


Nuevo Testamento en
mixteco



New Testament in Mixtec, Atatláhuca (MX:mib:Mixtec,
Atatláhuca)

Nuevo Testamento en mixteco New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

9665e546-39d0-5bd5-8b10-38916a94951f

Contents

SAN MATEO . . .	1
SAN MARCOS . . .	72
SAN LUCAS . . .	115
SAN JUAN . . .	189
HECHOS	243
ROMANOS	314
1 CORINTIOS . . .	344
2 CORINTIOS . . .	372
GÁLATAS	391
EFESIOS	402
FILIPENSES . . .	412
COLOSENSES . . .	419
1 TESALONICENSES	426
2 TESALONICENSES	432
1 TIMOTEO	436
2 TIMOTEO	444
TITO	450
FILEMÓN	454
HEBREOS	456
SANTIAGO	477
1 PEDRO	485
2 PEDRO	493
1 JUAN	498
2 JUAN	506
3 JUAN	507
JUDAS	509
APOCALIPSIS . . .	512

JNUHUN VAHA NI TEE SAN MATEO

*Lista ñayuu yucūn jeē ní
quiiji Jesucristo*

(Lc. 3.23-38)

¹ Yāha cúu lista ñayuu yucūn jeē ní quiiji Jesucristo. Te máá yá ni quiiji nuū yucūn rey David, te David ni quiiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón

ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyūcú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu yī María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

Jeē ní cacu Jesucristo

(Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo. ¹⁹ Te José, tēe quijnáhan ña jíin, chí tēe ndaā cúu de. Te tu ní cúní de cuāha de jñuhun canu ña, chí sa cúní de jeē na jécuiñī sāhi jée ma quijnáhan de jíin ña. ²⁰ Te níní súcuan nácani ni de, te jíin jéni

ni quee-ni ñn ndajéhé maá Jítoho yō Yaā Dios nuū de, te ni cahān yā jín de:

José, sēhe yucūn David, ma yūhu ró cueca ró ñasihí ró María, chi sēhe jeē scácu ña, vēji i nde nuū maá Espíritu Santo. ²¹ Te scácu ña ñn sēhe yí. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tǎcá jniñu yáha, návāha squícu jñuhun Jítoho yō Yaā Dios jeē ni cáhān tēe ni nacani jñuhun ya nde jenahán. Te suhva ni cahān de:

²³ Coó ñn sūchi síhí, te nihīn sēhe i,

te scácu i ñn sēhe yí,

te conaní sūchí un Emanuel. Achí tutu. Te síhví yáha cúní cahān: Yaā Dios ndeé yá jín yó.

²⁴ Te ni natahū ni José, te ni sáha de nájñuhun ni cahān ndajéhé Jítoho yō jín de. Te ni jeca de María ni cuu ña ñasihí de. ²⁵ Te tu ní quíxí de jín ña, chi nde ni scácu ña sēhe yí núú ña. Te ni snaní de i Jesús.

Jeē ní quijicoo tēe mago nuū yā

2

¹ Te ná ni cacu Jesús ini ñuu Belén ndañū Judea, te tiempo un ndácu rey Herodes jniñu. Yūcuán na te jecu tēe ndíchí jēe cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. ² Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núu cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñuhún ná i, áchí de.

³ Te rey Herodes, ná ni jini de jñuhun yáha, te ni cunéé ni de, nde jín táca ñayuu ñuu Jerusalén. ⁴ Te ni nastútú de tǎca sūtú cácujeñnu jín tēe cástéén tutu ley Yaā Dios nuū ñayuu. Te ni cajñuhún de tēe un ndé nuū cacu Cristo achí tutu. ⁵ Te ni cacachí nuū de:

Ini ñuu Belén ndañū Judea. Chi suhva cáhān nuū tútu ni tee tēe ni nacani jñuhun ya nde jenahán:

⁶ Te rǎhó ñayuu ñuu Belén ndañū Judá,

cújeñnu ga ñuu rǎ vēsú tǎca gá jeē cujeñnu ini Judá.

Chi suu ini ñuu rǎ quenda ñn Yaā ndacu jniñu,

te coto ya ñayuu maá rí Israel, achí Yaā Dios.

Achí tutu.

⁷ Yūcuán na te Herodes ni cana sáhi de tǎca tēe ndíchí un jēe naní mago. Te ni cajñuhun yúcún de ndé quíví ní cane quími ún. ⁸ Te ni tají de tēe un quíngoo de ñuu Belén. Te ni cahān de:

Cuángoo ní te cajñuhun yúcún ní ndé nuū íne sūchi lúlí un. Te núu ni nanihīn ní i, te quijicoo ní castūhun ní nuū ná, návāha suni máá ná quichiñuhún ná i, áchí rey.

⁹ Te jeē ní cajini de jñuhun ni cahān rey, te cuangoo de. Te máá quími cáhnu jeē ní cajito de ichi núu cáne niāndii, yósnúu núu de cuahān nde ni jinū nuū íne sūchi lúlí un, te

yūcuan ní jecuiñī. ¹⁰ Te ná ni cajito de jeē ní jecuiñī quīmi ún, te yōhyo ni cacusī ni de. ¹¹ Te ni jinūcoo de ni quīvicoo de ini vehe, te ni cajito de nuū súchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin súje cútú jíin súje uvuā nuū i. ¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te inga ichi cuanuhun de ñuu de.

Jeē ní jinu José cuango de nación Egipto

¹³ Te náa cuánuhun tāca téé mago, te ni scóto jēni José jeē in ndajéhé maá Jítoho yō Yaā Dios ni cahān yā jíin de:

Ndocuiñī te cunu ró quíngoo ró jíin súchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴ Te ni natahū ni José. Te cuango de jíin súchi lúlí jíin náná i, te ñuu ní cajica de cuango de nación Egipto. ¹⁵ Te ni coyūcú de yūcuan ndé ni jihī Herodes. Te súcuan ni cuu návaha squícu jnūhun Jítoho yō Yaā Dios jeē ni cáhān téé ni nacani jnūhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

Jeē ní ndacu Herodes jniñu jeē na cúu tāca súchi yí lúlí

¹⁶ Yūcuán na te Herodes ni jini de jeē súcuan ni castáhú

tée mago un de, te yōhyo ni quití ni de. Te ni tají de soldado cuango, te ni cajehni tāca súchi yí lúlí jéē uú cuiyā jíin jéē yiquín gá jeē cáyūcú ini ñuu Belén jíin tāca ñuu yajni. Chi je ni cajnūhun yúcún de tāca téé mago un nasaa tiempo ni cuu jeē ní cacu Jesús. ¹⁷ Te súcuan ni squícu jnūhun ni cahān Jeremías, téé ni nacani jnūhun Yaā Dios nde jenahán, chi ni cahān de:

¹⁸ Ini región Ramá ni jini sōho rí jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña,

te tu cácuni ña ndusī ni ña, chi ni cajihī i.

Achí tutu.

¹⁹ Yūcuán na te ni jihī Herodes. Te ni scóto jēni José jeē in ndajéhé Jítoho yō Yaā Dios ni cahān yā jíin de nuū ndeé de nación Egipto. ²⁰ Te ni cahān yā jíin de:

Ndocuiñī te nuhun rō ñuu rō Israel jíin súchi lúlí jíin náná i. Chi je ni cajihī téé cánducú cahni sūchi lúlí jíin nuú. Achí ndajéhé.

²¹ Yūcuán na te ni ndocuiñī de, te cuanuhun de nación Israel jíin súchi lúlí jíin náná i.

²² Te ni nihīn de jnūhun jeē Arquelao ni nucuñī de nuū tatá de Herodes, te máa de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuango de. ²³ Te ni jinū de yūcuán, te ni coyūcú de ñuu

naní Nazaret. Súcuan ni cuu návaha squícu jnūhun ni cacahān tēe ni canacani jnūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

*Jnūhun Juan tēe scuándute
(Mr. 1.1-8; Lc. 3.1-9, 15-17;
Jn. 1.19-28)*

3

1 Te ni yāha tiempo, te ni jinū Juan tēe scuándute nde nuū ñūhun téhé ndañūū Judea, nácani de jnūhun suhva:

2 Nacani ni rō jijnáhan rō jēe stóo rō cuéchi rō, chi je ni cuyajni Yaā ndeé andiví jēe ndacu ya jniñu nuū rō. Achí de.

3 Te Isaías, tēe ni nacani jnūhun Yaā Dios nde jenahán, suhva ni tee de jnūhun Juan nuū tútu:

Coo ñn tēe cana jee nde nuū ñūhun téhé:
Sátūhva rō máá rō jijnáhan rō,
chi quee maá Jítoho yō.
Te sáha rō jniñu ndaā, chi vēji ya, achi de.

Achí Isaías.

4 Te sahma ñūhun Juan cúu ixi quití naní camello, te núhni ñn cinturón ññ chīji de. Te jeē técu de cúu tíca ndicuéhyí jíin ndúxi yocō. 5 Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de. 6 Te ni canacani ndaā i cuéchi i nuū Yaā Dios, te ni scuándute de i ini yúte Jordán.

7 Te ná ni jito de jeē véjicoo cuehē tēe grupo fariseo jíin tēe grupo saduceo nuū

scuándute de, te ni cahān de jíin:

Va sēhe coō cácuu rō, chi xeēn rō nájñūhun coō. ¿A cájeni ni rō jeē cuu cunu rō cācu rō núū castigo xeēn jeē quíji? 8 Núu súcuan te sáha rō jniñu váha, te súcuan stéén rō jeē ní canacani ndije ni rō jeē stóo rō cuéchi rō. 9 Te ma cáni ni rō cahān rō jeē cuu cācu rō síquī jeē cácuu rō yúcūn Abraham. Chi cáhán rī jíin rō jeē cuu sáha Yaā Dios jeē táca yūū yáha nduu sēhe Abraham jeē candíje váha, te núu cúní yā. 10 Te cácuu rō nájñūhun nundehé jeē tu jéhe ndehē váha. Te vijna je iyó túhva Yaā Dios jeē cuáha ya castigo xeēn, nájñūhun je iyó túhva ñn cāa jeē cahnde nde yoho yujnu. Núu súcuan te sáha ya jíin rō nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. 11 Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo rō cuéchi rō. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhún. Te Yaā quiji chi cújéhnu ndasí yá. Chi tú na vé jéhnu cuiti cúu ri nuū yā, ni jeē cuajniñu ri nuū yā vēsú ñn jniñu lúli gá nájñūhun jeē quénehen ri ndijēn yā. 12 Te sáha ya nájñūhun sáha tēe scánda trigo, chi sásún ya ñayuu váha jíin ñáyuu cunéé, nájñūhun cúndoo trigo jeē quénda sún

paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuíti. Achí Juan.

*Jeē ní jendute Jesús
(Mr. 1.9-11; Lc. 3.21-22)*

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya.

¹⁴ Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sãñá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájnūhun ñin paloma, te ni quee xinī yā. ¹⁷ Te ichi ándiví ni cahān ñin jñūhun:

Yāha cúu Sēhe ri jeē maní ndasí rí jíin, te yōhyo cúsiñ ni rí jíin, áchí.

*Jeē ní jito ndee jexeén Jesús
(Mr. 1.12-13; Lc. 4.1-13)*

4

¹ Yūcuán na te ni jinū Jesús nde nuū ñūhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

² Te ni íyo ndite ni yā uū xico nduú uū xico ñuu, sáá te jíí yā sōco. ³ Te ni quee máá jexeén jeē cóto ndee un yá, te ni cahān jíin yá:

Núu máá ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu íi: Nasūu máni máá jíin stáa cátecu ñayuu, chi suni jíin táca jñūhun cáhán Yaā Dios, achí yá.

⁵ Yūcuán na te cuahān jexeén un jíin yá nde ñuu íi Jerusalén. Te ni jeni ya xinī torre templo. ⁶ Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñūhun, chi jnama ya rohó. Chi yósó núu tútu:

Tejníñu ya ndajéhé yā quiji-coo coto rōhó.

Te cunundee yā rohó jíináhan ya,

návāha ma cáchihi ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jítoho í Yaā Dios, núu jnama ya í chí tuú, áchí yá.

⁸ Te jexeén un ní jeca tucu ya cuahān jíin yá nde xinī ñin yucu súcún ndasí. Te ni steén táca nación ní cáhnu ñayīvi núu yā, te yōhyo luu cáa ndihi.

⁹ Te ni cahān jíin yá:

Tācá ñuu yáha cuáha ri nuū rō, te núu cuiñi yítí ró chiñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chiñúhún ñayuu máá Jítoho í

Yaā Dios, te nuū maá-ni ya cuajniñu i. Achí yá.

11 Yūcuán na te ni cujiyo-ni jexeén un cuáhān. Te ni que-coo ndajéhé Yaā Dios ni cajejniñu nuū yā.

Jeē ní quejéé Jesús nácani ya jñūhun región Galilea

(Mr. 1.14-15; Lc. 4.14-15)

12 Te ná ni nihīn Jesús jñūhun jeē íne Juan vecāa, te cuanuhun yā región Galilea.

13 Te tu ní cóndee yā ñuu Nazaret, chí ni jehēn yā ni condee yā ñuu Capernaum. Te ñuu un íne yumar, máa región Zabulón jíin Neftalí.

14 Te súcuan ni squícu jñūhun ni tee Isaías, tēe ni nacani jñūhun Yaā Dios nde jenahán:

15 Región Zabulón jíin Neftalí, ichi jeē yáhi yumar, lado yūte Jordán nuū cáne niāndii,

jíin región Galilea nuū cáyūcú ñayuu tācá nación tu jíin jñūhun ya.

16 Ñayuu ún chí nájnūhun cáyūcú i nuū néē, te coto i nájnūhun ñin luz cáhnu.

Te ñayuu je yajni naa, nihīn i jñūhun váha ndasí,

suu jñūhun jeē jnama ya anuá i.

Achí Isaías.

17 Te nde quiṽí yúcuán ní quejéé Jesús nácani ya jñūhun, te ni cahān yā suhva:

Nacani ni rō jijnáhan ró jéē stóo ró cuéchi ró, chí je ni cuyajni Yaā ndeé andiví jéē ndacu ya jniñu nuū rō, achí yá.

Jeē ní cana ya cuūn tēe jñú chācá

(Mr. 1.16-20; Lc. 5.1-11)

18 Te jica Jesús yumar Galilea cuahān yā. Te ni jito ya nuū uú jnáhan ñani. Te ñin de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar. 19 Te ni cahān yā jíin de:

Condiquīn ruhū na quíhín yō, te nasáha ri rohó tēe nihīn cuehē ñayuu candije ruhū, nájnūhun cánihīn rō chācá, achí yá.

20 Yūcuán na te ni castóo-ni de ñunu de, te ni candiquīn de ya.

21 Te ni jica ya jecu gā, te ni jito ya nuū inga uú jnáhan ñani. Te cácuu de Jacobo jíin Juan, sēhe Zebedeo. Te cáyūcú de ini barco jíin tátá de Zebedeo, cánachijnñi de ñunu de. Te suni ni cana ya de jeē cóndiquīn de ya. 22 Te ni castóo-ni de tátá de jíin barco, te ni candiquīn de ya cuango de.

Jeē ni steén yā nuū cuehē ñayuu

(Lc. 6.17-19)

23 Te ni jica cuu Jesús ní región Galilea, ni steén yā jñūhun ini tācá vehe ñi jeē cúu sinagoga. Te ni nacani ya jñūhun vāha ndese ndácu Yaā Dios jniñu. Te ni nasávāha ya ñayuu cácuñu tācá-ni cuehyí.

24 Te ni jitē núu jñūhun ya cuahān ní región Siria. Te nuū yā ni caquindeca i tāca ñayuu cácuñu, ñayuu cándoho tijni nuū cuehyí, jíin jéē jetú, jíin jéē ñūhun tachí ini, jíin jéē

jihí yíhí, jíin jéē ni íjin. Te ni nasávāha ya i jíjnáhan i. ²⁵ Te cuehē ñayuu región Galilea jíin Decápolis, jíin ñayuu ñuu Jerusalén jíin región Judea, jíin táca ñuu ichi núū cáne niāndii yūte Jordán, ni cacondiquin i ya.

Jeē ní nacani ya jnūhun nde nuū yúcu

5

¹ Te ni jito Jesús nuū ñayuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā táca jnūhun yáha nuū de:

*Jnūhun yōhyo ndetū
(Lc. 6.20-23)*

³ Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chi je ni quívicoo i ndaha Yaā andiví jéē ndácu ya jniñu nuū i.

⁴ Yōhyo ndetū ñayuu cácuuíhyá ni, chi ndusñ ni i sáha Yaā Dios.

⁵ Yōhyo ndetū ñayuu cáhīyo vītá suchí ini, chi ni jejnūhun ya jeē cutahū i ñayīví.

⁶ Yōhyo ndetū ñayuu jeē nájnūhun jeē cájīi i sōco cájichī i, súcuan jnāā i sáha i jniñu ndaā, chi máá yá chindéé ñáhán yá i jeē cuu sáha i.

⁷ Yōhyo ndetū ñayuu cákundáhú ni jnáhan, chi suni cundáhú ni Yaā Dios i.

⁸ Yōhyo ndetū ñayuu cáhīyo ndoo ini anuá, chi coto i nuū Yaā Dios.

⁹ Yōhyo ndetū ñayuu cánasámanī jnáhan, chi cahān Yaā Dios jeē sēhe ya cácuu i.

¹⁰ Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chi je ni quívicoo i ndaha Yaā andiví jéē ndácu ya jniñu nuū i.

¹¹ Yōhyo ndetū maá ró jijnáhan ró núu cácahān neé i nuū rō jeē síquī ruhū, te coto xeēn i rōhó, te stáú yáhu i rōhó, vēsú tú cuéchi ró. ¹² Na cúsh ni rō jijnáhan ró núu súcuan, te sa víhyá gā cusñ ni rō, chi cáhnu ndasí coo tahū rō nde andiví. Chi suni súcuan ni cajito xeēn i táca téé ni canacani jnūhun Yaā Dios jeē ní quijicoo xīhna gā vēsú rohó.

Jnūhun yátá síquī ññ jín síquī luz

(Mr. 9.50; Lc. 14.34-35)

¹³ Máá ró jijnáhan ró cájejniñu ró ini ñayīví nájnūhun jéjníñu ññ nuū cúñu návāha tú tehyū. Te núu ññ ún na náā jeē uhvuá, ¿te ndese nduu uhvuá tucu? Tuá cuajniñu cuiti gā, chi sa cate ñayuu te cueñū i síquī.

¹⁴ Máá ró cácuu nájnūhun luz jeē steén ini anuá ñayuu ñayīví. Te cácuu ró nájnūhun ññ ñuu íne xinī yúcu, jeē ma cúu quisáhi. ¹⁵ Te ni tu nástín ñayuu ññ lámpara te chune i chíji cajón, chi sa suhva jéni i nuū súcún, návāha cundijin nuū táca jéē cáyúcú ini vehe. ¹⁶ Te suni súcuan na steén rō luz maá ró nuū táca ñayuu, te suu cúu jeē cúni i jniñu váha casáha ró, te cahān i jeē yóhyo

vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

17 'Ma cáni ni rō jijnáhan rō jeē véji ri snáa rī ley jeē ni jéhe Yaā Dios nuū Moisés, jín jéē snáa rī tāca jnúhun ni cacahān tēe ni canacani jnúhun ya jenhán. Tú véji ri jeē snáa rī, chi sa suhva jeē steén cají rī jnúhun ndíso. 18 Chi jendaá cahán rī jín rō jeē núu níni íyó andiví jín ñáyiví, te ma náa cuíti ni ñin punto ni ñin letra nuū tútu ley yā, chi nde na squícu tāca ndihí jnúhun jeē cahán. 19 Núu súcuan te núu ñin ñayuu tu squícu i ñin jnúhun yáha jéē ndácu ley yā, vésú ñin jnúhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñu. Te núu ñin ñayuu squícu i te stéén i jeē squícu ñayuu, yūcuán na te cujéhnu i ichi andiví nuū ndácu Yaā Dios jniñu. 20 Chi cáhán rī jín rō jeē núu tú coo ndaā gā jniñu cásáha rō vésú jniñu cásáha tēe cástéén tutu ley yā jín tēe grupo fariseo, te ma quívicoo cuíti rō ndaha Yaā andiví jéē ndacu ya jniñu nuū rō.

Jeē ni stéén yā jeē ma quití ni yō

(Lc. 12.57-59)

21 'Je ni cajini rō jnúhun ni cacahān jín ñáyuu jenahán, jeē ma cáhni i ndíyí, te na-ni ñayuu núu cahni i ndíyí, te cundaā cuéchi i nuū tāca tóhō, achí. 22 Te ruhū chi cáhán rī

jín rō, vésú núu máa jéē quití ni ñin ñayuu jito i jnáhan i, suni cundaā siquī cuéchi i ún. Te núu ñin ñayuu cahán neé i nuū jnáhan i, núu súcuan te cundaā cuéchi i un núu justicia cujéhnu ga. Te núu ñin ñayuu cahán i nuū jnáhan i: Róhó jéē canéé íi, achí i, núu súcuan te quívi i nuū ñuhún infierno te núu ma nácani ni i.

23 'Jeē yúcuán te núu ni jinū rō nuū altar jín jéē socó rō nuū Yaā Dios, te núu ni nucūhun ni rō jeē ni sáha rō cuéchi siquī jnáhan rō, 24 núu súcuan te squéndōo rō jéē socó rō ún xiin altar, te xīhna gā quihín rō ndumaní rō jín jnáhan rō. Yūcuán na te nandicó rō socó rō.

25 'Te núu ñin ñayuu quihín i jín rō nuū tohó jeē cacān i cuéchi siquī rō, núu súcuan te níni cuáhán rō jín i ichi te sándaā maá rō jín i, návaha ma squívi i róhó núu juez. Chi juez siáha de róhó núu policía, te chune de róhó vecāa. 26 Te jendaá cahán rī jín rō jeē ma quénda cuíti rō yūcuán, chi nde chunaa rō ndihí cuíti xūhun jéē cájicān de.

Jeē ni stéén yā jeē ma cósiquí ndéē jnáhan

27 'Ni cajini rō jnúhun ni cacahān jenahán jeē ma cósiquí ndéē jnáhan ñayuu. 28 Te ruhū chi cáhán rī jín rō jeē núu ñin tēe ndéhe de nuū ñin ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

29 'Núu súcuan te núu tinūy lado váha rō sáha jeē quívi rō cuéchi, vāha ga quenehen rō

te scáne ró, návāha tuá sáha ró cuéchi. Chi vāha gā jeē nāā ñn tinūu ró vēsú jeē cóo ndihí yiqui cúñu rō te quihīn rō infierno. ³⁰ Te núu ndaha váha ró sáha jeē quívī ró cuéchi, vāha ga cahnde rō te scáne ró, návāha tuá sáha ró cuéchi. Chi vāha ga jeē nāā ñn ndaha ró vēsú jeē cóo ndihí yiqui cúñu rō te quihīn rō infierno.

Jeē ni stéén yā jeē ma ndusñn jnāhan

(Mt. 19.9; Mr. 10.11-12; Lc. 16.18)

³¹ Te suni ni cacahān nde jenahán: Núu ndé ñn cúní stóo ñasihí, te na cuáha acta nuū ña jeē ndusñn jín ña. ³² Te ruhū chi sa cáhān rī jín ró jeē núu ñn tēe stóo de ñasihí de, te núu nasūu jēē tǐjni ni ña, núu súcuan te sáha de jeē casíquí ndēē ña de, chi condee ña jín inga tēe. Te núu ñn tēe condeca de ñahan ní ndusñn, suni casíquí ndēē de ña.

Jeē ni stéén yā siquī jnūhun jéjnūhun téyí

³³ Te suni ni cajini ró jnūhun jeē ni cáhān jín ñayuu nde jenahán: Núu ni jéjnūhun téyí ró jeē squícu ró, jító jínúu Yaā Dios, núu súcuan te cánuú squícu ró jēē ni cáhān teyí ró un, áchí. ³⁴ Te ruhū chi cáhān rī jín ró jijnáhan ró jeē ní ñn siquī jnīñu ma cahán teyí ró nde jín síhvī Yaā Dios, ni ma cahán teyí ró jeē jító jínúu yā. Te núu jéjnūhun téyí ró te tú vāha jeē ndácunehen ró andiví ni ñayiví. Chi andiví cúu nuū ín mesa nuū ndácu Yaā Dios jniñu. ³⁵ Te ñayiví cúu nájnūhun teyū nuū ín

jehē yā. Te ni ma ndácunehen ró ñuu Jerusalén, chi suu cúu ñuu maá Yāā cúu Rey cujéñnu. ³⁶ Ni ma cahán rō jeē na cóndee cuēchi siquī rō núu tu squícu ró. Ma cahán rō súcuan, chi ma cúu cuiti sáha ró jēē ni ñn ixí xíní rō nducujín chí ndujnúu. ³⁷ Chi suhva-ni cahán rō: Cuu, achi rō. Tuú, achi rō. Chi núu chisóó gá rō jnūhun cahán rō, te nuū jexeén vēji.

Jeē ni stéén yā jeē ma cuáha yó jēē ndútahū ñayuu

(Lc. 6.29-30)

³⁸ Ni cajini ró jnūhun jeē ni cáhān jín ñayuu jenahán: Núu ñn tēe ndahva de tinūu jnāhan de, suni súcuan na ndáhva tinúú de. Te núu ñn tēe stáva de jnūhun jnāhan de, suni súcuan na stáva jnūhun de, áchí. ³⁹ Te ruhū chi sa cáhān rī jín ró: Ma nácuāha ró jēē ndútahū tēe sáha ndevāha jín ró. Chi sa núu ndé tēe cani de yiqui núu lado váha ró, te vāha ga suni cuāha ró inga lado cani de, vēsú jeē nácuāha ró jēē ndútahū de. ⁴⁰ Te núu ndé tēe stáú yáhu de rōhó te quēnde de camisa rō, suni cuāha ró jnūhun jeē na quihín de jín ndé ticāchi ró. ⁴¹ Te núu ndé tēe scāca de rōhó jēē condiso ró ndajníñu de ñn kilómetro, te caca ró úu kilómetro jín de. ⁴² Te na-ni ñayuu núu jícán i ndajníñu ró, te cuāha ró núu i. Te ñayuu jícán núu ndajníñu nuū rō, ma sasáhán ró cuāha ró núu i.

Jnūhun jeē cundáhú ni yō ñayuu cájito uhū yohó

(Lc. 6.27-28, 32-36)

43 "Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhiyo manī jín ró, te coto uhū rō ñayuu cájito uhū rohó, áchí. 44 Te ruhū chi sa cáhān rī jín ró: Cundáhú ni rō ñayuu cájito uhū rohó. Te cacān rō jeē váha coo ñayuu cácahān ndevāha siquī rō. Te sáha váha ró jín ñayuu cáquitī ni nuū rō. Te cacān tahú rō jehē ñayuu cácahān neē nuū rō te cájito xeēn i rōhó. 45 Te súcuan stéén rō jeē cácuu ró séhe máá Tátá rō, Yaā ndeé andiví, chi máá yá jéhe niāndii cundijin nuū ñayuu cunéé jín ñayuu váha. Te jéhe ya saū nuū ñayuu casáha jniñu ndaā jín nuū ñayuu casáha jniñu neé. 46 Chi núu iyó manī rō jín máá-ni ñayuu jeē manī jín ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de. 47 Te núu manijnáhan ró cáhān yíñuhún ró jín, ¿te na vé jeē váha ga sáha ró núu súcuan? Chi nde ñayuu tu cácañdije Yaā Dios, suni súcuan casáha i. 48 Núu súcuan te ndaā na cóo ndihī jeē sáha ró, nájnūhun iyó ndáā ndihī jeē sáha Tátá rō, Yaā ndeé andiví.

Jeē ni stéén yā ndese sáha yó jniñu váha

6

1 "Te jeē sáha ró táca jniñu váha nuū Yaā Dios, coto ró jéē ma sáha ró máá siquī jeē cúni ñayuu te cuajnúhún i rōhó. Chi núu súcuan sáha ró, te tú na tahū rō cuāha máá Tátá rō, Yaā ndeé andiví. 2 Jeē yúcuan

te jeē sáha ró caridad, te ma sáha ró jéē cúni táca ñayuu, nájnūhun casáha tēe stáhú-ni, cáhiin de nuū cúchitú ñayuu ini táca vehe īi sinagoga jín nuū yáhu. Chi súcuan casáha de návāha cuajnúhún ñayuu de jeē váha casáha de. Jendaá cahán rī jín ró jeē tahū de cúu jeē jejnúhún ñayuu de. 3 Te rōhó jijnáhan ró, núu casáha ró caridad, te sáha yuhu rō, návāha nde amigo váha ró tú cuni jeē sáha ró. 4 Súcuan na sáha yuhu rō caridad. Te máá Tátá rō jeē jító ya jeē sáha yuhu rō, īin quivī te cuāha ya tahū cuu ró.

Jeē ni stéén yā ndese cacān tahú yō

(Lc. 11.2-4)

5 "Te jeē cájicān tahú rō, te ma sáha ró nájnūhun casáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini táca vehe īi sinagoga jín táca yíqui yáhu, návāha cuni ñayuu te cuajnúhún i de. Jendaá cahán rī jín ró jeē máá yúcuan-ni cúu tahū jeē nihīn de, suu jeē jejnúhún ñayuu de. 6 Te rōhó jijnáhan ró, núu cájicān tahú rō, te ndiví ró ini vehe ró te casi rō yehyí. Te cacān tahú rō nuū máá Tátá rō, Yaā ndeé yuhu jín ró. Yūcuán na te máá Tátá rō jeē jító ya jeē súcuan sáha yuhu rō, sáha ya jeē jicān rō.

7 "Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájnūhun casáha ñayuu tu cájini jnúhun Yaā Dios. Chi cájeni ni i

jeē núu cuehē jnūhun súcuan cahān i, te sáa te cuni sōho ya, te tuú. ⁸ Núu súcuan te ma sáha ró nájñūhun cásáha máá i. Chi máá Tátá rō, je jíni yā na vé cájini ñúhún ró nde ná tu cacān rō nuū yā. ⁹ Núu súcuan te suhva cacān tahú rō:

Tátá maá ná jijnáhan ná jéē ndeé ní andiví,
níní na cóo yíñúhún ná nuū ní,
chi Yaā iī cúu ní.

¹⁰ Te ñúhún ni na jéē yachí quiji quiiví ndacu ní jniñu ní ñáyiví yáha.

Te na cóo tǎcá jniñu nújnahan ni ní,
nájñūhun íyó ini andiví,
súcuan na cóo ini ñayiví.

¹¹ Staā jeē cátecu na táca quiiví, cuāha ní núu ná vijna.

¹² Te cone cahnu ni ni núu táca cuéchi cásáha ná núu ní,

nájñūhun cáhine cáhnu ni na núu ñayuu casáha cuéchi nuū ná.

¹³ Te ma cuáha ni jnúhun jeē coto ndee jexeén saña, chi sa suhva jnama ní saña núu táca jéē neé.

Chi máá ní cúu Yaā ndácu jniñu, te jni ní poder,
te yōhyo luu cújéhnu ní ní cáni. Súcuan na cóo.
Amén.

Achi rō jijnáhan rō.

¹⁴ Chi núu cone cáhnu ni rō nuū ñayuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró. ¹⁵ Te núu ma cóne cáhnu ni rō nuū ñayuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jijnáhan rō.

Jeē ni stéén yā siquī jnúhun condite ni

¹⁶ Te núu condite ni rō jeē chiñúhún ró Yaā Dios, te ma sáha ró nájñūhun cásáha tēe stáhú-ni. Chi cásáha de jeē coto xií de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de.

¹⁷ Te máá ró jijnáhan ró, núu íyó ndite ni rō, te sa chuhun vāha ró xíní rō te nandahá núu rō, ¹⁸ návāha ma cúní ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te in quiiví te cuāha ya tahū cuu ró.

Ndese coo cúcá yó nde andiví

(Lc. 12.33-34)

¹⁹ Ma cóndihvī ni rō caya rō ndajniñu cúcá ini ñayiví yáha, chi quiiví tiquíxin, te cáne xehyu, te tívi. Te suni quiivícoo ñacuñhá te sácuñhá. ²⁰ Chi sa suhva sáha ró táca jniñu váha návāha cayā tahū rō nde andiví. Chi yúcuan má quiiví tiquíxin ni ma cáne xehyu jeē tívi. Ni ma cúu quiiví ñacuñhá sácuñhá. ²¹ Chi nde nuū nihín rō tahū váha ró, yúcuan cúu nuū cóndihvī ni rō siquī.

Tinūu cúu lámpara yiqui cúñu

(Lc. 11.34-36)

²² Tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cúndijin. ²³ Te núu tinūu ró tu íyó ndijin, te ní-ni yiqui cúñu rō iyó nee. Te suni súcuan cúu

ánuá rō, chi núu máni jeē jéni neé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquī xúhun

(Lc. 16.13)

²⁴ Ni iin mozo ma cúu cua-jníñu de nuū uū patrón. Chi quitī ni de nuū iin te coo manī de jíin inga, chí squícu vāha de nuū iin te sájéé ni de nuū inga. Te suni súcuan ma cúu cuajníñu ró núu Yaā Dios te núu máni siquī xúhun ndíhvī ni rō.

Yaā Dios ndíto ya yohó

(Lc. 12.22-31)

²⁵ Núu súcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéé cuhun ró. ²⁶ Condēhe ró ndese cátecu saa, chi tu cátaji ti, ni tu cánastútú tí jeē chívāha ti, ni tú yacā tī. Te vēsú súcuan te máá Tátá rō andiví scáji yā tī. Te cánuú ndasí gá rō jijnáhan ró vēsú tācá saa ún. ²⁷ ¿Te ndé iin ró, á cuu scuéhnu ró máá ró sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jéé ita tāca yúcū. Chi tu sájniñu, ni tu táú. ²⁹ Te cáhán rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún. ³⁰ Te núu súcuan jéhe Yaā Dios

sahma lúu ita un jéé jéé vijna te sajnē cayū nuū ñuhún, te nagā ni cuu róhó jíjnáhan ró jéé ma sáha ya jeē nihín rō sahma. ¿Te naun tu cácandíje nīhin ró jéé ndíto ya rohó?

³¹ Núu súcuan te ma nácani ndasí ni rō siquī jeē caji rō, jeē coho ró, jeē cuhun ró.

³² Chi tāca ñáyuu ñayiví jéé tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi iyó Tátá rō andiví, te jíni yā jeē caji ni ñuhún ró tāca jéé yáha. ³³ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jíin síquī jeē sáha ró jniñu ndaā jeē nújnahan ni yā. Yūcuán na te sáha ya jeē nihín rō tāca jéé yáha. ³⁴ Núu súcuan te ma nácani ni rō siquī jeē cóo sajnē, chi vijna cúu vijna te sajnē cúu sajnē. Chi cani ni rō siquī jnúndóho jeé iyó ná iin ná iin-ni quiví.

Jeē ma cahán yō siquī cuéchi jnáhan yó

(Lc. 6.37-38, 41-42)

7

¹ Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá ró jeē casáha ró súcuan.

² Chi nájnūhun cácahān rō siquī cuéchi ñayuu, suni súcuan cahán yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. ³ Chi cuéchi jnáhan ró cúu nájnūhun jeé íne iin yāca lúli tinúú i. ¿Te naun casáha ró cuenta jeē súcuan, te tu casáha ró cuenta cuéchi máá ró jeé cúu nájnūhun jeé

íne ñn nduhu tinūu máá ró? ⁴ ¿Te naun cácahān rō jín jnáhan rō: Na táva rī yāca íne tinūu ró, te tu cánacani ni rō jeē íne ñn nduhu tinūu máá ró? ⁵ Tēe stáhú-ni cácuu rō núu súcuan. Xihna gā tinūu máá ró tava rō nduhu, te yūcuán na te cuu condēhe váha rō jēe táva rō yāca tinūu jnáhan rō.

⁶ Ma sáha fuerza rō ñayuu cunéé quívicoo i nuū jnúhun ñi yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani rō jnúhun ya nuū ñayuu jeē tu cúní cuiṭi cuajnúhún. Chi cándāa i nájnūhun quini jeē jeñú tí siquī perla jeē ndeé yahu ga.

Cacān yō nuū yā te nihīn yō
(Lc. 11.9-13; 6.31)

⁷ Cacān rō nuū Yaā Dios, te cuāha ya nuū rō. Te nducú ró tāca jēe váha íyó núu yā, te nihīn rō sáha ya. Te cacān tahú rō nde nihīn rō, nájnūhun sáha ñayuu cahán yehyí ndé nune quíví i. ⁸ Chi tāca ñayuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

⁹ ¿Te ndé ñn róhó núu sēhe ró jicán i staā nuū rō, te á cuáha ró ñn yuū nuū i? ¹⁰ ¿Te núu jicán i ñn chācá, te á cuáha ró ñn coō nuū i? Tú cuiṭi súcuan. ¹¹ Núu súcuan te máá ró jijnáhan rō, vēsú ñayuu íyó cuéchi cácuu ró, te cájini rō cuāha ró jēe váha nuū séhe ró. Te nagā ni cuu máá Tátá rō andiví jēe ma cuáha ya jeē váha nuū ñayuu jicán nuū yā.

¹² Te nájnūhun cúní rō jeē sáha váha ñayuu jín ró, suni súcuan na sáha váha ró jín i. Chi tutu ley Moisés súcuan ndácu jniñu, jín táca tutu tēe ni canacani jnūhun Yaā Dios.

Siquī jeē quíví yó yéhyí túū
(Lc. 13.24)

¹³ Condihvī ni rō quívicoo ró ndaha Yaā Dios. Chi cúu nájnūhun ñn yéhyí túū. Chi yéhyí jín ichi jeē cuahán nuū jnahnú ndetū ñayuu, jíté te cáhnu, te cuehē i quívicoo yūcuán. ¹⁴ Te yéhyí jín ichi jeē cuahán nuū nihín tahú i cotecu i, chi tuū yehyí te cuiñi ichi, te jecu-ni i cánihīn i.

Jín jniñu cásáha ñayuu te
nácuni yō ndese ñayuu cácuu i
(Lc. 6.43-44)

¹⁵ Te ma cándíje cuiṭi rō tēe stáhú jēe cácahān de jeē jnúhun Yaā Dios cánacani de. Chi nájnūhun lanchi, quiṭi tú xeēn, súcuan cásáha de vējicoo de nuū rō. Te ini anuá de chi cácuu de nájnūhun yihí, quiṭi xéén. ¹⁶ Jín jniñu cásáha de te nacuni rō de ndese tēe cácuu de. Chi cúu nájnūhun jeē tu scóyo ró ndehē uva xiní iñu, ni tu scóyo ró higo xiní iñu yóquin. ¹⁷ Te tācá yujnu váha chí jēhe ndehē váha, te yujnu néé chí cúun ndehē néé. ¹⁸ ñn yujnu váha ma cúun ndehē néé, te ni ñn yujnu néé ma cuáha ndehē váha. ¹⁹ Te tācá yujnu jeē tu jēhe ndehē váha, chí tahndē te cayū nuū ñuhún. ²⁰ Te suni súcuan cácuu tēe ún, chí jín jniñu cásáha de te nácuni rō ndese tēe cácuu de.

Nasūú ndihi ñayuu quīvicoo andiví

(Lc. 13.25-27)

²¹ 'Nasūú ndihi ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tátá rī andiví. ²² Te quiví jeē sándaā rī jniñu ñayuu, te cuehē i cahán jíin rí: Jitoho na jijnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuéhē jniñu jéhu jíin síhví ní jeē náā ni ñayuu sáha. Achi i. ²³ Yūcuán na te cahán rī jíin ñáyuu ún: Tu jíiní cuiti rī rohó. Cuiyo quingoo ró, chi ñayuu casáha jniñu néé cácuu ró, achi rī.

Siquí uú vehe

(Lc. 6.47-49; Mr. 1.22)

²⁴ 'Núu súcuan te tāca ñáyuu jeē cájini sōho jnúhun cáhán rī te squícu i, cácuu i nájnuhun ñn tēe ni nacani vāha ni, te ni jeni de vehe de siquí cáva. ²⁵ Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquí cáva ndéé. ²⁶ Te tāca ñáyuu jeē cájini sōho jnúhun cáhán rī te tu squícu i, cácuu i nájnuhun ñn tēe cánéé jeē ní jeni de vehe de nuū ñítí. ²⁷ Te ni cuun saū, te ni quiji ndute ñúhún cuéhē, te ni quee tachī xeén, te ni cachundahá vehe ún. Te ni cotúú-ni, te ni naa i-ni. Achí yá jíin i jijnáhan i.

²⁸ Te ná ni jíinu ni cahán Jesús tāca jnúhun yáha, te ñayuu cuehē un ní canaa ni

i ni cajini i jnúhun ni steén yā. ²⁹ Chi ni steén vāha ya nuū i, chi máá yá cúu jeē ndíso jniñu siquí ndihi. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñn tēe ndóho cuehyí stehyú

(Mr. 1.40-45; Lc. 5.12-16)

8

¹ Te ni nanuu Jesús yucu ún, te cuehē ñayuu cándiquín i ya. ² Te ñn tēe ndóho cuehyí stehyú, ni quee de nuū yā. Te ni jecuiñí yití de nuū yā, te ni cahán de jíin yá:

Jíiní na jéé cuu sáha ní jéé nduvāha ná, te núu cúní ni, achí de.

³ Te Jesús ni soó yá ndaha ya siquí de, te ni cahán yā:

Cúní rī. Te na ndúvāha ró, achí yá.

Te ná ni cahán yā súcuan, te ni nduvāha-ni tēe ndóho cuehyí stehyú un. ⁴ Yūcuán na te ni cahán Jesús jíin de:

Ma cáchi cuiti ró nuū ní ñn. Chi quisteén ró máá ró nuū sutú, te condahá ró jeē socó ró nuū Yaā Dios, nájnuhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

Jeē ní nasávāha ya mozo capitán

(Lc. 7.1-10)

⁵ Te ni quiví Jesús ñuu Capernaum. Te ñn tēe nación Roma jeē cúu capitán, ni quee de nuū yā, te ni cahán ndahú de jíin yá:

⁶ Mozo na catú i vehe ná, chi ni íjin i te ndóho xeén i, achí de.

⁷ Te ni cahān Jesús:

Quihīn rī nasávāha ri i núu súcuan, áchí yá.

⁸ Te ni cahān capitán jíin yá:

Tu cújéhnú ná jéē quihín ni quívi ní vehe ná. Chí máá jéē cahán-ni ní, te na ndúvāha-ni mozo na. ⁹ Chí máá ná suni ndíso jniñu ná ní casáha tēe cácujeñhu ga. Te cújéhnú ná núu táca soldado na. Te núu cáhán na jíin ñin de jeē na quihín de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ñin jniñu nuū mozo na, te sáha i. Achí de.

¹⁰ Te jeē ní jini Jesús jñūhun yáha, te ni naa ni yā. Te ni cahān yā jíin ñáyuu cándiquīn yā ún:

Jendaá cahán rī jíin ró jeē ni nación yō Israel tu ní níhín rī ni ñin ñáyuu cándíje níhin súcuan, nájnūhun cándíje tēe yáha, vésú tēe nación tu jíin jñūhun Yaā Dios cúu de. ¹¹ Te cáhán rī jíin ró jeē quíjicoo cuehē ñáyuu ichi núu cáne niāndii jíin ichi núu queé niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andíví. ¹² Te sava ñáyuu nación Israel jeē maá i quívicoo núu, te sa quenehen ya i quihīn i nuū néē, chí tu ní cáncandíje i. Te yūcuan ndáhyū i te nacayíhí yuhu i jeē ndoho xeēn i. Achí yá.

¹³ Yūcuán na te ni cahān yā jíin tēe cúu capitán:

Cuánuhun vehe ró, chí sáha ri nájnūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro

(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yíhi quíji ña. ¹⁵ Te ni jniñu ya ndaha ña, te ni quenda-ni quíji ún ña. Te ni ndocuiñi ña, te ni sáha ña jeē ní cayeji de jíin yá.

Jeē ní nasávāha ya cuehē ñáyuu

(Mr. 1.32-34; Lc. 4.40-41)

¹⁶ Te jeē ní cuaa ni quecoo ñáyuu jíin cuehē ñáyuu jeē ñūhun tachī ini i. Te ni quenehen ya tachī un cuángoo jíin jñūhun cáhán-ni ya. Te suni ni nasávāha ya táca ñáyuu cácuñu. ¹⁷ Te súcuan ni cuu návāha cundaā jñūhun ni cahān Isaías, tēe ni nacani jñūhun Yaā Dios jenahán: Máá yá ni tejiyo ndinuū cuehyī cándoho yó, áchí Isaías.

Siquī ñáyuu jeē cácuñi i condiquīn i ya

(Lc. 9.57-62)

¹⁸ Te ni jito Jesús jeē ní ndicó ndúu cuehē ñáyuu yā. Te ni cahān yā jíin tēe cáscuáha jíin yá jeē na yáha de jíin yá inga lado mar. ¹⁹ Te ñin tēe stéén tutu ley Yaā Dios, ni quee de nuū yā, te ni cahān de:

Maestro, condiquīn na níhín quihīn yō ndé-ni cúu-ni nuū quihín ni, áchí de.

²⁰ Te ni cahān Jesús jíin de:

Táca ñúcuui, iyó yáu cava cáñuhun ti. Te suni saa, iyó

tácā tī. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²² Te ni cahān Jesús jíin de:

Condiquīn ruhū na quíhín yō. Te stóo tāca ndíyi na chíndūji jnáhan ndíyi, chí ndíyi cácuu ñayuu tu cácandíje. Achí yá.

Jeē ní jecuiñī tachī níhin jíin mar ni sáha ya

(Mr. 4.35-41; Lc. 8.22-25)

²³ Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá. ²⁴ Te nuū mar ni jequíhi ñin tachī níhin, te ni stónnda ndute mar, ni quívi ini barco un. Te Jesús chí quíxí yā. ²⁵ Te tēe cáscuáha jíin yá ni castónnda de ya, te ni cacahān de:

Jnama ní yóhó, chí je quée yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cácandíje níhin ró jéē cácu ró sáha rī, achí yá.

Yūcuán na te ni ndocuiñī yā, te ni cahān yā nuū tachí níhin un jíin núū mar. Te ni cuu nayúú í-ni. ²⁷ Te ni canaa ni de jíjnáhan de, te ni cacahān de:

¿Ndé ñin ga cúu tēe yáha, jéē ndé tachī níhin jíin mar cájetáhú jéē cahān de? áchí de.

Tēe Gadara jeē cándoho tachī

(Mr. 5.1-20; Lc. 8.26-39)

²⁸ Te ni jinū yā inga lado mar, máá región ñayuu Gadara. Te uū tēe ni quendacoo de nde nuū yíndūji ndíyi, ni quijnahan de ya. Te cáñuhun tachī ini de, te siquī jeē yóhyo xeēn tachī ún, te ni ñin ñayuu tu cúu yáha i ichi yúcuan. ²⁹ Te ni cacana cóhó de ni casáha tachī:

¿Naun véji ní núū ná, Jesús Sēhe Yaā Dios? ¿A véji ní yáha jeē stóho ní sáña ndé ná tu quee maá quívi? áchí.

³⁰ Te nde jicá jecu cáhīin cuehē quíni cájitu tī. ³¹ Te tachī jeē cáñuhun ini tēe un ní cacahān ndahú jíin yá:

Núu quenehen ní sáña, te cuáha ni jnúhun na quívicoo ná ini quíni cáhīin yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívicoo ini quíni. Te quíni un ní cajinu tī ni caningava tī ñin yucáva, te ni ndaquíhi tī ndute mar, ni cajihī tī.

³³ Te tēe cándito tī ni cajinu de cuangoo de jeē ní cayūhú de. Te ni najinūcoo de ñuu. Te ni cacastūhún de táca jniñu yúcuan, jíin ndese ni cuu jeē ní quendacoo tachī ini ndíndúú tēe ún. ³⁴ Yūcuán na te ndívi ñayuu ñuu un, ní quendacoo i cuacondéhé i Jesús. Te ná ni jinūcoo i nuū íne ya, te ni cacahān ndahú i jíin yá jeē na quénda ya región yúcuan quíhīn yā.

Jeē ní nasávāha ya ñn tēe ndóho cuehyī ni íjin
(Mr. 2.1-12; Lc. 5.17-26)

9

¹ Yūcuán na te ni ndīvi Jesús ini barco. Te ni nayāha ya cuahān yā inga lado mar, te ni najinū yā ñuu maá yá. ² Te ni caquindeca ñayuu ñn tēe ndóho cuehyī ni íjin, cá tú de nuū ñn camilla. Te ni jini Jesús jeē cá candije i jeē cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de síquī yā: Jeē cahán tēe yáha súcuan, chí cáhán de jnūhun ndevāha jeē quití ni Yaā Dios. ⁴ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī? ⁵ Jeē uú jnūhun yáha, ¿ndé ñn yí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te caca ró, chí je ni nduvāha ró, achi rī? ⁶ Te vijna te na stéén rī jeē maá rí, Yaā ní nduu tēe, ndíso jníñu ri ini ñayīvi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ní íjin ún:

Ndocuñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuñī-ni tēe ún, te cuanhun de vehe de. ⁸ Te ná

ni cajito ñayuu un jéē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ñn tēe jeē cúu nasávāha de ñayuu, achí i cájito i Jesús.

Jeē ní cana ya Mateo
(Mr. 2.13-17; Lc. 5.27-32)

⁹ Te ni quenda Jesús yūcuan cuahān yā. Te ni jito ya nuū ñn tēe nání Mateo, néne de nuū cutútú xūhun renta. Te ni cahān yā jíin de:

Condiquñ ruhū na quíhín yō.

Te ni ndocuñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xūhun renta jíin inga tēe cása ha cuéchi, suni cáyūcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xūhun renta jíin inga tēe cása ha cuéchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñúhún i tēe tájna, chí ñayuu cácu hū cúu jeē jíni ñúhún. ¹³ Cuahán jíjnahan ró núu súcuan, te nacani ni rō na vé cúu jeē cahán jnūhun yáha jéé yosó núu tútu i: Cúni rī jeē na cúndáhú ni rō jnahan ró, nasūu jéé sócú rō quití nuū rī, achí Yaā Dios nde jenahán. Te ruhū nasūu jéé véji rī cana rī ñayuu tú cuéchi, jeē cúu i nájnūhun ñayuu cáhīyo vāha,

chi sa suhva vēji ri cana ri ñayuu iyó cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya síquī jeē cóndite ní

(Mr. 2.18-22; Lc. 5.33-39)

¹⁴ Yūcuán na te tēe cáscuáha jíin Juan tēe scuándute, ní quecoo de nuū Jesús. Te ni cacahān de jíin yá:

Saña jíin tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu cásáha de súcuan?

¹⁵ Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níni néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶ Te ni cahān yā uū jñuhun yátá síquī jeē tu quíjnáhan jñuhun jeé jéē steén yā jíin táca jñuhun jenahán. Achí yá:

Ni ñn tu náchuhun ñn pedazo sahma jéé núu ñn sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnū ga nuū catáhné un. ¹⁷ Te suni tu cáchuhun vino jeé ini ññ túhú. Chi núu súcuan te ndatā ññ ún, te naa vino jíin ññ. Chi cánuú jéé chuhun i vino jeé ini ññ jéé, te súcuan te quéndōo vāha ndíndúú. Achí yá.

Jñuhun sēhe síhí Jairo jíin ñahan ní quehé yusáhma ya

(Mr. 5.21-43; Lc. 8.40-56)

¹⁸ Te níni cáhán Jesús táca jñuhun yáha, te ñn tēe cújéhnū nuū ñáyuu hebreo, ni quee de

nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuiñī Jesús, te cuahān yā jíin de, te suni cuangoo tēe cáscuáha jíin yá.

²⁰ Te mēhñu ñáyuu cuangoo jíin yá ni quee ñn ñahan, te je ni cuu uxī uū cuiyā ndóho ña cuehyī ññ. Te ni quee ña ichi yátá yā, te ni quehé ña yusáhma ya. ²¹ Chi ni jeni ni ña: Vēsú maá sahma ya na níhín rī quehé rí, te nduvāha rí, jeni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña máá hora un.

²³ Te ná ni jinū Jesús vehe tēe cújéhnū ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i. ²⁴ Te ni cahān yā jíin i:

Cujiyo jíjnáhan ró, chi sūchi síhí yáha, tu ní jíhí i chi quíxi-ni i, áchí yá.

Te ni cajecū catá i jeē ni cáhān yā. ²⁵ Te ni quenehen ya ñayuu cuehē ún, te ni quivī ya ini vehe. Te ni jññ ya ndaha sūchi síhí ní jihī ún, te ni ndocuiñī-ni i. ²⁶ Te ní región yúcuan ní jité núu jñuhun jññu jéhnū ní sáha ya ún.

Jeē ní nasávāha ya uū tēe cuáá

27 Te ni quenda Jesús yūcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ni ni sáña víí, achí de.

28 Te ná ni jinū yā vehe, te ni jinūcoo tēe cuáá un núū yā. Te ni cahān yā jíin de:

¿A cácandíje ró jéē cúu nannune ri tinūu ró? achí yá.

Te ni cacahān de;
Cácandíje ná, achí de.

29 Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cácandíje ró, achí yá.

30 Te ni cananune-ni tinūu de. Te Jesús ni cahān nīhin ya jíin de:

Ma cáchi cuiṭi rō nuū ni ḡn, achí yá.

31 Te máá de chi ni quendacoo de, te ni cajete-ni de jnūhun ní región yūcuan jéē súcuan ni sáha ya jíin de.

Jeē ní nasávāha ya ḡn tēe níhín

32 Te nuū ní quendacoo tēe un cuángoo de, te ni quecoo ñayuu jíin ḡn tēe níhín, jeē níhun tachī ini de. 33 Te ni quenehen ya tachī un cuáhān. Te tēe níhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiṭi yō ni ḡn jniñu súcuan ini ñuu Israel, achí i.

34 Te tēe grupo fariseo chi ni cacahān de:

Tēe yáha chi quenehen de tachī jíin fuerza maá jexeén jeē cujéhu nuū tachī, achí de.

Jeē cundáhú ni yā ñayuu cuehē

35 Te ni jica cuu Jesús tēcá ñuu jíin rancho, te ni steén yā jnūhun ini tēcá vehe iī sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuḡna-ni cuehyī cándoho i.

36 Te cundáhú ni yā jíto ya nuū ñayuu cuehē ún. Chi cándoho i te cácuḡnyá ni i, chi cácuu i nájnūhun lanchi jeē tú jitoḡo tī, chi tu ndíquín i Yaā cúu Jitoḡo i. 37 Yūcuán na te ni cahān yā jíin tēe cáscuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. 38 Núu súcuan te cacān tahu rō nuū maá Jitoḡo rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jnūhun ya nuū ñayuu. Achí yá.

Jeē ní nacāji ya uxī uū tēe apóstol

(Mr 3.13-19; Lc. 6.12-16)

10

1 Yūcuán na te ni cana ya uxī uū tēe jeē scuáha de jíin yá. Te ni jēhe ya poder nuū de jeē quenehen de tachī ini ñayuu, jíin jéē nasávāha de ñayuu cácuḡna tēcá ndinuū cuehyī.

2 Te yáha cúu síhví ndihúxí uū tēe apóstol un: Tēe ḡn cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. 3 Yūcuán na te Felipe, Bartolomé, Tomás, Mateo tēe

ni stútú xúhun renta, Jacobo sēhe Alfeo, jíin Lebeo jeē suni nání Tadeo, ⁴ jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní taji yá ndihúxí uū de quinacani de jnūhun

(Mr. 6.7-13; Lc. 9.1-6)

⁵ Te ni taji Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núū ñáyuu jeē násūu ñáyuu hebreo cácuu i, ni ma quívicoo ró táca ñuu ñáyuu Samaria. ⁶ Chi nuū maá-ni ñáyuu nación yō Israel quíngoo ró, chi cácuu i nájnūhun lanchi jeē ní sana. ⁷ Te jeē quíngoo ró te suhva nacani ró jnūhun: Je ni cuyajni Yaā ndeé andiví jeē ndacu ya jniñu nuū rō, achi rō. ⁸ Te nasávāha ró ñáyuu cándoho cuehyí stehyú jíin ñáyuu cándoho táca gá cuehyí, te nastécu rō ndīyí te quenehen ró táchī ini ñáyuu. Te súcuau-ni ni jēhe ri poder nuū rō jeē sáha ró, te suni súcuau-ni sáha ró jíin i.

⁹ Te ma cóndiso ró xúhun oro, ni xūhun plata, ni centavo cuechí. ¹⁰ Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquí jniñu jeē nácani ró jnūhun nuū ñáyuu, te cánuú coto i róhó.

¹¹ Te na-ni ñuu chí rancho núu ni jinūcoo ró, te yūcuán nducú ró ñin ñáyuu vāha, te coyūcu ró vehe i nde quíngoo tucu ró. ¹² Te jeē quíví ró vehe ñáyuu ún, te cahān rō jeē na

quíji jnūhun ndeyí jnūhun siē ni nuū i. ¹³ Te núu ñáyuu vāha cácuu i, te jnūhun ndeyí ní cahān rō quendōo siquí i. Te núu nasūu ñáyuu vāha cácuu i, te jnūhun ndeyí ní cahān rō ma quendōo siquí i. ¹⁴ Te núu iyó ñáyuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tícachā jehē rō, te súcuau stéén rō jeē iyó cuéchi i jeē tu ní cájetáhú i. ¹⁵ Jendaá cahán rī jíin ró jeē quíví juicio te xeēn gā coo castigo siquí ñuu casáha súcuau vésú siquí ñuu Sodoma jíin ñuu Gomorra nuū ní casáha ndasí ñáyuu cuéchi.

Jeē coto xeēn ñáyuu de jíjnáhan de

¹⁶ 'Cuni sōho ró, chi taji rí rohó quíngoo ró nájnūhun lanchi mēhñu yíhī. Núu súcuau te coo listo rō nájnūhun coō, te coo vítá ni rō nájnūhun paloma. ¹⁷ Te condito ró máá ró nuū ñáyuu, chi quee quíví jeē quíndeca i róhó núu tohó, te caní i róhó ini táca vehe iī sinagoga. ¹⁸ Te suni nde nuū táca gobernador jíin rey quíndeca i róhó jéē siquí ruhū. Te súcuau te nune ichi jeē nacani ndaā rō jnūhun ri nuū de jíin núu ñáyuu táca nación jeē tu jíin jnūhun Yaā Dios. ¹⁹ Te núu ni jendeca i róhó núu táca tēe ún, ma nácani ndasí ni rō ndese cahān rō. Chi máá hora un te máá yá steén nuū rō ndese cahān rō. ²⁰ Chi nasūu máá ró cúu jeē cahán, chí Espiritu

maá Tátá rō cúu jeē cahán jín yuhu ró.

²¹ Te sava ñayuu tu cácañdije, nastúu i ñani i jeē na cúu. Te tátá nastúu sēhe. Te sēhe ndonda siquí tátá jín náná jeē na cúu. ²² Te ndihi ñayuu quití ni i nuū rō jeē siquí ruhū. Te ñayuu jeē cuiñi nīhin nde jeē jínu jnūndóho, ñayuu ún chi cácu ánuá i. ²³ Te núu cájito xeēn i rōhó ñnuu, te cunu ró quihīn rō inga ñnuu. Chi jendaá cahán rī jín ró jeē ma ndécāva ró caca cuu ró ndihi nación yō Israel te ndiji-ni máá rí, Yaā ní nduu tēe.

²⁴ Ñin tēe scuáha, tu cújéhnú de nuū maestro de. Ni tēe cúu mozo, tu cújéhnú de nuū patrón de. ²⁵ Tēe scuáha chi nájnūhun ndóho maestro de suni súcuan ndoho nahín máá de, te tēe cúu mozo suni ndoho de nájnūhun ndóho patrón de. Núu súcuan te núu ruhū cácahān i jeē Satanás cúu rí, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñin cúu jeē yūhu yó

(Lc. 12.2-9)

²⁶ Núu súcuan te ma yūhu ró coto ró ñayuu. Chi táca jnúhun cácahān sāhí i ma quéndō sāhí cuiñi, chi ndihi natūu ndijín, te cuni ñayuu. ²⁷ Jnúhun ní cahán rī jín ró jeē tu ní jíní ñayuu, na nácastūhun cájí ró nuū i. Te jnúhun ní nacani sāhí rí nuū rō, na nácani jee ró yátá táca vehe. ²⁸ Te ma yūhu ró coto ró ñayuu cahni yiqui cúñu rō, chi ma cúu cahni i

ánuá rō. Chi sa suhva yūhu ró jéē ma stívi ró núu Yaā Dios, chi cuu snáhnú ndetū yā rohó jéē quívi ánuá rō jín yiqui cúñu rō infierno.

²⁹ Te táca saa chi tú yahu ndeé tī, chi nde uū tī jeē ñin centavo lulí. Te ni ñin tī tu nínga nuū ñúhun te núu tu jéhe Tátá rō jnúhun, chi ndíto ya tī. ³⁰ Te nagā ni cuu rōhó jínáhan ró, chi nde ndihi ixi xíní rō je ni cahu ya. ³¹ Núu súcuan te ma yūhu ró jínáhan ró, chi cánuu ndasí gá rō nuū yā vésú cuehē táca saa.

Ñayuu jejnúhún Jesucristo nuū inga ñayuu
(Lc. 12.8-9)

³² Te táca ñayuu jeē cuajnúhún rúhū nuū inga ñayuu, suni súcuan cuajnúhún rí i nuū Tatá rí, Yaā ndeé andiví. ³³ Te táca ñayuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tatá rí, Yaā ndeé andiví.

Jeē siquí Jesús te cusñin ini ñayuu

(Lc. 12.51-53; 14.26-27)

³⁴ Ma cáni ni rō jínáhan ró jéē véji rí jeē cóyūcu mání ñayuu ñayiví. Tú véji rí jeē cóyūcu mání ñayuu, chi sa suhva cuajnáhan i jeē siquí ruhū. ³⁵ Chi jeē siquí ruhū te cusñin ini sēhe yí jín tátá, te sēhe sñhí jín náná, te sēhe jēnu jín náná chíso. ³⁶ Chi táca ñayuu candije ruhū, chi jnáhan vehe i cúu jeē quití ni nuū i.

³⁷ Te núu ndé ñin ñayuu maní gā i jín tátá i chí jín i

náná i vēsú jín rúhū, nasūu ñáyuu vāha cúu i jeē cóndiquīn i ruhū. Te núu ndé ñin ñayuu manī gā i jín séhe yí i chí jín séhe síhí i vēsú jín rúhū, te suni nasūu ñáyuu vāha cúu i jeē cóndiquīn i ruhū.

³⁸ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē síquí jeē cóndiquīn i ruhū, nasūu ñáyuu vāha cúu i jeē cóndiquīn i ruhū.

³⁹ Te núu ndé ñáyuu cúní i cācu i nuū jnūndóho quiiji nuū i jeē síquí ruhū, núu súcuan te jnahnū ndetū i ní cáni. Te núu ndé ñin ñayuu vēsú na cúu i jeē síquí ruhū, te cotecu i ní cáni.

Jeē iyó táhū yō nuū Yaā Dios

(Mr. 9.41)

⁴⁰ Te ñayuu cuatáhú róho jijnáhan ró, núu súcuan te ruhū cájetáhú i. Te ñayuu cájetáhú rúhū, cájetáhú i Yaā ní taji rúhū vēji ri. ⁴¹ Núu na-ni ñayuu cuatáhú i ñin tēe nácani jnūhun Yaā Dios, síquí jeē jíca de jniñu Yaā Dios, núu súcuan te inuú-ni coo tahū de nuū Yaā Dios jín tēe nácani jnūhun Yaā Dios. Te núu na-ni ñayuu cuatáhú i ñin tēe ndaā, síquí jeē tēe ndaā cúu de, núu súcuan te inuú-ni coo tahū de nuū Yaā Dios jín tēe ndaā.

⁴² Te núu ndé ñáyuu cuāha i vēsú ñin ñajin ndute míjin coho ñin sūchi yáha, síquí jeē cúu i sūchi cándíje ruhū, ndaā ndije cúu jeē nihín i tahū i. Achí yá.

Jeē ní taji Juan uū tēe nuū yā

(Lc. 7.18-35)

11

¹ Te ná ni jīnu ni ndacu Jesús jniñu nuū ndihúxí uū tēe cáscuáha jín yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

² Te íne Juan vecāa. Te ni nihín de jnūhun tācá jniñu sáha Cristo. Te ni taji de uū tēe cáscuáha jín de, ³ cuacajñuhún de ya:

¿A máá ní cúu Cristo jeē achí tutu jeē quíji, chí condetu yó inga tēe quiiji? áchí de.

⁴ Te ni cahān yā jín de:

Cuángoo te castūhun ró nuū Juan tācá jniñu cájito ró jín jnūhun cájini ró. ⁵ Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyí stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéé jnama Yaā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jín de.

⁷ Te náa cuanuhun ndindúú tēe ún, te ni quejéé Jesús cahán yā jnūhun Juan jín ñáyuu:

¿Na vé ni jécondēhe ró jijnáhan ró nde nuū ñūhun téhé? ¿A ñin tēe jéni ñin jéni uū ni, nájñuhun ite jeē cánda sáha tachí? ⁸ Te núu tuú, ¿te na vé ni jécondēhe ró núu súcuan? ¿A ñin tēe cúní cujéhnu jeē ñūhun sahma lúu? Tuú chí cájini rō jeē tēe cáñuhun sahma lúu, máni ini vehe rey cáyúcú de.

⁹ ¿Te na vé ni jécondēhe ró núu súcuan? ¿A ñn tēe nácani jñūhun Yaā Dios? Cáhán rī jín ró jeē suu ni jécondēhe ró, te cújéhu ga Juan yáha vēsú tāca gá tēe ni canacani jñūhun Yaā Dios. ¹⁰ Chi jñūhun Juan cúu jeē ni cáhán Yaā Dios jeē yosó núu tútu ñ:

Tají rí tēe nacani jñūhun ri
cosnūú de ichi núu
Cristo,

návāha coo tūhva ñayuu jeē
jinú yā.

Achí Yaā Dios, achí tutu. ¹¹ Te jendaá cahán rī jín ró jeē ini ñayívi yáha cújéhu ga Juan tēe scuándute vēsú tāca gá tēe jeē ni íyo ini ñayívi. Te vēsú súcuan te tāca tēe núu ga ini ñuu nuū ndácu Yaā andívi jniñu, cújéhu ga de vēsú Juan.

¹² Te nde quívi ní quee Juan tēe scuándute, te nde vijna, chi cánducú ndéyí ñayuu quívi coo i ndaha Yaā andívi jéē ndácu ya jniñu nuū i. Te nde ñayuu xeēn cánducú ndéyí i síquí.

¹³ Chi nde ná tu quiji Juan, te ni íyo máá ley Moisés, te suni ní íyo tāca tēe ni canacani jñūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahán de jeē ndíji Elías. Te núu cácuñi rō cuatáhú ró jñūhun, te jíní rō jeē máá Juan cúu tēe jeē ní cachi tutu jeē quíji, chi cúu de nájnūhun Elías. ¹⁵ Tāca róhó jéē jíní sōho, na chúsóhó ró.

¹⁶ Yāhá cachi rī ñn jñūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúlí cáhñ nuū

yáhu cácasíquí i. Te cácana ndee i xiní jñáhan i: ¹⁷ Ni catívi rī scuílí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jéē tu ní núnáhan ni i ni ñn, súcuan cándāa ró. ¹⁸ Chi ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni rō, chi ni cacahán rō jeē ñūhun tachí ini de. ¹⁹ Yūcuán na te ni quee maá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jñūhun ró cácahán rō jeē máni máá jéē yéji rī jíhi ri vino. Te quíjnáhan ri jín tēe cástútú xūhun renta jín tāca gá tēe cása ha cuēchi, achí ró. Te núu cúndíchí ñn tēe jín jñūhun Yaā Dios, te jín jniñu sáha de te nátūu jeē tēe ndíchí cúu de. Achí yá.

*Jeē ní cuxeēn yā nuū sava
ñuu ññni ni
(Lc. 10.13-15)*

²⁰ Yūcuán na te ni quejéé yá cúxeēn yā nuū tācá ñuu nuū ni sáha ya cuehē jniñu jéhu, chi tu ní canacani ni i jeē stóo i cuēchi i. Te ni cahán yā:

²¹ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéhu jeē ni sáha ri ini ñuu máá ró, te yachí nacani ni ñayuu ñuu un jéē stóo i cuēchi i núú. Te sáha i seña jeē steén jeē nácani ni i síquí cuéchi i, chi chuhun i sahma jnúú te chuhun i yaa xiní i núú. ²² Núu súcuan te cáhán

rī jín ró jeē quivī coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. ²³ Te róhó ñáyuu ñuu Capernaum, ¿á cájeni ni rō jeē cujéhu ró nájnuhun ñin jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyi. Chi núu ini ñuu Sodoma ni sáha ri jniñu jéhu jeē ni sáha ri nuū maá ró, te coo ñuu yúcuan ndé vijna núu. ²⁴ Núu súcuan te cáhán rī jín ró jeē quivī coo juicio te xeēn gā coo castigo siquī rō vēsú jeē ni íyo siquī ñáyuu ñuu Sodoma. Achí yá.

Nehen nuū rī ndetātu ró, achí yá

(Lc. 10.21-22)

²⁵ Te suni quivī un ní cahān Jesús:

Na cútahū na núu ni Tátā, Jitoho andiví jín ñáyiví. Chi ni jesi ní táca jnúhun ndichí ní, jeē ma cúní ñayuu ndichí jín ñáyuu tūhva cuenta ñayiví yáha. Te ni steén ni núu ñáyuu cácuu nájnuhun sūchi lúlí. ²⁶ Chi súcuan ni nujnahan ni ni Tátā, achí yá.

²⁷ Te ni cahān gā yā:

Ndivii ni jéhe Tátá rī nuū rī. Te tu cájini ñayuu ndé ñin cúu ruhū, Séhe Yaā Dios, chi máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chi máá-ni Séhe cúu jeē jiní. Te íyó ñáyuu jeē cuní maá Séhe steén yā nuū i ndese Yaā cúu Tátá yā, te máá i suni cuní i. ²⁸ Tāca ró jéē ni cuíta ró jín táca jniñu jín ley jeē yí sáha jín ró, nehen quivícoo ró ndaha ri, te

ndetātu ró sáha ri. ²⁹ Quiví ró núu jniñu ndácu máá rí, te scuáha ró coo ró nájnuhun íyó máá rí. Chi vitá ni rī te suchí ni rī, Te súcuan te ndetātu ró jín ánuá ró sáha ri. ³⁰ Chi tú yí jéē cuandetū ró nuū rī, ni tú yí jéē squícu ró jniñu ndácu ri. Achí yá.

Jeē ní cataxín de yoco trigo quiví ndetátú

(Mr. 2.23-28; Lc. 6.1-5)

12

¹ Te ñin quiví ndetātu ní yáha Jesús cuahān yā nuū cáa trigo. Te tē cáscuáha jín yá, cáji de sōco. Te ni quejé de cátaxín de yoco trigo cáyeji de. ² Te ni cajito tē grupo fariseo, te ni cacahān de jín yá:

Condéhé, chi tē cáscuáha jín ró casáha de jniñu jeē tu íyó váha sáha yó quiví ndetátú, achí ley Moisés.

³ Te ni cahān maá yá jín de:

¿A tu ní cácahu ró tutu ndese ni sáha David, ñin quiví jeē ni jí de sōco jín tē cáhīn jín de? ⁴ Te ni quiví de ini vehe Yaā Dios. Te ni yeji de pan i jeē yosó ndijin nuū Yaā Dios. Te tú na ley jeē cáji de, ni tē cáhīn jín de, chi máá-ni sutū cuu cají. Te vēsú súcuan te tú na cuēchi ní íyo siquī de.

⁵ ¿Te á tu ní cácahu ró tutu ley Moisés, ndese cásajniñu sutū ini templo, vēsú quiví ndetātu cúu? Te tú na cuēchi íyó siquī de, vēsú quiví ndetātu cásajniñu de jniñu jeē cácuu de sutū. ⁶ Te cáhán rī jín ró jeē maá rí jeē íyó yáha, cújéhu ga rī vēsú templo. ⁷ Te tu cájecūhun ni rō jijnáhan ró

jnūhun yáha jeē yosó núū tútu iī jeē ni cáhān Yaā Dios: Jeē cuní gā rī cúu jeē cundáhú ni rō jnāhan ró, vēsú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahán rō súcuan siquī tēe jeē tú na cuēchi núú.
 8 Chi ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, achí yá.

Jeē ní nduvāha tēe ni ichī ndaha

(Mr. 3.1-6; Lc. 6.6-11)

9 Yūcuán na te cuahān Jesús, te ni quivī ya ini vehe iī sinagoga. 10 Te yūcuan íne iin tēe ni ichī iin ndaha de. Te cácuni tēe grupo fariseo jeē nihīn de cuēchi siquī yā, te ni cacajnūhún de ya:

¿A iyó ley jeē cuu nasávāha yó ñayuu huhú quivī ndétátú? achí de.

11 Te ni cahān yā jíin de:

¿Ndé iin róhó, núu névāha ró iin lanchi, te núu nínga tí ini iin yaū quivī ndétátú, te á tu jéhén rō natava rō tī, chí naún? 12 ¿Te á tu cánuú ndasí gá iin tēe vēsú iin lanchi? Núu súcuan te vetū-ni sáha yó jniñu váha quivī ndétátú, achí yá.

13 Yūcuán na te ni cahān yā jíin tēe ni ichī ndaha ún:

Scaá ndaha ró.

Te ni scaá de, te ni nduvāha-ni nájnūhun iyó inga. 14 Yūcuán na te ni quendacoo tēe grupo fariseo, te ni candajnūhún de siquī Jesús, ndese cahni de ya.

Jnūhun Jesús jeē ni cáhān Isaías nde jenhán

15 Te ni jini Jesús jeē súcuan cájeni ni de, te ni quenda ya yūcuan cuáhān yā. Te cuehē ñayuu cándiquīn i ya. Te ni nasávāha ya ndihi ñayuu huhú. 16 Te ni ndacu ya jniñu nuū i jeē ma stéén i ya. 17 Te súcuan ni cuu návāha squícu jnūhun ni cahān Yaā Dios siquī Jesús, te ni nacani Isaías jnūhun ya un ndé jenhán:

18 Yāha cúu mozo rī jeē ní nacāji rī, te manī rī jíin yá, te cúsi ni rī jíin yá.

Te cuāha rī Espíritu rī coo jíin yá.

Te máá yá sándaā jniñu ñayuu tácá nación.

19 Ma tejnáhan ya, ni ma cána jee ya,

te ni ma cahán jee ya ichi jeē cúni ñayuu.

20 Ma sáha xeēn yā jíin ñayuu ni cunihin jnūndóho siquī,

ni ma snáā yā ñayuu jeē maá lulí-ni cácandíje.

Chi kujéhnū ya siquī ndihi, te ndaā ndacu ya jniñu.

21 Te ñayuu tácá nación cocuhun ni i jeē jnáma ya i.

Achí Yaā Dios, achí Isaías nde jenhán.

Jeē ní cacahān de jeē jeniñu ya fuerza Satanás

(Mr. 3.19-30; Lc. 11.14-23; 12.10)

22 Yūcuán na te ni caquin-deca i nuū yā iin tēe cuáá ñihín, chí ñūhun tachī ini de. Te ni nasávāha ya de. Te ni

ndundijin tinūú de te ni nacahān de. ²³ Te ndihi ñayuu cuehē un ní canaa ni i cájito i, te ni cacahān i:

¿A tée yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cácahān i. Te ni cacahān de:

Tēe yáha ma cúu quenehen de tachī núu jeē tu sáha de jíin fuerza Satanás jeē cujéhnú nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásin máá te cájejnáhan máá, núu súcuan te snāá jeē iyó váha máá. Te núu in ñuu chí in vehe casásin máá te cájejnáhan máá, te ma cúu ga coyūcu cáhnu. ²⁶ Te suni súcuan Satanás núu quenehen jnáhan tachī, núu súcuan te sásin máá. ¿Te ndese cuiñi nihin Satanás jeē ndácu jniñu núu súcuan? ²⁷ Chi cácahān rō jeē jíin fuerza Satanás quenehen ri tachī. Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí suhva ró ni cacahān rō jeē cáquenehen ri tachī jíin fuerza Satanás. ²⁸ Te tuú chi sa jíin Espíritu Yaā Dios cúu jeē quenehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi in tēe ini vehe tēe ndacuī jeē

quenehen de ndajniñu de? Chi cánuú jeē xihna gā cuhni de tēe ndacuī ún, te yūcuán na te cuu quenehen de ndajniñu ún. Te suni súcuan cúu jeē jhni rī Satanás te quenehen ri tachī.

³⁰ Te ñayuu tu iyó mánī jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhán rī jíin ró: Iyó modo coo jnūhun cáhnu ni nuū tāca cuéchi cásaaha ñayuu, jíin núu tāca jnūhun néé cácahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

Jnūhun yujnu váha jíin yujnu néé

(Lc. 6.43-45)

³³ Núu yujnu váha, te váha ndehē, te núu yujnu néé, te cánéé ndehē. Chi jíin ndéhē te jíní yō ndese yujnu cúu. Te suni súcuan ñayuu. ³⁴ Va sēhe coō cácuu ró, chi xeēn rō nájñūhun coō. ¿Ndese cuu cahān rō jnūhun váha, chi ñayuu cásaaha néé cácuu ró? Chi jniñu jeē jéni ni anuá ñayuu, máni yūcuan cáhán i. ³⁵ Tēe váha cáhán de jnūhun váha, chi iyó ndáá anuá de. Te tēe sáha néé cáhán de jnūhun néé, chi cánéé ánuá de. ³⁶ Te cáhán rī jíin ró jeē tācá

na-ni jñūhun cácahān ñayuu, nacuāha i cuenta jñūhun un quivī coo juicio. ³⁷ Chi jín jñūhun ni cahān rō sándaā yā siquī rō, núu jeē quéndō ndaā rō chí jéē cóndee cuēchi siquī rō. Achí yá.

Jeē ní cajicān ñayuu tu cácañdije ñn jñiñu jéñu
(Mr. 8.12; Lc. 11.29-32)

³⁸ Yūcuán na te jecu tēe grupo fariseo jín tēe cástéén tutu ley Yaā Dios, ni cacahān de jín yá:

Maestro, cáculi na jéē sáha ní ñn jñiñu jéñu jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jín de:

Ñayuu yáha jeē casáha jñiñu neé, tu cájetáhú cuiti i Yaā Dios. Te cájicān i ñn jñiñu jéñu jeē steén núu Yaā ní tají Yaā Dios cúu rī. Te tuá na inga jñiñu jéñu stéén rī nuū i, chí máá-ni jñiñu jéñu nájnūhun ni cuu jín Jonás, tēe ni nacani jñūhun Yaā Dios. ⁴⁰ Chi nájnūhun ni ine Jonás chíji chācá cáñu unī nduú unī ñuú, suni súcuan ruhū, Yaā ní nduu tēe, cuu rī te cone rī chíji ñuhun unī nduú unī ñuú, te sáá te natecu rī. ⁴¹ Te táca ñáyuu ñuu Nínive nuū ní nacani Jonás jñūhun, natecu i jín ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chí máá i ni canacani ni i ni castóo i cuēchi i quivī ní nacani Jonás jñūhun nuū i. Te vijna chí cújéñu ga ruhū Yaā íne yāhá vēsú Jonás, te tu cácañdije ró rúhū. ⁴² Te

reina jeē ní cújéñu nación ichi sur, natecu ña jín ñáyuu tiempo yáha, quivī juicio jeē sándaā yā cuēchi, te cahān ña cuēchi siquī i. Chí nde jicá téyí ní quiñi ña ni jini nahín ña jñūhun ndíchí ní cahān rey Salomón. Te vijna chí cújéñu ga ruhū, Yaā íne yāhá vēsú Salomón, te tu cácañdije ró rúhū.

Tachī jeē nastútú jñáhan ndívi ini ñayuu
(Lc. 11.24-26)

⁴³ Núu ni quenda ñn tachī ini ñn tēe tu cándije, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: ⁴⁴ Na quínuhun rī vehe nuū ní quenda rī. Te núu ni ndee tucu, te jíto jeē tēe tu cándije ún, cúu de nájnūhun ñn vehe íyú te ni ndundoo. ⁴⁵ Yūcuán na te jéquihin uxā gā tachī neé gá vēsú maá. Te quivícoo ini tēe un jéē cóyūcu yúcuán. Núu súcuan te xeēn gā ndoho tēe un jéē sándihí vēsú jeē xíhna ñúhún. Te suni súcuan ndoho ñayuu tiempo yáha jeē casáha neé. Achí yá.

Náná yā jín ñani yā
(Mr. 3.31-35; Lc. 8.19-21)

⁴⁶ Te níni súcuan cáhán yā jín ñáyuu ún, te ni quee naná yā jín táca ñani yā, lín ña nuū quéhe, te cúní ña cahān ña jín yá. ⁴⁷ Te ni cachi ñn tēe nuū yā:

Náná ni jín táca ñani ni cáhīn nuū quéhe, te cáculi cahān jín ní, achí de.

⁴⁸ Te ni cahān yā jín tēe ni cahān súcuan jín yá:

¿Ndé ñn cúu náná rī, te ndé ñn cácuu ñani rī? Achí yá.

49 Te ni steén ndaha yá nde nuū cáyūcu tée cáscuáha jíin yá. Te ni cahān yā:

Suni náná rī jíin ñani rī cácuu tāca jéē yáha. 50 Chi tāca ñáyuu casquícú jniñu cúní maá Tátá rī, Yaā ndeé andiví, suu cácuu ñani rī, cuāha ri, náná rī. Achí yá.

Jnūhun yátá síquī tēe jéte trigo

(Mr. 4.1-9; Lc. 8.4-8)

13

1 Te quiví un ní quenda Jesús vehe cuahān yā, te ni jinū yā ni cucōo ya yumar.

2 Te ni cutútú cuéhē ndasí ñayuu nuū yā. Te ni quiví ya ini ñn barco, ni cucōo ya. Te tāca ñáyuu un cáyūcú i yumar. 3 Te jíin jnūhun yátá ni cahān yā cuehē jnūhun nuū i, te súcuan ni cahān yā:

Íin tēe cate trigo, ni quenda de jeē cáte de. 4 Te ná ni quejé de jéte de, te jecu trigo ni jitē yuhíchi. Te ni quecoo saa, ni cayeji tī. 5 Te jecu gā trigo ni jitē nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun.

6 Te nuū ní cane niāndii, te ni ichī-ni, te ni casun, chi tu ní níhín nuū quihín yoho. 7 Te jecu gā trigo ni jitē nuū náne iñu. Te ni jehnu iñu ún, te ni jesi nuū.

8 Te jecu ni jitē nuū ñūhun váha, te ni jēhe cuehē nunī. Sava ni jēhe ciento jeē íin ñn, te sava ni jēhe unī xico, te sava ga ni jēhe ocō uxī.

9 Tāca rōhó jéē jíni sōho, na chúsóhó ró. Achí yá.

Najehē cahán yā máni jnūhun yátá

(Mr. 4.10-12; Lc. 8.9-10)

10 Yūcuán na te tēe cáscuáha jíin yá un ní quecoo de nde nuū yā, te ni cacajñuhún de ya:

¿Najehē cúu jeē máni jnūhun yátá cáhán ni jíin ñáyuu? achí de.

11 Te ni cahān yā jíin de:

Róhó jíināhan ró chi sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cácadíje, chi ma jécūhun ni i. 12 Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún. 13 Jeē yúcuán cáhán rī jnūhun yátá jíin i. Chi vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeē tú na vé ni cájini i. 14 Ñayuu yáha chi squícú síquī i jnūhun ni cahān Yaā Dios jeē ní nacani Isaías, tēe ni nacani jnūhun nde jehāhán:

Vésú cuni nahín ró, te ma jécūhun ni rō,

te vésú coto ró, te ma nácuni rō.

15 Chi ñayuu yáha yōhoyo ni ndunīhni ni i,

te yōhoyo uhū chusóhó i,

te nájnūhun cájesi i tinūū i,

návāha coo nájnūhun jeē tu cájito i,

ni tu cájini nahín i,

te ni ma jécūhun ni i,

ni ma násāma ini i quívicoo i nuū rī

jeē nasávāha ri anuá i nuū
cuéchi i.

Achí Yaā Dios, achí tutu.

¹⁶ Te máá ró jijnáhan ró, yōhyo ndetū rō, chí cájito ró jíin tñūu ró, te cájini nahín ró jíin sóho ró. ¹⁷ Chi jendaá cahán rī jíin ró jeē cuehē tēe ni canacani jnūhun Yaā Dios jíin cuéhē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

*Jeē ní castūhun cáji yá
jnūhun yátá tēe jéte trigo*

(Mr. 4.13-20; Lc. 8.11-15)

¹⁸ Núu súcuan te cuni nahín jijnáhan ró na vé cuni cahán jnūhun yátá tēe jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quíji jexeén te quénde-ni jnūhun ini anuá i. ²⁰ Te trigo jeē ni jítē nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíin. ²¹ Te tu cúcutú jnúhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i siquī jnúhun ún, te quejéé nácani yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i siquī jeē iyó ini ñayivī yáha, te cúní i cucúca i, te stáhú un i cujneñu i jíin. Te ndihī jeē yáha jési nuū jnúhun ya, te tu íje i jíin jnúhun ya. ²³ Te trigo

jeē ni jítē nuū ñúhun váha cúu nájnūhun ñayuu cájini nahín jnúhun, te cájecūhun ni i, te cáhije i jíin jnúhun ya. Te sava i cúu nájnūhun nunī jeē jéhe ciento jeē ñn ñn, te sava ga i jéhe unī xico, te sava ga i jéhe ocō uxī. Achí yá.

Jnūhun yátá síquī ite lasú

²⁴ Te ni cahán yā inga jnūhun yátá jíin de:

Jeē ndácu Yaā andiví jniñu cúu nájnūhun ñn tēe jeē ní jete de trigo váha nuū ñúhun de. ²⁵ Te íyó ñn tēe jító uhū de tēe chíi trigo. Te náa cáquixī tēe chíi trigo jíin táca jnáhan de, te ni jehēn ni jete ndiquin lású nuū trigo de, te cuahán. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahán i jíin patrón i: ¿A násūu trigo váha ní jéte ní núu ñúhun ní? ¿Te ndese cúu jeē ní canecoo ite lasú nuū? ²⁸ Te ni cahán de jíin i: ñn tēe jító uhū ruhū ni sáha jeē yáha. Te ni cacahán mozo un jíin de: ¿Núu súcuan te á cúní ni jéé na quíngoo ná te jnuhun ná? achí i. ²⁹ Te ni cahán de: Tuú, chí núu jnuhun ró lású un te sanaa te jnuhun ró ndé jíin trigo. ³⁰ Váha ga na cuéhnu máá ndé quivī tahndé. Te quivī un cáhán rī jíin tēe cahnde jeē xīhna gā ite lasú cahnde de, te chucú tútú de návāha cahmu yó. Yūcuán na te trigo chí cahnde de ndivī ini yacā rī, achí de. Achí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jeē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájñūhun jéhu ñn ndiquin mostaza jeē ní jequin ñn tēe nuū ñūhun de. ³² Te jendaá jeē ñn ndiquin lúli gá cúu vésú tāca gá ndiquin. Te núu ni jehnu, te cúu cáhnu ga vésú tāca gá yucū, chi ndúu nájñūhun ñn yujnu. Te quíjicoo saa, te cásáha ti tacā tī chīji ndaha ún. Achí yá.

Jnūhun yátá síquī levadura
(Lc. 13.20-21)

³³ Te inga jnūhun yátá ní cahān yā jíin de:

Jeē ndácu Yaā andiví jniñu nuū ñáyuu cúu nájñūhun levadura jeē ní quihin ñn ñahan. Te ni saca ña jíin únī kilo harina, nde ni ndaa ndihi ñujen ni sáha. Achí yá.

Jeē máni jnūhun yátá cáhán yā jíin i

(Mr. 4.33-34)

³⁴ Tāca jnúhun yáha ní cahān Jesús jíin ñáyuu cuehē ún. Te tāca jéē ní steén yā, máni jnūhun yátá ní cahān yā jíin i. ³⁵ Súcuān ni sáha ya návāha squícu jnūhun ni cahān tēe ni nacani jnūhun Yaā Dios nde jenahán:

Cahān rī tāca jnúhun yátá jíin ñáyuu,

te cachi rī tāca jnúhun yísāhí ndé quiví ní jecōo ñayiví.

Achí tutu, áchí yá.

Jeē ní castūhun cáji yá jnūhun ite lasú

³⁶ Yūcuān na te ni nacuatáhu Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cáji ní jnūhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. ³⁸ Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jíto uhū jeē ní jete lasú un cúu máá jéxeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios. ⁴⁰ Te nájñūhun tahndē ite lasú te cayū nuū ñuhún, súcuān coo quiví jínu ñayiví. ⁴¹ Chi máá rí, Yaā ní nduu tēe, tají rí ndajéhé rī quingoo. Te nastútú yá tāca ñáyuu casquíví jnáhan nuū cuéchi, jíin ñáyuu casáha jniñu néé, quenehen ya i mēhñu ñáyuu ndácu ri jniñu nuū.

⁴² Te jnaa ya i cayū i nuū ñuhún. Te yūcuān ndáhyū i te nacayihí yuhu i jeē ndoho xeén i. ⁴³ Yūcuān na te ñayuu squícu nuū yā chi ndindéé i nájñūhun niāndii, te coyūcú i nuū ndácu máá Tátá i jniñu. Tāca róhó jéē jíni sōho, na chúsóhó ró.

Jnūhun yátá síquī yejnū xūhún jeē yísāhí

⁴⁴ Te jeē ndácu Yaā andiví jniñu nuū ñáyuu, suni cúu

nájñuhun ñn yejnū xūhún jeē yísāhi chíji ñn ñuhun. Te ni nanihñn ñn tēe, te ni nacasi tucu de siquī. Te jeē cúsiñ ni de jíin, te ni jehēn de ni xícó ndihi de jeē névāha de, te ni jeen de ñuhun ún.

Jñuhun yátá síquī perla jeē ndeé yahu

⁴⁵ Te jeē ndácu Yaā andiví jniñu nuū ñáyuu, suni cúu nájñuhun ñn tēe jéen xíco, te ndúcú de perla váha. ⁴⁶ Te ni jini de ñn perla jeē yáhu ndasí, te ni jehēn de ni xícó ndihi de jeē névāha de, te ni jeen de perla un.

Jñuhun yátá síquī ñunu jñi chācá

⁴⁷ Te jeē ndácu Yaā andiví jniñu nuū ñáyuu, suni cúu nájñuhun ñn ñunu jeē cásingava de ini mar, te quívicoo ndinuū chācá. ⁴⁸ Te núu ni chitú ñunu ún, te cánatava de yundúte. Te cácucoo de cánacāji de chācá. Te chācá váha cájnaa de ini jica, te chācá tú váha cáscáne de. ⁴⁹ Te suni súcuan coo quiví jínu ñayiví. Chi quijicoo ndajéhé yā, te sásñn ya ñayuu casáha jniñu néé méhñu ñáyuu casáha jniñu váha. ⁵⁰ Te ñayuu cunéé chi jnaa ya i cayū i nuū ñuhún. Te yūcuan ndáhyū i te nacayihí yuhu i jeē ndoho xeēn i. Achí yá.

Jñuhun yátá síquī ndajniñu ndeé yahu

⁵¹ Te ni cajñuhun yá de jíjnáhan de:

¿A ní cajecūhun ni rō tāca jñuhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñn tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jñuhun siquī ún. Chi cúu de nájñuhun ñn tēe chíí vehe. Te ini yejnū de táva de ndajniñu ndeé yahu, sava jeē jeé jíin sava jeē je ni cunahán íyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndihí ni cahān Jesús tāca jñuhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jñuhun ini vehe ñi sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jñuhun ndíchí? ¿Te ndese cúu sáha de tācá jniñu jéhu yáhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yáhá. ¿Te ndese jíin de tāca jñuhun yáha núu súcuan? Achí ñayuu.

⁵⁷ Te súcuan ni cacujéé ni i nuū Jesús. Te ni cahān yā jíin i:

Tāca tēe nácani jñuhun Yaā Dios, íyó yíñúhún ñayuu jíin de, te máni ñayuu ñuu maá de jíin ñáyuu vehe máá de cúu jeē tu íyó yíñúhún jíin de. Achí yá.

⁵⁸ Te tu ní sáha ya cuehē jniñu jéhu yūcuán, chí tu cácuandje i ya.

Jeē ni jīhī Juan tēe scuándute
(Mr. 6.14-29; Lc. 9.7-9)

14

¹ Te tiempo yúcuan te Herodes, tēe ndácu jniñu región Galilea, ni jini jnūhun de jnūhun Jesús. ² Te ni cahān de jín ñáyuu cáhīn jín de:

Tēe yúcuan cúu Juan tēe ni scuándute, te ni natecu de. Jeē yúcuan íyó poder de sáha de jniñu jéhu. Achí de.

³ Chi Herodes, je ni ndacu de jniñu jeē na quívi Juan vecā, jín jēe na cónuhni de jín cadena. Súcuan ni sáha de jeē siquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu íyó ley condeca ró ña, áchí de.

⁵ Te jeē yúcuan ní cuni Herodes cahni de Juan. Te yúhú de jeē quívi ni ñayuu, chi ndihí i jéni ndije ni i jeē ñn tēe nácani jnūhun Yaā Dios cúu Juan. ⁶ Te ñn quívi ni sáha Herodes ñn vico quívi ní cacu de. Te sēhe síhí Herodías ni quívi i ni jita jéhé i nuū ñáyuu ní cana de ún. Te ni cusí ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndívi i nuū Herodes, te ni cahān i:

Cuáha ní xínī Juan tēe scuándute, cone nuū ñn cohō, achí i.

⁹ Yūcuán na te rey Herodes ni cucuíhyá ni de. Te siquí jeē ni jéjnūhun téyí de, jín jēe ní cajini sōho tēe cáyeji staā jín de, jeē yúcuan ní ndacu de jniñu jeē na cuáha nuū i.

¹⁰ Te ni tají de soldado jeē na quícahnde xínī Juan ini vecā.

¹¹ Te ni quee soldado un jín xínī Juan, íne nuū ñn cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jín Juan, te ni candonehen de yíqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe
(Mr. 6.30-44; Lc. 9.10-17;
Jn. 6.1-14)

¹³ Te ná ni jini Jesús jnūhun, te ni cujiyo ya yúcuan cuáhān yā jín barco, jeē cóne sín ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhé i, cuajnahān i ya.

¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñu jeē véjicoo i jín. ¹⁵ Te nuū ní ini, te tēe cáscuáha jín yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jín de:

Tu jini ñúhún quíngoo i, chi cuáha máá ró jeē cáji i, áchí yá.

¹⁷ Te ni cacahān de jín yá:

Tú na vé cánevāha ná yāha, chi uhūn-ni staā jín úu-ni chācá, áchí de.

¹⁸ Te ni cahān yā jín de:

Cuáha na quíji, áchí yá.

¹⁹ Te ni cahān yā jín ñáyuu un jēe na cúcōo i nuū íte. Te

ni quihin ya ndihúhún staā jín ū chācá un. Te ni ndacoto ya ichi ándiví, te ni nacuatáhú yá. Te ni tahu cuéchi yá staā ún, te ni jēhe ya nuū tēe cáscuáha jín yá. Te máá de ni casaja de nuū ñayuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chitú úxī uū jica. ²¹ Te tēe ni cayeji un cúu nájñuhun uhūn mīl, te sīn ga cúu ñahan jín súchi lúli.

*Jeē ní jica jéhe yá nuū mar
(Mr. 6.45-52; Jn. 6.16-21)*

²² Yūcuán na te ni cahān-ni Jesús jín tēe cáscuáha jín yá jeē na quívicoo de barco, te cosnūú de quingoo de nde inga lado mar, ní ní jéē nátají yá ñayuu un quínungoo i. ²³ Te nuū ní cuu ni nacuatáhú yá nuū i, te máñuhún-ni ya ni caa ya yucu, cuacacān tahu yā. Te ni cuaa, te íne máñuhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chí vēji tachī ichi núú de. ²⁵ Te jeē yínee gā ni quee Jesús nuū de, jica jéhe yá nuū mar. ²⁶ Te tēe cáscuáha ún, ni cajito de ya jeē jica ya nuū mar. Te ni candondava de, te ni cacana cóhó de jeē cáyuhú de.

Jíhná cúu, áchí de.

²⁷ Te ni cahān-ni Jesús jín de:

Ndeyí coo ni rō, te ma yūhu ró, chí máá rí cúu, áchí yá.

²⁸ Yūcuán na te ni cahān Pedro jín yá:

Núu máá ní cúu, te cahān ni jín ná jéē na cáca jéhe ná nuū mar te jeē na nuū ní, áchí de.

²⁹ Te ni cahān yā:

Nehen núu súcuan, áchí yá.

Te ni quenda Pedro ini barco, te ni jica de nuū ndute cuahān de nuū Jesús. ³⁰ Te nuū ní jini de jeē níhin yíhi tachī, te ni yūhú de. Te ni quejéé de quee de chíji ndute. Te ni cana cóhó de:

Jnama ní saña, áchí de.

³¹ Te Jesús ni jñ-ni ya ndaha de. Te ni cahān yā jín de:

Tēe tu cándíje níhin cúu ró. ¿Naun ni nayūhu ró? Achí yá.

³² Te ni quíví ya ini barco un jín de, te ni jecuñí-ni tachī.

³³ Yūcuán na te tēe cáhīn ini barco un, ni cajecuñí yíí de nuū yā. Te ni cacahān de:

Jendaá ndije jeē Sēhe Yaa Dios cúu ní, áchí de.

*Jeē ní nasávāha ya ñayuu cácuñū región Genesaret
(Mr. 6.53-56)*

³⁴ Te ni quenda jíyo ya jín de nuū mar un, ní jinū yā región Genesaret. ³⁵ Te ñayuu yūcuan ní canacuni i ya. Te ni cascáca i jñuhun tācá ndañū yūcuan jéē ni jínū yā. Te ñayuu ni caquindeca i ñayuu cácuñū nuū yā. ³⁶ Te ni cacahān ndahú i jín yá jeē na quehé i vēsú yusáhma ya. Te tāca ñayuu jeē ní caquehé sahma ya, ni canduvāha i.

*Siquí ndese cújnehén ñayuu
(Mr. 7.1-23)*

15

¹ Yūcuán na te jecu tēe grupo fariseo jín tēe cástéén tutu ley Yaā Dios, ni quen-dacoo de ñuu Jerusalén, te ni quecoo de nuū yā. Te ni cacahān de jín yá:

² Tēe cáscuáha jín ró, ¿naun cástívi de costumbre jeē ní ca-jequin ñayuu jenahán? Chi tu ní cáscuícu de costumbre jeē nándahá de nuū yā te caji de staa. Achí de.

³ Te Jesús ni cajñūhun yá de:

Te máá ró jijnáhan ró, ¿suni naun cástívi ró jniñu ní ndacu Yaā Dios nuū rō? Chi sa costumbre maá ró cúu jeē casquícu ró. ⁴ Chi ni cahān Yaā Dios: Coó yíñúhún ró jín tátá rō jín náná rō. Te núu ndé ñn cahān síquī tátá chí síquī naná, na cúu nahín, áchí Yaā Dios. ⁵ Te máá ró chí cácahān rō jeē cuu cahān ñn tēe jín tátá de jín náná de: Ma cúu chindéé ñáhán ná níhín cuáha na jeē cáji ní jeē cúhun ní, chí ndíhi jeē névāha ná, je ni socō na núu Yaā Dios. ⁶ Te tēe cahān súcuan, tuá cánuú chindéé ñáhán de tátá de náná de, áchí ró jijnáhan ró. Te súcuan cástívi ró jniñu ní ndacu Yaā Dios, jeē síquí costumbre ni cajequin máá ró. ⁷ Tēe stáhú-ni cácuu ró. Ndaā ni nacani Isaiás jñūhun síquī rō nde jenahán, yósó núu tútu ñi jeē ni cáhān Yaā Dios:

⁸ Ñayuu yáha chí máá yuhu-ni i cájetáhú i ruhū,
te nasūu ndé jín ini jín ánuá i.

⁹ Te cáchiñúhún sáa-ni i ruhū,

chí jñūhun cástéén i cúu jniñu ní candacu tēe,
te nasūu jeē ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jín i:

Cuni sōho vāha jijnáhan ró, te chuhun ni rō: ¹¹ Nasūu jeē quívi ini yuhu ñayuu cu-jnéhén i sáha. Chi jñūhun jeē quénda yuhu i, yūcuan cúu jeē cujnéhén i sáha, áchí yá.

¹² Yūcuán na te tēe cáscuáha jín yá, ni quecoo de nuū yā, te ni cacahān de:

¿A jíní ni jeē ní caquítí ni tēe fariseo jeē ní cajini sōho de jñūhun ni cahān ní? áchí de.

¹³ Te ni cahān maá yá:

Cácuu de nájnūhun yujnu jeē tu ní náchuhun Tátá rí, Yaā ndeé andiví, te ñn quívi te jñūhun ya quihín. ¹⁴ Na quíngoo máá de. Chi cácuu de nájnūhun tēe cuáá cástéén ichi nuū inga tēe cuáá. Chi núu ñn tēe cuáá stéén de ichi nuū inga tēe cuáá, te ndíndúú de ñinga de xehvā. Achí yá.

¹⁵ Te ni cahān Pedro jín yá:

Castūhun cájí ní jñūhun yátá yáha nuū na jijnáhan ná, áchí de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún? ¹⁷ ¿A tu cájecūhun ni rō jeē taca jeē yéji ñayuu, chí quívi chíji i, te quénda-ni cuahán?

¹⁸ Te jñūhun jeē quénda yuhu ñayuu, chí nde ini anuá i vēji, te yūcuan cúu jeē cujnéhén i sáha. ¹⁹ Chi nde ini anuá ñayuu quénda jeē jeni néé ni, jeē jéñni ndíyi, jeē casíquí

ndéē jnáhan, jeē jíca jnéni, jeē sacuíhná, jeē cahán jnūhun stáhú, jeē cahán yāa síquī jnáhan. ²⁰ Tāca jeē yáha cúu jeē cujnéhén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

Ñahan inga nación jeē ní candíje nihin

(Mr. 7.24-30)

²¹ Te ni quenda Jesús yūcuan cuáhán yā región Tiro jíin Sidón. ²² Te iin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ní sáña víi. Chi sēhe síhí ná, ñūhun tachí ini i, te yōhoyo xeēn ndóho i, achí ña jíin yá.

²³ Te tu ní cáhán cuíti yā jeē ní cáhán ña. Yūcuán na te ni quecoo tēe cáscuáha jíin yá, te ni cacahán de:

Cahán ni jíin ña na quíhín ña, chi cána jee ña vēji ña yatā yō, achí de.

²⁴ Te ni cahán yā jíin ña:

Nuū maá-ni ñayuu nación Israel ni tají Yaā Dios sáña véji ná, chi cácuu i nájnūhun lanchi, quití ní sana.

²⁵ Te ñahan ún chi ni quee ña, te ni jecuíñi yítí ña nuū yā, te ni cahán ña:

Tátā, chindéé ñáhán ní sáña víi, achí ña.

²⁶ Te ni cahán yatá yá jíin ña:

Tu íyó váha jeē quénde yō staā sēhe, te cuáha yó núu ína, achí yá.

²⁷ Te ni cahán ña:

Jendaá cahán ni Tátā, te chindéé ñáhán ní sáña vēsú cúu ná nájnūhun ina. Chi suni máá tí cánihín nahín tí pedazo staā cuechí jeē cóyo chíji mesa jitoho tí cáyeji tí, achí ña jíin yá.

²⁸ Yūcuán na te ni cahán Jesús:

Yōhoyo váha jeē cándíje nihin ní súcuan, nánā. Te na sáha ná jeē cuní ni, achí yá.

Te máá hora un ní nduváha-ni sēhe síhí ña.

Jeē ní nasávāha ya cuehē ñayuu cácuhū

²⁹ Te ni quenda Jesús cuahán yā yūcuán, te ni yāha ya yumar Galilea. Te ni caa ya iin yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jeē cájica chácúa, jeē cuaá, jeē ñihín, jeē cacúhndú, jíin cuéhē gā ñayuu cácuhū. Te ni cajequin i nuū jehé Jesús. Te ni nasávāha ya i jíin náhan i. ³¹ Te ni canaa ni ñayuu un cájito i jeē nácahán ñayuu ñihín, ndúvāha ñayuu cuhndú, nácaca váha ñayuu chacúa, nánune tinūu ñáyuu cuaá. Te ni cacahán i jeē yōhoyo váha Yaā cúu Yaā Dios ñuu i Israel.

Jeē ní scáji yā cuūn mil tēe
(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahán yā jíin de:

Cúndáhú ni rī ñayuu cuehē yāhá, chi je ni cuu unī quivī cáyūcú i jíin rí, te tuá na vé caji i. Te tu cuní rī natají rí i nuhun ndite i, chi núu súcuan te sava ichi te cuíta lí i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúli, achí de.

³⁵ Yūcuán na te ni cahān yā jíin ñayuu cuehē un jēe na cúcōo i. ³⁶ Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū tēe cáscuáha jíin yá, te máa de ni casaja nuū ñayuu. ³⁷ Te ndihi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ³⁸ Te tēe ni cayejí ún, nde cuūn mil de cúu, te sīn ga cúu ñahan jíin súchi lúli.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndīvi ya ini barco, te cuahān yā región Magdala.

Jeē cájicān de ñn jniñu jéhnú nuū yā

(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chi cáconi de coto ndee de ya, te ni cajicān de jeē na sáha ya ñn jniñu jéhnú jeē coo ñn seña ichi ándiví. ² Te máa yá ni cahān yā jíin de:

Núu ni ini, te cácahān rō: Nandii, chí ni nasácuéhé i andiví, achí ró. ³ Te jenéhen chí cácahān rō: Vijna te cuun saū, chí ni nasácuéhé i

andiví, achí ró. Tēe stáhú-ni cácuu ró. Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnú sáha ri tiempo yáha. ⁴ Ñayuu yáha jeē casáha jniñu néé, tu cájetáhú cuiti i Yaā Dios. Te cájicān i jeē sáha ri ñn jniñu jéhnú jeē coo ñn seña andiví. Te tuá na ñnga jniñu jéhnú stéén rī nuū i, chí máa-ni jniñu jéhnú nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíjnáhan de, te cuahān yā.

Jnūhun levadura tēe fariseo (Mr. 8.14-21)

⁵ Te tēe cáscuáha jíin yá ni canaa ni de condišo de staā náa cuangoo de jíin barco ñnga lado mar. ⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān máa de:

Va siquī jeē tú na staā ndíso yó, jeē yúcuán cáhán yā súcuán, achí de.

⁸ Te ni jini Jesús, te ni cahān yā:

¿Najehē cácahān rō jeē ni cáhán rī súcuán siquī jeē tú na staā cándiso ró? Tēe tu cándíje ñihin cácuu ró. ⁹ ¿A ná tu jecūhun ni rō jeē tu ní cáhán rī súcuán siquī jeē tu ndíso ró stāā? ¿A tu cánucūhun ni rō jeē ní tahu cuéchí rí uhūn staā ni cayejí uhūn mil tēe, te nasaa jīca ni canastútú ró jeē ni quendōo? ¹⁰ ¿Te á tu

cánucūhun ni rō jeē ní tahu cuéchi rí uxā staā ni cayeji cuūn mil tēe, te nasaa jīca ni canastútú tucu ró? ¹¹ ¿Te najehe tu cájecūhun ni rō jeē násūu síquī staā ni cahān rī jīn ró jeē ni cáhān rī jeē coto má candíje ró levadura tēe fariseo jīn tēe saduceo? Achí yá jīn de.

¹² Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yíhi levadura, chí sa suhva ni cahān yatá yá jeē ma cándíje de jnūhun stáhú cástéén tēe fariseo jīn tēe saduceo.

Jeē ni cáhān Pedro jeē Jesús cúu Cristo

(Mr. 8.27-30; Lc. 9.18-21)

¹³ Te nuū ni jīnū Jesús región Cesarea Filipo jīn tēe cáscuáha jīn yá, te ni cajnūhun yá de:

Ruhū, Yaā ní nduu tēe, ¿ndé ñn cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahān. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jīn de:

Te máá ró, ¿ndé ñn cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní taji Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷ Te ni cahān Jesús:

Yōhyo ndetū rō, Simón sēhe Jonás, chí nasūú ñn ñayuu ni

steén jnūhun yáha nuū rō, chí sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhān rī jīn ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē maá rí cúu Cristo, suu cúu nájnūhun ñn yuū cáhnu. Te síquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuiti síquī i, ni jnūhun xeēn jeē cájihī i, tuá na vé cúu sáha jīn ánuá i. ¹⁹ Te máá ró condiso jníñu ró sáha ró jéē quívicoo ñayuu ndaha Yaā andiví jeē ndacu ya jníñu nuū i. Te tāca jéē cási rō jeē ma sáha ñayuu ini ñayiví yáha, suni casi jeē cáyūcú nde andiví. Te tāca jéē cuáha ró jnūhun sáha i ini ñayiví yáha, suni jeē cáyūcú nde andiví cuáha jnūhun. Achí yá.

²⁰ Yūcuán na te ni ndacu ya jníñu nuū tēe cáscuáha jīn yá, jeē ma cáchi de nuū ní ñn ñayuu jeē cúu ya Cristo.

Jeē ní castūhún Jesús jeē cúu yā

(Mr. 8.31-9.1; Lc. 9.22-27)

²¹ Te nde saá ní quejéé Jesús cástūhun cáji yá nuū tēe cáscuáha jīn yá jeē jīni ñūhún quihīn yā ñuu Jerusalén. Te tāca tēe jéhnu jīn sūtū cácujeñnu jīn tēe cástéén tutu ley, stóho ndasí de ya. Te cahni de ya, te nuū uní quiví te natecu yā, achí yá. ²² Yūcuán na te Pedro, ni cana máñūhún de ya, te ni quejéé de cáhān de nuū yá:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ñúhún cuiti ndoho ní jnúndóho yáha, áchí de.

²³ Te ni ndió cóto ya nuū Pedro, te ni cahān yā jíin de:

Cujiyo quihīn rō, chi cáhán rō ná cáhán Satanás. Chi tēe ndúcú stívi ruhū cúu rō. Te tu jéni ní rō nájnūhun jéni ní Yaā Dios, chi sa suhva jéni ní rō nájnūhun cájeni ní ñayuu. Achí yá.

²⁴ Yūcuán na te ni cahān yā jíin tēe cáscuáha jíin yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnúndóho jeē siquí rī, vēsú na cúu i. ²⁵ Chi núu ndé ñáyuu cuní i cācu i nuū jnúndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni. ²⁶ ¿Chi ndé cuajniñu vēsú na cúndeyí ñáyuu nihīn i ní ñáyiví, te núu quívi i nuū jnahnū ndetū i? Chi tú na jíin cuiti chunaa ñayuu jeē cácu ánuá i. ²⁷ Chi ruhū, Yaā ní nduu tēe, ndiji ri jíin táca ndajéhé rī, te yōhyo luu kujéhnu ri nájnūhun cújéhnu Tátá rī. Yūcuán na te cuāha ri tahū nuū ñn ñn ñayuu núu ndese jniñu ni casáha i. ²⁸ Te jendaá cahán rī jíin ró jeē sava tēe cáhīn yāhá, ma cúu de chi nde cuni de jeē maá rí, Yaā ní nduu tēe, ndácu ri jniñu jíin poder rī.

Jeē tucu ni nduu ya
(Mr. 9.2-13; Lc. 9.28-36)

17

¹ Yūcuán na te nuū iñú quívi te Jesús ni jeca ya Pedro jíin Jacobo jíin Juan ñani Jacobo, cuahān sīn ya jíin de ñn yucu súcún. ² Te yūcuán, tucu ni nduu ya nuū de. Chi ni ndindēe núu yā nájnūhun niāndii. Te sahma ya ni nducujín quiyi ndasí, nájnūhun nduva luz. ³ Te ni cajito-ni de jeē Moisés jíin Elías, tēe ni cahīyo jenahán, cándajnūhún de jíin yá. ⁴ Te ni cahān Pedro jíin yá:

Nacā jeē váha jeē cáhīn ná yáha. Te núu cúní ni te na sáha ná únī vehe ramada, ñn cuu maá ní, inga cuu Moisés, te inga cuu Elías, achí de.

⁵ Te níni cáhán gā de, te ni quiji vicō nūhun jēe yaa ndasí, ni jesi-ni nuū de. Te nuū vicó un ní cahān ñn jnūhun:

Yāha cúu Sēhe ri jeē maní ndasí rí jíin, te cúsiñ ni rī jíin. Na cúní nahín ró jnūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. ⁷ Yūcuán na te ni quee Jesús, te ni soó yá ndaha ya siquí de. Te ni cahān yā:

Ndocuñī, te ma yūhu ró jijnáhan ró, áchí yá.

⁸ Te ni candacoto de, te tuā tēe un ní cájito de, chi maá ñn na Jesús.

⁹ Te ni cananuu de jíin yá yucu ún. Te ni ndacu ya jniñu nuū de:

Ma cáchi rō nuū ní ñn jeē súcuan ni cajito ró, chi nde na nátecu maá rí, Yaā ní nduu tēe, áchí yá.

¹⁰ Yūcuán na te tēe cáscuáha jíin yá, ni cacajnūhún de ya:

Núu súcuan te tēe cástéén tutu ley Yaā Dios, ¿najehē cácahān de jeē cánuú ndiji Elías xihna gā, te sáa te quiji Yaā cúu Cristo? achí de.

¹¹ Te ni cahān Jesús jíin de:

Jendaá cúu jeē xihna gā quiji ñn tēe cuu nájnūhun Elías, te sátūhva de ndihi, áchí tutu. ¹² Te cáhān rī jíin ró jeē jé ni quiji tēe ni cuu nájnūhun Elías, te tu ní jíiní ñayuu jeē suu de cúu. Te ni casáha ndevāha ñayuu jíin de ndihi jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahān yā jeē Juan tēe scuándute, ni cuu de nájnūhun Elías.

Jeē ní nasávāha ya ñn sūchi jíhí yíhí

(Mr. 9.14-29; Lc. 9.37-43)

¹⁴ Te ni najinū yā jíin de nuū ñayuu cuehē ún. Te ni quee ñn tēe, ni jecuiñí yití de nuū yā, te ni cahān de:

¹⁵ Cundáhú ni ni séhe yí ná, chi yōhyo xeēn ndóho i cuehyí jíhí yíhí. Te je ni cuu cuehē jínu cótúú i nuū ñuhún jíin núú ndúte. ¹⁶ Te ni quindecena ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo ñihni ni cácuu ró chi tu cácañdije ró jéē cuu nduvāha i. ¿Nasaa ga quiví

condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máá hora un.

¹⁹ Yūcuán na te tēe cáscuáha un, ní cacajnūhun sūn de ya:

¿Najehē tu ní cúu quenehen ná tachí un jíināhan ná? achí de.

²⁰ Te ni cahān yā:

Siquí jeē tu cácañdije ñihin ró jéē cuu sáha ró. Chi jendaá cahān rī jíin ró, jeē núu candíje ró vésú ñn tíhli-ni, cūhva nájnūhun ñn ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihín inga lado, te cujiyo-ni. Te táca-ni jniñu chi cuu sáha ró, te núu candíje ñihin ró jéē cúu. ²¹ Te ñn tachí súcuan chi ma quénda cuiti quihín, te núu tu cacān tahú rō te coo ndite ni rō. Achí yá.

Jeē ni cáhān tucu ya jeē cúu yā

(Mr. 9.30-32; Lc. 9.43-45)

²² Te jíca cuu Jesús jíin de jíināhan de región Galilea, te ni cahān yā jíin de:

Maá rí, Yaā ní nduu tēe, nastúu i ruhū nuū táca tēe xeēn. ²³ Te cahni de ruhū, te nuū uní quiví te natecu rī, achí yá.

Te ni canducuíhyá ndasí ni de jeē ni cáhān yā jnūhun yáha.

Siquí xúhun cuajniñu ini templo

24 Te ni jinū yā ñuu Capernaum jín tée cáscuáha jín yá. Te tē cástútú xūhun templo ni quecoo de, te ni cacajñuhún de Pedro:

Te maestro maá ró jijnáhan ró, ¿á tú cuáha de xūhún cuajñiñu ini templo, chí naún? áchí de.

25 Te ni cahān Pedro:

Cuu, áchí de.

Te ná ni quívi de ini vehe, te xīhna gā Jesús ni cahān yā jín de:

¿Ndese jéni ni rō, Simón? Tāca tée cácuu rey ini ñayívi yáha, ¿ndé núu cájicān de xūhun renta jín xūhun cuajñiñu ñuu? ¿A núu séhe de chí núu ñayuu sín vehe? áchí yá.

26 Te ni cahān Pedro:

Nuu ñayuu sín vehe, áchí de.

Te ni cahān Jesús:

Nuu súcuan te tú na inga cujéhnu nuū séhe rey jeē cacán xūhún un núu i.

Súcuan ni cahān yā jeē cujéhnu ya cúu ya Séhe Yāā Díos. Te ni cahān yā:

27 Te na chúnaa yō, návāha tu squítí ni yō de. Núu súcuan te cuáhán ndé yumar, te scāne ró gancho jeē jnái chācá, te tava rō chācá jéē jnái xīhna gā. Te ndica rō yuhu ti, te yūcuan níhīn rō ñin xūhun jéē cánda chunaa rō jeē cájicān de. Te quindēca ró núu de jeē cúu ruhū jín róhó. Achí yá.

Ndé ñayuu cúu jeē cujéhnu ga

(Mr. 9.33-37; Lc. 9.46-48)

18

1 Te suni quívi un ní quecoo tē cáscuáha un núu yā, te ni cacajñuhún de ya:

¿Ndé ñin cújéhnu ga nuū ñayuu jeē ndácu Yāā andívi jniñu nuū? achí de.

2 Te ni cana ya ñin sūchi lúli, te ni jeni ya i mēhñú de. 3 Te ni cahān yā:

Jendaá cahán rī jín ró, núu tú nandió cóo ni rō te cani ni rō nájnūhun ñin sūchi lúli, ma quívi cui ti rō ndaha Yāā andívi jéē ndacu ya jniñu nuū rō. 4 Núu súcuan te ñayuu jeē jéni ni i jeē tu cújéhnu i, nájnūhun jéni ni sūchi lúli yáha, suu i cújéhnu ga nuū ñayuu jeē ndácu Yāā andívi jniñu nuū. 5 Te na-ni ñayuu núu jeē siquí ruhū jetáhú i ñin sūchi lúli nájnūhun sūchi yáha, te ruhū jetáhú i. Achí yá.

Xeēn coo siquí ñayuu quívi nuū cuéchi

(Mr. 9.42-48; Lc. 17.1-2)

6 Te núu ñin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quēe i chíji ndute mar nuú.

7 Nacā xeēn cúu jín ñayuu ñayívi, chí máni íyó jéē nducú squívi ñayuu nuū cuéchi. Te máni súcuan coo ini ñayívi. Te nacā xeēn ndoho ñayuu jeē squívi jnáhan nuū cuéchi.

8 Núu súcuan te núu ndaha ró chí jéhē rō sáha jeē quívi ró cuéchi, vāha ga cahnde rō te scāne ró na quíhín, návāha tuá sáha ró cuéchi. Chí vāha ga jeē coo chácúá ró chí coo tícúhndu ró te quívi ró núu cotecu rō ní

cáni, vēsú jeē cóndee ndindúú ndaha ró jéhē rō te quīvi ró núū ñuhún jeē cayú ñí cáni. ⁹Te núū tinūu ró sáha jeē quīvi ró cuéchi, vāha ga tava rō te scáne ró na quíhín, návāha tuá sáha ró cuéchi. Chi vāha ga jeē coo ñn-ni tinūu ró te quīvi ró núū cotecu rō ñí cáni, vēsú jeē cóndee ndindúú tinūu ró te quīvi ró núū ñuhún infierno.

Jnūhun yátá síquī lanchi jeē ní sana

(Lc. 15.3-7)

¹⁰ 'Coto ma sájéē ni rō nuū ní ñn sūchi lúli yáha. Chi cáhán rī jín ró jeē tācá ndajéhé andiví jéē ndíto ya i, níní cáhīn ya nuū maá Tátá rī andiví. ¹¹ Chi ruhū, Yaā ní nduu tēe, vēji ri jeē jnáma ri ñayuu jeē ní sana i nuū Yaā Dios.

¹² '¿Te ndese cájeni ni rō? Núu ñn tēe ndéca de ñn ciento lanchi, te núu sana ñn ti, ¿á tu stóo de cuūn xico xahūn cuūn gā tī yucu, te ndicó de quinanducú de quiti ní sana ún? ¹³ Te núu ni nanihīn de ti, te ndaā jeē yóhyo ga cúsiñi de jín quiti ún vēsú jín cuūn xico xahūn cuūn gā quiti jeē tu ní sana. ¹⁴ Te suni súcuan maá Tátá rō, Yaā ndeé andiví, tu cúní yā jeē jnahnú ndetū ni ñn sūchi lúli yáha.

Síquī jeē cóne cáhnu ni yō nuū jnáhan yó

(Lc. 17.3)

¹⁵ 'Te núu jnáhan ró ní sáha de cuéchi síquī rō, núu súcuan te castūhun ró nuū mañúhún-ni de jeē ní sáha de cuéchi síquī rō. Te núu ní jétáhú de jnūhun ni cahān rō

jín de, núu súcuan te je ní ndumanī de jín ró ní sáha ró. ¹⁶ Te núu tu ní jétáhú de jnūhun cáhán rō, te quicāna ró ñn chí úū gā ñayuu quihīn rō jín núu de, cuu i testigo jín ró, te cundaā cuéchi de te ndumanī de jín ró. ¹⁷ Te núu tu ní jétáhú tucu de jnūhun cácahān tēe ún, yūcuán na te castūhun ró nuū ñayuu cácañdije. Te núu tu ní jétáhú tucu de jnūhun cahān ñayuu cácañdije ún, te siáá rō de na cóo de nájnūhun ñn tēe tu cácañdije nuū Yaā Dios chí tēe stútú xūhun renta.

¹⁸ 'Jendaá cahān rī jín ró jéē tāca jéē cási rō jeē ma sáha ñayuu ini ñayīvi yáha, suni casi jeē cáyúcú nde andiví. Te tāca jéē cuáha ró jnúhun sáha i ini ñayīvi yáha, suni jeē cáyúcú nde andiví cuáha jnūhun.

¹⁹ 'Te suni cáhán rī jín ró, núu uū jnáhan ró ini ñayīvi yáha, inuú cani ni rō síquī ñn jeē cacán tahu rō, núu súcuan te maá Tátá rī andiví cuāha ya jeē cájicān rō. ²⁰ Chi núu ndé mí ndútútú úū chí úní ñayuu jeē cáchiñúhún i ruhū, te yūcuan íne ri jín i, áchí yá.

²¹ Yūcuán na te ni quee Pedro nuū yā, te ni cajnúhún de ya:

¿Nasaa jínu cone cáhnu ni na núu jnáhan ná jéē sáha de cuéchi síquī ná? ¿A ndé uxā jínu chí naún? áchí de.

²² Te ni cahān Jesús:

Tu cáhán rī jín ró jeē maá uxā jínu, chí nde uxā jínu jeē uní xico uxī.

Jnūhun yátá síquī mozo jeē tu ní íne cáhnu ni

23 'Núu súcuan te Yaā ndeé andiví, suhva cúu jeē íne cáhnu ni yā nuū ñáyuu ndácu ya jniñu nuū: Cúu nájñuhun ñin rey jeē cuní de sándaā de jíin mozo de jeē cátaū nuū de. 24 Te ni quejéé de sándaā de jíin i. Te ni caquindeca i ñin mozo jeē taú tijni millón peso nuū de. 25 Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táú. 26 Yūcuán na te ni jecuiñí yití mozo un, te ni cahān ndahú de jíin patrón de ún: Condetu ní, te na chúnaa ndihí ná xūhun ní, áchí de. 27 Te máá patrón ni cundáhú ni de mozo de. Te ni ine cáhnu ni de jeē taú mozo de ún, te ni siaá de jeē ma chúnaa gā. 28 Te ni quenda mozo un cuáhān de, te ni najnáhan-ni de jíin ñin jnáhan mozo de jeē taú jecu peso nuū de. Te ni jni de tēe ún, te ni quitu de sucūn, te ni cahān de: Chunaa jeē taú rō nuū rī, achí de. 29 Te jnáhan mozo de un ní jecuiñí yití núu de, te ni cahān ndahú jíin de: Condetu te na chúnaa ndihí ri xūhun ró, achí. 30 Te máá de tu ní cuní de, chi ni chune de tēe un vécāa nde quiví nachunaa jeē taú nuū de. 31 Te táca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuangoo de nuū patrón de, te ni cacachi de ndihí ndese ni cuu. 32 Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cáhnu ni

rī ndihí jeē taú rō nuū rī, chi ni cahān ndahú ró jíin rí. 33 Te nájñuhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, áchí de. 34 Te ni quití ndasí ni patrón, te ni ndacu de jniñu jeē na quiví vecāa nde nachunaa ndihí jeē taú nuū de.

35 Te ni jinu ni cahān yā, te áchí yá:

Nájñuhun ni sáha rey un jíin mozo de, suni súcuan sáha máá Tátá rī andiví jíin táca rōhó núu tu cone cáhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíin náhan de.

Siquí jeē ma stóo jnáhan tēe jíin ñahan

(Mr. 10.1-12; Lc. 16.18)

19

1 Te nuū ní ndihí ni cahān Jesús táca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. 2 Te cuehē ñayuu ni candiquín i ya, te yūcuan ní nasávāha ya ñayuu cácuñū.

3 Yūcuán na te ni quecoo jecu tēe grupo fariseo nuū yā, chí cácuni de coto ndee de ya núu ndese cahān yā. Te ni cacajñuhún de ya:

¿A íyó ley jeē cuu ndusñin ñin tēe jíin ñasihí de núu na-ni siquí cúu, chí naún? áchí de.

4 Te ni cahān yā:

¿A tu ní cácahu ró tutu ñi ndese ni sáha Yaā Dios ñayuu nde xīhna ñúhún? Chí tēe jíin

ñahan ni sáha ya, achí. ⁵ Te suni ni cahān Yaā Dios: Jeē yúcuan cúu jeē stóo tēe tátá de náná de, te quijnáhan de jín ñasihí de, te ìn na cuu ndíndúú de, áchí Yaā Dios, achí tutu. ⁶ Núu súcuan te tuá cúu uū jnáhan de, chí ìn na cúu. Jeē yúcuan tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

⁷ Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo ìn tēe ñasihí de, te na cúvāha acta jeē ndusín de jín ña? áchí de.

⁸ Te ni cahān yā jín de:

Siquí jeē níhni ní rō jijnáhan ró, jeē yúcuan ní jēhe Moisés jñuhun jeē stóo ró ñasihí ró. Te nde xīhna ñúhún chí nasū súcuan ní cuu. ⁹ Te ruhū chí cáhán rī jín ró, núu ìn tēe stóo de ñasihí de, te núu nasū jēe tíjni ní ña, te quijnáhan de jín inga ñahan, núu súcuan te cásiquí ndēe de ña. Te núu ìn tēe condeca de ñahan ní ndusín, suni cásiquí ndēe de ña, áchí yá.

¹⁰ Yūcuán na te ni cacahān tēe cáscuáha jín yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹ Te ni cahān yā jín de:

Jñuhun ni cahān rō yāhá, tu níhín jniñu nuū ndihí tēe, chí máá nene tēe jeē ni sáha Yaā Dios jeē níhín jniñu nuū.

¹² Chí íyó tíjni squí jeē jési jeē ma cóndeca tēe ñahan. Chí sava tēe ni cacacu de jeē ma cúu condeca de ñahan. Te

sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan squí jeē ndihví ni de jín jniñu jeē ndácu Yaā andíví nuū de. Tēe jeē cúu cuatáhú jñuhun jeē ma cóndeca de ñahan, na cuatáhú de núu súcuan. Achí yá.

Jeē ni jícān tahú Jesús jehē sūchi lúlí

(Mr. 10.13-16; Lc. 18.15-17)

¹³ Yūcuán na te ni quecoo ñayuu jín sūchi lúlí, jēe na sóo yá ndaha ya xiní i te cacān tahú yā jehē i. Te tēe cáscuáha jín yá, ni cacahān de nuū ñayuu vējicoo jín i. ¹⁴ Te ni cahān Jesús:

Cuāha jñuhun na quíjicoo sūchi lúlí jíñā nuū rī, te ma cásí rō jeē quíjicoo i. Chí ñayuu jeē ndió cóo ni i cani ni i nájñuhun sūchi yáha, suu i quíví ndaha Yaā andíví jēe ndacu ya jniñu nuū i, áchí yá.

¹⁵ Te ni soó yá ndaha ya xiní i jijnáhan i. Te ni quenda ya yūcuan cuáhān yā.

Jñuhun tēe cúcá

(Mr. 10.17-31; Lc. 18.18-30)

¹⁶ Te ìn tēe suchí ní quee de nuū Jesús, te ni cajñuhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihín tahú na cotecu na ní cáni andíví? áchí de.

¹⁷ Te ni cahān yā jín de:

¿Naun cáhán rō jeē tēe vāha cúu rí? Tú ni ìn tēe vāha íyó, chí máá ìn-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndēē jnáhan ró. Ma sacuíhná ró. Ma sajnūhún ró. ¹⁹ Cuatáhú ró nuū taťá rō nuū naná rō. Te cundáhú ni rō jnáhan ró nájñuhun cundáhú ni rō maá ró, achí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmaní gā sáha ná núu súcuan?

²¹ Te ni cahān Jesús:

Núu cúní rō squícu ndihí ró, cuáhán te xīco ró ndihí jeē névāha ró, te cuāha ró núu ñáyuu ndahú. Te nde andiví cuáha ya jeē ndetū ndasí coo ró. Yūcuán na te quiji ró condiquín rō ruhū quihín yō, achí yá.

²² Te tēe suchí un, ná ni jini sōho de jñuhun yáha, te ni cucuíhyá ni de te cuahān de, chí cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahán rī jíin ró, tēe cúcá chí yōhyo yí quívicoo de ndaha Yaā andiví jeē ndacu ya jniñu nuū de. ²⁴ Te cáhán tucu rī jíin ró jeē yachí gā yāha ñin camello yaū yutícuí, vēsú jeē quíví ñin ñáyuu cucá ndaha Yaā Dios jeē ndacu ya jniñu nuū í, achí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jñuhun yáha, te ni cacajñuhun jnáhan de:

¿Ndé ñáyuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí ndihí-ni cuu sáha ya, achí yá.

²⁷ Yūcuán na te ni cahān Pedro:

Sāña jíjnáhan ná ní castóo ná ndihí jeē cánevāha ná, te cándiquín na níhín. ¿Te na vé nihín na núu súcuan? áchí de.

²⁸ Te ni cahān Jesús jíin de:

Ruhū, Yaā ní nduu tēe, jendaá cahán rī jíin ró jíjnáhan ró jeē ñin quíví conene rī mesa ndacu rī jniñu, te yōhyo luu kujénu rī ini ñayívi jeé. Te quíví ún te máá ró jeē ní cacondiquín rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel. ²⁹ Te tāca ñáyuu jeē ni stóo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, síquí jeē cóndiquín i ruhū, te nanihín i ñin ciento gā jeē súcuan. Te suni nihín tahú i cotecu i níí cáni. ³⁰ Te cuehē ñáyuu jeē vijna cácuu i nuū, nduu i sandihí. Te ñáyuu jeē vijna cácuu i sandihí, nduu i nuū. Achí yá.

Jñuhun yátá síquí tēe cáscájniñu

20

¹ Te suhva cúu jeē ndácu Yaā andiví jniñu nuū ñáyuu: Cúu nájñuhun ñin tēe chí ñuhun. Te ñin nehen ni quenda de, ndúcú de tijni mozo jeē taxín ndéhē uva de. ² Te ni sándaā de jíin mozo un jeē chúnaa de ñin denario jeē quíví. Te ni tají de tēe

un cuángoo jeē taxín uva de. ³Yūcuán na te ni quenda tucu de nájñuhun cahīn. Te ni jito de nuū sava ga tēe cáyūcu sáa-ni de nuū yáhu. ⁴Te ni cahān de jín: Róhó jínáhan ró, cuángoo taxín ró uva rī, te chunaa vāha rī yāhu ró, áchí de. Te tēe un cuángoo de. ⁵Te ni quenda tucu de jeē cuácuu cahuxī uū jín jēe cuácuu cahunī, te suni súcuan ni nihīn tucu de mozo. ⁶Te jeē cuácuu cahuhūn ni quenda tucu de. Te ni nihīn tucu de jecu gā tēe cáyūcu sáa-ni nuū yáhu. Te ni cahān de jín: ¿Najehē cáhīn sáa-ni ró yáha ní ndiáca? áchí de. ⁷Te ni cacahān tēe ún: Siquī jeē tú ni ñn ní cána sáña jēe sájniñu ná. Te ni cahān de jín tēe ún: Núu súcuan te suni máá ró quingoo ró taxín ró ndehē uva rī, chi chunaa vāha rī yāhu ró, áchí de. ⁸Te nuū ní ini, te tēe chíí ñuhun ni cahān de jín tēe cújéhnú nuū mozo de: Cana xinī tēe casájñiñu te chunaa rō yāhu de, te xīhna gā tēe ni quívicoo sandihí, te sáa te tēe ni quívicoo xīhna ñúhún, áchí de. ⁹Te ni quecoo tēe jeē ni quívicoo cahuhūn. Te ñn denario ni caquihin ñn ñn de. ¹⁰Yūcuán na te ni quecoo tēe jeē ni quívicoo xīhna ñúhún. Te cájeni ni de jeē cuehē gā quiyāhu de. Te ñn-ni denario ni caquihin ñn ñn de. ¹¹Te nuū ní caquihin de, te ni caquejéé de cácahān sōo de siquī tēe chíí ñuhun, áchí de: ¹²Máá ná jijnáhan ná, ndiáca ni casájñiñu ná, te ni candoho ná jēe jihní. Te tēe yáha jēe

ni quívicoo sandihí, chi máá ñn hora-ni ni casájñiñu de. Te inuú-ni ni chiyāhu ní sáña jín de, áchí de. ¹³Te tēe chíí ñuhun ni cahān jín ñn de: Amigo, nasūu jēe tú vāha sáha rī jín ró. ¿A tu ní sándaā yō jeē ñn denario quiyāhu ró, chí naún? ¹⁴Núu súcuan te quihin yāhu ró te quinhun rō. Chi cúni rī jeē tēe ni quívicoo sandihí yáha, inuú quiyāhu de jín máá ró. ¹⁵¿Te á tu cuu sáha rī ndese cúni rī jín xúhun máá rí? ¿Te chí cúcuésún ni rō jeē ní chiyāhu vāha rī de jijnáhan de siquī jeē vāha ni rī? áchí de. ¹⁶Te nájñuhun ni sáha tēe chíí ñuhun, suni súcuan sáha Yaā Dios. Chi ñayuu cácuu sandihí, nduu i nuū. Te ñayuu cácuu nuū, nduu i sandihí. Chi cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i sēhe ya. Achí yá.

Jeē ni cáhān tucu Jesús jeē cúu yā

(Mr. 10.32-34; Lc. 18.31-34)

¹⁷Yūcuán na te ná ni quihin Jesús ichi cuahān yā ñnuu Jerusalén, te ni cana sīn ya ndihúxí uū tēe cácuáha jín yá. Te ni cahān yā jín de:

¹⁸Cuni sōho ró, chi je cuángoo yó ñnuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujehnú jín núu tēe cástéén tutu ley. Te ndonda de siquī rī jeē cúu rī. ¹⁹Te squívi de ruhū nuū tēe nación Roma jeē cáyūcú Jerusalén cándacu jniñu. Te tāca tēe un

sácatā de nuū rī. Te cani de ruhū, te sáa te cahni de ruhū jicā cruz. Te nuū uní quivī te natecu rī. Achí yá.

Jeē ní jicān naná Jacobo jíin Juan #n favor nuū yā
(Mr. 10.35-45)

²⁰ Yūcuán na te ni quee ñashí Zebedeo nuū yā jíin séhe ña Jacobo jíin Juan. Te ni jecuiñī yití ña nuū yā, jíicān ña #n favor nuū yā. ²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnúhun jeē quivī ndácu ní jniñu te conēne ndindúú séhe ná yáha xiin ní, #n i lado váha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho rō jnúndóho nájnūhun jeē quíji siquī rī? ¿Te á canda rō ndoho xeēn rō nájnūhun ndoho rī? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho rō jnúndóho nájnūhun jeē quíji siquī rī, te ndoho xeēn rō nájnūhun ndoho rī. Te jeē cōnēne rō lado váha ri jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca téee jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquitī ni de nuū uú ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásáha tēe cácujeñnu nuū ñáyuu tāca nación. Chi cándacu níhin de jniñu nuū i, te máa de cáchí ndese coo. ²⁶ Te máa rō jíinánhan rō, chi ma sáha rō súcuan. Chi núu ndé #n rō cúní cujeñnu, sa suhva cuajniñu rō núu jnánhan rō. ²⁷ Te núu ndé #n rō cúní cuu nuū, sa suhva sáha rō máa rō mozo nuū jnánhan rō. ²⁸ Chi suni súcuan sáha ruhū, Yaā ní nduu tēe, chi nasūu jeē véji ri jeē cuajniñu ñáyuu nuū rī, chi sa suhva véji ri jeē cuajniñu ri nuū ñáyuu. Te cuāha ri maá rí cuu rī návāha jnama ri cuehē ñáyuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ní candiquīn i ya. ³⁰ Te yuhíchi un cáyūcu uū tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máa ní jeē cúu ní Séhe yucūn David, cundáhú ni ní sáña, achí de.

³¹ Te ñáyuu un ní cacahān i nuū de jeē na cási de yuhu de. Te víhyá gā ni cacana jee de:

Máa ní jeē cúu ní Séhe yucūn David, cundáhú ni ní sáña víi, achí de.

³² Te ni jecuiñī Jesús, te ni cana ya ndindúú téee cuáá un, te ni cajnūhun yá de:

¿Na vé sáha ri jíin rō cácuni rō?

³³ Te ni cacahān de jíin yá:

Jeē na ndúndijin tinūu ná cácuni ná, achí de.

³⁴ Te ni cundáhu ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquin de ya cuango de jín yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuū cuácuyajni ya ñuu Jerusalén, te ni jinū yā jín tée cáscuáha jín yá ñuu Betfagé, jeē ine jehē yucu Olivos. Te ni tají yá uū tée cáscuáha jín yá jeē quingoo de. ² Te áchí yá jín de:

Cuáhán ñuu lulí ine ichi núú. Te yūcuan níhín rō in burra, núhni tī jín in burro lulí. Te ndají ró tī, quijicoo ró jín tí nuū rī. ³ Te núu ndé in cahán jín ró, te cachi rō nuū: Máá Jítoho yō jini ñúhún yá tī, achi rō. Yūcuán na te siáa-ni i tī, quiji ró jín tí, áchí yá.

⁴ Te súcuan ni cuu tācá jniñu yáha návāha squícu jñuhun ni cahán tē ni nacani jñuhun Yaā Dios nde jenahán, yósó núú tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yáhá condēhe ró jeē véji Rey rō.

Tu sájéhu ya maá yá, chi máa burra-ni yósó yá,

jín burrito, sēhe quití ndíso.

Achí tutu.

⁶ Yūcuán na te tē cáscuáha un cuango de, te ni casáha de nájnūhun ni ndacu Jesús jniñu nuū de. ⁷ Te ndéca de burra jín séhe tī, ni ndecoo de nuū yā. Te ni casoó de sahna

de siquī tī, te ni jecosō yā tī.

⁸ Te cáhiin cuehē ñayuu, te ni cascáa i sahna i ini ichi. Te sava ga i ni cajehnde ndaha ñúú, te ni cachucun i ini ichi.

⁹ Te ñayuu cuango ichi núú jín ñáyuu cuango ichi yátá, cácana jee i:

Yōhoyo cújéhu Yaā cúu Sēhe yucūn rey David. Yōhoyo vāha Yaā cúu Yaā jeē véji jín jniñu máá Jítoho yō Yaā Dios. Te yōhoyo cújéhu máá Yaā Dios. Achí i.

¹⁰ Te nuū ni quívi ya ñuu Jerusalén, te ndihi ñayuu ñuu un ní cacuvaā i, te cuehē i cájnūhun jnáhan:

¿Ndé tēe cúu tēe yáha? áchí i.

¹¹ Te ni cacahán ñayuu vējicoo jín yá:

Yáha cúu Jesús jeē nácani jñuhun Yaā Dios, jeē véji nde ñuu Nazaret ndañúu Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yaā Dios. Te ni quenehen ya tāca ñáyuu cájeen quití te cánaxico núú ñáyuu jeē socō i. Te ni scotúú ndeyi ya tāca mesa tēe cástáyi xūhún, jín silla tēe cáxícó paloma. ¹³ Te áchí yá jín i:

Yósó núú tútu i jeē cahán Yaā Dios: Vehe ri chi vehe nuū cájicān tahú cúu, áchí Yaā Dios. Te máá ró jijnáhan ró, chi nájnūhun yaū cava ñacuīhná ni canasáha ró. Achí yá.

14 Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávaha ya i. 15 Te sutū cácujuhnu jíin tēe cástéén tutu ley Yaā Dios, ni cajito de tācá jniñu jéhu sáha ya, te ni cajini de jeē cácana jee sūchi lúli ini templo: Yōhyo cújuhnu Yaā cúu Sēhe yucūn rey David, achí i. Te ni caquití ni de. 16 Te ni cacahān de jíin yá:

¿A tu jíini ró jēe súcuan cácahān sūchi yáha? áchí de.

Te ni cahān Jesús jíin de:

Jíini ri. ¿Te á ná tu cahu ró jēe yosó nuū tútu i jeē suhva cáhān ĩn tēe jíin Yaā Dios?

Sáha ní jēe tāca sūchi lúli jíin sūchi cájexin, vāha ndasí cáhān i jeē Yaā cújuhnu cúu Cristo.

Achí.

17 Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáá ún.

Jeē ni cáhān yā nuū yújnu higo

(Mr. 11.12-14, 20-26)

18 Te jenéhen inga quiví cuanuhun yā ñuu Jerusalén, te jíi yā sōco. 19 Te ni jito ya ĩn nundēhe higo, ín yuhíchi. Te ni jehēn yā jehē. Te tú na ndehē ni níhín yā, chí máá ndaha-ni ín. Te ni cahān yā jíin:

Vijna te ma cúun cuití gā ndehē xinī rō, achí yá.

Te ni ichī-ni yujnu higo ún.

20 Te tēe cáscuáha jíin yá, ni

canaa ni de cájito de. Te ni cacajnūhún de ya:

¿Ndese ni sáha ní jēe yachí-ni ni ichī yujnu higo? achí de.

21 Te ni cahān yā jíin de:

Jendaá cahān rī jíin ró, núu candíje ró te tú caní siquí ni rō, te cuu sáha ró jniñu jéhu nájnūhun ni sáha ri jíin yujnu higo. Te nde jniñu jéhu ga cuu sáha ró, chí nde cuu cahān rō jeē cújiyo yucu yáha, quihīn nuū mar, te sáha nájnūhun cahān rō. 22 Te tāca jēe cacán tahu rō jijnáhan ró, te núu candíje ró jēe nihín rō, te nihīn rō. Achí yá.

Siquí jeē ndiso jniñu Jesús

(Mr. 11.27-33; Lc. 20.1-8)

23 Te ni quiví tucu ya ini templo cáhnu. Te níni stéén yā jnūhun, te sutū cácujuhnu jíin táca tēe jéhu jeē cándacu jniñu nuū ñáyuu hebreo, ni quecoo de nuū yā. Te ni cacajnūhún de ya:

¿Ndé ní nihīn jniñu ró jēe sáha ró jniñu yáha? ¿Te ndé ĩn ni tee jniñu siquí rō jeē sáha ró súcuan? Achí de.

24 Te ni cahān Jesús:

Suni ruhū, cajnūhun rí rohó ĩn jnūhun jijnáhan ró, te núu cuu stío cuíñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. 25 ¿Ndé ĩn ni tee jniñu siquí Juan jeē ni scuándute de? ¿A Yaā Dios chí táca tēe? áchí yá jíin de.

Yūcuán na te ni canda-jnūhun máá de:

Núu cahān yō jeē Yaā Dios ni tee ya jniñu un siquí Juan, te cahān de jíin yó:

Núu súcuan ¿te najehē tu ní cá candíje ró de? ²⁶ Te núu cahān yō jeē ñayuu ni catee jniñu un síquī de, te cáyūhu yó ñayuu, chí ndivii i cá candíje i jeē téē ni nacani jnūhun Yaā Dios ni cuu ndije Juan. Achí de cácahān maá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ñn ni tee jniñu síquī rī sáha ri jniñu yáha, achí yá.

Jnūhun yátá síquī uú sēhe yí

²⁸ Te ni cahān gā yā jíin de:

Cuni nahín ró jnūhun yátá yáha: ñn tēē ni iyo uū sēhe yí de. Te ni cahān de jíin ñn i: Séhē, quihīn rō taxín ró ndehē uva rī vijna, achí de. ²⁹ Te ni cahān i: Ma quihín na, achí i. Te ni cunúu, te ni nacani ni i, te cuahān i nuū jniñu ún.

³⁰ Te tēē un ní jehēn de nuū ínga sēhe de, te suni súcuan ni cahān de jíin i. Te ni cahān i: Cuu núu súcuan, te quihīn na, achí i. Te tu ní jéhén i. ³¹ ¿Te ndese cájeni ni rō? Jeē ndíndúú i, ¿ndé ñn i ni squícu jniñu cúní tatá i? achí yá.

Te ni cacahān de:

Sūchi jéē ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahán rī jíin ró jeē téē cástútú xūhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu

nuū i, te maá ró jíinahan ró chí ma quívi ró. ³² Chí ni quiji Juan, ni steén de ndese condiquīn rō jnūhun ndaā, te tu ní cá candíje ró jnūhun ni cahān de. Te sa suhva tēē cástútú xūhun renta jíin ñahan cájica jnéni, ni cá candíje i jnūhun ni cahān de. Te maá ró, vésú ni cajito ró jéē ní cacandíje i, te tu ní cá nacani cuiñi ni rō jeē candíje ró. Achí yá.

Jnūhun yátá síquī tēē néē cá sájniñu nuū uva

(Mr. 12.1-12; Lc. 20.9-19)

³³ 'Cuni sōho inga jnūhun yátá jíinahan ró: Ni iyo ñn tēē chí ñuhun. Te ni nachuhun de cuehē ndehē uva. Te ni jesi de corral, te ni sáha de ñn nuū cúhun ndehē un táxīn. Te ni jeni de ñn vehe súcún návāha cuu coto de ní cáhnu.

'Te ni stóo de nuū sava tēē sájniñu nuū, te cuu sava de ndehē jíin. Te ni tee de ichi cuahān jicá de. ³⁴ Te maá tiempo ndutútú uva, te ni tají de jecu mozo cuanuquihín sava uva nuū téē cá sájniñu ún.

³⁵ Te tēē un ní cajni de mozo un. Te ñn i ni cacani de, te inga i ni cajehni de, te inga i ni cajēhe de yuū xinī. ³⁶ Te tēē chí uva ni tají tucu de jecu gā mozo cuango, cuehē gā vésú jeē xíhna ñuhún. Te suni súcuan ni casáha tēē un jíin ndíhi mozo un.

³⁷ 'Te jeē sándíhí na te ni tají de sēhe de cuahān. Te jeni ni de: Tēē ún chí cuatáhú de jíinahan de nuū séhe rī. ³⁸ Te tēē cá sájniñu ún, núu ní cajito de nuū séhe tēē chí uva, te

ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áhí. ³⁹ Te ni cajñi de i, te ni caquenehen de i inga lado, te ni cajehni de i. Achí yá.

⁴⁰ Yūcuán na te ni cajñūhun yá de:

Núu súcuan te núu na quíji tēe chíí uva un, ¿te ndese sáha de jíin tēe cásájniñu ún? áhí yá.

⁴¹ Te ni cacahān de jíin yá:

Ma cundáhú cuítí ni de tāca tēe cásáha jniñu néé un, chí cahni de. Te cuāha de ñuhun cáa uva un núu inga sava tēe sájniñu nuū, cuu sava de ndehē jíin. Te quiví ndutútú ndehē, te tēe ún nacuāha de sava ndehē nuū tēe chíí uva. Achí de.

⁴² Te ni cahān Jesús jíin de:

¿Te á ná tu cahu ró jñūhun yáha jeē yosó núu tútu íi, jeē ruhū cúu nájnūhun ñn yuū? Chí áhí tutu:

Yuū jeē ní casquéhichí tēe cájeni vehe,
yuū yáha nduu jeē quítuu vehe.

Máá Jítoho yō Yaā Dios ni sáha ya súcuan,
te cánaa ni yō jíto yó jniñu yáha.

Achí tutu. ⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájnūhun cúní yā.

⁴⁴ Te ñayuu tu cácandíje, ndoho i nájnūhun ndóho ñayuu jeē cotúú siquī yuū te jnánhú i. Te quiví sándaā Yaā Dios cuēchi, te ñayuu tu cácandíje, ndoho

i nájnūhun ndóho ñayuu jeē nínga yuū siquī i te cundihí i sáha. Achí yá.

⁴⁵ Te sutū cácujeñnu jíin tēe grupo fariseo ni cajini sōho de tāca jñūhun yátá ní cahān yā. Te ni cajecūhun ni de jeē siquī maá de cúu jñūhun yátá ní cahān yā siquī tēe cásájniñu nuū uva jíin tēe cájeni vehe. ⁴⁶ Te ni canducú de modo jñi de ya. Te cáyūhú de jeē quití ni ñayuu, chí cájeni ni i jeē tēe nácani jñūhun Yaā Dios cúu ya.

Jñūhun yátá siquī vico nándāha

22

¹ Yūcuán na te ni cahān tucu Jesús inga jñūhun yátá jíin de jijnáhan de:

² Súcuan cúu jeē ndácu Yaā andiví jniñu nuū ñáyuu: Cúu nájnūhun ñn rey jeē sáha de ñn vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhán de jíin jēe quíjicoo. Te ñayuu ún tu ní cácu ni i quíjicoo i.

⁴ Te ni tají tucu de jecu gā mozo quingoo, te áhí de jíin: Cahān jíin ñáyuu ní cana rī un jēe iyó túhva ndeyu. Chí je ni jehni rī stiquī rī jíin táca gá quití ní nduu, te ndihí je iyó túhva. Nehen jijnáhan ró vico nándāha. Achí rō jíin i. Achí de. ⁵ Te ñayuu ní cana de ún tu ní cásáha i cuenta. Chí ñn i cuahān nuū ítu i, te inga i cuahān nuū jniñu sáha i. ⁶ Te sava ga i ni cajñi i tāca mozo rey, te ni casácatā i nuū, te ni cajehni i. ⁷ Yūcuán na te yōhyo ni quití ni rey. Te ni tají de soldado de ni

jengoo, ni cajehni de ñayuu ní cajehni ndīyī ún, te ni cajehmu de ñuu i. ⁸ Yūcuán na te ni cahān de jīn sava ga mozo de: Ndihi je iyó tūhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñayuu váha cácuu i. ⁹ Núu sūcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te sūcuan te ni chitú ñayuu ini vehe nuū iyó vico nándāha.

¹¹ Te ni quīvi rey ini vehe jeē cahán de jīn ñayuu ni cutútú. Te ni jito de nuū ñn tēe jeē tu ñūhun sahma jeē ni jéhe de cuhun ñayuu quíjicoo vico nándāha. ¹² Te ni cahān de jīn tēe ún: Amigo, ¿ndese ni quīvi ró yáha jēe tu ñūhun ró sahma vico nándāha? áchí de. Te máá tēe ún tu ní cahán cuīti de. ¹³ Yūcuán na te ni cahān rey jīn tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quéhe nuū néē. Te yūcuan ndáhyū de te nacayihí yuhu de jeē ndóho xeēn de. Achí rey. ¹⁴ Chi cána Yaā Dios cuehē ñayuu jeē na cándíje i. Te jecu-ni i cándíje, te máá i nácāji ya jeē ndúu i sēhe ya. Achí Jesús.

Siquī xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni canda-jnūhún de núu ndese sáha de návāha cahān yā ñn jnūhun jeē nihín de cuēchi siquī yā. ¹⁶ Te ni catajī de jecu tēe cáscuáha jīn máá de jīn tēe grupo Herodes cuangoo de. Te ni cacahān de jīn yá:

Maestro, cájini na jēe tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ñn ñayuu siquī ní, chi tu sáha ní cuenta ndese cúu ñn ñn i, chi ñnuú-ni sáha ní jīn i. ¹⁷ Núu sūcuan te cahān ní ndese jéni ni ní: ¿A iyó váha jeē chúnaa yō renta nuū rey nación Roma jeē jñi nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahān yā jīn de:

Tēe stáhú-ni cácuu ró. ¿Najehē cájito ndee rō ruhū?

¹⁹ Stéén xūhun jēe jéconaā renta na cóto ri, achí yá.

Te ni castéén de ñn denario nuū yā. ²⁰ Te ni jito ya, te ni cajnūhun yá de:

¿Ndé ñn nuū cúu jeē ndee nuū xúhun yáha, te ndé síhvi cúu jeē ndeé yāhā?

²¹ Te ni cacahān de jīn yá:

Nuū jīn síhvi rey un cúu, áchí de.

Yūcuán na te ni cahān yā jīn de:

Núu sūcuan te nacuāha ró núu rey un jēe yíhi cuenta nuū de, te nacuāha ró núu Yaā Dios táca jēe yíhi cuenta nuū maá yá, achí yá.

²² Te nuū ní cajini de jeē ndichí ní cahān yā jnūhun

yáha, te ni canaa ni de, te ni castoo de ya, te cuangoo de.

Jeē ní cacajñuhún de siquī jeē nátecu ndīyi

(Mr. 12.18-27; Lc. 20.27-40)

²³ Te suni quivī un ní que-coo jecu tēe grupo saduceo nuū yā. Te tēe un cácahān jeē tu nátecu cuiti ndīyi. Te ni cacahān de jíin yá siquī ñn jñuhun, áchí de:

²⁴ Maestro, Moisés ni cahān de jeē núu ñn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndīyi ñani de. Achí Moisés. ²⁵ Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. ²⁶ Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndihí de ni cajihí, te suni ni jihí ñahan ún. ²⁸ Núu súcuan te quivī nátecu ndīyi, ¿ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástívi ró jñuhun siquī jeē tu cájecūhun ni rō jeē cahán tutu ñi, ni tu cájini rō jeē iyó poder Yaā Dios jeē nastécu yā ndīyi. ³⁰ Chi quivī nátecu ndīyi, te tuá na jñuhun quijnáhan tēe jíin ñahan coo. Chi coo i nájnūhun ndajéhé Yaā Dios andiví. ³¹ Te siquī jeē nátecu ndīyi, ¿á tu ní cácahu ró tutu jñuhun jeē cahán Yaā

Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu níí cáni. Achí yá jíin de.

³³ Te ñayuu un ní canaa ni i cájini nahín i jñuhun stéén yā.

Jniñu cánuú ndasí gá jeē ní ndacu Yaā Dios
(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. ³⁵ Te ñn de jeē cúu tēe stéén tutu ley Yaā Dios, ni cajñuhún de ya, chi coto ndee de ya cuní de:

³⁶ Maestro, ¿ndé ñn cúu jñuhun ndácu jniñu cánuú ndasí gá nuū tutu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnáā ndasí ró sáha ró ndihí jeē cúsiñi ni yā, nde jíin ñni jíin ánuá rō, jíin ní jée níjnūmí rō, achí tutu. ³⁸ Yāha cúu jniñu ndácu ya jeē cujéhnū ga te cánuú ndasí gá. ³⁹ Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró. ⁴⁰ Te chíji ndindúú jñuhun yáha ní quenda ndihí ley jeē ní tee Moisés, jíin ndihí jeē ní castéén tēe ni canacani jñuhun Yaā Dios, achí yá.

Siquī jeē cúu Cristo sēhe yucūn David
(Mr. 12.35-37; Lc. 20.41-44)

41 Te níní cáyūcu tútú gá tēe fariseo un, te Jesús ni cajnūhun yá de:

42 ¿Ndese cájeni ni rō siquī Cristo? ¿Sēhe ndé yúcūn cúu ya?

Te ni cacahān de:
Sēhe yucūn David, achí de.

43 Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espíritu Santo ndejenahán? Chi ni cahān de:

44 Máá Jítoho yō Yaā Dios ni cahān yā jíin Jítoho rī, Yaā quiiji:

Cucōo ró lado váha ri nuū cujéhnú ró,
te na sáha ri jeē quende rō poder tāca jéē cájito uhū rohó.

Achí Yaā Dios. Achí David.
45 Te núu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? achí yá.

46 Te ni ñn de tu ní cúu stió cuiñí cuiñi de jnūhun nuū yā. Te nde quiñí ún tuá ni ñn de ní chūndeyí ni de cajnūhún de ya.

Jeē ni cáhānyā jeē iyó cuéchi de jíinahan de
(Mr. 12.38-40; Lc. 11.37-54; 20.45-47)

23

1 Yūcuán na te ni cahān Jesús jíin ñáyuu jíin tée cáscuáha jíin yá:

2 Tēe cástéén tutu ley Yaā Dios jíin tée grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. 3 Núu súcuan te cuatáhú ró te squícu ró tāca jéē cándacu de nuū rō. Te

ma sáha ró nájñūhun cásaáha máá de. Chi cácahān-ni de, te tu cáscuácu de. 4 Chi suni cástéén de tāca ley ni catava maá de jeē yí sáha, te cátee de siquī ñáyuu, te tu cácuñdeyí i squícu i. Te máá de jíinahan de, chi ni ñn xinī ndáha de tu cáscánda de jeē squícu de. 5 Te máni siquī jeē na cuájñūhún ñáyuu de cúu ndíhi jeē casáha de. Chi cánujnahan ni de cuhni de cuehē jnūhun tutu ñ jneē de jíin ndaha de. Te suni cáscáca ni ga de yuhvá yusáhma de jeē steén jeē cácuñdeyí ga de vésú inga ñáyuu. 6 Te cánujnahan ni de cucōo de nuū silla yíñūhún gá nuū cáyeji ñáyuu víco, jíin silla yíñūhún gá ini vehe ñ sinagoga. 7 Te suni cánujnahan ni de jeē cahán yíñūhún ñáyuu jíin de nuū calle, jíin jéē cahán i maestro jíin de.

8 Te máá ró jíinahan ró, ma cuáha ró jnūhun jeē cahán ñáyuu maestro jíin ró. Chi ñnuú cácuu ndíhi ró jéē cácuu ró hermano, te iyó ñn-ni Maestro rō jeē cúu ruhū, Cristo. 9 Te ma chíñūhún ró ni ñn tēe ñayívi yáha jeē cahán rō padre jíin de. Chi iyó ñn-ni Tátá rō jíinahan ró, Yaā ndeé andívi. 10 Te suni ma cuáha ró jnūhun jeē cahán i jitoho jíin ró. Chi iyó ñn-ni Jitoho rō, te suu cúu ruhū, Cristo. 11 Te tēe mēhñu ró jíinahan ró jeē jeñíñu nuū jnahan, suu de cúu jeē cujéhnú ga. 12 Chi tēe jeē sajeñu de máá de, sa ndululí de. Te tēe jeē sálulí de máá de, sa ndujéhnú de.

13 'Nacā xeēn ndoho róhó

tée cástéén tutu ley jiín róhó tée fariseo, chi tée stáhú-ni cácuu ró. Chi cájesi rō jeē quívi ñayuu ndaha Yaā andiví jēē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

14 'Nacā xeēn ndoho róhó tée cástéén tutu ley jiín róhó tée fariseo, chi tée stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahú nahán ró návāha cani ní ñayuu jeē tú na cuēchi ró. Jeē yūcuān xeēn gā ndoho ró castigo.

15 'Nacā xeēn ndoho róhó tée cástéén tutu ley jiín róhó tée fariseo, chi tée stáhú-ni cácuu ró. Chi ní ñuhun íchi jiín ní mar cájica cuu ró cánducú ró ñin ñayuu scandíje ró sáhān maá ró. Te núu ni candíje i, te cásaáha ró jēē vihyá gā cúu cuēchi i jeē quihín i infierno vēsú maá ró.

16 'Nacā xeēn ndoho ró, chi cácuu ró nájnūhun tēē cuáá jēē steén ichi nuū ñáyuu. Chi cácahān rō: Núu ndé tēē jéjnūhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. 17 Tēē cánéé tēē cuáá cácuu ró jēē castíví ró jnúhun cácahān rō. ¿Ndé ñin cúu jeē cujéhnu ga, á oro un chí Yaā Dios jeē ndeé ini templo jeē sáhíi oro

un? 18 Te suni cácahān rō: Núu ndé tēē jéjnūhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajniñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. 19 Tēē cánéé tēē cuáá cácuu ró jēē castíví ró jnúhun cácahān rō. ¿Ndé ñin cúu jeē cujéhnu ga, á ndajniñu yúcu nuū altar, chí Yaā Dios jeē sáhíi yā ndajniñu ún?

20 Núu súcuān te tēē jéjnūhun téyí, te núu ndácunehen de Yaā Dios jeē chíí altar, núu súcuān te nde jiín ndajniñu yúcu nuū altar ndácunehen de. 21 Te tēē jeē jéjnūhun téyí, te núu ndácunehen de templo, núu súcuān te nde jiín Yaā Dios jeē ndeé ini templo ndácunehen de. 22 Te tēē jéjnūhun téyí, te núu ndácunehen de andiví, núu súcuān te suni ndácunehen de mesa Yaā Dios te nde jiín máá Yaā Dios jeē ndeé nuū mesa un.

23 'Nacā xeēn ndoho róhó tēē cástéén tutu ley jiín róhó tēē fariseo, chi tēē stáhú-ni cácuu ró. Chi cásaáha ró úxí úxí nuhni tamínú jiín yucú anís jiín yucú comino, te cásocō rō ñin ñin siquí tāca úxí un núu Yaā Dios. Te cástóo ró jnúhun cánuú ndasí gá nuū ley, suu jeē cáca ndaā rō, jiín jēē cundáhú ni rō jnáhan ró, jiín jēē candíje ró. Tāca jēē yáha cánuú sáha ró núu, te suni ma stóo ró jēē socó rō

tāca yúcū ún. ²⁴ Cácuu ró nájñuhun tēe cuáá jēē steén ichi nuū ñayuu. Chi cásquícū ró ñin jeē lulí gá un, te cástóo ró jēē cánuú gá. Te suu cúu nájñuhun jeē cátava rō chūcún ndíhī jeē ñúhun nuū ndúxi, te cácocó ró ñin quiti cáhnu jeē naní camello.

²⁵ 'Nacā xeēn ndoño rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi nájñuhun jeē cánacate ró yátā vaso jíin yátā cohó. Te ichi ñni rō chi ñúhun máni máá jñuhun cuíhná jíin jñuhun ndíyo ni. ²⁶ Tēe cuáá cácuu ró, fariseo. Xíhna gā sáha ró jēē coo ndoo ñni anuá rō, te yūcuán na te suni coo ndoo tāca jēē casáha ró jēē cájito ñayuu nuū.

²⁷ 'Nacā xeēn ndoño rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi cándāa ró nájñuhun vehe ndíyi nuū panteón jeē cáyaa. Chi ichi yátá jíto luu, te ichi ñni ñúhun chitú yiqui ndíyi jíin táca jēē tehyú. ²⁸ Te súcuu cácuu máá ró, chi ichi yátá rō casáha ró jeē tēe ndaā cácuu ró núu ñayuu. Te ichi ñni rō ñúhun chitú jñuhun stáhú-ni jíin jñuhun néé.

²⁹ 'Nacā xeēn ndoño rōhó tēe cástéén tutu ley jíin rōhó tēe fariseo, chi tēe stáhú-ni cácuu ró. Chi casáha ró vehe siquī nuū yíndūji ndíyi jíí rō, tēe ni canacani jñuhun Yaā Dios nde jenahán. Te casáha luu ró vehe siquī nuū yíndūji táca tēe ni iyo ndaā. ³⁰ Te cácahān rō: Núu jeē suni yúcu yó tiempo jeē ní cotecu ndíyi

jíí yō, te ma squívi nduu yō jíin de jeē cáhni yō tēe ni canacani jñuhun Yaā Dios, achí ró. ³¹ Te súcuu cácahān ndaā rō jeē maá ró cácuu yucūn ñayuu ni cajehni tēe ni canacani jñuhun ya. ³² Núu súcuu te tāca cuéchi jeē ní casqujéjé ndíyi jíí rō, máni un casáha ga maá ró.

³³ 'Va sēhe coō cácuu ró, chi xeēn rō nájñuhun coō. ¿Ndesē cācu ró jēē ma jnahnú ndetū rō quingoo ró infierno? ³⁴ Núu súcuu te tají rí tāca tēe nacani jñuhun Yaā Dios nuū rō, jíin táca tēe ndíchí jēē castéén jñuhun ya. Te sava de cahni rō, te sava de cata caa ró jíicā cruz. Te sava ga de cani ró de ñni táca vehe ñi sinagoga, te scúnu ró de quingoo de táca ñuu. ³⁵ Te súcuu te condee cuéchi siquī maá ró jeē ní cajehni jíí rō táca tēe ndaā, xíhna gā nde Abel tēe ndaā, te nde Zacarías sēhe Berequías, tēe ni cajehni de ñni templo sava mēhñu cuarto ñi jíin altar. ³⁶ Jendaá cahán rí jíin ró jeē táca cuéchi yáha condee siquī ñayuu iyó vijna.

Jeē cucuíhyá ni yā jíto ya ñuu Jerusalén

(Lc. 13.34-35)

³⁷ 'Róhó ñuu Jerusalén, jéhni rō tēe cánacani jñuhun Yaā Dios, te jéhe ro yúu xiní tēe tájí Yaā Dios vējicoo nuū rō. Te cuehē jínu ni cuni rí nastútú rí sēhe ró, nájñuhun ndují jēē nastútú tí sēhe tí chíji ndijēn tí, te tu ní cúní rō. ³⁸ Núu súcuu te vijna te stóo uun na rí rōhó jíin sēhe ró. ³⁹ Chi cahán rí

jiín ró jéē ndé vijna te ma cóto cuiti gā rō nuū rī, chi nde quiiji quivī jeē cahán sēhe ró: Yōhyo vāha Yaā cúu Yaā véndiji jiín jniñu máá Jítóho yō Yaā Dios, achi i. Achí yá.

Jeē ní cachi yā jeē náā templo

(Mr. 13.1-2; Lc. 21.5-6)

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jiín yá, te ni cacahān de jiín yá siquī tācá vehe jeē ndejnáhan jeē cúu máá templo un. ² Te ni cahān yā jiín de:

Tāca jéē cájito ró yáha, jendaá cahán rī jiín ró jeē quiiji quivī jeē ma cóso jnáhan ga ni ñn yuū, chi ndihi jnanū. Achí yá.

Na seña coo nuū cuácuyajni ndihi ñayiví

(Mr. 13.3-23; Lc. 21.7-24; 17.22-24)

³ Te ni jehēn yā jiín tēe cáscuáha jiín yá nde yucu Olivos, te ni cucōo ya yūcuán. Te ni quecoo de nuū yā, te ni cacajñuhun sñn de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndiji ní jiín jéē jínu ñayiví? áchí de.

⁴ Te ni cahān Jesús:

Coto ró jéē ma stahú ni ñn de rōhó. ⁵ Chi quiijicoo cuehē tēe jeē stahú jiín síhví rí. Máá rí cúu Cristo, achi de. Te súcuan stahú de cuehē ñayuu. ⁶ Te nihñn rō jñuhun jeē tāca lado iyó guerra, chí

je yajni coo guerra. Te ma yūhu ró, chi cánuú coo súcuan. Te ni ná tu jinū quivī ndihi ñayiví. ⁷ Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jiín cuéhyī xeēn. Te cháha chúcuan jñāa. ⁸ Te tāca jéē yáha cácuu jñūndóho quejéé xíhna ññhún gá.

⁹ Yūcuán na te nastúu i rōhó jijnáhan ró jéē stóho i rōhó te cahni i rōhó. Te ndihi ñayuu quitī ni i nuū rō jeē siquī ruhū. ¹⁰ Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. ¹¹ Te canecoo cuehē tēe stahú, te cahān de jeē jñuhun Yaā Dios cánacani de, te stahú de cuehē ñayuu. ¹² Te nducuehē jniñu néé, te jeē yúcuan cuehē i ma cóo manī gā i. ¹³ Te ñayuu cuiñi ñihin jiín jñuhun ri nde quivī jínu, ñayuu ún chi cācu. ¹⁴ Te jñuhun yáha siquī ndese ndácu Yaā Dios jniñu, cuitē núu ñí cáhnu ñayiví, návāha cuni ñayuu tācá nación. Yūcuán na te jínu ñayiví.

¹⁵ Te Daniel, tēe ni nacani jñuhun Yaā Dios, ni tee de jñuhun ñn tēe néé jéē quíji. Te rōhó jéē cácahu tutu ún, na jécūhun ni rō. Chi ñn quivī te cuni rō jeē sáha ndevāha de jeē stívi de tācá ndajniñu ñi ini templo, te cuiñi de ini lugar ñi. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quéhe, ma ndívi i ini vehe

jeē quénehen i ndajníñu i, chi cánuú cunu yachī i návāha cācu i. ¹⁸ Te ñayuu cáhiin nuū itu, ma ndiji i vehe jeē quíhin i sahma i. ¹⁹ Te quivī ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachī ña. ²⁰ Te cacān tahu rō jeē ma quíji jñúndóho un jéē cunu ró máá tiempo cúun yuhvā ni quivī ndétātú. ²¹ Chi jeē quejéé un te coo cuehē jñúndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndihi jñúndóho ún te ni ma cóo ga jeē súcuan. ²² Te núu tú nastíyi Yaā Dios tiempo jñúndóho ún, te ni ñin ñayuu ma cácu cuiti i. Te jeē siquí ñayuu cácandíje jeē ní nacāji ya, jeē yúcuan nastíyi ya tiempo un.

²³ 'Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahán i. ²⁴ Chi canecoo tēe cástáhú jéē achi de jeē Cristo cúu de, chí achi de jeē tēe nácani jñuhun Yaā Dios cúu de. Te sáha de jniñu jéñnu jeē naa ni ñayuu coto i, návāha stáhú de nde maá ñayuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jíin ró: Cuácondēhe ró, chí nde nuū ñuhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chí ini vehe yāha íne ya, achi i, te ma candíje ró jíjnáhan ró. ²⁷ Chi nájnūhun jeē ndíndēe

sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quivī ndiji ruhū, Yaā ní nduu tēe, chí ndihi ñayuu coto. ²⁸ Te nájnūhun jeē cutútú téji ndé-ni cúu nuū catú quiti ní jhī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

Ndese coo quivī ndiji Yaā ní nduu tēe

(Mr. 13.24-37; Lc. 21.25-33; 17.26-30, 34-36)

²⁹ Yūcuán na te núu ni ndihi tāca jñúndóho quivī ún, te cojnúú niāndii, te yoō ma ndí gā. Te ningoo quimi andiví. Te tāca jéē íin andiví chí quisi i. ³⁰ Yūcuán na te coto ñayuu nuū maá rí, Yaā ní nduu tēe, ndiji ri ichi andiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu kujéñnu ri. ³¹ Te taji rí ndajéhé rī quin-goo, te tiví ñihin ya trompeta. Te quinastútú yá ñayuu ní nacāji ri ndicúún lado ñayiví, nde ñin lado ñayiví jíin ndé inga lado.

³² 'Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jhni. ³³ Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachī coo. ³⁴ Jendaá cahán rī jíin ró jeē ma cúu ndihi ñayuu jeē cóto jñúndóho ún, chí nde squícu

ndihi jniñu ún. ³⁵ Andiví jíin ñáyiví chi naa, te tāca jnūhun cáhán rī chi ma nāa, chi ndihi squícu.

³⁶ Te quiví jíin hora jeē ndíji ri, tú ni ñn ñayuu jiní, ni máa ndajéhé cáhīyo andiví, ni máa rí, Sēhe Yaā Dios. Chi máa ñn ni Tátá rī Yaā Dios cúu jeē jiní.

³⁷ 'Chi nájnūhun ni cuu quiví ni iyo Noé, suni súcuan coo quiví ndiji ruhū, Yaā ní nduu tēe. ³⁸ Chi quiví ún, nde ná tu cuun saū xeén, te cáyeji i cájhi i, cánandāha i, te cájēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. ³⁹ Te tu ní cácandíje ñayuu jeē cuun saū xeén, te ni cuun, te ni ndaa ndute ni cajihī ndihi i. Te suni súcuan coo núu na ndíji ruhū, Yaā ní nduu tēe. ⁴⁰ Te quiví ún cone uū tēe sájniñu nuū ítu. Te ñn de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñn ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cácandíje i.

⁴² 'Núu súcuan te ndito na cóo ni rō, chi tu cájini rō na quiví ndiji Jitoho rō. ⁴³ Te na chūhun ni rō jeē cahán jnūhun yátá yáha: Tēe chíi vehe, núu jeē jiní de na hora quiiji ñacuīhná, te condito de, te ma cuáha de jnūhun sácuīhná ndajniñu vehe de núu. ⁴⁴ Te rōhó jíjnahan ró, suni súcuan coo tūhva ró, chi máa hora jeē tú na vé cájeni ni rō, te ndiji ruhū, Yaā ní nduu tēe.

Jnūhun yátá síquī mozo (Lc. 12.41-48)

⁴⁵ 'Núu súcuan te coo ró nájnūhun ñn mozo jeē ndíto xinī te squícu vāha. Te máa patrón ni jeni de mozo un jēe cóto i ñayuu vehe de, návāha scáji i máa hora. ⁴⁶ Te yōhyo ndetū mozo un jēe núu ni ndee patrón, te cuni de jeē súcuan squícu vāha i. ⁴⁷ Jendaá cahán rī jíin ró jeē cani de mozo un jēe cóto i ndihi ndajniñu de. ⁴⁸ Te núu mozo sáha néé cúu i, te jeni ni i jeē ma ndíji yachī patrón i, ⁴⁹ te quejéé i cani i jnahan mozo i, te caji i coho i jíin tēe cánajini, ⁵⁰ núu súcuan te ndee-ni patrón quiví jeē tu ndétu i jíin hora jeē tú na vé jeni ni i. ⁵¹ Te stóho xeén de i, te squiví de i nuū cáhiin tēe stáhú-ni. Te yūcuan ndáhyū i te nacayihí yuhu i jeē ndoho xeén i. Achí yá.

Jnūhun yátá síquī uxī sūchi síhí

25

¹ 'Te suhva cúu jeē ndácu Yaā andiví jniñu nuū ñayuu: Cúu nájnūhun ñn vico nándāha. Te ni iyo uxī sūchi síhí jeē ní caquihin i linterna cándaha i, te ni quendacoo i cuajnahán i ñn tēe nandāha. ² Te uhūn i chíi tú ndito xinī i, te uhūn i chíi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chíi cándaha i botella petróleo jíin linterna i. ⁵ Te níni cúcuéé quiiji tēe nandāha ún, te ni quee

māhná, te ni caquixī ndihi i. ⁶ Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jijnáhan ró, áchí. ⁷ Yūcuán na te tāca súchi sñí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jín súchi ndito xinī: Cuāha jecu petróleo nuū rī jijnáhan ró, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jín máá ró. Vāha ga quingoo ró núu cūyāhu, te cuaan ró jēe cúu máá ró. Achí i. ¹⁰ Te níní cuángoo i cuaan i, te ni quee-ni tēe nandāha. Te sūchi cáhīyo tūhva un, ní quívicoo i jín de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi sñí un. Te ni cacahān i jín tēe nándāha: Nune ní yéhyí na quívicoo ná, áchí i. ¹² Te ni cahān maá de: ¿Ndé nuū véjicoo ró? Chi tu jíní rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quívi na hora ndiji ruhū, Yaā ní nduu tēe. Achí yá.

Jnūhun yátá síquī tēe ní jēhe núu xūhun núu tāca mozo

¹⁴ Te suhva cúu jeē ndácu Yaā andívi jniñu nuū ñáyuu: Cúu nájñūhun ñn tēe jeē quihīn jicá de inga ñuu. Te nde ná tu quihīn de te ni cana de mozo de jijnáhan, te ni jēhe núu de xūhūn de nuū i, jeē na sájñiñu i jín návāha nducuehē.

¹⁵ Te nuū ñn i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñn mil. Súcuan ni jēhe de, chi jíní de nasaa canda ñn ñn i sájñiñu i jín. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhūn, ni sájñiñu de jín. Te ni nihīn de uhūn gā mil síquī. ¹⁷ Te mozo jeē ní quihin uū mil xūhūn, suni ni nihīn de uū gā mil síquī. ¹⁸ Te mozo jeē ní quihin ñn mil xūhūn, ni jehēn de ni jete de yaū, te ni chisāhí de xūhūn patrón de.

¹⁹ Te ni yāha cuehē tiempo, te ni ndee patrón mozo un jijnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhūn un, te ni nacūāha de xūhūn un núu patrón de jín uhūn gā mil jeē ni nihīn de síquī. Te ni cahān de: Ni jēhe ní uhūn mil nuū ná, te yāha íyó uhūn gā mil jeē ni nihīn na síquī. Achí de. ²¹ Te ni cahān patrón jín de: Iyó váha núu súcuan. Yōhō vāha mozo cúu ró jēe síquī vāha ró. Chi vāha ni síquī ró ñn jniñu lúli-ni, te vijna te cuāha ri jniñu jéhnū ndacu ró. Te quívi ró núu cusí ni rō jín rí. Achí de. ²² Yūcuán na te ni quee mozo jeē ní quihin uū mil xūhūn un. Te ni cahān de: Ni jēhe ní úu mil nuū ná, te yāha íyó úu gā mil jeē ni nihīn na síquī. Achí de. ²³ Te ni cahān patrón jín de: Iyó váha núu súcuan. Yōhō vāha mozo cúu ró jēe síquī vāha ró. Chi vāha ni síquī ró ñn jniñu lúli-ni, te vijna te

cuāha ri jniñu jéhnun ndacu ró. Te quiví ró núu cusí ni rō jín rí. Achí de. ²⁴ Te ni quee mozo jeē ní quihin in mil xūhún un, te ni cahān de jín patrón: Je jíní na níhín jéē téē xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nándacān ní vēsú jeē ni jéhe ní. ²⁵ Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nácuāha na xūhun ní. Achí de. ²⁶ Te ni cahān patrón jín de: Mozo cuxí cúu ró te máni jniñu neé sáha ró. Chi jéni ni rō jeē cuehē gā cuní rí vēsú jeē cuu sáha mozo rí, te cuehē gā nándacān rí vēsú jeē ni jéhe rí. ²⁷ Núu jeē ni chúne ró xūhun rí nuū banco nuú, te jeē ní ndee rí te naquihin ri xūhun rí nde jín séhe xūhun núu. Achí de jín i. ²⁸ Te ni cahān de jín táca gá mozo de: Núu súcuan te quende rō mil xūhun jínā nuū i, te cuāha ro núu mozo névāha uxí mil. ²⁹ Chi ñayuu jeē névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yáha jéē tu sájniñu vāha, quenehen ró i na quíhín i nuū quéhe nuū neē. Te yūcuan ndáhyū i te nacayíhí yuhu i jeē ndoho xeēn i. Achí patrón un.

Siquí jeē cóo juicio táca nación

³¹ Te ni cahān gā yā:

In quiví te ndiji máa Yaā ní nduu téē, te cuu ya Rey nuū ñayuu. Te táca ndajéhe

yā cuiñi ní xiin ya. Te cucōo ya mesa nuū ndacu ya jniñu, te yōhyo luu kujéhnun ya. ³² Te ndutútú ñayuu táca nación nuū yā. Te sásín ya i jínáhan i, nájnūhun cúsín lanchi jín ndixúhú sáha téē ndító ti. ³³ Te ñayuu váha jeē cúu nájnūhun lanchi, chucú yá i lado váha ya. Te ñayuu neé jeē cúu nájnūhun ndixúhú, chucú yá i lado jecó yá. ³⁴ Yūcuán na te cahān Rey jín ñayuu cáhīn lado váha ya: Nacā ndetū rō jeē ni sáha Tátá rí jín ró. Nehen quivícoo ró núu ndacu ró jniñu. Chi nde quiví ní jecōo ñayiví te je ni sátūhva ya nuū ndacu ró jniñu. ³⁵ Chi ni jii rí sóco, te ni cajēhe ro jéē ní yeji rí. Ni jichí rí ndute, te ni cajēhe ró jéē ní jihi rí. Ni quiji ri nde ñuu jicá, te ni cajēhe núu ró vehe ni ndōo rí. ³⁶ Ni cumaní sahma ri, te ni cajēhe ró. Ni cocuhū rí, te ni jecondēhe ró ruhū. Ni ine ri vecāa, te suni ni jecondēhe ró ruhū. Súcuan cahān yā jín ñayuu cáhīn lado váha ya. ³⁷ Yūcuán na te cahān ñayuu váha un jín yá: ¿Na quiví ní cajito ná níhín jéē jí ni sóco, te ni cajēhe na jéē ní yeji ní, chí jéē jichí ni ndute, te ni cajēhe ná ní jihi ní? ³⁸ ¿Te na quiví ní cajito ná jéē ní quiji ní ndé ñuu jicá, te ni cajēhe núu ná vehe ni ndōo ní, chí jéē cúmaní sahma ní, te ni cajēhe ná? ³⁹ ¿Te na quiví ní cajito ná jéē cuhú ni, chí jéē íne ní vecāa, te ni jecondēhe ná níhín? achí i. ⁴⁰ Yūcuán na te cahān Rey jín i: Jendaá cahān rí jín ró jéē ná ni casáha ró

26

súcuan jíin ñin tãcá hermano rī
jeē cãcandíje, vēsú ñayuu núu
ga cúu i, te nuū maá rí ni
casáha ró.

41 Yūcuán na te suni cahān
Rey jíin ñayuu cáhīin lado jecó
yá: Ñayuu jnahnū ndetū cãcuu
ró. Cujiyo quingoo ró núu
ñuhún jeē cayú ñí cáni, nuū
iyó túhva cone jexeén jíin táca
táchī jeē cájejniñu nuū. 42 Chi
ni jíi rī sōco, te tu ní cájēhe ro
jéē cáji rī. Ni jichī rī ndute,
te tu ní cájēhe ro jéē coho rī.
43 Ni quiji ri nde ñuu jicá, te
tu ní cájēhe núu ró vehe ndōo
rī. Ni cumanī sahma rī, te tu
ní cájēhe ró. Ni cocuhū rī, ni
ine rī vecāa, te tu ní jécondēhe
ró ruhū. Súcuan cahān yā
jíin ñayuu cáhīin lado jecó yá.
44 Yūcuán na te cahān ñayuu
un jíin yá: ¿Na quivī ní cajito
na níhín jéē jíi ni sōco, chí jéē
jichī ni ndute, chí jéē ní quiji
ní ndé ñuu jicá, chí jéē cúmanī
sahma ní, chí jéē cuhú ni, chí
jéē íne ní vecāa, te tu ní cájēhe
na jéē cúmanī nuū ní? Achi i.
45 Yūcuán na te cahān yā jíin i:
Jendaá cahán rī jíin ró, jeē tu
ní casáha ró súcuan jíin ni ñin
tãcá hermano rī jeē cãcandíje,
vēsú ñayuu núu ga cúu i. Núu
súcuan te suni nuū maá rí cúu
jeē tu ní casáha ró, achi yā.
46 Yūcuán na te quingoo ñayuu
un núu ndóho i ñí cáni. Te
ñayuu váha un quívicoo i nuū
cótecu i ñí cáni. Achi Jesús.

*Jeē ní casquínáhan de
jnūhun jeē jni de Jesús*

(Mr. 14.1-2; Lc. 22.1-2;
Jn. 11.45-53)

1 Te nuū ní ndihī ni cahān
Jesús táca jnūhun yáha, te ni
cahān yā jíin tée cãscuáha jíin
yá:

2 Je cájini rō jeē uū na quivī
te coo víco pascua. Te ruhū,
Yāa ní nduu tēe, nastúu i ruhū
jeē cúu rī jicá cruz, achi yá.

3 Yūcuán na te sutū
cãcujéhnu, jíin tée cástéén
tutu ley, jíin táca tée jéhnu
jeē cándacu jniñu nuū ñayuu
hebreo, ni candutútú de ini
patio vehe palacio maá sūtū
cujéhnu ga jeē naní Caifás.
4 Te ni candajnúhún de ndese
jni de Jesús jíin jnūhun stáhú,
te cahni de ya. 5 Te ni cacahān
de:

Ma jni yó de máa quívī víco,
chí ndonda ñayuu siquī yō,
achi de.

*Jnūhun ñahan jeē ní chuhun
perfume xinī yā*

(Mr. 14.3-9; Jn. 12.1-8)

6 Te íne Jesús ñuu Betania
vehe Simón, tēe ni ndoho
cuehyī stehyú. 7 Te ni quee
ñin ñahan nuū yā, ndáhá ña
ñin frasco yuū luu jeē ñūhun
aceite perfume jeē yóhyo
yahu ndéé. Te ni chuhun ña
xinī yā níni jéē yéji yā staā.
8 Te ni cajito tēe cãscuáha jíin
yá, te ni caquitī ni de, te ni
cacahān de:

¿Najehē cúu jeē náa saá-ni
perfume jiñā? 9 Chi cuu xícó
yahu yó núu, te cuāha yo
xūhun núu ñayuu ndahú. Achi
de.

10 Te ni jini Jesús jnūhun
cãcahān de. Te ni cahān yā jíin
de:

¿Naun cásáha ró jéē nácani uhū ni ñahan yáha? Chi ñn jniñu váha cúu jeē ni sáha ña jíin rí. ¹¹ Chi níní coyūcu ñáyuu ndahú jíin ró, te ruhū chí tuá condee rī jíin ró. ¹² Chi jeē ní chuhun ña perfume yáha ruhū, suu cúu jeē ní sátūhva ña ruhū nde quivī quíndūji rí. ¹³ Jendaá cahán rī jíin ró jeē ní cáhnu ñayīvī ndé-ni cúu nuū cuité jnūhun yáha jéē jnáma rí ñayuu, suni nacani i jnūhun jeē ní sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā
(Mr. 14.10-11; Lc. 22.3-6)

¹⁴ Yūcuán na te ñn jeē ndihúxí uū tēe cáscuáha ún, nání de Judas Iscariote, ni jehēn de nuū sutú cácujuhnu. ¹⁵ Te ni cahán de jíin:

¿Nasaa cuáha ní núu ná, te na nastúu ná de nuū ní? áchí de.

Te ni cajēhe ocō uxī xūhun plata nuū de. ¹⁶ Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máá quivī jeē quejéé vico jeē cáyeji ñayuu pan jeē tú na levadura yíhi, te ni quiji-coo tēe cáscuáha un núu Jesús. Te ni cacahán de jíin yá:

¿Ndé nuū cuní ni jéē quísatūhva ná cuxíni ní vico pascua? áchí de.

¹⁸ Te ni cahán yā:

Cuángoo nde ñuu, vehe tēe jeē jé ní cacahán yō, te cahán

rō jíin de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíin tēe cáscuáha jíin yá, achí rō. Achí yá.

¹⁹ Te tēe cáscuáha jíin yá, ni casáha de nájnūhun ni ndacu Jesús jniñu nuū de, te ni casátūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíin ndihúxí uū tēe cáscuáha jíin yá. ²¹ Te níní yéji yā jíin de te ni cahán yā:

Jendaá cahán rī jíin ró jeē ñn rōhó nastúu ruhū vijna, áchí yá.

²² Te ni cacucuíhyá ndasí ni de. Te ná ñn ná ñn de ni cacajnūhún de ya:

¿A sáña cúu? áchí de.

²³ Te ni cahán yā:

Ñn rōhó jéē cáyeji cáhnu jíin rí ñn cohō, suu ró nastúu ruhū. ²⁴ Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnúhun rí nuū tútu ií. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

²⁵ Yūcuán na te ni cahán Judas, tēe nastúu ya:

¿A sáña cúu, Maestro? áchí de.

Te ni cahán yā jíin de:

Suu ró cúu, áchí yá.

²⁶ Te níní jéē cáyeji de jíin yá, te ni quihín ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahán yā:

Caji rō jijnáhan ró, chí yāha cúu yiqui cúñu rī, áchí yá.

27 Yūcuán na te ni quihin ya ñn copa ndūxi uva, te ni nacuatáhú yá, te ni jēhe ya nuū de. Te ni cahān yā:

Coho jijnáhan ró. 28 Chi yāha cúu ññi rī jeē cuáha ri jeē cúu contrato jeé, te cati jeē ndundo cuēchi cuehē ñayuu, te coo jnūhun cáhnu ni nuū cuéchi i.

29 Te cáhán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Tátá rī jniñu nñi ñayiví, te sáa te coho tucu ri jín ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mr. 14.26-31; Lc. 22.31-34; Jn. 13.36-38)

30 Te ni jita ya ñn yaa iñ jín de jijnáhan de. Te ni quenda ya cuahān yā jín de nde yucu Olivos. 31 Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jnūhun ri nuū tútu iñ, ni cahān Yaā Dios: Cuáha ri jnūhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí. 32 Te jeē nátecu rī, te xīhna ruhū cosnūu rí quihñ rī región Galilea, te sáa te najinūcoo ró, achí yá.

33 Yūcuán na te ni cahān Pedro:

Vēsú ndiñi de na náyūhú de, te máa ná chi ma náyūhú cuiti ná, achí de jín yá.

34 Te ni cahān yā jín de:

Jendaá cahán rī jín ró jeē jecuáa vijna, nde ná tu cana líhli, te yūhu ró jeē jñi ñayuu rohó, te unī jínu cahān rō jeē tu jini rō ruhū, achí yá.

35 Te ni cahān Pedro jín yá:

Vēsú núu cuu na jín ní, te ma cahán cuiti na jéé tu jini na níhñ, achí de.

Te suni súcuan ñi cacahān ndiñi tēe cáscuáha jín yá.

Jeē ni jicān tahu yā nuū huerto Getsemaní

(Mr. 14.32-42; Lc. 22.39-46)

36 Yūcuán na te ni jinū Jesús jín tēe cáscuáha jín yá ñn lugar nuū naní Getsemaní. Te ni cahān yā jín de:

Yāhá-ni cucōo ró, te na quihñ rī yūcuan cácan tahu rī, achí yá.

37 Te ni jeca ya Pedro jín ndindúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxií ni yā jeē quiji jnūndóho siquí yā. 38 Yūcuán na te ni cahān yā jín de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró jín rí.

39 Te ni jica ya jecu gā, te ni jecuñi yiti yá ni jequin ya nuū yā nuū ññuhun, te ni jicān tahu yā suhva nuū Yaā Dios:

Tátá maá ná, núu cuu te tejiyo ní jnūndóho yáha jéé ma quiji siquí ná. Te nasūu jéé cuní maá ná, chi jeē cuní maá ní na cóo, achí yá.

40 Yūcuán na te ni ndee yā nuū ndinúni tēe cáscuáha jín yá, te ni jito ya jeē cáquixi de. Te ni cahān yā jín Pedro:

¿A tu ní cánda ró condito ró jín rí vēsú ñn hora? 41 Coondito ni rō te cacān tahu jeē chindéé ñāhán yá rohó jéé ma sáha ró cuéchi jeē coto ndee jeneé rohó. Chi cuní

ndije ánuá rō squícu vāha ró, te yiqui cúñu rō chi tu fuerza, achí yá.

42 Te ni jehēn tucu ya vuelta uū, te suhva ni jicān tahú yā:

Tátá maá ná, te núu ma cúu cujiyo jnūndóho yáha jeē ma ndóho ná, te na cóo jeē cuní maá ní núu súcuan, áchí yá.

43 Te ni ndee tucu ya nuū de, te ni jito ya jeē cáquixī tucu de, chi yōhyo cájiī de māhná. 44 Te ni stóo ya de, te cuahān tucu ya cuacacān tahú yā vuelta unī. Te suni jnūhun yúcuan ní cahān yā. 45 Yūcuán na te ni ndee tucu ya nuū de jíjnáhan de, te ni cahān yā jíin de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jni tēe cáhiyo cuēchi ruhū. 46 Ndocuñī jíjnáhan ró, chi je vēji tēe nastúu ruhū, te quihīn yō jíin de, áchí yá.

Jeē ní cajni de Jesús

(Mr. 14.43-50; Lc. 22.47-53; Jn. 18.2-11)

47 Te sá cáhán gā yā súcuan, te ni quee-ni Judas, in jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñhu jíin táca tēe jéñhu cándacu jniñu nuū ñáyuu hebreo, ni catají tēe ún. 48 Te Judas, tēe nastúu ya ún, je ni jēhe de in seña nuū tēe un jíjnáhan, chi ni achi de:

Tēe jeē téchūhu rí un cúu. Te jni ró jíjnáhan ró, áchí de.

49 Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. 50 Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo táca gá tēe ún, te ni cajni de Jesús.

51 Te in tēe jeē cáhīn jíin Jesús, ni tava de espada de, te ni jehnde de sōho in mozo maá sūtū cujeñhu ga. 52 Yūcuán na te ni cahān Jesús jíin de:

Nachuvāha espada rō, chi táca jeē cácejnáhan jíin espada, suni jíin espada cuu. 53 ¿Te á tu cájini rō jeē cuu cacān tahú rī nuū Tatá rī, te vijna ñuhún tají yá víhyá gā uxí uū mil ndajéhé andiví jeē jnama ruhū? 54 Te núu súcuan, ¿te ndese cuu squícu jnūhun cáhán tutu iī jeē cánuú ndoho rī súcuan? áchí yá.

55 Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jeē jni ró rúhū jeē súcuan. Táca quívī ni cucōo rī jíin ró jíjnáhan ró ini templo cáhnu, ni steén rī jnūhun, te tu ní cájni ró rúhū. 56 Te súcuan cása ha ró návāha na squícu jeē cáhán tutu iī jeē ní catee tēe ni canacani jnūhun Yaā Dios, achí yá.

Yūcuán na te ndihī tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujeñhu ga

(Mr. 14.53-65; Lc. 22.54-55, 63-71; Jn. 18.12-14, 19-24)

57 Te tēe ni cajniñ Jesús, cuangoo de jíin yá nuū Caifás, tēe cúu sutū kujéhnū ga. Te yūcuán cáhīn tūtú tēe cástéén tutu ley jíin táca tēe jéhnū cándacu jniñū. 58 Te Pedro chí jíca-ni ndíquín de ya, te ni jinū de patio sutū kujéhnū ga. Te ni quívi de ini patio, te ni cucōo de jíin táca policia, návāha coto de ndese coo síquī yā.

59 Te sutū cácujehnū jíin táca tēe jéhnū jíin ndíhi tēe cása ha junta kujéhnū ga, ni canducú de tēe cahān jnūhun yáa síquī Jesús, chí cahni de ya cácuni de. 60 Te vēsú ni quecoo cuehē ñayuu cácahān yaá, te tu ní cánihīn de cuēchi síquī yā jeē cáhni de ya. Te jeē sándihí te ni quecoo uū testigo jeē cahán yaá síquī yā. 61 Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívi te nucondichí sáha de, áchí.

62 Yūcuán na te ni ndocuiñí maá sūtū kujéhnū ga, te ni cahān de jíin yá:

¿Naun tu cáhán cuíti rō? ¿A íyó ndáa jeē cácahān tēe yáha síquī rō? Achí de.

63 Te Jesús tu ní cáhán cuíti yā. Te ni cahān maá sūtū kujéhnū ga:

Ndácu ri jniñū nuū rō jeē cahān ndaā rō cuni nahín maá Yaā Dios, Yaā técu. Cachí cají te núu maá ró cúu Cristo, Sēhe Yaā Dios, achí de jíin yá.

64 Te ni cahān yā:

Suu ri cúu, nájnūhun cáhán rō. Te na cástūhun rí nuū rō jijnáhan ró jeē táca quívi jeē quíji te coto ró rúhū, Yaā ní

nduu tēe, condee rī lado váha Yaā iyó poder. Te coto ró jeē ndíji ri ichi ándiví jíin vícō. Achí yá.

65 Yūcuán na te sutū kujéhnū ga ni jehnde de sahma de jeē quití ndasí ni de, te ni cahān de:

Tēe yáha chí cáhán de jnūhun ndevāha jeē quití ni Yaā Dios, chí sáha de máa de Sēhe Yaā Dios. ¿Ndé jíni ñúhún gá yō testigo núu sūcuán? Chí je ni cajini ró jnūhun ndevāha cáhán de. 66 ¿Te ndese cájeni ni rō? achí de.

Te ni cacahān tēe cuehē ún: Cuēchi cúu jeē cahán de sūcuán, te jíni ñúhún cuu de, áchí.

67 Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. 68 Te ni cacahān de:

Te núu Cristo cúu ró, te cachi rō ndé ñin cúu jeē ní cani róhó, áchí de.

Jeē ní cachi Pedro jeē tu jíni de ya

(Mr. 14.66-72; Lc. 22.56-62; Jn. 18.15-18, 25-27)

69 Te níni jēe sūcuán cúu, te Pedro néne de nuū quéhe ini patio. Te ni quee ñin ñahan jéjniñū vehe ún, te ni cahān ña jíin de:

Róhó chí suni ni jica ró jíin Jesús tēe Galilea, achí ña.

70 Te máa de tu ní cáchi de, chí ni cahān de ni cajini ndíhi ñayuu:

Tu jíni rī na jnūhun cáhán rō, achí de.

71 Te ni quenda de yéhyí núu quéhe, te ni jito inga ñahan nuū de. Te ni cahān ña jíin ñayuu cáhīn yūcuán:

Tēe yáha chi suni ni jica de jín Jesús, tēe ñuu Nazaret, achí ña.

⁷² Te inga jínu tu ní cáchi tucu de, chi sa ni cahān teyí de:

Tu jíní rī tēe ún, achí de.

⁷³ Te ni cunúu jecu gā, te ñayuu cáhīn yūcuan ní quecoo i nuū Pedro, te ni cacahān i:

Jendaá ndije jeē suni jnáhan tēe un cúu ró, chi ndijin cahán rō jeē tēe Galilea cúu ró, achí i.

⁷⁴ Yūcuán na te ni quejé de cáhān teyí de jeē na cóndee cuēchi siquī de núu tu cáhān ndaā de:

Tu jíní cuiti rī tēe ún, achí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jín de: Nde ná tu cana líhli, te yūhu ró te cahān rō uní jínu jeē tu jíní rō ruhū. Te ni quenda de cuahān de, te yōhoyo ni ndahyū de jeē ní cachi de jeē tu jíní de ya.

Jeē cuángoo de jín yá nuū Pilato

(Mr. 15.1; Lc. 23.1-2;
Jn. 18.28-32)

27

¹ Yūcuán na te ni cundijin. Te táca sūtū cácujuhnu jín táca tēe jéhu jeē cándacu jniñu nuū ñayuu hebreo, ni casquijnáhan de jnūhun ndese sáha de jeē cuu Jesús. ² Te ni cajihni de ya, te cuángoo de jín yá nuū Poncio Pilato, tēe cúu gobernador.

Jeē ni jihī Judas

³ Yūcuán na te Judas, tēe ni nastúu ya un, ní jito de jeē ní cunīhin siquī yā jeē

cúu yā. Te ni jnahuhū ni de, te ni nacuāha de ocō uxī xūhun plata jeē ni níhīn de nuū sūtū cácujuhnu jín núu táca tēe jéhu. ⁴ Te ni cahān de jín:

Cuēchi ni sáha ná jēe ní nastúu ná ñn tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scáne Judas xūhún un ini templo. Te ni quenda de cuahān de, te ni scuéhne de máá de.

⁶ Te sūtū cácujuhnu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chi xūhun jēe ni jéconaā jeē cúu ñn tēe cúu, achí de.

⁷ Yūcuán na te ni casándaā de jeē xūhun yūcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yūcuan cúu jeē ndé vijna nání ñuhun ún Lugar Ñuhun Niñī.

⁹ Te sūcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihóco uxī xūhun plata, te sūcuan-ni cúu ñn yāhu jeē ní casáha ñayuu Israel cuenta jeē ndeé yā nuū i. ¹⁰ Te jín xūhun un ní cajeen de ñuhun quíxin, nájnūhun ni ndacu máá Jítoho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5;
Jn. 18.33-38)

11 Te nuū ní jinūcoo de jíin Jesús nuū gobernador, tēe cúu Pilato, te ni cajnūhún de ya:

¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájñūhun cáhán rō.

12 Te sutū cácujuhnu jíin tēe jéhnū cándacu jniñu, ni cacahān de cuēchi siquī yā. Te tú na vé ni cáhán cuiti yā.

13 Yūcuán na te ni cahān Pilato jíin yá:

¿A tu jíni ró jēe cácahān de cuehē cuēchi siquī rō? achí de.

14 Te tu ní cáhán cuiti yā ni ññ jñūhun jíin de. Te nahán ní naa ni gobernador jeē tú na vé ni cáhán yā jíin de.

Jeē ní cundaā jeē cúu yā

(Mr. 15.6-20; Lc. 23.13-25; Jn. 18.38-19.16)

15 Te íyó costumbre gobernador jeē quivī víco un siaá de ññ tēe íne vecāa, núu na-ni tēe cácuñi ñayuu. 16 Te suu quivī un íyó ññ tēe íne vecāa, nání de Barrabás, te je ni jitē núu jñūhun jeē ni sáha de cuēchi xeēn. 17 Te nuū ní candutútú ñayuu, te ni cahān Pilato jíin i:

¿Ndé tēe cácuñi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

18 Súcuñi ni cahān de chí cúní de siaá de Jesús. Chí je ni jecūhun ni de jeē ní cacucuéśún ni tāca sūtū un cájito de ya, te jeē yúcuñi ní quijicoo jíin yá nuū de.

19 Te níní jēe néne Pilato silla nuū sándaā de jniñu, te ññashí de ní tají ññ jñūhun nuū

de: Ma quivī nduu rō jíin ñáyuu siquī tēe ndaā jíñā, chí yōhyo ni siūhu jéni ruhū cuni jeē siquī de, áchí ññ.

20 Te sutū cácujuhnu jíin táca tēe jéhnū, ni cascáhán de ñayuu jeē na cácan i jeē siaá de Barrabás, te na cúu Jesús.

21 Yūcuán na te ni cajnūhún tucu gobernador:

Jeē uú de, ¿ndé ññ de cácuñi rō jeē siaá rī? achí de.

Te ni cacahān i:

Siaá ni Barrabás, achí i.

22 Te ni cajnūhún Pilato:

Núu súcuñi te ¿ndese cácuñi rō jeē sáha ri jíin Jesús, tēe cúu Cristo? achí de.

Te ni cacahān ndihí i:

Cata caa ní de jicā cruz, na cúu de, áchí i.

23 Yūcuán na te ni cahān Pilato:

¿Na cuēchi ni sáha de núu súcuñi? achí de.

Te ñayuu un ní cacana jee ndasí i:

Cata caa ní de jicā cruz, na cúu de, áchí i.

24 Te ni jini Pilato jeē tu cúndeyí de jíin ñáyuu, chí sa víhyá gā cácuvaā i. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee siquī rī jeē cúu tēe vāha yāhá. Chí siquī maá ró jijnáhan ró na cóndee. Achí de.

25 Te ni cacahān ndihí ñayuu:

Suu siquī maá ná jíin siquī séhe ná na cóndee cuēchi jeē cúu de, áchí i.

26 Yūcuán na te ni siaá de Barrabás. Te ni ndacu de

jniñu jeē na cáni tãcá soldado un Jesús, jíin jeē cáta caa de ya jicā cruz.

27 Yūcuán na te soldado un cuango de jíin Jesús ini palacio. Te ni cacana de ndiñi jnáhan de ni candutútú núū yā. 28 Te ni caquenehen de sahma ya, te ni cachuhun de ya ñin sahma cuehé jeē cúu sahma rey. 29 Te ni casáha de ñin corona iñu, ni cachuhun de xinī yā. Te ni cachihí de ndaha váha ya ñin yujnu jeē nájnūhun bastón. Te ni casacatā de nuū yā, chi ni cajecuiñi yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

30 Te ni catesihí de nuū yā. Te ni caquihin de yujnu jeē ní cachihí de ndaha ya, te ni cacani de xinī yā. 31 Te nuū ní cuu ni casacatā de nuū yā, te ni catava de sahma cuehé un, te ni canachuhun de ya sahma máá yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

32 Te nuū ní quendacoo soldado un jíin yá, te ni canajnáhan de jíin ñin tēe ñuu Cirene, naní de Simón. Te ni catejniñu de tēe un jeē cóndiso de cruz yā.

33 Te ni jinūcoo de ñin lugar nuū naní Gólgota, jeē cuní cahān Lugar Yiqui Xíní. 34 Te ni cajēhe de vino jeē ni sácā núu jíin ñin jeē uvuá jeē cóho

ya. Te nuū ní jito ndee ya, te tu ní cuní yā coho ya.

35 Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ñin ñin de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquí ndese nihīn ñin ñin de sahma ri, achí yā, achí tutu. 36 Yūcuán na te ni cacucōo de yūcuan jeē cóto de nde cuu yā. 37 Te ni catee de ñin jnūhun xinī cruz yā jeē cahán na siquí ni jíhí yā: Yāha cúu Jesús, Rey ñayuu hebreo, achí.

38 Te suni ni cacata caa de uū tēe cuihná núu uū gā cruz, ñin de lado váha ya, te inga de lado jecó yá. 39 Te ñayuu cáyāha yūcuan cáscuícó i xinī i, te cácahān neé i:

40 Róhó chí cáhán rō jeē cánu rō templo cáhnu, te nuū uní quiví te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz vii, achí i.

41 Te sutū cácujeñnu, jíin tēe cástéén tutu ley, jíin tēe grupo fariseo, jíin tēe jēhnu jíjnáhan de, suni súcuan ni cacahān catá de, te áchí de cácahān maá de:

42 Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. 43 Ni candíje de Yaā Dios, te na jnama ya de vijna te núu cundáhú ni yā de, chí ni cahān de jeē cúu de Sēhe ya. Achí de jíjnáhan de.

44 Te tēe cuihná jeē cándita caa xiin ya, suni súcuan ni cacahān neé de.

Jeē ni jihī Jesús

(Mr. 15.33-41; Lc. 23.44-49; Jn. 19.28-30)

45 Te nuū ní cuu cahuxī uū, te ni cunee ní cáhnu nde cahunī. 46 Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

47 Te sava ñayuu cáhīin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, áchí i.

48 Te ni jinu-ni ñn tēe, ni jequihin de ñn cachī, te ni chundaji de nuū vinagre iyá. Te ni tee de xinī ñn yujnu, te ni tee de yuhu ya jeē coho ya. 49 Te sava ga de ni cacahān:

Condetu ró, na cóndēhe yó núu quiji Elías jnama de chí tuú, áchí de.

50 Te Jesús ni cana jee ya inga jínu, te ni jihī-ni ya. 51 Te sahma ndíta caa jeē ndihyú cuarto iñ ini templo cáhnu, ni ndatā-ni sava sava nde xinī te nde nuū jehé. Te ni jnāa, te ni catahū sáva toto. 52 Te ni cananune yaū nuū yíndūji ndīyi. Te cuehē ndīyi jeē ní cacandije i Yaā Dios, ni canatecu i. 53 Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu iñ Jerusalén, te cuehē ñayuu ni cajito nuū i.

54 Te ná ni jihī Jesús, te tēe cúu capitán jíin tēe cáhīin jíin de jeē cándito de nde cuu yā, ni cajini de jeē ni jnāa, jíin táca gá jniñu ní cuu. Te yōhyo ni cayūhú de, te ni cacahān de:

Jendaá ndije jeē Séhe Yaā Dios cúu tēe yáha, áchí de.

55 Te yūcuan cáhīin cuehē ñahan, cándēhe jícá ña. Te suu ñahan un ní candiquīn ña Jesús nde Galilea, vējicoo ña cájejniñu ña nuū yā. 56 Te unī ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quíndūji Jesús

(Mr. 15.42-47; Lc. 23.50-56; Jn. 19.38-42)

57 Te nuū ní ini quíivī ún, te ni quee ñn tēe cúca, nání de José, te tēe ñuu Arimatea cúu de. Te suni tēe ni scuáha jíin Jesús cúu de. 58 Tēe un ní jehēn de nuū Pilato, te ni jicān de yiqui cúñu Jesús. Te ni ndacu Pilato jniñu jeē na cuáha nuū de. 59 Te José ni quihin de yiqui cúñu yā, te ni chusúcún de ñn sahma cuitá iyó ndoo. 60 Te névāha de ñn yaū jeē ní caan jeé jícā ñn cava, nuū ná tu quíndūji ndīyi. Te yūcuan ní chíndūji de ya. Te ni jesi de ñn yuū cáhnu yuhu yáú un, te cuahān de. 61 Te María ñuu Magdala, jíin inga María, cáyūcú ña ichi núu nuū yíndūji ya.

Jeē ní cacondito soldado nuū yíndūji ya

62 Te ni cuu tācá jniñu yáha máa quíivī jeē casátūhva ñayuu jeē quiji quíivī ndétátú.

Yūcuán na te ni cundijin maá quivī ndétātú. Te sutú cácujuhnu jíin tée grupo fariseo ni jengoo de nuū Pilato. ⁶³Te ni cacahān de:

Cánucūhun ni na jeē nde na técu tēe stáhú néé un te ni cahān de jeē nátecu de nuū uní quivī. ⁶⁴Núu súcuan te ndacu ní jniñu na cóto vāha tǎcá soldado yuhu yáú un nde núu ni yāha uní quivī. Chi núu tuú te sanaa te quijicoo tēe ni cascuáha jíin de, te tava cuihná de ndīyī ún jecuáa, quingoo de jíin. Yūcuán na te cachi de nuū ñáyuu jeē ní natecu tēe ún. Te cáhú gá cuu jnūhun stáhú yúcuan vēsú jeē xíhna ñúhún. Achí de.

⁶⁵Te ni cahān Pilato:

Yāha cáhīyo soldado. Cuángoo jíin de, te sácutú váha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶Te cuangoo de, te ni casácutú de yuū jeē ndihyú yuhu yáú nuū yíndūji ya, te ni castūn nīhin de. Te ni castóo de tǎcá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹Te ni yāha quivī ndétātú un, te ni cundijin quivī domingo. Te María ñuu Magdala jíin inga María un, ní jecondēhé ña nuū ní yíndūji Jesús. ²Yūcuán na te iin sanaa-ni te ni jnāa nīhin ndasí. Chi iin ndajéhé maá Jítoho yō Yaā Dios ni cuun ya ichi ándiví, ni quee ya

nuū ní yíndūji Jesús. Te ni stáa ya yuū ndihyú yuhu yáú un, te ni cucōo ya siquī.

³Te ndíndēe núu yā nájñūhun taja, te sahma ñúhun ya yaa quiyi nájñūhun yuhvā volcán.

⁴Te soldado cándito yūcuan ní quisi i de jeē cáyūhú de cájito de ya. Te ni cacuu ndīyí de. ⁵Te ni cahān ndajéhé jíin ndíndúú ñahan ún:

Ma yūhu ró, chi jíin rī jeē vécondēhe ró Jesús, Yaā ni jíhī jicā cruz. ⁶Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachíndūji de ya. ⁷Te yachī quingoo ró, te cachi rō nuū tée cáscuáha jíin yá jeē ní natecu yā. Te xíhna gā maá yá jinū Galilea, te sáa te najinūcoo de. Te yūcuán coto de nuū yā. Achí rō na cúni de. Je ni castūhun rí nuū rō, achí ndajéhé.

⁸Te ni quendacoo ña nuū ní yíndūji ya, te yachī cuangoo ña. Te cáyūhú ña, te suni yōhyo cácusī ña. Te ni cajinu ña cuacastūhún ña nuū tée cáscuáha jíin yá. ⁹Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū tǎcá hermano rī, tēe ni cascuáha jíin rí, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

11 Te níní cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu tǎcǎ jniñu jeē ní cuu. 12 Te sutū cácujuhnu ni candutútú de nuū táca tée jéhu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núu soldado jijnáhan. 13 Te ni cacahān de jín:

Cahān rō jijnáhan ró jēe tée cáscuáha jín de ni quijicoo jecuáa, te ni catava cuīhna ndíyí un níní cáquixí rō, achi rō. 14 Te núu na cúni gobernador jnūhun yáha, te máa rí quiscáhán rī de, návāha tú nihīn rō castigo jijnáhan ró. Achí de.

15 Te soldado un ní caquihin de xūhún un, te ni cacachi de nájjnūhun ni cacahān jín de. Te nde vijna chi súcuan cácahān ñayuu hebreo nájjnūhun ni cacahān soldado un.

Jeē ní tejniñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

16 Te ndihúxí ñn tēe ni cascuáha un cuánungoo de nde Galilea, nde yucu nuū ní cachi Jesús jeē quíngoo de. 17 Te nuū ní cajito de nuū yā, te ni cachiñúhún de ya. Te sava de tu cácandíje vāha de jeē maá yá cúu. 18 Te ni quee ya nde nuū de, ni cahān yā jín de:

Je ni jēhe Tátá rī ndihi poder nuū rī jeē ndácu ri jniñu andíyí jín ñáyíyí. 19 Núu súcuan te cuángoo nuū ñáyuu

tǎcǎ nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máa Tátá jín Séhe jín Espíritu Santo. 20 Te stéén rō nuū i jeē na cuátáhú i tǎcǎ jniñu ní ndacu ri nuū rō. Te cocuhun ni rō jeē maá rí íne ri jín ró ní cáni nde quíyí jínu ñáyíyí. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute
(Mt. 3.1-12; Lc. 3.1-9,
15-17; Jn. 1.19-28)

¹ Yāha quéjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō, návāha coo tūhva ñayuu jeē jinú rō, achí Yaā Dios jíin Cristo.

³ Te tēe ún cana jee de nde nuū ñūhun téhé:

Sátūhva ró máá ró jijnáhan ró, chí quee maá Jítoho yō.

Te sáha ró jniñu ndaā, chí vēji ya, achi de.

Achí Isaías. ⁴ Te Juan ni jinū de nde nuū ñūhun téhé, scuándute de ñayuu. Te cáhán de jíin i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. ⁵ Te tāca ñáyuu región Judea jíin ñáyuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁶ Te sahna ñūhun Juan cúu ixi camello, te núhni ñin cinturón ñii chíji de. Te jee técu de cúu tīca ndicuéhyí jíin ndúxi yocō. ⁷ Te suhva ni nacani de jnūhun:

Quiji máá Yaā cujéhnu ndasí. Chí tú na vé jéhnu cuiti cúu ri nuū yā, ni jeē cuajniñu ri nuū yā vēsú ñin jniñu lúli gá nájñuhun jeē cuíta ndeyi ri ndají rí correa ndijēn yā. ⁸ Te ruhū chí jíin ndute scuándute ri rohó jijnáhan ró, te Yaā ún chí nájñuhun jeē scuándute ya rohó cúu jeē cuáha ya Espíritu Santo condee ini anuá rō, achí Juan.

Jeē ní jendute Jesús
(Mt. 3.13-17; Lc. 3.21-22)

⁹ Te ni cuu jecu quivī, te Jesús ni quenda ya ñuu Nazaret ndañúu Galilea, te Juan ni scuándute de ya ini yūte Jordán. ¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espíritu Santo ni quee xinī yā, te cáa nájñuhun ñin paloma. ¹¹ Te ichi ándiví ní cahān ñin jnūhun:

Máá ró cúu Sēhe ri jeē maní ndasí rí jíin, te yōhoyo cúsiñi ní jíin ró, achí.

Jeē ní jito ndee jexeén Jesús
(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñūhun téhé ní sáha Espíritu Santo. ¹³ Te uū xico quivī ni condee yā nuū ñūhun téhé un núu ín quiti yúcú. Te ni jito ndee Satanás yā, chí cúníjeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

Jeē ní quejéé Jesús nácani ya jnūhun
(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te

ni jinū Jesús región Galilea, nácani ya jnūhun vāha ndese ndácu Yaā Dios jniñu. ¹⁵ Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jíjnáhan ró, te candíje ró jnūhun jeē jnáma ya rohó. Achí yá.

Jeē ní cana ya cuūn tēe jniñ chācá

(Mt. 4.18-22; Lc. 5.1-11)

¹⁶ Te jica Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájni chācá cácuu de, te cásinga de ñunu de ini mar. ¹⁷ Te ni cahān yā jíin de:

Condiquīn ruhū na quihín yō, te nasáha ri rohó tēe nihīn cuehē ñayuu candíje ruhū, nájnūhun cánihīn rō chācá, áchí yá.

¹⁸ Yūcuán na te ni castóo-ni de ñunu de, te ni candiquīn de ya.

¹⁹ Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyūcú de ini barco de, cánachijnī de ñunu de.

²⁰ Te suni ni cana ya de jeē cóndiquīn de ya. Te ni castóo-ni de tátá de Zebedeo ini barco un jíin mozo de, te ni candiquīn de ya cuangoo de.

Jeē ní quenehen ya tachī ini ñn tēe

(Lc. 4.31-37)

²¹ Te ni jinū yā jíin de ñuu Capernaum. Te quivī ndétatu ní quivī ya ini vehe iī sinagoga, te ni steén yā jnūhun.

²² Te ni canaa ni ñayuu ni cajini i jnūhun stéén yā. Chi ni steén vāha ya nuū i, chi máá yá cúu jeē ndíso jniñu siquī ndihi. Te tēe cástéén tutu ley Yaā Dios, tu súcuan cástéén de.

²³ Te ini vehe iī sinagoga ñuu un íne ñn tēe jeē ñūhun tachī ini. Te ni cana cóhó de:

²⁴ ¿Naun véji ní núu na jíjnáhan ná, Jesús ñuu Nazaret? ¿A véji ní jéé snáā ní sáña, chí naún? Je jíin na ndé ñn cúu ní, chí Sēhe iī Yaā Dios cúu ní. Achí de.

²⁵ Te Jesús ni cahān xeēn yā jíin táchī ún:

Casi yuhu ró te quenda ró ini de, áchí yá.

²⁶ Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

²⁷ Te ndihi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñn jnūhun jéé cúu jeē yáha? Chi tēe yáha cújéhnu de jeē ndácu de jniñu nde nuū tachī te quéndacoo, áchí i.

²⁸ Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chīsó Simón Pedro

(Mt. 8.14-15; Lc. 4.38-39)

²⁹ Te ni quenda ya jíin de jíjnáhan de ini vehe iī sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. ³⁰ Te naná chīsó Simón, catú ña yīhi quīji ña. Te ni cacastūhún de nuū yā jeē kuhú ña. ³¹ Yūcuán na te ni quindehe ya nuū catú ña, te ni jniñ ya ndaha ña, te ni ndonehen ya ña. Te ni

quenda-ni quīji ún ña, te ni sāha ña jeē ní cayeji de jíin yá.

Jeē ní nasávāha ya cuehē ñayuu

(Mt. 8.16-17; Lc. 4.40-41)

32 Te ni quēe niāndii te ni cuaa. Te ni quecoo ñayuu jíin táca ñáyuu cácuḥū jíin jéē ñúhun tachī ini. 33 Te táca ñáyuu ñuu un ní cacutútú i yéhyí un. 34 Te ni nasávāha ya cuehē ñayuu cácuḥū tǐjni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé ñn cúu ya.

Jeē ní nacani ya jnūhun región Galilea

(Lc. 4.42-44)

35 Te nehen ndasí ní ndonda ya, nde yínee gā. Te ni quenda ya cuahān sǐn ya yatā ñúū nuū tú ñayuu, te yūcuan ní jicān tahu yā. 36 Te Simón jíin tée cáhīin jíin de, ni jenanducú de ya. 37 Te ni cananihīn de ya, te ni cacahān de jíin yá:

Tāca ñáyuu cánanducú i níhín, áchí de.

38 Te máá yá ni cahān yā:

Sa suhva na quíhín yō tāca gá ñuu íne yajni, návāha suni nacani ri jnūhun nuū i, chi jeē yūcuan ní quee rī. Achí yá.

39 Te sūcuan te ni jica cuu ya ní región Galilea, ni nacani ya jnūhun ini vehe iī sinagoga tācá ñuu, te ni quenehen ya tachī ini ñayuu.

Jeē ní nasávāha ya ñn tēe ndóho cuehyī stehyú

(Mt. 8.1-4; Lc. 5.12-16)

40 Te ñn tēe ndóho cuehyī stehyú, ni quee de ni jecuiñī yití de nuū yā, te ni cahān de jíin yá:

Jíní na jeē cuu sāha ní jéē nduvāha ná, te núu cúní ni, áchí de.

41 Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

42 Te ná ni cahān yā sūcuan, te ni nduvāha-ni tēe ndóho cuehyī stehyú un. 43 Yūcuán na te nátají yá de quinhun de, te ni cahān níhin ya jíin de:

44 Ma cáchi cuiṭi rō nuū ní ñn. Chī quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núū yā, nájñūhun ni ndacu Moisés jniñu jenahán. Te sūcuan te cuni ñayuu jeē ní nduvāha ró. Achí yá.

45 Te ni quenda de cuahān de, te ni quejéé de nácani de jnūhun nuū ndihí ñayuu ndese ni nduvāha de. Te siquī yūcuan tuá ni cúu quiví Jesús tācá ñuu, chī cúchitú ndasí ñáyuu nuū yā. Te ni jica ya yatā tācá ñuu nuū tu cúchitú ñáyuu. Te tāca lado ni quijicoo ñayuu nuū yā.

Jeē ní nasávāha ya ñn tēe ndóho cuehyī ni íjin

(Mt. 9.1-8; Lc. 5.17-26)

2

1 Te ni cuu jecu quiví, te ni quiví tucu Jesús ñuu Capernaum. Te ni cajini ñayuu jeē néne ya vehe. 2 Te ni cacutútú-ni cuehē ñayuu, te ni

chitú vehe jeē ndé yehyí tuá núne. Te ni nacani ya jñuhun Yaā Dios nuū i. ³ Yūcuán na te ni quecoo cuūn tēe nuū yā, cándiso de ñn tēe ndóho cuehyī ni íjin. ⁴ Te tu ní cúu quīvicoo de nuū yā siquī jeē chitú ñáyuu. Te ni cacao de siquī véhe, te ni canune de ndaā nuū ín ya, te yaū un ní cascúun de tēe cúhú, cáttú de nuū ñn camilla. ⁵ Te ni jini Jesús jeē cácandíje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

⁶ Te yūcuan cáyúcú jecu tēe cástéén tutu ley Yaā Dios, te tēe un ní cajeni ni de siquī yā: ⁷ ¿Naun cáhán tēe yáha súcuan? Cáhán de jñuhun ndevāha jeē quití ni Yaā Dios, chí nasūu Yāā Dios cúu de jeē cóne cáhnu ni de nuū cuéchi. ⁸ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī? ⁹ Jeē uú jñuhun yáha, ¿ndé ñn yí gá cáa? ¿A jeē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te naquihin ró camilla rō, te caca ró, achi rī? ¹⁰ Te vijna te na stéén rī jeē maá rí, Yaā ní nduu tēe, ndíso jñíñu rī ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

¹¹ Cáhán rī jíin ró, ndocuñī te naquihin ró camilla rō, te quinuhun rō vehe ró, áchí yá jíin de.

¹² Yūcuán na te ni ndocuñī-ni tēe ún, te ni naquihin de camilla de, te ni quenda de cuahān de, jito jínúu ndihi ñayuu. Te ndívi i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ni ñn jniñu súcuan, áchí i.

*Jeē ní cana ya Leví
(Mt. 9.9-13; Lc. 5.27-32)*

¹³ Te ni quenda tucu ya cuahān yā nde yumar. Te tāca ñáyuu ni jinūcoo i nuū yā, te ni steén yā jñuhun nuū i. ¹⁴ Yūcuán na te ni yāha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuñī de, te cuahān de jíin yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaaha cuēchi, suni cáyúcú de cáyeji de staā jíin Jesús jíin tēe cáscuáha jíin yá, chí íyó cuéhē de jeē cándiquīn de ya. ¹⁶ Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihi tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásaaha cuēchi? áchí de.

¹⁷ Te ni jini Jesús, te ni cahān yā jíin de:

Ñayuu cáhīyo váha, tu jíni ñúhún i tēe tájna, chí ñayuu

cácuñū cúu jeē jíni ñúhún. Te ruhū nasūu jeē véji ri cana ri ñayuu tú cuēchi, jeē cúu i nájñuhun ñayuu cáhīyo vāha. Chi sa suhva véji ri cana ri ñayuu cáhīyo cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquī jeē cóndite ní

(Mt. 9.14-17; Lc. 5.33-39)

18 Te ni cuu ñn quivī jeē cáhīyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jeē cascuáha jíin grupo fariseo, tijni jínu cáhīyo ndite ni de. Te tēe cáscuáha jíin máa ní, ¿naun tu cásaha de súcuan?

19 Te ni cahān Jesús jíin de:

¿A cuu condite ni de níni jéē iyó rí jíin de? ¿A cuu condite ni ñayuu cáhīin vico nándāha, te núu níni néne tēe nándāha? Chi núu néne tēe nándāha, te ma cúu condite ni i. 20 Te quee quivī jeē cújiyo tēe nándāha, te quivī ún chi condite ni i.

21 Te ni cahān yā uū jñuhun yátá síquī jeē tu quíjnahan jñuhun jeē jéē steén yā jíin táca jñuhun jenahán. Achí yá:

Ni ñn tu náchuhun ñn pedazo sahma jéē núu ñn sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáñnu ga nuū cátáñndé un. 22 Te suni tu cáchuhun vino jeé ini ññi túhú. Chi núu súcuan te vino jeé un ndatá ññi ún, te naa vino jíin ññi.

Jeē yúcuán cánuú jéē chúhun i vino jeé ini ññi jéé.

Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

23 Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. 24 Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni ñn jniñu quivī ndétátú. Achí de.

25 Te ni cahān maá yá jíin de:

¿A tu ní cácahu cuiti rō tutu ndese ni sáha David, ñn quivī ní cumanī jeē cáji de, te ni jíi de sōco jíin tēe cáhīin jíin de? 26 Te ni quivī de ini vehe Yaā Dios. Te Abiatar ni cuu sutū cujéñnu ga. Te ni yeji de pan i jeē yosó ndijin nuū Yaā Dios. Te tú na ley jeē cáji ni ñn tēe, chi máa-ni sutū cuu cají. Te suni ni jēhe de ni cayejí tēe cáhīin jíin de. Te tú na cuēchi ní íyo síquī de. Achí yá.

27 Te suni ni cahān yā jíin de jíjnahan de:

Tu ní jéconā ñayuu jeē ndóho i nuū quivī ndétátú, chi ni jéconā quivī un jéē ndétátú i. 28 Núu súcuan te ruhū, Yaā ní nduu tēe, máa rí cúu jeē ndácu jniñu síquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha
(Mt. 12.9-14; Lc. 6.6-11)

3

¹ Te ni quivī tucu Jesús ini vehe i sinagoga. Te yūcuan ine iin tēe ni ichī iin ndaha de.

² Te tēe grupo fariseo cājito yuhu de ya núu nasávāha ya tēe un quivī ndétátú, návāha nihin de cuēchi siquī yā.

³ Yūcuán na te ni cahān yā jín tēe ni ichī ndaha ún:

Ndocuiñī te condichi rō mehñu yāha, áchí yā.

⁴ Te ni cajñuhun yá de jijnáhan de:

¿Ndese cáhán ley siquī quivī ndétátú? ¿A jēe sáha vāha yó, chí sáha née yó? ¿A jēe nasávāha yó ñayuu je yajni cuu, chí sáha yó jēe cúu i? áchí yá.

Te máa de tú na vé ni cacahān de. ⁵ Te ni quitī ni yā ni jito ya nuū de jijnáhan de, te ni cucuíhyá ni yā jeē níhni ni de. Te ni cahān yā jín tēe ni ichī ndaha:

Scaá ndaha ró.

Te ni scaá de, te ni nduvāha-ni ndaha de. ⁶ Yūcuán na te ni quendacoo tēe grupo fariseo, te ni casquijnáhan de jñuhun jín tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

⁷ Te Jesús cuahān yā nde yumar jín tēe cáscuáha jín yá. Te cuehē ñayuu región Galilea ni candiquin i ya. ⁸ Te suni ñayuu región Judea, jín ñayuu ñuu Jerusalén, jín ñayuu Idumea, jín ñayuu ichi

núu cáne niāndii yūte Jordán, jín ñayuu región Tiro jín Sidón, cuehē ndasí ñayuu ni cajini jñuhun i jniñu jéhu ni sáha ya, te ni quecoo i nuū yā. ⁹ Te ni cahān yā jín tēe cáscuáha jín yá jeē na cóo tūhva iin barco quivī ya, návāha ma chitú nihin ñayuu cuehē ún xiin ya. ¹⁰ Chi cuehē ñayuu je ni nasávāha ya, te jeē yūcuan vējicoo cuehē gā ñayuu cándoho tāca núu cuehyī, te chítú nihin i xiin ya jeē quehé i ya cácuni i. ¹¹ Te ñayuu cañuhun tachī ini, núu ni cajito nuū yā, te cájecuiñī yití núu yā, te cácana cóho:

Máa ní cúu Sēhe Yaā Dios, achí.

¹² Te ni ndacu nihin ya nuū tachí un jēe ma cáhán gā jeē cúu ya Sēhe Yaā Dios.

Jeē ní nacāji ya uxī uū tēe apóstol

(Mt. 10.1-4; Lc. 6.12-16)

¹³ Yūcuán na te ni caa ya cuahān yā iin yucu. Te ni cana ya tāca tēe jeē cuní maá yá caca jín yá, te ni quecoo de nuū yā. ¹⁴ Te ni jeni ya uxī uū de jeē cuiñi de jín yá, te tají yá de quingoo de nacani de jñuhun. ¹⁵ Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu. ¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷ Te Jacobo jín ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jñuhun, nájñuhun yíhi

fuerza taja. ¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹ jín Judas Iscariote, tēe jeē ní nastúu de ya.

Jeē ní cacahān ñayuu jeē jeniñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quívi ya ñn vehe jín tēe cáscuáha jín yá un. ²⁰ Te ni ndutútú tuçu cuehē ñayuu, te ni tuá ni cúu caji yā staā jín de. ²¹ Te tāca jnáhan vehe ya ni cajini jñuhun jeē súcuan cúu. Te ni quecoo de venūquihin de ya. Chi cácahān de jeē ní sana xinī yā.

²² Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē kujéhu nuū tachí. Te jín fuerza un quénehen de tachí, achí de.

²³ Te ni cana ya de jínáhan de, te ni cahān yā ñn jñuhun yátá jín de:

¿Ndesé cuu quenehen Satanás maá? ²⁴ Chi núu ñn nación sásñn máá te cuajnáhan máá, nación un má cúu ga coyūcu cáhnu. ²⁵ Te núu ñayuu ñn vehe sásñn máá te cuajnáhan máá, ñayuu un má cúu ga coyūcu cáhnu. ²⁶ Te suni súcuan Satanás jín jnáhan tachí, chi núu sásñn máá te cuajnáhan máá, núu súcuan te ma cóo ga, chi sa suhva naa.

²⁷ Te ni ñn tēe ma cúu quívi de ini vehe tēe ndacuī

jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachí.

²⁸ Te jendaá cahán rī jín ró jeē iyó modo coo jñuhun cáhnu ni nuū tāca cuéchi cásaña ñayuu, te suni nuū tāca jñuhun néé cácahān i. ²⁹ Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cáni, achí yá.

³⁰ Súcuan ni cahān yā, chi ni cacahān i jeē quénehen ya tachí jín fuerza Satanás.

Náná yā jín ñani yā

(Mt. 12.46-50; Lc. 8.19-21)

³¹ Yūcuán na te ni quee naná yā jín táca ñani yā. Te ín ña nuū quéhe, te ni taji ña jñuhun cuahān nuū yā jeē cána ña ya. ³² Te ñayuu cáyūcu ní xiin ya, ni cacahān i jín yá:

Náná ni jín táca ñani ni cáhñn nuū quéhe, te cácuni cahān jín ní, achí i.

³³ Te ni cahān maá yá:

¿Ndé ñn cúu náná rī jín ñani rī? achí yá.

³⁴ Yūcuán na te ni ndacoto ya nuū ñayuu cáyūcu xiin ya ún, te ni cahān yā:

Suni náná rī jín ñani rī cácuu tāca ñayuu yáha. ³⁵ Chi tāca ñayuu casquícu jniñu cúni Yaā Dios, suu cácuu ñani rī, cuāha rī, náná rī, achí yá.

Jñuhun yátá siquī tēe jéte trigo

(Mt. 13.1-9; Lc. 8.4-8)

4

¹ Te yumar ni quejéé tucu Jesús steén yā jnūhun. Te ni cutútú cuéhē ndasí ñāyuu nuū yā, te jeē yúcuan ní quīvī ya ni cucōo ya ini ñn barco nuū mar. Te tāca ñāyuu un cáyūcú i yumar. ² Te jíin jnúhun yátá ni steén yā cuehē jnūhun nuū i, te súcuan ni cahān yā:

³ Cuni nahín jíjnáhan ró: ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayeji tī. ⁵ Te jecu gā trigo ni jité nuū ñūhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jité nuū náne iñu. Te ni jehnu iñu ún, te ni jesi nuū, te tu ní jéhe nunī. ⁸ Te jecu ni jité nuū ñūhun váha. Te ni cane, te ni jehnu, te ni jéhe cuehē nunī. Sava ni jéhe ocō uxī jeē ñn ñn nunī, te sava ga ni jéhe unī xico, te sava ga ni jéhe ciento. Achí yá.

⁹ Yūcuán na te ni cahān yā jíin de:

Tāca róhó jéē jíni sōho, na chúsóhó ró. Achí yá.

Najehē cahán yā máni jnūhun yátá

(Mt. 13.10-17; Lc. 8.9-10)

¹⁰ Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhīn jíin de. Te ni cacajñuhún de ya na vé cuní cahān jnūhun yátá un. ¹¹ Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisáhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhīn sīn siquī, chí máni jíin jnúhun yátá cáhán rī tāca jnúhun jíin i. ¹² Súcuan cáhán rī návāha vēsú cájito i, te quendōo i nájnūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

Jeē ní castūhun cáji yá jnūhun yátá tēe jéte trigo

(Mt. 13.18-23; Lc. 8.11-15)

¹³ Te ni cahān gā yā jíin de jíjnáhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan? ¹⁴ Tēe jéte trigo cúu tēe scuité núu jnūhun Yaā Dios. ¹⁵ Te trigo jeē ni jité yuhíchi cúu nájnūhun ánuá sava ñayuu. Chí cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. ¹⁶ Te trigo jeē ni jité nuū ñūhun yuū, chí cúu nájnūhun ánuá sava ñayuu cájini nahín jnúhun, te yachī-ni cájetáhú i te cácusī ni i jíin. ¹⁷ Te tu cúcutú jnúhun ún ini anuá i, te jecu-ni quívī cájetáhú i. Te núu ni quejéé jnúndóho, chí jíto xeēn ñayuu i siquī jnúhun ún, te quejéé nácani yátá ni i. ¹⁸ Te jeē ni jité nuū náne iñu cúu nájnūhun jecu gā ñayuu. Chí vēsú ni cajini sōho i, ¹⁹ te cándihvī

ni i siquī jeē iyó ini ñayīvi yáha. Te cáconi i cucúca i, te stáhú un i jeē cutóó ni i siquī tǎcá ndajníñu. Te ndihi jeē yáha cácuñéñu i jíin, te jési nuū jnúhun ya, te tu íje i jíin jnúhun ya. ²⁰ Te trigo jeē ni jítē nuū ñúhun váha cúu nájñúhun ñayuu cájini nahín jnúhun, te cájetáhú i, te cáhije i jíin jnúhun ya. Te sava i cúu nájñúhun nunī jeē jéhe ocō uxī jeē ñin ñin, te sava i jéhe unī xico, te sava ga i jéhe ciento. Achí yá.

Jnúhun yátá síquī lámpara
(Lc. 8.16-18)

²¹ Suni ni cahān yā jíin de:

Núu nástñin ñayuu ñin lámpara, ¿a chúne i chíji ñin cajón chí chíji jito? Tuú, chí jéni i nuū sucún návāha cundijin. ²² Te suni súcuan, tu íyó ni ñin jnúhun sáhi jéē ma cúni ñayuu, chí ndihi tǎca jnúhun natūu ndijin te cuni ñayuu. ²³ Tǎca róhó jéē jíni sōho, na chúsohó ró, áchí yá.

²⁴ Te suni ni cahān yā jíin i:

Cuni sōho váha ró. Chí cūhva jeē chusóhó ró jnúhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeē chusóhó váha ró. ²⁵ Chí ñayuu je jécūhun ni, stéén gā yā nuū i. Te ñayuu tu cándije, máa jecu jeē jíni i ún, sa suhva naa. Achí yá.

Jnúhun yátá síquī trigo jeē jéhu

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñáyuu: Cúu nájñúhun trigo jeē ní jete ñin

tēe. ²⁷ Yūcuán na te quíxi de te ndóna de, te súcuan jíca quivī cuahān. Te trigo un cáne te jéhu. Te máa de tu jíni de ndese cúu jeē jéhu. ²⁸ Chí máa ñuhun sáha jeē jéhu trigo, xihna gā yucū, sáa te cáne yoco, yūcuán na te íje máa núnī. ²⁹ Te núu ni cuaan trigo un, te quéjéē ñáyuu cájehnde i, chí je ni jíni quivī tahndé. Achí yá.

Jnúhun yátá síquī ndiquin mostaza

(Mt. 13.31-32; Lc. 13.18-19)

³⁰ Te suni ni cahān yā:

Na cáhán rī ñin jnúhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. ³¹ Ndúcuehē i nájñúhun jéhu ñin ndiquin mostaza jeē jéquin i nuū ñúhun. Te yūcuan cúu ñin ndiquin lúli gá vésú tǎca ndiquin jeē iyó. ³² Te ná ni jequin i, te cáne te jéhu ga vésú tǎca gá yucū, te cúnáhu ndaha. Te tǎca saa chí sáha tí tǎcā tí nuū cuándahū xinī ún. Achí yá.

Jeē máni jnúhun yátá cáhán yā jíin i

(Mt. 13.34-35)

³³ Te cuehē jnúhun yátá súcuan ni cahān yā jíin ñáyuu, núu nasaa cánda i jécūhun ni i. ³⁴ Te tǎca jéē ni stéén yā, máni máa jnúhun yátá ní cahān yā jíin i. Te nuū tēe cáscuáha jíin yá chí ni nacastūhun cáji yá jnúhun ún.

Jeē ní jecuññi tachī níhin jíin mar ni sáha ya

(Mt. 8.23-27; Lc. 8.22-25)

³⁵ Te jeē cuácuua quivī ún, te ni cahān yā jín téē cáscuáha jíin yá:

Na yáha yó quihīn yō inga lado mar, achí yá.

³⁶ Te ni casquéndōo de ñayuu cuehē ún, te ni quivicoo de ini barco nuū je íne Jesús, cuango de jíin yá. Te suni cuango jecu gā barco jíin de jíjnáhan de. ³⁷ Te ni jequihī ñin tachī níhin, te ni stónnda ndute mar, te ni quivī ini barco. Te je yajni chitú ndute ini barco.

³⁸ Te Jesús catú yá yatā de ini barco, quixí yā te yāhi ñin sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yō? achí de.

³⁹ Te ni ndocuiñī yā, te ni cahān yā nuū tachí níhin un jíin núū mar:

Jecuiñī te nayúú-ni coo ró, achí yá.

Te ni jecuiñī tachī, te ni cuu nayúú í-ni. ⁴⁰ Te ni cahān yā jíin de jíjnáhan de:

¿Naun cáyūhú ndasí ró? ¿Naun tu cácandíje ró jéē cácu ró sáha ri?

⁴¹ Te yōhoyo ni cayūhú de, te ni cacahān de jíin jnáhan de:

¿Ndé ñin ga cúu tēe yáha jéē nde tachī níhin jíin mar cájetáhú jéē cahán de? achí de.

Tēe Gadara jeē ndóho tachī (Mt. 8.28-34; Lc. 8.26-39)

5

¹ Te ni jinū Jesús jíin de jíjnáhan de inga lado mar, región Gadara. ² Te ná ni

quenda ya ini barco un, te ñin tēe ññuhun tachī ini, ni quenda de nde nuū yándūji ndīyi, te ni quee de nuū yā. ³ Tēe un ndéē de nuū yándūji ndīyi. Te tu jéjníñu jeē jíhni ñayuu de, ni jíin cadena. ⁴ Chi cuehē jínu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ñin cúndeyí jíin de. ⁵ Te nduú ñuú jíca de yucu jíin núū yándūji ndīyi, te cána cóhó de, te stújí de máá de jíin yúū. ⁶ Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. ⁷ Te ni cana cóhó de:

¿Naun vēji ní núū ná, Jesús Sēhe Yaā Dios, Yaā kujéhnu téyi? Cáhán ndahú ná jíin ní, jíni nahín Yaā Dios, ma stóho ní sáña, achí de.

⁸ Súcuán ni cahān de, chí je ni cahān Jesús:

Táchī, quenda ini tēe yáha quihīn rō.

⁹ Te ni cajnūhun yá de:

¿Na vé naní ró?

Te ni cahān de:

Legión naní ná, chí cuehē tachī ññuhun ini ná, achí de.

¹⁰ Te ni cahān ndahú ndasí de jíin yá jeē ma tájí yá tachí quendacoo región ún. ¹¹ Te yajni yucu yúcuán cáhīn cuehē quīñī cájitu tí. ¹² Te tachī jeē ññuhun ini tēe un ní cacahān ndahú jíin yá:

Núu tají ní sáña, te cuāha ní jnūhun quivicoo ná ini quīñī yūcuán, achí.

¹³ Te Jesús ni jēhe ya jnūhun. Te ni quendacoo tachī ún ini tēe ún, te ni quivicoo ini quīñī, te íyó nájnūhun uū mil tí. Te

quinī un ní cajinu ti ni ningoo ti ñin yucáva, ni quivicoo ti nuū mar. Te ni ndaquñhi ti ndute, ni cajihī tī.

14 Te tēe cándito ti, ni cajinu de cuango de jeē ní cayūhú de. Te ni jinūcoo de ni cacastūhún de nuū ñáyuu ñuu un jín ñáyuu tāca rancho. Te cuango ñayuu un cuácondēhé i na vé ni cuu. 15 Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñuhun de sahma, te je ni nducájí xínī de. Te ni cayūhú ñáyuu ún. 16 Te tēe ní cajito, ni canacani de jñuhun nuū ñáyuu, ndese ni nduvāha tēe ni ñuhun tachī ini, jín ndese ni candoho quinī ún. 17 Yūcuán na te ni caquejéé i cácahān ndahú i jín yá jeē na cújiyo ya región yūcuan quihīn yā.

18 Te ni ndivī ya ini barco. Te tēe ni ñuhun tachī ini un ní cahān ndahú de jín yá jeē na cuáha ya jñuhun quihīn de jín yá. 19 Te Jesús tu ní jéhe ya jñuhun, chi ni cahān yā jín de:

Cuánuhun vehe ró núū jñahan ró, te nacani ró jñuhun nuū i ndese yōhyo jénu jniñu ni sáha máá Jítoho rō jín ró, te ndese ni cundáhú ni yā rohó, áchí yá.

20 Te ni quenda de cuahān de, te ni quejéé de nácani de jñuhun tācá ñuu Decápolis ndese yōhyo jénu jniñu ni sáha Jesús jín de. Te ndivīi ñayuu un ní canaa ni i cájini nahín i.

Jñuhun sēhe síhí Jairo jín ñahan ní quehé yusáhma ya (Mt. 9.18-26; Lc. 8.40-56)

21 Te ni nayāha tucu Jesús cuanuhun yā inga lado mar jín barco. Te ni quecoo cuehē ñayuu nuū yā, nuū íne ya yumar. 22 Te ni quee ñin tēe cújénu ini vehe ñi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā. 23 Te ni cahān ndahú ndasí de jín yá:

Sēhe síhí ná je yajni cuu i. Na quihín yō vehe ná te soó ní ndaha ní síquī i návāha na ndúvāha i te cotecu i, áchí de.

24 Yūcuán na te cuahān yā jín de. Te cuehē ñayuu cándiquīn i ya, te ni chitú níhin i xiin ya cuango i. 25 Te mēhñu ñáyuu un cuáhān ñin ñahan cúhú, jeē ní cuu uxí uū cuiyā ndóho ña cuehyī niñī. 26 Te yōhyo ni ndoho ña, chi ni jexin ña tāca jéē névāha ña jín cuehē tēe tájna, te tu ní jéjniñu jeē ndúvāha ña, chi sa suhva víhyá gā sáha. 27 Te ñahan yáha ná ni nihīn ña jñuhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. 28 Chi ni jeni ni ña: Vēsú maá sahma ya na níhín rī quehé rí, te nduvāha ri, jeni ni ña. 29 Te ni jecuiñī-ni niñī ña, te ni jini ña jeē ní nduvāha ña cuehyī ún. 30 Te Jesús ni jini yā jeē ní nduvāha ñin ñayuu jín fuerza yā. Te ni ndió cóto ya nuū ñáyuu cuehē, te ni cahān yā:

¿Ndé ñin ni quehé sahma ri? Achí yá.

31 Te tēe cáscuáha jíin yá, ni cacahān de:

Jíto ní jēē ñáyuu cuehē yāha ní chitú níhin i xiin ní te cáquihí i níhín ní cáni ichi, te cájnūhun ní ndé ñn ni quehé sahma ní.

32 Te máá yá jíto ya cháha chúcuan, cúní yā jeē na cáchi ñayuu ni sáha. 33 Te ñahan un yúhú ña te quísi i ña, te je jíiní ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndihi ndese ni cuu jíin ña. 34 Te ni cahān yā jíin ña:

Séhē, ni candíje ró jéē cuu nasávāha ri rohó, te jeē yúcuan ní nduvāha ró. Cuáhán te na ndúsñi ni rō, chi je ni nduvāha ró cuéhyi ní ndoho ró, áchí yá.

35 Te níiní cáhán gā yā súcuan, te ni quecoo ñayuu cáyūcú vehe tēe cújéhnú ini vehe i sinagoga, te ni cacahān i jíin de:

Je ni jihí sēhe síhí ní. Te ma sajnēñu ga ní Maestro, achí i.

36 Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnú ini vehe i sinagoga:

Ma yūhu ró, chi candíje ró jéē nastécu rī i, áchí yá.

37 Te tu ní jéhe ga yā jnūhun condiquin ñayuu yā, chi máá-ni Pedro jíin Jacobo, jíin Juan ñani Jacobo. 38 Te ni jinū yā vehe tēe cújéhnú ini vehe i sinagoga, te ni jito ya ñayuu, cácuvaā i, te cándahyū i, te cácana cóhó i. 39 Te ni quívi ya, te ni cahān yā:

¿Najehē yōhyo cásaáa rō te cándahyū rō? Sūchi síhí yáha,

tu ní jíhí i, chi quíxí-ni i, áchí yá.

40 Te ni cajecū catá i jeē ni cáhān yā. Te ni quenehen ndihi ya i cuahān i nuū quéhe. Te ni cana ya máá-ni tátá jíin náná sūchi síhí un, jíin tēe cáhān jíin yá, te ni quívi ya jíin de nuū catú sūchi síhí ní jihí ún. 41 Te ni jñi ya ndaha i, te ni cahān yā jíin i:

Talita cumi, achí yá. Te jnūhun un cúní cahān: Síhí, cáhán rī jíin ró, ndocuiñi, achí yá.

42 Te ni ndocuiñi-ni sūchi síhí un, te ni nacaca i, chi je íyó i uxí uū cuiyā. Te yōhyo ni canaa ni ñayuu cájito i. 43 Te ni ndacu níhin ya jniñu nuū i jíináhan i jeē ma cáchi cuiti i nuū ni ñn. Te ni cahān yā jeē na cuáha ña jeē cáji sūchi síhí.

Jeē cuánuhun yā ñuu Nazaret
(Mt. 13.53-58; Lc. 4.16-30)

6

1 Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuango de jíin yá. 2 Te máá quívi ndétātu ní steén yā jnūhun ini vehe i sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnúhun yáha? ¿Te ndese cúu jeē cahān de jnūhun ndíchí yáha jíin jéē sáha de jniñu jéhnú yáha? 3 Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáhá. Achí i.

Te súcuan ni cacujéē ni i nuū Jesús. ⁴Te ni cahān yā jíin i:

Tāca tēe nácani jnūhun Yaā Dios, iyó yíñúhún ñayuu jíin de, chí máni ñayuu ñuu maá de, jíin jnáhan de, jíin ñayuu vehe de cúu jeē tu iyó yíñúhún jíin de. Achí yá.

⁵Te tu ní cúu sáha ya cuehē jniñu jéhnú yūcuán. Chi jecu-ni ñayuu cácuñu ni soó yá ndaha ya siquī i, te ni nasávaha ya i. ⁶Te náa ni yā jito ya jeē tu cácanđije ñayuu jijnáhan i. Yūcuán na te ni jica cuu ya taca ñuu yajni, ni steén yā jnūhun.

Jeē ní tají yá ndihúxí uū de cuanacani de jnūhun
(Mt. 10.5-15; Lc. 9.1-6)

⁷Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachī ini ñayuu. ⁸Te ni ndacu ya jeē tú na vé condiso de jeē cuajniñu de ichi, ni ñunu, ni staā, ni xūhún. Chi máa vara-ni condahá de. ⁹Te quihí de ndijēn, te ma quihín de jíin úu sahna, áchí yá. ¹⁰Te suni ni cahān yā jíin de:

Na-ni vehe núu ni quíwicoo ró, te yūcuán coyūcu ró ndé quenda tucu ró quíhín rō inga ñuu. ¹¹Te núu ñn ñuu tu cájetáhú i rōhó, ni tu cúní i cuni nahín i jnūhun cahān rō, na quéndacoo ró yúcuán, te scóyo ró tícachā jehē rō, te súcuan steén rō jeē iyó cuéchi i jeē tu ní cájetáhú i. Jendaá cahán rī jíin ró jeē quíwí coo

juicio te xeēn gā coo castigo siquī ñuu cásaaha súcuan vēsú siquī ñuu Sodoma jíin ñuu Gómorra nuū ní casáha ndasí ñayuu cuéchi.

¹²Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i. ¹³Te suni ni caquenehen de cuehē tachī ini ñayuu. Te ni cachíhi de aceite cuehē ñayuu cácuñu, te ni canduvāha i.

Jeē ni jíhí Juan tēe scuándute
(Mt. 14.1-12; Lc. 9.7-9)

¹⁴Te rey Herodes ni jini jnūhun de jnūhun Jesús, chí ni jité núu jnūhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jéhnú. Achí de.

¹⁵Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chí ñn tēe nácani jnūhun Yaā Dios cúu de, nájnūhun tēe ni canacani jnūhun ya nde jenahán, áchí i.

¹⁶Te ná ni jini Herodes, te ni cahān de:

Tuú chí yūcuán cúu Juan jeē ní ndacu rī jniñu ni tahndé xinī, te ni natecu de núu súcuan, áchí de.

¹⁷Chi máa Herodes ni ndacu de jniñu jeē na quíwí Juan vecā, jíin jéē na cónuhñi de jíin cadena. Súcuan ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña

ñasihí de. ¹⁸ Te Juan ni cahān de nuū Herodes:

Tu iyó ley jeē cóndeca ró ñasihí ñani rō, achí de.

¹⁹ Te jeē yúcuan Herodías ni jito uhū ña Juan, te cúní ña jeē na cúu de, te tu ní níhín ña modo. ²⁰ Chi Herodes yúhú de cahni de Juan, chí jíní de jeē tē ndaā tē ndoo cúu Juan. Te jeē yúcuan ní jesi de jeē nducú ña jeē cúu Juan. Te nújnahan ni de jíní nahín de jnūhun cáhán Juan, vēsú tu jécūhun vāha ni de.

²¹ Te ni quee ñn quiví jeē ní cundeyí Herodías. Chi ni sáha Herodes ñn vico quiví ní cacu de, te ni jēhe de jeē ní cacuxíni tē cándiso jníñu nuū de, jíin tēe cácuu capitán, jíin tēe cácujuhnu región Galilea. ²² Te ni quiví sēhe síhí máa Herodías, ni jita jéhé i nuū chitú un. Te ni cacusí ni rey Herodes jíin tēe cácuixíni jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

²³ Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de. ²⁴ Te ni quenda i, ni jecajñuhún i náná i:

¿Na vé cacān na núu de? achí i.

Te ni cahān ña:

Xiní Juan tēe scuándute cacān rō nuū de, achí ña.

²⁵ Yūcuán na te ni ndívi-ni i nuū rey, te ni cahān i:

Cúní na jēe vijna ñúhún-ni cuāha ní xiní Juan tēe scuándute, cone nuū ñn cohō, achí i jíin de.

²⁶ Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquí jeē ni jéjnūhun téyí de, jíin jēe ní cajini sōho tēe cáyeji staā jíin de, jeē yúcuan tu ní cúní de sásáhán de jeē ni jícān i. ²⁷ Te ni tají-ni de ñn soldado jeē quíquihin de xiní Juan. ²⁸ Te ni jehēn soldado un vecāa, te ni jehnde de xiní Juan. Te ni quee de jíin xiní Juan, íne nuū ñn cohō. Te ni jēhe de nuū súchi síhí un, te máa i ni jēhe i nuū naná i.

²⁹ Te tēe cáscuáha jíin Juan ni canihín de jnūhun, te ni jengoo de, ni candonehen de yiquí cúñu Juan, te ni cachindūji de.

Jeē ni scáji yā uhūn mil tēe
(Mt. 14.13-21; Lc. 9.10-17;
Jn. 6.1-14)

³⁰ Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnūhun ni castéén de.

³¹ Te ni cahān yā jíin de:

Na quíngoo yó ñn lugar nuū tú ñayuu, te ndetātu yó jecu, achí yá.

Chí cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

³² Yūcuán na te ni quiví ya ñn barco jíin táca tēe apóstol un, te cuangoo sín ya jíin de ñn lugar nuū tú ñayuu. ³³ Te cuehē ñayuu ni cajito i jeē cuahán yā jíin de, te ni canacuni i jeē máa yá cúu. Te nde tācá ñuu ni quendacoo i, te yachí cuangoo i, te xíhna

gā i ni jinūcoo vēsú maá yá.
³⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jito ho tī. Te ni steén yā cuehē jnūhun nuū i. ³⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. ³⁶ Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

³⁷ Te ni cahān Jesús jíin de:

Cuāha máá ró jeē cáji i, áchí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jíin de:

¿Nasaa staā cánevāha ró? Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úū chācá iyó, áchí de.

³⁹ Yūcuán na te ni cahān yā jíin ñáyuu jeē na cúcōo sīn i cuenta grupo nuū íte. ⁴⁰ Te ni cacucōo sīn ciento ciento i, jíin cincuenta cincuenta i. ⁴¹ Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tée cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i. ⁴² Te ndivii

i ni cayeji, te ni candutú chíji i. ⁴³ Yūcuán na te ni canastútú de pedazo staā jíin cháca jéē ní quendōo, te ni chitú úxí uū jīca. ⁴⁴ Te tēe ni cayeji, chi uhūn mil de cúu.

*Jeē ní jica jéhé yá nuū mar
 (Mt. 14.22-27; Jn. 6.16-21)*

⁴⁵ Yūcuán na te ni cahān-ni Jesús jíin tée cáscuáha jíin yá jeē na quívicoo de barco, te cosnūú de yāha de inga lado mar ñuu Betsaida. Te máá yá chi natají yá ñayuu quinhun i, te sáá te suni quihīn yā. ⁴⁶ Te nuū ní cuu ni natají yá i, te ni caa ya yucu cuacacān tahu yā. ⁴⁷ Te jeē ní cuaa, te barco un je ni cuu sava nuū mar cuahān, te máñuhún-ni ya ni quendōo nuū ñūhun íchi. ⁴⁸ Te ni jito ya jeē yóhyo jnūndóho cáscáca de barco, chi nīhin vēji tachī ichi núú de. Te jeē yínee gā ni quee ya nuū de, jīca jéhé yá nuū mar. Te yāha ya nuū de quihīn yā nuú. ⁴⁹ Te ni cajito de jeē jīca ya nuū mar, te ni cajeni ni de jeē jihná cúu, te ni cacana cóhó de. ⁵⁰ Chi ndīhi de ni cajito nuū yā, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

⁵¹ Te ni quiví ya ini barco un, te ni jecuiñī-ni tachī. Te yóhyo ni canaa ni de cájito de. ⁵² Chi cándāa néé gá jeē níjnūní de, chi ni jíin jniñu jéhnu jeē ní nducuehē staā, tu ní cájecūhun ni de jeē máá yá cúu Yaā ní tají Yaā Dios.

Jeē ní nasávāha ya ñayuu cácuḥū región Genesaret (Mt. 14.34-36)

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. ⁵⁴ Te nuū ní quenda ya jíin de ini barco, te ñayuu yúcuan ni canacuni-ni i ya. ⁵⁵ Te yachī ni jengoo i tācá ndañúū yūcuán, te ni caquindeca i ñayuu cácuḥū, cáyosó i nuū camilla, vējicoo ñayuu nuū ní jito i íne ya. ⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuḥū yuhíchi, te cácahān ndahú i jíin yá jeē na quehé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

Siquī ndese cújnehén ñayuu (Mt. 15.1-20)

7

¹ Yūcuán na te tēe grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ² Te tēe un ní cajito de jeē sava tēe cáscuáha jíin Jesús, ni cayeji jnehén de staā, chi tu ní cáscuicu de costumbre jeē nándahá de nuū Yaā Dios. Te ni cacahān siquī de. ³ Chi tēe fariseo jíin ndihi ñayuu hebreo, névāha i costumbre jenahán jéē ma cáji i staā núu tu nandahá váha i xīhna gā. ⁴ Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán

jeē casquícu i, nájnūhun jeē ndúndoo taza, tındohō, cohō cáa, jíin jíto. ⁵ Te tēe fariseo jíin tēe cástéén tutu ley Yaā Dios, ni cacajnūhún de ya:

Tēe cáscuáha jíin ró, ¿naun tu cáscuicu de costumbre ñayuu jenahán? Chi sa cáyeji jnehén de staā, achí de.

⁶ Te ni cahān yā jíin de:

Ndaā ni nacani Isaías jnūhun siquī rō jijnáhan ró jéē tēe stáhú-ni cácuu ró. Chi súcuan ni tee de jnūhun ni cahān Yaā Dios nde jenahán: Ñayuu yáha chi máá yuhu-ni i cájetáhú i ruhū, te nasūu ndé jíin ini jíin ánuá i.

⁷ Te cáchiñúhún sáa-ni i ruhū, chí jnūhun cástéén i cúu jniñu ní candacu tēe, te nasūu jéē ní ndacu máá rí cúu.

Achí Yaā Dios. Achí Isaías. ⁸ Súcuan cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tındohō jíin taza. Te cuehē gā costumbre súcuan cáscuicu ró, achí yá.

⁹ Te suni ni cahān yā:

Cásiáá rō jniñu ní ndacu Yaā Dios, návāha squícu ró costumbre ni cajequin máá ró. ¹⁰ Chi Moisés ni cahān de: Coó yíñúhún ró jíin tátá rō jíin náná rō. Te núu ndé ñin cahān siquī tátá chí siquī naná, na cúu nahín. Achí Moisés. ¹¹ Te máá ró chí cacahān rō jeē cuu cahān ñin tēe jíin tátá de náná de: Ma cúu chindéé ñáhán ná níhín cuáha na jéē cáji ni jéē cúhun ní, chí ndihi jeē névāha ná, chí Corbán cúu,

áchí ró. (Te jnūhun Corbán cuní cahān jeē ni sócō nuū Yaā Dios.)¹² Te cácahān rō jeē núu súcuan cahān iin tēe, te tuá cánuú chindéé ñáhān de tátá de náná de.¹³ Te súcuan cástivi ró jniñu ní ndacu Yaā Dios, jeē síquí costumbre ni cajequin ñayuu jenahán vēji. Te cuehē gā jniñu súcuan cásáha ró, áchí yá.

¹⁴ Te ni cana tucu ya ñayuu cuehē ún, te ni cahān yā jiín i:

Cuni sōho vāha ró jijnáhan ró, te chuhun ni rō:¹⁵ Tāca jēé iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuan cúu jeē cujnehén i sáha.¹⁶ Tāca róhó jēé jíni sōho, na chúsóhó ró, áchí yá.

¹⁷ Te ni stóo ya ñayuu cuehē ún, te ni quívi ya ini vehe. Te tēe cáscuáha ún, ni caca-jnūhún de ya síquí jnūhun yátá yáha jēé ni cáhān yā.¹⁸ Te ni cahān yā jiín de:

¿A máá ró suni ná tu jecūhun ni rō, chí naún? ¿A tu cájini rō jeē tāca jēé quívi ini ñayuu, ma cúu cujnehén i sáha?¹⁹ Chi tu quívi ini anuá i, chí chíji i quívi, te quénda-ni cuahān, achí yá.

Súcuan ni steén yā jeē tāca jēé yéji ñayuu, tu cújnehén ánuá i sáha.²⁰ Te ni cahān gā yā:

Jeē quénda ini anuá ñayuu, yūcuan cúu jeē cujnehén i sáha.²¹ Chi nde ini anuá ñayuu quénda jeē jéni néé ni, jeē casíquí ndéé jnáhan, jeē jíca jnéni, jeē jéhni ndíyi,²² jeē sacuíhná, jeē ndiyo ni ndajniñu jnáhan, jeē sáha néé,

jeē stahú jnáhan, jeē máni cuēchi sáha, jeē cucuésún ni, jeē cahán yāa síquí jnáhan, jeē sandúxí máá, jeē canéé xínī.²³ Tāca jniñu néé yáha, máni ini anuá ñayuu quénda, te cújnehén i sáha, áchí yá.

Ñahan inga nación jeē ní candíje níhin

(Mt. 15.21-28)

²⁴ Te ni quenda ya yūcuan cuáhān yā región Tiro jiín Sidón. Te ni quívi ya iin vehe, te cúni yā jeē tú ni iin ñayuu cuni jeē íne ya yūcuán. Te vésú súcuan, te tu ní cúu cone sáhi yá.²⁵ Te iin ñahan íyó séhe síhí ña jeē ñūhun tachī ini i, ni nihīn-ni ña jnūhun jeē íne ya. Te ni quee ña, te ni jecuíñi yití ña nuū jehé yā.²⁶ Te ñahan ñuu jíca cúu ña, chí nde Sirofenicia cúu nación ña, Te ni cahān ndahú ña jiín yá jeē na quénehen ya tachī ini séhe síhí ña.²⁷ Te ni cahān Jesús jiín ña:

Nasūu núu maá ní vēji ná, chí máni nuū ñayuu cácuu séhe Israel. Chi tu íyó váha jeē quénde yō staā séhe te cuāha yó núu ína, achí yá.

²⁸ Te ni cahān ña:

Jendaá cahán ni Tátā, te chindéé ñáhān ní sáña vésú cúu ná nájñūhun ina. Chi suni máá tí cáhīin tí chíji mesa, cánihīn tí staā cuechí jēé cóyo yuhu sūchi lúlí cáyeji tí, achí ña.

²⁹ Yūcuán na te ni cahān yā jiín ña:

Vāha ni cahān ní. Cuáhán ní núu súcuan, chí je ni quenda tachī ún ini séhe síhí ní, achí yá.

³⁰ Te ni najinū ña vehe ña, te ni jito ña jeē catú sēhe síhí ña nuū jító, te je ni quenda tachī ún ini i.

Jeē ní nasávāha ya ñn tēe sóhó cástété

³¹ Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. ³² Te ni caquindeca i ñn tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de. ³³ Te ni quenehen sín ya de nuū ñáyuu cuehē ún, te ni chune ya xinī ndáha ya sóho de, te ni tesíhi yá, te ni quehé yá yaá de. ³⁴ Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sóho de, te ni nduvāha yaá de, te ni nacadhān vāha de. ³⁶ Te ni ndacu ya jniñu nuū ñáyuu un jéē ma cáchi i nuū ní ñn. Te vēsú ni cahān nihin ya jíin i, te víhyá gā ni cajete i jnūhun. ³⁷ Te yōhyo ni canaa ni i cájito i, te ni cacahān i:

Vāha sáha ya tēcá jniñu, chí nde tēe cásohó, cánacuni sóho de, te tēe cándāa ññhín, cánacahān vāha de sáha ya, achí i.

Jeē ni scáji yā cuñ mil ñayuu

(Mt. 15.32-39)

8

¹ Te tiempo un ní candutútú cuehē ndasí ñáyuu, te tuá na vé caji i. Te ni cana

Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chí je ni cuu unī quiví cáyūcú i jíin rí, te tuá na vé caji i. ³ Te núu natají rí i quinhun ndite i vehe i, te cuíta í i sava ichi, chí íyó sava i jeē jicá véjicoo i, áchí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíin áhan i? Chí yāhá tú na ñayuu yúcu, áchí de.

⁵ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶ Yūcuán na te ni cahān yā jíin ñáyuu cuehē un jéē na cúcoo i. Te ni quihin ya ndihúxá staā ún, te ni nacuatáhú yá nuū Yāa Dios. Te ni tahu cuechí yá, te ni jēhe ya nuū tēe cáscuáha jíin yá. Te máa de ni casaja de nuū ñáyuu cuehē ún. ⁷ Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíin áhan de. ⁸ Te ndihi i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jica. ⁹ Te tēe ni cayeji un, íyó nájnūhun cuñ mil de. Te ni nacuatáhú yá nuū ñáyuu ún, te cuanungoo i. ¹⁰ Yūcuán na te ni ndiví-ni ya ini barco jíin tēe cáscuáha jíin yá, te cuahān yā región Dalmanuta.

Jeē ní cajicān de ñn jniñu jéhu nuū yā

(Mt. 16.1-4; Lc. 12.54-56)

11 Yūcuán na te ni quecoo tēe grupo fariseo, te ni caquejeé de stíchi de Jesús. Te cácuni de coto ndee de ya, te ni cajiçān de jeē sāha ya iin jniñu jéhnū jeē coo iin seña ichi ándiví. 12 Te ni jitū ni yā siquī jeē tu cácdíje de jíjnáhan de, te ni cahān yā:

¿Naun cájicān ñayuu yáha iin jniñu jéhnū nuū rī? Jendaá cahán rī jeē ma stéén rī ni iin jniñu jéhnū nuū ñáyuu yāhá.

13 Te ni squéndōo ya de jíjnáhan de, te ni ndīvi tucu ya ini barco, te cuahān yā inga lado mar.

Jnūhun levadura tēe fariseo (Mt. 16.5-12)

14 Te tēe cáscuáha jíin yá ni canaa ni de condiso de jeē cáji de, chi iin-ni pan cánevāha de ini barco. 15 Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

16 Te ni cacahān tēe cáscuáha un jíin táca jnáhan de:

Va siquī jeē tú na staā ndíso yó, jeē yúcuán cáhán yā súcuán, achí de.

17 Te ni jini Jesús, te ni cahān yā:

¿Najehē cándajñūhun ró jeē ni cahān rī súcuán siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cahān rī súcuán siquī jeē tu cándiso ró stáā? ¿A yóhyo uun ni rō candíje ró? 18 Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni

rō? 19 Chi ná ni tahú cuéchi rí uhūn staā ni cayeji uhūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxī uū jíca, achí de.

20 Te suni súcuán ná ni tahú cuéchi rí uxā staā ni cayeji cuūn mil tēe, ¿te nasaa jíca ni chitú pedazo staā jeē ní canastútú ró? Achí yá.

Te ni cacahān de:

Uxā jíca, achí de.

21 Te ni cahān yā jíin de:

Te nde vijna ¿á ná tu jecūhun ni rō jíjnáhan ró?

Súcuán ni cahān yatá yá jeē ma cándíje de jñūhun stáhú cástéén tēe ún.

Jeē ní nasávāha ya tēe cuáá ñūu Betsaida

22 Yūcuán na te ni jinū yā jíin de ñūu Betsaida. Te ni caquindeca ñayuu iin tēe cuáá núu yā, te ni cacahān ndahú i jíin yá jeē na tēe ya ndaha ya nuū de. 23 Yūcuán na te ni jñi ya ndaha tēe cuáá un, te ni quenehen ya de yatā ñūu ún. Te ni tee ya tesīhi yá tñūú de, te ni tee ya ndaha ya siquī. Te ni cajñūhun yá de núu cuu coto de jecu. 24 Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chi ná cáa yujnu cáa i, achí de.

25 Yūcuán na te ni tee tucu ya ndaha ya siquī tñūú de. Te ni ndacoto vāha de, te ni nduvāha-ni tñūú de, te ni jito cájí de ndīhi-ni. 26 Te ni natají yá de quinhun de vehe de, te achí yá:

Ma quívi ró ñuu, ni ma cáchi cuiti rō nuū ní ñn, áchí yá.

Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

²⁷ Yūcuán na te Jesús jíin tée cáscuáha jíin yá, cuahān yā tācá ndañúú Cesarea Filipo. Te ichi un ní cajnúhun yá de:

Ruhū, ¿ndé ñn cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnúhun Yaā Dios nde jenahān. Te sava ga i cácahān jeē inga tēe ni nacani jnúhun Yaā Dios cúu ní.

²⁹ Yūcuán na te ni cajnúhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jnúhun yáha nuū ní ñn ñayuu.

Jeē ní castúhún Jesús jeē cúu yā

(Mt. 16.21-28; Lc. 9.22-27)

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tée jéhu jíin sūtū cácujeñu jíin tée cástéén tutu ley, squéhichī de ruhū, te cahni de ruhū. Te nuū uní quívi te natecu rī, achí yá.

³² Te cájí ní cahān yā jnúhun yáha. Yūcuán na te Pedro, ni cana máñúhún de ya, te ni quejéé de cáhān de nuū yā jeē ma cuáha ya jnúhun

coo súcuan. ³³ Te máá yá ni ndió cóto ya ni jito ya nuū tée cáscuáha jíin yá. Te ni cahān yā nuū Pedro:

Cujiyo quihīn rō, chi cáhān rō ná cáhān Satanás. Chi tu jéni ní rō nájnūhun jéni ní Yaā Dios, chi sa suhva jéni ní rō nájnūhun cájeni ní ñayuu, achí yá.

³⁴ Te ni cana ya tēe cáscuáha jíin yá jíin ñayuu cuehē ún, te ni cahān yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnúhun ndoho i jnúndóho jeē síquí rī, vēsú na cúu i. ³⁵ Chi núu ndé ñayuu cuní i cácu i nuū jnúndóho quiiji nuū i jeē síquí ruhū, núu súcuan te jnahnū ndetū i ní cáni. Te núu ndé ñayuu, vēsú na cúu i jeē síquí ruhū jíin síquí jeē scáca i jnúhun jeē jnáma ri ñayuu, núu súcuan te cotecu i ní cáni. ³⁶ ¿Chi ndé cuajniñu vēsú na cúndeyí ñayuu nihīn i ní ñáyiví, te núu quívi i nuū jnahnú ndetū i? ³⁷ Chi tú na jíin cuiti chunaa ñayuu jeē cácu ánuá i. ³⁸ Te ñayuu yáha tu cácañdije cuiti i, te máni máá cuéchi cása ha i. Te núu na-ni ñayuu cúcanu i nuū ñayuu yáha jeē síquí ruhū, Yaā ní nduu tēe, jíin síquí jnúhun cáhān rī, suni súcuan cucanu rī jeē síquí máá i, quívi ndíji ri jíin táca ndajéhé ndoo ri. Te quívi ún chi yóhyo luu cujéhu ri nájnūhun cújéhu Tátá rī. Achí yá.

9

¹ Te suni ni cahān yā jīn de jijnáhan de:

Jendaá cahán rī jīn ró jeē sava tēe cáhīn yāhá, ma cúu de chi nde cuni de jeē ndácu Yaā Dios jniñu jīn poder yā, achí yá.

*Jeē tucu ni nduu ya
(Mt. 17.1-13; Lc. 9.28-36)*

² Yūcuán na te nuū iñú quiyī te Jesús ni jeca ya Pedro jīn Jacobo jīn Juan, cuahān sīn ya jīn de ĩn yucu súcun. Te yūcuán, tucu ni nduu ya nuū de. ³ Te sahma ya ni ndindéé, te ni nducuíjín quiyī, nájñuhun yuhvā volcán. Te tú ni ĩn ñayuu ñayīvi yáha cuu nacate jeē ndúquiya ndasí súcuan. ⁴ Te ni cajito de jeē Elías jīn Moisés cándajñuhún de jīn yá. ⁵ Yūcuán na te ni cahān Pedro jīn Jesús:

Maestro, nacā jeē váha jeē cáhīn na yáha. Te na sáha ná únī vehe ramada, ĩn cuu máa ní, inga cuu Moisés, te inga cuu Elías, achí de.

⁶ Chi yōhyo ni cayūhu tée cáscuáha ún, te Pedro tu ní sáha de cuenta na vé cúu jeē cahán de. ⁷ Te ni quiji vicō nūhun ní jesi-ni nuū de. Te nuū vicó un ní cahān ĩn jñuhun:

Yáha cúu Sēhe ri jeē maní ndasí rí jīn. Te na cúni nahín ró jñuhun cáhán yā. Achí.

⁸ Te ni candacoto-ni de, te tuá tēe un ní cájito de, chi máa ĩn na Jesús.

⁹ Te ni cananuu de jīn yá yucu ún. Te ni ndacu nīhin ya jniñu nuū de jeē ma cáchi de nuū ní ĩn jeē súcuan ni cajito

de, chi nde na nátecu maá yá, Yaā ní nduu tēe, áchí yá. ¹⁰ Jeē yúcuan ní cachuvāha de tāca jēē ní cuu ún, te cácajnūhun jñahan de na jñuhun cúu jeē nátecu yā. ¹¹ Te ni cacajnūhún de ya:

Te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiji ĩn tēe cúu nájñuhun Elías, te sátūhva de ndihi, áchí tutu. ¿Te ndese cáhán tucu tutu ĩi siquī ruhū, Yaā ní nduu tēe? Cáhán jeē ndoho xeēn rī, te sájéē ni i nuū rī. ¹³ Te cáhán rī jīn ró jeē jé ni quiji tēe ni cuu nájñuhun Elías, te ni casáha ndevāha ñayuu jīn de tāca jēē ní cacuu ni maá i, nájñuhun cáhán jñuhun de nuū tútu, áchí yá.

*Jeē ní nasávāha ya ĩn sūchi
ñūhun tachī ini*

(Mt. 17.14-21; Lc. 9.37-43)

¹⁴ Te ni najinū yā jīn de nuū sava ga tēe cáscuáha jīn yá, te ni cajito ya ñayuu cuehē ndasí, ni cajicó ndúū i de. Te suni cáhīn tēe cástéén tutu ley Yaā Dios, cátejnáhan jīn de. ¹⁵ Te nuū ní cajito tāca ñayuu un jēē véji ya, te ni canaa ni i. Te cájīnu i cuangoo i nuū yā jeē cahān i jīn yá. ¹⁶ Te ni cajñuhun yá i:

¿Na siquī cátejnáhan ró jīn de jijnáhan de? áchí yá.

¹⁷ Te ni cahān ĩn tēe íne yūcuán:

Maestro, vendeca ná séhe ná núū ní, chi ñūhun ĩn tachī

ini i, te ni cuñihín i ni sáha. ¹⁸ Te ndé-ni cúu nuū íne i, te tachī un scótúú i, te jéhni yihí-ni i. Te jée tiñū yuhu i, te squihñi jnúhun i. Te cuacuxii ndasí i sáha. Te ni cahān ndahú ná jín tée cáscuáha jín ní jeē na quénehen de tachī ún, te tu ní cúu sáha de, áchí de.

¹⁹ Te ni cahān yā jín de jijnáhan de:

Ñayuu tu cándíje cuiti cácuu ró. ¿Nasaa ga quiví condee rī jín ró? ¿Te nasaa ga quiví cuandeyí ni rī jín ró? Cuáquihin sūchí un, na quíji i, áchí yá.

²⁰ Te ni caquindecade i nuū yā. Te nuū ní jito tachī un núu yā, te ni jehni yihí-ni i. Te ni cotúú i, te cónéhén cócáni i, te jée tiñū yuhu i. ²¹ Te Jesús ni cajnúhun yá tatá i:

¿Nasaa cuiyā ni cuu jeē sáha súcuan jín i?

Te ni cahān de:

Nde lulí i. ²² Te ni cuu cuehē jínu scótúú táchī ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ni ní chindée ñáhán ní sãña jéē ndúvãha sēhe ná, áchí de.

²³ Te ni cahān Jesús jín de:

Núu cuu cándíje ró jeē sáha rí, chí ñayuu cándíje te cuu tãca jéē cuní i, áchí yá.

²⁴ Te máá tátá sūchí un ní cahān jee de:

Cándíje ná, te chindée ñáhán ní sãña jéē cándíje ñihin ga ná, áchí de.

²⁵ Te ni jito Jesús jeē ní cutútú cuehē ñayuu nuū yā. Te ni cahān yā nuū tachí:

Tachī jeē sañihín sásóhó, ruhū ndácu rí jniñu jeē na quénda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchī ún, te ni jehni yihí tucu i, te ni quenda cuahān. Te sūchí un ní cuu i nájnūhun ndíyi. Te ni cacahān cuehē ñayuu jeē jé ni jihí i. ²⁷ Te Jesús ni jñi ya ndaha i, te ni ndonehen ya i, te ni nucuñi-ni i.

²⁸ Yūcuán na te ni quiví ya ini ñn vehe, te tēe cáscuáha jín yá, ni cacajnúhun sín de ya:

¿Najehē tu ní cúu quenehen ná tachī un jijnáhan ná? áchí de.

²⁹ Te ni cahān yā:

Íñ tachī súcuan chí ma quénda cuiti te núu tú cacān tahú rō te coo ndite ni rō, áchí yá.

Jeē ni cáhān tucu ya jeē cúu yā

(Mt. 17.22-23; Lc. 9.43-45)

³⁰ Te ni quenda ya yūcuan jín de jijnáhan de, te ni yāha ya ndañū Galilea cuahān yā. Te tu ní cúní yā jeē cuní ni ññ ñayuu. ³¹ Chi stéén yā nuū tée cáscuáha jín yá, te áchí yá:

Máá rí, Yāá ní nduu tēe, nastúu i ruhū nuū tãca tēe xeēn. Te cahni de ruhū, te núu ni jihí rí, te nuū uní quiví te natecu rí, áchí yá.

³² Te tu ní cájecūhun ni de jnúhun yáha, te cáyūhú de cajnúhún de ya siquí jnúhun ni cahān yā.

Nde ñáyuu cúu jeē cujéhnu ga

(Mt. 18.1-5; Lc. 9.46-48)

³³ Te ni jinū yā jín de ñuu Capernaum, te nuū ni quiví

ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

³⁴ Te tu ní cácahān cuíti de, chi ichi un ní cacahān de siquī nūu ndé ñn de cújéhnū ga.

³⁵ Yūcuán na te ni cucōo ya, te ni cana ya ndihúxí uū de, te ni cahān yā:

Nūu ndé ñn ró cúní cujéhnū ga, na cúu ró tée nūu ga nuū tāca jnáhan ró, te cuajníñu ró nūu jnáhan ró.

³⁶ Yūcuán na te ni jñi ya ndaha ñn sūchi lúli, te ni jeni ya i mēhñú de jíjnáhan de. Te ni nundee yā i, te ni cahān yā jíin de:

³⁷ Na-ni ñayuu nūu jeē siquī ruhū jetáhú i ñn sūchi lúli nájñūhun sūchi yáha, te ruhū jetáhú i. Te ñayuu jetáhú rúhū, nasūu máá ñn-ni ruhū, chi suni Yaā ní tají rúhū jetáhú i, áchí yá.

Ñayuu tu cáhán siquī yā, ñn i jíin yá

(Mt. 10.42; Lc. 9.49-50)

³⁸ Yūcuán na te ni cahān Juan jíin yá:

Maestro, ni cajito ná ñn tēe jeē jíin síhví ní quénehen de tachī ini ñayuu. Te ni cajesi ná jeē sáha de, chi tu jíca de jíin yó, achí de.

³⁹ Te ni cahān Jesús jíin de:

Ma cási rō jeē sáha de. Chi ni ñn tēe jeē jíin síhví rí sáha de jñiñu jéhnū, ma cúu nacahān de siquī rī. ⁴⁰ Chi tēe tu cáhán siquī yō, ñn de jíin yó. ⁴¹ Te na-ni ñayuu nūu jeē siquī ruhū cuāha i vēsú ñn ñajin ndute coho ró, siquī jeē

cácandíje ró ruhū, ndaā ndije cúu jeē nihín i tahū i. Achí yá.

Xeēn coo siquī ñáyuu quívi nuū cuéchi

(Mt. 18.6-9; Lc. 17.1-2)

⁴² Te nūu ñn sūchi lúli yáha cándíje i ruhū, te nūu quívi i cuéchi sáha na-ni ñayuu, te vāha ga nūu ni conuhnī ñn yōso cáhnū sucūn ñayuu ún, te quēe i chīji ndute mar nuú.

⁴³ Te nūu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñn-ni ndaha ró te quívi ró nūu cotecu rō ní cáni, vēsú jeē cóndee ndindúú ndaha ró te quívi ró infierno, nuū cayú ññhūn jeē ma ndahvá cuíti. ⁴⁴ Te yūcuán chi tu cájihī tindacú, te tu ndáhvá cuíti ññhūn. ⁴⁵ Te nūu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró nūu cotecu rō ní cáni, vēsú jeē cóndee ndindúú jehē rō te quívi ró infierno, nuū cayú ññhūn jeē ma ndahvá cuíti. ⁴⁶ Te yūcuán chi tu cájihī tindacú, te tu ndáhvá cuíti ññhūn. ⁴⁷ Te nūu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jñiñu jíin ñn na tinūu ró, vēsú jeē cóndee ndindúú tinūu ró te quívi ró infierno. ⁴⁸ Te yūcuán chi tu cájihī tindacú, te tu ndáhvá cuíti ññhūn.

⁴⁹ 'Chi nájñūhun quénda vāha oro sáha ññhūn, súcuan

quénda vāha ñayuu sáha jñūdóho. Te tāca cúñu jeē socó ñayuu nuū yā, cúhuvuā sáha ñīī. ⁵⁰ Vāha íyó ñīī, te núu ñīī ún na náā jeē uhvuá, ¿te ndese nduu uhvuā tucu sáha ró? Núu súcuan te cuu ró ñáyuu vāha, nájnūhun íyó vāha ñīī. Te na cóyūcu vāha ró jíin jnáhan ró. Achí yá jíin de.

Siquí jeē ma stóo jnáhan tēe jíin ñahan
(Mt. 19.1-12; Lc. 16.18)

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jñūhun nuū i, nájnūhun sáha ya. ² Yūcuán na te jecu tēe grupo fariseo ni quecoo de nuū yā, chi cáconi de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusín ñi tēe jíin ñasihí de. ³ Te ni cahān yā jíin de:

¿Na jniñu ni ndacu Moisés nuū rō nde jenahán?

⁴ Te ni cacahān de:

Moisés ni jēhe de jñūhun jeē cúvāha ñi acta jeē ndusín de jíin ña, te ndōo ña, achí de.

⁵ Te ni cahān Jesús jíin de:

Siquí jeē níhni ni rō jijnáhan ró, jeē yúcuán ní ndacu de jniñu yáha núu rō. ⁶ Te nde xīhna ñúhún, ná ni sáha Yaā Dios ndihí, chi tēe jíin ñahan ni sáha ya. ⁷ Jeē yúcuán cúu jeē stóo tēe tátá de náná de, te quijnáhan de jíin ñasihí de.

⁸ Te ñi na cuu ndindúú de,

áchí Yaā Dios. Núu súcuan te tuá cúu uū jnáhan de, chi ñi na cúu. ⁹ Jeē yúcuán tu íyó vāha jeē stóo jnáhan, chi jeē ni squíjnáhan Yaā Dios cúu, achí yá.

¹⁰ Te tēe cáscuáha ún nuū ni quívicoo de vehe, te ni cacajnūhún tucu de ya siquí jñūhun ún. ¹¹ Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndéē de ñasihí de. ¹² Te núu ñi ñahan stóo ña yí ña te condeca ña inga tēe, suni cásiquí ndéē ña de. Achí yá.

Jeē ni jicān tahú Jesús jehē sūchi lúli

(Mt. 19.13-15; Lc. 18.15-17)

¹³ Yūcuán na te ni quecoo ñayuu jíin súchi lúli, jéē na sóo yá ndaha ya xiní i. Te tēe cáscuáha jíin yá, ni cacahān de nuū ñáyuu vējicoo jíin i. ¹⁴ Te ni jito Jesús, te ni quití ni yā, te ni cahān yā jíin de:

Cuāha jñūhun na quíjicoo sūchi lúli jíinā nuū rí, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quíví ndaha Yaā andiví jeē ndacu ya jniñu nuū i. ¹⁵ Te jendaá cahān rí jíin ró, núu ñi ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñi sūchi lúli, ma quíví cuítí i ndaha ya, achí yá.

¹⁶ Te ni nundee ya i, te ni soó yá ndaha ya xiní i, te ni jicān tahú yā jehē i jijnáhan i.

Jñūhun tēe cúcá

(Mt. 19.16-30; Lc. 18.18-30)

17 Yūcuán na te ni quihin tucu ya ichi cuahān yā. Te jínu ñn tēe ni quee de, te ni jecuññi yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahú na cotecu na ní cáni andiví? áchí de.

18 Te ni cahān yā jín de:

¿Naun cáhán rō jeē tēe vāha cúu rí? Tú ni ñn tēe vāha iyó, chí máá ñn-ni Yaā Dios. 19 Je jíní rō táca jniñu ní ndacu Yaā Dios: Ma cosíquí ndéē jnáhan ró. Ma cáhni rō ndīyí. Ma sacuíhná ró. Ma sajnúhún ró. Ma stahú ró jnáhan ró. Cuatáhú ró nuū tatá rō nuū naná rō. Achí yá.

20 Te ni cahān tēe un jín yá:

Táca jniñu yáha je ni squícu ná ndé ná lulí ná, Maestro, achí de.

21 Yūcuán na te ndáhú jito ya nuū de jeē cúsiñ ni yā jín de. Te ni cahān yā:

Ñn na jniñu cúmaní sáha ró núu súcuan. Cuáhán te xīco ró ndihi jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquñ rō ruhū, te cuāha ró jnūhun ndoho ró jnúndóho jeē siquí rí, achí yá.

22 Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chí cúca ndasí de.

23 Yūcuán na te Jesús ni ndacoto ya ní xiin ya, te ni cahān yā jín tēe cáscuáha jín yá:

Tēe cúca chí yōhyo yí quívicoo de ndaha Yaā Dios jeē ndacu ya jniñu nuū de, áchí yá.

24 Te tēe cáscuáha jín yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jín de:

Séhē, ñayuu tēnuū xūhún, yōhyo yí quívicoo i ndaha Yaā Dios jeē ndacu ya jniñu nuū i. 25 Yachí gā yāha ñn camello yaū yutícuí, vēsú jeē quíví ñn ñayuu cucá ndaha Yaā Dios jeē ndacu ya jniñu nuū i, áchí yá.

26 Te víhyá gā ni canaa ni de cájini de, te ni cacajnūhun jnáhan de:

¿Ndé ñayuu cúu jeē cácu núu súcuan?

27 Te ni ndacoto ya nuū de, te ni cahān yā:

Ñayuu chí ma cúu squíví i máá i ndaha Yaā Dios, te máá yá chí cuu sáha ya, chí ndihi-ni jniñu cuu sáha ya, achí yá.

28 Yūcuán na te ni cahān Pedro jín yá:

Saña jínjáhan ná, ní castóo ná ndihi jeē cánevāha ná, te cándiquñ na níhín, áchí de.

29 Te ni cahān Jesús:

Jendaá cahán rí jín ró jijnáhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jín síquí jeē scáca i jnūhun jeē jnáma ri ñayuu, 30 núu súcuan te ñanihín i ñn ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jín jéé cóto xeēn ñayuu i. Te nde inga vida quiji te cotecu i ní cáni. 31 Te cuehē ñayuu jeē vijna cácujeñnu, nduu i ñayuu núu

ga. Te ñayuu jeē núu ga vijna, chi ndujéhnú i, áchí yá.

Jeē ni cáhān tucu ya jeē cúu yā

(Mt. 20.17-19; Lc. 18.31-34)

³² Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sōho de jnūhun ni cahān yā. Te cáyūhú de cuángoo de jíin yá. Yūcuán na te ni cana sīn tucu ya ndihúxí uū tée cáscuáha, te ni quejéé yá cástūhún tucu ya nuū de tāca jéé quíji siquī yā. ³³ Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tée, nuū sutú cácujuhnu jíin núu tée cástéén tutu ley. Te ndonda de siquī rī jeē cúu rī, te squívi de ruhū nuū tée nación Roma jeē cáyūcú Jerusalén cándacu jniñu. ³⁴ Te tāca tée un sácatā de nuū rī, te cani de ruhū, te tesihí de nuū rī, te sáá te cahni de ruhū. Te nuū uní quivī te natecu rī, achí yá.

Jeē ni jíicān Jacobo jíin Juan ñin favor nuū yā

(Mt. 20.20-28)

³⁵ Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéé sáha ní ñin jeē cacán na núu ní, áchí de.

³⁶ Te ni cahān yā jíin de:

¿Ndese cácuni rō jeē sáha ri jíin ró? achí yá.

³⁷ Te ni cacahān de:

Cuāha ní jnūhun jeē cónēne ná xiin ní quívi ndujéhnú ní,

ñin ná lado váha ní, te inga ná lado jecó ní, áchí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnūndóho nájñūhun jeē quíji siquī rī? ¿Te á canda ró ndoho xeēn rō nájñūhun ndoho ri? achí yá.

³⁹ Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnūndóho nájñūhun jeē quíji siquī rī, te ndoho xeēn rō nájñūhun ndoho ri. ⁴⁰ Te jeē cónēne ró lado váha ri jíin lado jecó rī, nasūu rúhū cúu jeē cuáha jnūhun. Chi je íyó túhva cuu tāca tée jeē ní nacāji Tátá rī, te tée un níhīn, achí yá.

⁴¹ Te uxī gā tée cáscuáha un, ní cajini de jnūhun yáha, te ni caquitī ni de nuū Jacobo jíin Juan. ⁴² Te Jesús ni cana ya de, te ni cahān yā jíin de:

Cájini rō ndese cásáha tée cácujuhnu nuū ñáyuu táca nación. Chi cándacu níhin de jniñu nuū i, te máá de cáchí ndese coo. ⁴³ Te máá ró jíināhan ró, chi ma sáha ró súcuan. Chi núu ndé ñin ró cúni cujuhnu, sa suhva cuajniñu ró núu jnāhan ró.

⁴⁴ Te núu ndé ñin ró cúni cuu nuū, sa suhva sáha ró máá ró mozo nuū tāca jnāhan ró.

⁴⁵ Chi suni súcuan sáha ruhū, Yaā ní nduu tée, chi nasūu jéé véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuāha ri máá rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáá

(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñáyuu cuehē ndasí. Te Bartimeo tēe cuáá, sēhe Timeo, néne de yuhíchi, jíicán de caridad. ⁴⁷ Te ni jini de jnūhun jeē Jesús ñuu Nazaret vēji ya. Te ni quejéé de cána jee de:

Jesús Sēhe yucūn David, cundáhú ni ni sáña, áchí de.

⁴⁸ Te cuehē ñayuu ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quihín yō, chí cána ya rohó, áchí i jíin de.

⁵⁰ Yūcuán na te ni scáne de ticāchí de, te yachī ni ndocuiñī de, te ni jinū de nuū Jesús. ⁵¹ Te ni cahān yā jíin de:

¿Na vé cuní rō jeē sáha ri jíin rō?

Te máá de ni cahān de:

Maestro, jeē na ndúndijin tinūu ná cuní na, áchí de.

⁵² Te ni cahān Jesús jíin de:

Cuáhán núu súcuan. Ni candíje rō jeē cuu nasávāha ri rohó, te jeē yūcuan ní nduvāha rō, áchí yá.

Te ni ndundijin-ni tinūu de, te ni ndiquin de Jesús cuahān de jíin yá ichi ún.

Jeē ni quivi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11

¹ Te ni cuyajni ya ñuu Jerusalén, vēji ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quingoo de. ² Te áchí yá jíin de:

Cuángoo ñuu lulí íne ichi núu. Te núu ni quivi-ni ró yūcuan, te nihin rō in burro núhni tí, jeē ní in tēe ná tu coso de tí. Te ndají ró tí, quijicoo ró jíin tí. ³ Te núu ndé in cajnūhún naun cándají ró tí, te cachi rō: Máá Jítoho yō jíni ñúhún yá tí, te yachī natají yá tí ndiji tí, achí rō. Achí yá jíin de.

⁴ Te cuangoo de, te ni canihin de burro un núhni tí yehyí núu quehe nuū náquijnáhan ichi. Te ni candají de tí. ⁵ Te sava ñayuu cáhlin yūcuan ní cacahān jíin de:

¿Na vé cúu jeē casáha ró jeē cándají ró burro jiñā? achí í.

⁶ Yūcuán na te ni cacahān de nájnūhun ni cachi Jesús. Te ni casiáá i tí vējicoo de jíin tí. ⁷ Te ni ndecoo de jíin tí nuū Jesús, te ni casoó de sahma de siquī tí, te ni jecosō yā tí. ⁸ Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúu, te ni cachucun i ini ichi ún.

⁹ Te ñayuu cuangoo ichi núu jíin ñáyuu cuangoo ichi yátá, cácana jee i:

Yōhyo cújéhnū ya. Yōhyo vāha Yaā cúu Yaā jeē véji jíin jniñū máá Jítóho yō Yaā Dios. ¹⁰ Te yōhyo luu coo, chi je ya-jni ndacu ya jniñū nájnūhun ni ndacu jíi yō rey David. Te yōhyo cújéhnū máá Yaā Dios. Achí i.

¹¹ Te ni quiví Jesús ñuu Jerusalén, jíin ini templo cáhnu. Te ni jito ya nuū tācá ndajniñū yúcu ní yúcuán. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo

(Mt. 21.18-19)

¹² Te inga quiví ún, nuū ní quenda ya ñuu Betania cuahān yā jíin de, te jíi yā sōco. ¹³ Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhín yā, chí máá ndaha-ni ín. Chí nasūu tiempo ndehē cúu. ¹⁴ Yūcuán na te ni cahān yā nuū yujnu ún:

Tuá na ndehē cuun cuiti xinī rō jeē cáji ñayuu, achí yá.

Te tēe cáscuáha jíin yá ni cajini de jeē súcuán ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cánaxico núu ñáyuu jeē socō i. Te ni scotúú ndeyi ya tāca mesa tēe cástáyi xūhún, jíin

silla tēe cáxícó paloma. ¹⁶ Te tu ní jéhe ya jnūhun jeē yáha ñayuu ini templo jíin ndajniñū ndíso i. ¹⁷ Te ni steén yā jnūhun nuū i, achí yá:

Yósó núu tútu íi jeē cahán Yaā Dios: Vehe ri chí vehe nuū cájicān tahú ñayuu tācá nación cúu, achí yá. Te máá ró jijnáhan ró chí nájnūhun yaū cava ñacuñna ní canasáha ró, achí yá.

¹⁸ Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chí cáyūhú de jeē ndujéhnū ga maá yá vēsú maá de, chí tāca ñáyuu yōhyo cácusī ni i cájini i jnūhun stéén yā. ¹⁹ Te jeē cuácuaa, te ni quenda ya ñuu Jerusalén cuahān yā.

Jeē ni íchī nundēhe higo

(Mt. 21.20-22)

²⁰ Te jenéhen inga quiví ni nayāha ya jíin de cuahān yā. Te ni cajito de jeē nundēhe higo un je ni ichī nde yoho. ²¹ Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichī caján, achí de.

²² Te ni cahān Jesús jíin de:

Candije ró jéé sáha Yaā Dios jeē jicán rō. ²³ Chí jendaá cahán rī jíin ró, núu ndé ñáyuu cahān i jeē cújiyo yucu yáha quihīn nde nuū mar, te núu tú nacani siquí ni i, chí sa suhva candije i jeē cóo nájnūhun ni cahān i, yūcuán na te cundaā jeē ni jicān i. ²⁴ Jeē yúcuán cáhān rī jíin ró, tāca jéé cacán

tahú rō, te núu candíje ró jéē nihín rō, te nihín rō. ²⁵ Te jeē cájicān tahú rō, te cone cáhnu ni rō nuū ñáyuu casáha cuēchi siquī rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró. ²⁶ Chi núu tú cone cáhnu ni rō nuū jnāhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, áchí yá.

*Siquī jeē ndíso jniñu Jesús
(Mt. 21.23-27; Lc. 20.1-8)*

²⁷ Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cájucjéhnú jín tée cástéén tutu ley Yaā Dios jín tée jéhnú cándacu jniñu, ni quecoo de nuū yā. ²⁸ Te ni cacajñuhún de ya:

¿Ndé ní nihín jniñu ró jéē sáha ró jniñu yáha? ¿Te ndé ñn ni tee jniñu siquī rō jeē sáha ró súcuán? áchí de.

²⁹ Te ni cahān Jesús:

Suni ruhū, cajñuhun rí rohó ñn jñuhun jíjnāhan ró. Te núu cuu stío cuñí rō, yūcuán na te cachi rī nuū rō ndé ní nihín jniñu ri jeē sáha ri jniñu yáha.

³⁰ ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca tée? Cachi nuū rī, achí yá.

³¹ Yūcuán na te ni canda-jñuhun máá de:

Núu cahān yō jeē Yaā Dios ni tee ya jniñu un síquī Juan, te cahān de jín yó: Núu súcuán ¿te najehē tu ní cándíje ró de? ³² Te núu cahān yō jeē ñáyuu ni catee jniñu un síquī de, te quitī ni

ñáyuu nuū yō, achí de cácahān maá de.

Chi cáyūhú de jeē quitī ni ñáyuu, chi ndivii i cácandíje i jeē tée ni nacani jñuhun Yaā Dios ni cuu ndije Juan. ³³ Jeē yúcuán ní cacahān de jín yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, áchí yá.

*Jñuhun yátá síquī tēe néé
cásájniñu nuū uva*

(Mt. 21.33-46; Lc. 20.9-19)

12

¹ Te ni quejéé yá cahán yā jñuhun yátá jín de jíjnāhan de:

Ñn tēe ni nachuhun de cuehē uva, te ni jesi de corral, te ni sáha de ñn nuū cūhun ndehē un táxín. Te ni sáha de ñn vehe súcūn návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jín. Te ni tee de ichi cuahān jíca de. ² Te máá tiempo ndutútú uva, te ni tají de ñn mozo de cuanuquihin sava uva nuū tēe cásájniñu ún.

³ Te tēe un ní cajñi de mozo un, te ni cacani de i, te ni canatajé de i cuanuhun i súcuán-ni. ⁴ Yūcuán na te tēe chíí uva un ní tají tucu de inga mozo cuahān. Te tēe cásájniñu un ní cajehē de yūu xiní mozo un, te ni castújí de, te ni cacahān ndevāha de nuū. ⁵ Te tēe chíí uva ni tají tucu de inga mozo cuahān. Te ni cajehni de i. Te suni súcuán ni tají de cuehē gā

mozo cuahān, te sava i ni canani de, te sava i ni cajehni de.

⁶ Te tēe chíí uva, íyó ñn sēhe de jeē maní ndasí de jíín. Te jeē sándihí na ni tají de sēhe de un cuáhān nuū tēe cásájniñu. Te jéni ni de: Tēe ún chíi cuatáhú de jíínáhan de nuū séhe ri. ⁷ Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí. ⁸ Te ni cajñi de i, ni cajehni de i, te ni cascáne de i ñnga lado. Achí yá.

⁹ Yūcuán na te ni cajñuhun yá de:

Núu súcuan ¿te ndese sáha tēe chíí uva un? Ndiñi de te cahni de tēe cásájniñu ún, te cuáha de ñuhun cáá uva un nuū ñnga sava tēe sájniñu nuū.

¹⁰ ¿Te á ná tu cahu ró jñuhun yáha jéé yosó núu tútu ñi, jeē ruhū cúu nájñuhun ñn yuū? Chíí achí tutu:

Yuū jeē ní casquéhichí tēe cájeni vehe,
yuū yáha nduu jeē quítuu vehe.

¹¹ Máá Jítóho yō Yaā Dios ni sáha ya súcuan,
te cánaa ni yō jító yó jniñu yáha.

Achí tutu, achí yá.

¹² Yūcuán na te ni canducú de modo jñi de ya. Chíi ni cajecūhun ni de jeē siquī maá de cúu jñuhun yátá ní cahān yā siquī tēe cásájniñu nuū uva jíín tēe cájeni vehe. Te siquī jeē cáyūhú de jeē quítu ni ñayuu, te ni castóo de ya te cuango de.

Siquī xūhun renta

(Mt. 22.15-22; Lc. 20.20-26)

¹³ Yūcuán na te ni catají de sava tēe grupo fariseo jíín tēe grupo Herodes cuango de nuū yā, ndúcú de ndese sáha de návāha cahān yā ñn jñuhun jeē nihín de cuēchi siquī yā. ¹⁴ Te ni quecoo de, te ni cacahān de jíín yá:

Maestro, cájini na jéé tēe cáhān ndaā cúu ní, te tu yúhú ní jeē cahān ni ñn ñayuu siquī ní. Chíi tu sáha ní cuenta ndese cúu ñn ñn i, chíi inuū-ni sáha ní jíín i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jñi nación yō, chíi tuú? ¿A chúnaa yō, chíi má chúnaa yō? Achí de jíín yá.

¹⁵ Te máá yá jiní yā jeē stahú-ni de, te ni cahān yā jíín de:

¿Najehē cájito ndee rō ruhū? Cuáha ñn xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajñuhun yá de:

¿Ndé ñn nuū cúu jeē ndeé nuū xūhun yáha, te ndé síhví cúu jeē ndeé yáhá?

Te ni cacahān de jíín yá:

Nuū jíín síhví rey un cúu, achí de.

¹⁷ Yūcuán na te ni cahān yā jíín de:

Núu súcuan te nacuaāha ró núu rey un jéé yñi cuenta nuū de, te nacuaāha ró núu Yaā Dios táca jéé yñi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

*Jeē ní cacajñūhún de siquī
jeē nátecu ndīyi*

(Mt. 22.23-33; Lc. 20.27-40)

¹⁸ Yūcuán na te jecu tē grupo saduceo ni quecoo de nuū yā. Te tē un cácahān jeē tu nátecu cuiti ndīyi. Te ni cacahān de jíin yá siquī ñn jñūhun, áchí de:

¹⁹ Maestro, Moisés ni tee de nuū tútu jeē cánevāha yó: Núu ñn tē cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuiñī i nuū ndīyi ñani de, áchí tutu.

²⁰ Núu súcuan te ni íyo uxā ñani. Te tē núu ní quiñáhan de jíin ñahan. Te ni jihí de, te tú sēhe de ní íyo. ²¹ Te tē uū ni naquihin de ña, te suni ni jihí de, te tú sēhe de ní íyo. Te suni súcuan tē unī. ²² Te ndihúxá de ni condeca de ña, te ni ñn de tú sēhe de ní íyo. Te jeē sándihí te suni ni jihí ñahan ún. ²³ Núu súcuan te núu na nátecu de jíináhan de quiñí nátecu ndīyi, ¿te ndé ñn de cuu ña ñasihí de? Chi ndihúxá de ni condeca de ña. Achí de jíin yá.

²⁴ Yūcuán na te ni cahān yā jíin de:

Yōhoyo cástívi ró jñūhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā ndīyi. ²⁵ Chi quiñí nátecu ndīyi, te tuá na jñūhun quiñáhan tē jíin ñahan coo. Chi coo i nájnūhun ndajéhé Yaā Dios andiví. ²⁶ Te siquī jeē nátecu ndīyi, ¿á tu ní cácahu ró tutu ní tee Moisés, ndese ni

cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. ²⁷ Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Yōhoyo cástívi ró jñūhun núu súcuan. Achí yá jíin de.

*Jniñu cánuú ndasí gá jeē ní
ndacu Yaā Dios*

(Mt. 22.34-40)

²⁸ Te ni quee ñn tē stéén tutu ley Yaā Dios, te ni jini de jeē castíchi jñáhan tē un jíin Jesús. Te ni jini de jeē váha ni nastió cuiñí yá jñūhun. Te ni cajñūhún de ya:

¿Ndé ñn cúu jñūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

²⁹ Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá ñn-ni ya iyó. ³⁰ Núu súcuan te coo manī ndasí ró jíin máá Jítoho rō Yaā Dios, nde jñáa ndasí ró sáha ró ndihí jeē cúsiñi ni yā, nde jíin ini jíin ánuá rō, jíin ní jeē níjnūní rō, jíin ní fuerza rō. Yāha cúu jniñu ndácu ya jeē cánuú ndasí gá. ³¹ Te jniñu uū jeē ní ndacu ya, suni súcuan cáhán: Cundáhú ni rō jñáhan ró nájnūhun cundáhú ni rō maá ró. Tuá inga jñūhun ndácu jniñu cánuú gá iyó, chi suu máá jéē yáha-ni. Achí yá jíin de.

³² Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chi ndaā chi iyó ñn-ni Yaā Dios, te tuá na inga yā iyó.

³³ Te cánuú jéē coo manī ndasí yó jíin yá nde jíin ini jíin ánuá yō, jíin ní jeē níjnūnī yō, jíin ní fuerza yō, te cundáhú ni yō jnāhan yó nájñūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiiti jíin táca gá jeē socó yō nuū yā. Achí de jíin yá.

³⁴ Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quiiví ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chūndeyí ni de cajñūhún de ya.

Siqui jeē cúu Cristo sēhe yucūn David

(Mt. 22.41-46; Lc. 20.41-44)

³⁵ Te stéén Jesús jñūhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David? ³⁶ Chi máá David suhva ni cahān de jñūhun ya ni sáha Espíritu Santo nde jenahán:

Máá Jítoho yō Yaā Dios ni cahān yā jíin Jítoho rī, Yaā quiiji:

Cucōo ró lado váha ri nuū cujéhnu ró,

te na sáha ri jeē quende rō poder táca jéē cájito uhū rohó.

Achí Yaā Dios. Achí David.

³⁷ Te núu sēhe yucūn David cúu Cristo, ¿te ndese cúu jeē ni

cáhān de jeē Jítoho de cúu ya? achí yá.

Te ñayuu cuehē, cánujñahan ni i cájini nahín i táca jñūhun cáhán yā.

Jeē ni cáhānyā jeē iyó cuéchi de jíināhan de

(Mt. 23.1-36; Lc. 11.37-54; 20.45-47)

³⁸ Te stéén yā jñūhun, te ni cahān yā jíin i:

Coto má candíje ró táca tēe cástéén tutu ley. Chi cácusí ni de cáñuhun de sahma cáni jeē steén jeē cujéhnu de, cájica cuu de jíin. Te cánujñahan ni de jeē cahán yíñūhún ñáyuu jíin de ini calle. ³⁹ Te cánujñahan ni de cucōo de nuū silla yíñūhún gá ini vehe i sinagoga, jíin silla yíñūhún gá nuū víco cáyeji ñayuu. ⁴⁰ Te cáquende de vehe ñahan ní caquendōo ndáhú. Te nahán cájicān tahu de návaha cani ni ñayuu jeē tú na cuéchi de. Tēe yáha jíināhan de chi xeén gā ndoho de castigo. Achí yá.

Jeē ni sócō ñahan viuda xūhún

(Lc. 21.1-4)

⁴¹ Te ñn quiiví néne Jesús ini templo ichi núu táca yéjnū nuū cásocō i xūhún. Te jíto ya ndese cáchuhun ñayuu xūhún ini yejnū ún. Te cuehē ñayuu cucá ní cachuhun i cuehē xūhún. ⁴² Te ni quee ñn ñahan viuda jeē ndóho ndáhú. Te ni chuhun ña uū centavo lulí ini yejnū ún. ⁴³ Yūcuán na te ni cana ya tēe cáscuáha jíin yá, te ni cahān yā jíin de:

Jendaá cahán rī jíin ró jeē cuehē gā cúu jeē ni sócō ñahan

viuda ndahú yáha, vēsú jeē ní casocō tāca ñáyuu cucá. ⁴⁴ Chi tācá i ni casocō i jeē ni ndóo siquī xúhun cuéhē i. Te ñahan yáha, vēsú ndahú ndóho ña, te ni chuhun ndihí ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te ñin tēe scuáha jíin yá ni cahān de:

Maestro, condēhe ní ná luu jíito tācá vehe yáha jéē cúu templo, jíin táca yúū jeē ní cuvāha, áchí de.

² Te ni cahān yā jíin de:

Tācá vehe náhnu yāha jéē cájito ró, chí ma cóso jnáhan ga ni ñin yuū, chí ndihí jnanū. Achí yá.

Na seña coo nuū cuácuyajni ndihí ñayiví

(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núú templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sñn de ya:

⁴ Castūhun ní nuū ná, ¿ndé quiví coo tāca jéē ní cachi ní jéē coo? ¿Te na seña coo núu cuacuyajni squícu tāca jéē ní cahān ní? áchí de.

⁵ Te ni cahān yā jíin de:

Coto ró jéē ma stahú ni ñin de róhó. ⁶ Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stáhú de cuehē ñayuu.

⁷ Te nihīn rō jñuhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndihí ñayiví. ⁸ Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnāa, te coo jnamā, te ndonda ñayuu siquī jnáhan i. Te tāca jéē yáha cácuu jñūndóho quejéé xíhna ñúhún gá.

⁹ Te condito ró máá ró, chí nastúu i róhó núū tāca tóhō, te ini tācá vehe ñi sinagoga caní i róhó. Te quindeca i sava ró núū tācá gobernador jíin núū tāca rey, te cahān i cuēchi siquī rō siquī jeē cácan díje ró rúhū. Te súcuan te cuu naçani ró jñuhun ri nuū de. ¹⁰ Te jíni ñúhún jéē xíhna gā cuitē núu jñuhun nuū tācá nación ndese jnáma ri i, te sáá te ndihí quiví. ¹¹ Te núu ni cajñi de róhó cuángoo de jíin ró nuū tāca tóhō, te ma nácani ni rō xíhna gā ndese stíó cuiñí rō nuū de te cācu ró. Chí máá hora un te máá Yā Dios cuāha ya jñuhun nuū rō ndese cahān rō, te jñuhun ún cahān rō. Chí nasūu máá ró cúu jeē cahān, chí Espíritu Santo cúu jeē cahān. ¹² Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. ¹³ Te tāca ñáyuu quití ni i nuū rō jeē siquí ruhū. Te ñayuu cuiñi nīhin jíin jñuhun ri nde quiví jínu, chí cācu i.

¹⁴ Te Daniel, tēe ni nacani jñuhun Yā Dios, ni tee de

jnūhun ñn tēe néé jéé quíji. Te róhó jéé cácahu tutu ún, na jécūhun ni rō. Chi ñn quivī te cuni rō jeē sāha ndevāha de jeē stívi de tācá ndajníñu ñ ini templo, te cuiñi de nuū tú na ley cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁵ Te ñayuu cáyūcu núu quéhe, ma ndívi i ini vehe jeē quénehen i ndajníñu i, chi cánuú cunu yachī i návāha cācu i. ¹⁶ Te ñayuu cáhīin nuū ítu, ma ndíji i vehe jeē quíhin i sahma i. ¹⁷ Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachī ña. ¹⁸ Te cacān tahú rō jeē ma quíji jnūndóho un jéé cunu ró máá tiempo cúun yuhvā. ¹⁹ Chi jeē quejéé un te coo cuehē jnūndóho xeēn, jeē ná tu coo súcuan nde quivī ní sāha Yaā Dios ñayīví te nde vijna. Te jeē ndíhi jnūndóho ún te ni ma cóo ga jeē súcuan. ²⁰ Te núu tú nastíyi máá Jítóho yō Yaā Dios tiempo jnūndóho ún, te ni ñn ñayuu ma cácu cuiti i. Te jeē siquí ñáyuu cácañíje jeē ní nacāji ya, jeē yúcuán nastíyi ya tiempo un.

²¹ Núu súcuan te núu ñn ñayuu cahān jíin ró: Yahá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. ²² Chi cañecoo tēe cástáhú te cahān de jeē Cristo cúu de, chí cahān de jeē tēe nácani jnūhun Yaā Dios cúu de. Te sāha de jniñu jénu jeē naa ni ñayuu coto i, návāha

stáhú de nde maá ñáyuu ní nacāji ya, te núu na cúu. ²³ Te ndito na cóo ni rō, chi je ni castūhun rí nuū rō vijna nde ná tu coo.

Ndese coo quivī ndiji Yaā ní nduu tēe
(Mt. 24.29-35, 42-44;
Lc. 21.25-36)

²⁴ Te quivī ún, núu je ni ndíhi jnūndóho ún, te cujnúú níandii, te yoō ma ndí gā. ²⁵ Te ñingoo quími íin andiví. Te tāca jéé íin andiví chi quisi i. ²⁶ Yūcuán na te coto ñayuu nuū maá rí, Yaā ní nduu tēe, ndiji rí jíin vícō, te condiso rí cuehē poder, te yōhyo luu cujénu rí. ²⁷ Yūcuán na te tají rí ndajéhé rí quinastútú yá ñayuu ní nacāji rí ndicúun lado ñayīví, nde nuū ndíhi ñayīví te nde nuū ndíhi andiví.

²⁸ Vijna te scuáha ró ndese sāha nundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ²⁹ Te suni súcuan núu ni cajini rō jeē ní quejéé cúu tācá jniñu jeē ni cáhān rí, yūcuán na te na jécūhun ni rō jeē ní cuyajni quivī ndíji rí, te yachī coo. ³⁰ Jendaá cahán rí jíin ró jeē ma cúu ndíhi ñayuu jeē cóto jnūndóho ún, chí nde squícu ndíhi jniñu ún. ³¹ Andiví jíin ñáyīví chí naa, te tāca jnúhun cahán rí chí ma náā, chí ndíhi squícu.

³² Te quivī jíin hora jeē ndíji rí, tú ni ñn ñayuu jíiní, ni máá ndajéhé cáhiyo andiví, ni máá rí, Sēhe Yaā Dios. Chí máá ñn ní Tátá rí cúu jeē jíiní.

33 Núu súcuan te na cócuhun ni rō tāca jnúhun yáha, te ndito na cóo ni rō, te cacān tahú rō, chí tu cájini rō na quivī ndiji ri. 34 Chi coo nájñuhun ñn tēe jeē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ñn ñn de. Te ni ndacu de jniñu nuū tēe ndíto yéhyí jeē na cóndito de. 35 Te suni súcuan róhó jijnáhan ró, ndito na cóo ni rō. Chí cúu ri nájñuhun jitohe vehe ún, te tu cájini rō na hora ndiji ri, á jéē cuácuaa, chí ñuú, chí jéē cána líhli, chí jénéhen. 36 Chi ñn sanaa-ni te ndiji ri, te coto ró jéē ma nánihñ rī rohó jéē tu ndíto ró. 37 Te jñuhun cáhán rī jín ró jijnáhan ró, suni cáhán rī jín ndivii ñayuu: Ndito na cóo ni rō jijnáhan ró. Achí yá.

Jeē ní casquijnáhan de jñuhun jeē jñi de Jesús

(Mt. 26.1-5; Lc. 22.1-2; Jn. 11.45-53)

14

1 Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yáhi. Te sutū cácujuhnu jín tēe cástéén tutu ley, ni canducú de modo ndese jñi de Jesús jín jnúhun stáhú, te cahni de ya. 2 Te ni cacahān de:

Ma jñi yó de máá quivī vico, chí ndonda ñayuu siquī yō, achí de.

Jñuhun ñahan jeē ní chuhun perfume xinī yá

(Mt. 26.6-13; Jn. 12.1-8)

3 Te íne Jesús ñuu Betania vehe Simón, tēe ni ndoho cuehyí stehyú. Te níni yéji yā staa, te ni quee ñn ñahan nuū yā, ndáhá ña ñn frasco yuū luu jeē ñuhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yá. 4 Te sava tēe cáhñin yūcuan ní caquitī ni de, te ni cacahān de:

¿Najehē cúu jeē náā saá-ni perfume jñā? 5 Chi cuu xícó yahu yó víhyá gā unī ciento denario, te cuāha yo núu ñáyuu ndahú núu, áchí de.

Te ni cacahān sōo de jín ña.

6 Te ni cahān Jesús:

Ma stáhān rō ña. ¿Naun cásáha ró jéē nácani uhū ni ña? Chí ñn jniñu váha cúu jeē ni sáha ña jín rí. 7 Chí níni coyūcu ñáyuu ndahú jín ró, te núu cácuñi rō te cuu sáha vāha ró jín i. Te ruhū chí tuá condee rī jín ró. 8 Chí ni sáha ña ndihí jeē cuu sáha ña jeē maní ña jín rí. Chí nde ná tu quindūji ri te je ni sátūhva ña ruhū jeē ní chuhun ña perfume ruhū. 9 Jendaá cahán rī jín ró jeē ñi cáhnu ñayiví ndé-ni cúu nuū cuité núu jñuhun jeē jnáma ri ñayuu, suni nacani i jñuhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yá

(Mt. 26.14-16; Lc. 22.3-6)

10 Yūcuán na te Judas Iscariote, ñn jeē ndihúxí uū tēe cáscuáha un, ní jehēn de nuū sutú cácujuhnu, ni sándaā de jín jéē nastúu de Jesús nuū

jijnáhan. ¹¹ Te nuū ní cajini sōho sutū un jēē cahán de, te ni cacusiñ ni, te ni cajejnūhun jeē cuáha xūhun núū de. Te nde quivī un ní nducú de modo ndese nastúu de ya.

Jeē ní jequin yā Cena yā

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yáhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajnūhún de ya:

¿Ndé nuū cuní ni jéē quísátūhva ná cuxíni ní vico pascua? achí de.

¹³ Te ni tají yá uū tēe cáscuáha ún quingoo de, te achí yá jíin de:

Cuángoo nde ñuu, te yūcuán najnáhan ró jíin ñin tēe ndíso quíyí ndute. Te condiquín rō de quihín rō jíin de. ¹⁴ Te vehe jeē ndívi de, yūcuan cáhān rō jíin tēe chíí vehe: Achí máá Maestro: ¿Ndé ñin cúu cuarto vehe ní cuáha núú ní núū cuxíni ya vico pascua jíin tēe cáscuáha jíin yá? achi rō. ¹⁵ Te máá de stéén de ñin cuarto cáhnu nde xiní véhe jeē je íyó túhva. Te yūcuan sátūhva ró jéē cuxíni yó, achí yá jíin de.

¹⁶ Te cuangoo tēe cáscuáha ún, te ni jinūcoo de ñuu, te ni canihín de nájnūhun ni cahān yā jíin de. Te ni casátūhva de jeē cuxíni ya vico pascua.

¹⁷ Te jeē cuácuaa, te ni quee ya jíin ndihúxí uū de. ¹⁸ Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñin rōhó jéē yéji jíin rí, nastúu ro rúhū, achí yá.

¹⁹ Yūcuán na te ni cacucuíhyá ni de, te ná ñin ná ñin de ni cacajnūhún de ya:

¿A sáña cúu? achí ñin de.

Te suni súcuan inga de:

¿A sáña cúu? achí ñin ñin de.

²⁰ Te ni cahān yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū. ²¹ Te ruhū, Yaā ní nduu tēe, jendaá cúu jeē quihín rī cuu rī, nájnūhun yósó jnūhun rí nuū tútu ñi. Te nacā xeēn ndoho tēe nastúu ruhū. Váha ga núu tu ní cácu tēe un núú, achí yá.

²² Te níni cáyeji de jíin yá, te ni quihin ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chí yāha cúu yiquí cúñu rī, achí yá.

²³ Yūcuán na te ni quihin ya ñin copa ndūxi uva, te ni nacuatáhú yá, te ni jēhe ya ni cajihí ndihí de. ²⁴ Te ni cahān yā jíin de:

Yāha cúu ñiñī rī jeē cuáha rí jeē cúu contrato jeé, te cati jeē ndundoo cuéchi cuehē ñayuu. ²⁵ Te jendaá cahán rī jíin ró jeē ndé vijna te ma cóho ga rī ndūxi ndehē uva yāhá, chí nde quiji quivī ndacu Yaā Dios jniñu ní ñayiví, te sáa te coho tucu rí jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jiní de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñin yaa ñi jín de jínáhan de. Te ni quenda ya cuahán yā jín de nde yucu Olivos. ²⁷ Yūcuán na te ni cahán yā:

Ndivii rō nayūhu ró jeē siquí ruhū jecuáa vijna. Chi suhva je yósó jnúhun ri nuū tútu ñi, ni cahán Yaā Dios: Cuaha ri jnúhun jeē cáhni ñayuu tēe ndíto lanchi, te lanchi un cuitē núu ti jeē yūhu tí, achí. ²⁸ Te jeē nátecu rī, te xīhna ruhū cosnúu rí quihīn rī región Galilea, te sáa te najinūcoo ró, achí yá.

²⁹ Yūcuán na te ni cahán Pedro:

Vēsú ndihí de na náyūhú de, te máa ná chi ma náyūhú cuiti ná, achí de jín yá.

³⁰ Te ni cahán yā jín de:

Jendaá cahán rī jín ró jeē jecuáa vijna, nde ná tu cana líhli uū jínu, te yūhu ró jeē jniñ ñayuu rohó, te unī jínu cahán rō jeē tu jíní rō ruhū, achí yá.

³¹ Te ni cahán teyí de jín yá:

Vēsú núu cuu na jín ní, te ma cahán cuiti na jéé tu jíní na níhín, achí de.

Te suni súcuan ni cacahán ndihí de.

Jeē ni jicān tahú yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jín tée cáscuáha jín yá ñin lugar nuū naní Getsemaní. Te ni cahán yā jín de:

Yāhá-ni cucōo ró, te na quíhín rī cacān tahú rī, achí yá.

³³ Te ni jeca ya Pedro jín Jaco bo jín Juan, cuahán yā jín de. Te ni quejéé yá cucuíhyá

ndasí ni yā te cúxií ni yā jeē quíji jnúndóho siquí yā. ³⁴ Te ni cahán yā jín de:

Yōhyo cucuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

³⁵ Te ni jica ya jecu gā, te ni jecuññi yití yá ni jequin ya nuū yā nuū ñúhun. Te ni jicān tahú yā nuū Yaā Dios jeē núu cuu te ma ndóho ya jnúndóho jeē quejéé quiji siquí yā. ³⁶ Te suhva ni cahán yā:

Tátá maá ná, ndihí-ni jniñu cuu sáha máa ní. Te tejiyo ní jnúndóho yáha jéé ma quíji siquí ná. Te nasūu jéé cuní maá ná, chi jeē cuní maá ní na cóo, achí yá.

³⁷ Te ni ndee yā nuū ndinúní tée cáscuáha jín yá, te ni jito ya jeē cáquixí de. Te ni cahán yā jín Pedro:

Simón, ¿á quíxi rō? ¿A tu ní cánda ró condito ró jín rí vēsú ñin hora? ³⁸ Coó ndito ni rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé rōhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

³⁹ Te ni jehēn tucu ya, ni jicān tahú yā, te suni jnúhun yúcuan ní cahán yā. ⁴⁰ Te ni ndee ya nuū de, te ni jito ya jeē cáquixí tucu de, chi yōhyo cájī de māhná. Te tuá ni cánihín de jnúhun stío cuñí de nuū yā. ⁴¹ Te ni ndee yā jeē vuelta unī, te ni cahán yā jín de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū,

Yaā ní nduu tēe, natūu ri te jñi tēe cáhīyo cuēchi ruhū.
 42 Ndocuiñi jijnáhan ró, chí je vēji tēe nastúu ruhū, te quihīn yō jín de. Achí yá.

Jeē ní cajñi de Jesús
 (Mt. 26.47-56; Lc. 22.47-53;
 Jn. 18.2-11)

43 Te sá cáhán gā yā súcuan, te ni quee-ni Judas, ññ jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yu-jnu. Chí sutū cácujeñhu jín tēe cástéén tutu ley jín tēe jéñhu cándacu jniñu, ni catají de tēe ún. 44 Te Judas, tēe nástúu ya ún, je ni jēhe de ññ seña nuū tēe un jijnáhan, chí ni cachi de:

Tēe jeē téchūhu rí un cúu. Te jñi ró jijnáhan ró quihīn rō jín, te ma siaá cuiti rō, achí de.

45 Te ni quee de nde nuū Jesús, te ni cahān de jín yá:

Maestro, Maestro, achí de.

Te ni techūhú de ya. 46 Te tāca gá tēe un ní cajñi de ya, te cuango de jín yá.

47 Te ññ tēe íne jín yá ni tava de espada de, te ni jehnde de sōho ññ mozo maá sūtū cujeñhu ga. 48 Te ni cahān Jesús jín ñáyuu cuehē ún:

¿Te va tēe cuiñá cúu ri jeē vējicoo ró jín espada jín yu-jnu jñi ró rúhū jeē súcuan?

49 Tāca quívi ni ine ri jín ró jijnáhan ró ini templo cáhnu, ni steén rī jñuhun, te tu ní cájñi ró rúhū. Te súcuan cása ha ró návaha na squícu jeē cahán tutu iī, achí yá.

50 Yūcuán na te ndihi tēe cáscuáha jín yá, ni castóo de ya, ni cajinu de cuango de.

Tēe suchí jeē ní jinu

51 Te ññ tēe suchí, ndíquin de ya cuahān de jín yá. Te ndí de máá ññ sahma cuitá. Te ni cajñi tēe ún de.

52 Te máá sahma cuitá un ní canihīn. Te ni jinu máá ññ ni de cuahān de.

Jeē ní indichi Jesús nuū junta tēe cácujeñhu ga

(Mt. 26.57-68; Lc. 22.54-55, 63-71; Jn. 18.12-14, 19-24)

53 Yūcuán na te ni jinūcoo de jín Jesús nuū sutū cujeñhu ga. Te tāca sūtū cácujeñhu jín tēe jéñhu cándacu jniñu jín tēe cástéén tutu ley, ni candutútú de. 54 Te Pedro chí jíca-ni ndíquin de ya, te ni jinū de nde ini patio sutū cujeñhu ga. Te ni cucōo de jín tāca policía, násaā de ññuhūn.

55 Te sutū cácujeñhu jín ndihi tēe cása ha junta cujeñhu ga, ni canducú de cuēchi siquī Jesús, chí cahni de ya cácuni de. Te tu ní canihīn de. 56 Chí cuehē de ni cacahān yaá siquī yā, te tu ní quijnáhan jñuhun ni cacahān de. 57 Yūcuán na te ni candocuiñi sava de, te ni catee de cuēchi siquī yā, achí de:

58 Máá ná ni cajini ná cáhán de jeē canu de templo yá ha jéē ní cuvāha ni casáha tēe, te nuū uní quívi te nacani de inga jeē násūu jín ndaha tēe cuvāha, achí de. Achí jijnáhan.

59 Te ni jñuhun yá ha tu ní quijnáhan tucu jeē cacahān de siquī yā.

60 Yūcuán na te sutū cujeñhu ga ni ndocuiñi de nuū ñáyuu cuehē ún, te ni cajñuhún de Jesús:

¿Naun tu cáhán cuíti rō? ¿A iyó ndāā jeē cácahān tēe yáha síquī rō? achí de.

⁶¹ Te máá yá tu ní cáhán cuíti yā, chí tú na vé ni stíó cuíñi yā. Te sutū cujéhnū ga ni cajñuhún tucu de ya:

¿A máá ró cúu Cristo, Sēhe Yaā vāha jeē cujéhnū? áchí de jíin yá.

⁶² Te ni cahān yā:

Suu ri cúu. Te coto ró jéē ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíin vícō, achí yá.

⁶³ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Ndé jíni ñuhún gá yō testigo núu súcuan? ⁶⁴ Chi je ni cajini ró jéē cahán de jñuhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihí de ni cacahān jeē na cúu yā.

⁶⁵ Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachí ndé ñn cúu jeē ní cani rōhó, achí de.

Te tāca tēe policia ni cacani de nuū yā.

Jeē ní cachi Pedro jeē tu jíin de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhān de jíin Jesús. Te ni quee ñn ñahan jéjñiñu vehe sutū cujéhnū ga ún. ⁶⁷ Te ni jito ña nuū de jeē néne de

násaa de yuñuhún. Te ni jito vāha ña nuū de, te ni cahān ña:

Róhó chí suni ni jica ró jíin Jesús, tēe ñuu Nazaret, achí ña.

⁶⁸ Te máá de tu ní cáchi de, chí ni cahān de:

Tu jíin rī de, ni tu jíin rī na jñuhun cáhán rō, achí de.

Te ni quenda de yéhyí núu quéhe. Te ni cana-ni líhli. ⁶⁹ Te ñahan jéjñiñu un ní jito tucu ña nuū de, te ni quejéé ña cáhán ña jíin ñayuu cáhān yūcuán:

Tēe yáha suni jñahan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhān yūcuán ní cacahān tucu i jíin Pedro:

Jendaá ndije jeē suni jñahan de cúu ró, chí tēe Galilea cúu ró, te ñnuú-ni cáhán rō jíin de jíjñahan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi síquī de núu tu cáhán ndaā de:

Tu jíin rī tēe un jéē cácahān rō jñuhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jñuhun ni cahān Jesús jíin de: Nde ná tu cana líhli uū jínu, te yūhu ró te cahān rō unī jínu jeē tu jíin rō ruhū. Te ni nacani ni de síquī jñuhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujuhnu ni candutútú de jíin tée jéhnú cándacu jniñu, jíin tée cástéén tutu ley, jíin ndihi tēe cása ha junta cujéhnú ga, te ni casquijnáhan de jnūhun. Te ni cajihni de Jesús, te cuango de jíin yá nuū Pilato, tēe cúu gobernador. ² Te Pilato ni cajnūhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

³ Te sutū cácujuhnu un ní cacahān de cuehē cuēchi siquī yā. ⁴ Te Pilato ni cajnūhún tucu de ya:

¿Naun tu cáhán cuiti rō? ¿A tu jíni ró jēe cuehē cuēchi cacahān de siquī rō? achí de.

⁵ Te tu ní cáhán cuiti yā ni ñin jnūhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quivī víco un siaá de ñin tēe íne vecāa, núu na-ni tēe cácuni ñayuu. ⁷ Te íyó ñin tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndiíyí. ⁸ Te ni quecoo ñayuu cuehē, te ni cacahān i jíin Pilato jeē na sáha de nájnūhun íyó costumbre de. ⁹ Te ni cahān Pilato jíin i:

¿A tu cácuni rō jeē siaá rī tēe cúu Rey rohó ñayuu hebreo? achí de.

¹⁰ Súcuān ni cahān de, chí cúní de siaá de Jesús. Chí je

ni jecūhun ni de jeē ní cacu-cuésún ni tāca sūtū un cájito de ya, te jeē yúcuān ní quijicoo jíin yá nuū de. ¹¹ Te sutū cácujuhnu un ní cascáhán de ñayuu cuehē un jēe váha ga na cácan i jeē siaá Pilato Barrabás. ¹² Yūcuān na te ni cajnūhún tucu Pilato:

Núu súcuān ¿te ndese cácuni rō jeē sáha ri jíin tēe jeē cacahān rō jeē cúu de Rey rohó ñayuu hebreo? achí de jíin i.

¹³ Te ni cacana jee i:

Cata caa ní de jicā cruz, na cúu de, achí i.

¹⁴ Te ni cahān Pilato:

¿Na cuēchi ni sáha de núu súcuān?

Te ñayuu un ní cacana jee tucu i:

Cata caa ní de jicā cruz, na cúu de, achí i.

¹⁵ Te Pilato cuní de jeē na cúsiñ ni ñayuu jíin de, te ni siaá de Barrabás. Yūcuān na te ni ndacu de jniñu jeē na cáni táca soldado Jesús, jíin jēe cata caa de ya jicā cruz.

¹⁶ Yūcuān na te soldado un cuángoo de jíin yá ini patio palacio, jeē sácata de nuū yā. Te ni canastútú de ndihi jnáhan de. ¹⁷ Te ni cachuhun de ya ñin sahma cuehé ndihí jēe cúu sahma rey. Te ni casáha de ñin corona iñu, ni cachuhun de xinī yā.

¹⁸ Yūcuān na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesihí de nuū yā, te ni cajecuñí yití de nuū yā, casáha de jeē chiñuhún de ya. ²⁰ Te nuū ní cuu

ni casácatā de nuū yā, te ni catava de sahma cuehé ndíhí un, te ni canachuhun de ya sahma máá yá. Te ni caque-
nehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹ Te ñn tēe nání Simón ñuu Cirene, tēe cúu tátá Alejandro jín Rufo, vendiji de jeē ni jéhēn de rancho. Te ni yāha de yūcuán, te ni catejníñu soldado un de jeē cóndiso de cruz yā.

²² Te cuango de jín yá ñn lugar nuū naní Gólgota, jeē cuní cahān Lugar Yiqui Xíní. ²³ Te ni cajēhe de vino jeē ni sácā núu jín súde uvuā jeē cóho ya, te tu ní jíhi ya. ²⁴ Te ni cacata caa de ya jicā cruz. Te ni casáha de sorteo jeē siquí ndese nihīn ñn ñn de sahma ya.

²⁵ Te cahīn ni cacata caa de ya. ²⁶ Te jñūhun ni catee de xinī cruz cahán na siquī ni jihī yā: Yāha cúu Rey ñayuu hebreo, achí. ²⁷ Te suni ni cacata caa de uū tēe cuíhná núu uū gā cruz, ñn de lado váha ya, te inga de lado jecó yá. ²⁸ Te ni squícu jñūhun cáhán tutu i: Ni casquijnáhan de ya jín tēe casáha neé, achí.

²⁹ Te ñayuu cáyāha yūcuán cáscuicó i xinī i, te cácahān neé i:

Jājaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró. ³⁰ Núu súcuan te jnama ró máá ró, te nuu ró jicā cruz vii, achí i.

³¹ Te suni súcuan ni cacahān catá sutū cácujeñnu jín tēe cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? ³² Núu na cúni yō jeē Cristo, Rey ñayuu Israel, nuu de jicā cruz vijna, yūcuán na te candíje yó, achí de jijnáhan de.

Te tēe cándita caa jín yá, suni súcuan ni cacahān neé de.

Jeē ni jihī Jesús

(Mt. 27.45-56; Lc. 23.44-49; Jn. 19.28-30)

³³ Te nuū ní cuu cahuxī uū, te ni cunee ní cáhnu nde cahunī. ³⁴ Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jñūhun un cúni cahān: Yā Dios maá ná, Yā Dios maá ná, ¿naun ni stóo ní sáña?

³⁵ Te sava ñayuu cáhīn yūcuan, ní cajini i jñūhun ún, te ni cácahān i:

Cuní nahín, chi cána de xinī Elías, tēe ni nacani jñūhun Yā Dios jenahán, achí i.

³⁶ Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, achí de.

³⁷ Te máá Jesús ni cana jee ya, te ni jihī-ni ya. ³⁸ Yūcuán na te sahma ndíta caa jeē ndihyú cuarto i ini templo cáhnu, ni ndatā sava sava nde xinī te nde nuū jehé. ³⁹ Te tēe ñuu Roma jeē cúu capitán, índichi de nuū yā, te ni jini de

jeē ní cana jee ya te ni jihī yā.
Te ni cahān de:
Jendaá ndije jeē Séhe Yaā
Dios cúu tēe yáha, áhí de.

⁴⁰ Te suni cáhīn sava ñahan,
cándēhe jícá ña. Te unī ña
cácuu María ñuu Magdala, jíin
María naná José jíin Jacobo
suchí, jíin ñahan nání Salomé.
⁴¹ Te ñahan yáha ní candiquīn
ña ya, ni cajejnīñu ña nuū yā
nde náa jícá ya Galilea. Te
suni cáhīn cuehē gā ñahan jeē
ni jéngoo jíin yá ñuu Jerusalén.

Jeē ní quindūji Jesús
(Mt. 27.57-61; Lc. 23.50-56;
Jn. 19.38-42)

⁴² Te ni ini quivī ún. Te
quivī sátūhva cúu, chí sajnē
cúu quivī ndétātú. ⁴³ Te ni
quee José, tēe ñuu Arimatea.
Te cúu de ñn tēe cújéhnú nuū
junta cújéhnú ga. Te suni
ñúhun ni de jeē quiji quivī jeē
ndacu Yaā Dios jniñu. Te tu
yúhú de chí ni quivī de nuū
Pilato, ni jicān de yiqui cúñu
Jesús. ⁴⁴ Te Pilato chí náa ni
de jeē yachí ni jihī yā. Te
ni cana de capitán, te ni ca-
jnūhún de tēe un núu je ni
jihī yā. ⁴⁵ Yūcuán na te ni
cucáhnú ni de jeē ni cáhān
capitán jíin de, te ni jēhe de
jnūhun jeē quihin José yiqui
cúñu yā. ⁴⁶ Te José ni jeen
de ñn sahma cuitá váha. Te
ni snúu de yiqui cúñu yā, te
ni chusúcún de sahma ún. Te
ni chindūji de ya ini ñn yaū
jeē quindūji ndīyi, jeē ní caan
jicā ñn cava. Te ni jesi de
ñn yuū yuhu yáú un. ⁴⁷ Te
María ñuu Magdala, jíin María
naná José, ni cajito ña nuū ní
cachindūji de ya.

Jeē ní natecu Jesús
(Mt. 28.1-10; Lc. 24.1-12;
Jn. 20.1-10)

16

¹ Te ni ini quivī ndétātú,
te María ñuu Magdala, jíin
María naná Jacobo, jíin Sa-
lomé, ni cajeen ña táca per-
fume jeē quíchuhun ña yiqui
cúñu yā. ² Te jenéhen quivī
domingo, jeē ní cane niāndii,
te ni jinūcoo ña nuū ní yindūji
ya. ³ Te cácahān ña:

¿Ndé níhīn yō tēe tejiyo yuū
ndihyú yuhu yáú? áhí ña.

⁴ Te ni candacoto ña, te
ni cajito ña jeē jé ni cujiyo
yuū cáhnú un cuáhān. ⁵ Te
ni quivīcoo ña ini yaū ndīyi.
Te ni cajito ña ñn ndajéhé
Yaā Dios jeē cáa nájñūhun tēe
suchí, néne ya ichi lado váha,
ñúhun ya ñn sahma cuijín
cáni. Te ni cayūhú ña. ⁶ Te ni
cahān yā jíin ña:

Ma yūhu ró jijnáhan ró.
Chí vecondēhe ró Jesús ñuu
Nazaret, Yaā ni jíhí jicā cruz.
Tuá yā yáhá, chí je ni natecu
yā. Yáhá condéhé ró nuū ní
cachindūji de ya. ⁷ Cuánungoo
te cachi rō nuū tēe cáscuáha
jíin yá, jíin núu Pedro, jeē
xíhna gā maá yá jinū Galilea,
te sáa te najinūcoo de. Te
yūcuán coto de nuū yā,
nájñūhun ni cahān yā jíin de
nde saá, áhí yá jíin ña.

⁸ Yūcuán na te ñahan un ní
quendacoo ña nuū ní yindūji
ya, te cájinu ña cuangoo ña.
Chí quisi i ña jeē cáyūhú ña. Te
tu ní cácahi cuiti ña nuū ní ñn,
chí cáyūhú ña.

*Jeē ní nane Jesús nuū María
ñuu Magdala*

(Jn. 20. 11-18)

⁹ Te Jesús ni natecu yā jenéhen quivī domingo. Te xīhna gā ni nane ndijin yā nuū María ñuu Magdala, ñahan jeē ní quenehen ya uxā tachī ini. ¹⁰ Te cuahān ña cuacastūhún ña nuū tāca téa ni cajica jíin yá jeē ní nane ya nuū ña. Te cácuquíhyá ni de te cándahyū de. ¹¹ Te nuū ní cajini de jñūhun jeē ní jito ña nuū yā jeē técu yā, te tu ní cácañdije de jñūhun cáhán ña.

*Jeē ní nane ya nuū uū tēe
cáscuáha jíin yá*

(Lc. 24.13-35)

¹² Yūcuán na te ni quenda-coo uū jnáhan tēe ún, cájica de cuahān de ichi rancho, te sīn modo ni nane ndijin yā nuū de. ¹³ Te ni canandicó de, ni cacastūhún de nuū tāca gá jnáhan de. Te ni tu ní cácañdije tucu jnáhan de jeē cácahān ndindúú de.

*Jeē ní tejñiñu ya de nacani
de jñūhun*

*(Mt. 28.16-20; Lc. 24.36-49;
Jn. 20.19-23)*

¹⁴ Te cúcuéé gá te ni nane ndijin yā nuū ndihúxí ñn de jeē cáyūcú de mesa cáyeji de staa. Te ni cahān yā nuū de, chi nīhni ni de jeē tu cácañdije de jeē cácahān jnáhan de un, jéé ní natecu yā ni cajito de ya. ¹⁵ Te ni cahān yā jíin de:

Cuángoo jíinájhan ró ní ñayiví, te nacani ró jnúhun ri nuū tāca ñáyuu ndese jnáma ri i. ¹⁶ Te ñayuu candíje te cuandute i, chi cācu i. Te ñayuu tú candíje, chi jnahnū

ndetū i. ¹⁷ Te ñayuu candíje, sáha i tācá jniñu jéhnū yáha jeē steén jeē iyó rí jíin i: Jíin síhví rí quenehen i tachī ini ñayuu. Te cahān i tijni yuhu jéé. ¹⁸ Te núu ni jñi sanaa i coō, chí núu ni jñi i veneno, te ma sáha daño jíin i. Te suni soó i ndaha i síquī ñáyuu cácuñhū, te nduvāha. Achí yá jíin de.

*Jeē ní ndaa ya cuanuhunya
andiví*

(Lc. 24.50-53)

¹⁹ Yūcuán na te nuū ní ndihí ni cahān maá Jítoho yō jíin de jíinájhan de, te ni ndaa ya cuanuhun yā andiví, te ni cucōo ya lado váha Yaā Dios nuū cujéhnū ya. ²⁰ Te máa de ni quendacoo de, ni canacani de jñūhun ya tāca lado ndese jnáma ya ñayuu. Te máa Jítoho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndáa jñūhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcún de historia Jesús, tācá jniñu jeē ni sāha ya ni cajito yó. ² Te ni catee de tāca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcún ná tāca jnúhun ya, nde nuū ní quejéé. Te ni jeni ni na jéē suni íyó váha jeē tée cájí ná tāca jnúhun yáha núu ní, amigo Teófilo. ⁴ Te súcuan te cuni ni jéē íyó ndáā tāca jnúhun jeē ní cacastūhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni íyo ñn sutū ñáyuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucún máá sūtū Aarón cúu ña. ⁶ Te ndíndúú de cahīyo ndaā de nuū Yaā Dios, te ndaā váha cásquicu de jniñu ndácu ley máá Jítoho yō Yaā Dios, cájito tāca ñáyuu. ⁷ Te tú sēhe de íyó, chí ñahan númá cúu Elisabet, te je jéhu ndíndúú de.

⁸ Te ñn quiví te jéjníñu Zacarías nuū jniñu jeē cúu de sutū nuū Yaā Dios, chí ni quee quiví jeē ndívi grupo de. ⁹ Te ni casáha de sorteo, nájnūhun íyó costumbre sutū. Te ni sāha tocar Zacarías jeē quiví

de ini cuarto ñi templo Jítoho yō Yaā Dios, te cahmu de sūje cūtú. ¹⁰ Te hora jeē cayú sūje cūtú, te tāca ñáyuu cuehē cáhīn i fuera, cájicān tahú i. ¹¹ Te ni cane ñn ndajéhé máá Jítoho yō nuū de, ín ya lado váha altar nuū jéhu de sūje cūtú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíin de:

Zacarías, ma yūhu ró, chí je ni chihi Yaā Dios cuenta jeē ni jícān tahú rō. Te ñasihí ró Elisabet, scácu ña ñn sēhe yíí, te snání ró i Juan. ¹⁴ Te yōhyo cusí ni rō. Te cuehē ñáyuu cusí ni jeē cácu i. ¹⁵ Chí cujéhu sēhe ró sāha máá Yaā Dios. Te ma cóho i vino ni ndixi cuíí. Te cunuú máá Espíritu Santo jíin i, nde ná tu cacu i. ¹⁶ Te sāha i jeē cuehē ñáyuu nación rō Israel ndívicoo i nuū Jítoho i Yaā Dios. ¹⁷ Te xihna gā Juan quiji nacani jnúhun Jítoho yō Jesús, te sáa te quiji ya. Te sāha i nájnūhun ní sāha Elías, tēe ni nacani jnúhun Yaā Dios jehahán, te conevāha i poder jeē nácani i jnúhun, nájnūhun ni conevāha Elías. Te sāha i jeē tāca tátá ndumaní de jíin sēhe de. Te suni sāha i jeē ñáyuu ñhni ni cuatáhu i nuū Yaā Dios, nduu i ñáyuu ndaā. Súcuan sátūhva i ñáyuu návāha candíje i máá Jítoho yō jeē quíji ya. Achí ndajéhé.

¹⁸ Te Zacarías ni cajnūhún de ya:

¿Ndese cucáhu ni na núu jendaá cúu? Chí tēe jéhu cúu

ná, te suni jéhnū ñasihí ná, áchí de.

¹⁹ Te ni cahān ndajéhé un jíin de:

Máá rí cúu Gabriel, te íne rí nuū Yaā Dios, jejniñū rí nuū yā. Te ni tají yá ruhū vēji rí cahān rī jíin ró, te nácani rí jnūhun vāha yāha nuū rō. ²⁰ Te jeē tu ní cándije ró jnúhun ni cahān rī, te cuñhín ró, te ma cúu cahān rō, chí nde na cácu sēhe ró. Te squicu nahín jnúhun cáhán rī yāhá, na queé quiví, achí ndajéhé.

²¹ Te ñayuu cáhīin ichi fuera, cándetu i Zacarías, te cájeni ni i na vé ni cuu jeē cucuéé de ini cuarto īi templo. ²² Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñn jeē ni stéen yā nuū de. Te máá seña na ni sáha de nuū i, chí ni cuñhín de.

²³ Te nuū ni jínu quiví ni jejniñū de ini templo, te cuanuhun de vehe de. ²⁴ Te ni cuu jecu quiví, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhén ña. Te jéni ni ña: ²⁵ Súcuau ni sáha máá Jítoho yō jíin rí, te ni tejiyo ya jnūhun jeē cúcanu rī nuū ñáyuu jeē tú sēhe rí, jéni ni ña.

Jeē ní cachi ndajéhé jeē cacu Jesús

²⁶ Te nuū íñu yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañúū Galilea. ²⁷ Te ni jehēn yā nuū ñn sūchi síhí námí María. Te je ni cundaā jeē quijnáhan ña jíin

ñn tēe nání José, te sēhe yucūn rey David cúu de. ²⁸ Te ni quiví ndajéhé un núū ndeé ña, te ni cahān yā:

Tandii, nacā ndetū cúu ró. Chi máá Jítoho yō Yaā Dios iyó yá jíin ró, te ni sáha ya jeē yóhyo ndetū gā cúu ró núū tāca gā ñahan, áchí yá.

²⁹ Te nuū ni jito ña nuū yā, te ni cunéé ni ña jeē súcuau cáhán yā, te jéni ni ña naun cáhán yā súcuau jíin ña. ³⁰ Te ni cahān gā ndajéhé un jíin ña:

Ma yūhu ró María, chí ni sáha Yaā Dios jeē vāha jíin ró. ³¹ Te jecūhun sēhe ró te scácu ró ñn sēhe yí, te snání ró i Jesús. ³² Te kujéhnū i, te conaní i Sēhe Yaā kujéhnū téyí. Te máá yá jeē cúu ya Jítoho yō Yaā Dios, sáha ya jeē cuu i rey, nájñūhun jíi i David ni cuu de rey. ³³ Te ní cáni ndacu i jniñū nuū ñáyuu naciōn Israel. Te ma ndíhi cuiti jeē ndácu i jniñū. Achí ndajéhé.

³⁴ Yūcuán na te ni cajñūhún María:

¿Ndese coo jeē ni cáhán ní? Chí ná tu coo yí ná, áchí ña.

³⁵ Te ni cahān ndajéhé un:

Máá Espíritu Santo quiji siquí rō, te poder máá Yaā kujéhnū téyí sáha ñn jniñū jéhnū jíin ró. Te jeē yúcuau máá súchi íi jeē cácu, quihí cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñn sēhe vésú je jéhnū ña. Te vijna íyó íñu yoō jeē tuá cácahān ñayuu jeē cúu ña ñahan númá. ³⁷ Chí ndíhi-ni cuu sáha Yaā Dios, te tu íyó ni

ñin jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chí sáha ná táca jniñu ndácu Jítoho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quivī, te yachī cuahān María, ni caa ña yucu cuahān ña ñin ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet jeē cahán María jíin ña, te sūchi ñūhun chíji ña ni canda-ni i. Te ni cunuú Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhoyo ndetū gā cúu ró núu táca gā ñahan, jíin jéē yóhoyo ndetū sēhe ró. ⁴³ ¿Te ndese cúu jeē ní quee naná maá Jítoho rī nuū rī? Chí tu cújéhnu cuiṭi rī. ⁴⁴ Chí jeē ní jini-ni ri jnūhun ni cahān rō jíin rí, te sūchi ñūhun chíji rī ni canda i jeē cúsiñi ni i. ⁴⁵ Te nacā ndetū rō jeē ní candíje ró, chí squícu nahín táca jnūhun ni cahān maá Jítoho yō jíin ró. Achí Elisabet.

⁴⁶ Yūcuán na te ni cahān María:

Cáhán rī jeē cújéhnu ndasí máá Jítoho yō Yaā Dios,

⁴⁷ te cúsiñi ni rī jíin Yaā Dios, Yaā jnáma ruhū.

⁴⁸ Chí ni sáha ya cuenta ruhū, vésú tu cújéhnu rī.

Te na squícu ri jniñu ndácu ya.

Te nde vijna te tāca ñáyuu jeē nacacu, cahān i jeē yóhoyo ndetū rī.

⁴⁹ Chí Yaā jniñi ndihí poder, ni sáha ya jniñu jéhnu jíin rí.

Te Yaā ñi ndoo cúu ya.

⁵⁰ Te ní cáni cundáhú ni yā táca ñáyuu ndíso iyo nuū yā.

⁵¹ Ni sáha ya jniñu jéhnu jíin poder yā,

chí ni scúnu ya ñáyuu casándúxí máá,

⁵² te ñáyuu cácujuhnu, ni quende ya jeē cújéhnu i.

Te ñáyuu ndahú chí ni sajuhnu ya i,

⁵³ te ñáyuu cájii sōco ni jēhe ya jeē cáji vāha i.

Te ñáyuu cucá ní natají yá i súcuan-ni.

⁵⁴ Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

⁵⁵ Chí súcuan ni jejnūhun ya nuū táca jíi yō,

nuū Abraham jíin táca yúcūn de jeē cóo ní cáni.

Achí María.

⁵⁶ Te ni condee ña jíin Elisabet nájnūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quivī jeē scácu Elisabet sēhe ña, te ni scácu ña ñin sēhe yí. ⁵⁸ Te táca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i

jnūhun sī ni jíin ña. ⁵⁹ Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquin un. (Te yūcuán cúu ñin jnuni nuū yiqui cúñu tāca sūchi yí hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. ⁶⁰ Te ni cahān naná i:

Ma cúu, chi Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ñin jnáhan ró nání súcuán, áchí i.

⁶² Yūcuán na te jíin seña ni cacajnūhún i tátá sūchí un ndese cúní de jeē cónaní i.

⁶³ Te máá de ni jicān ñin tutu, te ni tee de: Juan conaní i. Te tāca ñayuu un ní canaa ni i cájito i. ⁶⁴ Te ni nduvāha Zacarías jeē ní cuñhín de, te ni quejéé de cáhán de jeē yóhoyo vāha Yaā cúu Yaā Dios.

⁶⁵ Te tāca ñayuu ndeé yajni jíin de, yóhoyo ni canaa ni i. Te ní yucu región Judea ni jité núu tāca jnūhun yáha jeē súcuán ni cuu. ⁶⁶ Te tāca ñayuu jeē ní cajini jnūhun, ni quejéé i cánacani ni i, te cacajnūhun jnáhan i:

¿Ndesee coo na cuéhnu sūchi yáha? áchí i.

Chi máá Jítoho yō yóhoyo ni sáha ya jeē vāha jíin i.

Jnūhun luu jeē ní nacani Zacarías

⁶⁷ Te tátá i Zacarías ni cunuú Espiritu Santo jíin de, te ni nacani de jnūhun ni steén Yaā Dios nuú de:

⁶⁸ Yóhoyo vāha Yaā cúu máá Jítoho yō, Yaā Dios yohó ñayuu Israel,

chi ni quiji ya nuū yō jeē cácuu yó ñayuu yā, te ni jnama ya yohó.

⁶⁹ Te ni jeni ya ñin Yaā iyó poder jeē jnáma ya yohó,

te Yaā ún cacu yucūn mozo yā rey David.

⁷⁰ Chi súcuán ni jejnūhun ya, ni cacahān tāca téé ndoo ánuá jeē ní canacani de jnūhun ya jenahán.

⁷¹ Chi ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

⁷² Chi ni cundáhú ni yā tāca jíi yō jijnáhan, te tu ní nāa ni yā contrato i yā.

⁷³ Chi suu un ní jejnūhun téyí yá nuū jíi yō Abraham,

⁷⁴ suu jeē jnáma ya yohó núu ñayuu cájito uhū yohó, návāha cuajniñu yó núu yā, te ma yūhu yó i.

⁷⁵ Te coo ndaā coo ndoo ánuá yō, cuajniñu yó núu yā tāca quivī jeē cótecu yō.

⁷⁶ Te róhó sūchi lúli, cuu ró téé nacani jnūhun Yaā kujéhnu téyí.

Chi cosnūu ró ichi núu maá Jítoho yō, návāha sátūhva ró ñayuu, te sáa te quiji ya.

⁷⁷ Te castūhun ró nuū ñayuu maá yá jeē jnáma ya i, jíin jéé cóne cáhnu ni yā nuū tāca cuéchi i.

78 Chi Yaā Dios maá yó, vāha ni yā te cúndáhú ni yā yohó.

Jeē yúcuan tají yá maá Yaa jeē sáha jeē cúndijin ini anuá yō, quiji ya nde andiví,

79 návāha jecūhun ni yohó jéē cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo sī ni yō.

Achí Zacarías.

80 Te sūchi lúli un ní jehnu i te ni ije i jíin jnúhun ya. Te ni condee i nde nuū ñúhun téhé ndé quiví ní quenda ndijin i nuū ñáyuu Israel.

*Jeē ní cacu Jesús
(Mt. 1.18-25)*

2

1 Te ni cuu jecu quiví, te Augusto, tēe cúu rey, ni ndacu de jniñu jeē coo censo jeē núcosō síhví ndivii ñayuu ní cáhnu nuū ndácu de jniñu.

2 Yāha cúu censo xīhna ñúhún jéē ní casáha de ná ni cuu Cirenio gobernador nación Siria.

3 Te ndivii ñayuu cuanungoo i ná ñuu ná ñuu maá i jeē nácuāha i síhví i. 4 Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de.

5 Te ni jehēn de návāha nacuāha de síhví de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo.

6 Te níni cáhīin de yūcuán te ni jinū quiví jeē cácu sēhe ña.

7 Te ni scácu ña sēhe yí nūú ña, te ni chusúcún ña i sahma cuitá, te ni jequin ña i ini ñn nundōo nūú yéji quití, chi tuá núne mesón condee ña.

Jeē ní canecoo ndajéhé yā nuū pastor

8 Te yajni ñuu Belén cáhīin tēe cácuu pastor, te cándito de lanchi de níi niñu jecuáa nde yucu ún. 9 Te ñn sanaa-ni te ni cane ñn ndajéhé maá Jítóho yō nuū de, te nduva máá Jítóho yō ni ndindēe níi nūú cáhīin de. Te yōhyo ni cayūhú de. 10 Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jñūhun vāha nuū rō, te sáha jeē cúsiñ ndasí ni tāca ñáyuu: 11 Chi vijna nde ini ñuu David ni cacu ñn Yaa jnama rōhó, te máá Jítóho yō Cristo cúu ya. 12 Te súcuan nacuni rō sūchi yíquin un, chi ñúsúcún i sahma cuitá te catú i ini ñn nundōo nūú yéji quití. Achí yá.

13 Te ñn sanaa-ni te ni canecoo cuehē gā ndajéhé andiví, cáhīin ya jíin ndajéhé un, te cácahān yā jeē yōhyo vāha Yaa cúu Yaa Dios. Te áchí yá:

14 Yōhyo luu cújéhnú Yaa Dios nde nuū sucún.

Te na ndúvāha ni tāca ñáyuu ñayiví, sáha ya jeē cúsiñ ni yā jíin i.

Achí táca ndajéhé.

15 Yūcuán na te cuanungoo ndajéhé un andiví. Te tēe cácuu pastor ni cacahān de jíináhan de:

Na quíhín yō nde ñuu Belén, te cuni yō na vé ni cuu jeē

ní castūhun maá Jítóho yō nuū yō, achí de.

16 Te yachī cuango de, te ni nanihín de María jíin José jíin súchi yíquín un, cáti i ini nundōo núū yéji quiti. 17 Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. 18 Te ni canaa ni tāca ñayuu cájini nahín i jnūhun cácahān tēe cácuu pastor. 19 Te María, ni quendōo tāca jnúhun yáha nuū jeē níjnūní ña, te nácani ni ña siquī. 20 Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios siquī tāca jēē ní cajini sōho de jíin jēē ní cajito de, chi ni squícu nahín nájnūhun ni cahān ndajéhé yā jíin de.

Jeē ní castéén de i nuū Yaā Dios ini templo

21 Te ni cuu unā quivī jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuan ní cachi ndajéhé yā nuū María nde ná tu jecūhun i.

22 Te ni jīnu quivī jeē casquícu ña costumbre jeē ndúndoo ña nuū Yaā Dios jíjnáhan ña, nájnūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. 23 Súcuan ni casáha de, chí yósó núū tútu ley yā: Tāca súchi yí núú jēē cácacu, quíhi cuenta i nuū Jítóho yō Yaā Dios, achí tutu. 24 Te suni cuasocō de nájnūhun cáhán

ley maá Jítóho yō: Socō rō uū livi chí úu paloma, achí tutu.

25 Te ni iyo iin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te maá Espíritu Santo iyó yá jíin de. 26 Te je ni castūhun yá nuū de jeē ma cúu cuiti de chí nde coto de nuū Cristo jeē tají maá Jítóho yō Yaā Dios. 27 Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jíin i, jeē nácuāha de i nuū Yaā Dios nájnūhun cáhán ley Moisés. 28 Te Simeón ni ñunundee de i, te ni cahān de jeē yóhyo vāha Yaā cúu Yaā Dios, te áchí de:

29 Tátā Yaā Dios, vijna te cuu cuāha ni jnúhun jeē cuu ná, chí je ni cusí ni ná.

Chí je ni squícu ní jnúhun ni jnūhun ní núū sāña jēē cúu ná mozo ni.

30 Chí ni jito jínúū na núū Yaā jnáma sāña jíjnáhan ná.

31 Chí ni jeni ní yá jeē jnáma ya tāca ñayuu ñayíví.

32 Te maá yá sáha jeē cúndijin ini anuá ñayuu táca nación,

návāha jecūhun ni i siquī ní.

Te sáha ya jeē cujéhnū ñayuu maá ní Israel.

Achí Simeón.

33 Te José jíin náná i cánaa ni de cájini nahín de jnūhun ni cahān Simeón siquī i. 34 Te ni jicān tahú Simeón jehē de

jíjnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nació n yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichī ni cuehē ñayuu i. ³⁵ Te súcuan te quenda ndi-jin ndese cájeni ni tāca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

³⁶ Te suni íne ññ jnahan nácani jñūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yñ ña uxā cuiyā.

³⁷ Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe iī, chi jéjníñu ña nuū Jítóho yō Yaā Dios nduú ñuú, te ndite ni ña te jícán tahu ña.

³⁸ Te suni hora un ní quee ña, te ni nacuatáhú ña nuū Yaā Dios. Te ni cahān ña jñūhun sūchi yíquín un jíin táca ñáyuu Jerusalén jeē cáñuhun ni i jeē quée Yaā jnama i.

Jeē cuánungoo de ñuu Nazaret

³⁹ Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañuū Galilea. ⁴⁰ Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

Jeē íne sūchi lulí Jesús ini templo

⁴¹ Te ndijnahan cuiyā jéngoo tátá i náná i ñuu

Jerusalén, jeē cúu vico pas-cua. ⁴² Te nuū ní cuu uxī uū cuiyā i, te cuangoo tucu de Jerusalén, nájñūhun sáha sáha de quivī vico ún. ⁴³ Te ni yāha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíin náná i. ⁴⁴ Te cájeni ni de jeē cuahán i mēhñu ñáyuu cájica ichi ún. Te ni cajica de ññ quivī, te sáá te ni cananducú de i mēhñu táca jnáhan de jíin ñáyuu cájini jnáhan de jíin. ⁴⁵ Te tu ní cánanihīn de i. Te ni canandicó de cuangoo de Jerusalén, cuananducú de i.

⁴⁶ Te nuū uní quivī te ni cananihīn de i ini templo, néne i mēhñu tée cástéén tutu ley Yaā Dios, te jíini nahín i jeē cácahān de te cájnūhún i de siquī jnúhun ún. ⁴⁷ Te tāca ñáyuu cájini jñūhun cáhán i, cánaa ni cájito jeē váha cáji xínī i te váha nástíó cuññi i jñūhun. ⁴⁸ Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhoyo ni canacani ni rī cánanducú rí rohó, achí ña.

⁴⁹ Yūcuán na te ni cahān i: ¿Naun cánanducú ní sāña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jñūhun ni cahān i.

⁵¹ Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendōo tāca jnúhun yáha núu jeē níjnūní ña. ⁵² Te Jesús ni jehnu ga i, te ni cundíchí gá i, te cúsnī ni Yaā

Dios jíin i, te suni súcuan tãca ñáyuu.

Jnūhun Juan tēe scuándute
(Mt. 3.1-12; Mr. 1.1-8;
Jn. 1.19-28)

3

1 Te ni cuu xahūn cuiyā jeē ndácu Tiberio jniñu nñ nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia.

2 Te sutū cujéhu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. 3 Te ni jica nuu de tãcá ñuu jeē iyó yajni yūte Jordán. Te cáhán de jíin ñáyuu jeē na nãcani ni i jeē stóo i cuēchi i te cuandute i, nãvãha cone cáhnu ni Yaā Dios nuū cuēchi i. 4 Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán: Coo ñn tēe cana jee nde nuū ñūhun téhé:

Sátūhva ró máá ró jijnáhan ró, chi quee maá Jítóho yō. Te sãha ró jniñu ndaã, chi vēji ya.

5 Te tãca xéhvã na ndúndaã, te tãcá yucu jíin loma na ndúnduhvã, te na ndúyóhó ichi yácuá, te na ndúlii ichi ndáyí.

Te ndihí un cúu jeē ndúvãha ndundaã anuá ñáyuu nuū yã.

6 Te ndihí i cuni i jeē jnáma Yaā Dios i.

Súcuan cahãn Juan, achí tutu.

7 Te ni quendacoo cuehē ñáyuu, cuahãn i nuū de jeē scuándute de i. Te ni cahãn de nuū i:

Va sēhe coō cácuu ró, chi xeēn rō nãjnūhun coō. ¿A cájeni ni rō jeē cuu cunu ró cãcu ró núu castigo xeēn jeē quíji? 8 Núu súcuan te sãha ró jniñu váha, te súcuan stéen rō jeē ní nacani ndije ni rō jeē stóo ró cuéchi ró. Te ma cáni ni rō cahãn rō jeē cuu cãcu ró síquī jeē cácuu ró yúcūn Abraham. Chi cáhán rī jíin ró jeē cuu sãha Yaā Dios jeē tãca yúu yãha nduu sēhe Abraham jeē candíje váha, te núu cúní yã. 9 Te cácuu ró nãjnūhun nundehé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nãjnūhun je íyó túhva ñn cãa jeē cahnde nde yoho yujnu. Núu súcuan te sãha ya jíin ró nãjnūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

10 Te ñáyuu un ní caca-jnūhún i de:

¿Te ndese sãha ná núu súcuan? Achí i.

11 Te ni cahãn de:

Róhó jéē cánevãha uū sahna, na cuáha ró ñn nuū jeē tu névãha. Te róhó jéē cánevãha jeē yéji, suni súcuan na sãha ró, áchí de jíin i.

12 Te suni jecu tēe cástútú xúhun renta, ni quecoo de jeē cuándute de. Te ni caca-jnūhún de Juan:

Maestro, te máá ná, ¿ndese sãha ná jijnáhan ná?

13 Te ni cahãn Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajñuhún jecu soldado:

Te máá ná, ¿ndese sáha ná jijnáhan ná? achí de.

Te ni cahán Juan jíin de:

Ma quénde rō ndajniñu ni ñn jíin jnúhun siúhú ni jíin jnúhun stáú yáhu, te cusñ ni rō jíin yáhu ró, achí de.

¹⁵ Te táca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahán Juan jíin i jijnáhan i:

Ruhū chi jíin ndute scuándute ri rohó. Te vēji ñn Yaā jeē nájñuhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñuhun ñuhún. Te cújéhu ndasí yá, chi tú na vé jéhu cuiti cúu ri nuū yā, ni jeē cuajniñu ri nuū yā vēsú ñn jniñu lúli gá nájñuhun jeē ndají rí vēsú correa ndijēn yā. ¹⁷ Te sáha ya nájñuhun sáha tēe scánda trigo, chi sásñn ya ñayuu vāha jíin ñáyuu cunéé, nájñuhun cúndoo trigo jeē quénda sñn paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

¹⁸ Te súcuan te jíin cuéhē gā jñuhun ni stíhví ni de ñayuu un, ní nacani de jñuhun vāha Yaā Dios nuū i. ¹⁹ Te suni ni cahán xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha

Herodes. ²⁰ Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ine de ni scuándute de táca ñáyuu, te suni ni scuándute de Jesús. Te jícán tahú yā, te ni nune-ni andívi. ²² Te ni cuun Espíritu Santo ni quee xiní yā, te cáa nájñuhun ñn paloma. Te ichi andívi ní cahán ñn jñuhun:

Máá ró cúu Sēhe ri jeē maní ndasí rí jíin, te yōhoyo cúsn ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejéé Jesús steén yā jñuhun, te íyó yá nájñuhun ocō uxí cuiyā. Te cájeni ni ñayuu jeē sēhe José cúu ya. Te José ni cuu sēhe Elí, ²⁴ te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, ²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, ²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, ²⁷ te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, ²⁸ te Neri ni

cuu sêhe Melqui, te Melqui ni cuu sêhe Adi, te Adi ni cuu sêhe Cosam, te Cosam ni cuu sêhe Elmodam, te Elmodam ni cuu sêhe Er, ²⁹ te Er ni cuu sêhe Josué, te Josué ni cuu sêhe Eliezer, te Eliezer ni cuu sêhe Jorim, te Jorim ni cuu sêhe Matat, ³⁰ te Matat ni cuu sêhe Leví, te Leví ni cuu sêhe Simeón, te Simeón ni cuu sêhe Judá, te Judá ni cuu sêhe José, te José ni cuu sêhe Jonán, te Jonán ni cuu sêhe Eliaquim, ³¹ te Eliaquim ni cuu sêhe Melea, te Melea ni cuu sêhe Mainán, te Mainán ni cuu sêhe Matata, te Matata ni cuu sêhe Natán, ³² te Natán ni cuu sêhe David, te David ni cuu sêhe Isaí, te Isaí ni cuu sêhe Obed, te Obed ni cuu sêhe Booz, te Booz ni cuu sêhe Salmón, te Salmón ni cuu sêhe Naasón, ³³ te Naasón ni cuu sêhe Aminadab, te Aminadab ni cuu sêhe Aram, te Aram ni cuu sêhe Esrom, te Esrom ni cuu sêhe Fares, te Fares ni cuu sêhe Judá, ³⁴ te Judá ni cuu sêhe Jacob, te Jacob ni cuu sêhe Isaac, te Isaac ni cuu sêhe Abraham, te Abraham ni cuu sêhe Taré, te Taré ni cuu sêhe Nacor, ³⁵ te Nacor ni cuu sêhe Serug, te Serug ni cuu sêhe Ragau, te Ragau ni cuu sêhe Peleg, te Peleg ni cuu sêhe Heber, te Heber ni cuu sêhe Sala, ³⁶ te Sala ni cuu sêhe Cainán, te Cainán ni cuu sêhe Arfaxad, te Arfaxad ni cuu sêhe Sem, te Sem ni cuu sêhe Noé, te Noé ni cuu sêhe Lamec, ³⁷ te Lamec ni cuu sêhe Matusalén, te Matusalén ni cuu sêhe Enoc, te Enoc ni cuu sêhe Jared, te Jared ni

cuu sêhe Mahalaleel, te Mahalaleel ni cuu sêhe Cainán, ³⁸ te Cainán ni cuu sêhe Enós, te Enós ni cuu sêhe Set, te Set ni cuu sêhe Adán, te Adán ni cuu sêhe Yaā Dios, chi ni sáha ya de.

*Jeē ní jito ndee jexeén Jesús
(Mt. 4.1-11; Mr. 1.12-13)*

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sáha Espíritu Santo. ² Te ni ine ya yūcuan úū xico quivī, te ni jito ndee jexeén yā, chi cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jíi yā sōco. ³ Yūcuán na te ni cahān jexeén un jíin yá:

Núu máá ró cúu Sêhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíin:

Tuú chi yósó núu tútu iī: Nasūu máni máá jíin stáā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde xinī ñn yucu súcún, te ñn núnúu-ni ni steén nuū yā tācá nación ñí cáhnu ñayiví. ⁶ Te ni cahān jíin yá:

Nuū máá ró cuāha ri jeē kujéhnu ró núu ndivii nación yáha, chi yōhyo luu cáa. Chi máá rí jñí ndihí, te cuu cuāha ri nuū ndé ñn cúní rī. ⁷ Núu súcuan te núu cuiñi yítí ró chiñúhún ró ruhū, te cuāha ndihí ri nuū rō. Achí jexeén.

8 Te ni cahān Jesús jíin:

Satanás, cujiyo quihīn rō, chi yósó núū tútu jeē chiñúhún ñayuu maá Jítóho i Yaā Dios, te nuū maá-ni ya cuajniñu i. Achí yá.

9 Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó.

10 Chi yósó núū tútu:

Tejníñu ya ndajéhé yā quiji-coo coto rōhó.

11 Te cunundee yā rohó jíjnáhan ya, návāha ma cáchihí ró jéhē rō nuū yuú.

Achí tutu. Achí jexeén.

12 Te ni cahān Jesús:

Tuú chi suni yósó núū tútu jeē ma cóto ndee ñayuu Jítóho i Yaā Dios, núu jnama ya i chí tuú, áchí yá.

13 Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

14 Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jité núu jnūhun ya. 15 Te ni steén yā jnūhun ini tācá vehe iī sinagoga, te ndihí ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

16 Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe iī sinagoga, nájnūhun sáha sáha ya. Te ni ndocuiñi yā jeē cahu ya tutu iī. 17 Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihīn yā nuū yosó jnūhun ni cahu ya:

18 Espíritu maá Jítóho yō Yaā Dios iyó yá jíin rí,

chi ni tejníñu ya ruhū jeē nácani rí jnūhun vāha nuū ñayuu ndahú.

Te ni tají yá ruhū vēji rí jíin jnūhun jeē ndúvāha ni ñayuu cáccucuíhyá ni.

Te castūhun rí nuū ñayuu cáyihí ndaha jexeén jeē coo libre i.

Te sáha rí jeē ndúndijin ini anuá ñayuu tu cájecūhun ni,

te jnama rí ñayuu jeē cándoho i sáha jnáhan i.

19 Te nacani rí jnūhun jeē ní quee tiempo jeē sáha Jítóho yō Yaā Dios jeē vāha ñayuu.

Achí tutu ni cahu ya.

20 Te ni nacasi yā tutu ún, te ni nacuāha ya nuū tēe jéjníñu ini sinagoga, te ni nucōo ya jeē steén yā jnūhun nuū ñayuu cáhīn ini sinagoga. Te tācá i cájito vāha i nuū yā. 21 Te ni quejéé yá cahán yā jíin i:

Vijna te ni squícu jnūhun cáhán tutu iī yāha ní cajini sōho ró, áchí yá.

22 Te ndivii i ni cacahān jeē vāha tēe cúu ya, te cánaa ni i jeē ní cajini i tāca jnūhun luu

ni cahān yā. Te ni cacajñūhun jñāhan i:

¿A násūu séhe José cúu tēe yáha?

23 Te ni cahān yā jín i:

Jíní vāha ri jeē cájeni ni rō cahān rō jñūhun yátá yáha jín ri: Tēe tájñá, sátájñá ró maá ró núu súcuan. Te jñūhun yáha cúni cahān jeē nájñūhun ni nasávāha ri cuehē ñayuu cácuñū ini ñuu Capernaum ni canihīn rō jñūhun, suni súcuan na sáha ri ñuu yō yāhá návāha candíje ró cájeni ni rō. Achí yá jín i.

24 Te ni cahān gā yā:

Jendaá cahán rī jín ró, ni ññ tēe nácani jñūhun Yaā Dios, tu cájetáhú ñayuu ñuu maá de nuū de. 25 Te suni jendaá cahán rī jín ró jeē ni iyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jñūhun Yaā Dios. Te tiempo un tu ní cúun cuiñi saū unī cuiyā yosáva, te ni iyo ññ jnamā xeēn ní cáhnu nación.

26 Te tu ní tájñi Yaā Dios Elías quihīn de nuū ni ññ ñahan viuda nación yō Israel, chí nuū máá ññ-ni ñahan viuda jeē ndeē ñuu Sarepta ndañū Sidón, ni jehēn de ni jito de jeē ní yeji ña. 27 Te ini nación yō Israel suni ni iyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jñūhun Yaā Dios. Te ni ññ de tu ní cándíje jeē ndúvāha de sáha Eliseo, chí sa suhva máñúhún-ni Naamán, tēe nación Siria ni nduvāha. Achí yá.

28 Yūcuán na te tāca ñáyuu cáhīn ini sinagoga, yōhyo ni caquitī ni i jñūhun ní cahān yā. 29 Te ni candocuiñī i, te ni caquenehen i ya yatā ñūu ún, cuahān i jín yá xinī yúcu íne ñuu ún, chí cácuñi i chundahá i ya ñinga ya cava ún. 30 Te tu ní cúu sáha i, chí ni yāha-ni ya mēhñú i cuahān yā.

Jeē ní quenehen ya tachī ini ññ tēe
(Mr. 1.21-28)

31 Yūcuán na te cuahān Jesús ñuu Capernaum región Galilea. Te quivī ndétatu ní steén yā jñūhun nuū ñáyuu. 32 Te ni canaa ni i cájini i jñūhun stéén yā. Chí ni steén vāha ya nuū i, chí jíní vāha máá yá.

33 Te ini vehe sinagoga un íne ññ tēe jeē ññūhun tachī xeén ini de. Te tēe un ní cana cóho de:

34 Cuijiyo ní. ¿Naun vēji ní núu na jínñahan ná, Jesús ñuu Nazaret? ¿A véji ní jēē snáā ni sáña, chí naún? Je jíní na ndé ññ cúu ní, chí Sēhe ññ Yaā Dios cúu ní. Achí de.

35 Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núu tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jín de. 36 Te ndiñi ñayuu un ní cayūhú i, te ni cacahān i jín jñāhan i:

¿Na jñūhun cúu yāha jēē ní cuu súcuan? Chí cújēhnu tēe yáha jēē ndácu ññin de jñññu nuū tachí, te quēndacoo-ni, áchí i.

37 Te jñūhun ya ni jītē núu cuahān ní cáhnu región yūcuán.

Jeē ní nasávāha ya naná chīsó Simón Pedro

(Mt. 8.14-15; Mr. 1.29-31)

38 Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te náná chīsó Simón, yíhi xeēn quíji ña, te ni cacahān ndahú de jíin yá jehē ña. 39 Te ni jīta ndeyi ya nuū ña, te ni cahān yā jeē na ndíco quíji ún. Te ni nduvāha-ni ña. Te ni ndocuñiñi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

40 Te jeē ni quée niāndii, te tāca ñáyuu jeē iyó jnáhan i cácuñu ndinuū cuehyi, ni caquindeca i jnáhan i un núu yā. Te ni soó yá ndaha ya siquī iñ iñ i, te súcuan ni nasávāha ya i. 41 Te suni cuehē ñayuu ni quendacoo tachī ini i, te cácana cóhó táchī ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jñūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

Jeē ní nacani ya jñūhun región Galilea

(Mr. 1.35-39)

42 Te nuū ní cundijin, te ni quenda ya cuahān sīn ya yatā ñūū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te

cástétu i ya jeē tú cujiyo ya nuū i. 43 Te ni cahān yā jíin i:

Suni cánuú jéē nacani ri jñūhun vāha nuū tāca gá ñuu siquī ndese ndácu Yaā Dios jñiñu, chi jeē yúcuan ní tají yá ruhū vēji ri. Achí yá.

44 Te ni jica cuu ya ní región Galilea, nácani ya jñūhun ini táca vehe iī sinagoga.

Jeē ní canihīn de cuehē chācá ni sáha ya

(Mt. 4.18-22; Mr. 1.16-20)

5

1 Te iñ quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chi cácuni i cuni nahín i jñūhun Yaā Dios. 2 Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cánacate de ñunu de. 3 Te ni quivī ya ini iñ barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jñūhun nuū ñáyuu cuehē jeē yúcu i yundúte un. 4 Te nuū ni jínu ni steén yā, te ni cahān yā jíin Simón:

Scáca ró barco na quihín yō nde nuū iyó cúnú ndute, te sínga ró ñunu ró jñi ró cháca, achí yá.

5 Te ni cahān Simón:

Maestro, ní niñu ni casínga ná ñunu jeē jñi ná tí, te tu ní níhín cuiti ná ni iñ ti. Te jeē cahán maá ní súcuan, te na sínga tucu ná ñunu, achí de.

6 Te ni casínga de, te ni quāvicoo cuehē ndasí cháca, nde nducú táhndē ñunu de. 7 Te ni cacaja ndahá de nuū jnáhan de cáhīn ini inga barco, na quíjicoo chindéé ñájnáhan jíin de. Te ni quecoo de, te ni cascútú ndā de ti ndíndúú barco, te nde je yajni quēe barco. 8 Te ni jito Simón Pedro jeē súcuan ni cuu. Te ni jecuiñī yití de nuū Jesús, te ni cahān de:

Cujiyo ní núū ná, chi tēe íyó cuéchi cúu ná, áchí de.

9 Chi máá de jíin táca tēe cáhīn jíin de, ni cayūhú de jeē ní canihīn de cuehē chācá un ní sáha ya. 10 Te suni ni cayūhú Jacobo jíin Juan, ndíndúú séhe Zebedeo, chi tēe chindéé ñájnáhan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

11 Yūcuán na te nuū ni jínūcoo de jíin barco nuū ñūhun íchi, te ni castóo de ndihī ndajniñū de, te ni candiquīn de ya cuango de.

Jeē ní nasávāha ya ñn tēe ndóho cuehyī stehyú
(Mt. 8.1-4; Mr. 1.40-45)

12 Yūcuán na te íne Jesús ini ñn ñuu, te ni quee ñn tēe ndóho cuehyī stehyú. Te ni jito de nuū Jesús, te ni jecuiñī yití de ni jecuīn de nuū de nde nuū ñūhun, te ni cahān ndahú de jíin yá:

Jíní na jēe cuu sáha ní jēe nduvāha ná, te núu cúní ni, áchí de.

13 Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. 14 Te ni ndacu ya jniñū nuū de jeē ma cáchi cuiti de nuū ní ñn. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñū jehahán. Te súcuan te cuni ñayuu jeē ní nduvāha ró. Achí yá.

15 Te víhyá gā ni jitē núu jnūhun ya cuahān. Te ni cataca cuehē ñayuu jeē cúni nahín i jnūhun stéén yā, jíin jēe nasávāha ya i nuū tāca cuéhyī cándoho i. 16 Te máá yá cuahān sīn ya nuū tú ñayuu, te ni jicān tahú yā.

Jeē ní nasávāha ya ñn tēe ndóho cuehyī ni íjin

(Mt. 9.1-8; Mr. 2.1-12)

17 Te ñn quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tācá ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñū. 18 Yūcuán na te ni quecoo jecu tēe, cándiso de ñn tēe ndóho cuehyī ni íjin, cáttú de nuū ñn

camilla. Te cánducú de squívi de tēe ún ini vehe, te caquin de nuū íne ya. ¹⁹ Te tu ní cánihin de modo quivicoo de jíin tēe un, chi cáyūcú chitú ñáyuu. Te ni cacao de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñáyuu. ²⁰ Te ni jini Jesús jeē cá candíje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé ñin cúu tēe yáha jēē cahán de jnūhun ndevāha jeē quití ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī? ²³ Jeē uú jnūhun yáha, ¿ndé ñin yí gá cáa? ¿A jēē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuiñī te caca ró, chi je ni nduvāha ró, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yáha jēē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cáhán rī jíin ró, ndocuiñī te naquihin ró camilla rō, te quinhun rō vehe ró, áchí yá jíin de.

²⁵ Te ni ndocuiñī-ni tēe ún, jíto jíinú ñáyuu. Te ni naquihin de camilla nuū ni cátu de, te cuanuhun de vehe de. Te nácuatáhu de nuū Yaā Dios. ²⁶ Te yōhyo ni canaa ni tāca ñáyuu cájito i, te ni cacahān i jeē yóhyo vāha Yaā cúu Yaā Dios. Te suni yōhyo cáyūhú i, te cácahān i:

Vijna te ni cajito yó jniñu jéhnu téyí, áchí i.

Jeē ní cana ya Leví
(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ñin tēe stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquīn ruhū na quíhin yō.

²⁸ Te ni ndocuiñī de, te ni stóo de ndihi ndajniñu de, te cuahān de jíin yá.

²⁹ Yūcuán na te ni sáha Leví ñin vico cáhnu vehe de, jeē cúsiñi ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá. ³⁰ Te tēe grupo fariseo jíin tēe cástéén tutu ley Yaā Dios, ni quejéé de cácahān de siquī tēe cáscuáha jíin yá, te ni cacajnūhún de:

¿Najehē cáyeji rō cájiji ró jíin tēe cástútú xúhun renta jíin tēe cásaáha cuéchi? áchí de.

³¹ Te ni cahān Jesús:

Ñáyuu cáhīyo vāha, tu jíni ñúhún i tēe tájna, chi ñáyuu cácuahū cúu jeē jíni ñúhún. ³² Te ruhū nasūu jēē véji ri cana ri ñáyuu tú cuéchi, jeē cúu i nájnūhun ñáyuu cáhīyo vāha. Chi sa suhva véji ri cana

ri ñayuu cáhīyo cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquī jeē cóndite ni

(Mt. 9.14-17; Mr. 2.18-22)

³³ Yūcuán na te ni cacahān de jíin yá:

Tēe cáscuáha jíin Juan, jíin tée cáscuáha jíin grupo fariseo, cuehē jínu cáhīyo ndite ni de te cájicān tahu de. Te tēe cáscuáha jíin máá ní, ¿naun tu cásáha de súcuan? Chi cáyeji de cájihi de.

³⁴ Te ni cahān yā jíin de:

¿A cuu condite ni de níní jeē iyó rí jíin de? ¿A cuu sáha ró jeē condite ni ñayuu cáhīin vico nándāha, te núu níní néne tēe nándāha? ³⁵ Te quee quivī jeē cújiyo tēe ni nandāha, te quivī ún chi condite ni i. Achí yá.

³⁶ Te suni ni cahān yā uū jñuhun yátá síquī jeē tu quíjnáhan jñuhun jeé jeé steén yā jíin táca jñuhun jenahán. Achí yá:

Ni ñin ñayuu tu jéhnde i ñin pedazo sahma jée i, te nachuhun i nuū ñin sahma túhú i. Chi núu súcuan te stívi i sahma jée i, te suni tu quíjnáhan jeé jeé un jíin jée tuhú. ³⁷ Te tú ni ñin chuhun vino jeé ini ñin túhú. Chi núu súcuan, te vino jeé un ndatá ñin, te naa vino jíin ñin. ³⁸ Chi cánuú jée cuhun vino jeé ini ñin jée, te súcuan te quéndō vāha ndindúú. ³⁹ Te ñayuu cájihi vino áva, tu cúní i coho i jeé jeé, chi jeé áva cúu jeé vāha ga, achí i. Achí yá.

Jeē ní cataxín de yoco trigo quivī ndétátú

(Mt. 12.1-8; Mr. 2.23-28)

6

¹ Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquūin de ini ndaha de, te ni cayeji de. ² Te sava tēe grupo fariseo ni cacajñuhún de:

¿Najehē casáha ró jniñu jeē tu iyó vāha sáha ró quivī ndétátú?

³ Te ni cahān Jesús jíin de:

¿A tu ní cácahu cuiñi rō tutu ndese ni sáha David, ñin quivī jeē ni jíi de sōco jíin tée cáhīin jíin de? ⁴ Te ni quivī de ini vehe Yaā Dios, te ni quihin de pan i jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhīin jíin de. Te tú na ley jeé cáji ni ñin tēe, chi máá-ni sutū cuu caji. Te vēsú súcuan te tú na cuēchi ní iyo síquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeé ndácu jniñu síquī ndese sáha ñayuu quivī ndétátú, áchí yá.

Jeē ní nduvāha tēe ni ichi ndaha

(Mt. 12.9-14; Mr. 3.1-6)

⁶ Te inga quivī ndétátú, suni ni quivī ya ini vehe i sinagoga, te ni steén yā jñuhun. Te yūcuan íne ñin tēe ni ichi ndaha vāha de. ⁷ Te tēe cásteén tutu ley jíin tée grupo fariseo, cájito yuhu de ya núu nasávāha ya tēe un quivī ndétátú, návāha nihīn

de cuēchi siquī yā. ⁸ Te máa yá je jíni yā ndese cájeni ni de. Te ni cahān yā jíni té ni ichi ndaha ún:

Ndocuiñi, te condichi rō mēhñu yáha, áchí yá.

Te ni ndocuiñi de, te ni jecondichi de mēhñú. ⁹ Yūcuán na te ni cahān yā jíni de jíjnahan de:

Na cájnūhun rí rohó in jnūhun: ¿Ndese cáhan ley siquī quivī ndétátú? ¿A jéé sáha vāha yó, chí sáha néé yó? ¿A jéé nasávāha yó ñáyuu je yajni cuu, chí sáha yó jéé cúu i? Achí yá.

¹⁰ Te ndéhé yá nuū de jeé cáyūcú de ní xiin ya. Te ni cahān yā jíni tée cúhú un:

Scaá ndaha ró.

Te ni scaá de, te ni nduvāha-ni ndaha de. ¹¹ Te yōhyo ni caquitī ni tāca té un, te ni quejéé de cándajnūhún de siquī Jesús, ndese cahni de ya.

Jeé ní nacāji ya uxī uū tēe apóstol

(Mt. 10.1-4; Mr. 3.13-19)

¹² Te ni cuu jecu quivī, te ni quenda ya cuacacān tahu yā nde yucu. Te ní niñu ni jicān tahu yā nuū Yaā Dios. ¹³ Te nuū ní cundijin, te ni cana ya tāca tée cáscuáha jíni yá. Te ni nacāji ya uxī uū de, te ni cahān yā jeé cuu de apóstol, condiso jniñu de nacani de jnūhun ya. ¹⁴ Te yāha cúu síhví de jíjnahan de: Simón jeé ní nasnání yá de Pedro, jíni ñani de Andrés, te suni Jacobo jíni Juan, Felipe jíni Bartolomé, ¹⁵ Mateo, Tomás, Jacobo sēhe Alfeo, Simón tēe

grupo cananista, ¹⁶ Judas ñani Jacobo, jíni Judas Iscariote, tēe jeé ní nastúu de ya.

Jeé ni stéén yā nuū ñáyuu cuehē

(Mt. 4.23-25)

¹⁷ Te ni nanuu ya yucu jíni táca té un jéé cascuáha jíni yá, te ni jecuiñi yā in nduhvā jíni de. Te cuehē ñáyuu ní región Judea jíni ñuu Jerusalén, jíni ñáyuu yumar ñuu Tiro jíni ñuu Sidón, ni quecoo i jeé cúni nahín i jnūhun stéén yā, jíni jéé ndúvāha i cuehyī cándoho i. ¹⁸ Te ñáyuu jeé ñūhun tachī ini i, suni ni canduvāha i ni sáha ya. ¹⁹ Te ndivii ñáyuu cácuu i quehé i ya, chí súcuu ndúvāha i sáha ya jíni poder yā.

Jnūhun ñáyuu yōhyo ndetū jíni ñáyuu jeé xeēn ndoho

(Mt. 5.1-12)

²⁰ Te ni ndacoto ya nuū tée cáscuáha jíni yá un, te ni cahān yā:

Yōhyo ndetū rohó jéé cándoho ndáhú, chí quivī ró ñuu nuū ndácu Yaā Dios jniñu.

²¹ Yōhyo ndetū rohó jéé cáji sōco vijna, chí quiji quivī jeé ndutú chíji ró.

Yōhyo ndetū rohó jéé cándahyū rō vijna, chí quiji quivī jeé cuecú rō.

²² Yōhyo ndetū rō te núu cáquitī ni ñáyuu nuū rō jeé siquí ruhū, Yaā ní nduu tēe, te cáscuéhichí i rōhó, te cácahān neé i nuū rō, te cácahān i jeé ñáyuu casáha jniñu neé cácuu ró. ²³ Te na cóo sí ni rō quivī sáha i súcuu, te víhyá gā na cúsi ni rō, chí cáhnu téyí coo

tahū rō nde andiví. Chi suni súcuan ni casáha uhū tāca jíi i jíin tée ni canacani jnūhun Yaā Dios nde jenahán.

24 "Te nacā jeē xeēn ndoho róhó ñáyuu cucá, chi vijna-ni cúu jeē cáhīyo sī ni rō.

25 "Nacā jeē xeēn ndoho róhó ñáyuu jeē víjna cáhīyo vetū chíji ró, chi quiji quiví jeē cuu rō sōco.

"Nacā jeē xeēn ndoho róhó ñáyuu jeē víjna cájecū rō, chi quiji quiví jeē nduculhyá ni rō te ndahyū rō.

26 "Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cajejnúhún jíi i tāca tée ni canacani jnūhun stáhú ndé jenahán.

Jnūhun jeē cundáhú ni yō ñáyuu cájito uhū yohó
(Mt. 5.38-48; 7.12)

27 "Te cáhán rī jíin róhó jeē cájini sōho: Cundáhú ni rō ñáyuu cájito uhū rohó. Te sáha vāha ró jíin ñáyuu cáquitī ni nuū rō. 28 Te cacān rō jeē vāha coo ñáyuu cácahān ndevāha síquī rō. Te cacān tahú rō jehē ñáyuu cácahān neé núu rō. 29 Te núu ndé tée cani de ñin lado yiqui núu rō, te vāha ga suni cuāha ró inga lado cani de, vēsú jeē nácuāha ró jēē ndútahū de. Te núu ndé tée cúní de quende de ticāchi ró, suni cuāha ró jnūhun jeē na quíhín de jíin ndé camisa rō. 30 Te na-ni ñáyuu jicán nuū rō, te cuāha ró núu i. Te ñáyuu quíhin ndajníñu ró, ma nándacān rō. 31 Te nájñūhun cáconi rō jeē sáha vāha ñáyuu

jíin ró, suni súcuan na sáha vāha ró jíin i.

32 "Chi núu íyó mánī rō jíin máa-ni ñáyuu jeē maní jíin ró, ¿te na vé jeē vāha ga sáha ró núu súcuan? Chi nde tée casáha cuēchi, suni maní de jíin tée maní jíin máa de.

33 Te núu sáha vāha ró jíin máa-ni ñáyuu jeē casáha vāha jíin ró, ¿te na vé jeē vāha ga sáha ró núu súcuan? Chi nde tée casáha cuēchi, suni súcuan casáha de. 34 Te núu cuāha núu ró núu maá-ni ñáyuu jeē ñūhun ni rō nacuāha i nuū rō, ¿te na vé jeē vāha ga sáha ró núu súcuan? Chi nde tée casáha cuēchi, suni jéhe núu de nuū tāca gá tée casáha cuēchi, návāha nanihīn tucu de. 35 Núu súcuan te cundáhú ni rō ñáyuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéñnu téyí. Chi máa yá vāha ni yā jíin ñáyuu tu nácuatáhú núu yā jíin ñáyuu casáha neé. 36 Núu súcuan te cundáhú ni rō ñáyuu, nájñūhun máa Tátá rō cundáhú ni yā i.

Ma cahán yō síquī cuéchi jnāhanyó
(Mt. 7.1-5)

37 "Ma cahán rō síquī cuéchi ñáyuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone

cáhnu ni yā nuū rō. ³⁸ Cuāha ró núū ñáyuu, te suni súcuan cuāha Yā Dios nuū rō. Chi vāha ndasí cuāha ya nuū rō, nájñuhun jeē chícuāha váha ya, quisi ya, sánihin ya, te nde scáa ya cuāha ya nuū rō. Chi cūhva jeē cājēhe ró núū ñáyuu, suni cūhva un cuāha ya nuū rō. Achí yá.

³⁹ Te ni cahān yā ññ jñuhun yátá jíin i:

Tēe cástéén jñuhun tú ndaā, cácuu de nájñuhun tēe cuáá. Te ññ tēe cuáá, ¿á cuu stéén de ichi nuū inga tēe cuáá? ¿A tú ñingava ndindúú de ini xehvā? ⁴⁰ ññ tēe scuáha, tu cújēhnu de nuū maestro de. Te tēe scuáha ún, núu je ni cutūhva váha de, te jinū de coo de nájñuhun maestro de.

⁴¹ Te cuēchi jñáhan ró cúu nájñuhun jeē íne ññ yāca lúli tinūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájñuhun jeē íne ññ nduhu tinūu máá ró? ⁴² ¿Te naun cácahān rō jíin jñáhan ró: Condetu, na táva rī yāca íne tinūu ró, te tu cánacani ni rō jeē íne ññ nduhu tinūu máá ró? Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jéē táva rō yāca tinūu jñáhan ró.

Jíin jññu cásáha ñayuu te nácuni yō ndese ñayuu cácuu i
(Mt. 7.17-20; 12.34-35)

⁴³ Tu íyó yujnu váha jeē jéhe ndehē neé, te ni tu íyó yujnu neé jéē jéhe ndehē váha.

⁴⁴ Chi jíin ndéhē jeē jéhe ññ

ññ yujnu, te jíni yō núu yujnu váha cúu. Chi tu scóyo yó ndehē higo xiní ññ, ni tu scóyo yó ndehē uva xiní yucú zarza. ⁴⁵ Te suni súcuan tēe vāha, cáhán de jñuhun vāha, chí vāha ánuá de. Te tēe sáha neé cáhán de jñuhun neé, chí cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquí uu vehe
(Mt. 7.24-27)

⁴⁶ ¿Najehē cácahān yññhún ró jíin rí: Jitoho ná, áchí ró, te tu cásquicu ró jññu ndácu rí? ⁴⁷ Táca ñáyuu vēji nuū rī te jíni sōho jñuhun cáhán rī te squícu, na stéén rī nuū rō ndese cúu i. ⁴⁸ Cúu i nájñuhun ññ tēe jeē ní jeni de vehe de, te ni jete cúnú de nde ni nihñ de toto, te ni jeni de squí. Te nuū ní ndaa yūte, te ni chundahá vehe ún, te tu ní cánda cuiti sáha, chí squí toto íin. ⁴⁹ Te táca ñáyuu jíni sōho jñuhun cáhán rī, te tu squícu i, cúu i nájñuhun ññ tēe ni jeni de vehe de nuū ññuhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jíin i jíjñáhan i.

Jeē ní nasávāha ya mozo capitán
(Mt. 8.5-13)

7

¹ Te nuū ni jínu ni cahān yā ni cajini nahín ñáyuu ún, te cuahān yā ññu Capernaum.

² Te ññ tēe nación Roma jeē cúu capitán, íyó ññ mozo de jeē maní ndasí de jíin. Te mozo un cúhú i te je yajni

cuu i. ³ Te ni jini capitán jnūhun Jesús. Te ni tají de jecu tēe jéhnū cándacu jniñū nuū ñáyū hebreo, cuangoo de nuū yā jeē cahán ndahú de jíin yá jeē na quíji ya sávāha ya mozo de. ⁴ Te ni jinūcoo tēe un núū Jesús, te ni cacahān ndahú ndasí de jíin yá:

Chindéé ñáhán ní tēe cúu capitán, chí tēe vāha cúu de. ⁵ Chi maní de jíin nación yō, te máá de ni ndacu jniñū ni cuvāha ñin vehe sinagoga cuu yó. Achí de.

⁶ Yūcuán na te cuahān Jesús jíin de jíināhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíin yá:

Achí capitán jeē tu cúni de sájneñū de níhín, chí tu cújéhnū de jeē quihín ní quívi ní vehe de. ⁷ Jeē yūcuán tu ní sájéhnū de máá de jeē quíji de nuū ní, áchí de. Te máá jéē cahán-ni ní, te na ndúvāha-ni mozo de, áchí de. ⁸ Chi máá de suni ndíso jniñū de ni casáha tēe cácujeñū ga. Te cújéhnū de nuū tǎcá soldado de, áchí de. Te núu cáhán de jíin ñin tēe jeē na quihín de, te cuahān de. Te núu cáhán de jíin ñnga tēe jeē na quíji de, te quíji de. Te núu ndácu de ñin jniñū nuū mozo de, te sáha i, áchí de. Achí táca tēe un jíin yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíin ñáyū cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín

rī ni ñin ñáyū candíje ñihin súcuan, nájñūhun cándíje tēe ún, vésú tēe nación tu jíin jnūhun Yāā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yíi ñahan viuda

¹¹ Yūcuán na te cuahān yā ñin ñuu naní Naín. Te tēe cácuáha jíin yá, jíin ñáyū cuehē, suni cuangoo i jíin yá. ¹² Te ná ni cuyajni ya yuñúú ún, te yūcuán ní quendacoo ñáyū jeē quíchindūji i ñin tēe suchí jéē ní jíhī. Te máñuhún-ni i nuū naná i, te ñahan viuda cúu ña. Te cuehē ñáyū ñuu un véjicoo jíin ña. ¹³ Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndíyi ún, te ni jniñū ya yejnū, te ni cajecuiñī tēe cándiso ún. Te ni cahān yā jíin súchi ní jíhī:

Cáhán rī jíin ró, ndocuiñī, achí yá.

¹⁵ Yūcuán na te ni nucōo súchi ní jíhī ún, te ni quejéé i nácahān i. Te ni nacuáha ya i nuū naná i. ¹⁶ Te ndivii ñáyū ni cayūhú i jeē ní cajito i, te ni cacahān i jeē yóhio vāha Yāā cúu Yāā Dios. Te cácahān i:

Mēhñū yó ni quee ñin tēe cújéhnū nácani jnūhun Yāā Dios.

Te suni cácahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jitē núu jnūhun ya ní cáhnu región Judea jíin táca región yajni yūcuán.

Jeē ní tají Juan uū tēe nuū yā

(Mt. 11.2-19)

¹⁸ Te íne Juan vecāa, te tēe cáscuáha jíin de ni cacastūhun núu de jeē súcuan ni cuu táca jniñu yáha. ¹⁹ Te ni cana Juan uū tēe ún, te ni tají de cuango nuū Jesús, návaha cajnūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajnūhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máá hora un ní nasávaha ya cuehē ñayuu cácuñu, jíin ñáyuu cándoho cuehyī xeēn, jíin ñáyuu ñūhun tachī ini. Te suni cuehē ñayuu cuaá ní ndundijin tinūú i ni sáha ya. ²² Te ni cahān yā jíin de:

Cuángoo te castūhun ró nuū Juan táca jniñu ni cajito ró jíin jnūhun ni cajini ró. Te cachi rō nuū de jeē ñáyuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvaha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jéé jnama Yaā Dios i. ²³ Te

yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahán yā jnūhun Juan jíin ñáyuu:

¿Na vé ni jécondēhe ró jijnáhan ró ndé nuū ñūhun téhé? ¿A ñin tēe jéni ñin jéni uū ni, nájñūhun ite jeē cánda sáha tachī? ²⁵ Te núu tuú, ¿te na vé ni jécondēhe ró núu súcuan? ¿A ñin tēe cúní cujéñnu jeē ñūhun sahma lúu? Tuú chí cájini rō jeē tēe cáñuhun sahma lúu te cánducú táca jéé cúsiñ ni, máni ini vehe rey cáyúcú de.

²⁶ ¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cáhán rī jíin ró jeē suu ni jecondēhe ró. Te cújéñnu ga Juan yáha vēsú táca gá tēe ni canacani jnūhun Yaā Dios. ²⁷ Chí jnūhun Juan cúu jeē ni cáhān Yaā Dios jeē yosó núu tutu i:

Tají rí tēe nacani jnūhun ri coşnūú de ichi núu Cristo,

návaha coo tūhva ñayuu jeē jinú yā.

Achí Yaā Dios, achí tutu.

²⁸ Te cáhán rī jíin ró jeē ini ñayīvī yáha cújéñnu ga Juan tēe scuándute vēsú táca gá tēe jeē ni íyo ini ñayīvī. Te vēsú súcuan te táca tēe núu ga ini ñuu nuū ndácu Yaā Dios jniñu, cújéñnu ga de vēsú Juan. Achí yá.

²⁹ Te táca ñáyuu jíin táca tēe cástútú xūhun renta, ni cajini i jnūhun cáhán yā, te ni cajetáhú i jeē Yaā ndaā cúu

Yaā Dios, chi je ni cajendute i nuū Juan. ³⁰ Te tēe grupo fariseo jín tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cájendute de nuū Juan. ³¹ Te ni cahān gā maá Jítóho yō:

Yāhá cachi rī ñin jnūhun yátá návāha na cúni rō ndese cúu ñayuu tiempo vijna. ³² Cúu i nájñūhun sūchi lúlí cáhīn nuū yáhu cácasíquí i. Te cácana ndee i xinī jnáhan i: Ní cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándahyū rō, achí i. Te nájñūhun cándāa sūchi lúlí un jéē tu ní núnjahan ni i ni ñin, suni súcuan cándāa ró. ³³ Chi ni quiji Juan tēe scuándute, te cuehē jínu ni ñyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñūhun tachī ini de. ³⁴ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnúhun ró cácahān rō jeē máni máá jéē yéji rī jíhi ri vino. Te quíjnahan ri jín tēe cástútú xūhun renta jín táca gá tēe cása ha cuēchi, achí ró. ³⁵ Te núu cundíchi ñin tēe jín jnúhun Yaā Dios, te jín jniñu sáha de te cájini táca gá tēe ndíchi jeē ndichí de. Achí yá.

Jeē ñne Jesús vehe Simón tēe fariseo

³⁶ Te ñin tēe fariseo ni cana de Jesús jeē cáji yā staā jín de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñin

ñahan sáha cuēchi, ndéé ña ñuu yúcuán, te ni jini ña jeē ni jínū Jesús vehe tēe fariseo un, yéji yā staā. Te ni quee ña jín ñin frasco yuū luu jeē ñūhun chitú aceite perfume. ³⁸ Te ñin yítí ña nuū jehé yā, te ndáhyú ña. Te ni quejéé ña stáji ña jehé yā jín ndute tñnúú ña, te ni nasíchí ña jín ixi xíní ña. Te ni techūhú ña jehé yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. ⁴⁰ Yūcuán na te ni cahān Jesús jín de:

Simón, cúni rī cahān rī jín ró ñin jnūhun.

Te ni cahān maá de:

Cahān ní, Maestro.

⁴¹ Te ni cahān Jesús:

Ñin tēe jéhe núu xūhún, ni ñyo uū tēe táu nuū de. ñin de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēe un jéē náchunaa de. Te tēe jéhe núu xūhun ní ñne cáhnu ni de nuū ndindúú tēe ún. Núu súcuan te cachi ró: Jeē ndindúú tēe ún, ¿ndé ñin de coo manī gā jín de? Achí yá.

⁴³ Te ni cahān Simón:

Jéni ni na jéé tēe ni cotaū cuehē gā, achí de.

Te ni cahān yā jín de:

Ndaā cahán rō, achí yá.

⁴⁴ Te jító ya nuū ñahan ún, te ni cahān gā yā jín Simón:

¿A jító ró na vé sáha ñahan yáha? Jeē ní quee rī vehe

ró, te tu ní jéhe ró ndute jeē ndúndoo jehē rī nájñuhun íyó costumbre. Te ñahan yáha ní stáji ña jehē rī jíin ndute tínúú ña, te ni nasíchí ña jíin ixi xíní ña. ⁴⁵ Te tu ní téchūhu ró ruhū nájñuhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī. ⁴⁶ Te tu ní chūhun ró aceite xínī rī nájñuhun íyó costumbre. Te ñahan yáha ní chuhun ña aceite perfume jehē rī. ⁴⁷ Núu súcuan te cáhán rī jíin ró jeē ni stéén ña jeē yóhoyo manī ña jíin rí siquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū ñn ñayuu íyó jecu-ni cuéchi, te jecu-ni stéén i jeē maní i jíin rí, achí yá.

⁴⁸ Te ni cahān yā jíin ña:

Je íne cáhnu ni rī nuū tāca cuéchi ró, achí yá.

⁴⁹ Yūcuán na te ñayuu cáyeji staā jíin yá, ni quejéé i cácahān maá i:

¿Nde ñn ga cúu tēe yáha jéē cahán jeē íne cáhnu ni nuū cuéchi? achí i.

⁵⁰ Te Jesús ni cahān gā yā jíin ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsī ni rō. Achí yá.

Jñuhun ñahan ní cajejnīñu nuū yā

8

¹ Yūcuán na te ni cuu jecu quívi, te ni jica cuu Jesús tācá ñuu náhnu jíin ñuu lulí. Te nácani ya jñuhun vāha te cástūhun yá ndese ndácu Yāā

Dios jniñu. Te ndihúxí uū tēe cácuu apóstol, cájica de jíin yá. ² Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñn ña cúu María ñuu Magdala, te ini ñahan un ní quenehen ya uxā tachī. ³ Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jéhe ña tāca jéé jíni ñúhún yá jíin de jíināhan de.

Jñuhun yátá siquī tēe jéte trigo

(Mt. 13.1-9; Mr. 4.1-9)

⁴ Te cuehē ñayuu tācá ñuu yúcuan ní jinūcoo i nuū Jesús. Te ni cacutútú cuéhē ndasí ñayuu, te ni cahān yā ñn jñuhun yátá jíin i:

⁵ ñn tēe cate trigo, ni quenda de jeē cáte de. Te ná ni quejéé de jéte de, te jecu trigo ni jitē yuhíchi. Te ni cajeñū ñayuu siquī, te ni cayeji saa. ⁶ Te jecu gā ni jitē nuū ñúhun yuū. Te ni cane, te ni ichī-ni, chi tú cuehē cajin. ⁷ Te jecu gā ni jitē nuū náne iñu. Te ñnuú-ni ni canecoo iñu jíin, te ni jesí nuū. ⁸ Te jecu ni jitē nuū ñúhun váha. Te nuū ní jehnu, te ni jéhe cuehē nunī, chi jeē ñn ñn ni jéhe nde ciento. Achí yá.

Yūcuán na te ni cahān jee ya:

Tāca rōhó jéé jíni sōho, na chúsóhó ró, achí yá.

*Najehē cahán yā máni
jnūhun yátá*

(Mt. 13.10-17; Mr. 10-12)

⁹ Te tēe cáscuáha jín yá ni cacajñuhún de ya na vé cuní cahán jnūhun yátá yáha. ¹⁰ Te ni cahán yá:

Róhó jínáhan ró, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jín jnūhun yátá cáhán rī jín sava ga i, návāha vēsú cájito i, te quéndōo i nájnūhun jeē tú na vé ni cájito i. Te vēsú cájini sōho i, te ma jécūhun ni i.

*Jeē ní castūhun cáji yá
jnūhun yátá tée jéte trigo*

(Mt. 13.18-23; Mr. 4.13-20)

¹¹ 'Jnūhun yátá yáha cúní cahán: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jítē nuū ñūhun yuū cúu nájnūhun ñayuu cájini jnūhun, te cájetáhú i te cácusī ni i jín. Te tu cúcutú jnūhun ún ini anuá i. Te jecu-ni quivī cá candíje i, te núu ni que-jéé jnúndóho, te cájica yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuangoo i te cácuñéñu i jín jniñu i jín jéé cuní i cucúcá i te coo sī ni i. Te tu íje i jín jnūhun ya. ¹⁵ Te trigo jeē ni jítē nuū ñūhun váha cúu nájnūhun ñayuu cájini nahín jnūhun ya,

te cájni vāha i, chi íyó váha íyó ndáā anuá i. Te cáhije i jín jnūhun ya, chi cá candíje vāha i.

Jnūhun yátá síquī lámpara

(Mr. 4.21-25)

¹⁶ 'Núu nástín ñayuu ñn lámpara, te tu jési i ni ñn síquī, ni tu jéni i chíji jito. Chi sa suhva jéni i nuū sucún, návāha cundijin nuū ñayuu quívicoo vehe. ¹⁷ Te suni súcuan tu íyó ni ñn jnūhun sáhi jéé ma cúní ñayuu, chi ndihí táca jnūhun cácahán i nane ndijin te cuni ñayuu.

¹⁸ 'Núu súcuan te na cúní sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máá jecu jeé jéni ni i jeé jini i, sa suhva naa. Achí yá.

Náná yā jín ñani yā

(Mt. 12.46-50; Mr. 3.31-35)

¹⁹ Yūcuán na te ni quee naná yā jín táca ñani yā nuū íne ya. Te tu ní cúu quívicoo ña nuū yā síquī jeé chitú ñayuu. ²⁰ Te ñn ñayuu ni castūhun núu yá:

Náná ni jín táca ñani ni cáhīn nuū quéhe, te cácuni cahán jín ní, áchí i.

²¹ Te ni cahán maá yá:

Suni náná rī jín ñani rī cácuu ñayuu cájini sōho jnūhun Yaā Dios te cáscuicu i, áchí yá jín i.

*Jeē ní jecuñī tachī ñhin jín
mar ni sáha ya*

(Mt. 8.23-27; Mr. 4.35-41)

²² Te ñn quivī ni quivī ya ñn barco jín tée cáscuáha jín yá, te ni cahán yá jín de:

Na yáha yó quih̄n yō inga lado mar.

Te ni cascáca de barco cuango de. ²³ Te níni cascáca de barco, te ni quixī yā. Te ni jequih̄i ñn tachī níhin nuū mar, te je yajni chitú ndute ini barco, te ndúcú quéé barco. ²⁴ Te ni castón da de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñī-ni ya, te ni cahān yā nuū tachī níhin jín núu mar. Te ni cajecuiñī-ni, te ni cuu nayúú í-ni. ²⁵ Te ni cahān yā jín téé cáscuáha jín yá:

¿Naun tu cácañdije ró?

Te máa de yōhyo ni cayūhú de, te cánaa ni de, te cácahān de jín jnáhan de:

¿Ndé ñn ga cúu tēe yáha jéé nde nuū tachí níhin jín núu ndúte ndácu de jniñu te cájetáhú jéé cahān de? Achí de.

Tēe Gadara jeē ndóho tachī (Mt. 8.28-34; Mr. 5.1-20)

²⁶ Yūcuán ña te ni cane ya jín de región Galilea, te cuahān yā región Gadara jeē íne inga lado mar Galilea.

²⁷ Te nuū ní nanuu ya nuū ñúhun íchi, te ñn tēe ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiñi de sahma, ni tu ndéé de vehe, chi sa suhva nuū cáyindūji ndīyi ndeé de. ²⁸ Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núu ná, Jesús Sēhe Yaā cujéhnu téyí? Cáhan

ndahú ná jín ní jeē ma stóho ní sáña, áchí de.

²⁹ Súcuan ni cahān de, chi je ni ndacu ya jniñu nuū tachí un jéé na quéndacoo ini de. Te ni cuu cuehē jínu sáha xeēn tachī jín de. Te cájihni ñayuu ndaha de jehē de jín cadena, návāha tú na vé sáha de. Te ndih̄i-ni jéhnde de, te jínu de jéhén de nde nuū ñúhun téhé sáha tachī ún. ³⁰ Te Jesús ni cajñuhun yá de:

¿Na vé naní ró?

Te ni cahān de:

Legión naní ná.

Súcuan ni cahān de jeē naní de, chi ñúhun cuehē tachí ini de. ³¹ Te ni cacahān ndahú táchí un jín yá jeē ma tají yá quih̄n ini túhñchi cúnú. ³² Te yucu yúcuan cáh̄in cuehē quñī cájitu ti. Te tachí jeē cáñuhun ini tēe un ní cacahān ndahú jín yá jeē na cuáha ya jñuhun quñivicoo ini quñī ún. Te ni jēhe ya jñuhun. ³³ Te ni quendacoo tachí ún ini tēe ún, te ni quñivicoo ini quñī. Te quñī un ní cajinu ti ni ñingoo ti ñn yucáva, ni quñivicoo ti nuū mar, te ni ndaquih̄i ti ndute, ni cajih̄i ti.

³⁴ Te tēe cándito ti ni cajito de jeē súcuan ni cuu, te ni cayūhú de. Te ni cajinu de cuacastühún de nuū ñáyuu ñuu un jín ñáyuu tāca rancho. ³⁵ Te cuango ñayuu un cuácondēhé i ña vé ni cuu. Te ni jinūcoo i nuū íne Jesús. Te ni cajito i nuū téé ní quendacoo tachí ini, néne de nuū jehé Jesús, te ñúhun de sahma, te je ni nducájí xíní de. Te ni cayūhu ñáyuu ún.

36 Te tēe ní cajito ni canacani de jnūhun nuū ñáyyu, ndese ni nduvāha tēe ni ñuhun tachī ini.

37 Yūcuán na te tāca ñáyyu ní región Gadara, ni caquejéé i cácahān ndahú i jín yá jeé na cújiyo ya quihīn yā, chi yōhyo cáyūhú i. Te ni ndivī ya ini barco jeé quínuhun yā. 38 Te tēe jeé ní quendacoo tachī ini, ni cahān ndahú de jín yá jeé na cuāha ya jnūhun quihīn de jín yá. Te Jesús ni cahān yā jeé na quéndōo de, te achí yá:

39 Cuánuhun vehe ró, te nacani ró jnūhun ndese yōhyo jéhu jniñu ni sáha Yaā Dios jín ró, achí yá jín de.

Te cuahān de, te ni nacani de jnūhun ní ñuu ún, ndese yōhyo jéhu jniñu ni sáha Jesús jín de.

Jnūhun sēhe síhí Jairo jín ñahan ní quehé yusáhma ya

(Mt. 9.18-26; Mr. 5.21-43)

40 Te nuū ní najinū Jesús inga lado mar, te ñayuu un ní cacusi ni i jeé ní najinū yā, chi ndihī i cándetu i ya.

41 Te ni quee ñn tēe cújéhu ini vehe īi sinagoga, naní de Jairo. Te ni jecuiñī yití de nuū jehé yā, te ni cahān ndahú de jín yá jeé na quihīn yā jín de vehe de. 42 Chi íyó ñn sēhe síhí de jeé mañúhún-ni i nuū de, te íyó i nájñuhun uxī uū cuiyā. Te sūchí un je yajni cuu i. Te cuahān yā jín de. Te cuehē ñayuu cándiquīn i ya, te ni chitú níhin i xiin ya cuan-goo i.

43 Te mēhñu ñáyyu un cuahān ñn ñahan cúhú jeé ní

cuu uxī uū cuiyā ndóho ña cuehyī niñī. Te ni jexin ña tāca jeé névāha ña jín tēe tájna, te tu ní nduvāha ña sáha ni ñn de. 44 Te ni quee ña ichi yátá yā, te ni quehé ña yusáhma ya. Te ni jecuiñī-ni niñī ña.

45 Yūcuán na te ni cahān Jesús:

¿Ndé ñn ni quehé sahma ri? achí yá.

Te ndivī i ni cacahān jeé tu ní quehé i. Te Pedro jín tēe cáhīn jín de, ni cacahān de:

Maestro, jito ní jéé ñáyyu cuehē yāha ní chitú níhin i xiin ní, te cáquihī i níhīn, te cájnūhun ní ndé ñn ni quehé sahma ní.

46 Te ni cahān Jesús:

Tuú chi ñn ñayuu ni quehé sahma ri, chi ni jini rī jeé jín fuerza rī ni nduvāha ñn ñayuu, achí yá.

47 Te ni jini ñahan un jéé tu ní cúu coo yuhu jeé ní sáha ña. Te quisi i ña ni quee ña, te ni jecuiñī yití ña nuū jehé yā. Te jito jínūū tāca ñáyyu, te ni cachi cají ña najehé ni quehé ña yusáhma ya, jín jéé ní nduvāha-ni ña. 48 Te ni cahān yā jín ña:

Séhē, ni candíje ró jéé cuu nasávāha ri rohó, te jeé yúcuan ní nduvāha ró. Cuahán te na ndúsī ni rō, achí yá.

49 Te níni cáhán gā yā súcuan, te ni quee ñn tēe vēji vehe Jairo, tēe cújéhu ini sinagoga, te ni cachi nuū de:

Je ni jihī sēhe síhí ní. Te ma sájñéñu ga ní Maestro, achí de.

50 Te ni jini Jesús jnūhun yáha, te ni cahān yā jín Jairo:

Ma yūhu ró, chi candíje-ni ró, te nastécu rī sēhe ró, áchí yá.

⁵¹ Te ni jinū yā vehe, te tu ní jehe ya jnūhun quīvi ñayuu jíin yá, chi máa-ni Pedro jíin Juan jíin Jacobo jíin tátá naná sūchi síhí un. ⁵² Te cácuquíhyá ni ndihí ñayuu cáyucú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quíxí-ni i, áchí yá.

⁵³ Te ni cajecū catá i jeē ni cáhān yā, chí cájini i jeē ni jíhí sūchi síhí un. ⁵⁴ Yūcuán na te ni jñi ya ndaha i, te ni cahān jee ya jíin i:

Síhí, ndocuñī, achí yá.

⁵⁵ Te ni natecu i, te ni ndocuñī-ni i. Te ni ndacu ya jniñu jeē na cuáha ña jeē cáji i. ⁵⁶ Te tátá i náná i yōhyo ni canaa ni de cájito de. Te ni ndacu nīhin ya jniñu nuū de jeē ma cáchi de nuū ni ñn jeē súcuān ni cuu.

Jeē ní tají yá ndihúxí uū de cuanacani de jnūhun
(Mt. 10.5-15; Mr. 6.7-13)

9

¹ Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachī ini ñayuu, jíin jéē nasávāha de ñayuu cácuñū.

² Te ni tají yá de quingoo de jeē nácani de jnūhun ndese ndácu Yaā Dios jniñu, jíin jéē nasávāha de ñayuu cácuñū.

³ Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni

staā, ni xūhún. Te quihīn rō jíin ñn-ni camisa, te ma cóndiso ró inga. ⁴ Te na-ni vehe núu ni quīvicoo ró, te yūcuán coyūcu ró nde quenda tucu ró quihīn rō inga ñuu. ⁵ Te núu ñn ñuu tu cájetáhú i rōhó, na quéndacoo ró yúcuān, te scóyo ró tícachā jehē rō, te súcuān stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñū.

Jeē ni jíhí Juan tēe scuándute
(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tācá jniñu sáha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chi ni ndacu ri jniñu ni tahndē xinī. Núu súcuān ¿te ndé tēe cúu tēe yáha jeē jíni jnūhun ri jeē sáha de jniñu jéñnu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe
(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācá jniñu ni casáha de. Te ni jeca ya

de cuahān sīn ya jīn de ĩn lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuango i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávaha ya ñayuu cácuñu.

¹² Te nuū cuáhini, te ni quecoo ndihúxí uū tēe cáscuáha jīn yá, te ni cacahān de jīn yá:

Tají ní ñayuu cuehē yāhá na quíngoo i tācá ñuu jīn táca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, áchí de.

¹³ Te ni cahān yā jīn de:

Cuāha máá ró jeē cáji i, áchí yá.

Te ni cacahān de:

Tú na vé cánevaha ná, chí uhūn-ni staā jīn úu-ni chācá. Te vēsú núu quicuaan ná stāā caji ndihi ñayuu cuehē yáha, te ni ma cúu, áchí de.

¹⁴ Chí iyó nájñūhun uhūn mil tēe. Te ni cahān yā jīn tēe cáscuáha ún:

Cahān jīn ñayuu na cúcōo sīn cincuenta cincuenta i, áchí yá.

¹⁵ Te súcuan ni casáha de, te ni cacucōo ndihi ñayuu. ¹⁶ Te ni quihin ya ndihúhún staā jīn úu chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jīn yá, te ni casaja de nuū ñayuu cuehē. ¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ĩn quivī ni cusīn Jesús, jícán tahú yā, te máá-ni tēe cáscuáha un cáhīn de jīn yá. Te ni cajñūhun yá de:

Ruhū, ¿ndé ĩn cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajñūhun yá de:

Te máá ró, ¿ndé ĩn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu nīhin ya jniñu nuū de jeē ma cáchi de jnūhun yáha núu ní ĩn ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéhnú jīn sūtū cácujuhnu jīn tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

²³ Yūcuán na te ni cahān yā jīn ndihi de:

Na-ni ñayuu núu cúní i condiquīn i ruhū, na cási i jeē cuní máá i, te na cóndiquīn i ruhū tāca quivī, te cuāha i jnūhun ndoho i jnūndóho jeē siquí rī, vēsú na cúu i. ²⁴ Chí núu ndé ñayuu cuní i cácu i nuū jnūndóho quiji nuū i jeē siquí ruhū, núu súcuan te

jnahnū ndetū i nń cání. Te núu ndé ñáyuu, vésú na cúū i jeē siquí ruhū, te cotecu i nń cání. ²⁵ ¿Chi ndé cuajníñu vésú na cúndeyí ñayuu nihīn i nń ñáyiví, te núu squívi i máá i nuū jnahnú ndetū i nń cání? ²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jín siquí jnúhun cáhán rī, suni súcuan cucanu rī jeē siquí máá i, quiví ndíji ri. Te quiví ún chi yōhyo luu cujéñu rī, nájñuhun cújéñu Tátá rī, te suni cácujeñu ndajéhé ndoo ya sáha ya. ²⁷ Te jendaá cahán rī jín ró jeē sava tēe cáhīn yáhá, ma cúū de chi nde cuni de jeē ndácu Yaā Dios jniñu jín poder yā. Achí yá.

*Jeē tucu ni nduu ya
(Mt. 17.1-8; Mr. 9.2-8)*

²⁸ Yūcuán na te nájñuhun nuū uná quiví jeē ni cáhán yā jñuhun yáha, te ni caa ya ñin yucu, cuacacān tahu yā. Te Pedro jín Jacobo jín Juan cuango de jín yá. ²⁹ Te níní jícán tahu yā, te tucu ni nduu nuū yā, te sahma ya ni nducujín quiyi, te ndíndēe. ³⁰ Yūcuán na te ni canecoo uū tēe, cándajnūhún de jín yá. Te cúu de Moisés jín Elías, tēe ni cahīyo jenahán. ³¹ Te luu ndíndēe de cáhīn de, te ni cacahán de jín yá siquí jeē ní cuyajni cuu yā ñuu Jerusalén. ³² Te Pedro jín tēe cáyūcu jín de, yōhyo cájiī de māhná, te vésú súcuan te tu ní cáquixī de. Te ni cajito de jeē lúu ndíndēe yá jín ndíndúú tēe cáhīn jín yá. ³³ Te nuū ní cacujiyo tēe

un núu yā, te ni cahán Pedro jín yá:

Maestro, nacā jeē váha jeē cáhīn ná yáha. Te na sáha ná únī vehe ramada, ñin cuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahán de. ³⁴ Te níní cáhán de súcuan, te ni quee vicō nūhun ní jesi nuū de jínáhan de. Te ni cayūhú de jeē cáhīn de chíji vicō ún. ³⁵ Te nuū vicó un ní cahán ñin jñuhun:

Yáha cúu Sēhe ri jeē maní ndasí rí jín. Te na cúni nahín ró jñuhun cáhán yā, achí.

³⁶ Te nuū ni jínu ni cahán jñuhun ún, te máá ñin na Jesús ín ya nuū de. Te máá de tu ní cácahán cuiti de, te tāca quiví ún tu ní cácachi de nuū ni ñin jeē súcuan ni cajito de.

*Jeē ní nasávāha ya ñin sūchi
ñuhun tachī ni
(Mt. 17.14-21; Mr. 9.14-29)*

³⁷ Te inga quiví un ní nanuu ya yucu jín de. Te cuehē ñayuu ni jejnahan i ya. ³⁸ Te mēñu ñáyuu cuehē un ní cana jee ñin tēe:

Maestro, jícán tahu na núu ni jēe condēhe ní sēhe yí ná, chí máñuhún i nuū ná. ³⁹ Te máni jeē sáha xeēn tachī jín i, te cána cóhó i sáha, te jéñi yíhí i, te jēe tiñū yuhu i. Te yōhyo stóho i, te yōhyo uhū siaá i. ⁴⁰ Te ni cahán ndahú ná jín tēe cácuáha jín ní jeē na quénehen te tachī ún, te tu ní cúu sáha de, achí de.

⁴¹ Te ni cahán yā jín de jínáhan de:

Ñayuu yōhyo nīhni ni cácuu ró, chí tu cácanđije ró jēē cuu nduvāha i. ¿Nasaa ga quivī condee rī jīn ró jeē cuándeyí ni rī jīn ró? Cuáquihin sēhe ró na quíji i, achí yá.

⁴² Te níní véji i nuū yā, te ni cotúú i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. ⁴³ Te ndivii ñayuu nahán ní canaa ni i cájito i jeē yóhyo jéhu jniñu sáha Yaā Dios.

Jeē ni cáhān tucu ya jeē cúu yā

(Mt. 17.22-23; Mr. 9.30-32)

Te níní cánaa ni i cájito i tācá jniñu ni sáha Jesús, te ni cahān yā jīn téē cáscuáha jīn yá:

⁴⁴ Chuhun vāha ni rō jnūhun cáhān rī yāhá, te ma náā ni rō, chí ruhū, Yaā ní nduu tēe, nastúu i ruhū quivī ri ndaha tāca téē xeēn, achí yá.

⁴⁵ Te tu ní cájecūhun ni de jnūhun cáhān yā, chí tu ní cúu cuiti jecūhun ni de. Te ni cayūhú de cajnūhún de ya siquī jnūhun ni cahān yā.

Ndé ñáyuu cúu jeē cujéhu ga

(Mt. 18.1-5; Mr. 9.33-37)

⁴⁶ Yūcuán na te tēē cáscuáha jīn yá ni caquejéē de cácahān de siquī núu ndé ñn de cújéhu ga. ⁴⁷ Te Jesús ni jini yā jeē súcuan cájeni ni de. Te ni jñi ya ndaha ñn sūchi lúlí, te ni jeni ya i xiin ya. ⁴⁸ Te ni cahān yā jīn de:

Na-ni ñayuu núu jeē siquí ruhū jetáhú i sūchi lúlí yáha, te

ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñu ró, máá i cújéhu ga, achí yá.

Ñayuu tu cáhān siquī yā, ñn i jīn yá

(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñn tēe jeē jīn síhví ní quénehen de tachī ini ñayuu. Te ni cajesi na jeē sáha de, chí tu jíca de jīn yó, achí de.

⁵⁰ Te ni cahān Jesús jīn de:

Ma cási rō jeē sáha de, chí tēe tu cáhān siquī yō, ñn de jīn yó, achí yá.

Jeē ni cáhān yā nuū Jacobo jīn Juan

⁵¹ Te ni cuyajni quivī jeē quínuhun yā andiví, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jīn jnūhun jeē jinú yā. Te cuango de ñn ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndóo ya, chí ni cajini i jeē ndé Jerusalén quihín yā. ⁵⁴ Te Jacobo jīn Juan, tēē cáscuáha jīn yá, ni cajini de jeē súcuan cúu, te ni cacahān de jīn yá:

¿A cúní ni jēē ndácu yó jniñu quiji ñuhūn nde andiví, nájnūhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. ⁵⁶ Chí ruhū, Yaā ní nduu tēe, tú vēji

ri jeē snāā rī ñayuu, chi sa suhva jeē jnāma rī ñayuu, achí yá.

Yūcuán na te cuahān yā jín de inga ñuu.

Siquī ñáyuu jeē cácu ni i condiquīn i ya

(Mt. 8.19-22)

⁵⁷ Te níni jīca ya ichi jín de, te ni cahān ñn tēe jín yá:

Condiquīn na níhín quihīn yō ndé-ni cúu-ni nuū quihín ni, achí de.

⁵⁸ Te ni cahān Jesús jín de:

Tāca ñūcuui, íyó yāu cava cáñuhun ti. Te suni saa, iyó tēcā tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jín inga de:

Condiquīn ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xihna gā. Yūcuán na te condiquīn na níhín, achí de.

⁶⁰ Te ni cahān Jesús jín de:

Stóo tāca ndíyi na chindūji jnāhan ndíyi, chi ndíyi cácuu ñayuu tu cácandíje. Te rōhó, cuáhán te nacani ró jnúhun ndese ndácu Yaā Dios jniñu, achí yá.

⁶¹ Yūcuán na te suni ni cahān inga de:

Cúni na condiquīn na níhín, te cuāha ní jnúhun jeē xihna gā quicahān na jín ñáyuu cáyūcú vehe ná, achí de.

⁶² Te ni cahān Jesús jín de:

Núu na-ni tēe quéjéé de condiquīn de ruhū, te núu máni jeē nacani cuihyá ni de siquī tāca jéé ni stóo de, núu súcuán te cúu de nájñuhun ñn

tēe jítu jín yátá, te jícó cóto de ichi vehe de. Te ma cuajníñu de condiquīn de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tēcá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tēcá ñuu jín táca lugar nuū jé yajni quihīn maá yá. ² Te ni cahān yā jín de:

Ñayuu yáha cácu i nájñuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuán te cacān tahu rō nuū maá Jítóho rō Yaā Dios jeē na tají yá cuehē tēe na quingoo de cahnde de trigo, cúu jeē nacani de jnúhun ya nuū ñáyuu. ³ Te cuángoo jínáhan ró, te na cástūhun rí nuū rō jeē tají rí rohó quingoo ró nájñuhun londe mēhñu yfhī.

⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajñuhun ró jín ni ñn. ⁵ Te na-ni vehe núu ni quívi ró, te xihna gā cahān rō: Na quíji jnúhun ndeyí jnúhun sñ ni nuū rohó, ñáyuu vehe yáha, achí rō. ⁶ Te núu vehe yúcuán íyó ñáyuu vāha, te jnúhun ndeyí ní cahān rō jinū siquī i. Te núu tuú, te jnúhun ndeyí ní cahān rō ma jinú siquī i. ⁷ Te suni vehe yúcuán coyūcu ró, te caji rō coho ró jéé cuáha ñayuu nuū rō. Chi siquī jniñu jeē nacani ró jnúhun nuū ñáyuu, te cánuú

coto i róhó. Ma quéndōo ró tijni vehe, chi ñn-ni vehe. ⁸ Te na-ni ñuu núu ni quivicoo ró, te núu cuatáhu i róhó, te caji rō tāca jēē cuáha i nuū rō. ⁹ Te nasávāha ró ñáyuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰ Te na-ni ñuu núu ni quivicoo ró, te núu tu ní cájetáhu i róhó, te quendacoo ró ini calle yūcuán, te cahān rō: ¹¹ Nde ticachā ñuu rō yāha jēē ni jnā jehē rī, na náscóyo ri jeē cúu seña jeē iyó cuéchi ró jēē tu ní cájetáhu ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuū. ¹² Te cáhán rī jín ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuēchi.

Jeē ní cuxeēn yā nuū sava ñuu nīhni ni
(Mt. 11.20-24)

¹³ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéhu jeē ni sáha ri ini ñuu maá ró, te yachī nacani ni ñáyuu ñuu un jēē stóo i cuēchi i núú. Te sáha i seña jeē steén jeē nácani ni i siquī cuéchi i, chi chun i sahma jnúú te chuhun i yaā xinī i núú. ¹⁴ Núu súcuan te quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. ¹⁵ Te róhó ñáyuu ñuu Capernaum, zá cájeni ni

rō jeē cujéhu ró nájnūhun ñn jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndíyi. Achí yá.

¹⁶ Te ni cahān gā yā jín tēe jeē tají yá quingoo:

Ñáyuu chusóhó jnúhun cahān rō, nuū maá rí chusóhó i. Te ñáyuu squéhichī rohó, suni ruhū squéhichī i. Te ñáyuu squéhichī ruhū, suni squéhichī i Yaā ní tají ruhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusī ni de te cácahān de jín Jesús:

Nde tachī cájetáhu núu na jēē jín síhví ní, chi quéndacoo ini ñáyuu, achi de.

¹⁸ Te ni cahān yā jín de:

Súcuan cúu, chi ni jito ri jeē nájnūhun ñn taja ni ningava Satanás ichi ándiví, chi ni quende rī ndíhi poder un. ¹⁹ Te vijna te je ni jēhe ri fuerza nuū rō jeē cueñū rō nájnūhun siquī tāca cóo jín tísuhma, te cundeyí ró siquī tāca fuerza maá jēē jito uhū yohó, te tú na vé sáha ga jín ró. ²⁰ Te ma cúsi ni rō maá-ni jeē cájetáhu táchī nuū rō, chi sa cusī gā ni rō jeē yosó síhví ró nde ándiví. Achí yá.

Jeē ní cusī ni Jesús

(Mt. 11.25-27; 13.16-17)

²¹ Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núu ni Tātā, Jitoho ándiví jín ñáyiví. Chi ni jesi ni táca jnúhun ndíchí ní, jeē ma cúni ñáyuu ndíchí

jiín ñáyuu tūhva cuenta ñayīvi yáha. Te ni steén ni núū ñáyuu cácuu nájñūhun sūchi lúli. Chi súcuan ni nujnahān ni ni Tátā, achí yá.

²² Te ni cahān gā yā:

Ndivii ni jēhe Tátā rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátā rī cúu jeē jiní yā ruhū. Ni tu cájini ñayuu ndese Yaā cúu máá Tátā, chi máá-ni Sēhe cúu jeē jiní. Te íyó ñáyuu jeē cuní máá Sēhe stéén yā nuū i ndese Yaā cúu Tátā yā, te máá i suni cuni i. Achí yá.

²³ Yūcuán na te jító ya nuū téé cáscuáha ún, te ni cahān yā jiín máá-ni de:

Yōhyo ndetū ñayuu cájito jniñū jéhu jeē cájito máá ró.

²⁴ Chi cáhān rī jiín ró jeē cuehē tēe ni canacani jñūhun Yaā Dios, jiín táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jñūhun ñn tēe vāha ni nación Samaria

²⁵ Yūcuán na te ñn tēe stéén tutu ley Yaā Dios, ni ndocuññi de ni jecahān de jiín Jesús, chi cuní de coto ndee de ya. Te ni cajñūhún de:

Maestro, ¿na vé sáha ná te ñihñ tahú na cotecu na ññ cáni andiví? áchí de.

²⁶ Te ni cahān yā jiín de:

¿Ndese yósó núū tútu ley? ¿Ndese cáhān cáhu ró? Achí yá.

²⁷ Te máá téé un ní cahān de jeē cahān nuū tútu:

Coo manī ndasí ró jiín máá Jítóho rō Yaā Dios, nde jnáā

ndasí ró sáha ró ndihí jeē cúsiñ ni yā, nde jiín ini jiín ánuá rō, jiín ññ fuerza rō, jiín ññ jéé nijnūní rō. Te cundáhú ni rō jnáhan ró nájñūhun cundáhú ni rō máá ró, achí. Achí de.

²⁸ Te ni cahān yā jiín de:

Vāha ni cahān rō. Te núu cuu sáha ró súcuan te ñihñ tahú rō cotecu rō ññ cáni, achí yá.

²⁹ Te máá téé un cuní de jeē quéndōo ndaā de nuū yā jiín jñūhun ni cajñūhún de, te ni cahān de:

¿Te ndé ñáyuu cácuu jnáhan ná? áchí de.

³⁰ Te ni cahān Jesús:

Ñn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuñhna núū de, te ni caquende ndihí ndajñiñū de, te nde sahma ñūhūn de. Te ni cacani ndevāha ún de jeē jé yajni cuu de núú. Te ni castóo ún de, te cuangoo. ³¹ Te ni cuu jeē íchi un yáha ñn sutū quihñ de, te ní jito de nuū téé ún, te ni síyo-ni de cuahān de. ³² Te suni súcuan ñn tēe grupo levita jeē cájeñiñū ini templo, vēji de ichi ún, te ni jito de nuū téé ún, te ni yāha jícá-ni de cuahān de. ³³ Te ñn tēe nación Samaria, suni vēji de ichi ún, te nuū ní jito de, te ni cundáhú ni de tēe ún. ³⁴ Te ni quee de nde nuū catú téé ún, te ni chuhun de aceite jiín vino nuū ni túji tēe ún, te ni jihni de sahma nuū. Te ni soó de tēe un síquī quiti de, te cuahān de jiín téé un ndé ñn mesón, te ni condito de. ³⁵ Te ñnga quiví ún, hora jeē quihñ de, te ni tava de uū xūhun cáa,

ni jēhe de nuū tēe chíi mesón. Te ni cahān de: Coto ní tēe yáha, te núu caxīn gā ni xúhun ní jíin de, te nuū nándicó ná te nachunaa ná núu ní, áchí de. ³⁶ Núu súcuan ¿te ndese jéni ni rō? Jeē ndinúni tēe ún, ¿ndé ñn de ni chihi cuenta jeē jnāhan de cúu tēe ni canecoo ñacuīhna núu? Achí yá jíin tēe stéén tutu ley.

³⁷ Te ni cahān de:

Tēe jeē ní cundáhú ni tēe ni tujī, vēsú tēe ñuu jicá cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihin tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña ya ni jehēn yā vehe ña. ³⁹ Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jnūhun cáhán yā. ⁴⁰ Te Marta chi cúnéé máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sáña núu jniñu? Te cahān ní jíin ña na chíndéé ñáhán ña sáña, achí ña.

⁴¹ Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. ⁴² Te íyó ñn-ni jniñu cánuú. Te María chi ní nacāji ña jniñu cánuú, suu jeē ndíhví ni ña siquī jnúhun Yāā

Dios, te ma quénehen yó ña nuū ún. Achí yá.

Jeē ni stéén yā ndese cacān tahú yō

(Mt. 6.9-15; 7.7-11)

11

¹ Te ñn quiṽí íne Jesús ñn lugar jicán tahú yā. Te nuū ní ndíhi ni jicān tahú yā, te ñn tēe scuáha jíin yá, ni cahān de:

Stéén ni núu ná ndese cacān tahú na jíjnāhan ná, nájnūhun ni steén Juan nuū tēe ni cascuáha jíin de, achí de.

² Te ni cahān yā jíin de:

Jeē cacán tahú rō, te suhva cahān rō:

Tátá maá ná jíjnāhan ná jéé ndeé ní andiví,
níní na cóo yíñúhún ná nuū ní,
chi Yāā íi cúu ní.

Te ñūhun ni na jéē yachī quiji quiṽí ndacu ní jniñu ní ñáyiví yáha.

Te na cóo tācá jniñu nújnahan ní ní,
nájnūhun íyó ini andiví,
súcuan na cóo ini ñáyiví.

³ Staā jeē cátecu na táca quiṽí, cuáha ní núu ná vijna.

⁴ Te cone cáhnu ní ní núu tāca cuéchi cása ha ná núu ní,
nájnūhun cáhine cáhnu ní na núu ñáyuu casáha cuéchi nuū ná.

Te ma cuáha ní jnúhun jeē coto ndee jexeén sáña, chi sa suhva jnama ní sáña nuū tāca jéé neé.

Achi rō jíjnāhan ró. Achí yá.

⁵ Te ni cahān gā yá:

Núu ndé ñn rōhó íyó ñn amigo rō, te núu quiñin rō vehe de sava ñuú te cahān

rō jín de: Amigo, cuāha núu unī staa nuū rī. ⁶ Chi ñn amigo rī jeē jíca de viaje, ni quee de vehe ri, te tú na vé névaha ri jeē cuáha ri caji de. Achí rō. ⁷ Te núu cahān tēe íne ini vehe: Ma stáhān rō ruhū, chí ndíhyú yehyí rí, te je cáquixī sēhe ri jín rí, te ma cúu ndonda ri jeē cuáha ri nuū rō, achí de. ⁸ Te cáhān rī jín ró, vēsú ma ndóna de cuāha de nuū rō siquī jeē cúu de amigo rō, te jeē yóhyo stáhān rō de, jeē yúcuan ndonda de cuāha de ndíhi jeē jíní ñúhún ró. ⁹ Núu súcuan te cáhān rī jín ró jijnáhan ró jeē suni súcuan cacān tahu rō nuū Yaā Dios, te cuāha ya nuū rō. Te nducú ró tāca jēe váha iyó núu yā, te nihīn rō sáha ya. Te cacān tahu rō nde nihīn rō, nájnūhun sáha ñayuu cahán yehyí ndé nune quīvi i. ¹⁰ Chi tāca ñayuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

¹¹ '¿Te ndé ñn ró cúu tátá, te núu sēhe ró jicán i staa nuū rō, te á cuáha ró ñn yuū nuū i? Te núu jicán i chācá, ¿te á cuáha ró ñn coō nuū i? ¹² Chí núu jicán i ñn ndivī, ¿te á cuáha ró ñn tisuhma nuū i? Tú cuīti súcuan. ¹³ Núu súcuan te máá ró jijnáhan ró, vēsú ñayuu iyó cuéchi cácuu ró, te cájini rō cuāha ró jēe váha nuū sēhe ró. Te nagā ni cuu máá Tátá rō andiví jēe ma cuáha ya Espíritu Santo nuū ñayuu jicán nuū yā. Achí yá.

Jeē ní cacahān de jeē jijníñu

ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuñíñn de ni sáha. Te nuū ní quenda tachī, te ni nacahān tēe ni cuñíñn un. Te ni canaa ni ñayuu cájito i. ¹⁵ Te sava ñayuu ún chí ni cacahān i:

Jín fuerza Satanás jeē kujénu nuū tachí, quénehen tēe yáha táca táchī ini ñayuu, achí i.

¹⁶ Te sava ga i cuní i coto ndee i ya, te ni cajicān i jeē sáha ya jeē coo ñn seña ichi ándiví. ¹⁷ Te máá yá jiní yā jeē súcuan cájeni ni i, te ni cahān yā:

Tācá nación jeē sasín máá te cuajnáhan máá, núu súcuan te snāa jeē iyó váha máá. Te núu ñayuu ñn vehe sásín máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásín máá jín jnáhan tachī, ¿te ndese cuiñi nihin jeē ndácu jniñu núu súcuan? Chi cacahān rō jeē jín fuerza Satanás quénehen ri tachī ini ñayuu. ¹⁹ Te núu súcuan cúu núu, te ñayuu cascuáha jín máá ró jijnáhan ró, ¿na jín fuerza cáquenehen máá i tachī, cájeni ni rō? Núu súcuan te máá i jijnáhan i cachí jeē ní castiví ndasí ró ni cacahān rō jeē cáquenehen ri tachī jín fuerza Satanás. ²⁰ Te tuú chí sa suhva jín fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jēe ndácu ya jniñu.

²¹ 'Te núu ñn tēe ndacuī, ndíto de vehe de jín nújí de,

núu súcuan te tú ni ñn nda-jniñu de ndoñhún. ²² Te núu quiji inga tēe ndacuī gā, te cundeyí jín tēe ún, núu súcuan te quende nují de jeē ndíto de vehe de, te sáha de ndese cúni maá de jín ndajniñu jeē quēnde de. Te nájñuhun tēe ndacuī gā ún, súcuan cúu maá rí nuū Satanás.

²³ Te ñayuu tu iyó mání jín rí, núu súcuan te jító uhū i ruhū. Te ñayuu tu nástútú jín rí, núu súcuan te sa jéte núu i ñayuu vējicoo nuū rí.

Tachī jeē nastútú jnáhan ndávi ini ñayuu
(Mt. 12.43-45)

²⁴ Núu ni quenda ñn tachī ini ñn tēe tu cándije, te jíca cuu nuū ñuhun téhé, ndúcú núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda rí. ²⁵ Te núu ni ndee tucu, te jító jeē tēe tu cándije un cúu de nájñuhun ñn vehe jeē ní ndundo. ²⁶ Yūcuán na te jéquihin uxā gā tachī xeén gā vēsú maá. Te quívicoo ini tēe un jéé cóyūcu yúcuan. Núu súcuan te xeén gā ndoho tēe un jéé sándihí vēsú jeē xihna ñuhún. Achí yá.

Yōhyo ndetū ñayuu cájini nahín jnúhun ya

²⁷ Te níni cáhán yā jñuhun yáha, te ñn ñahan íne mēhñu ñáyuu cuehē un, ní cahān jee ña jín yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cáscu i, áchí yá.

Jeē ní cajicān ñayuu tu cáccandije ñn jniñu jéhnú
(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni cása ha néé i. Te cájicān i ñn jniñu jéhnú jeē steén núu Yaā ní tají Yaā Dios cúu rí. Te tú na inga jniñu jéhnú steén rí nuū i, chí máa-ni jniñu jéhnú nájñuhun ni cuu jín Jonás, tēe ni nacani jñuhun Yaā Dios nde jenahán. ³⁰ Chí nájñuhun ni cajini ñayuu ñuu Nínive jeē ní cuu ñn jniñu jéhnú jín Jonás, suni súcuan cuni ñayuu tiempo yáha jeē coo ñn jniñu jéhnú jín rúhū, Yaā ní nduu tēe, jeē quijnáhan jín modo ni ndoho Jonás. ³¹ Te reina jeē ní cujéhnú nación ichi sur, natecu ña jín ñáyuu tiempo yáha, quiví juicio jeē sándaā yā cuēchi, te cahān ña cuēchi siquí i. Chí nde jíca téyí ní quiji ña ni jini nahín ña jñuhun ndíchí ní cahān rey Salomón. Te vijna chí cújéhnú ga ruhū, Yaā íne yáha vēsú Salomón, te tu cáccandije ró rúhū. ³² Te tāca ñáyuu ñuu Nínive nuū ní nacani Jonás jñuhun, natecu i jín ñáyuu tiempo yáha, quiví juicio jeē sándaā yā cuēchi, te cahān i cuēchi siquí ñáyuu yáha. Chí máa i ni canacani ni i ni castóo i cuēchi i quiví ní nacani Jonás jñuhun nuū i. Te vijna chí cújéhnú ga

ruhū, Yaā íne yāhá vēsú Jonás, te tu cá candije ró rúhū.

Jnūhun yátá síquī lámpara
(Mt. 5.15; 6.22-23)

33 'Núu nást'ín ñayuu ìn lámpara, tu chísāhí i, ni tu chúne i chíji ìn cajón. Chi sa suhva jéni i nuū sucún, návāha cundijin nuū ñayuu quívicoo vehe. 34 Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cundijin. Te núu tinūu ró tu íyó ndijin, te ní-ni yiqui cúñu rō iyó nee. 35 Te suni súcuan cúu ánuá rō, te coto ró jéē ma cáni néé ni rō, návāha tú coo nee ini anuá rō. 36 Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin vāha ini anuá rō, nájñūhun ìn lámpara jeē sáha jeē cundijin vāha. Achí yá.

Jeē ni cáhānyājeē iyó cuéchi de jijnáhan de
(Mt. 23.1-36; Mr. 12.38-40; Lc. 20.45-47)

37 Te nuū ní cuu ni cahān yā, te ìn tēe grupo fariseo ni cana de ya jeē caji yā staā vehe de. Te ni quívi ya, te ni cucōo ya mesa jeē caji yā staā. 38 Te tēe fariseo un náā ni de jito de jeē tu squícu ya costumbre jeē nandahá yá te caji yā staā. 39 Te ni cahān maá Jítoho yō jín de:

Róhó tēe fariseo jijnáhan ró, chi nájñūhun jeē cánacate ró yátā vaso jín yátā cohó cúu jeē nándahá ró. Te ichi íni rō chi ñūhun máni maá jnúhun cuihná jín jnúhun néé. 40 Tēe

cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? 41 Te jeē cájēhe ró caridad nuū ñayuu ndahú, na sáha ró síquī jeē cundahú ndije ni rō i. Te súcuan te coo ndaā anuá rō.

42 'Nacā xeēn ndoho róhó tēe fariseo, chi cásquícu ró tācá jniñu lúlí, te tu cásquícu ró jniñu cánuú. Chi cásáha ró úxí uxí nuhnī tamīnu jín ruda jín táca yucū, te cásocō rō ìn ìn síquī tāca úxí un núu Yaā Dios. Te tu cásáha cuiñi rō jniñu ndaā, ni tu cáhīyo manī rō jín Yaā Dios. Tāca jéē yáha cánuú sáha ró núú, te suni ma stóo ró jéē socó rō tāca yúcū ún.

43 'Nacā xeēn ndoho róhó tēe fariseo, chi máni cánujnahān ni rō cucōo ró núu silla yíñuhún gá ini vehe ìn sinagoga. Te cánujnahān ni rō jeē cahān yíñuhún ñayuu jín ró nuū calle.

44 'Te nacā xeēn ndoho róhó tēe cástéén tutu ley Yaā Dios, jín róhó tēe fariseo, chi tēe stáhú-ni cácuu ró. Chi cándāa ró nájñūhun yaū ndīyī jeē tú ndijin, chi cásnāā rō anuá ñayuu, te tu jíní i jeē súcuan cásáha ró jín i. Achí yá jín de.

45 Yūcuán na te ni cahān ìn tēe stéén tutu ley:

Maestro, jeē ni cáhān ni táca jnúhun yáha, suni nde síquī maá ná jijnáhan ná ní cahān ní, achí de jín yá.

46 Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō tāca ley ni catava maá ró jeē yí sáha, te tu cácuñdeyí ñayuu squícu i. Te

máá ró, chi ni ñn xinī ndáha ró tu cáscánda ró jeē squícu ró.

⁴⁷ 'Nacā xeēn ndoho ró jijnáhan ró. Chi cásáha ró vehe siquī nuū yíndūji ndīyi jíí rō, tēe ni canacani jnūhun Yaā Dios nde jenahán. Te suni tāca jíí rō ni cajehni de tēe ún.

⁴⁸ Te jeē casáha ró súcuan cúu jeē cáquijnáhan ró jíín de siquī jniñu ní casáha de. Chi máá de ni cajehni tēe ún, te máá ró cásáha ró vehe ndīyi ún.

⁴⁹ 'Jeē yúcuan nde jenahán ní cahān Yaā Dios ñn jnūhun ndíchi: Tají rí tāca tēe nacani jnūhun ri jíín tāca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰ Te súcuan te siquī ñáyuu tiempo yáha na cóndee cuēchi jeē ní cajehni jíí i tēe ni canacani jnūhun Yaā Dios, nde quivī ni jécōo ñayiví te nde vijna, ⁵¹ nde Abel xīhna gā te nde Zacarías, tēe ni cajehni de ini templo sava mēhñu cuarto ií jíín altar. Núu súcuan te cáhán rī jíín ró jeē siquī ñáyuu tiempo yáha condee tāca cuēchi ún.

⁵² 'Nacā xeēn ndoho róhó jeē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cácuni rō jecūhun ni rō, ni tu cájēhe ró jnūhun jeē jecūhun ni ñayuu cácuni. Achí yá.

⁵³ Te jeē ni cáhán yā jnūhun yáha, te tēe cástéén tutu ley Yaā Dios jíín tēe fariseo, yōhyo ni caquitī ni de nuū yā. Te ni caquejéé de cástíchí de ya siquī cuehē gā jnūhun.

⁵⁴ Chi yuhu-ni cánducú de núu

sanaa te stívi yá jnūhun cahān yā, návāha nihīn de cuēchi siquī yā.

Siquī jnūhun stáhú cácahān tēe fariseo

12

¹ Te níni súcuan cúu, te ni cacutútú cuéhē mil ñayuu, chi nde cájeñū i siquī jehé jnáhan i. Te xīhna gā ni quejéé yá cahán yā jíín tēe cáscuáha jíín yá:

Coto má candíje ró levadura tēe grupo fariseo, chi suu cúu jnūhun stáhú cácahān de. Chi jíté núu nuū ñáyuu, nájñūhun ndécava levadura nuū ñújen pan. ² Chi jnūhun stáhú un má quéndōo sáhi cuiti, chi ndíhi natūu ndijin, te cuni ñayuu. ³ Núu súcuan te suni máá ró, tāca jnūhun ni cacahān rō jeē tu ní jíni ñayuu, ñn quivī te cuni vāha i. Te tāca jnūhun ni cacahān sáhi ró jeē ndihyú yehyí, ñn quivī te cahān jee ñayuu yatā tāca vehe.

Jeē ní cachi yā ndé ñn cúu jeē yūhu yó

(Mt. 10.28-31)

⁴ Cáhán rī jíín ró jijnáhan ró, amigo: Ma yūhu ró coto ró ñáyuu cahni yiqui cúñu rō, chi núu ni cajehni i róhó, te tuá na vé cúu sáha ga i. ⁵ Te na cáchi rī nuū rō ndé ñn yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te iyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

6 "Te tãcã saa chi tú yahu ndéé tĩ, chi nde uhũn tĩ jeē uú centavo lulí. Te ni ñn ti tu náã ni Yaã Dios jeē tu ndító ya. 7 Te nagã ni cuu róhó jijnáhan ró, chi nde ndihĩ ixi xíní rō je ni cahu ya. Núu súcuan te ma yũhu ró jijnáhan ró, chi cánuú ndasí gá rō nuũ yã vēsú cuehē tãcã saa.

Ñayuu jejnúhún Jesucristo nuũ inga ñayuu

(Mt. 10.32-33; 12.32; 10.19-20)

8 "Te cáhãn rĩ jijn ró, tãca ñáyuu jeē cuajnúhún rúhũ nuũ inga ñayuu, suni súcuan ruhũ, Yaã ní nduu tēe, cuajnúhún rí i nuũ tãcã ndajéhé Yaã Dios. 9 Te tãca ñáyuu jeē ma cuajnúhún rúhũ nuũ inga ñayuu, suni súcuan ma cuajnúhún rí i nuũ tãcã ndajéhé Yaã Dios.

10 "Te núu ndé ñáyuu cahãn i siquĩ ruhũ, Yaã ní nduu tēe, cone cáhnu ni Yaã Dios nuũ i. Te núu ndé ñáyuu cahãn ndevãha i siquĩ Espĩritu Santo, ma cone cáhnu ni Yaã Dios nuũ i.

11 "Te núu cuandeca i róhó tãca vehe ñĩ sinagoga nuũ tēe cásãndaã cuēchi, jijn núu tēe cácuu tohō, te ma nãcãni ndasí ni rō ndese stió cuĩñĩ rō jnũhun nuũ de. 12 Chi máã hora un te Espĩritu Santo steén yã nuũ rō ndese cahãn rō. Achí yã.

Siquĩ jeē ma tēnuũ yō ndajniñũ cúcã

13 Yũcuán na te ñn tēe íne nuũ ñáyuu cuehē un ní cahãn de jijn Jesús:

Maestro, cahãn ni jijn ñãni na jēe na táhú sãva de tahũ na jijn de, áchĩ de.

14 Te ni cahãn yã jijn de:

¿Ndé ñn ni jeni ruhũ jeē ndacu ri jniñũ tahũ sãva tahũ rō? Achí yã.

15 Te ni cahãn gã yã:

Condito ró máã ró jijnáhan ró jēe ma ndíyo ni rō xũhun jijn táca gá. Chi vēsú cuehē ndasí ndajniñũ névãha ñn tēe, te nasũu jēe yúcuan sãha jeē quéndōo ndetũ de, áchĩ yã.

16 Yũcuán na te ni cahãn yã ñn jnũhun yátã jijn i:

Nĩ ñyo ñn tēe cúcã jeē névãha ñũhun jeē cúu vãha ndasí itu.

17 Te tēe cúcã un ní nacãni ni de: ¿Ndese sãha ri? Chi tuã ndé cahun niñĩ ri. Achí de. 18 Te ni jeni ni de: Suhva na sãha ri. Na cánu rĩ tãca yácã rĩ, te nasãha ri jeē náhnu ga. Te yũcuán chuvãha ndihĩ ri niñĩ ri jijn táca ndajniñũ ri.

19 Yũcuán na te cahãn rĩ jijn ánuã rĩ: Vijna te cuehē teyĩ névãha yó jēe canda cuehē cuiyã. Na ndétãtu yó te caji yō coho yó, te na cúsiĩ ni yō, ni jeni ni de. 20 Te ni cahãn Yaã Dios jijn de: Tēe cãnéé cúu ró. Chi jecuãã vijna cuu rō, te tãca jēe ní chuvãha ró, ¿ndé tēe cuu? Achí Yaã Dios jijn de.

21 Te súcuan ndoho tãca tēe jeē sacúcã de máã de, te tu ndúcú de jeē quéndōo ndetũ de sãha Yaã Dios. Achí yã.

Yaã Dios ndító ya yohó
(Mt. 6.25-34)

22 Te ni cahãn yã jijn tēe cáscuãha jijn yã:

Núu súcuan te cáhán rī jín ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun rō. ²³ Chi Yaā Dios ni sáha ya jeē técu rō jín yiqui cúñu rō, te nagā ni cuu jeē ma cuáha ya jeē caji rō jín jéē cúhun rō. ²⁴ Condēhe rō ndese cátecu quití cácuu nájnūhun calú, chi tu cátaji tí, ni tu cánastútú tí jeē chívāha tí, ni tú yacā tí. Te vēsú súcuan te máá Yaā Dios scáji yā tí. Te cánuú ndasí gá rō jijnáhan rō vēsú táca quití ún. ²⁵ ¿Te ndé ñn rō, á cuu scuéhnu rō máá rō sava metro gā, vēsú ña nácani ndasí ni rō? ²⁶ Te núu ma cúu sáha rō vēsú ñn jniñu lúlí súcuan, ¿te najehē cánacani ndasí ni rō siquī jeē caji rō jín jéē cuhun rō?

²⁷ 'Condēhe jijnáhan rō ndese jéé ita táca yúcū. Chi tu sájniñu, ni tu táu. Te cáhán rī jín rō jeē ni rey Salomón, quiví ní ñūhun de sahma váha ndasí, tu ní ñūhun de sahma lúu súcuan nájnūhun ita ún. ²⁸ Te núu súcuan jéhe Yaā Dios sahma lúu ita un jéé jéé vijna te sajnē cayū nuū ñuhún, te nagā ni cuu rōhó jijnáhan rō jéé ma sáha ya jeē nihín rō sahma. ¿Te naun tu cácandíje ñihin rō jéé ndító ya rohó? ²⁹ Núu súcuan te ma nácani cuíhyá ni rō ndese caji rō ndese coho rō. ³⁰ Chi táca ñáyuu ñayívi jéé tu cácandíje cúu jeē máni siquī jeē yáha cándihvī ni i. Te máá rō jijnáhan rō, chi íyó Tátá rō andiví, te jíní yā jeē cájini ñuhún rō táca jéé yáha. ³¹ Te sa

suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō táca jéé yáha.

Ndese coo cúca yó nde andiví
(Mt. 6.19-21)

³² 'Ma yūhu rō jijnáhan rō chi cácuu rō nájnūhun lanchi ri. Chi vēsú jecu-ni cácuu rō, te máá Tátá rō cúsi ni yā jeē quívicoo rō ñuu nuū ndácu ya jniñu. ³³ Xico rō jeē cánevāha rō, te cuáha rō xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chívāha rō xúhun ñni yjñi. Chi nde andiví te ma náá jeē váha coneváha rō. Chi yūcuan má quívi ñacuñhá, ni ma cúu stívi tíquixin. ³⁴ Chi nde nuū nihín rō tahū váha rō, yūcuan cúu nuū cóndihvī ni rō siquī.

Jeé na cóo tūhva yó jéé ndéé yā

³⁵ 'Coo tūhva rō jijnáhan rō jéé ndéé Jitoho rō, te coo rō nájnūhun mozo jeē nastán i lámpara i. ³⁶ Chi íyó tūhva i te cándetu i jeē ndéé patrón i jeē cuahán de vico nándaáha. Chi núu ni ndee de te cahán de, te nune-ni i yéhyí jijnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jín rō jeé máá patrón sátūhva de máá de, te scúcōo de i mesa te caní de cohō i. ³⁸ Te vēsú cucuéé de ndee de nde sava ñuú, chí jéé nēé gā, te núu cuni de jeé súcuan cándito mozo de, te yōhyo ndetū i jijnáhan i núu súcuan. ³⁹ Te na jécūhun

ni rō jeē cahán jnūhun yátá yáha: Tēe chíí vehe, núu ni jini de na hora quiiji ñacuīhná, te condito de, te ma cuáha de jnūhun jeē sacuíhná vehe de núu. ⁴⁰ Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

Jnūhun mozo vāha jíin mozo tu squícu

(Mt. 24.45-51)

⁴¹ Yūcuán na te Pedro ni ca-jnūhún de ya:

¿A jíin máá-ni ná jíjnáhan ná cáhan ni jnūhun yátá yáha, chí suni cáhan ni jíin ndihi ga ñayuu? achí de.

⁴² Te ni cahán máá Jítóho yō:

Cáhan rī jíin ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora. ⁴³ Te yōhyo ndetū mozo un jéē núu ni ndee patrón, te cuni de jeē súcuan squícu vāha i. ⁴⁴ Jendaá cahán rī jíin ró jeē cani de mozo un jéē coto i ndihi ndajníñu de. ⁴⁵ Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnáhan mozo i, te caji i coho i te najjini i, ⁴⁶ núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squívī de i ndoho i jíin ñayuu tu cásquícu.

⁴⁷ Te mozo jeē jiní i ndese nújnahan ni patrón i, te núu tu sátūhva i ni tu squícu i jeē

cuní de, ndoho xeēn i jíin yu-jnu xíi. ⁴⁸ Te mozo jeē tu jíin i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chí ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjniñu ya i, suni cuehē gā nandacān yā nuū i.

Jeē siquí Jesús te cusín ini ñayuu

(Mt. 10.34-36)

⁴⁹ Ni quee rī jeē nájnūhun jeē scuíquín rī ñuhūn ini ñayívī, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quívīcoo ñayuu ndaha Yaā Dios. ⁵⁰ Te íyó iin jnūndóho cánuú ndoho ri, te cúcuíhyá ndasí ni rī chí nde jīnu ndoho ri, te ndusī ni rī. ⁵¹ ¿A cájeni ni rō jeē véji ri jeē cóyūcu mánī ñayuu ñayívī? Cáhan rī jíin ró jeē tuú, chí sa suhva jeē cusín ini ñayuu jeē siquí ruhū. ⁵² Chí nde vijna te quejéé jéē uhūn ñayuu iin vehe, sásín máá jíjnáhan, unī siquí uú, te uū siquí uní. ⁵³ Chí tátá cusín ini jíin séhe yíí, te séhe yíí jíin tátá, te náná jíin séhe síhí, te séhe síhí jíin náná, te náná chíso jíin séhe jēnú, te séhe jēnu jíin náná chíso. Achí yá.

Jeē ni cahán yā siquí seña andiví

(Mt. 16.1-4; Mr. 8.11-13)

⁵⁴ Te suni ni cahán yā jíin ñayuu cuehē ún:

Núu cájito ró jeē náne vicō ichi núu cáne niāndii, te

cácahān rō jeē cuun saū, te súcuan cúu. ⁵⁵ Te núu quée tachī vēji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chi cájecūhun ni rō ndese stéén seña andiví jíin ini ñayīví, ¿te naun tu cájecūhun ni rō ndé ñin cúu ruhū jeē sáha ri tǎcá jniñu jéhnu tiempo yáha?

Jeē cóndihvī ni yō jeē ma cóndee cuēchi siquī yō
(Mt. 5.25-26)

⁵⁷ ¿Te najehē tu cánacani ni maá ró ndé ñin cúu jniñu ndaā sáha ró? ⁵⁸ Te núu ñin ñayuu quihīn i jíin ró nuū tohó jeē cacán i cuēchi siquī rō, núu súcuan te níni cuáhān rō jíin i ichi te condihvī ni rō sándaā rō jíin i. Chi núu tuú, te squívī i róhó núu juez, te juez siáha de róhó núu policía, te policía chune de róhó vecāa. ⁵⁹ Te jendaá cahán rī jíin ró jeē ma quénda cuiti rō yūcuán chi nde chunaa rō ndihī cuiti xūhun cájicān de. Te suni súcuan condihvī ni rō cahān ndahú ró jíin Yaā Dios, návāha ma ndácunehen ya cuēchi siquī rō. Achí yá jíin de.

Jeē cánuu nacani ni yō jeē stóo yó cuēchi yó

13

¹ Te ñin quivī yúcuán ní quecoo jecu tēe, ni canacani de jñūhun nuū yā ndese ni candoho jecu tēe Galilea. Chi ná cájehni de quitī jeē socó de, te ni quecoo mozo Pilato ni cajehni tēe ún. ² Te ni cahān Jesús:

Tēe Galilea un, ¿á cájeni ni rō jeē súcuan ni candoho

de siquī jeē xeēn gā ni īyo cuēchi de vēsú tǎca gá ñayuu Galilea? ³ Cáhān rī jíin ró jeē tuú. Te róhó jíjnáhan ró suni jnahnū ndetū rō núu tú nacani ni rō jeē stóo ró cuēchi ró. ⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tǎca gá ñayuu ñuu Jerusalén? ⁵ Cáhān rī jíin ró jeē tuú. Te máá ró jíjnáhan ró, suni jnahnū ndetū rō núu tú nacani ni rō jeē stóo ró cuēchi ró.

Jñūhun yátá núndēhe higo

⁶ Yūcuán na te ni cahān yā jñūhun yátá yáha jéē steén yā ndese cácuu ñayuu tu squícu jñūhun Yaā Dios:

Cácuu i nájñūhun ñin nundēhe higo jeē ín nuū ñúhun ñin tēe. Te ni jecondēhé de núu ín ndehē xinī, te tú na vé ín. ⁷ Te ni cahān de jíin mozo sájñiñu nuū ñúhun de: Vijna te je íyó únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chí máá jéē sajnēñu nuū ñúhun, áchí de. ⁸ Te ni cahān mozo un jíin de: Stóo ní na cuíñi ñin na cuiyā, te na nástáyā ná jéhē te chuhun ná jéhen. ⁹ Te na cóndēhe yó núu tú cuun ndehē inga cuiyā. Te núu tuú, te tahndē, achí mozo. Achí yá.

Jeē ní nasávāha ya ñin ñahan quivī ndétátú

¹⁰ Te ñin quivī ndétátú te stéén Jesús jñūhun ini vehe ñi sinagoga. ¹¹ Te íyó ñin ñahan

jeē ní cuu xahūn unī cuiyā cuhú ña. Chi ñn tachī ni sāha jeē jīca tīhí ña, te tuá cúu cuiṭi caca jnuu ña. ¹² Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jēe cuhú ni.

¹³ Te ni soó yá ndaha ya síquī ña, te ni nucuñī jnuu-ni ña, te ni nacuatáhú ña nuū Yaā Dios. ¹⁴ Te tēe cújéhu ini vehe īi sinagoga, ni quiṭi ni de nuū Jesús jeē ní nasāvāha ya ñahan un quívī ndétātú. Te ni cahān de jíin ñáyuu:

Iñū quívī iyó jēe sájniñu yó, te tāca quívī ún quiṭicoo ró nduvāha ró. Te quívī ndétātú chi ma cúu, áchí yá.

¹⁵ Yūcuán na te ni cahān maá Jítoho yó jíin de:

Tēe stáhú-ni cácuu ró. Quiṭi ndétātu ¿á tu cándají ró stiquī rō burro ró jēe quíscóho ró tí ndute? ¹⁶ Te ñahan yáha jēe cúu ña ñn sēhe yucūn Abraham, chi nájnūhun ni conuhnī ña xahūn unī cuiyā ni sāha Satanás. ¿Te á tu iyó váha jeē nájnūhun nandají rí ña nuū cuehyī ndóho ña quívī ndétātú? Achí yá.

¹⁷ Te jeē ni cahān yā súcuan, te tāca tēe cájito uhū de ya, ni cacucanu de. Te ndihí ñayuu ún chi ni cacusiñi ni i jito i tācá jniñu jéhu sāha ya.

Jnūhun yátá síquī ndiquin mostaza

(Mt. 13.31-32; Mr. 4.30-32)

¹⁸ Te ni cahān yā:

Na cáhán rī ñn jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē

i nájnūhun jéhu ñn ndiquin mostaza jeē jéquin ñn tēe nuū ñūhun de, te ndúu nájnūhun ñn yujnu. Te cúu cáhnu, te tācá saa chi cásáha ti tacā ti chíji ndaha ún. Achí yá.

Jnūhun yátá síquī levadura
(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájnūhun levadura jeē ní quihin ñn ñahan, te ni saca ña jíin únī kilo harina, te ni ndaa ndihí ñujen ni sāha. Achí yá.

Siquī jeē quívi yó yéhyí túū
(Mt. 7.13-14, 21-23)

²² Te jīca Jesús jeē cuahán yā ichi ñūū Jerusalén, te yáha ya tācá ñuu náhnu jíin ñuu lulí, te stéen yā jnūhun. ²³ Te ñn ñayuu ni cajnūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condiñvī ni rō quívicoo ró ndaha Yaā Dios. Chi cúu nájnūhun ñn yéhyí túū. Te cáhán rī jíin ró jeē ñn quívī te cuehē ñayuu nducú i quívicoo i, te ma cúu ga. ²⁵ Te quívī ún te sāha rī nájnūhun ñn tēe chíi vehe jeē ndocuñī de te nacasi de yéhyí. Te ichi yátá véhe cuiñi ró jíinánhan ró, te scáján ró yéhyí, te cahān rō: Nune ní yéhyí na quívicoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayeji ná ni cajihí ná jíin ní, te ini calle ñuu na ní steén ni jnūhun, achi rō. ²⁷ Te cahān

maá de: Cáhán rī jín ró jeē tu jín rī rohó ndé chi véjicoo ró. Cujiyo quingoo ró, chi ñayuu casáha jniñu néé cácuu ró. Achi de. ²⁸ Te quivicoo ró núu ndahyú rō, te nacayihí yuhu ró jéē ndoho xeēn rō. Te coto ró núu Abraham jín Isaac jín Jacob jín ndihi tēe ni canacani jñuhun Yaā Dios, cáyucú de ñuu nuū ndácu ya jniñu. Te rōhó, vēsú cácuu ró yúcūn de, te quivicoo ró núu ndoho ró. ²⁹ Te cuehē ñayuu, vēsú tu cácuu i yucūn de, te quijicoo i ichi núu cáne niāndii jín ichi núu quée niāndii, ichi norte jín ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandihí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandihí. Achí yá.

Jeē ní cucuíhyá ni yā siquī ñáyuu ñuu Jerusalén
(Mt. 23.37-39)

³¹ Te máá quivī un ní quecoo jecu tēe fariseo, te ni cacahān de jín yá:

Cujiyo ní quihīn ní inga lado, chi cúní Herodes cahni de nihín, áchí de.

³² Te ni cahān yā:

Cuángoo te castūhun ró nuū tēe mañoso un jéē ná tu jinū quivī cuu rī, chi vijna jín sájnē quenehen ri tachī ini ñayuu, te nasávāha ri ñayuu cácuu. Te isá te jīnu jniñu sáha ri, achi rō. ³³ Chi cánuú jéē cáca ri quihīn rī vijna jín sájnē jín isá, te jinū rī Jerusalén. Chi tēe cánacani

jñuhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

³⁴ Rōhó ñuu Jerusalén, jéhni rō tēe cánacani jñuhun Yaā Dios, te jéhe ró yúu xinī tēe tájí Yaā Dios véjicoo nuū rō. Te cuehē jínu ni cuni rī nastútú rí sēhe ró, nájnūhun ndují jéē nastútú tí sēhe ti chīji ndijēn tī, te tu ní cúní rō. ³⁵ Núu súcuan te vijna te stóo uun na ri rohó jín sēhe ró. Te cáhán rī jín ró jéē ndé vijna te ma cóto cuiti gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā véndiji jín jniñu máá Jítoho yō Yaā Dios, achi i. Achí yá.

Jeē ní nasávāha ya ñn tēe cūhú cuehyī cuiñi

14

¹ Te ñn quivī ndétātu ní jehēn yā vehe ñn tēe fariseo cujéhnu, ni jecaji yā staā jín de. Te tāca gá tēe fariseo cájito yuhu de ya núu stívī yá. ² Te yúcuan íne ñn tēe cūhú de cuehyī cuiñi, índichi de nuū yā. ³ Te ni cajñuhun yá tēe cástéén tutu ley Yaā Dios jín táca tēe fariseo:

¿A iyó ley jeē nasávāha ri ñayuu cácuu quivī ndétātu, chí tuú? áchí yá.

⁴ Te máá de tu ní cácahān cuiti de. Te ni jñi ya tēe cūhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jín de jínáhan de:

¿Ndé ñn rōhó núu burro ró chí stíquī rō ñingava tī ini pozo, te á tu yachī natava rō

tī vēsú quivī ndétātu cúu, chí naún? Achí yá.

⁶ Te tu ní cúu stió cuiñí de ni ìn jnūhun nuū yā jeē súcuan ni cahān yā.

Jnūhun siquī ñayuu jéngoo vico

⁷ Te ni jito Jesús jeē tée ni cataca ún, cánacāji de silla yíñúhún gá nuū mesa cucōo de. Te ni cahān yā jnūhun yáha jíin de:

⁸ Núu ìn tēe cana de jeē quihín rō ìn vico nándāha, te ma cucōo ró lugar nuū yíñúhún gá. Chí núu súcuan te sanaa te je ni cana de ìn tēe cújéhnu ga vēsú rohó.

⁹ Te quee tēe ni cana rōhó, te cahān de jíin ró: Ndonga, te na cucōo tēe yáha jíinā. Yūcuán na te cucanu rō jeē quihín rō cucōo ró ndé sandihí na.

¹⁰ Chí sa suhva núu ni cana ìn tēe rōhó, te cucōo ró ndé lugar sandihí na. Te núu quee tēe ni cana rōhó, te cahān de jíin ró: Amigo, nehen cucōo ró ìn lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajeñnu de rōhó. ¹¹ Súcuan ni cahān rī jnūhun yáha návāha cuni rō jeē tāca ñayuu jeē sajeñnu i máá i, nuu i sáha Yaā Dios. Te ñayuu jeē snūū i máá i, ndujéñnu i sáha ya. Achí yá.

¹² Te suni ni cahān yā jíin tēe ni cana ya yéji yā staā:

Núu sáha ró ìn vico cúsámá chí jeē cuxíni, te ma cána ró ñayuu cácuu amigo rō, jíin ñani rō, jíin jnāhan ró, jíin ñayuu cucá. Chí núu súcuan te suni máá i nacana i rōhó, te súcuan nanihīn rō jeē ni jéhe

ró. ¹³ Chí sa suhva núu sáha ró vico, te cana ró ñayuu ndahú, ñayuu cuhndú, ñayuu chacuá, jíin ñayuu cuaá. ¹⁴ Te súcuan te quendōo ndetū rō, chí ma cúu nacuāha i nuū rō. Te nihīn rō tahū rō quivī nátecu ñayuu ndaā, achí yá.

Jnūhun yátá síquī vico cúxíni

¹⁵ Te ìn tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

¹⁶ Yūcuán na te ni cahān Jesús ìn jnūhun yátá jēe steén yā jeē cána Yaā Dios ñayuu quivicoo i ñuu nuū ndácu ya jniñu:

Ìn tēe ni sáha de ìn vico cáhnu cuxíni, te ni tají de mozo ni cana cuehē ñayuu.

¹⁷ Te máá quivī cuxíni, te ni tají de mozo de cuacana ñayuu jeē quíjicoo caji staā: Nehen ní jíjnāhan ní, chí je íyó túhva ndihí, achí mozo.

¹⁸ Te ndihí i ni cacahān i jeē na cóne cáhnu ni de chí ma quíngoo i. Ìn tēe ni cahān de: Sáá ní jeen rī ìn ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen rī uhūn yunta stiquī, te quihīn rī coto ndee rī tī, te na cóne cáhnu ni de nuū rī chí ma jeé rī, achí de.

²⁰ Te inga de ni cahān de: Sáá ní quijnāhan rī, te jeē yúcuán ma cúu jeé rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñayuu.

Yūcuán na te ni quitī ni patrón, te ni cahān de jín mozo de: Yachī quihīn rō tāca calle nāhnu jín calle lulí, te cana rō ñáyuu ndahú, ñáyuu cuhndú, ñáyuu chacuá, jín ñáyuu cuaá, na quíjicoo i vico, áchí de. ²² Te ni jehēn mozo, te ni ndee de, te ni cahān de jín patrón de: Je ni sáha ná jēē ni cáhān ní, te cúmanī gā ñáyuu te chitú vehe ní, áchí de. ²³ Te ni cahān tucu patrón: Quihīn tucu rō táca calle jín ichi, te cana fuerza rō ñáyuu na quíjicoo i, návāha chitú vehe rí. ²⁴ Chi cáhān rī jín rō jeē ní ñn tēe ni cana rí xīhna ñūhún, ma cuáha cuiti rī jnūhun jeē cuxíni de vehe rí, achí de. Achí yá.

Jnūhun jeē cánuú nacani vāha ni yō te condiquīn yō Cristo

²⁵ Te cuehē ndasí ñáyuu cándiquīn i Jesús cuango i jín yá, te ni ndió cóto ya nuū i, te ni cahān yā jín i:

²⁶ Núu na-ni ñáyuu cuní condiquīn ruhū, te núu manī gā i jín tátá i, náná i, ñasihí i, sēhe i, ñani i, cuáha i, vēsú jín rúhū, ma cúu cuu i ñáyuu scuáha jín rí. Te núu ndíhví gā ni i síquī jeē cóo vāha máá i vēsú jeē cóndiquīn i ruhū, te suni ma cúu tucu. ²⁷ Te na-ni ñáyuu núu tu jéhe i jnūhun ndoho i jnūndóho vēsú nde cuu i jeē síquí jeē cóndiquīn i ruhū, te ma cúu cuu i ñáyuu scuáha jín rí. ²⁸ Chi núu ndé ñn rō cúní rō sáha rō ñn vehe cáhnu, ¿á tu cánuú jēē xīhna gā cucōo rō te tava rō cuenta núu canda xūhun jēē sínu rō? ²⁹ Chi núu tuú, te núu je

ni jequin rō cimientu, te tu cánda xūhun rō sínu rō, yūcuán na te tāca ñáyuu sácatā i coto i rōhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achí i. ³¹ Te suni súcuan núu ñn rey quihīn de cuajnáhan de jín inga rey jeē véji síquī de, ¿á tu cánuú jēē xīhna gā cucōo de te nacani ni de núu canda uxī mil soldado jeē cuajnáhan de jín inga rey jeē véji síquī de jín ócō mil soldado? ³² Chi núu tú canda de, te níní jícá gá véji inga rey, te tají de tēe cándiso jníñu, cajnūhún de na vé cuní inga rey jeē cuáha de nuū, te jecuiñi-ni. ³³ Te máá rō jijnáhan rō, suni súcuan cánuú jēē xīhna gā nacani ni rō cahnde ni rō stóo rō ndíhi jeē névāha rō, chí núu tuú te ma cúu cuu rō ñáyuu scuáha jín rí.

Jnūhun yátá síquī ññ
(Mt. 5.13; Mr. 9.50)

³⁴ Te ñáyuu cácandíje cácuu i nájñūhun ññ. Vāha íyó ññ, te núu ññ ún na náā jeē uhvuá, ¿te ndese nduu uhvuā tucu? ³⁵ Tuá cuajníñu cuiti, ni jeē chúhun ñáyuu nuū itu, ni jeē ndúu jēhen, chí máá cate ññ-ni i. Tāca rōhó jēē jíní sōho, na chúsóhó rō. Achí yá.

Jnūhun yátá síquī lanchi ní sana
(Mt. 18.10-14)

15

¹ Te tāca tēe cástútú xūhun renta jín táca gā tēe casáha cuēchi, ni quecoo de nuū Jesús jeē cuní sōho de jnūhun cáhān yā. ² Te tāca tēe grupo

fariseo jíin tée cástéén tutuley Yaā Dios, ni cacahān de síquī yā:

Tēe yáha jétáhú de tāca tée cásáha cuēchi te yéji de jíin, áchí de.

³ Te ni cahān yā jnūhun yátá yáha jíin de:

⁴ ¿Ndé ĩn ró núu névāha ró ĩn ciento lanchi, te núu scuíta ró ĩn tī, te á tu stóo ró cúun xico xahūn cuūn gā tī yucu, te quinanducú ró quitī ní sana ún ndé nanihīn rō tī? ⁵ Te núu ni nanihīn rō tī, te coso sūcun ró tī, te cusī ĩn rō. ⁶ Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān rō jíin i: Na cúsi ĩn yō, chí ni nanihīn rī lanchi ri jeē ní sana. Achí rō. ⁷ Te cáhán rī jíin ró jeē suni sūcuan cúu nde andiví. Chí cúsi gā ni yā jíin ĩn ñáyuu iyó cuéchi núu nacani ni i jeē stóo i cuēchi i, vēsú jíin cúun xico xahūn cuūn ñáyuu iyó ndáa jeē tuá jíni ñúhún nacani ni i.

Jnūhun yátá síquī ñahan ní scuíta xūhún

⁸ Te núu ĩn ñahan névāha ña uxī peso cāa, te núu scuíta ña ĩn, ¿á tu nastūn ña lámpara te nastáa ña vehe, te nanducú yúcún ña nde nanihīn ña? ⁹ Te núu ni nanihīn ña, te nastútú ña tācá amiga ña jíin ñáyuu yúcu yajni jíin ña, te cahān ña jíin i: Na cúsi ĩn yō, chí ni nanihīn rī xūhun jéē ní scuíta ri. Achí ña. ¹⁰ Te cáhán rī jíin ró jeē suni sūcuan cúsi ĩn tācá ndajéhé Yaā Dios síquī ĩn ñáyuu iyó cuéchi núu nacani ni i jeē stóo i cuēchi i. Achí yá.

Jnūhun yátá síquī sūchi ní jéhēn jecó

¹¹ Te ni cahān gā yā:

ĩn tēe ni ĩyo uū sēhe yí de. ¹² Te tēe suchí gá ni cahān i jíin tátá i: Tátá, tahú sáva ní ndajníñu ní, te cuāha ní sava cuu tahū ná, áchí i. Te ni tahú sáva de tahū ndíndúú i. ¹³ Te ni cuu jecu-ni quiví, te tēe suchí gá un ní stutú ndíhi i ndajníñu i. Te ni quenda i cuahān i ĩn ñuu jicá. Te yūcuan ní snáa i tahū i, chí ni jexīn cáhá i. ¹⁴ Te ná ni ndíhi ni jexīn i, te ni quee ĩn jnamā xeén ini ñuu ún, te ni quejéé cúmanī jeē cáji i. ¹⁵ Yūcuán na te cuanducú jníñu i nuū ĩn tēe ñuu ún. Te ni tají de i cuahān i rancho de jeē cóto i quinī de. ¹⁶ Te cúní i caji i vēsú soō ndúchi jeē cáyeji quinī ún, návāha ndutú chíji i. Te ni ĩn ñáyuu tú na vé jéhe nuū i. ¹⁷ Yūcuán na te ni quejéé i nácani ni i: Tāca mozo casájniñu vehe tátá rī, iyó cuéhē staā cáyeji i. Te ruhū chí jíi rī sōco yāhá. ¹⁸ Na quínuhun rī nuū tátá rī, te cahān rī jíin de: Tátá, ni sáha ná cuéchi nuū Yaā Dios jíin núu maá ní. ¹⁹ Vijna te nasūu gá tēe vāha cúu ná jéē cónaní ná sēhe ní. Te cuāha ní jnúhun cuu ná nájñūhun ĩn mozo ni, achí rī. ²⁰ Yūcuán na te ni naquihīn i ichi cuanuhun i vehe tátá i.

Te níni jicá gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²¹ Yūcuán na te ni cahān i jíin de: Tátá, ni sáha ná cuéchi nuū Yaā Dios

jiín núū maá ní. Vijna te nasūu gá tēe vāha cúu ná jéē cónaní ná sēhe ní. Achí i. ²² Te máá tátá i chi sa ni cahān de jiín táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jēhē i. ²³ Te quiquihin ró becerro xēhen, te cahni rō tī na caji yō, chi sáha yó vico. ²⁴ Chi sēhe yí rí yáha, nájnūhun je ni jihī i, te ni natecu i. Chi tu ní jíní rī ndé chi ní jéhēn i, te ni ndee i, áchí de. Te ni caquejéé de cásáha de vico.

²⁵ Te sūchi jévāha, íne i nde rancho, te vēndiji i, te ni cuyajni i yatā véhe. Te ni jini i jeē cúu yaa te cájita jéhé ñáyuu. ²⁶ Te ni cana i ñn mozo, te ni cajnūhún i na vé cúu jeē cúu. ²⁷ Te ni cachi mozo un núū i: Ni ndee ñani rō, te tátá rō ni jehni de becerro xēhen, chi ni ndee vāha i nuū de, áchí mozo. ²⁸ Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jiín i jeē na ndívi i. ²⁹ Te ni cahān i jiín tátá i: Níní sáha ná jniñu ndácu ní, te tu cúnīhni cuiṭi ni na núū ní. Te tu jéhe ní vēsú ñn lítú núū ná, jeē sáha ná vico caji na jiín táca amigo na. ³⁰ Te ni ndee sēhe ní yáha jeē ni jéxīn cāhá i xūhun ní jiín táca ñahan. Te ni jehni ní becerro xēhen caji i, áchí i jiín tátá i. ³¹ Yūcuán na te ni cahān de jiín i: Séhē, róhó chi níní ndéé ró jiín rí, te ndihi jeē névāha ri chi suni cuenta maá ró cúu. ³² Te vijna chi íyó váha jeē sáha yó vico te cusñi yō. Chi ñani rō yāhá, nájnūhun

ni jihī i, te ni natecu i. Chi tu ní jíní yō ndé chi ní jéhēn i, te ni ndee i, áchí de. Achí yá.

Jnūhun yátá siquī mozo jeē ni stáhú de patrón de

16

¹ Te suni ni cahān Jesús jiín tēe cáscuáha jiín yá:

Ñn tēe cúca ní íyo ñn mozo de jeē ndíso jniñu nuū táca gá mozo. Te ni cacahān jiín patrón un jéē mozo un snáā cāhá ndajniñu de. ² Te ni cana de mozo un, te ni cahān de jiín: ¿Na jnūhun cúu yāha jéē nihín rī siquī rō? Nacuāha cuenta jniñu ndíso ró, chi ma cóndiso jniñu ga rō nuū mozo rī. Achí de. ³ Yūcuán na te jéni ni maá de: ¿Ndesé sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chi cúcanu rī. ⁴ Núu súcuan te jíní rī ñn jeē sáha ri, návāha ñayuu cájeen nuū patrón rī, cuāha i vehe condee rī núu na quée quivī jeē quenehen de jniñu ri. ⁵ Te ni cana de ná ñn ná ñn tēe jeē cátaū nuū patrón de. Te ni cajnūhún de ñn: ¿Nasaa táu rō nuū patrón rī? ⁶ Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró inga lista jeē uú xico uxī na, achí de. ⁷ Yūcuán na te ni cajnūhún de inga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jiín tēe ún: Yāhá na cuáha ri lista rō, te na sáha ró inga lista jeē cuún

xico na, áchí de. ⁸ Yūcuán na te patrón ni cahān de: Nacā jeē ndichí ní sáha tēe cúnéé un, áchí de. Te cáhán rī jín ró jeē ñáyuu ñayīvi yáha, ndichí gá casáha i jeē quendōo vāha i nuū jnáhan i, vēsú ñayuu cá candíje nuū Yaā Dios.

⁹ Núu súcuan te cáhán rī jín ró jeē ndichí gá na sáha ró vēsú jeē ni sáha mozo ndichí un. Chi ini ñayīvi yáha nuū yíhi cuēchi, na sáha ró jniñu vāha jín xúhun ró, cuāha ró núu ñáyuu ndahú, návāha vēsú núu ni ndihi xúhun ró ñayīvi yáha, te quīvicoo ró andiví núu coo vehe ró ní cáni.

¹⁰ Tēe jeē squícu vāha jín ñn jniñu lúli-ni, suni squícu vāha de jín jniñu cáhnu. Te tēe jeē stahú jín ñn jniñu lúli-ni, suni stáhú de jín jniñu cáhnu. ¹¹ Núu súcuan te núu tu squícu vāha ró jín xúhun jeē iyó ñayīvi yáha nuū yíhi cuēchi, te ma cuáha ya jeē vāha cuu ró ní cáni andiví. ¹² Te núu tu squícu vāha ró jín ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró ní cáni.

¹³ Ni ñn mozo ma cúu cua-jniñu de nuū uū patrón. Chi quitī ni de nuū ñn te coo manī de jín inga, chí squícu vāha de nuū ñn te sájéé ni de nuū inga. Te suni súcuan ma cúu cuajniñu ró núu Yaā Dios te núu máni siquī xúhun ndíhví ni rō, achí yá.

¹⁴ Te tēe fariseo ni casácatā de nuū yā jeē ní cajini de tāca jnūhun cáhán yā, chí tēe cútóo xúhun cácuu de. ¹⁵ Te ni cahān yā jín de:

Máá ró casáha ró jēe tēe ndaā cácuu ró núu ñáyuu. Te Yaā Dios chí jíní yā ndese cáa ini anuá rō. Chí jniñu cájeni ni ñayuu jeē jniñu jéhnu cúu, te nuū Yaā Dios chí jniñu néé cúu.

Siquī ley Yaā Dios jín siquī jeē ndácu ya jniñu

¹⁶ Nde ná tu quiji Juan tēe scuándute, te ni iyo ley jeē ni jéhe Yaā Dios nuū Moisés, te suni ni castéén tāca tēe cánacani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñáyuu nducú ndéyí i quívicoo i ndaha ya.

¹⁷ Te yí gá cúu jeē náa ñn letra nuū tútu ley yā vēsú jeē náa andiví jín ñayīvi, chí squícu ndihi jnūhun cáhán.

Siquī jeē ma stóo jnáhan tēe jín ñahan

(Mt. 19.1-12; Mr. 10.1-12)

¹⁸ Núu ñn tēe stóo de ñasihí de te quijnáhan de jín inga ñahan, núu súcuan te cásiquí ndéé de ña. Te núu ñn tēe condeca de ñahan ní ndusñn, suni cásiquí ndéé de ña, áchí yá.

Jnūhun tēe cúca jín Lázaro

¹⁹ Te ni cahān gā yā:

Ni iyo ñn tēe cúca, ní ñn hun de sahma lúu vāha ndasí. Te ndiquiví ni iyo vāha ndasí jéé ní yeji de. ²⁰ Te suni ni iyo ñn tēe ndáhú, nání de Lázaro, néne de yéhyí tēe cúca un, te ní cáhnu de ñn ndíhyi. ²¹ Te máni cúní de jeē ndutú chíji de jín stāa cuēchi jeē stíví tēe cúca un. Te quécoo ina te

cánayuu ti nuū ndíhyi de. ²² Te ni jihī tēe ndáhú un, te tācá ndajéhé Yaā Dios cuangoo ya jíin ánuá de nde andiví nuū néne Abraham. Te suni ni jihī tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyi tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. ²⁴ Yūcuán na te ni cana cóhó de: Tátā Abraham, cundáhú ni ni sáña, te tají ní Lázaro, na quíchundaji de xinī ndáha de nuū ndúte, te quiiji de stáji de yáá ná. Chi xeēn ndóho ná núū yáñuhūn yāhá. Achí de. ²⁵ Te ni cahān Abraham jíin de: Séhē, nucūhun ni rō jeē ni níhīn rō ndihi jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusiī ni de yāhá, te róhó chi ndóho ró jíñā. ²⁶ Te suni íyó ñin jeē cunú téyí, íne mēhñu yó jíjnáhan yó. Te ñayuu cáhīn yāhá, vēsú cáconi i yāha i jeē i nuū rō, te ma cúu. Te ni ma cúu yāha máá ró quiijicoo ró yāha. Achí Abraham. ²⁷ Yūcuán na te ni cahān tēe cúcá: Núu súcuan te cáhān ndahú ná jíin ní, Tátā Abraham, tají ní Lázaro na quihín de vehe tátá na. ²⁸ Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yāha, áchí de. ²⁹ Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chūhun

ni i, áchí Abraham. ³⁰ Te ni cahān tucu tēe cúcá: Vēsú súcuan, Tátā Abraham, te núu ñin ñayuu ni jihī quihīn nuū i, yūcuán na te nacani ni i jeē stóo i cuēchi i, áchí de. ³¹ Te ni cahān Abraham jíin de: Núu tu chūhun ni i jnūhun ni nacani Moisés jíin táca tēe ni canacani jnūhun Yaā Dios, suni ma cándíje cuiti i núu natecu ñin ndíyi quihīn nuū i, áchí de.

Xeēn coo siquī ñáyuu squívi jnáhan nuū cuéchi
(Mt. 18.6-7, 21-22; Mr. 9.42)

17

¹ Te ni cahān Jesús jíin tēe cáscuáha jíin yá:

Máni íyó jēe nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi. ² Vāha ga núu ni conuhñi ñin yōso cáhnu sucūn i te quēe i chíji ndute mar, vēsú jeē squívi i ñin sūchi lúli yāha núu cuéchi. ³ Coto ma sáha ró súcuan jíjnáhan ró.

"Te núu jnáhan ró sáha de cuēchi siquī rō, te cahān rō nuū de. Te núu nacani ni de, te cone cáhnu ni rō nuū de. ⁴ Te núu uxā jínu jeē ñin quívi sáha de cuēchi siquī rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnu jnūhun cándíje

⁵ Te tēe cácuu apóstol ni cacahān de jíin Jítóho yō:

Sáha ní jéē nīhin ga candíje ná jéē sáha Yaā Dios jeē cájicān na núu yā, achí de.

⁶ Te ni cahān maá Jítóho yō jíin de:

Núu cácandíje ró vēsú ìn tihlí-ni, nájñūhun ìn ndiquin mostaza jeē tihlí-ni cáa, te cuu cahān rō jeē nūyūhndu yáha na quénda te nucondichi nde nuū mar, te coo nájñūhun cahān rō.

Jeē cánuú squícu vāha yó núu yā

⁷ 'Ndé ìn ró íyó mozo rō jeē jítu de chí ndíto de quití ndéca ró, te núu ni najinū de vehe ró, te tu cáhán rō jíin de jeē cúcōo de caji de staā.

⁸ Chi sa suhva cáhán rō: Sáha ró ndeyu cuxíni ri, te cani ró cóhō rī. Te núu ni cuu ni yeji rī ni jihí ri, yūcuán na te caji maá ró coho ró, cácahān rō.

⁹ Te cácahān rō jeē tu cánuú nacuatáhú ró nuū mozo núu ni sáha de jniñu ní ndacu ró, chí jeē cánuú sáha de cúu.

¹⁰ Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhú yá nuū rī, chí ni sáha ri máá-ni jeē cánuú sáha ri, achí rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea. ¹² Te ni jinū yā ìn ñuu, te uxī tēe ndóho cuehyī stehyú ni quen-dacoo de vejnahān de ya, te

jíca ní cajecuiñī de. ¹³ Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū táca sūtū jeē ní canduvāha ró, áchí yá.

Te níni cuángoo de te ni canduvāha-ni de. ¹⁵ Yūcuán na te ìn-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. ¹⁶ Te ni jecuiñī yití de nuū yā, te ni jequin de nuū de nde nuū ñūhun, te ni nacuatáhú de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ìn gā de, ¿naun tu ní cánandicó de nacuatáhú de? ¹⁸ ¿A máñuhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

¹⁹ Te ni cahān yā jíin tēe ún:

Ndocuiñī quinhun rō. Chi ni candíje ró jéē cuu nasávāha ri rohó, te jeē yúcuán ní nduvāha ró, áchí yá.

Ndese coo quivī jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni cacajñūhún de Jesús ndé quivī quejéé jéē ndácu Yaā Dios jniñu ini ñayiví. Te ni cahān yā jíin de:

Ma quéē ndijin jeē ndácu Yaā Dios jniñu. ²¹ Ni ma cúu cahān ñayuu: Yáha íne ya ndácu ya jniñu, chí: Yūcuán íne ya, achí i. Chí je ndácu Yaā

Dios jniñu mēhñu ró jijnáhan ró. Achí yá.

22 Yūcuán na te ni cahān yā jīn téē cáscuáha jīn yá:

Quee tiempo jeē yóhoyo cúu ni rō coto ró jēē ndiji ruhū, Yaā ní nduu tēe, te ma coto ró jijnáhan ró. 23 Te cahān ñayuu jīn ró: Yāha íne ya, chí: Yūcuán íne ya, achi i. Te ma quíngoo ró condēhe ró, ni ma cóndiquīn rō i. 24 Chi nájnūhun sáha taja jeē ndíndēē ñin lado andiví te cundijin nde inga lado, suni sūcuán cuu quiví ndíji ruhū, Yaā ní nduu tēe, chí ndihí ñayuu coto. 25 Te jīni ñúhún jēē xihna gā ndoho xeēn rī, te ñayuu iyó vijna, squéhichī i ruhū. 26 Chi nájnūhun ni cuu quiví ni íyo Noé, suni sūcuán cuu quiví ndíji ruhū, Yaā ní nduu tēe. 27 Chi quiví un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndihí i. 28 Te suni sūcuán ni cuu quiví ni íyo Lot. Ni cayejí i, ni cajihí i, ni cajeen i, ni caxícó i, ni catajī i itu, ni cajeni i vehe. 29 Te quiví jeē ní quenda Lot ini ñuu Sodoma cuahān de, te ni cuun ñuhūn jīn azufre ichi ándiví, te ni snāā ndihí ñayuu. 30 Te suni sūcuán coo quiví jeē ndíji ruhū, Yaā ní nduu tēe.

31 "Te quiví ún te ñayuu cáhīn yatā véhe, te ndajniñu i ñúhun ini vehe, cáhān rī jīn i jeē ma ndívi i naquihin i, chí cánuú cunu yachī i

jeē cácu i. Te suni sūcuán ñayuu casájniñu nuū itu, ma quínuhun i vehe i jeē quíhin i ndajniñu i. 32 Te nucūhun ni rō ndese ni ndoho ñasihí Lot jeē ni jīhī ña. 33 Te núu ndé ñáyuu cuní i cācu i nuū jnūndóho quiji nuū i jeē siquí ruhū, núu sūcuán te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū, te cotecu i ní cáni.

34 "Te cáhān rī jīn ró jeē quiví ndíji rī te quíxí uū tēe ñin jīto jecuáā, te ñin de naquihin rī, te inga de ndōo, chí tu ní cándíje de. 35 Te coo uū ñahan jeē ndíco cáhnu, te ñin ña naquihin rī, te inga ña ndōo. 36 Te uū tēe sájniñu de nuū itu, te ñin de naquihin rī, te inga de ndōo. Achí yá.

37 Te jeē ní cajini de jnūhun yáha, te ni cacajnūhún de ya: ¿Ndé mí coo sūcuán nájnūhun ni cahān ní? Achí de.

Te ni cahān yā jīn de:

Nájñūhun jeē cutútú téji ndé-ni cúu nuū catú quiti ní jīhī, suni sūcuán coo tāca jēē ni cáhān rī ndé-ni cúu-ni nuū cáhīyo ñayuu.

Jnūhun yatā síquē juez jīn ñahan viuda

18

1 Te ni cahān yā ñin jnūhun yatā jīn de jeē cánuú jeē niní cácan tahu de, te ma ndínuu ni de jīn. 2 Te ni cahān yā:

Ni íyo ñin juez ini ñin ñuu. Te ni tu ndíso íyo de nuū Yaā Dios, ni tu yúhú de nuū ní ñin ñayuu. 3 Te suni ñuu un iyó ñin ñahan ní ndóo ndáhú. Te

ñahan un jéhén-ni jéhén-ni ña nuū de, jícán ña jeē na sándaā de siquī ñn ñayuu jeē jító uhū i ña. ⁴ Te cuehē quivī tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní ñn ñayuu, ⁵ te ñahan viuda yáha, yōhyo stáhān ña ruhū, te jeē yúcuán na sándaā rī siquī ñáyuu jeē jító uhū i ña. Chi núu tuú, te quejéé rí jnanīní ni rī jeē quíji quíji ña. Achí de. Achí máá Jítóho yō.

⁶ Te ni cahān gā yā:

Súcuán cúu jeē ni cáhān juez, tēe tú ndaā. ⁷ Te Yaā Dios, nasūu súcuán cúu ya, chí sándaā yā siquī jníñu ñayuu ní nacāji ya jeē nduú ñuú cácahān ndahú i jín yá. Chí jnama ya i nuū tāca jēé cájito uhū i. ¿Te á cuéé jnama ya i? ⁸ Cáhán rī jín ró jeē yachī. Te quivī ndíji ruhū, Yaā ní nduu tēe, ¿á níñn gā rī ñayuu cácañdije níñn ini ñayiví? Achí yá.

Jñuhun yátá siquī tēe fariseo jín tēe stútú xúhun renta

⁹ Te suni ni cahān yā jñuhun yátá yáha jín jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhīyo ndaā:

¹⁰ ñn tēe fariseo cuahān de templo jeē cacān tahú de. Te ñn tēe stútú xúhun renta suni cuacacān tahú de templo. ¹¹ Te tēe fariseo, índichi de, te súcuán ni jicān tahú de: Tātā Yaā Dios, na cútahū na núu ní, chí tu cúu ná nájñuhun cándaā sava ga tēe,

tēe cuíhná, tēe néé, tēe cásiquí ndēē jñahan cácuu de. Ni tu cúu ná nájñuhun cáa tēe yúcuán jēé stútú xúhun renta jeē scáa ga de jícán de nuū ñáyuu. ¹² Te uū jínu jeē semana iyó ndite ni na núu ní, te jēhe ná nuū ní ñn ñn siquī tāca úxī ndajñíñu níñn na, áchí de. ¹³ Te tēe stútú xúhun renta, ni jecuiñī jicá de nuū templo, ni tu ní chūndeyí ni de jeē ndonehen de nuū de, chí sa suhva ni cani de yīqui jicā de jeē cucuíhyá ni de. Te ni cahān de: Tātā Yaā Dios, cundáhú ni ni sáña, chí tēe iyó cuéchi cúu ná, áchí de. ¹⁴ Te cáhán rī jín ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñayuu jeē sajéñnu i máá i, sa ndululí i. Te ñayuu jeē sálulí i máá i, sa ndujéñnu i. Achí yá.

Jeē ni jicān tahú Jesús jehē sūchi lúli

(Mt. 19.13-15; Mr. 10.13-16)

¹⁵ Te ni quecoo ñayuu jín sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuán cúu, te ni cacahān de nuū ñáyuu vējicoo jín i. ¹⁶ Te máá Jesús ni cana ya de, te ni cahān yā:

Cuāha jñuhun na quíjicoo sūchi lúli jínā nuū rī, te ma cásí rō jeē quíjicoo i. Chí ñayuu jeē ndió cóo ni i cani ni i nájñuhun sūchi yáha, suu i quiví ndaha Yaā Dios jeē ndacu ya jniñu nuū i. ¹⁷ Te jendaá cahán rī jín ró, núu ñn ñayuu tú cuatáhú i jeē ndácu Yaā Dios

jniñu nuū i, nájñuhun jétáhú ñn sūchi lúlí, ma quívi cuiti i ndaha ya, achí yá.

Jñuhun tēe cúca

(Mt. 19.16-30; Mr. 10.17-31)

18 Te ñn tēe cújéñnu ni ca-jñuhún de ya:

Tēe vāha cúu ní Maestro. ¿Te na jniñu váha sáha ná te nihñn tahú na cotecu na ní cání andívi? Achí de.

19 Te ni cahān Jesús jíin de:

¿Naun cáhán rō jeē tēe vāha cúu ri? Tú ni ñn tēe vāha íyó, chí máá ñn-ni Yaā Dios. 20 Je jíiní rō tācá jniñu ní ndacu Yaā Dios: Ma cosíquí ndéē jñahan ró. Ma cáhni rō ndíyi. Ma sacuíhná ró. Ma sajnúhún ró. Cuatáhú ró nuū tatá rō nuū naná rō. Achí yá.

21 Te ni cahān maá de:

Tācá jniñu yáha je ni squícu ná ndé ná lulí ná, achí de.

22 Te Jesús ni jini ya jñuhun yáha, te ni cahān yā jíin de:

Ñn na jniñu cúmaní sáha ró núu súcuan. Xícó ndíhi jeē névāha ró, te cuāha ró núu ñáyuu ndahú. Te nde andívi cuāha ya jeē váha ndasí núu rō. Yūcuán na te quiji ró condiquñ rō ruhū, achí yá.

23 Te ná ni jini sōho de jñuhun yáha, te yōhyo ni cucuíhyá ni de, chí cúcá ndasí de. 24 Te jíto Jesús jeē súcuan cúcuíhyá ni de, te ni cahān yā:

Tēe cúcá chí yōhyo yí quívicoo de ndaha Yaā Dios jeē ndacu ya jniñu nuū de.

25 Yachí gā yāha ñn camello yaū yutícuí vēsú jeē quívi ñn ñayuu cucá ndaha Yaā Dios jeē ndacu ya jniñu nuū i, achí yá.

26 Te tēe ní cajini jñuhun yáha, ní cacahān de:

¿Ndé ñáyuu cúu jeē cácu núu súcuan? Achí de.

27 Te ni cahān yā jíin de:

Ñayuu chí ma cúu squívi i máá i ndaha Yaā Dios, te máá yá chí cuu sáha ya, achí yá.

28 Yūcuán na te ni cahān Pedro:

Sāña jíjñahan ná ní castóo ná ndíhi jeē cánevāha ná, te cándiquñ na níhín, achí de.

29 Te máá yá ni cahān yā jíin de:

Jendaá cahán rī jíin ró jíjñahan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē squí jeē scáca i jñuhun jeē ndácu Yaā Dios jniñu nuū ñáyuu, 30 núu súcuan te nanihñn cuehē gā i ñni ñayívi yáha, te tiempo quiji te cotecu i ní cání, achí yá.

Jeē ni cáhán tucu ya jeē cúu yā

(Mt. 20.17-19; Mr. 10.32-34)

31 Te ni cana sñn ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndíhi jñuhun ndese ndoho ruhū, Yaā ní nduu tēe, nájñuhun ni catee tēe ni canacani jñuhun Yaā Dios nde jenahán. 32 Chí ñayuu nastúu i ruhū nuū tēe nación Roma jeē cáyúcú Jerusalén cándacu jniñu. Te tēe un sácata de nuū rī, te cahān neé de nuū rī, te tesíhí de nuū rī. 33 Te caní de ruhū, te sáa te cahni de ruhū. Te nuū uní quívi te natecu rī. Achí yá.

³⁴ Te máá de tu ní cájecūhun cuiti ni de tāca jnūhun yáha. Chi jnūhun yí cúu, te tu ní cúu jecūhun ni de jeē cahán yā.

Jeē ní nasávāha ya in tēe cuáá ñuu Jericó

(Mt. 20.29-34; Mr. 10.46-52)

³⁵ Te ni cuyajni ya cuahān yā ñuu Jericó. Te in tēe cuáá néne de yuhíchi, jícán de caridad. ³⁶ Te ni jini sōho de jeē yáha cuehē ñayuu cuangoo i, te ni cajnūhún de naun cuángoo i. ³⁷ Te ni cacahān i jíin de jeē Jesús, tēe ñuu Nazaret, yáha ya cuahān yā. ³⁸ Yūcuán na te ni cana jee de: Jesús Sēhe yucūn David, cundáhú ni ni sáña, áchí de.

³⁹ Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁰ Yūcuán na te ni jecuiñi Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnūhun yá de:

⁴¹ ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, áchí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, áchí yá.

⁴³ Te ni ndundijin-ni tinūu de, te ni ndiquin de ya, te nácuatáhú de nuū Yaā Dios. Te ndihi ñayuu jeē ní cajito i,

suní ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quivi Jesús ini ñuu Jericó, te ni yāha-ni ya cuahān yā. ² Te yūcuan íyó in tēe cúcá nání de Zaqueo, te cújéhu de nuū tēe cástútú xúhun renta. ³ Te cuní de coto de návāha cuni de ndé in cúu Jesús. Te tu ní cúu, chi cuehē ñayuu cuangoo i jíin yá, te ndiqui-ni cáa de. ⁴ Te jínu de ni cosnūú de. Te ni caa de xiní in nuyūhndú návāha coto de nuū yā, chi yūcuan yáha ya quihān yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chi jíni ñūhún jéē ndóo ri vehe ró vijna, áchí yá.

⁶ Yūcuán na te ni cusī de, te yachī ni nanuu de, te ni jeca de ya cuahān de jíin yá vehe de. ⁷ Te ni cajito ñayuu jeē súcuan ni cuu, te ni cacahān i siquī yā jeē cuahān yā ndōo ya vehe in tēe sáha cuēchi. ⁸ Yūcuán na te ni ndocuñi Zaqueo, te ni cahān de jíin máá Jítoho yō:

Vijna te sava ndihi ndajniñu ná chi cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná úní gā siquī naquihin i, áchí de.

⁹ Te ni cahān Jesús:

Vijna te vehe yáha je ni cācu in tēe jeē ma jnahnú ndetū de, chi ni candíje de nájnūhun ni candíje jíi de Abraham. ¹⁰ Chi ruhū, Yaā ní nduu tēe,

ni quiji ri nducú rí ñayuu jeē jnahnú ndetū, te jnama ri i, áchí yá.

Jnūhun yátá síquī uxī mozo jín xūhun

11 Te nuū ñáyuu ní cajini tāca jnūhun yáha, ní cahān gā Jesús ñn jnūhun yátá jéē steén yā ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jéē ndácu ya jniñu sáha Yaā Dios. 12 Te ni cahān yā:

Ñn tēe cújéhnú cuahān jicá de inga nación, návāha nihīn jniñu de cuu de rey, te ndiji de ndacu de jniñu. 13 Te nde ná tu quihīn de, te ni cana de uxī mozo de, te nuū ñn ñn i ni jēhe de ñn xūhun jéē ndeé yahu ndasí. Te ni cahān de jín i: Sájniñu ró jéē na ndúcuehē xūhun yáha jijnáhan ró níni jéē quihín rī te ndee rī, achí de. 14 Te ñayuu nación de cáquitī ni i nuū de, te ni catajī i jecu tēe cándiso jniñu cuango yātā de jeē cahān: Tu cánujnahan ni ñayuu nación na jéē cuáha ní jniñu nuū tēe yáha jéē cuu de rey nuū i, achí.

15 Te vésú súcuan te ni nihīn jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núū, návāha na cúni de nasaa ni canihīn ñn ñn i síquī. 16 Te ni quee ñn mozo un núū de, te ni cahān i: ñn xūhun jéē ni jéhe ní núū ná, ni nduu uxī, achí i. 17 Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jín ñn

jniñu lúli-ni, te vijna te sáha ri jeē cújéhnú ró ndacu ró jniñu nuū uxí ñuu jnī ri, achí de.

18 Te ni quee inga mozo, te ni cahān i: ñn xūhun jéē ni jéhe ní núū ná, ni nduu uhūn, achí i. 19 Te suni ni cahān de jín mozo un: Róhó, cújéhnú ró ndacu ró jniñu nuū uhún ñuu jnī ri, achí de. 20 Te ni quee inga mozo, ni cahān i: Yáha nácuāha ná xūhun ní, chi ni chuvāha ná ini ñn pañuelo. 21 Chi ni yūhu ná nihín, chi tēe xeēn cúu ní. Chi cuehē gā nándacān ní vésú jeē ni jéhe ní, te cuehē gā cuní ni vésú jeē cúu sáha mozo ni, achí de.

22 Yūcuán na te ni cahān rey: Mozo neé cúu ró núu súcuan, te jín jnūhun ni cahān rō te sándaā rī jeē iyó cuéchi ró jéē tu ní sájniñu ró jín xūhun rí. Chi jéni ni rō jeē tēe xeēn cúu ri, te cuehē gā nándacān rī vésú jeē ni jéhe ri, te cuehē gā cuní rī vésú jeē cúu sáha mozo rī. 23 Núu súcuan ¿te naun tu ní chúne ró xūhun rí vésú nuū banco? Te jeē ní ndee rī te naquihin ri xūhun rí nde jín séhe xūhun núú. Achí de.

24 Te ni cahān de jín ñayuu cáhīn yūcuán: Quende xūhun jíñā nuū i, te cuāha ró núu mozo jeē névāha uxī, achí de.

25 Te ñayuu un ní cacahān i jín de: Te ndese, chi je névāha de uxī, achí i. 26 Te ni cahān tucu rey: Cáhán rī jín ró jeē ñáyuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vésú jecu jeē névāha i.

27 Te tēe jeē cájito uhū ruhū, jeē tu ní cánujnahan ni de jeē

cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndihí ni cahān yā jnūhun yāha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de. ³⁰ Te achí yá jíin de:

Cuáhán ñuu lulí íne ichi núu. Te núu ni quívi ró, te nihīn rō ñin burro núhni tī, jeē ní ñin tēe ná tu coso de tī. Te ndají ró tī quíji ró jíin tī. ³¹ Te núu ndé ñin cajnūhún naun cándají ró tī, te cahān rō jíin: Máa Jítoho yō jíni ñúhún yá tī, achí rō. Achí yá.

³² Te cuangoo tēe ni tají yá, te ni canihīn de tī nájnūhun ni cahān yā jíin de. ³³ Te jeē cándají de tī, te ni cacahān jitoho tī jíin de:

¿Naun cándají ró burro ri? achí.

³⁴ Te ni cacahān de:

Máa Jítoho yō jíni ñúhún yá tī.

³⁵ Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī.

³⁶ Te ná-ni cuahān yā, sáa cáscáa ñayuu sahma i ini ichi.

³⁷ Te nuū ní cuyajni ya nuū cúun ichi yucu Olivos, te ndihí ñayuu cándíje jeē cándiquīn i ya, ni caquejéé i cácusī ni i,

te cácana jee i jeē yóhyo vāha Yaā cúu Yaā Dios siquī tācá jniñu jéhnū ni sáha ya ni cajito i. ³⁸ Te achí i:

Yóhyo vāha Yaā cúu Rey jeē véji jíin jniñu máa Jítoho yō Yaā Dios. Te sáha ya jeē cóo manī yō jíin Yaā Dios andiví. Te yóhyo cújéhnū Yaā Dios, achí i jíináhan i.

³⁹ Yūcuán na te jecu tēe fariseo cáhīn mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquīn nihín jéé na cási i yuhu i, achí de.

⁴⁰ Te ni cahān Jesús:

Cáhán rī jíin ró jeē núu ñayuu yāha na cási i yuhu i, te tāca yūu chí cana jee, achí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴² Te ni cahān yā:

Róhó ñáyuu Jerusalén, yóhyo ni cuu ni rī jeē na jécūhun ni rō jeē cuu ndu-manī rō jíin Yaā Dios sáha ri. Te siquī jeē tu cácdíje ró, te vijna chí ma cúu ga jecūhun ni rō. ⁴³ Chí quee quívi jeē coo jnūndóho, te ñayuu cájito uhū rohó, cuicó ndúu i ñuu rō, te casi cutú i jíin yūu, te tāca lado ndonda i siquī rō. ⁴⁴ Te ndihí vehe scótúu i, te cahni i róhó jíináhan ró. Te ma stóo i ni ñin vehe jeē cóso jnáhan ga yūu. Chí ni quíji ri nde nuū Yaā Dios jeē jnáma ri rohó, te tu ní cácdíje ró. Achí yá.

Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ni quivī ya ini templo cáhnu, te ni quejéé yá quenehen ya táca ñáyuu cájeen quiti te cánaxīco núu ñáyuu jeē socó i. ⁴⁶ Te ni cahān yā jíin i:

Yósó núu tútu iī jeē cahān Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jijnáhan ró, chi nájnūhun yaū cava ñacuīhna ní canasáha ró, áchí yá.

⁴⁷ Te ndiquivī ni steén yā jnūhun ini templo. Te sutū cácujuhnu jíin téé cástéén tutu ley Yaā Dios jíin téé cácujuhnu nuū ñáyuu ñuu ún, cánducú de modo ndese cahni de ya. ⁴⁸ Te tu cánihīn de modo sáha de, chi ndivīi ñayuu yōhyo cájetáhú i cájini nahín i jnūhun cáhán yā.

Siquī jeē ndiso jniñu Jesús
(Mt. 21.23-27; Mr. 11.27-33)

20

¹ Te ñn quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujuhnu jíin téé cástéén tutu ley Yaā Dios jíin táca téé jénu cándacu jniñu. ² Te ni cacahān de:

Castūhún, ¿ndé ní nihīn jniñu ró jéé sáha ró jniñu yáha? ¿Te ndé ñn ni tee jniñu siquī rō jeē sáha ró súcuan? Achí de.

³ Te ni cahān Jesús jíin de:

Suni ruhū cajnūhun rí rohó ñn jnūhun jijnáhan ró.

Castūhun núu rī: ⁴ ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca téé? Achí yá.

⁵ Yūcuán na te ni canda-jnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácandíje ró de núu súcuan?

⁶ Te núu cahān yō jeē ñáyuu ni catee jniñu un síquī de, te ndivīi ñayuu cahni i yóhó jíin yúū, chí cácandíje i jeē téé ni nacani jnūhun Yaā Dios ni cuu ndije Juan, achí de cácahān maá de.

⁷ Te ni cacahān de jeē tu cájini de ndé ñn ni tee jniñu siquī Juan jeē ni scuándute de.

⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, áchí yá.

Jnūhun yátá siquī tēe néé
cásajniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jnūhun yátá yáha jíin ñáyuu ún:

ñn tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de inga ñuu.

¹⁰ Te máá tiempo ndutútú uva, te ni tají de ñn mozo cuahān nuū téé cáásajniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. ¹¹ Te tēe chíí uva ni tají tucu de inga mozo cuahān.

Te tēe cásájniñu ún, suni ni cacahān ndevāha de nuū i, te ni cacani de i, te ni canatajī de i cuanuhun i súcuan-ni. ¹² Te tēe chíi uva ni tajī tucu de inga mozo cuahān. Te tēe cásájniñu ún, suni ni castújī de mozo un, te ni cascúnu de i.

¹³ Yūcuán na te ni cahān tēe chíi uva: ¿Nde se sāha rí? Na tájī rí sēhe rí jeē maní rí jín, chí sanaa te núu ni cajito de i te coo yíñuhún de nuū i. Achí de. ¹⁴ Te tēe cásájniñu ún, ná ni cajito de jeē véji i, te ni cacahān de: Tēe chíi táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajñuhun yá de:

Núu súcuan ¿te ndese sāha tēe chíi uva jín tēe cásájniñu ún? ¹⁶ Ndiji de te cahni de tēe un jínáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jñuhun yáha, te ni cacahān i:

Aí, núu ma cóo cuiti súcuan víi, achí i.

¹⁷ Te ndéhé yá nuū i jínáhan i, te ni cahān yā:

Núu súcuan ¿te á cájecūhun ni rō jñuhun yáha jéē yosó núu tútu íi jeē cúu rí nájñuhun ññ yuū? Chí achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

Achí. ¹⁸ Te ñayuu tu cándíje, ndoho i nájñuhun ndóho ñayuu jeē cotúú siquī yuū te jnáhnú i. Te quivī sándaā

Yaā Dios cuēchi, te ñayuu tu cándíje, ndoho i nájñuhun ndóho ñayuu jeē nínga yuū siquī i te cundihí i sāha. Achí yá.

Siquī xūhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujeñnu jín tēe cástéén tutu ley Yaā Dios, ni cacuni de jññ de ya maá hora un. Chí ni cajecūhun ni de jeē siquī maá de cúu jñuhun yátá ní cahān yā siquī tēe cásájniñu nuū uva jín tēe cájeni vehe. Te tu ní cúu, chí cáyūhú de jeē quitī ni ñayuu. ²⁰ Yūcuán na te ni catajī de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sāha de jeē cahán yā ññ jñuhun jeē nihín de cuēchi siquī yā, te quindecá de ya nuū tēe cúu gobernador. ²¹ Te ni cacahān de:

Maestro, cájini na jéē cahán vāha ní, te stéén ndaā ní. Te tu sāha ní cuenta ndese cúu ññ ññ ñayuu, chí inuú-ni sāha ní jín i. Te stéén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jññ nación yō, chí tuú? achí de.

²³ Te ni jini yā jeē cácuni de stáhú de ya, te ni cahān yā jín de:

¿Najehē cájito ndee rō ruhū? ²⁴ Stéén ññ xūhún na cóto rí. ¿Ndé ññ nuū cúu jeē ndeé nuū xūhun yáha, te ndé síhví cúu jeē ndeé yāhá? achí yá.

Te ni cacahān de jín yá:

Nuū jín sǎhví rey un cúu, áchí de.

²⁵ Yūcuán na te ni cahān yā jín de:

Núu súcuan te nacuāha ró núu rey un jēē yǎhi cuenta nuū de, te nacuāha ró núu Yaā Dios tāca jēē yǎhi cuenta nuū maá yá, achí yá.

²⁶ Te tāca tēē ún tu ní cúu nihīn de cuēchi siquī yā jín ni ñn jñuhun cáhán yā, cájito jínúu ñayuu. Chi sa ni canaa ni de jeē ndichí ní stió cuǎñí yā jñuhun nuū de, te tuá na vé ni cácahān de.

Jeē ní cacajñuhún de siquī jeē nátecu ndīyi

(Mt. 22.23-33; Mr. 12.18-27)

²⁷ Yūcuán na te jecu tēē grupo saduceo ni quecoo de nuū yā. Te tēē un cácahān jeē tu nátecu cuiti ndīyi. Te ni cacahān de jín yá:

²⁸ Maestro, Moisés ni tee de nuū tútu jeē cánevāha yó: Núu ñn tēē cuu de, te ndōo ñasihí de, te núu tu ní íyo sēhe de jín ña, núu súcuan te cánuú jeē ñani de naquihin ñasihí de, te sēhe de jeē cácu jín ña nucuǎñí i nuū ndīyi ñani de, áchí tutu.

²⁹ Núu súcuan te ni íyo uxā ñani. Te tēē núu ní quiñáhan de jín ñahan. Te ni jihí de, te tú sēhe de ní íyo. ³⁰ Te tēē uū ni naquihin de ña, te suni ni jihí de, te tú na sēhe de ní íyo.

³¹ Te tēē unī ni naquihin de ña. Te suni súcuan ndihúxá de ni condeca de ña, te ni cajihí ndihí de, te ni ñn de tú sēhe de ní íyo. ³² Te jeē sándihí te suni ni jihí ñahan ún. ³³ Núu súcuan te núu na nátecu de jínáhan de quiví nátecu ndīyi, ¿te ndé

ñn de cuu ña ñasihí de? Chi ndihúxá de ni condeca de ña. Achí de jínáhan de.

³⁴ Yūcuán na te ni cahān yā jín de:

Ñayīvi yáha chi cáquiñáhan tēē jín ñahan. ³⁵ Te ñayuu vāha jeē nátecu i quivícoo i andiví, ma quiñáhan ga i yūcuán, chi tuá na jñuhun quiñáhan tēē jín ñahan coo. ³⁶ Ni ma cúu cuiti gā i, chi coo i nájnñuhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē nátecu ndīyi, chi ni tee de nuū tútu ndese ni cahān yā jín de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jín Isaac jín Jacob. ³⁸ Te jeē ni cáhán de súcuan cúu jeē ní cachí de jeē cátecu tāca ndīyi. Chi vēsú je ni cajihí i, te cátecu i nuū iyó máá yá, chi cúu ya Yaā sáha jeē técu ñayuu ní cáni. Achí yá jín de.

³⁹ Te jecu tēē cástéén tutu ley Yaā Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de cajñuhún de ya.

Siquī jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahān yā jín de jínáhan de:

¿Ndese cúu jeē cácahān ñayuu jeē Cristo cúu sēhe yucūn David? ⁴² Chi máá David suhva ni cahān de jñuhun ya nuū tútu Salmo: Máá Jítóho yō Yaā Dios suhva ni cahān yā jín Jítóho rī, Yaā quiji:

Cucōo ró lado váha ri nuū
cujéhnú ró,

43 te na sáha ri jeē quende
rō poder táca jéē cájito
uhū rohó.

Achí Yaā Dios. Achí David.
44 Te núu sēhe yucūn David
cúu Cristo, ¿te ndese cúu jeē ni
cáhān de jeē Jítóho de cúu ya?
áchí yá.

*Jeē ni cáhānyā jeē iyó cuéchi
de jínáhan de*

(Mt. 23.1-36; Mr. 12.38-40;
Lc. 11.37-54)

45 Te ni cahān yā jín tée
cáscuáha jín yá, te suni ni ca-
jini sōho ndihi ñayuu:

46 Coto má cándije ró táca
tée cástéén tutu ley. Chi
cácusī ni de cáñhun de
sahma cáni jeē steén jeē
cujéhnú de, cájica cuu de jín.
Te cánujnahan ni de jeē cahān
yiñúhún ñáyuu jín de nuū
yáhu. Te cánujnahan ni de
cucōo de nuū silla yiñúhún
gá ini vehe ī sinagoga, jín
silla yiñúhún gá nuū víco
cáyeji ñayuu. 47 Te cáquende
de vehe ñahan ní caquendō
ndáhú. Te nahán cájicān tahú
de návāha canī ni ñayuu jeē
tú na cuéchi de. Tēe yáha
jínáhan de chi xeēn gā ndoho
de castigo. Achí yá.

*Jeē ni sócō ñahan viuda
xūhún*

(Mr. 12.41-44)

21

1 Te ná ni iyo ya ini templo,
te jító ya nuū ñáyuu cucá jéē
cáchuhun i cuehē xūhún ini
tāca yéjnū nuū cáscō i. 2 Te
suni ni jito ya nuū īn ñahan
viuda jeē ndóho ndáhú, te ni

chuhun ña uū centavo lulí ini
yejnū ún. 3 Te ni cahān yā:

Jendaá cahān rī jín ró jeē
cuehē gā cúu jeē ni sócō ñahan
viuda ndahú yáha, vēsú jeē ní
casocō táca gá ñayuu. 4 Chi
tácá i ni casocō i jeē ni ndóo
siquī xúhun cuéhē i. Te ñahan
yáha, vēsú ndahú ndóho ña, te
ni chuhun ndihi ña jeē cótecu
ña. Achí yá jín de.

*Jeē ní cachi yā jeē náā tem-
plo*

(Mt. 24.1-2; Mr. 13.1-2)

5 Te saya de ni cacahān de
jeē luu cáa templo cáhnu, chi
ni cuvāha jín táca yúu luu
jín táca jéē ní casocō ñayuu.
Yūcuán na te ni cahān yā:

6 Ndihi jeē cájito ró yáha,
quee quivī jeē ma cóso jnāhan
ga ni īn yuū, chi ndihi jnanū,
áchí yá.

*Na seña coo nuū cuácuyajni
ndihi ñayiví*

(Mt. 24.3-28; Mr. 13.3-23)

7 Te ni cacajñuhún de ya:

Maestro, ¿ndé quivī coo táca
jéē ní cachi ní jéē coo? ¿Te
na seña coo nuū cuácuyajni
squícu táca jéē ni cáhān ní?
áchí de.

8 Te ni cahān yā:

Coto ró jéē ma stahú i róhó.
Chi quijicoo cuehē tēe jeē
stahú jín sīhví rí, te cahān
de: Máá rí cúu Cristo. Te
suni cahān de: Je ni quee
quivī ndihi ñayiví, achi de. Te
ma cóndiquīn rō de. 9 Te núu
nihīn rō jñuhun jeē táca lado
iyó guerra te cándonda ñayuu
siquī tohō, te ma yūhu ró, chi
cánúú jéē xīhna gā coo súcuan,

te ni ma jinú yachī quivī ndihi ñayiví. Achí yá.

10 Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. 11 Te cháha chúcuān jnāa téyí, te coo jnamā jín cuéhyī xeēn. Te coo seña jéhu ichi ándiví jeē yūhú ndasí ñáyuu coto i.

12 Te nde ná tu coo tāca jniñu yáha, te coto xeēn i róhó, te jñi i róhó. Te quindecā i sava ró tāca vehe ñi sinagoga jeē cahán i cuēchi siquī rō. Te chune i sava ró vecāa. Te quindecā i sava ró núū tāca rey jín núū tācá gobernador, te cahān i cuēchi siquī rō jeē siquí jeē cácadíje ró rúhū. 13 Te jeē súcuān coo, te cuitē núu ga jñuhun ri, chi nacani ndaā rō nuū de jijnáhan de. 14 Núu súcuān te cundaā ni rō jeē ma nacani ni rō xihna gā ndese stío cuiñí rō nuū de te cācu ró. 15 Chi ruhū cuāha ri jñuhun ndichí cahān rō, návāha ñáyuu jeē cájito uhū rohó, ma cúndeyí i jín ró ni ma cúu cahān i siquī rō. 16 Te nde tatá rō, naná rō, ñani rō, jnáhan ró, jín amigo rō, nastúu i róhó núū ñáyuu xeēn. Te cahni i sava ró. 17 Te tāca ñáyuu chi quiví ni i nuū rō jeē siquí ruhū. 18 Te ni ñiñi xini rō jijnáhan ró ma náa, chi coto ya rohó. 19 Te núu cuiñi ñihin ró jín jñuhun ri, te cotecu rō ní cáni.

20 Te núu ni cajito ró jeē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. 21 Yūcuán na te ñáyuu

cáyucú región Judea, na cúnu i caa i yucu quingoo i. Te ñáyuu cáyucú Jerusalén, na quéndacoo i quingoo i. Te ñáyuu cáhīn nde rancho, ma nándicó i ñuu ún. 22 Chi tāca quiví un cuāha Yaā Dios castigo nuū ñáyuu jeē siquí cuéchi i, návāha squícu tāca jñuhun jeē yosó núū tútu. 23 Te quiví ún nacā jeē ndahú ñahan cáñuhun sēhe jín ñahan cándeca yiquín, chi ma cúnihīn ña cunu yachī ña. Chi yōhyo xeēn coo jñundóho ini ñayiví, te quiji castigo xeēn siquí ñáyuu yáha. 24 Te sava i cuu nuū guerra, te sava i quingoo preso nde tācá inga nación. Te ñáyuu tāca gá nación ndacu ñihin i jniñu nuū ñáyuu ñuu Jerusalén, nde jīnu tiempo jeē jéhe Yaā Dios jñuhun ndacu i jniñu.

Ndese coo quiví ndiji Yaā ní nduu tē
(Mt. 24.29-35, 42-44;
Mr. 13.24-37)

25 Yūcuán na te coo seña nuū nīandii jín núū yoó jín núū quími. Te ini ñayiví te quiji jñundóho xeēn siquí ñáyuu tācá nación. Te cunéé ni i, te yūhú i jeē ñihin xeēn mar te ndónda xeēn ndute mar vēji nuū ñuhun. 26 Te cuu sōo sava ñáyuu jeē cáyūhú i cándetu i tāca jñundóho quiji siquí ñayiví. Te tāca jéé ín ándiví chi quisi i. 27 Yūcuán na te coto ñáyuu nuū maá rí, Yaā ní nduu tē, ndiji ri jín vícō, te condiso ri cuehē poder, te yōhyo luu kujéhu ri. 28 Te núu ni quejéé tāca jniñu yáha, te ndeyí coo ni rō, te cocunuū rō

andiví, chi je yajni jnama ya rohó. Achí yá jíin de jíjnáhan de.

²⁹ Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu. ³⁰ Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní. ³¹ Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayīvī.

³² Jendaá cahān rī jíin ró jeē ma cúu ndihī ñayuu tiempo un, chi nde squícu ndihī jniñu ún. ³³ Andiví jíin ñáyīvī chi naa, te tāca jnúhun cáhān rī chi ma náā, chi ndihī squícu.

³⁴ Te coto ma stívi ró maá ró jíjnáhan ró jéē sáha ró táca cuéchi, jíin jéē najini ró, jíin jéē cujnēñu ró jíin táca ndajniñu cotecu rō, návāha tú sanaa ni rō te quee quivī un síquī rō. ³⁵ Chi nájnūhun jeē núu ñin trampa, súcuan quee jnūndóho síquī ñayuu cáyūcu ní cáhnu ñayīvī. ³⁶ Núu súcuan te ndito coo ni rō, te níni cácan tahu rō, návāha cuu cācu ró núu táca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquivī steén yā jnūhun ini templo, te ndijnahan jecuāā jéndōo ya nde yucu jeē naní Olivos. ³⁸ Te tāca jénéhen quécoo ñayuu nuū yā ini templo jeē cúni sōho i jnūhun steén yā.

Jeē ní casquíjnáhan de jnūhun jni de Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuya- jni vico pascua jeē cáyeji ñayuu hebreo pan jeē tú na levadura yíhi. ² Te sutū cácujuhnu jíin tée cástéén tutu ley, ni canducú yuhu de modo cahni de Jesús, chi cáyūhú de jeē quitī ni ñayuu.

³ Te ni quivī Satanás ini anuá Judas jeē nastúu de ya. Te suni nání de Iscariote, te cúu de ñin jnáhan jeē ndihúxí uū tēe apóstol. ⁴ Te ni jehēn de ni candajnūhún de jíin táca sūtū cácujuhnu jíin tée cándiso jniñu ini templo, núu ndese nastúu de ya nuū tée un jíjnáhan. ⁵ Te tēe un ní cacusī ni de, te ni cajejnūhun de jeē cuáha de xūhun núu Judas. ⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quivī vico jeē cáyeji ñayuu pan jeē tú na levadura yíhi, te suni quivī un cájehni i londe nájnūhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajnūhún de ya: ¿Ndé nuū cuní ni jéē quisátūhva ná? áchí de.

10 Te ni cahān yā jīn de:

Cuāngoo ñuu yūcuán, te núu ni quivícoo ró te najnáhan ró jīn ñn tēe ndíso quīyí ndute. Te condiquīn rō de quihīn rō jīn de nde vehe nuū ndívi de.

11 Te cahān rō jīn tēe chíí vehe ún: Achí máá Maestro: ¿Ndé ñn cúu cuarto vehe ní cuāha núu ní núu cuxíni ya vico pascua jīn tēe cáscuáha jīn yá, achi rō. 12 Yūcuán na te stéén de ñn cuarto cáhnu nde xinī vehe jeē je íyó túhva, te yūcuan sátúhva ró jēe cuxíni yó, achí yá.

13 Te cuangoo de, te ni canihīn de nájnūhun ni cahān yā. Te ni casátúhva de jeē cuxíni ya vico pascua.

14 Yūcuán na te ni jinū hora jeē cuxíni, te ni quee Jesús, te ni cucōo ya mesa jīn tēe cácuu apóstol. 15 Te ni cahān yā jīn de:

Yōhyo ni cuu ni rī cuxíni rī jīn ró jijnáhan ró vico pascua yáha, vijna nde ná tu cuu rī.

16 Chi cáhán rī jīn ró jeē ma caji cuiṭi gā rī vico pascua, chi nde quiji quivī ndacu Yaā Dios jniñu ní ñayīví, te sáa te caji tucu ri, achí yá.

17 Te ni quihin ya ñn copa ndūxi uva, te ni nacuatáhú yá, te ni cahān yā:

Quihin copa yáha, te coho ró jīn jnáhan ró. 18 Chi cáhán rī jīn ró jeē ndé vijna te ma cóho ga rī ndūxi uva, chi nde quiji quivī ndacu Yaā Dios jniñu ní ñayīví, te sáa te coho tucu ri. Achí yá.

19 Te ni quihin ya pan, te ni nacuatáhú yá, te ni tahú

cuéchí yá, te ni jēhe ya nuū de jijnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuéchi ró jijnáhan ró. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

20 Te suni súcuan ni sáha ya jīn copa ndūxi uva, ná ni cuu ni cuxíni ya. Te ni cahān yā jīn de:

Yāha cúu niñī rī jeē cuáha rī jeē cúu contrato jeé, te cati jeē ndundoo cuéchi ró jijnáhan ró.

21 Te vijna chi tēe nastúu ruhū, néne de jīn rī nuū mesa yáha. 22 Chi ruhū, Yaā ní nduu tēe, jendaá cúu jeē quihīn rī cuu rī nájnūhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

23 Yūcuán na te ni caquejéé de cácajnūhun jnáhan de ndé ñn de cúu jeē nastúu de ya.

Jeē ní cacahān de siquī ndé ñn de cújéhu ga

24 Yūcuán na te yōhyo ni cacahān de siquī ndé ñn de cújéhu ga nuū jnáhan de.

25 Te ni cahān Jesús jīn de:

Rey tācá nación chi cándacu nīhin de jniñu nuū ñayuu cájni de, te cácahān i jeē tēe cása ha vāha cúu jeē cácu jéhu nuū i. 26 Te róhó jijnáhan ró, ma cóo ró súcuan. Chi núu ndé ñn ró cújéhu ga, te sa nasáha lulí ró maá ró. Te núu ndé ñn ró ndácu jniñu, te sa nasáha ró máá ró tēe jéjniñu nuū jnáhan. 27 ¿Te ndé ñn cúu jeē cujéhu ga, á tēe yéji nuū mesa, chí tēe jéni cohō? ¿A

nasūu tēe jeē yéji nuū mesa cúu jeē cujéhu ga? Te ruhū nasūu súcuan cúu ri, chi ni nasáha ri maá rí nájñuhun tēe jéjñíñu nuū rō, chi vēji ri sáha ri jeē nihín tahú rō.

28 Te máá ró cácuu tēe jeē niní cáhīn jíin rí tāca quívī jeē ndóho ri jñūndóho. 29 Núu súcuan te nájñuhun ni sáha Tátá rī jeē ndácu ri jñíñu, suni súcuan sáha ri jeē ndacu ró jñíñu jíjñáhan ró. 30 Te caji rō coho ró jíin rí ini ñuu nuū ndacu ri jñíñu. Te cucōo ró ññ ññ mesa jeē sándaā rō jñíñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jíní de ya

(Mt. 26.31-35; Mr. 14.27-31; Jn. 13.36-38)

31 Te suni ni cahān maá Jítóho yō jíin Simón Pedro:

Simón, cuni sōho ró, chi ni jicān Satanás rohó jíjñáhan ró jéē coto ndee rohó nájñuhun jeē síjin trigo, te stúu ndé ññ ró cácuu nájñuhun paja jeē nayūhu ró, te ndé ññ ró cácuu nájñuhun trigo jeē candíje nīhin ró. 32 Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jñáhan ró jíin jñúhun ri. Achí yá.

33 Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

34 Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jñññ ñayuu rohó, te

uní jínu cahān rō jeē tu jíiní rō ruhū, achí yá.

Jeē ní cuyajni coto ya jñūndóho

35 Yūcuán na te ni cajñuhun yá de jíjñáhan de:

Ná ni tají rí rohó ní jengoo ró jéē tu ní cóndiso ró ññuu ni yijñi xūhún ni ndijēn, ¿te á ní ñyo ññ jeē ní cumani nuū rō? Achí yá.

Te ni cacahān de:

Tú ni ññ ní cumani.

36 Te ni cahān yā:

Nde vijna sa cáhán rī jeē cóndiso ró ññuu ró, te suni yijñi xūhún. Te tēe jeē tu névāha espada jeē coto de máá de, na xíco de ticāchí de te na cuáan de. 37 Chi cáhán rī jíin ró jeē quee quívī ndoho yó jñūndóho, chi cánuú squícu jñuhun yáha jéē cahán nuū tútu siquī rī: Sáha ñayuu jíin yá nájñuhun casáha i jíin tēe sáha cuēchi xeēn, achí tutu. Chi tāca jñuhun un jéē yosó cáhán siquī rī, chi squícu nahín, achí yá.

38 Yūcuán na te ni cacahān de:

Yāha íyó úu espada, achí de.

Te ni cahān yā jíin de:

Jíin jéē yáha-ni, achí yá.

Jeē ni jicān tahú yā nuū huerto Getsemani

(Mt. 26.36-46; Mr. 14.32-42)

39 Te ni quenda ya cuahān yā yucu Olivos nájñuhun sáha sáha ya. Te tēe cáscuáha jíin yá ni candiquīn de ya cuangoo de jíin yá. 40 Te nuū ni jíin yā yūcuán, te ni cahān yā jíin de:

Cacān tahú rō jíjñáhan ró jéē chindéé ñáhán yá rohó jéē ma sáha ró cuēchi núu coto ndee jeneé rohó, achí yá.

41 Te ni jica ya jecu, cūhva jeē jicá jínú yuū jeē squiín. Te ni jecuiñī yití yá, te suhva ni jicān tahú yā:

42 Tātā, núu cúní ni te tejiyo ní jnūndóho yáha jéē ma quíji siquí ná. Te nasūu jéē cuní maá ná, chi jeē cuní maá ní na cóo, áchí yá.

43 Te ni cane ñn ndajéhé andiví núu yā, te ni jēhe fuerza nuū yā. 44 Te cúcuíhyá ndasí ni yā jeē quiji jnūndóho siquí yā, te ni nducú ndeyí gá yā ni jicān tahú yā. Te ni cane jnañū yā, te too nuū ñūhun nájñūhun yúyú náhnu niñī.

45 Te ná ni ndocuiñī yā jeē ni jicān tahú yā, te ni ndee yā nuū téē cáscuáha jín yá. Te ni jito ya jeē cáquixí de, chi tuá cáhīyo ndeyí ni de cacān tahú de jeē cácuquíhyá ndasí ni de.

46 Te ni cahān yā jín de:

¿Naun cáquixí rō? Ndonga te cacān tahú rō jeē chindéé ñáhán yá rohó jéē ma sáha ró cuéchi jeē cóto ndee jeneé rohó. Achí yá.

Jeē ní cajñi de Jesús

(Mt. 26.47-56; Mr. 14.43-50; Jn. 18.2-11)

47 Te sá cáhán gā yā súcuan, te ni quecoo cuehē ñayuu. Te tēe nání Judas, ñn jñahan jeē uxí uū tēe scuáha jín yá, yósnūu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. 48 Te ni cahān Jesús jín de:

Judas, ¿á jín jéē téchūhu ró ruhū cúu jeē nastúu ró ruhū, Yaá ní nduu tēe? Achí yá.

49 Te tēe cáhīn jín yá, ni cajito de jeē ní quejéé cúu, te ni cacajñūhún de ya:

¿A ndonda ná jínahan ná siquí de jín espada? áchí de.

50 Te ñn de ni stují de mozo sutū cujéhnu ga, chi ni jehnde de sōho lado váha. 51 Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de. 52 Te ni cahān yā jín sūtū cácujeñnu jín téē cándiso jniñū ini templo jín táca téē jéñnu jeē ní quecoo de jeē jñi de ya:

¿Te va tēe cuíhná cúu ri jeē véjicoo ró jín espada jín yu-jnu jeē jñi ró rúhū jeē súcuan?

53 Táca quívī ni ine ri jín ró jijnahan ró ini templo cáhnu, te tu ní cájñi ró rúhū. Te vijna te ni quee hora jeē jñi ró rúhū jín jéē sáha ró táca jniñū jeē ndácu jeneé jéē ndeé núu néē. Achí yá.

Jeē ní cachi Pedro jeē tu jín de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Te ni cajñi de ya cuango de jín yá vehe sutū cujéhnu ga. Te Pedro chi jicá-ni ndíquín de ya. 55 Te táca policía ni cascáyú de ñūhūn ini patio, te ni condúu de yuñūhún un cáyūcú de. Te suni ni cucōo Pedro jín de.

56 Te ñn ñahan jéjñiñū ini vehe un, ní jito ña nuū de jeē néne de yuñūhún. Te ni jito vāha ña nuū de, te ni cahān ña:

Tēe yáha suni ni jica de jín téē ún, áchí ña.

57 Te máá de tu ní cáchi de, chi ní cahān de:

Tu jíní rī tēe ún, áchí de.

58 Te ní cunúu jecu gā, te ní jito tucu inga ñayuu nuū Pedro, te ní cahān:

Róhó, suni jnáhan tāca tēe un cúu ró, áchí.

Te ní cahān Pedro:

Nasūu cúu ri, hombre, achí de.

59 Te ní cuu nájñūhun ñin hora gā, te ní cahān ñihin inga de:

Jendaá ndije jeē tēe yáha ní jica de jín tēe ún, chi suni tēe región Galilea cúu de, áchí de.

60 Te ní cahān Pedro:

Hombre, tu jíní rī na jñūhun cáhán rō.

Te sá súcuan cáhán gā de, te ní cana-ñi líhli. 61 Yūcuán na te ní ndió cóto máá Jítóho yō, te ní jito ya nuū Pedro. Te ní nucūhun ní de jñūhun ní cahān yā jín de: Nde ná tu cana líhli, te yūhu ró te cahān rō uní jínu jeē tu jíní rō ruhū.

62 Te ní quenda de cuahān de, te yōhyō ní ndahyū de jeē ní cachi de jeē tu jíní de ya.

Jeē ní casácatā de nuū yā

(Mt. 26.67-68; Mr. 14.65)

63 Te tāca tēe cándito Jesús, ní casácatā de nuū yā, te ní cacani de ya. 64 Te ní cajesi de sahma nuū yā, te ní cacani de nuū yā, te ní cacahān de:

Cachi ndé ñin cúu jeē ní cani róhó, áchí de.

65 Te cuehē gā jñūhun súcuan ní cacahān neé de jín yá.

Jeē ní indichi Jesús nuū junta tēe cácujeñnu ga

(Mt. 26.59-66; Mr. 14.55-64; Jn. 18.19-24)

66 Te jeē ní cundijin, te ní candutútú táca tēe jéñnu cándacu jniñu nuū ñayuu hebreo, jín sūtū cácujeñnu, jín tēe cástéén tutu ley Yaā Dios. Te cuangoo de jín yá nuū junta tēe cácujeñnu ga, te yūcuan ní cacajñūhún de ya:

67 Cachi, ¿á máá ró cúu Cristo jeē ní tají Yaā Dios? Achí de.

Te ní cahān yā jín de:

Vesú na cáhán rī jeē suu ri cúu, te ní ma candije cuiti rō.

68 Te suni núu cajñūhun máá rí rohó jijnáhan ró, te suni ma stió cuñí rō nuū rī, ní ma siaá rō ruhū. 69 Te ruhū, Yaā ní nduu tēe, tāca quívi jeē quíji conene ri lado váha máá Yaā iyó poder, achí yá.

70 Yūcuán na te ndihi de ní cacajñūhún de ya:

¿A máá ró cúu Sēhe Yaā Dios núu súcuan?

Te ní cahān yā jín de:

Suu ri cúu, nájñūhun cácahān rō, achí yá.

71 Yūcuán na te ní cacahān de:

¿Na testigo gā jíní ñūhún yó núu súcuan? Chi ní cajini sōho yó jín yuhu máá de jeē cahān ndevāha de jeē cúu de Sēhe Yaā Dios. Achí de jijnáhan de.

Jeē ní indichi Jesús nuū Pi-lato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni canducuiñi ndihi de, te cuango de jín yá nuū Pilato.

² Te yūcuan ní caquejé de cácahān de cuēchi siquī yā:

Ni canihīn na té yáha jē stón da de ñayuu siquī tohō. Te cáhān de jeē tú vāha jeē cuāha ná xūhun renta nuū rey nación Roma jeē ndácu jniñu nuū nación na. Te suni cáhān de jeē maá de cúu Cristo, Rey jeē ní tají Yaā Dios. Achí de jijnáhan de.

³ Yūcuán na te Pilato ni cajñuhún de ya:

¿A maá ró cúu Rey ñayuu hebreo?

Te ni cahān yā:

Suu rī cúu, nájñuhun cáhān rō, achí yá.

⁴ Te ni cahān Pilato jín sūtū cácujeñu jín ñayuu cuehē ún:

Tú ni ññ jñuhun stívi cáhān tē yáha jē nihín rī cuēchi siquī de, achí de.

⁵ Te maá de víhyá gā ni cacahān de:

Tē yáha stón da ndasí de ñayuu siquī tohō jín jñuhun stéén de ní Judea. Chi ni quejé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajñuhún de ñayuu núu tē región Galilea cúu ya. ⁷ Te nuū ní cacahān ñayuu jeē cúu ya tē Galilea, te ni ndacu de jniñu jeē na quíngo de jín yá nuū Herodes, tē cúu gobernador Galilea. Chi quivī ún suni íne Herodes

ñuu Jerusalén. ⁸ Te nuū ní jito de nuū Jesús, te yōhyo ni cusñi ni de, chi je ni cuu cuehē tiempo jeē cuní de coto de nuū yā. Chi ni nihín de jñuhun ya, te ñuhun ni de jeē sáha ya ññ jniñu jéñu coto de. ⁹ Te ni cajñuhún de ya cuehē jñuhun, te tu ní stíó cuiñí yā ni ññ jñuhun nuū de. ¹⁰ Te suni cáhān tāca sūtū cácujeñu jín tē cástéén tutu ley, te nihín ni cacahān de cuēchi siquī yā. ¹¹ Yūcuán na te Herodes jín táca soldado de ni cacahān neé de jín yá, te ni casacatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quíndeca de ya nuū Pilato. ¹² Te maá quivī un ní candumaní jñáhan Pilato jín Herodes, chi ichi yátá ni caquití jñáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato táca sūtū cácujeñu jín táca tē cándiso jniñu jín táca gá ñayuu, ni candutútú. ¹⁴ Te ni cahān de:

Ni caquindeca ró tē yáha núu rī, jeē cácahān rō jeē stón da de ñayuu siquī tohō. Te je ni stichí rī de, ni cajito jínúu rō. Te tu ní nihín rī ni ññ cuēchi siquī de nájñuhun jeē cácahān rō. ¹⁵ Te ni Herodes, tu ní nihín de, chi ni natajítucu de tē yáha núu rī. Te tú cuiñi ni ññ cuēchi ní sáha de jeē cúu de. ¹⁶ Núu súcuan te na cuāha rī castigo de, te siáá rī de quihín de, achí Pilato.

17 Te íyó costumbre jeē t̄acá vico pascua siaá Pilato in preso jeē cuní ñayuu. 18 Te ñayuu cuehē ún, inuú-ni ni cacana jee i:

Na cúu t̄ee jíñá, te siaá ní Barrabás, achí i.

19 Te Barrabás íne de vecāa siquī jeē ni stóna de ñayuu siquī tohō ini ñuu ún, te ni jehni de ndīyī. 20 Te Pilato cuní de siaá de Jesús, te ni cahān tucu de jíñ ñáyuu. 21 Te máa i víhyá gā ni cacana jee i:

Cata caa ní de jicā cruz, na cúu de, achí i.

22 Te ni cahān tucu de jíñ i vuelta unī:

¿Na cuēchi ni sáha de núu súcuan? Tu ní níhín cuiṭi rī ni in cuēchi siquī de jeē cúu de. Núu súcuan te na cuáha ri castigo de, te siaá rī de quihīn de, achí Pilato.

23 Te víhyá gā ni cacana jee ñayuu un, ní cacahān nīhin i jeē na cúu yā jicā cruz. Te máa i jíñ táca sūtū cácujeñnu, ni cacana jee ndasí i. Te ni cundeyí i ni cascāhān i Pilato jeē na cúu yā. 24 Yūcuán na te ni ndacu Pilato jniñu jeē na cóo nájñuhun cácuñi i. 25 Te ni siaá de t̄ee jeē ní cajicān i, t̄ee jeē íne vecāa jeē ni stóna de ñayuu siquī tohō te ni jehni de ndīyī. Te ni jēhe de jñuhun jeē na cúu Jesús nájñuhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

26 Te cuango t̄acá soldado jíñ yá jeē cahni de ya jicā cruz. Te ni canihīn de in t̄ee ñuu Cirene, nání de Simón,

vendiji de jeē ni jéhēn de rancho. Te ni catejñíñu de t̄ee un jeē cóndiso de cruz yā quihīn de yatā yā.

27 Te cuehē ndasí ñáyuu ndíquín i yatā yā cuango i. Te suni cuehē ñahan cuango ña, te cándahyū cohó ña jeē cácuñihyá ni ña jehē yā. 28 Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyú rō jehē maá ró jíñ jéhē sēhe ró jíñáhan i. 29 Chi quee quivī jeē coo jñūdóho xeēn siquī rō, te cahān rō: Yōhyo ndetū t̄acá ñahan númá, jíñ jēē tu ní scácu sēhe, jíñ jēē tu ní cóndeca yiquín, chi tú sēhe ña jeē jnahuhū ni ña jeē ndóho i, achí rō jijnáhan ró. 30 Quiṭi ún te quejéé ñáyuu cahān i jíñ táca yucu: Cotúu siquī rī jijnáhan ri návāha cuu rī. Te suni jíñ táca loma: Casi siquī rī jijnáhan ri, achí i. 31 Chi núu cásaḥa xeēn i jíñ rúhū jeē tú na cuēchi ri, te nagā ni cuu jeē ma cóo xeēn siquī ndihī ñayuu chi íyó cuēchi i. Achí yá.

32 Te suni cuango de jíñ úu t̄ee ni casáha cuēchi xeēn, jeē suni cuu de jíñ yá. 33 Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndíndúu t̄ee ni casáha cuēchi xeēn un núu yā gā cruz, in de lado váha ya, te inga de lado jecó yá. 34 Te níñí jēē súcuan cúu, te ni cahān Jesús:

Tátā, cone cáhnu ni ni núu de jíñáhan de, chi tu cájini de

na vé casáha de, áchí yá.

Te soldado un ní casáha de sorteo jeē siquí ndese nihīn iin iin de sahma ya. ³⁵ Te cáhīn ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnama de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te tācá soldado suni ni casacatá de nuū yā, chí ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jíin yá:

Núu máá ró cúu Rey ñayuu hebreo, te na jnama ró máá ró, achí de.

³⁸ Te suni ni iyo jnūhun jeē ndeé xinī cruz yā jeē cahán na siquí ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

³⁹ Te iin jeē ndindúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnama ró máá ró te suni jnama ró ndindúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chí inuú cándoho yó jíin Yaā yáha. ⁴¹ Te máá yó chí vetū-ni cándoho yó, chí yāha cánihīn yō castigo siquí jniñu neé ní casáha yó. Te Yaā yáha chí tú ni iin cuēchi ní sáha ya, achí de.

⁴² Te ni cahān de jíin yá:

Jesús, nucūhun ni ni sáña jeē quéjéé ní ndacu ní jniñu, áchí de.

⁴³ Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, áchí yá.

Jeē ní jíhī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee ní cáhnu nde cahunī. ⁴⁵ Te ni cujnuú níandii. Te sahma ndíta caa jeē ndihyú cuarto i ini templo cáhnu, ni ndatā-ni sava sava. ⁴⁶ Yūcuán na te ni cana jee Jesús:

Tátā, naquihin ní ánuá na, áchí yá.

Te súcuan ni cahān yā, te ni jíhī-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

⁴⁸ Te ndivii ñayuu cáhīn yūcuan ní cajito i tāca jéé ní cuu, te cácani i yīqui jíicā i jeē cájnahuhū ni i, te ni nandió cóo i cuanungoo i. ⁴⁹ Te tāca ñáyuu cájini jnáhan jíin yá, jíin tāca ñahan Galilea jeē ní cajica ña jíin yá, cáhīn jíicā ña cájito ña tāca jéé ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni iyo iin tēe vāha tēe ndaā, nání de José. Te tēe ñuu Arimatea ndañūū Judea cúu de. Te cúu de jnáhan tāca

tée hebreo cácujuhnu ga jeē casáha junta. ⁵¹ Te ñúhun ni de jeē quiji quiv̄i jeē ndacu Yaā Dios jniñu, te suni tu ní núnjahan ni de jeē ní casándaā junta un jēē cúu Jesús. ⁵² Te tēe un ní jehēn de nuū Pilato, ni jicān de yiqui cúñu Jesús. ⁵³ Te ni snúu de ya jicā cruz, te ni chusúcun de ya ñn sahma cuitá. Te ni chindūji de ya ini ñn yaū jeē ní caan jicā ñn cava, nuū ná tu quindūji ndīyi. ⁵⁴ Te quiv̄i un cúu quiv̄i casátūhva ñayuu, chi jehíni un quéjéé quiv̄i ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña tācá perfume jíin aceite yucū jeēn asñ. Te ni candetátú ña quiv̄i ndétátú, nájñuhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quiv̄i domingo, te ni jinūcoo tucu ñahan un núu ní yindūji Jesús, te cándahá ña tācá perfume jíin aceite ni casátūhva ña. Te suni cuangoo sava ga ñahan jíin ña. ² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi. ³ Te ni quiv̄icoo ña yaū ún, te tuá yiqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndīyi.

Sáa te ni cajito ña uū ndajéhé Yaā Dios jeē cáa nájñuhun tēe, cáhīn ya xiin ña, te cáñuhun ya sahma ndíndēé. ⁵ Te yōhyo ni cayūhú ña, te ni cajexin ña nuū ña nde nuū ññuhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu? ⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhīyo cuēchi, jeē jñi de ya cahni de ya jicā cruz, te nuū uní quiv̄i te natecu yā. Achí ndajéhé un.

⁸ Yūcuán na te ni canucūhun ni ña tāca jñuhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jñuhun yáha núu ndihúxí ñn apóstol jíin núu tāca gá de. ¹⁰ Te ñahan ní canacani jñuhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tācá apóstol chi cájeni ni de jeē jñuhun cánéé cáñúú cácahān ña, te tu ní cácañdije de.

¹² Te vēsú súcuan, te Pedro ni quenda de, te jínu de cuacandéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náa ni de jeē ní jito de jeē tuá yā.

Jeē ní ndajñuhun yá jíin úu de íchi cuáhán Emaús
(Mr. 16.12-13)

13 Te suu quivī un cuángoo uū jnáhan de ñn ñuu naní Emaús, jeē jicá nájñuhun uxī ñn kilómetro jíin ñuu Jerusalén. 14 Te cándajnūhún de siquī tācá jniñu jeē ní cuu ún. 15 Te níni cándajnūhún de te cácajnūhun jnáhan de, te máá Jesús ni cuyajni ya yatā de, te jíca ya cuahān yā jíin de. 16 Te ni sáha jíin de jeē tu ní cánacuni de ya, vēsú cájito de nuū yā. 17 Te ni cajñuhun yá de:

¿Na jñuhun cándajnūhun ró cájica ró? ¿Te najehē cácuquíhyá ni rō? Achí yá.

18 Te ñn de jeē naní Cleofas ni cahān de jíin yá:

Ndihi cuiti ñayuu cájini i tācá jniñu ní cuu ini ñuu Jerusalén tāca quivī yáha. ¿Te á máñúhún-ni níhín cúu jeē ní quee ní ñuu un jéē tu jíni ni na vé ni cuu? Achí de.

19 Te ni cajñuhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñuhun Yaā Dios. Te jíin poder Yaā Dios ni sáha ya tācá jniñu jéhnu te ni nacani ya jñuhun, jito jínúu Yaā Dios jíin tāca ñáyuu. 20 Te sutū cácujuhnu jíin téē cándiso jniñu nuū ná, ni canastúu de ya nuū tāca téē Roma, te téē un ní casándaā de jeē cúu yā jicā cruz. 21 Te máá ná ní cañuhun ni na jéē máá yá jnama ya nación na Israel nuū ñáyuu Roma nuú. Te siquī tācá jniñu yáha, te ni cane inga jñuhun. Chi vijna je íyó úní quivī jeē ní cuu

ún. 22 Te sava ñahan cájini jnáhan ná jíin, ni canacani ña ñn jñuhun jeē yóhyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyi ún. 23 Te tuá ni cájito ña yiqui cúñu yā. Te ni ndecoo ña nuū na jíjñahan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. 24 Te ni jengoo sava jnáhan ná ndé yaū ndīyi ún, te ni cajito de jeē súcuan íyó, nájñuhun ni cacahān ñahan ún, te tu ní cájito cuiti de nuū yā.

25 Yūcuán na te ni cahān máá yá jíin de:

Tēe tu cájecūhun cuiti ni cácuu ró. Yóhyo uhū cácandíje ró tāca jñuhun Cristo ni cacahān tēe ni canacani jñuhun Yaā Dios nde jenahán. 26 ¿Te á tu súcuan ní jíni ñúhún ndoho Cristo tāca jnúndóho yáha, te sáá te quinhun yā nuū lúu cujéhnu ya? Achí yá.

27 Te ni nacani cáji yá tāca jñuhun jeē yosó nuū tútu íi jeē cahān siquī máá yá. Te ni quejéé yá jíin jñuhun ni tee Moisés, te ni cahān gā yā tāca jñuhun jeē ní catee téē ni canacani jñuhun ya nde jenahán.

28 Te nuū ni jínūcoo de ñuu nuū cuángoo de ún, te Jesús ni sáha ya jeē cáca ga yā quihñn yā. 29 Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quivī ya jeē quéndōo ya jíin de. 30 Te nuū ní cucōo ya mesa jeē cáji yā

jiín de jíjnáhan de, te ni quihin ya staā, te ni jicān tahu yā, te ni tahu cuéchi yá, te ni jēhe ya nuū de. ³¹ Te jeē sāha ya súcuan, te nájñūhun ni cananune tinūú de, te ni canacuni de ya. Te ni ndoñūhún-ni ya nuū de cuahān yā. ³² Te ni cacahān maá de:

Jendaá jeē yóhyo ni cacusiñ ni yō ná ni nacani ya jñūhun nuū yō ichi ún te ni castūhun cáji yá jñūhun cáhán tutu ñ. Achí de.

³³ Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni canajnáhan de jíín ndihúxi ñn ga apóstol, cáyūcu tútú de jíín sava ga jnáhan de. ³⁴ Te ni cacahān tēe cáyūcu tútú un:

Jendaá ndije jeē ní natecu maá Jítoho yō, te ni nane ndijín yā nuū Simón, achí de jíjnáhan de.

³⁵ Yūcuán na te ndindúú tēe un ní canacani de jñūhun ndese ni najnáhan ya jíín de ichi, jíín ndese ni canacuni de ya ná ni tahu cuéchi yá staā.

Jeē ní nane ya nuū tēe cáscuáha jíín yá

(Mt. 28.16-20; Mr. 16.14-18; Jn. 20.19-23)

³⁶ Te sá cácahān gā de tāca jñūhun yáha, te ni jecuiñi-ni Jesús mēhñú de jíjnáhan de. Te ni cahān yā jíín de:

Ndeyí sñ coo ni rō jijnáhan ró, achí yá.

³⁷ Te ni candacoto ñyo de, ni cayūhú ndasí de, chi ni cajeni ni de jeē ñn ánuá cúu ya. ³⁸ Te ni cahān yā jíín de:

¿Naun cáyūhu ró, te naun cájeni siquí ni rō súcuan? ³⁹ Condéhé ndaha ri jíín jéhe rī, te cuni rō jeē maá rí cúu. Jñi ruhū te cuni rō, chi ñn ánuá tu névāha cūñu ni yiqui nájñūhun cájito ró jēe névāha maá rí, achí yá.

⁴⁰ Te jeē ni cáhān yā súcuan, te ni steén yā ndaha ya jēhe yā nuū ni yñi ndūyu cāa. ⁴¹ Te yóhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíín de:

¿A cánevāha ró jecu jeē cáji rī yāhá? achí yá.

⁴² Yūcuán na te ni cajēhe de ñn pedazo chācá ní tau nuū yā, jíín ñn pedazo ñahmā ndūxi yocō. ⁴³ Te ni quihin ya, te ni yeji yā nuū de jíjnáhan de. ⁴⁴ Te ni cahān yā jíín de:

Tāca jēe ní cuu jíín rí cúu jeē ni cáhān rī ná ni ine ri jíín ró jíjnáhan ró ndé saá, jeē cánuú squícu tāca jñūhun ri jeē yosó núu tátu ley Moisés, jíín núu tācá tutu tēe ni canacani jñūhun Yaā Dios, jíín núu tátu salmo, achí yá.

⁴⁵ Te ni nune ya jeē níjnūni de, návāha cuu jecūhun ni de tāca jēe cahān tutu ñ. ⁴⁶ Te ni cahān yā:

Súcuan cáhān nuū tátu jeē ruhū Cristo, cánuú cuu rī, te nuū uní quivī natecu rī. ⁴⁷ Te cuitē núu jñūhun ri jeē cánuú nacani ni ñayuu jeē stóo i cuéchi i, te cone cáhnu ni Yaā Dios nuū i. Te ñuu Jerusalén quejéé cuitē núu jñūhun yáha, te quihñ nuū ñayuu tācá nación. ⁴⁸ Te maá ró cácuu tēe nacani jñūhun tācá jñiñu ní

cajito ró. ⁴⁹ Te taji rí Espíritu Santo quiji ya nuū rō jijnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quiji nde andiví. Achí yá.

Jeē ní ndaaya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jín de jijnáhan de. Te ni ndonehen ya ndindúú ndaha ya, te ni jicān tahu yā jehē de. ⁵¹ Te ní ní jícán tahu yā jehē de, te ni cujiyo-ni ya nuū de, ni ndaa ya cuanuhun yā andiví. ⁵² Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusī ni de. ⁵³ Te ní ní cáhīn de ini templo cáhnu, cánacuatáhú de nuū Yaā Dios. Te ni cuu. Amén.

JNUHUN VAHA NI TEE SAN JUAN

*Yaā naní Jnúhun Yaā Dios
ni nduu ya tēe*

¹ Nde xīhna ñúhún ná ni jecōo ndihi jeē iyó, te je iyó Yaā naní Jnúhun Yaā Dios, chi steén yā ndihi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya.

² Máá yá ndeé yá nde jeē xīhna ñúhún jíin Yaā Dios. ³ Te ni sáha Yaā Dios jeē jíin máá yá ni jecōo ndihi tāca jéē iyó. Te ma jécōo ni ñin jeē iyó núu tu ní sáha máá yá. ⁴ Máá yá sáha jeē técu ndihi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios.

⁵ Te Yaā cúu luz ún ndíndēe núu ñayuu tu cájica ndaā, jeē nájnūhun cáhīyo i nuū néē. Te ñayuu cáhīyo nuū néē tu cúu ndahva i luz yā.

⁶ Te ni ñyo ñin tēe jeē ní tají Yaā Dios, naní de Juan. ⁷ Tēe un ní quiji de jeē nácani cájí de jnúhun máá Yaā cúu luz, návaha candíje tāca ñayuu jeē jíin jnúhun cáhán de. ⁸ Nasūu máá Juan cúu luz ún, chi cúu de ñin jeē ní nacani cájí jnúhun máá luz un. ⁹ Te máá Yaā cúu luz ndije jeē steén ini anuá tāca ñayuu, nde saá ní quiji ya ini ñayíví.

¹⁰ Te Yaā cúu Jnúhun Yaā Dios ni condee yā ini ñayíví, te vésú jeē jíin máá yá ní sáha Yaā Dios ñayíví, te ñayuu

ñayíví tu ní cácuni i cuatáhú i jeē maá yá cúu. ¹¹ Ni quiji ya nuū ñayuu maá yá nación hebreo, te ñayuu ún tu ní cájetáhú i ya. ¹² Te vésú súcuan te sava ñayuu chi ní cajetáhú i ya, te ni cacandíje i jeē sáha ya jehē i. Te nuū maá i ní jēhe ya jnúhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácacu ñayuu ini ñayíví, ni nasūu síquī jeē cácuni tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéē yóhoyo luu cújéhnu ya, chi máñúhún-ni ya cúu Sēhe Tátá yā, Yaā cújéhnu súcuan. Te máni máá jéē sáha ya jeē váha yóhó, te máni máá jnúhun ndaā cahán yā. ¹⁵ Te Juan ni nacani de jnúhun ya, te ni cahán de:

Yaā yáha cúu jeē ní cáhán rī náa áchí rí jeē Yaā quiji chi cújéhnu ga yā vésú ruhū, chi je iyó yá nde ná tu cacu ri, achí de.

¹⁶ Te ndihi yó ní canihīn yō cuehē ndasí jeē váha iyó núu yā, chi máni jeē váha sáha sáha ya jíin yó. ¹⁷ Moisés ni steén de ley Yaā Dios nuū ñayuu jenahán, te Jesucristo chí sáha ya jeē váha yóhó te steén yā tāca jnúhun ndaā Yaā Dios nuū yō. ¹⁸ Tú ni ñin ñayuu ni jíto cuítu nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

Jñuhun Jesús jeē ni cáhān Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajǎ i jecu sutū jǎn tēe grupo levita jeē cájejniñu inǎ templo, ni jengoo de nuū Juan, návāha cajñuhún de ndé in cūu Juan te na jniñu ndíso de. ²⁰ Te Juan cájǎ ní cachi de:

Nasūu rúhū cūu Cristo, achí de.

²¹ Te ni cacajñuhún tucu de:

Núu súcuan ¿te ndé in cūu ró? ¿A cūu ró Elías, tēe ni nacani jñuhun Yaā Dios nde jenahán, chí naún?

Te ni cahān Juan:

Nasūú de cūu ri.

Te ni cacajñuhún tucu de:

Núu súcuan ¿te á cūu ró tēe nacani jñuhun Yaā Dios jeē achí tutu iñ jeē quǎji?

Tuú, áchǎ tucu Juan.

²² Te ni cacahān tucu jǎn de:

¿Te ndé in cūu ró núu súcuan? Cachi nuū rǎ jǎnahan ri, chí jǎni ñuhún castūhun rǎ nuū tāca tēe ni catajǎ rúhū vējicoo ri. Cachi na jniñu ndíso ró ví.

²³ Te ni cahān Juan:

Máá rǎ cūu tēe jeē ni cáhān Isaías, tēe ni nacani jñuhun Yaā Dios nde jenahán, jeē quǎji ri cana jee ri nde nuū ñuhun téhé. Te cáhān rǎ jǎn ñayuu jeē na sátūhva i máá i, chí quǎji máá Jítóho yō. Achǎ Juan.

²⁴ Te tēe grupo fariseo cácuu jeē ní catajǎ tēe ni quǎjicoo ún.

²⁵ Te ni cacajñuhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quǎji nacani jñuhun Yaā Dios cūu ró?

²⁶ Te ni cahān Juan:

Ruhū chí jǎn ndute scuándute rǎ. Te mēhñu ró jǎnahan ró íne in Yaā jeē tu cájini rō. ²⁷ Te Yaā un cūu jeē ni cáhān rǎ jeē quǎji ya te cújehnu ga yā vēsú ruhū. Chí tú na vé jehnu cuiti cūu ri nuū yā, ni jeē cuajniñu ri nuū yā vēsú in jniñu lúli gá nájñuhun jeē ndajǎ rǎ correa ndijēn yā. Achí de.

²⁸ Súcuan ni cuu jeē ní candajñuhún de jǎn Juan nde Betábara jeē íne ichi núu cáne niāndii yūte Jordán, nuū scuándute Juan.

Siquǎ jeē cūu ya Londe Yaā Dios

²⁹ Te inga quivǎ un ní jito Juan nuū Jesús jeē véji ya nuū de. Te ni cahān de jǎn ñayuu:

Condēhe jǎnahan ró, chí yāha véji Yaā cūu Londe jeē ní tajǎ Yaā Dios, te cuu yā jeē sándoo ya cuēchi ñayuu ñayǎví.

³⁰ Yaā yāha cūu jeē ni cáhān rǎ jeē quǎji in Yaā cújehnu ndasǎ, chí je íyó yá nde ná tu cacu ri.

³¹ Te nde saá te tu ní jǎni rǎ jeē yāha cūu Yaā ní tajǎ Yaā Dios. Te ni quǎji ri jeē scuándute rǎ ñayuu ñuu yō Israel jǎn ndute, návāha stéén rǎ nuū i jeē suu ya cūu, achǎ Juan.

³² Te suni ni cahān gā de jñuhun ya:

Ní jito ri Espǎritu Santo, ní cuun ya ichi ándivǎ, cáa ya nájñuhun paloma, te ni quee ya xinǎ Jesús. ³³ Te nde

saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jée cúun Espíritu Santo te quendōo xinī ñn tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios.
 34 Te je ni jito ri ún, te nácani cájī rí jnūhun jeē máá yá cúu Sēhe Yaā Dios. Achí Juan.

Uū tēe jeē ní cana ya xīhna gā

35 Te inga quivī ún te Juan íne tucu de yūcuan jíin uū tēe cájica jíin de. 36 Te ni jito de nuū Jesús jeē jíca ya yūcuán. Te ni cahān de:

Condēhe jíjnáhan ró, chí yūcuan cúu Yaā cúu Londe jeē ní tají Yaā Dios.

37 Te ndíndúú tēe cájica jíin Juan ni cajini sōho de jnūhun yáha, te ni candiquīn de Jesús. 38 Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

39 Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caque-ndōo de jíin yá quivī ún, chí nájñūhun cacuūn jehíni cúu.

40 Te Andrés, ñani Simón Pedro, cúu ñn jeē ndíndúú tēe un jée ní cajini sōho jnūhun ni cahān Juan, te ni candiquīn Jesús. 41 Te Andrés, yachī ni jenanducú de ñani de Simón, te ni cahān de jíin:

Ni caquiijnáhan ri jíin Mesías, achí de. Te jnūhun un cúni cahān Cristo, Yaā ní tají Yaā Dios.

42 Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conani ró Cefas, achí yá. Te jnūhun un cúni cahān Pedro, jeē cuni cahān yūū.

Jeē ní cana ya Felipe jíin Natanael

43 Te inga quivī un cúni Jesús quihīn yā región Galilea. Te ni nihīn jnáhan ya jíin Felipe, te ni cahān yā jíin de:

Condiquīn ruhū na quihín yō.

44 Te Felipe cúu tēe ñuu Bet-saida, jeē cúu ñuu Andrés jíin Pedro. 45 Te ni jenanducú de Natanael, te ni cahān de jíin:

Ni canihīn jnáhan ri jíin Yaā jeē yosó jnúhun ya nuū tútu ley jeē ní tee Moisés, jíin núu tútu ni catee tēe ni canacani jnūhun Yaā Dios nde jenahán. Te Jesús sēhe José ñuu Nazaret cúu ya. Achí de.

46 Te ni cahān Natanael jíin de:

¿Te ndese cúu kujéhnu ñn tēe jeē ní cacu ñuu ndahú Nazaret?

Te ni cahān Felipe:

Quihín yō de cuni rō, achí de.

47 Te ni jito Jesús jeē véjī Natanael, te ni cahān yā:

Yáha véjī ñn tēe ndaā jeē cúu ndije yucūn Israel, chí tu stáhú cuiti de, achí yá.

48 Te ni cahān Natanael jīn yá:

¿Ndese jíní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná ine ró jéhē nundéhe higo, achí yá.

49 Yūcuán na te ni cahān Natanael jīn yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

50 Te ni cahān Jesús:

¿A máá jéē ni cáhān rī jeē ní jito ri rohó ná ine ró jéhē nundéhe higo, te jeē yúcuan cándije ró rúhū naún? Tuú chi coo jniñu jéhnú ga coto ró vésú jeē yáha, achí yá jīn de.

51 Te ni cahān gā yā:

Jendaá cahán rī jīn ró jijnáhan ró jéē nde vijna te coto ró jéē núne andiví, te tēcá ndajéhé Yaā Dios cándaa cánuu nuū ruhū, Yaā ní nduu tēe, achí yá.

Jeē ni jéhēn yā ñn vico nándāha ñuu Caná

2

1 Te ni yāha unī quiví, te ni iyo ñn vico nándāha ñuu Caná ndañū Galilea. Te yúcuan ine náná Jesús. 2 Te suni ni cacana i Jesús jīn tēe cáscuáha jīn yá, ni jehēn yā vico un jīn de. 3 Te ni ndoco vino. Te náná Jesús ni cahān ña jīn yá:

Ni ndoco vino i, achí ña.

4 Te ni cahān Jesús jīn ña:

¿Naun cáhān ni súcuan jīn ná nánā? Chi ná tu quee quiví jeē sáha ná jniñu jéhnú, achí yá.

5 Te náná yā chi ni cahān ña jīn ñáyuu cájeni cohō:

Sáha ró jijnáhan ró táca jéē cahān yā jīn ró. Achí ña.

6 Te yúcuan iyó iñū tenéjā yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te ñn ñn tenéjā un cánda cuhun cuñ xico chí ciento litro ndute. 7 Te ni cahān Jesús jīn ñáyuu cájeni cohō:

Scútú ndñ rō tēcá tenéjā yáha.

Te ni cascútú ndñ i. 8 Te ni cahān yā jīn i:

Vijna te quēen ró jecu te quindecá ró coto ndee tēe ndíto vico, achí yá.

Te ni cajendeca i nuū de. 9 Te ni séyühú de ndute jeē ní nduu vino, te tu jíní de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha. 10 Te ni cahān de jīn:

Tāca ñáyuu chi xihna gā vino váha cájēhe i, te núu je ni cajihí vāha ñayuu cáhīn vico, yūcuán na te jéhe de vino ndahú na. Te máá ró tucu ni sáha ró, chi nde jeē sándihí te jéhe ró vino jeē yóhoyo vāha ga jíhi, achí de.

11 Jniñu yáha jéē ni sáha Jesús ini ñuu Caná ndañū Galilea cúu jniñu jéhnú xihna ñúhún jéē ni sáha ya jeē steén yā poder yā. Te súcuan ni steén yā jeē yóhoyo cújéhnú ya. Te tēe cáscuáha jīn yá ni candíje de ya.

12 Te ná ni yāha jniñu yáha, te cuahān yā ñuu Capernaum jīn náná yā jīn táca ñani yā jīn tēe cáscuáha jīn yá. Te ni coyūcu yá yūcuán jecu quiví.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén. ¹⁴ Te ini templo cáhnu ni jito ya ñayuu cáxícó stiquī jín lanchi jín paloma, jín ñayuu castáyi xūhun, cáyūcú i nuū mesa i. ¹⁵ Te jeē súcuan ni jito ya, te ni sáha ya ñn cuarta ññi. Te ni scúnu ya tācá i ini templo, nde jín lanchi jín stiquī i. Te ni jete yā xūhun ñayuu castáyi. Te ni scotúú yá tāca mesa i. ¹⁶ Te ni cahān yā jín ñayuu cáxícó paloma:

Tava tācá quiti yáha. Te ma sáha ró yáhu ini vehe Tátá rī. Achí yá.

¹⁷ Yūcuán na te tēe cáscuáha jín yá, ni canucūhun ni de jnūhun yósó nuū tútu i: Je yajni cuu na jéē yóhoyo ndíhví ni na síquī vehe ní, achí yá jín Tátá yā, achí tutu.

¹⁸ Te tēe ñuu yā hebreo ni cacajnūhún de ya:

¿Na jniñu jéhnu sáha ró jéē steén rō poder rō, te cucáhnu ni rī jeē ndíso jniñu ró sáha ró súcuan? achí de jín yá.

¹⁹ Te ni cahān yatá Jesús:

Canu rō templo yáha, te nuū uní quiví te nucondichi sáha rī, achí yá.

²⁰ Yūcuán na te ni cacahān tēe hebreo un:

Uū xico iñū cuiyā te ni jñu ni cuvāha templo yáha. Te róhó, ¿á nuū uní-ni quiví te nucondichi sáha ró naún? Achí de.

²¹ Te templo jeē cahán Jesús cúu máa yiqui cúñu yā, chi cahni ñayuu yā te natecu yā nuū uní quiví. ²² Jeē yúcuan cúu jeē ná ni natecu yā jeē ni jíhī yā, te tēe cáscuáha jín yá ni canucūhun ni de jeē ni cáhān yā jnūhun yáha. Te ni cacandíje de jnūhun jeē yósó nuū tútu i, jín jnūhun yáha jéē ni cáhān Jesús.

Jeē jini Jesús ndese cáa ini anuá ñayuu

²³ Te ná íne Jesús ñuu Jerusalén máa vico pascua, te cuehē ñayuu ni cacandíje i jeē cúu ya Cristo, chi ni cajito i tācá jniñu jéhnu sáha ya jeē steén yā poder yā. ²⁴ Te máa Jesús chi tu ní jétáhú yá i, chi je jíní yā ndese cáa ini anuá i jínáhan i. ²⁵ Te tu jini ñúhún yá jeē cáchi ni ñn ñayuu nuū yā ndese íyó táca ñayuu, chi máa yá je jíní yā ndese cáa ini anuá i.

Jeē ní candajnūhún Jesús jín Nicodemo

3

¹ Te ni íyo ñn tēe grupo fariseo, naní de Nicodemo, te cújéhnu de nuū ñayuu ñuu de hebreo. ² Tēe yáha ní quiji de nuū Jesús ñn jecuáa, te ni cahān de jín yá:

Maestro, je cájini na jéē maá Yaā Dios ni tají yá nihín jéē steén ni jnūhun ya nuū na jínáhan ná. Chi núu tu íyó Yaā Dios jín ní, te ma cúu sáha ní ni ñn jniñu jéhnu nájnūhun sáha máa ní jeē steén ni poder ní, achí de.

³ Te ni cahān Jesús:

Jendaá cahán rī jín ró jeē núu tu nacacu jeé ññayuu, te ma cúu quívi i ndaha Yaā Dios jeē ndacu ya jniñu nuū i, áchí yá jín de.

⁴ Te ni cahán Nicodemo jín yá:

¿Te ndese cuu nacacu ññtēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

⁵ Te ni cahán Jesús:

Jendaá cahán rī jín ró jeē núu tú nacacu ññayuu, te ma cúu quívi i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájñuhun jín ndute, te condee Espíritu Santo ini anuá i. ⁶ Jeē cácu sáha ññayuu, chí sēhe ññayuu cúu. Te jeē cácu sáha Espíritu yā, chí sēhe ya cúu. ⁷ Ma náā ni rō cani ni rō ndese cúu jñuhun ni cahán rī jín ró jeē cánuú jēe nacacu jeé ró jijnáhan ró. ⁸ Te tachí chí quee cuahán ndé-ni cúu nuū cuní maá, te jíní sōho ró jēe cáyu, te tu jíní rō ndé nuū véji ni ndé nuū quihín. Te suni súcuan cúu tāca ññayuu jeē nácacu sáha Espíritu, chí tu jíní rō ndese sáha ya jniñu ún, áchí yá.

⁹ Te ni cahán tucu Nicodemo:

¿Ndese ga cúu núu súcuan?

¹⁰ Te ni cahán Jesús:

Máá ró cúu ññ maestro jeē kujénu nuū ññayuu ññuu yō Israel, te ¿á tu jécūhun ni rō jñuhun yáha naún? ¹¹ Jendaá cahán rī jín ró jeē jñuhun cájecūhun ni rī cúu jeē cácahán rī jín ró. Te cánacani cájí rī jñuhun jniñu ní cajito rī.

Te tu cácaandíje ró jñuhun cácahán rī. ¹² Chí ni cahán rī jñuhun ndese sáha Yaā Dios ini ññayívi, te tu cácaandíje ró. Núu súcuan ¿te ndese candíje ró núu cahán rī jñuhun tāca ndese sáha ya nde andívi?

¹³ Chí ni ññ tu ní cáa andívi jeē cúni ndese íyó yúcuan, chí máññuhún-ni ruhū, Yaā ní nduu tēe. Chí andívi ndéé rí, te ni cuun ri vēji rī. ¹⁴ Te nájñuhun ni cata caa Moisés ññ coō cāa nuū ññ yujnu, ná ni cajica ññayuu nuū ññuhun téhé, suni súcuan máá rí, Yaā ní nduu tēe, cánuú jēe cóndita caa rī jicā cruz. ¹⁵ Te súcuan cánuú návāha tāca ññayuu jeē candíje i jeē jnáma rī i, ma jñahnú ndetū i, chí sa suhva cotecu i ní cáni andívi.

Yōhoyo ni cundáhú ni yā ññayuu ññayívi

¹⁶ Chí Yaā Dios yōhoyo ni cundáhú ni yā ññayuu ññayívi. Jeē yúcuan ní tají yá Sēhe ya ni quiji, vēsú maññuhún-ni ya iyó, návāha tāca ññayuu jeē candíje i jeē jnáma ya i, ma jñahnú ndetū, chí sa suhva cotecu i ní cáni andívi. ¹⁷ Chí tu ní tájí Yaā Dios Sēhe ya ini ññayívi jēe snahnú ndetū yā ññayuu, chí sa suhva jeē jnáma ya ññayuu.

¹⁸ Ññayuu jeē candíje i jeē jnáma ya i, ma jñahnú ndetū i. Te ññayuu tu cándíje, je ni jñahnú ndetū i, chí tu ní cándíje i máá Sēhe Yaā Dios, te máá ññ-ni ya iyó. ¹⁹ Máá Yaā jeē stíndéé ini anuá ññayuu, je ni quee ya ini ññayívi. Te cánujñahan gā ni ññayuu caca i nájñuhun nuū néé vēsú nuū

luz yā, chi jniñu cásáha i cú jniñu néé. Jeē yúcuan cú jeē jnahnú ndetū ñayuu tu cácanđije ún. ²⁰ Chi tāca ñayuu casáha jniñu néé, tu nújnahan cuiti ni i luz yā. Te tu jéhe i jñuhun jeē stíndēe yá ini anuá i, chi tu cúní i jeē natū jniñu néé cásáha i. ²¹ Te ñayuu jeē cájica jíin jniñu ndaā, jéhe i jñuhun jeē stíndēe yá ini anuá i, návāha natū ndijin jeē tācá jniñu cásáha i cúu jniñu cúní Yaā Dios. Achí yá jíin de.

Jeē ni cáhān tucu Juan jñuhun Jesús

²² Yūcuán na te Jesús jíin tēe cáscuáha jíin yá, cuahān yā región Judea. Te ni condee yā yūcuán jecu tiempo jíin de, te cáscuándute de ñayuu. ²³ Te suni scuándute Juan, íne de lugar jeē naní Enón yajni ñuu Salím, chi yūcuán íyó cuéhē ndute. Te ni quijicoo ñayuu nuū de, te ni scuándute de i. ²⁴ Súcuán ni sáha Juan nde ná tu quívi de vecāa.

²⁵ Yūcuán na te sava tēe cáscuáha jíin Juan yōhyo ni cacahān de jíin sava jnáhan de hebreo siquī núu ndé ñn cúu modo vāha ga jeē cúchi ñayuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jíin ní yūte Jordán ichi núu cáne niāndii, jeē ní nacani ní jnúhun de nuū ná, vijna te scuándute máá de, te ndívií ñayuu cuangoo i nuū de.

²⁷ Te ni cahān Juan:

Ni ñn tēe ma cúu sáha de jniñu Yaā Dios te núu ma

tejniñu ya de. ²⁸ Máá ró jijnáhan ró chi ni cajini sōho ró jéē ní cáhān cají rí jeē násūu máá rí cúu Cristo, chi cúu ri ñn jeē ní tají Yaā Dios jeē cósnūú nacani jñuhun jeē quíji ya. ²⁹ Te núu cásáha víco quíjnáhan, te máá yíi cúu jeē ndéca ñasíhí. Te amigo yíi un íne jíin de, te jíni sōho jñuhun cáhān de. Te yōhyo cúsi ní jíni sōho jñuhun cáhān yíi ún. Te suni súcuán ruhū, chi cúu ri nájnūhun amigo yíi, chi ni quee máá Cristo, te yōhyo cúsi ní rí jíni sōho ri jñuhun cáhān yā. ³⁰ Te jíni ñúhún jéē ndujéhnu ga máá yá te ndululí gá máá rí, achí Juan.

Jeē ní quiji ya nde nuū sucún

³¹ Te Yaā jeē véji nde andiví, cújéhnu ya nuū ndíhi. Chi tāca jéē ní cacu ini ñayívi yáha, sēhe ñayívi cúu, te máni jñuhun ñayívi cáhān. Te Yaā jeē véji ichi ándiví, chi cújéhnu ya nuū ndíhi ñayuu. ³² Te nácani ya jñuhun jeē ní jito ya jíin jéē ní jíni sōho ya. Te ñayuu chi tu cácanđije i jñuhun cáhān yā. ³³ Te núu ñn ñayuu candíje i jñuhun cáhān yā, suu cúu jeē jejnúhún i jeē Yaā ndaā cúu Yaā Dios. ³⁴ Chi Yaā ní tají Yaā Dios véji, máni máá jnúhun Yaā Dios cahán yā. Chi Yaā Dios tu yícuāha jéhe ya Espíritu yā nuū Yaā ní tají yá. ³⁵ Máá yá jeē cúu ya Tatá, yōhyo maní yā jíin Séhe ya, te ndívií ni jéhe ya ndaha Séhe ya jeē ndacu ya jniñu nuū. ³⁶ Ñayuu jeē candíje máá

Séhe ya jeē jnáma ya i, cotecu i ní cání andiví. Te ñayuu tu cúní candíje Sēhe ya, ma cótecu i ní cání andiví, chí sa suhva cuāha Yaā Dios castigo jeē ndoho i ní cání.

Jeē ni cahān Jesús jín ñahan ñúu Samaria

4

1 Te tēe grupo fariseo, ni canihīn de jñūhun jeē iyó cuéhē gā tēe cáscuáha jín Jesús vēsú jín Juan, jín jēe cuehē gā ñayuu scuándute ya vēsú Juan. 2 Te nasūu jēe scuándute máá yá, chí tēe cáscuáha jín yá cúu jeē cascuándute. 3 Te ná ni jini Jesús jeē súcuan ni canihīn de jñūhun, te ni quenda ya región Judea, te cuanuhun yā región Galilea.

4 Te ichi jeē nuhún yā chí yáha región Samaria. 5 Te ni jinū yā ññ ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. 6 Te yūcuan íne pozo jeē naní pozo Jacob. Te ni cucōo Jesús xiin pozo un, chí ni cuīta yá jeē cuahán yā ichi. Te nájnūhun cahuxī uū cúu. 7 Te ni quee ññ ñahan Samaria, vēji ña vequihin ña ndute. Te ni cahān Jesús jín ña:

Cuāha ní ndute coho ná, áchí yá.

8 Te tēe cáscuáha jín yá, chí je cuango de nde ñuu, cuacuaan de jeē cáji de jín yá. 9 Te ñahan Samaria un ní cahān ña jín yá:

¿Ndese cúu jeē jicán ni ndute nuū ná coho ní? Chí

tēe hebreo cúu ní, te ñahan Samaria cúu ná, áchí ña.

Súcuan ni cahān ña, chí ñayuu hebreo tu cácahān i jín ñáyuu Samaria. 10 Te ni cahān Jesús:

Núu jeē jini ni ndese cúní Yaā Dios sáha ya jeē váha níhín, jín ndé ññ cúu sáña jēe jicán na ndute nuū ní, yūcuán na te máá ní cacān ni núu ná, te cuāha ná ndute jeē cótecu ni ní cání sáha, áchí yá.

11 Te ni cahān ña jín yá:

Tátā, yōhyo cúnú pozo yáha, te tú na vé ndahá ní jēe táva ní ndute. Núu súcuan ¿te ndé nuū nihín ni ndute jeē cótecu na sáha? 12 ¿Te á cújēhnu ga maá ní vēsú jí yō Jacob, chí naún? Chí máá de ni stóo de pozo yáha nuū yō. Te yāha ní cajihí máá de ndute, jín táca séhe de, jín quití ndéca de. Achí ña.

13 Te ni cahān Jesús:

Tāca ñáyuu jeē jíhi ndute yáha, chí jichí tucu i. 14 Te ñayuu coho ndute jeē cuáha na núu i, chí ma jichí cuīti gā i. Chí ndute jeē cuáha ná un, cane ini i nájnūhun ndute jeē cáne nuhún, te sáha jeē cotecu i ní cání, áchí yá jín ña.

15 Te máá ña tu ní jécūhun ni ña, te ni cahān ña jín yá:

Tátā, cuāha ní ndute ún coho ná, návāha ma jichí cuīti gā ná, ni tuá jini ñūhun quiquihin ná ndute pozo yáha, áchí ña.

16 Te ni cahān Jesús jín ña:

Cuácana ní yñ ní te quiji ní jín de, áchí yá.

17 Te ni cahān ña:

Tú yñ ná íyó.

Te ni cahān Jesús:

Ndaā cahán ni jéē tú yī ní iyó. ¹⁸ Chi je ni cuu uhūn yī ní, te tēe ndéca ní vijna chi nasūú yī ní cúu de. Yāha cúu jeē ni cáhān ndaā ní, áchí yá.

¹⁹ Te jeē súcuan ni cahān yā, te ni cahān ña:

Tátā, ñin tēe nácani jnūhun Yaā Dios cúu ní, jéni ni ná. ²⁰ Tāca jíi na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jéē ñuu Jerusalén cúu nuū cánuú chiñúhún yó yā, achí ña.

²¹ Te ni cahān Jesús jíin ña:

Nánā, candíje ní jnūhun cáhán na, chí quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátā, chí ndihī-ni lugar te cuu chiñúhún ní yá. ²² Máá ní ñáyuu Samaria tu cájini ni ndé ñin cúu jeē cáchiñúhún ní. Te máá ná jijnáhan ná chí cájini na ndé ñin cúu jeē cáchiñúhún ná. Chí nde nuū maá ná jijnáhan ná ñáyuu hebreo cúu nuū véji Yaā jnama ñayuu. ²³ Te je ni quee quivī jeē ñáyuu cáchiñúhún ndáā, vijna te chiñúhún ndije i Yaā cúu Tátá nde jíin ini jíin ánuá i. Chí máá Tátá cúní yā jeē súcuan chiñúhún ñáyuu yā. ²⁴ Yaā Dios cúu Espíritu, te ñayuu jeē cuní i chiñúhún i ya, cánuú jéē chiñúhún ndije i ya jíin ini jíin ánuá i, áchí yá.

²⁵ Te ni cahān ñahan ún:

Jíní na jéē quíji Mesías jeē cúu Cristo, Yaā jeē tají Yaā Dios. Te núu ni quee maá

yá, te stéén cají yá tāca jnūhun nuū yó.

²⁶ Te ni cahān Jesús:

Máá ná jeē cahán jíin ní, suu ná cúu Yaā ún.

²⁷ Te sá cáhán gā yā súcuan, te ni ndecoo-ni tēe cáscuáha jíin yá. Te ni canaa ni de cájito de jeē ndájnūhun yá jíin ñahan yúcuan. Te ni ñin de tu ní cájnūhún de ya núu na vé cájnūhun yá ña chí na vé ndájnūhun yá jíin ña. ²⁸ Yūcuán na te ñahan un ní stóo ña quiyi ña, te cuahān ña nde ñuu. Te ni cahān ña jíin ñáyuu ún:

²⁹ Nehen na quíngoo yó te coto ró ñin tēe jeē ní cachi ndihī tāca jéē ni sáha ri. Sanaa te máá yá cúu Cristo, jeē cándetu yó quiji, áchí ña.

³⁰ Yūcuán na te ni quenda-coo i ñuu ún, te cuangoo i nuū íne Jesús. ³¹ Te nde ná tu jinūcoo i, te tēe cáscuáha jíin yá ni cacahān ndahú de jíin yá:

Maestro, cají ni stáā víi, achí de.

³² Te ni cahān yā jíin de:

Iyó stáā cají rī jeē tu cájini rō ndese cúu.

³³ Yūcuán na te tēe cáscuáha jíin yá, ni cacajnūhun jnáhan de:

¿A ní quindeca ñin ñayuu jeē ní yeji yā, chí naún? áchí de.

³⁴ Te ni cahān Jesús:

Jeē ní cachi rī jeē iyó jéē cáji rī cúu jeē cúshī ni rī sáha ri jniñu cúní Yaā ní tají ruhū véji ri, jíin jéē sínu ri jniñu ún. ³⁵ Te cácahān rō jeē cúmanī cuñ gā yoō te tahndē trigo. Te ruhū chí cáhán rī jíin ró: Condēhe jijnáhan ró, chí ñayuu

cuehē cácuu i nájñuhun trigo jeē jé ni cuaan jeē tahndé, chi je cáhīyo tūhva i candíje i ruhū. ³⁶ Te tēe scándíje ñayuu cácuu de nájñuhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jñuhun ri, inuú-ni cusī ni de jíin tēe cástéén gā jñuhun ri. ³⁷ Chi ndaā cúu jñuhun jeē cahán: ĩn tēe jéte, te inga tēe nástútú, áchí. ³⁸ Te suu cúu jeē ní tají rí rohó jíjnáhan ró jéē scándíje ró ñayuu jeē jé ni canihīn jñuhun ya ni casáha inga tēe. Chi inga tēe je ni canacani de jñuhun nuū ñáyuu, te máá ró chi nájñuhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyūcú ñuu ún, ni candíje i Jesús jeē ní jini sōho i jñuhun ni cahān ñahan ún. Chi ni cahān ña: Ni cachi ya ndihī tāca jéē ni sáha ri. ⁴⁰ Te jeē yúcuan cúu jeē ñayuu Samaria un ní jinūcoo i nuū yā, te ni cacahān ndahú i jíin yá jeē na quéndōo ya ñuu i. Te ni ndōo ya yúcuan úu quivī. ⁴¹ Te cuehē gā i ni cacandíje i ya jíin jñuhun cáhān maá yá. ⁴² Te ni cacahān i jíin ñahan ún:

Tuá niní jéē cahán maá ró te candíje ri yā, chi je ni cajini sōho ri jñuhun cáhān maá yá. Te cájini yō jeē maá yá cúu ndije Cristo, Yāā jnama ñayuu ñayiví. Achí i.

Jeē ní nasávāha ya sēhe tēe ndíso jñíñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe cánacani jñuhun Yāā Dios, tu cáhīyo yíñúhún ñáyuu ñuu de jíin de, te suni súcuan ni cuu jíin máá yá. ⁴⁵ Te ná ni najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quivī ni íyo vico ún.

⁴⁶ Yūcuán na te ni jehēn tucu ya ñuu Caná ndañúū Galilea, nuū ni sáha ya jeē ndúte ni nduu viño. Te ini ñuu Capernaum ni íyo ĩn tēe cújéñu jeē ndíso jñíñu nuū rey. Te cúhú sēhe de. ⁴⁷ Tēe un ní jini jñuhun de jeē ní najinū Jesús región Galilea jeē ni jéhēn yā región Judea. Te ni jecondēhé de ya, te ni cahān ndahú de jíin yá jeē na quihín yā jíin de vehe de, te nasávāha ya sēhe de, chi je yajni cuu i. ⁴⁸ Te ni cahān Jesús jíin de:

Núu tú coto ró jniñu jéñu jeē náā ni rō sáha, te ma candíje cuiti rō jíjnáhan ró, áchí yá.

⁴⁹ Te tēe ndíso jñíñu nuū rey, ni cahān de:

Cava vāha ni ní na quihín yō, chi núu cucuée ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jñuhun ni cahān Jesús, te cuanuhun-ni de. ⁵¹ Te níní

jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajñuhún de na hora ni quejéé ndúvāha i. Te ni cacahān i jíin de:

Cahñin jeē ícu ni quenda quíji i.

⁵³ Yūcuán na te máá tátá i ni sáha de cuenta jeē hora un cúu jeē ni cáhān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jéhnū jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ñin tēe catú yuhu pila Betesda

5

¹ Yūcuán na te cuahān tucu Jesús ñuu Jerusalén, chí íyó tucu vico cásáha jnáhan ñuu yā hebreo. ² Te Jerusalén iyó ñin pila ndute yajni yéhyí jéē naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. ³ Te ini tǎcá corredor un cáca cuehē ñayuu cácuñū, jeē cuaá, jeē chacuá, jeē ni íjin. Te cándetu i jeē canda ndute ún. ⁴ Chí íyó quívi jeē cúun ñin ndajéhé yā ini pila un, te scánda ya ndute. Te ñayuu quívi xīhna gā ini pila un ná scánda ya ndute, te ndúvāha i na-ni cuehyī ndóho i. ⁵ Te yūcuan íyó ñin tēe jeē ní cuu ocó xahūn uní cuiyā cuhú de.

⁶ Te ni jito Jesús jeē catú de,

te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúni rō nduvāha ró? áchí yá.

⁷ Te ni cahān tēe cuhú un jíin yá:

Tu níhín na ni ñin tēe squívi sǎhá ini pila hora jeē cánda ndute. Chí tǎca jínu jeē cuní na quívi ná, te quívi-ni inga ñayuu xīhna gā. Achí de.

⁸ Te ni cahān Jesús:

Ndocuñī te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quívi ndétātu cúu quívi ún.

¹⁰ Yūcuán na te jnáhan de tēe hebreo un ní cacahān jíin de:

Quívi ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin rí camilla rí te caca rí, achí de.

¹² Yūcuán na te ni caca-jñuhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíni de ndé ñin cúu jeē ní nasávāha de. Chí cáhñin cuehē ñayuu yūcuán, te Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chí je ni nduvāha ró. Ma sáha ga rō cuēchi, chí núu tuú, te quíji ñin jñundóho xeēn gā siquī rō, achí yá.

¹⁵ Yūcuán na te cuahān tēe ún, te ni castūhún de nuū

jnáhan de hebreo un jēe Jesús cúu jeē ní nasávāha ya de. ¹⁶ Te siquī jeē ní sáha Jesús jniñu yáha quivī ndétátú, jeē yúcuan cúu jeē tée hebreo un cájito xeēn de ya, te cácuni de cahni de ya. ¹⁷ Te ni cahān Jesús jiín de:

Máá Tátá rī chi ní cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸ Te siquī jeē ni cáhān yā súcuan, te tēe hebreo un víhyá gā cácuni de cahni de ya. Chi nasūu máá ĩn-ni jeē tu squícu ya jeē cahán ley siquī quivī ndétátú, chi suni jeē ni cáhān yā jeē Tátá yā cúu Yaā Dios, te súcuan sáha ĩnuú yá maá yá jiín Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cahán rī jiín ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē maá rí, chi máni sáha ri jeē jíto ri sáha Tátá rī. Chi tāca jēe sáha Tátá rī, suni sáha ruhū jeē cúu ri Sēhe ya. ²⁰ Chi máá Tátá rī, manī yā jiín ruhū jeē cúu ri Sēhe ya, te stéén yā nuū rī ndihī jeē sáha ya. Te jéhnu ga jniñu stéén yā vēsú jeē ní cuu vijna, jeē naa ni rō coto ró jijnáhan ró. ²¹ Te nájnūhun jeē nastécu maá Tátá rī ndīyi te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní maá rí. ²² Te máá Tátá rī, tu sándaā yā siquī ni ĩn ñayuu, chi ni jēhe ya jnūhun jeē sándaā maá

rí siquī tāca ñáyuu, chi Sēhe ya cúu ri. ²³ Te súcuan te coo yíñúhún ndihī ñayuu nuū rī, nájnūhun yíñúhún i nuū Tátá rī. Te ñayuu tu íyó yíñúhún núu rī, núu súcuan te suni tu yíñúhún i nuū maá Tátá rī jeē ní tají yá ruhū vēji ri.

²⁴ 'Jendaá cahán rī jiín ró: Núu ĩn ñayuu chuhun ni i jnūhun cáhán rī, te candíje i jeē Yaā ndaā cúu Yaā ní tají ruhū vēji ri, ñayuu ún cotecu i ní cáni andiví, te ma jnahnú ndetū i. Chi ma cúu ga i nájnūhun ndīyi, chi sa suhva cotecu i ní cáni. ²⁵ Jendaá cahán rī jiín ró jeē quiji quivī, te vijna je ni quejéé, jeē tāca ñáyuu cácuu nájnūhun ndīyi, cuni nahín i jnūhun cáhán ruhū, Sēhe Yaā Dios. Te ñayuu cuatáhú, chi cotecu i ní cáni. ²⁶ Chi nájnūhun íyó poder maá Tátá rī jeē sáha ya jeē técu ndihī-ni, suni súcuan ni jēhe ya poder nuū ruhū jeē sáha ri jeē cotecu ndihī-ni. ²⁷ Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe. ²⁸ Ma náā ni rō canī ni rō siquī jnūhun cáhán rī. Chi quee quivī jeē tāca ndīyi cuni sōho i jnūhun cahán rī, ²⁹ te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i ní cáni. Te ndīyi jeē ní casáha jniñu néé, natecu i te quivícoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ 'Tú na vé cúu sáha ri jeē maá rí. Chi nájnūhun

ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní maá rí, chi sáha ri jeē cuní maá Tátá rī, Yaā ní tají rúhū vēji ri. ³¹ Núu ruhū cahān rī jeē cúu ri Séhe Yaā Dios, te cachi ñayuu jeē tu jéjníñu jnūhun cáhán rī. ³² Te iyó inga jeē cahán jeē cúu ri Séhe ya. Te jíní rī jeē jnúhun un jéē cahán yā, chi níhín jniñu. ³³ Máá ró ni catají ró tēe ni cacajnúhún de Juan. Te Juan chi ndaā ni cahān de jnūhun ri. ³⁴ Te vēsú súcuan te nasūu rúhū cúu jeē jíní ñúhún jeē steén ñn tēe jeē Séhe Yaā Dios cúu ri. Chi máá ró cúu jeē jíní ñúhún návāha candíje ró te cácu ró jíjnáhan ró. Jeē yúcuan ní cahān rī jeē iyó ndáā jnūhun ri jeē ní nacani Juan. ³⁵ Máá Juan ni cuu de nájnūhun ñn lámpara jeē cayú te cúndijin, cúu jeē ní nacani de jnūhun ri. Te máá ró, jecu-ni quivī ni canujnahan ni rō jeē ni steén de nuū rō. ³⁶ Te iyó jéē steén cají gá jeē kujéhnū ri vēsú jeē ní cáhán Juan. Suu jniñu sáha ri, jniñu jeē ní tejniñu Tátá rī ruhū jeē sáha ri, jniñu un steén ndije jeē maá yá ni tají rúhū vēji ri. ³⁷ Te Tátá rī jeē ní tají yá ruhū vēji ri, suni máá yá cahán nuū tútu ñi jeē kujéhnū ri, vēsú tu ní cájini sōho cuiti rō jeē cahán yā, ni tu ní cájito ró yá. ³⁸ Te tu ní cáchuhun ni rō jnūhun un jéē ní cáhán Tátá rī, chi tu cácandíje ró rúhū, Yaā ní tají yá vēji. ³⁹ Cánanducú vii rō táca jnúhun cáhán tutu ñi, chi

cájeni ni rō jeē yūcuan níhín rō jnúhun jeē cótecu rō ní cáni sáha. Te jnúhun siquī maá rí cúu jeē cahán tutu ún. ⁴⁰ Te vēsú súcuan te tu cácuni rō cuatáhú ró ruhū quívicoo ró ndaha ri návāha cotecu rō ní cáni.

⁴¹ Tu chíhi ri cuenta jnūhun jeē cácahān ñayuu jeē kujéhnū ri. ⁴² Chi je jíní rī ndese cándāa ánuá rō jeē tu cáhīyo manī rō jíin Yaā Dios. ⁴³ Ruhū vēji ri jíin jniñu cuní Tátá rī, te tu cájetáhú ró ruhū. Te núu inga tēe quee de jíin jniñu cuní maá de, sa tēe un yáchí cuatáhú ró de. ⁴⁴ ¿Ndese cuu candíje ró jíjnáhan ró? Chi máni cácuni rō jeē kujéhnū ró sáha jnáhan ró, te tu cánducú ró jeē kujéhnū ró sáha Yaā Dios, jeē maá ñn-ni ya iyó. ⁴⁵ Ma cáni ni rō jeē cáquin rī cuēchi siquī rō nuū Tátá rī. Chi iyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndaā rō jíin ley jeē ní tee de. ⁴⁶ Chi núu ní cácandíje ró jéē ní tee Moisés, te suni candíje ró rúhū nuú, chi jnūhun máá rí ni tee de. ⁴⁷ Te núu tu cácandíje ró jnúhun ri jeē ní tee de, ¿te ndese candíje ró jnúhun cáhán maá rí núu súcuan? Achí yá jíin de.

*Jeē ni scáji yā uhūn mil tēe
(Mt. 14.13-21; Mr. 6.30-44;
Lc. 9.10-17)*

6

¹ Yūcuán na te cuahān Jesús inga lado mar Galilea, jeē cúu mar Tiberias. ² Te yōhyo cuehē ñayuu ni candiquín i

ya, chi ni cajito i tãcá jniñu jéñu jeē steén yā poder yā jeē ní nasávaha ya ñayuu cácuñu. ³ Te ni caa ya ñin yucu, te ni cucōo ya yūcuan jín tée cáscuáha jín yá. ⁴ Te je ni cuyajni vico pascua jeē cánucūhun ni jnáhan ñuu yā hebreo jeē ní cacācu i nuū ñáyuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jín Felipe:

¿Ndé nuū cuaan yó jēē cáji ñayuu yáha jijnáhan i?

⁶ Te súcuan ni cahān yā jeē jito ndee yā de núu ndese cahān de. Chi je jíní maá yá ndese sáha ya. ⁷ Te ni cahān Felipe jín yá:

Te ni ma cánda uū ciento denario staā, ni vēsú jeē cáji i jecu jecu jijnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jín yá un:

⁹ Yáha íne ñin sūchi yí jēē ndíso i uhūn staā cebada jín uū chácá. ¿Te ndé canda cuiti ún, chi ñayuu cuehē ndasí cúu?

¹⁰ Yūcuán na te ni cahān Jesús:

Cahān jín ñáyuu na cucōo i, áchí yá.

Te yūcuan cáa cuehē ite, te ni cacucōo i, te nájñūhun uhūn mil tēe cúu. ¹¹ Te ni quihin Jesús staā ún, te ni nacuatáhú yá nuū Yaā Dios. Te ni jēhe ya nuū tēe cáscuáha jín yá, te máá de ni casaja de nuū ñáyuu ní cacucōo ún. Te suni súcuan ni sáha ya jín chácá, te ni cayejí i nasaa cácuni maá i. ¹² Te nuū ní candutú chíj i,

te ni cahān yā jín tēe cáscuáha ún:

Nastútú ró tãcá pedazo jeē ni ndóo, návaha tu stívi cuiti yō.

¹³ Te ni canastútú de, te ni chitú úxí uū jīca pedazo jeē ni ndóo siquí ndihúhún staā cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéñu ni sáha Jesús jeē ni stéén yā poder yā. Te ni cacahān i:

Jendaá ndije jeē tēe yáha cúu jeē cahán tutu jeē quíjini ñayívi jēē nácani jñūhun Yaā Dios. Achí i.

¹⁵ Te ni jini Jesús jeē cácuni i sáfuerza i ya jeē cuu ya rey i núu. Te ni cujiyo tucu máá ñin-ni ya, ni caa ya cuahān yā nuū sucún gá yucu.

Jeē ní jica jéhé yá nuū mar
(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuáha jín yá ni nanuu de cuangoo de nde mar. ¹⁷ Te ni ndivicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñin tachí níhin, te sáha jeē ndónnda ndute mar un. ¹⁹ Te jeē ní cuu nájñūhun uhūn chí íñu kilómetro cájica de jín barco, te ni cajito de jeē jīca Jesús nuū mar, te ni cuyajni ya vēj i ya nuū barco. Te ni cayūhú de. ²⁰ Te máá yá ni cahān yā jín de:

Máá rí cúu. Ma yūhu ró jijnáhan ró.

²¹ Te ni cacusiñ ni de jeē na quívi ya ini barco. Te ni sáha ya jeē yachí-ni ni jinūcoo-ni

de ñuhun íchi núū cuángoo de ún.

Jeē cánanducú ñayuu Jesús

22 Te inga quíví ún, te ñayuu jeē ní caquendōo inga lado mar, ni cajini i jeē téē cáscuáha jíin yá cuangoo de jíin máñuhún-ni barco ni íne yūcuán, jíin jéē tu ní quíví Jesús quihín yā jíin de jíináhan de. 23 Te sava ga barco jeē véjicoo ichi núū Tiberias, ni quecoo yajni lugar nuū ní cayeji i staā jeē ní nacuatáhu máá Jítóho yō jehē. 24 Te jeē ní cajito ñayuu un jéē tuá Jesús íne ya yūcuán, ni téē cáscuáha jíin yá, te ní quívícoo i táca barco un, te cuangoo i ñuu Capernaum cuananducú i ya.

Jesús cúu staā jeē cótecu yō ní cání

25 Te nuū ni jínūcoo i nde inga lado mar, te ni nanihín jnáhan i jíin Jesús. Te ni cacañuhún i ya:

Maestro, ¿na hora ni quee ni yáha?

26 Te ni cahān Jesús:

Jendaá cahán rī jíin ró jeē cánanducú ró ruhū síquī jeē ní cayeji rō nde ni candutú chíji ró, te nasūu síquī jeē ní cajito ró táca jniñu jéhnu jeē steén rī poder rī. 27 Ma cóndihví ni rō maá síquī jeē caji rō jeē yachī nataxīn, chí sa suhva condihví ni rō síquī jeē nihín rō jeē cótecu rō ní cání sáha. Te máá rí, Yaā ní nduu téē, cuāha rī nájnūhun staā jeē cótecu rō ní cání sáha. Chí Tátá rī Yaā Dios ni jeni ya ruhū jeē sáha rī súcuan. Achí ya jíin i.

28 Yūcuán na te ni cacañuhún i ya:

¿Ndese sáha ná návāha squícu ná jniñu cúni Yaā Dios?

29 Te ni cahān Jesús:

Jniñu jeē cúni Yaā Dios cúu jeē candíje ró ruhū, Yaā ní tají yá vēji.

30 Yūcuán na te ni cacahān i:

Núu súcuan ¿te na jniñu jéhnu sáha ní coto ná jíináhan ná te candíje ná jéē ní tají yá nihín? ¿Na jniñu cúu jeē sáha ní? 31 Chí táca jíi yō jenahán ni cayeji de maná jeē ní cuun ichi ándiví ndé nuū ñuhun téhé, nájnūhun yósó núu tútu: Yaā Dios ni jēhe ya staā ni cuun ichi ándiví, ni cayeji i, áchí tutu. Achí i jíin yá.

32 Te ni cahān Jesús:

Jendaá cahán rī jíin ró: Nasūu Moisés ni jēhe staā un núu de jíináhan de jeē ní cuun ichi ándiví, chí máá Tátá rī ni jēhe. Te máá yá jēhe staā ándiví jéē cótecu rō ní cání sáha. 33 Chí staā jēhe Yaā Dios cúu máá Yaā ní quiji ichi ándiví, te sáha ya jeē ñayuu ñayíví cotecu i ní cání ándiví. Achí yá.

34 Te ni cacahān i jíin yá:

Níní cuáha ni stáā ún caji na núu súcuan.

35 Te ni cahān Jesús:

Máá rí cúu máá stáā jeē cótecu rō ní cání sáha. Ndé vé quíví ndaha rí, ma cúu cuiti gā sōco. Te ndé vé candíje ruhū, ma jichí cuiti gā. 36 Te nájnūhun je ni cahān rī jíin ró, tu cáandíje ró ruhū, vēsú ní cajito ró núu rī. 37 Táca ñayuu jeē sáha Tátá rī jeē candíje i ruhū, máá i quívícoo

ndaha ri. Te jétáhú rí tāca jēē cuní quīvī ndaha ri, chí ma squéhichī cuítī rī quihīn. ³⁸ Chi ní quiji ri ichi ándiví návāha sáha ri jniñu jeē cuní Yaā ní tají rúhū, te nasūu jēē sáha ri jeē cuní maá rí. ³⁹ Te jniñu jeē cuní Tatá rī, Yaā ní tají rúhū, cúu jeē ma scuíta ri ní ñn ñayuu ni jéhe ya nuū rī, chí condito ri i te nastécu rī i quīvī jínu ñayīvī. ⁴⁰ Te Yaā ní tají rúhū, cuní yā jeē tāca ñáyuu jeē nihín i jnūhun ruhū, Sēhe Yaā Dios, te candíje i ruhū, cotecu i ní cání andiví. Chí nastécu rī i quīvī jínu ñayīvī. Achí yá.

⁴¹ Yūcuán na te ni caquejéé jnáhan ñuu yā hebreo cácahān de siquī yā, chí ni cahān yā jeē maá yá cúu staā ní quiji ichi ándiví. ⁴² Te ni cacahān de:

¿A násūu tēe yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quiji de ichi ándiví núu súcuan?

⁴³ Te ni cahān Jesús jíin de:

Ma cahán rō siquī rī jijnáhan rō. ⁴⁴ Ni ñn ñayuu ma cúu quīvī i ndaha ri núu ma sáha Tatá rī jeē cúu ni i quīvī i, chí maá yá ni tají rúhū vēji ri. Te nastécu rī i quīvī jínu ñayīvī. ⁴⁵ Te suhva yósó núu tútu ni catee tēe ni canacani jnūhun Yaā Dios: Tācá i chí stéén Yaā Dios nuū i, achí. Núu súcuan te tāca ñáyuu jíni sōho jnūhun cáhán Tatá rī, te jétáhú i jeē steén yā nuū i, ñayuu ún chí quívicoo i ndaha ri.

⁴⁶ Te tu ní jíto ni ñn ñayuu nuū maá Tatá rī. Chí máñuhún-ni ruhū ni jito ri

nuū yā, chí nde nuū maá yá vēji ri. ⁴⁷ Jendaá cahán rī jíin rō jijnáhan rō jēē ñayuu jeē candíje i jeē jnáma ri i, maá i cotecu i ní cání. ⁴⁸ Máá rí cúu staā jeē cótecu rō ní cání sáha. ⁴⁹ Tāca jíi rō jenahán, ní cayejí de staā maná jeē ní cuun ichi ándiví ndé nuū ñūhun téhé, te tu ní sáha jeē cótecu de ní cání andiví. ⁵⁰ Te staā jeē cahán rī jeē vēji ichi ándiví, chí na-ni ñayuu caji, te cotecu i ní cání andiví. ⁵¹ Te suu maá rí cúu staā un jēē ní quiji ichi ándiví jēē sáha jeē cótecu rō ní cání. Te ñayuu jeē cáji staā yáha, cotecu i ní cání andiví. Te staā jeē cuáha ri un cúu yiqui cúñu rī, te cuáha ri návāha ñayuu ñayīvī cotecu i ní cání andiví. Achí yá.

⁵² Yūcuán na te jnáhan ñuu yā hebreo ni cacahān de jíin táca jnáhan de:

¿Ndese cuu cuáha tēe yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahán rī jíin rō: Núu tú candíje rō jēē yiqui cúñu ruhū, Yaā ní nduu tēe, cúu nájñūhun staā, te niñī rī cúu nájñūhun ndute, núu súcuan te ma cótecu rō ní cání andiví. ⁵⁴ Chí ñayuu cácaandíje jeē yiqui cúñu rī cúu nájñūhun staā te niñī rī cúu nájñūhun ndute, maá i cotecu i ní cání. Te nastécu rī i quīvī jínu ñayīvī. ⁵⁵ Chí yiqui cúñu rī jíin níñī rī cúu ndije jeē sáha jeē cótecu i ní cání. ⁵⁶ Te ñayuu cácaandíje jeē yiqui cúñu rī jíin níñī rī cúu nájñūhun staā jíin ndute jeē cótecu i ní cání sáha, maá i níni ndúú i jíin rí, te ndúú

rí jíin i. ⁵⁷ Máá Tátá rī, Yaā técu, ni taji yá ruhū vēji ri, te técu rī sáha máá yá. Te suni súcuan, ñayuu cácañdije jeē cúu ri nájnūhun staā i ndute i, suni súcuan cotecu i ní cáni sáha ri. ⁵⁸ Máá rí cúu staā ní quiji ichi ándiví. Te staā jeē cahán rī tu cúu nájnūhun staā maná jeē ní cayejí tāca jíí rō jenahán, chí tu ní sáha jeē cótecu de ní cáni. Te staā jeē cahán rī, chí ñayuu caji, cotecu i ní cáni sáha, áchí yá.

⁵⁹ Tāca jnúhun yáha ní steén Jesús nuū ñayuu ní candutútú ini vehe iī sinagoga ñuu Capernaum.

Jnúhun cotecu yō ní cáni

⁶⁰ Te cuehē ñayuu cascuáha jíin yá, ni cajini sōho i jnúhun yáha jēē ni stéén yā. Te ni cacahán maá i:

Yōhyo yí jnúhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cácahán i jeē yí cúu jnúhun yāhá, te ni cahán yā jíin i:

¿A yí sáha jnúhun yáha jíin ró jijnáhan ró? ⁶² ¿Te ndese sáha ró núu coto ró jēē ruhū, Yaā ní nduu tēe, ndaa ri nuhun rī nuū ní cóndee rī xīhna ñúhún? ⁶³ Máá ánuá ñayuu cúu jeē sáha jeē técu i. Chí yiquí cúñu i tu jéjníñu cuiti súcuan. Te tāca jnúhun ni cahán rī jíin ró cúu jeē quéndōo vāha ánuá rō, te cotecu rō ní cáni sáha. ⁶⁴ Te sava ró chí tu cácañdije ró. Achí yá.

Chí nde xīhna ñúhún je jíin Jesús ndé-ni cúu ñayuu jeē ma cándije, jíin ndé iñ de cúu jeē

nastúu de ya. ⁶⁵ Te ni cahán gā yā:

Jeē yúcuan ní cahán rī jíin ró jeē ma cúu quívi ni iñ ñayuu ndaha ri, te núu tu sáha Tátá rī jeē cúu ni i quívi i, áchí yá.

⁶⁶ Te nde quívi ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yūcuán na te ni cahán yā jíin máá ndihúxi uū tēe cáscuáha jíin yá:

¿A suni cácuni máá ró quingoo ró, chí naún?

⁶⁸ Te ni cahán Simón Pedro: ¿Ndé núu gā quingoo ná? Chí máá ní cúu jeē nácani jnúhun jeē cótecu na ní cáni sáha. ⁶⁹ Te ni cacandije ná te cájini na jēē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahán Jesús:

Te vēsú ni nacāji ri ndihúxi uū rō, te íyó iñ ró jeē ní quívi jexeén ini. Achí yá.

⁷¹ Te súcuan ni cahán yā siquí Judas Iscariote, sēhe Simón. Chí máá de nastúu de ya, vēsú iñ jnáhan jeē uxí uū tēe cáscuáha jíin yá cúu de.

Jeē tu ní cácañdije ñani Jesús

7

¹ Yūcuán na te jíca cuu Jesús región Galilea. Chí tu cúni yā caca cuu ya región Judea, chí jnáhan ñuu yā hebreo jeē cáyūcu yúcuan, cácuni de cahni de ya. ² Te cuacuyajni vico jeē casáha ñayuu yā hebreo vehe ramadá, cáyūcú i chíji. ³ Te ñani yā ni cacahán de jíin yá:

¿Naun máá yáha-ni íne ró? ¿Naun tú quihīn rō región

Judea, návāha tēe yūcuan jēe cá candíje de róhó, suni coto de jniñu jéhnú sáha ró. ⁴ Chi núu cúní ñn tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéhnú, vāha ga na sáha ró jēe cúní ndivii ñayuu.

⁵ Súcuan ni cacahān ñani yā jíin yá, chi ni máá de tu cá candíje de ya. ⁶ Yūcuán na te ni cahān Jesús:

Ná tu quee maá quiví jeē quihín rī. Te máá ró jijnáhan ró chi na-ni quiví-ni te cuu quingoo ró. ⁷ Chi ma quití ni ñayuu ñayiví núu rō, te máá rí chi quití ni i jito i ruhū, chi cáhán rī jeē jini rī jeē máni jniñu née cásáha i. ⁸ Cuángoo máá ró vico ún. Te máá rí chi ma quihín rī vijna, chi ná tu quee maá quiví cánuú quihín rī. Achí yá.

⁹ Súcuan ni cahān yā jnūhun yáha jíin de, te ni quendōo ya Galilea.

Jeē ni jéhēn Jesús vico vehe ramáda

¹⁰ Te nuū ni yáha ñani yā cuangoo de vico ún, te sáá te suni cuahān maá yá. Te tú cuahān ndijin yā, chi tu ní stéén yā maá yá. ¹¹ Te jnáhan ñuu yā hebreo cá nanducú i ya nuū víco ún, te cácahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chi sava i cácahān: Tēe vāha cúu de. Te sava ga i cácahān: Tuú chi stáhú de ñayuu.

¹³ Te yuhu-ni ni cacahān i jnūhun ya, chi cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quiví ya templo cáhnú, te ni quejéé yá steén yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jini tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéén rī chi nasūu jnúhun máá rí cúu, chi jnūhun jeē ni jéhe máá Yaā ní tají ruhū cúu. ¹⁷ Núu ñn ñayuu cúní i sáha i jniñu cúní Yaā Dios, ñayuu ún chi jecūhun ni i núu nde nuū Yaā Dios vēji jnūhun stéén rī, chí jnúhun jeē jéni ni maá-ni rí cúu. ¹⁸ Tēe cáhán jnūhun jéni ni maá de, tēe un ndúcú de jeē na sájéhnú ñayuu de. Te núu ñn tēe ndúcú de jeē sajéhnú de Yaā ní tají de, tēe un cúu tēe ndaā, te tú na jnūhun stáhú íyó jíin de.

¹⁹ ¿A násūu jéē ni jéhe Moisés ley yā nuū rō jeē squícu ró? Te ni ñn ró tu cásquícu. Chi sa jeē cá cuni rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachí ndóho ró. ¿Ndé ñn cúní cahni rohó?

²¹ Te ni cahān Jesús:

Ni nasávāha rí ñn tēe quiví ndétátú, te ndivii rō ni canaa ni rō ni cajito ró jēe quiví ndétátú ni sáha rí jniñu ún. ²² Te Moisés ni jéhe de ley jeē cúu circuncidar nuū rō. Te cásáha ró circuncidar sūchi yí núu uná quiví jeē ní cacu i,

vēsú quivī ndétātu cúu. (Te nasūu máá Moisés ní jéquin ley un, chi je ni iyo nuū tāca jíí de.) ²³ Núu súcuan te núu cásáha ró circuncidar vēsú quivī ndétātu cúu, návāha squícu ró ley Moisés, ¿te najehē cáquitī ni rō jeē ní nasávāha ndihí ri ñn tēe quivī ndétátú? ²⁴ Ma yachí caní ni rō jeē cuéchi cúu jeē sáha ri. Chí sa caní vāha ni rō siquī tācá jniñu váha. Achí yá.

Jeē ní cachi Jesús ndé nuū véji ya

²⁵ Yūcuán na te sava ñayuu ñuu Jerusalén ni cacajnūhun jnáhan i:

¿A násūu tēe yáha cúu jeē cánanducú tēe cácujuhnu jeē cáhni de, chí naún? ²⁶ Te yáha cáhán ndijin de nuū chitú, te tú na jnūhun cácahān jíín de. ¿A sanaa te ni cacundaā ní tēe cácujuhnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chi je cájini yō nuū véji tēe yáha. Te jeē quíji Cristo, chí ni ñn yó má cúni ndé chi quíji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu véji ri. Te vēsú súcuan te máá Yaā ndaā cúu jeē ní tají ruhū véji ri, te tú véji ri jeē cuní máá rí. Te tu cájini rō ndese Yaā cúu ya. ²⁹ Te máá rí chí jííní rī yā, chí nde nuū máá yá véji ri, te máá yá ni tají ruhū, achí yá.

³⁰ Yūcuán na te ni canducú de jñi de ya. Te ni ñn de tu ní cúu jñi de ya, chí ná tu quee

maá quivī jeē jñi de ya. ³¹ Te cuehē ñayuu chí ni cacandíje i ya, te ni cacahān i:

¿A násūu tēe yáha cúu Cristo, Yaā ndétu yó jeē quiji? Chí cuehē ndasí jniñu jéhnu sáha ya jeē steén yā poder yā. Achí i.

Jeē ní catají de policía jeē jñi de Jesús

³² Te ni cajini tēe fariseo jeē súcuan cácahān ñayuu jnūhun ya. Te máá de jíín sūtū cácujuhnu, ni catají de policía cándito templo jeē jñi de ya. ³³ Te ni cahān Jesús:

Jecu na quivī condee rī jíín rō jijnáhan ró. Yūcuán na te nuhun rī nuū Yaā ní tají ruhū véji ri. ³⁴ Te nanducú ró ruhū, te ma nánihīn rō ruhū. Chí ma cúu jinūcoo ró núu cóndee rī. Achí yá.

³⁵ Yūcuán na te máá tēe un ní cacajnūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihīn de nuū jnáhan yó hebreo jeē ní cajitē núu cáyūcu ndé nación Grecia? ¿Te á steén de jnūhun nuū ñayuu Grecia, chí naún? ³⁶ ¿Te na jnūhun cúu jeē ni cahān de jíín yó jeē nanducú yó de te ma nánihīn yō de, chí ma cúu jinūcoo yó núu cóndee de? Achí tēe un jíínáhan de.

Siquī ndute jeē cótecu yō níí cáni sáha

³⁷ Te quivī sándihí vico ún te cúu vico cáhnu ga. Te quivī un ní ndocuiñi Jesús, te ni cahān jee ya:

Núu ndé ñayuu jnáa ndasí i tāca jeē váha jeē sáha ri jehē i,

nájnūhun jeē jichí i ndute, núu súcuan te na quívi i ndaha ri te coho i ndute, cúu jeē nihín i jeē váha ún. ³⁸ Te ñayuu jeē candíje jeē jnáma ri i, chí ini anuá i condee Espíritu Santo, te cuu ya nájnūhun yūte cáne ñuhún jeē sáha ya jeē cótecu i ní cáni, nájnūhun cáhán tutu i. Achí yá.

³⁹ Te súcuan ni cahān yā jeē ñayuu candíje jeē jnáma ya i, nihín i Espíritu Santo. Chí ná tu quee Espíritu ún, chí ná tu ndaa Jesús quínuhun yā nuū ndujéhnū ya.

Jeē ní cacusín ñayuu siquí yā

⁴⁰ Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tée yáha cúu jeē achí tutu jeē quiji de nacani de jnūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chí ni cacahān i:

Tuú chí nasúu Galilea quiji Cristo. ⁴² Chí cáhán tutu i jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusín ñayuu jeē siquí yā. ⁴⁴ Te sava i cácuni i jni i ya, te ni in i tu ní jni i ya.

Jeē tu ní cá candíje tēe cácujehnū

⁴⁵ Yūcuán na te policia cándito templo tu ní cájni de Jesús, te cuanungoo de nuū taca tée fariseo jíin núu

sutú cácujehnū. Te tēe ún ni cacajnūhún de policia:

¿Najehē tu ní quecoo ró jíin de? achí.

⁴⁶ Te ni cacahān policia un:

Tú cuiti ni in tēe cáhán váha ndasí nájnūhun cáhán tēe yúcuan, achí.

⁴⁷ Te ni cacahān tēe fariseo:

¿Te á suni nde máá ró jíin náhan ró ní stáhú de naún?

⁴⁸ Ni in jnáhan ruhū tēe cácujehnū jíin tée fariseo, tu cá candíje ri jnūhun cáhán tēe ún, ¿te naun cá candíje máá ró?

⁴⁹ Te ñayuu cuehē yáhá jéē tu cájecūhun ni i ley Moisés, chí jnahnū ndetū i jeē cá candíje i tēe ún, achí de jíin náhan de.

⁵⁰ Te ni cahān Nicodemo, tēe ni jéhēn nuū yā in jecuáá, te suni in tēe fariseo cúu de:

⁵¹ Cáhán ley yō jeē ma cúu tee yó cuéchi siquí in tēe, te núu tú xihna gā cuni sōho yó ndese cáhán de, návaha cucáhnū ni yō na cuéchi ni sáha de. Achí de.

⁵² Te ni cacahān jíin de:

Te róhó, ¿á suni nde Galilea vēji ró jéē cahán rō jehē tēe ún? Nanducú váha ró núu tútu i te cuni rō jeē ndé Galilea tu quénda cuiti ni in tēe nacani jnūhun Yaā Dios. Achí jíin de. ⁵³ Te cuanungoo de ná vehe ná vehe de.

Jnūhun ñahan ní casiquí ndéē jnáhan

8

¹ Te ni caa Jesús cuahān yā yucu Olivos. ² Te jeē cuácundijin inga quívi, te ni ndee tucu ya templo. Te ndihi ñayuu ni quecoo i nuū yā. Te

ni cucōo ya, te ni steén yā jnūhun nuū i. ³ Yūcuán na te tēe cástéén tutu ley Yaā Dios jíin tēe grupo fariseo, ni que-coo de jíin ñin ñahan jeē ní canihīn de ña jeē casiquí ndéē ña. Te ni cajeni de ña mēhñú. ⁴ Te ni cacahān de jíin yá:

Maestro, ni canihīn ná ñahan yáha jeē casiquí ndéē ña. ⁵ Te ley Moisés ndácu jniñu nuū yō jeē cuáha yó yūū xinī ñahan cásáha súcuan návāha cuu ña. Te máá ní, ¿ndese cáhán ni?

⁶ Te súcuan ni cacahān de jeē cájito ndee de ya núu cu-atáhú yá jeē cahán ley un, chí núu tuú te caquin de cuēchi siquī yā. Te Jesús ni jíita ndeyi ya, te ni tee ya nuū ñūhun jíin xinī ndáha ya. ⁷ Te jeē cácajnūhun cácajnūhún de ya, te ni ndonehen ya maá yá, te ni cahān yā jíin de:

Núu ndé ñin máá ró tú na cuēchi ró, te xīhna gā maá ró cuáha yuū xinī ña núu súcuan, áchí yá.

⁸ Te ni jíita ndeyi tucu ya, te ni tee tucu ya nuū ñūhun. ⁹ Te nuū ní cajini de jeē súcuan ni cahān yā, te ni cajecūhun ni de jeē suni cáhīyo cuēchi de. Te ná ñin ná ñin de ni quenda-coo de cuahān de, xīhna gā tēe jéhnú ga te nde nuū ní ndihi na. Te ni ndōo máá ñin na Jesús jíin ñahan índichi mēhñú un. ¹⁰ Te ni ndonehen tucu ya maá yá, te tuá ni ñin tēe un ní jíito ya, chí máá na ñahan ún. Te ni cahān yā jíin ña:

¿Ndé chí cuángoo tēe cájequin cuēchi siquī rō? ¿A

tú ni ñin de ní ndónnda cahān gā cuēchi siquī rō?

¹¹ Te ni cahān ña:

Tú ni ñin de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

¹² Te inga jíinu ni cahān Jesús jíin ñáyuu:

Máá rí cúu nájnūhun luz jeē steén ini anuá ñayuu ñayīví, jeē sáha jeē jécūhun ni i siquī Yaā Dios. Ñayuu candíje ruhū chí ma cáca i nájnūhun nuū néē, chí sa suhva coneváha i luz ini anuá i jeē sáha jeē cótecu i ní cáni.

¹³ Yūcuán na te ni cacahān tēe fariseo jíin yá:

Róhó chí cáhán rō jnūhun jehē maá ró, te tu jéjníñu jnūhun cáhán rō.

¹⁴ Te ni cahān Jesús jíin de jíinahan de:

Vēsú cáhán rī jehē maá rí, te íyó ndáa jnūhun cáhán rī. Chí jíiní rī ndé nuū véji rí jíin ndé nuū quihín rī. Te róhó tu cájini rō ndé nuū véji rí ni ndé nuū quihín rī. ¹⁵ Máá ró chí cuenta ñayuu ñayīví cásándaā rō siquī jnúhun cáhán rī. Te ruhū chí tu sándaā mañúhún rí siquī ni ñin ñayuu. ¹⁶ Te núu sándaā rī siquī i, te ndaā sáha rí, chí tu sáha máñúhún rí, chí sándaā rī nde jíin máá Tátá rī, Yaā ní tají rúhū véji rí. ¹⁷ Te yósó núu tútu ley cánevāha ró jéē núu inuú cácahān uū testigo, te jíini ñúhún cuatáhú ró jeē cácahān, chí íyó ndáa

jnūhun ún. ¹⁸ Núu súcuan te ruhū cúu ñin jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

¹⁹ Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī.

Te núu jeē cájini rō ruhū, suni cuni rō Tátá rī nuū.

²⁰ Tāca jnūhun yáha ní cahān Jesús jeē steén yā ini templo nuū cáyūcu yéjnū jeē cásocō i xūhún. Te tú ni ñin de ní jnū de ya, chí ná tu quee máá quívī jeē jnū de ya.

Jeē ni cahān yā jeē ma cúu jinūcoo de nuū cóndee yā

²¹ Te ni cahān tucu Jesús jíin de:

Ruhū chí quihīn rī, te nanducú ró rúhū, te ma nánihīn rō ruhū, chí quendōo cuēchi ró siquī rō quívī cúu rō. Te jeē yúcuán má cúu jinūcoo ró núu quihín rī, achí yá.

²² Yūcuán na te tēe hebreo un ní cacahān máá de:

¿A cahni tēe yáha máá de, te jeē yúcuán cahán de jeē ma cúu jinūcoo yó núu quihín de, chí naún? Achí de.

²³ Te ni cahān yā:

Máá ró jijnáhan ró chí ñayīvi yáha véjicoo ró, te ruhū chí nde andiví véji rī. Máá ró cácuu ñayuu ñayīvi yáha, te ruhū chí nasūu tēe ñayīvi yáha cúu rī. ²⁴ Jeē yúcuán ní cahān rī jeē quendōo cuēchi ró siquī rō quívī cúu rō. Chí núu ma candíje ró jéé máá rí cúu Cristo, te quendōo nahín cuēchi ró siquī rō quívī cúu rō. Achí yá.

²⁵ Te ni cacajñuhún de ya:

Núu súcuan ¿te ndé ñin cúu rō?

Te ni cahān yā:

Je ni cachi ri nuū rō nde xīhna, ñuhún ndé ñin cúu rī.

²⁶ Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chí ini ñayīvi yáha cahán rī maá-ni jnūhun jeē ní jini ri ni cahān Yaā ní tají rúhū vēji rī. Te máni jnūhun ndaā cahán yā. Achí yá.

²⁷ Te tu ní cájecūhun ni de jeē cahán yā jnūhun Tátá yā andiví jíin de. ²⁸ Jeē yúcuán ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu rī. Te cuni rō jeē tú na vé sáha ri jeē máá rí, chí cahán rī maá-ni jnūhun ni steén Tátá rī nuū rī. ²⁹ Chí máá Tátá rī, Yaā ní tají rúhū, ndéé yá jíin rí. Te tu stóo máñuhún yá ruhū, chí níni sáha ri jniñu jeē núnjahan ni máá yá. Achí yá.

³⁰ Te jeē ni cahān yā jnūhun yáha, te cuéhē ñayuu ni candíje i ya.

Siquī ndé-ni cúu sēhe Yaā Dios jíin séhe jexeén

³¹ Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi ñihin ró jíin jnūhun stéén rī nuū rō, te cuu ndije ró ñáyuu scuáha jíin rí. ³² Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yñi ró ndaha.

³³ Te ni cacahān i jíin yá:

Sēhe yucūn Abraham cácuu ri, te tu cáyihí cuiti rī ndaha ni ñn. ¿Te ndese cúu jeē cahán rō jeē nduu libre rī núu súcuan?

34 Te ni cahān Jesús:

Jendaá cahán rī jín ró jeē tāca ñáyuu casáha cuēchi, tu íyó libre i, chi yíhi i chíji cuēchi jeē jejniñu cāhá i nuū. 35 Te ñayuu jejniñu cāhá, chí tu cúu i ñn jnáhan ñayuu vehe nuū jejniñu i. Te ñn sēhe chí sa suhva cúu ndije i jnáhan ñayuu vehe ún. 36 Núu súcuan te máá rí jeē cúu Sēhe Yaā Dios, núu sáha rí jeē tuá cua-jniñu cāhá ró nuū cuēchi, núu súcuan te nduu libre ndije ró jijnáhan ró, te cuu ró séhe ya. 37 Te jíní rī jeē séhe yucūn Abraham cácuu ró, te vēsú súcuan te cácuni rō cahni rō ruhū, chí tu cájetáhú ró jñūhun cáhán rī. 38 Ruhū chí cáhán rī jñūhun jeē ni stéén Tatá rī nuū rī. Te máá ró chí casáha ró jniñu jeē ni cahān tatá máá ró jijnáhan ró. Achí yá.

39 Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yucūn de, yūcuán na te jniñu váha ni sáha de suni sáha máá ró nuū. 40 Te vijna chí cácuni rō cahni rō ruhū, vēsú ni cahān rī jín ró tāca jñūhun ndaā ni steén Tatá rī nuū rī. Te Abraham chí tu ní sáha cuiti de súcuan. 41 Máá ró chí inuú casáha ró jín tatá máá ró. Achí yá jín i.

Yūcuán na te ni cacahān i:

Máá rí chí tu cácuu rí sēhe ndáhú jēē tu tátá. Chí íyó ñn-ni tátá rī, te Yaā Dios cúu ya.

42 Te ni cahān Jesús:

Núu Yaā Dios cúu ndije tátá rō, te coo manī rō jín rí nuú. Chí nde nuū Yaā Dios ni quenda rí vēji rí. Te tú vēji rí jeē cuní máá rí, chí máá yá ni tají rúhū. 43 ¿Te najehé tu cájecūhun ni rō jñūhun cáhán rī núu súcuan? Suu siquī jeē tu cácuni rō chusóhó ró jñūhun nácani rí. 44 Máá ró jijnáhan ró chí tátá rō cúu jexeén. Te cácuni rō sáha ró máá jēē cuní tátá rō ún. Máá jexeén ni jehni ndīyi nde jeē xíhna ñúhún. Te tu ní ñn cuiti jín jñūhun ndaā, te tú cuiti na jñūhun ndaā cahán. Te jeē cahán jexeén jñūhun stáhú cúu jeē súcuan cáa máá. Chí máá un cúu jeē ndíso jñūhun stáhú, te máá un cúu jeē ní squéjéé ndíhi jñūhun stáhú. 45 Te ruhū chí cáhán rī jñūhun ndaā, te jeē yúcuan cúu jeē tu cácandíje ró rúhū. 46 Te ni ñn ró ma nihín rō cuēchi siquī rī, chí tú cuiti na cuēchi rí. Te máni jñūhun ndaā cahán rī, ¿te naun tu cácandíje ró rúhū? 47 Ñayuu cácuu sēhe Yaā Dios, chí cáchusóhó i jñūhun Yaā Dios. Te nasūu séhe Yaā Dios cácuu ró, te jeē yúcuan tu cácuni rō chusóhó ró. Achí yá jín de.

Iyó Jesús nde ná tu coo Abraham

48 Yūcuán na te ni cacahān jnáhan ñuu yā hebreo un:

Ndaā cácahān rī jeē canéé ró nájñuhun ñayuu Samaria, te ñúhun tachī ini rō.

⁴⁹ Te ni cahān Jesús:

Tu ñúhun tachī ini rī, chí yíñúhún rí jín Tátá rī. Te máá ró jijnáhan ró chí tu cáhīyo yíñúhún ró jín rí. ⁵⁰ Máá rí tu ndúcú rí jeē cujéñnu rí. Iyó ñn jeē sáha jeē cujéñnu rí, te máá yá sándaā siquī jñuhun cácahān rō. ⁵¹ Jendaá cahán rī jín ró, núu ndé ñáyuu squícu jñuhun cáhán rī, ma cúu cuiti i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacucáhnu ni rī jeē ñúhun ndije tachī ini rō. Chí Abraham jín táca tēe ni canacani jñuhun Yaā Dios nde jenahán, ni cajihī de. Te róhó cáhán rō, núu ndé vé squícu jñuhun cáhán rō, te ma cúu cuiti i, áchí ró. ⁵³ ¿Te chí jéñnu ga rō vésú jí yō Abraham naún? Chí ni jihī de, te suni ni cajihī táca tēe ni canacani jñuhun ya. ¿Te ndé ñn ga sáha ró máá ró núu súcuan? Achí de.

⁵⁴ Te ni cahān Jesús:

Núu ruhū sajeñnu rí maá rí, te tu níhín jñíñu. Máá Tátá rī cúu jeē sajeñnu ruhū. Te cácahān rō jeē maá yá cúu Yaā Dios maá ró. ⁵⁵ Te vésú súcuan te tu cájini rō ndese Yaā cúu ya. Te ruhū chí jíní rī yā. Te núu cahān rī jeē tu jíní rī yā, te cuu rí tēe stáhú nájñuhun máá ró jijnáhan ró. Te tuú chí jíní ndije rí yā, te squícu rí jñuhun cáhán yā. ⁵⁶ Te jí rō Abraham ni cusí ni de jeē coto de quiví

quéē rī. Te je ni jito de, te ni jito rí jeē ní cusí ndasí ni de. Achí yá.

⁵⁷ Yūcuán na te ni cacahān tēe hebreo un jín yá:

Ni ná tu coo ró uū xico uxí cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cahán rī jín ró jeē nde ná tu cacu Abraham te je iyó rí, achí yá.

⁵⁹ Yūcuán na te ni caquihin de yūu jeē cuáha de xiní yā. Te Jesús chí ni quenda sáhi yá ni yáha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá. ² Te tēe cáscuáha jín yá ni cacajñuhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máá de cúu, chí naún?

³ Te ni cahān Jesús:

Nasūu cuéchi máá de, ni nasūu cuéchi tátá de náná de cúu jeē ní cacu de súcuan, chí sa suhva návāha cuni ñayuu jñíñu jéñnu sáha Yaā Dios jín de. ⁴ Níní jéé cúu nájñuhun nduú ini ñayiví, te cánuú sáha rí jñíñu Yaā ní tají rúhū. Chí quee tiempo jeē coo nájñuhun jecuáa, jeē tuá cuu sájñíñu ni ñn. ⁵ Níní jéé iyó rí ini ñayiví te cúu rí luz jeē cúndijin ini anuá ñayuu ñayiví, návāha jecūhun ni i siquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ñúhun, te ni sáha ya ndehyū jín tesīhi yá un, te ni tee ya siquī tīnūu tée cuáá un. ⁷ Te ni cahān yā jín de:

Cuáhán núu pila Siloé te nacate ró tīnūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tīnūú de, te ni ndundijin-ni, te ni nandicó de vēji de. ⁸ Yūcuán na te ñayuu yúcu yajni jín de, jín ñáyuu jeē ní cajito jeē cúu de tēe cuáá, ni cacajñūhun jñáhan i:

¿A násūu tée yáha cúu jeē ndeé-ni yáhá te jícán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chi ni cahān de:

Suu ri cúu.

¹⁰ Yūcuán na te ni cacajñūhún i de:

¿Te ndese cúu jeē ní nanune tīnūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tīnūu rí, te ni cahān de jín rí: Cuáhán núu pila Siloé te nacate ró tīnūu ró. Te ni jehēn rí, te ni nacate ri, te ni nanune-ni tīnūu rí, achí de.

¹² Yūcuán na te ni cacajñūhún i de:

¿Ndé nuū íne tēe ún? áchí i.

Tu jíní rí, achí de.

Jeē ní castíchí tēe fariseo tēe ni cacu cuáá

¹³ Yūcuán na te ni cajen-deca i tēe ni íyo cuáá un

núu tēe grupo fariseo. ¹⁴ Te quivī ndétātu cúu jeē ni sáha Jesús ndehyū jeē ní nanune ya tīnūú de. ¹⁵ Te tēe fariseo un ní cacajñūhún tucu de tēe ún ndese ni nanune tīnūú de. Te ni cahān de:

Ni tee de ndehyū siquī tīnūu ná, te ni nacate ná, te ni ndundijin-ni tīnūu ná, achí de.

¹⁶ Yūcuán na te ni cacahān sava tēe fariseo:

Tēe ún chí nasūu ndé nuū Yaā Dios vēji de, chí tu née íi de quivī ndétátú.

Te sava ga de chí ni cacahān:

¿Ndese cuu sáha tēe un táca jñiñu jéhnú yáha te núu tēe íyó cuéchi cúu de?

Te ni cacusín de siquī yā.

¹⁷ Te ni cacajñūhún tucu de tēe ni íyo cuáá un:

Róhó, ¿ndese cáhán rō siquī tēe ni nanune tīnūu ró núu súcuan?

Te máá de ni cahān de:

Ín tēe nácani jñūhun Yaā Dios cúu de, achí de.

¹⁸ Te tēe hebreo un chí tu ní cá candíje de jeē ní íyo cuáá tēe ún te ni ndundijin tīnūú de. Te ni cacana xiní tatá de náná de. ¹⁹ Te ni cacajñūhún de:

¿A yáha cúu sēhe ro jéē ní cacu cuáá cácahān rō? Núu súcuan ¿te ndese ni ndundijin tīnūú de vijna? áchí.

²⁰ Te ni cacahān tatá de náná de:

Suu sēhe ri cúu tēe yáha jéē ní cacu cuáá. ²¹ Te tu cájini rí ndese ni ndundijin tīnūú de vijna, ni tu cájini rí ndé tēe ni nanune tīnūú de. Cajñūhun ró maá de, chí je jéhnú de, te na cáchi máá de.

²² Súcuan ni cacahān tatá de náná de, chí cáyūhú de cájito de jnáhan de tēe hebreo. Chí je ni casándaā tēe un jēe núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quīvi i ini vehe iī sinagoga.

²³ Jeē yúcuan ní cacahān tatá de náná de: Cajnūhun ró maá de, chí je jéhnū de.

²⁴ Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jító jínū Yaā Dios. Chí cájini rī jeē tēe íyó cuéchi cúu tēe ni nanune tinūu ró.

²⁵ Yūcuán na te ni cahān de: Tu jíni na núu íyó cuéchi de, chí naún. Te íyó iin jeē jíni ná, cúu jeē tēe cuáá ní cuu ná, te vijna chí ni ndundijin tinūu ná. Achí de.

²⁶ Te ni cacajnūhún tucu de: ¿Ndese ni sáha de jíin ró? ¿Ndese ni nanune de tinūu ró núu súcuan?

²⁷ Te ni cahān de: Je ni cuu ni castūhun ná nuū ní, te tu ní cácu ni ní cu-atáhú ní. ¿Te najehē cácu ni ní jēe cáchi tucu ná núu ní? ¿Te chí suni cácu ni ní jínáhan ní candíje ní yá naún?

²⁸ Yūcuán na te ni cacahān neé jíin de, te áchí:

Máá ró chí cándíje ró tēe ún, te máá rí chí cácu ndíje rí Moisés. ²⁹ Te cájini rī jeē ni cahān Yaā Dios jíin Moisés. Te tēe yúcuan, ni tu cájini rī ndé nuū véji de.

³⁰ Te ni cahān tēe ni iyo cuáá:

Náa ni na jēe cácahān ni jēe tu cájini ní jeē véji de nuū Yaā

Dios, vēsú ni nanune de tinūu ná. ³¹ Te cájini yō jeē Yaā Dios tu jíni nahín yá jeē cájicān ñayuu iyó cuéchi. Chí jíni nahín yá nuū maá-ni ñayuu jeē cáchiñúhún i ya te casáha i jeē cuní yā. ³² Te ní véji yó te tu ní jíni sōho cuiti yō jeē iin tēe nanune de tinūu inga tēe ni cacu cuáá. ³³ Te núu nasūu ndé nuū Yaā Dios véji tēe ún, te ma cúu cuiti sáha de iin jniñu súcuan. Achí de.

³⁴ Te ni cacahān tēe hebreo un:

Róhó chí íyó ndasí cuéchi ró ndé quiví ní cacu ró, ¿te á máá ró steén nuū rī naún? áchí.

Te ni caquenehen tēe un yátā vehe iī sinagoga.

Siquī ñayuu cáhīyo cuáá ánuá

³⁵ Te ni jini jnūhun Jesús jeē ní caquenehen de tēe ún. Te ni nihín jnáhan ya jíin de, te ni cahān yā jíin de:

¿A cándíje ró Séhe Yaā Dios?

³⁶ Te ni cahān de:

¿Ndé iin cúu ya návāha candíje ná yá?

³⁷ Te ni cahān Jesús:

Je ni jito ró núu yā, te suu cúu ruhū jeē cahān jíin ró, achí yá.

³⁸ Yūcuán na te ni jecuiñi yití de nuū yā, te ni cahān de:

Cándíje ná jēe nihín cúu Ji-toho ná.

³⁹ Te ni cahān Jesús:

Véji rí ini ñayiví yáha jēe sándaā rī siquī ñayuu. Chí ñayuu jeē nájnūhun cácuáá ánuá, ndundijin ini anuá i jeē jécūhun ni i siquī rī. Te ñayuu jeē jéni ni i jeē cájecūhun ni

i, nájñuhun nducuáá ánuá i. Achí yá.

⁴⁰ Te sava tēe fariseo jeē cáhīn jīn yá, ná ni cajini de jñuhun yáha, te ni cacahān de jīn yá:

¿Te chí jēni ni rō jeē suni tēe tu cájecūhun ni cácuu máá rí naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuēchi ró. Te siquī jeē ní cacahān rō jeē cájecūhun ni rō, te tu cájetáhú ró, jeē yúcuu condee cuēchi siquī rō.

Jñuhun yátá siquī lanchi

10

¹ Jendaá cahán rī jīn ró, núu yīhi lanchi ini corral cánevāha cáhnu ñayuu, te núu ndé tēe tu quívī de ichi yéhyí corral un, chi sa suhva inga lado cáa de quívī de, tēe un cúu ñacuīhná, chi vēji jeē sacuíhná. ² Te tēe quívī ichi yéhyí, chi tēe un cúu pastor ndító lanchi. ³ Te tēe ndító yéhyí, núne de te quívī tēe ún. Te lanchi de cánacuni tī tachī de. Te cána de síhvī lanchi máá de, te táva de tī. ⁴ Te núu ni tava de ndīhi lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de. ⁵ Te ma cóndiquīn tī yatā inga tēe, chi sa suhva cunu tī coto tī de, chi nácuni tī jeē nasūu jítaho tī cúu.

⁶ Jñuhun yátá yáha ní cahān Jesús jīn ñayuu, te tu ní cájecūhun ni i na jñuhun cúu jeē ni cahān yá.

Jesús cúu máá pastor vāha

⁷ Yūcuán na te ni cahān gā Jesús jīn i:

Jendaá cahán rī jīn ró: Máá rí cúu nájñuhun yéhyí corral nuū quívīcoo ñayuu cácuu nájñuhun lanchi rī. ⁸ Tāca tēe jeē tu ní tájí Yaā Dios, jeē ní quijicoo de nde ná tu quee rī, cácuu de nájñuhun ñacuīhná, chi tu ní cástéén de jñuhun ndaā. Te ñayuu cácuu nájñuhun lanchi rī, tu ní cájetáhú i de. ⁹ Máá rí cúu nájñuhun yéhyí. Te ñayuu jeē jīn máá rí quívīcoo, jnama rī i. Te cuu i nájñuhun lanchi jeē ndívīcoo tī nuū yīhi vāha tī, te quéndacoo tī nuū cáji vāha tī.

¹⁰ Tēe cuīhná chi máni vēji de jeē sacuíhná de lanchi, te cahni de, te snāa de. Te ruhū chi vēji rī nāvāha cotecu ñayuu cácuu lanchi rī, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndító vāha de lanchi de, vēsú nde cuu de jeē siquí tī. ¹² Te ĩn tēe yíyāhu, nasūu pastor tī cúu de, chi nasūu lanchi máá de cúu tī. Te núu jító de jeē vēji yīhī, te stóo de lanchi, te jínu de cuahān de. Te yīhī chi jnái tī lanchi, te sáha tī jeē jité núu lanchi. ¹³ Te tēe yíyāhu ún chi jínu de cuahān de siquī jeē lanchi tátú cúu jeē ndító de, te jeē yúcuu tu cúndáhú ni de tī.

¹⁴ Máá rí cúu máá pastor vāha. Te jíní rī tāca ñayuu cácuu nájñuhun lanchi rī, te máá i cájini i ruhū. ¹⁵ Te yāha cúu nájñuhun jeē Tatá rī jiní yā ruhū, te máá rí jiní rī Tatá rī. Te cuu rī jeē siquí ñayuu cácuu lanchi rī. ¹⁶ Te suni

Íyó gá ñayuu jeē cácuu lanchi ri, te sîn sîn ñayuu cácuu i. Te cánuú jéē suni condeca ri ñayuu ún. Te cuatáhú i jnūhun cáhán rī. Te coyūcu cáhnu-ni ndihī ñayuu candíje, te coo iin-ni pastor i.

¹⁷ Te Tátá rī manī ndasí yá jíin rī síquī jeē jéhe ri maá rí jeē cúu rī jehē ñayuu, te natecu tucu rī. ¹⁸ Ni iin ma cúu cahni ruhū, chí máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chí súcuan íyó poder rī. Súcuan ni cahān Tátá rī jeē sáha ri. Achí yá.

¹⁹ Te jeē ní cajini jnáhan ñuu yā hebreo jnūhun yáha, te ní cacusîn tucu i. ²⁰ Te cuehē i ní cacahān:

¿Naun cáchusóhó ró jeē cahán de? Chí ñūhun tachī ini de, te ní tīvī xīnī de.

²¹ Te sava ga i ni cacahān:

Tu súcuan cáhán tēe ñūhun tachī ini, nájnūhun cáhán tēe yáha. Te tēe ñūhun tachī ini, ¿á cuu nanune de tinūu tée cuáá naún? Achí.

Jeē ní casquéhichī i Jesús

²² Te tiempo míjin cúu, te ñuu Jerusalén cánasáha ñayuu vico jeē cánucūhun ni i quivī ní cuhiī templo cáhnu. ²³ Te jíca cuu Jesús ini templo, ini corredor jeē naní Salomón. ²⁴ Te jnáhan ñuu yā hebreo ni cacutútú i nuū yā, te ní cacahān i:

¿Nasaa ga quivī sáha ró jéē ma cucáhnu ni rī? Cachi cají nuū rī jijnáhan ri núu máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejníñu Tátá rī ruhū sáha ri, yūcuan stéén cají jéē maá yá ni tají ruhū. ²⁶ Te tu cá candíje ró, chí nasūú lanchi ri cácuu ró, nájnūhun je ni cahān rī jíin ró. ²⁷ Ñayuu cácuu lanchi ri, chí nácuni i jeē maá rí cúu jeē cahán jíin i. Te jíin rī i, te cándiquīn i ruhū. ²⁸ Te cotecu i ní cáni sáha ri, te ma jnahnú ndetū cuiti i. Te ni iin ma cúu quende i ndaha ri. ²⁹ Máá Tátá rī ni squívī ya i ndaha ri. Te cújéhu ga maá yá vésú tāca gá. Te ni iin ma cúu quende i ndaha ya. ³⁰ Máá rí jíin Tátá rī, chí iin-ni cúu ri, achí yá.

³¹ Yūcuán na te jnáhan ñuu yā hebreo ni caquihin tucu de yuū jeē cuáha de xīnī yā.

³² Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tátá rī. ¿Te á síquī jeē ni sáha ri jniñu váha cúu jeē cuáha ró yūú xīnī rī núu súcuan? Achí yá.

³³ Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xīnī rō, chí síquī jeē cahán ndevāha ró jéē achí ró jeē inuú cúu ró jíin Yaā Dios. Chí tēe-ni cúu ró, te sáha ró jéē inuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéē ni cahān Yaā Dios: Nájnūhun yaā cácuu ró, achí Yaā Dios, achí tutu. ³⁵ Chí ñayuu jeē ní cajetáhú jnūhun

ya, ni cahān yā jeē cácuu i nájñuhun yaā. Te cájini yō jeē ma cúu cahān yō jeē tú ndaā jñuhun cáhān tutu iī. ³⁶ Núu súcuan ¿te naun cácahān rō jeē jñuhun ndevāha cúu jeē ni cáhān rī jeē Séhe Yaā Dios cúu rí? Chi máá Yaā Dios ni jeni ya ruhū siquī jñiñu iī, te ni taji yá ruhū vēji rí ini ñayivī. ³⁷ Núu tu sáha rí jñiñu sáha Tátá rī, núu súcuan te ma candíje rō rúhū. ³⁸ Te núu sáha rí, te vēsú tu cácaandíje rō rúhū, te na cándíje rō siquī jñiñu sáha rí ún. Te súcuan te cucáhnu ni rō jeē ñn-ni cúu Tátá rī jíin rí, te ñn-ni cúu rí jíin Tátá rī. Achí yá.

³⁹ Yūcuán na te cánducú tucu de jñi de ya. Te ni ndoñúhún-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán.

⁴¹ Te ni quijicoo cuehē ñayuu nuū yā, te ni cacahān i jíin táca jñahan i:

Ndaā chi vēsú tu ní sáha Juan ni ñn jñiñu jéhnu, te ni cundaā ndihi jñuhun ni cahān de siquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni ca-candíje i ya.

Jeē ni jñi Lázaro

11

¹ Te ni iyo ñn tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betania. ² Te María un jéē cúu cuáha Lázaro, suu ña cúu jeē ní chihi

aceite perfume jehē Jitoho yō, te ni nasíchí ña jíin ixi xíní ña. ³ Te ndindúú cuáha de un ní catajī ña jñuhun cuahān nuū Jesús:

Tēe jeē maní ni jíin, cúhú de, áchí ña, áchí mozo.

⁴ Te ná ni jini Jesús jñuhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnu ya. Chi ruhū, Séhe Yaā Dios, jíin cuéhyī yáha te stéén rī jeē suni cújéhnu máá rí. Achí yá.

⁵ Te maní Jesús jíin Marta jíin cúhú ña jíin Lázaro. ⁶ Te vēsú súcuan te nuū ni níhñ yā jñuhun jeē cuhú de, te ni quendōo ya uū gā quivī nuū ndeé yá un. ⁷ Yūcuán na te ni cahān yā jíin tēe cáscuáha jíin yá:

Na quíhín tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jñahan yó hebreo cuáha de yuū xiní ní. ¿Te cúní ni quíhín tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayivī yáha cúu nájñuhun jeē iyó úxī uū hora ñn nduú. Te jeē sáha rí jeē cuní Yaā Dios, cúu rí nájñuhun tēe jeē jíca nduú, te tu cáchihi de jehē de, chi cúndijin nuū de ñayivī yáha. ¹⁰ Te tēe jeē tu sáha jeē cuní Yaā Dios, chi nájñuhun jíca de jecuáa, te nájñuhun cáchihi

de jehē de, chi tu cúndijin ini anuá de. Achí yá.

11 Yūcuán na te ni cahān tucu ya:

Amigo yō Lázaro quíxí de, te quihīn rī sáha ri jeē nátaḥū ni de. Achí yá.

12 Yūcuán na te tēe cáscuáha un ní cacahān de:

Núu quíxí de te jíní yō jeē nduvāha de.

13 Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quíxí ndije de. 14 Yūcuán na te ni cahān cají yá:

Je ni jihī Lázaro. 15 Te cúsi ni rī jeē tu ní cóyūcu yó yūcuán, návāha vāha ga candíje ró jēe coto ró jniñu jēhnu sáha ri. Núu súcuan te na quíngoo yó núu ndíyí ún. Achí yá.

16 Yūcuán na te Tomás, tēe cúu cuatí, ni cahān de jín jnáhan de jeē cascuáha jín yá:

Suni na quíngoo yó návāha cuu yō jín yá, achí de.

Jesús cúu jeē sáha jeē nátecu te cotecu ní cáni

17 Te nuū ní quee Jesús, te jíní yā jeē ní cuu cuñ quiví yíndūji Lázaro. 18 Te yajni-ni íne ñuu Betania jín ñuu Jerusalén, nájnūhun uū kilómetro yosáva. 19 Te Marta jín María, ni quecoo cuehē jnáhan ña hebreo jeē cahán i jnūhun ndeyí ni jín ña jeē siquí jeē ni jihī cuāha ña. 20 Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. 21 Te ni cahān Marta jín Jesús:

Núu ní íyo ní yáha, te ma cúu cuāha ná núu. 22 Te vēsú súcuan te jíní na jēe tāca jēe cacán ni núu Yaā Dios, te sáha ya, achí ña.

23 Te ni cahān Jesús jín ña:

Natecu cuāha ró.

24 Te ni cahān Marta:

Jíní na jēe nátecu de quiví nátecu tāca ndíyí nde quiví jínu ñayiví.

25 Te ni cahān Jesús:

Máa rí cúu Yaā sáha jeē nátecu jín jēe cótecu ní cáni. Ñayuu candíje jeē jnáma ri i, vēsú na cúu i, te natecu i. 26 Te ñayuu cátecu te cándíje i ruhū, cotecu i ní cáni andiví. ¿A cándíje ró jnúhun yáha? Achí yá.

27 Te ni cahān ña:

Cándíje ná jēe maá ní cúu Cristo, Sēhe Yaā Dios, jeē achí tutu jeē quíji ini ñayiví, achí ña.

Jeē ni ndáhyū Jesús nuū yíndūji Lázaro

28 Te ná ni cahān ña súcuan, te cuahān-ni ña, cuacana yuhu ña cuhū ña María:

Máa Maestro ni quee yā, te cána ya rohó, achí ña.

29 Te jeē ní jini María jnūhun yáha, te yachí ni ndocuiñí ña, cuahān ña nuū yā. 30 Te ná tu quiví Jesús ñuu, chi ni ndōo-ni ya nuū ni jéjnahan Marta yā. 31 Te ñayuu hebreo un jēe cáyucú ini vehe jín María, jeē cacahān i jnūhun ndeyí ni jín ña, ni cajito i jeē yachí ni ndocuiñí ña cuahān ña. Te ni candiquín i ña cuangoo i, chi cájeni ni i jeē cuándahyū ña nde nuū yíndūji ndíyí.

32 Yūcuán na te ni jinū María nuū íne Jesús, te ni jecuiñī yitī ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

33 Te ni jito Jesús jeē ndahyú ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i. 34 Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

35 Te ni ndahyū Jesús.

36 Yūcuán na te ni cacahān ñayuu hebreo un:

Condēhe náa yōhyo manī de jíin ndíyí ún.

37 Te sava i chi ni cacahān i:

Tēe yáha jéē ní nanune de tinūu tée cuáá, ¿á tu ní cúu sáha de jeē ma cúu Lázaro nuú? áchí i.

Jeē ní natecu Lázaro

38 Te yōhyo ni jnahuhū ni tucu Jesús, te ni quee yā nde nuū yíndūji ndíyí. Te ñn yaū cava cúu, te yuyáú un ndíhyú ñn yuū. 39 Te ni cahān yā:

Tejiyo yuū un jíjnáhan ró, áchí yá.

Te Marta, cuāha ndíyí un, ni cahān ña:

Je jéén xicō de, chi je ni cuu cuūn quivī yíndūji de.

40 Te ni cahān Jesús jíin ña:

¿A násūú je ni cahān rī jíin ró jeē núu candíje ró te coto ró jéé yóhyo cújéhnū Yaā Dios jíin poder yā? áchí yá.

41 Yūcuán na te ni catejiyo i yuū jeē ndési yuyáú ndíyí

ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéé sáha ní jéé jicán na. 42 Te jíin na jéé níiní sáha ní jéé jicán na. Te jeē váha ñayuu cáhīn yáha cúu jeē súcuan cáhán na, návāha na cándíje i jeē maá ní ni tají sáña.

43 Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

44 Te ni quenda-ni tēe ni jihī ún, te ñúsúcún ndaha de síhin de jíin tira sahma. Te nuū de ñúsúcún ñn sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquíjnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

45 Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. 46 Te sava i chi cuangoo i nuū tée grupo fariseo, te ni castūhún i ndese ni sáha Jesús.

47 Yūcuán na te tēe fariseo un jíin sūtū cácujehnū ni candutútú de junta jíin táca gá tēe cácujehnū. Te ni cacahān de:

¿Ndese sáha yó? Chi tēe ún yōhyo cuehē jniñu jéhnū sáha de. 48 Te núu condéhé-ni yó, te ndivii ñayuu candíje i de. Te quijicoo táca tée nación Roma jeē cácujehnū, te canu de templo cáhnu yó, te scuíté núu de ñayuu nación yō, achí de jíjnáhan de.

49 Te ñn jnáhan de jeē naní Caifás, jeē cúu máá sūtū cujéhnū ga cuiyā ún, ni cahān de:

Róhó chí tu cájini cuiti rō, 50 ni tu cájecūhun ni rō jeē váha ga jeē cúū ñn tēe jehē ñáyuu nación yō vēsú jeē náā ndivii i, áchí de.

51 Te tu ní cáhán de jñūhun yáha jēē jēni ni maá de. Chí siquī jeē cúu de sūtū cujéhnū ga cuiyā ún, te ni sáha Yaā Dios jíin de jeē ní nacani de jñūhun jeē cúū Jesús jehē ñáyuu nación hebreo. 52 Te nasūu máá ñn-ni jehē nación hebreo, chí suni jehē ndivii ñáyuu cácuu sēhe Yaā Dios jeē ní cajitē núu tācá nación, návāha ñn na cuu i jíjnáhan i. 53 Yūcuán na te nde quivī ún te tāca tēe hebreo cácujehnū un, ní casquijnáhan de jñūhun jee cáhni de Jesús.

54 Jeē yúcuan tuá ní jíca ndijin yā nuū jnáhan ñnuu yā hebreo un, chí ni quenda ya región Judea, te cuahān yā ñn ñnuu naní Efraín, nuū iyó yajni ñuhun téhé. Te ni condee yā yūcuan jíin tēe cáscuáha jíin yá.

55 Te ni cuyajni vico pascua jeē cánasáha ñáyuu hebreo. Te cuehē ñáyuu tācá ñnuu yūcuán cuángoo i ñnuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáá te quejéé vico pascua. 56 Te cánanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiiji de vico, chí tuú? Achí i.

57 Te sūtū cácujehnū jíin tēe fariseo ni candacu de jniñu jeē núu ndé ñn ñáyuu jiní ndé nuū íne ya, te na cástūhún i, návāha jñii de ya.

Jeē ní chuhun María perfume jehē Jesús
(Mt. 26.6-13; Mr. 14.3-9)

12

1 Te cúmani íñū gā quivī te coo vico pascua. Te ni jehēn tucu Jesús ñnuu Betania nuū ndeé Lázaro, tēe ni jihī te ni nastécu yā de. 2 Te ni casáha i ñn vico xíni jeē yíñūhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñáyuu. 3 Yūcuán na te María ni quee ña jíin nájñūhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixí ña. Te ñí ini vehe un ní chitú xícō perfume un. 4 Yūcuán na te ni cahān Judas Iscariote sēhe Simón, ñn tēe scuáha jíin yá un, te suu de cúu jeē nastúu de ya:

5 ¿Najehē tu ní cúyāhu perfume yáha jēé uní ciento denario, te cuāha yó núū ñáyuu ndahú núú. Achí de.

6 Súcuan ni cahān de, nasūu jēé cundáhú ndije ni de ñáyuu ndahú, chí sa suhva jeē cúu de tēe cuihná. Chí máá de ndíso yijni xūhún, te quíhin cuihná de jeē cájequin tāca tēe ún. 7 Yūcuán na te ni cahān Jesús:

Ma stáhān rō ña. Chí jeē ni sáha ña yáhá cúu jeē ni sátūhva ña ruhū nde quivī jeē

quíndūji ri. ⁸ Chi níni cáyūcu ñáyuu ndahú jíin ró, te ruhū chí tuá condee rī jíin ró. Achí yá.

Jeē ní casquijnáhan de jnūhun jeē cahni de Lázaro

⁹ Te cuehē ñáyuu hebreo ni cajini jnūhun i jeē néne ya ñuu Betania. Te ni jinūcoo i, te nasūu máá ñn jeē cuní i coto i nuū Jesús, chí suni jeē cuní i coto i nuū Lázaro, tēe jeē ní nastécu yā. ¹⁰ Yūcuán na te sutū cácujuhnu ni casquijnáhan de jnūhun jeē suni cahni de Lázaro. ¹¹ Chí jeē síquí Lázaro te ni cujiyo cuehē jnáhan ñuu de hebreo nuū de, te cá candíje i Jesús.

Jeē ni quívi Jesús Jerusalén (Mt. 21.1-11; Mr. 11.1-11; Lc. 19.28-40)

¹² Te inga quívi ún, te ñáyuu cuehē jeē ní quecoo vico pas-cua un, ní cajini jnūhun i jeē véji Jesús ñuu Jerusalén. ¹³ Te ni cajehnde i ndaha ñúú, te ni quendacoo i cuajnahán i ya. Te cácana jee i:

Yōhyo cújehnu Yaā Dios. Yōhyo vāha Yaā cúu Yaā jeē véji jíin jniñu máá Jítoho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihín Jesús ñn burro, te ni jecosō yā tī, nájñūhun cáhán tutu ñ:

¹⁵ Ñáyuu ñuu Jerusalén jeē naní ñuu Sion, ma yūhu ró jijnáhan ró. Yāhá condēhe ró jeē véji Rey rō, te yósó yá ñn burro. Achí tutu.

¹⁶ Te quívi ún te tēe cáscuáha jíin yá, tu ní cájecūhun ni de jeē súcuan squícu tāca jéē yosó núu tútu ñ. Te nde ná ni ndujéhnu Jesús jeē cuánuhun yā andiví, te sáá te ni canucūhun ni de tāca jnūhun yósó síquí yā, jíin jéē ní casáha de súcuan jíin yá.

¹⁷ Te ñáyuu ní cahín jíin yá ná ni cana ya xiní Lázaro nuū ní yíndūji de, te ni nastécu yā de, ni canacani i jnūhun ndese ni sáha ya. ¹⁸ Jeē yúcuan ní quendacoo ñáyuu cuehē un, ní jejnahan i ya, chí ni cajini jnūhun i jeē ni sáha ya jniñu jéhnu un jéē ni steén yā poder yā. ¹⁹ Yūcuán na te ni cacahán máá tēe fariseo:

Vijna te je ni cajito yó jéē ma cúu cuiti gā casi yō. Chí jíto yó jéē ndivii cuiti ñáyuu cuan-goo i jíin de. Achí de jijnáhan de.

Ñáyuu nación Grecia nánducú i Jesús

²⁰ Te sava ñáyuu nación Gre-cia, suni ni quiijicoo i ñuu Jerusalén vico pascua un jéē chíñúhún i Yaā Dios. ²¹ Te ni quecoo i nuū Felipe, tēe ñuu Betsaida ndañúú Galilea. Te ni cacahán i jíin de:

Tátā, cácumi ná cahán na jíin Jesús, achí i.

²² Te ni jehén Felipe, ni castūhún de nuū Andrés. Te ndíndúú de cuacastūhún de nuū Jesús. ²³ Te ni cahán Jesús jíin de:

Je ni quee quívi jeē ndujéhnu Yaā ní nduu tēe. ²⁴ Te jendaá cahán rī jíin ró, ñn nuní trigo núu tú ñingava nuū ñūhun te quíndūji, núu

súcuan te quendōo máá ñn-ni. Te núu quindūji, te nacayā cuehē ndasí. Te suni súcuan cánuú cuu rī quindūji rī, návāha coo cuehē ñayuu jeē ndúu i sēhe Yaā Dios. ²⁵ Te na-ni ñayuu núu tu jéhe i jñūhun ndoho i jeē siquí ruhū, te jnahnū ndetū i. Te ñayuu jeē jéhe i jñūhun ndoho i jeē siquí ruhū ini ñayīvi yáha, cotecu i ní cáni andívi. ²⁶ Núu ndé ñayuu cuní i cuajniñu i nuū rī, na cóndiquīn i ruhū. Te nuū cóndee rī, suni yūcuán condee ñayuu jejníñu nuū rī. Te ñayuu jejníñu nuū rī, chí sáha Tátá rī jeē cujéhnu i.

Jeē ni cáhān Jesús jeē cuu yā

²⁷ Te vijna te cúcuíhyá ndasí ni rī sáha jñūndóho quiji siquí rī. ¿Te ndese cahān rī? ¿A cáhān rī jín Tátá rī: Jnama ní sáña núu jñūndóho jeē quíji siquí ná, achi rī? Ma cúu, chí jeē siquí yúcuán cúu jeē véji rī. ²⁸ Tátá, stéén ni jéé cujéhnu ndasí ní jín poder ni, áchí yá.

Yūcuán na te ichi ándívi ní cahān ñn jñūhun:

Je ni steén rī jeē cujéhnu rī, te sáha tucu rī inga jínu, áchí yá.

²⁹ Te ni cajini ñayuu cáhān yūcuán, te ni cacahān i jeē taja cáhān. Te sava ga i ni cacahān:

Ñn ndajéhé Yaā Dios ni cahān jín yá.

³⁰ Te ni cahān Jesús jín i:

Tu ní cáhān jñūhun yáha jéé siquí ruhū, chí sa suhva návāha cuní rō siquí jñūhun jeē ni cáhān yā jín rī. ³¹ Vijna cúu jeē sándaā Yaā Dios siquí

cuéchi ñayuu ñayīvi yáha. Vijna cúu jeē scúnu ya jexeén jeē ndácu jniñu ini ñayīvi yáha. ³² Te ruhū, núu na jínu condita caa rī cuu rī ini ñayīvi, te sáha rī jeē jnáā tāca ñayuu quívicoo i ndaha rī, achí yá.

³³ Súcuan ni cahān yā jeē steén yā ndese modo cuu yā.

³⁴ Te ni cacahān ñayuu jín yá:

Ni cajini sōho ná jéé cahān tutu ley Yaā Dios cánevāha yó, jeē Cristo cotecu yā ní cáni. ¿Te naun cáhān ni jéé Yaā ní nduu tēe, cánuú condita caa ya cuu yā? ¿Ndé ñn cúu máá Yáā ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quívi condee rī jín ró jeē cúu rī luz cundijin ini anuá rō. Núu súcuan te vijna jeē iyó gá luz rī jín ró, te caca ró jín, chí sanaa ni rō te cuahān rī, te nájnūhun quendōo ró núu néé. Chí ñayuu cájica nájnūhun nuū néé, tu cájini i ndé nuū cuángoo i. ³⁶ Núu súcuan te níní ndéé gá rī jín ró, te candíje ró ruhū jeē cúu rī luz, návāha nduu ró ñayuu cájica jín luz, achí yá.

Súcuan ni cahān Jesús tāca jñūhun yáha, te cuahān-ni ya, te tuá ni stéén yā maá yá nuū i.

Jeē tu ní cá candíje ñayuu hebreo jeē cúu ya Cristo

³⁷ Te vésú cuehē jniñu jéhnu ni sáha Jesús jeē steén yā poder yā nuū i, te tu ní cá candíje i ya. ³⁸ Chí squícu nahín jñūhun ni cahān Isaías,

tēe ni nacani jnūhun Yaā Dios nde jenahán:

Tátā Yaā Dios, tu ní cá candíje ñayuu jnūhun ni canacani ná, te tu ní cá candíje i jniñu jéhu jeē ni stéén ni poder ni núu i.

Achí Isaías. ³⁹ Jeē yúcuán tu ní cúu candíje i, chí ni cahán tucu Isaías:

⁴⁰ Ni sáha ya jeē nájnūhun cáhiyo cuáá ánuá i,

jíin jéē cá cunihni ni i, návāha coo nájnūhun jeē tu cájito i,

te ni ma jécūhun ni i, ni ma násāma ini i quivícoo i nuū rī,

jeē nasávāha ri anuá i nuū cuéchi i.

Achí Cristo, achí tutu. ⁴¹ Jnūhun yáha ní cahán Isaías, chí je ni jito de ndese yōhyo cújéhu Jesús, te ni cahán de ndese coo quiví jeē quíji ya.

⁴² Te vésú súcuán te cuehē ñayuu hebreo chí ni cacandíje i ya, te suni nde jíin sava tēe cándacu jniñu. Te tu ní cá cachi de jeē cá candíje de ya, chí siquī jeē cáyūhú de táca tēe fariseo. Chí núu súcuán te quenehen ún de ini vehe i sinagoga jeē ma cuáha ga jnūhun quivícoo de. ⁴³ Chí cácusih gā ni de jeē cújéhu de sáha ñayuu, vésú jeē cújéhu de sáha Yaā Dios.

Jnūhun cáhán Jesús cúu jeē sándaā siquī ñáyuu

⁴⁴ Te ni cahán jee Jesús:

Ñayuu cá candíje ruhū, nasūu máñuhún-ni ruhū cá candíje i, chí suni cá candíje i nde maá Tátá rī, Yaā ní tají

rúhū. ⁴⁵ Te ñayuu cájito nuū rī, suni cájito i nuū Yaā ní tají rúhū. ⁴⁶ Máá rí jeē cúu ri luz cúndijin ini anuá ñayuu, ni quiji ri ini ñayiví návāha táca ñayuu cá candíje ruhū, ma cáca i nájnūhun nuū néē. ⁴⁷ Te núu in ñayuu jíni sōho i jnūhun cáhán rī, te núu tu jétáhú i, te nasūu rúhū sándaā siquī i. Chí tú vēji ri jeē ndénehen ri cuéchi siquī ñayuu ñayiví, chí sa suhva jeē jnáma ri i.

⁴⁸ Te ñayuu jeē casquéhichī i ruhū te tu cájetáhú i jnūhun cáhán rī, iyó in jeē sándaā siquī i. Suu táca jnūhun jeē ni cáhán rī, jnūhun un cúu jeē ndenehen cuéchi siquī i quiví jínu ñayiví. ⁴⁹ Chí tu cáhán rī jeē cúu ni maá rí, chí Tátá rī, Yaā ní tají rúhū, máá yá ni ndacu jniñu nuū rī ndese cahán rī jíin ndese stéén rī. ⁵⁰ Te jíni rī jeē jniñu ndácu Tátá rī sáha jeē cótecu ñayuu ní cáni. Núu súcuán te jnūhun cáhán rī, chí máni jnūhun jeē ní cachi Tátá rī cúu, áchí yá.

Jeē ní nacate ya jehē tēe cáscuáha

13

¹ Te jehíni inga quiví te quejéé vico pascua. Te je jíni Jesús jeē ní quee quiví jeē quénda ya ñayiví yáha quínuhun yā nuū Tátá yā. Te níni cúndáhú ni yā ñayuu maá yá jeē cáyúcú ini ñayiví. Te vijna jeē jínu jeē íne ya ñayiví, te sáha ya in jniñu jeē steén cají yá jeē cundáhú ni yā i.

² Te jexeén je ni squiví ini anuá Judas Iscariote sēhe

Simón, jeē vijna nastúu de ya.
³ Te jíní Jesús jeē véji ya nuū Yaā Dios, te nuhūn yā nuū Yaā Dios, jíin jéē ni sáha Tátá yā jeē kujéhnú ya siquī ndihi-ni.
⁴ Te cúxíni ya jíin téē cáscuáha jíin yá, te ni ndocuiñi yā. Te ni stáa ya sahma ndíi ya, te ni jihni yā ñn toalla chíji ya.
⁵ Te ni chuhun ya ndute ini ñn tijehēn. Te ni quejéé yá nácate ya jehē téē cáscuáha. Te násíchí yā jíin toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jíin yá:

Ma nácate cuiti ni jehē ná.

Te ni cahān Jesús:

Núu tú nacate ri jehē rō, te ma cúu cundúú ró jíin rí.

⁹ Te ni cahān Simón Pedro:

Núu súcuan cúu te nasūu máá jehē-ni ná, chí suni nacate ní ndaha ná jíin xíní ná, áchí de.

¹⁰ Te ni cahān Jesús jíin de:

Tēe jeē sa ní jichí, tu jíni ñúhún ndundoo ñí cáhnu de, chí máá jehē-ni de, chí je íyó ndoo ñí cáhnu de. Te máá ró chí je ni candundoo ró. Te tú ndihi ró cáhīyo ndoo.

¹¹ Chí je jíni yā ndé ñn de cúu jeē nastúu de ya, te jeē yúcuan ní cahān yā: Tú ndihi ró cáhīyo ndoo.

¹² Te nuū ni jínu ni nacate ya jehē de jíinahan de, te ni

naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jíin rō? ¹³ Cácahān rō jeē Maestro jíin Jítóho rō cúu ri, te ndaā cácahān rō, chí suu ndije cúu ri. ¹⁴ Núu súcuan te vēsú Maestro rō jíin Jítóho rō cúu ri, te ni nacate ri jehē rō jíinahan ró, te suni súcuan cánuú jéē nacate máá ró jehē jnahan ró. ¹⁵ Chí jniñu yáha ni sáha ri jeē steén rī nuū rō jeē suni súcuan sa cuajniñu ró núu jnahan ró, nájñūhun sa máá rí ni jejniñu ri nuū rō. ¹⁶ Jendaá cahān rī jíin ró jeē ñn mozo tu cújéhnú de nuū patrón de, te téē jíca jniñu táhú nuū de, te cújéhnú de nuū téē ni tají de. Te máá ró cácuu mozo rī, te na cuájniñu ró núu jnahan ró nájñūhun ni steén rī nuū rō. ¹⁷ Te núu ni cajecūhun ni rō jñūhun yáha, te yōhyo ndetū rō te núu squícu ró.

¹⁸ "Te nasūu jéē cahān rī jeē ndihi ró ndetū, chí je jíni rī tāca róhó jéē ní nacāji ri. Te cánuú squícu jñūhun yáha jeē cáhān tutu ñi: Tēe yéji staā jíin rí, ni ndió cuiñí de siquī rī, achí tutu. ¹⁹ Te vijna te je cástūhun rí tāca jéē yáha núu rō nde ná tu coo, návāha núu na cóo, te candíje ró jéē maá rí cúu Yaā ní tají Yaā Dios. ²⁰ Jendaá cahān rī jíin ró jeē na-ni ñayuu jeē cuatáhú i tāca jéē tají rí, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū véji ri, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahān Jesús tāca jnúhun yáha, te ni cucuíhyá ndasí ni yā. Te ni cahān caji yá:

Jendaá cahān rī jín ró jijnáhan ró jéē ñn máá ró nastúu ruhū, achí yá.

²² Yūcuán na te tēe cáscuáha jín yá, ni candacoto de nuū jnáhan de, cájeni ni de ndé ñn de cúu jeē ni cáhān yā. ²³ Te ñn máá tée scuíha jeē maní gā yā jín, néne de xiin ya mesa jeē cácxíni de jín yá. ²⁴ Te ni sáha Simón Pedro seña nuū de jeē na cájnūhún de ya ndé ñn de cúu jeē ni cáhān yā.

²⁵ Yūcuán na te tēe un ní scáyí de máá de nuū Jesús, te ni cajnúhún de ya:

¿Ndé ñn de cúu? áchí de jín yá.

²⁶ Te ni cahān Jesús:

Na chúndaji rī staā te cuāha rī nuū ñn de, te suu tēe un cúu, achí yá.

Te ni chundaji ya staā, te ni jēhe ya nuū Judas Iscariote sehe Simón. ²⁷ Te jeē ní quihín de staā ún, te ni quívi-ni Satanás ini anuá de. Yūcuán na te ni cahān Jesús jín de:

Jniñu jeē sáha ró, na sáha yachí rō.

²⁸ Te ni ñn tēe cáyeji staā jín yá, tu ní cájecūhun ni de naun ni cahān yā súcuan jín de. ²⁹ Chi sava de cájeni ni de jeē ni cáhān Jesús jín Judas jeē cuāan de jeē jini ñúhún yá vico ún, chí jéē cuáha de jecu xūhun nuū ñayuu ndahú.

Chi máá de ndíso yijni xūhún. ³⁰ Te jeē ní yeji de staā ún, te ni quenda-ni de cuahān de. Te je ni cuaa.

Jeē ní ndacu ya jniñu jéé

³¹ Yūcuán na te jeē cuahān Judas te ni cahān Jesús:

Vijna te ruhū, Yaā ní nduu tēe, stéen rī ndese cújéhu ri, te suni jín rúhū te cuni ñayuu ndese cújéhu Yaā Dios.

³² Te núu jín rúhū cuni ñayuu ndese cújéhu Yaā Dios, núu súcuan te suni stéen Yaā Dios ndese cújéhu ruhū jeē cúu rī Sēhe ya. Te yachí-ni stéen yā.

³³ Séhē, tuá nahān condee rī jín ró jijnáhan ró. Te nanducú ró ruhū, te nájnūhun ni cahān rī jín táca jnáhan yó hebreo, suni súcuan cáhān rī jín ró vijna, jeē ma cúu jinūcoo ró núu quihín rī. ³⁴ Te vijna te ndácu rī ñn jniñu jéé núu rō, jeē na cúndáhú ni rō jnáhan ró. Nájnūhun cúndáhú ni rī rohó, suni súcuan na cúndáhú ni rō jnáhan ró. ³⁵ Te núu cúndáhú ni rō jnáhan ró, súcuan te cuni tāca ñayuu jeē cácuu ró tée cáscuáha jín rí, achí yá.

Jeē ní cachi yā jeē yūhu Pedro cahān de jeē jini de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahān Simón Pedro jín yá:

¿Ndé nuū quihín ni núu súcuan?

Te ni cahān Jesús:

Nuū quihín rī chi ma cúu condiquín rō ruhū vijna, te cúcuéé gá te jinū rō.

³⁷ Te ni cahān Pedro:

¿Najehē ma cūu condiquīn na nihín vijna? Tu yúhú ná cuu na jéē siquí ni.

³⁸ Te ni cahān Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jīn ró jeē nde ná tu cana líhli, te unī jínu yūhu ró te cahán rō jeē tu jíní rō ruhū. Achí yá.

Jesús cūu ichi jeē jinú yō nuū Tatáyā

14

¹ Te ni cahān gā yā:

Ma cucuíhyá ni rō siquī tāca jnúndóho. Na cándije ró jéē sáha Yaā Dios jehē rō, te suni na cándije ró jéē sáha ri jehē rō. ² Chi nuū ndeé Tátá rī, iyó cuéhē vehe condee rō jijnáhan ró. Te núu jeē tu súcuan iyó, te je ni castūhun rí nuū rō nuū. Núu súcuan te quihín rī quisátūhva rī nuū cóyūcu ró. ³ Te jeē quihín rī sātūhva rī nuū cóyūcu ró, te ndiji ri quinaquihín ri rohó quihín yō, návāha suni coyūcu ró nuū cóndee maá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahān Tomás jīn yá:

Tu cájini na ndé nuū quihín ni, ¿te ndese cuni ná ichi jínú yūcuan núu súcuan?

⁶ Te ni cahān Jesús jīn de:

Maá rí cūu ichi jinū rō andiví, te maá rí cūu jnūhun ndaā jīn jnúhun cotecu rō ní cáni. Te ni ĩn ma jinú nuū Tátá rī te núu tú ruhū. ⁷ Te núu je ni cájini rō ruhū, te suni je ni cájini rō Tátá rī núu

súcuan. Te ndé vijna je cájini rō yā, chi je ni cajito ró nuū rī, achí yá.

⁸ Te ni cahān Felipe jīn yá:

Stéén ni Tátá ni núu ná, te na cúvāha ni na jijnáhan ná, achí de.

⁹ Te ni cahān Jesús:

Felipe, je ni cuu cuehē quivī jīca ri jīn ró jijnáhan ró, ¿te á ná tu cuni rō ndé ĩn cūu ri naún? Tēe jeē jito ruhū, suu Tátá rī jito de. Núu súcuan ¿te najehē cahán rō jeē steén rī Tátá rī nuū rō? ¹⁰ ¿A tu cándije ró jéē ĩn-ni cūu ri jīn Tátá rī, te Tátá rī ĩn-ni cūu ya jīn rí? Tāca jnúhun cáhán rī jīn ró, nasūu jnúhun máá rí cūu. Chi Tátá rī jeē ĩn-ni cūu ya jīn rí, máá yá sáha tācá jniñu jeē sáha ri. ¹¹ Candije ró jijnáhan ró jéē ĩn-ni cūu ri jīn máá Tátá rī, te Tátá rī ĩn-ni cūu ya jīn rí. Te núu tu cájecūhun ni rō, te cándije ró rúhū siquí tācá jniñu sáha ri. ¹² Jendaá cahán rī jīn ró, núu ndé ñáyuu cándije ruhū, jniñu jéhu jeē sáha ri yāhá, suni sáha i. Te jéhu ga jniñu sáha i vēsú yāhá, chi quinhun rī nuū ndeé Tátá rī. ¹³ Te tācá na-ni vé cacán rō nuū Tátá rī siquí jeē cácandije ró jéē cūu ri Sēhe ya, te sáha ri jeē cacán rō, te súcuan stéén rī jeē yóhyo cújéhu Tátá rī. ¹⁴ Chi tācá na-ni vé cacán rō siquí jeē cácandije ró rúhū, te sáha nahín rí.

Jeē ni jéjnūhun ya jeē tají yá Espíritu Santo

¹⁵ Te núu manī rō jīn rí jijnáhan ró, te na squícu ró jniñu ndácu ri nuū rō. ¹⁶ Te

cacān tahu rī nuū Tatá rī, te taji yá inga Yaā chindéé ñáhán róhó, te sáha ya jeē cóo sī ni rō jijnáhan ró. Te Yaā un cúu máá Espíritu jeē steén jnūhun ndaā, te condee yā jín ró ní cáni. ¹⁷ Te ñayuu ñayīvi má cúu cuatáhú i ya, chí tu cúu coto i nuū yā, ni tu cúu cuni i ndese Yaā cúu ya. Te máá ró chí je cájini rō ndese Yaā cúu ya, chí ndéé yá jín ró, te condee yā ini anuá rō ní cáni. ¹⁸ Ma stóo uun ri rohó, chí ndiji ri nuū rō. ¹⁹ Jecu na quivī te ma cóto ga ñayuu ñayīvi núu rī. Te máá ró jijnáhan ró chí coto ró núu rī, chí cotecu rī ní cáni, te jeé yúcuan suni cotecu máá ró. ²⁰ Te quivī ún te cuni rō jeé ñn-ni cúu rī jín Tatá rī, te máá ró ñn-ni cúu ró jín rí jeé ndeé rí ini anuá rō jijnáhan ró. ²¹ Te na-ni ñayuu núu ñūhun ni i jniñu ní ndacu ri, te squícu i, ñayuu un cúu jeé maní ndije jín rí. Te ñayuu jeé maní jín rí, suni coo maní Tatá rī jín i. Te suni ruhū coo maní rī jín i, te stéén rī nuū i jeé nduú rí jín i. Achí yá.

²² Te ni cahān Judas jín yá (te nasūu tée cúu Iscariote):

Najehē cúu jeé steén ni máá ní nuū ná, te nuū ñáyuu ñayīvi chí tuú?

²³ Te ni cahān Jesús:

Ñayuu jeé maní jín rí, chí cásquícu i jeé cahán rī. Te coo maní Tatá rī jín i. Te Tatá rī jín máá rí quijicoo ri cundúu rí jín i. ²⁴ Te ñayuu jeé tú maní jín rí, tu cásquícu i jeé cahán rī. Te jnūhun cájini sōho ró cahán rī, nasūu jnūhun máá rí

cúu, chí jnūhun máá Tatá rī jeé ní taji ruhū cúu.

²⁵ 'Tāca jnūhun yáha cáhán rī jín ró ní ní íne ga rī jín ró. ²⁶ Te Tatá rī chí taji yá Espíritu Santo, quiji nucuñī nuū rī. Te máá yá chindéé ñáhán yá rohó, te sáha ya jeé cóo sī ni rō. Te stéén yā tāca jnūhun nuū rō, te nacachi tucu ya tāca jéé ni cáhán rī jín ró.

²⁷ 'Te jeé quihín rī, te sáha ri jeé cóo ndeyí coo sī ni rō. Nájñūhun íyó ndeyí sī ni máá rí, suni súcuan coo ndeyí sī ni rō sáha ri. Te jeé sáha ri jeé cóo ndeyí sī ni rō, tu quijnáhan jín jnūhun ndeyí cácahān ñayuu ñayīvi. Ma cucuíhyá ni rō siquī tāca jnúndóho, te ni ma yūhu ró. ²⁸ Je ni cajini sōho ró jéé ni cáhán rī jeé quihín rī, te ndiji ri cundúu rí jín ró. Te núu cáhīyo maní vāha ró jín rí, te cusī ni rō jeé ni cáhán rī jeé nuhún rī nuū Tatá rī. Chí cújéhu ga Tatá rī vijna vésú ruhū. ²⁹ Je ni castūhun rí nuū rō tāca jnūhun yáha nde ná tu coo, návāha núu je ni cuu, te candíje ró ruhū jijnáhan ró.

³⁰ 'Ma cahán rī cuehē gā jnūhun jín ró, chí je vēji jexeén jeé ndácu jniñu ini ñayīvi yáha. Te tú na vé cúu sáha siquī rī nuū. ³¹ Te na cóo nájñūhun ni ndacu Tatá rī jniñu nuū rī, návāha cuni ñayuu ñayīvi jéé maní rī jín Tatá rī, te sáha ri jniñu ní ndacu ya. Ndocuñī jijnáhan ró na quíngoo yó. Achí yá.

Jesús cúu nájñūhun yoyúcu uva

15

1 'Máá rí cúu nájnūhun yoyúcú uva váha ndaā, te Tátá rī cúu nájnūhun tēe ndíto yoyúcú uva un. 2 Te máá ró chí cácuu ró nájnūhun ndaha, te núu tu jéhe ró ndéhē te quende yā rohó. Te núu cácuu ró nájnūhun ndaha jeē jéhe ndehē, te nasándoo ya nacahnde yā rohó nájnūhun jeē cúu ró ndaha ún, návāha cuāha ró cuéhē gā ndehē. 3 Te máá ró chí je ni candundoo ánuá rō jīn jnūhun ni steén rī nuū rō, nájnūhun ndúndoo ndaha uva. 4 Na cúndúú ró jīn rí, te suni máá rí cundúú rí jīn ró. ĩn ndaha uva ma cúu cuāha ndehē jeē maá, te núu tu yǎjnē jicā yóho. Te suni súcuan máá ró, ma cúu sáha ró jniñu váha te núu tu cúndúú ró jīn rí.

5 'Máá rí cúu yoyúcú un, te máá ró cácuu ndaha ri. Ñayuu jeē nduú jīn rí, te ruhū ndúú rí jīn i, máá i cúu nájnūhun ndaha jeē jéhe cuehē ndehē. Chí núu tú cundúú ró jīn rí, te tú cuiṭi na jniñu váha cuu sáha ró. 6 Ñayuu jeē tu cúndúú jīn rí, quende yā i nájnūhun ĩn ndaha uva, te ichī. Te ndoho i nájnūhun ndaha uva un jéē ndutútú te cayū nuū ñuhún.

7 'Núu ndúú ró jīn rí, te cáñuhun ni rō jnūhun cáhán rī, yūcuán na te cacān rō na-ni vé cácuu rō, te sáha ri jeē cácahán rō. 8 Te núu cásáha ró cuéhē jniñu váha, súcuan cástéén rō jeē cúu ndije ró ñayuu cascuáha jīn rí, te súcuan nácuni ñayuu jeē yóhyo cújéhnū Tátá rī. 9 Nájnūhun

manī Tatá rī jīn rí, suni súcuan manī rī jīn ró jijnáhan ró. Núu súcuan te ma siaá rō jnūhun manī rī jīn ró. 10 Núu squícu ró jniñu ní ndacu ri nuū rō, te níni coo manī rī jīn ró, nájnūhun máá rí squícu ri jniñu ní ndacu Tátá rī nuū rī, te níni íyó mánī yā jīn rí.

11 'Súcuan ni cahān rī jīn ró návāha coo sĥ ni rō nájnūhun íyó sĥ ni rī, chí nde cusĥ teyĥ ni rō. 12 Te yāha cúu jniñu ndácu ri nuū rō jijnáhan ró: jeē na cúndáhú ni rō jnáhan ró nájnūhun cúndáhú ni rī rohó. 13 Núu ĩn tēe cuu de jehē amigo de, te tuá na vé cúmanī gā sáha de jeē cundáhú ni de amigo de. 14 Te máá ró cácuu amigo rī núu squícu ró jniñu ndácu ri nuū rō. 15 Ma cahán gā rī mozo jīn ró, chí ĩn mozo tu cástūhún patrón nuū i ndese jéni ni de sáha de. Chí sa suhva amigo cahān rī jīn ró, chí je ni castūhun rí nuū rō tāca jnūhun ni cahān Tatá rī jīn rí. 16 Máá rí ni nacāji rōhó jéē jnáma ri rohó, te nasūu máá ró ni cánacani ni xīhna gā jeē cóndiquĥn rō ruhū. Te ni jeni ri rohó jéē caca ndaā rō te scándíje ró cuéhē ñayuu jeē cuu i sēhe ri ní cáni. Te súcuan te ndĥi jeē cacán rō nuū Tatá rī siquĥ jeē cácandíje ró rúhū, sáha ya jeē jicán rō. 17 Te yāha cúu jniñu ndácu ri nuū rō: jeē na cúndáhú ni rō jnáhan ró.

Jeē cáquitĥ ni ñayuu ñayĥvi núu Jesús jīn núu ñáyuu cácandíje

18 "Te núu cáquitĥ ni ñayuu ñayĥvi núu rō jijnáhan ró, te

je cájini rō jeē xīhna gā nuū maá rí ni caquitī ni i. ¹⁹ Te núu jeē iyó gá rō jín modo ñayuu ñayiví, te coo manī ñayuu ñayiví jín ró nuú, nájñuhun manī i jín jnáhan i. Te ni nacáji ri rohó jeē tuá coo ró jín modo ñayuu ñayiví. Te jeē yúcuan cáquitī ni i nuū rō, chí tuá cácuu ró cuenta ñayiví. ²⁰ Nucūhun ni rō jñuhun ni cahān rī jín ró: Núu tu iyó yíñuhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i rohó jéē cácuu ró mozo rī. Te núu jeē ni cájetáhú i jñuhun ni steén rī, te suni cuatáhú i jñuhun cástéén rō. ²¹ Te táca jniñu yáha sáha i jín ró jeē siquí ruhū, chí tu cájini i Yaā ní tají ruhū vēji ri.

²² 'Núu jeē tu ní quíji ri nacani ri jñuhun nuū i, te ma cóo cuēchi i núu. Te vijna chí ma cúu ga cahān i jeē tu jín i jeē iyó cuēchi i. ²³ Ñayuu jeē cáquitī ni nuū rī, suni nuū Tatá rī cáquitī ni i. ²⁴ Núu jeē tu ní sáha ri jniñu jéhu nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jín núu Tatá rī. ²⁵ Te súcuan cásáha i návāha squícu jñuhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

²⁶ 'Te tají rí maá Yaā chindéé ñáhán rohó te sáha ya jeē cóo sñ ni rō. Te Yaā un cúu maá Espíritu jeē steén jñuhun ndaā, te quíji ya nde nuū Tatá

rī, te nacani cájī yá jñuhun ri. ²⁷ Te suni maá ró nacani ró jñuhun ri, chí je cáhīn ro jín rí nde ná ni quejéé rí nácani ri jñuhun.

16

¹ 'Tāca jñuhun yáha ní cahān rī jín ró návāha ma náyūhu ró jeē quíji jñundóho. ² Chi quenehen i rohó jéē ma cuáha ga i jñuhun cone ró táca vehe ñi sinagoga. Te quee quiví jeē cahni i rohó, te cani ni i jeē ñn jniñu váha ni sáha i nuū Yaā Dios. ³ Te súcuan sáha i jín ró, chí tu cájini cuiti i maá Tatá rī ni maá rí. ⁴ Te ni cahān rī jñuhun yáha jín ró návāha núu je ni quee quiví jeē súcuan coo, te nucūhun ni rō jeē jé ni cahān rī jín ró.

Jniñu sáha Espíritu Santo

'Te tu ní cáhán rī jñuhun yáha jín ró nde xīhna ñuhún, chí íne maá rí jín ró jijnáhan ró. ⁵ Te vijna chí nuhūn rī condee rī jín Yaā ní tají ruhū vēji ri. Te ni ñn ró tu cájñuhun ró ndé nuū quihín rī. ⁶ Chi maá jéē cácuuñhyá ndasí ni rō jeē ni cahān rī súcuan jín ró. ⁷ Jendaá cahán rī jín ró: Jeē váha maá ró jijnáhan ró cúu jeē quihín rī. Chí núu tú quihín rī, te ma quíji Yaā chindéé ñáhán rohó te sáha ya jeē cóo sñ ni rō. Te núu cuahān rī, te tají rí yā quíji ya nuū rō. ⁸ Te jeē quee yā, te steén yā nuū ñayuu ñayiví jéē iyó cuēchi i, jín ndese quivícoo i ichi ndaā, jín jéē sándaā Yaā Dios siquí cuēchi i. ⁹ Stéén yā jeē iyó cuēchi i, chí

tu cá candíje i ruhū. ¹⁰ Te stéén yā siquī ichi ndaā, chi máá rí nuhūn rī nuū Tatá rī, te ma cóto ga rō nuū rī. ¹¹ Te stéén yā siquī jeē sándaā Yaā Dios cuēchi ñayuu, chi je ni cundaā jeē jnahnú ndetū máá jéxeén jeē kujéhnū ini ñayiví yáha.

¹² Te iyó cuéhē gā jnūhun cúní rī cahān rī jiín ró, te ma cóto jecūhun ni rō vijna. ¹³ Te jeē quée máá Espíritu jeē steén jnūhun ndaā, te máá yá steén tāca jnúhun ndaā un núū rō. Chi ma cahán yā jeē máá yá, chi cahān yā tāca jéē jini sōho ya cahán Yaā Dios. Te stéén yā siquī tācá jniñu jeē coo. ¹⁴ Te stéén yā jeē kujéhnū rī, chi nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō. ¹⁵ Ndihi ndese cújéhnū Tatá rī, suni súcuan cújéhnū máá rí. Jeē yúcuán ní cahān rī jeē Espíritu Santo nacastūhun yá nuū rō tāca jnúhun jeē jé ni cahān rī, te sáha ya jeē jécūhun ni rō jijnáhan ró.

Vēsú cá cucuíhyá ni rō, te ndusī ni rō

¹⁶ Jecu na te ma cóto ga rō nuū rī. Te jecu tucu quiví te coto tucu ró núū rī, chi quínuhun rī nuū ndeé Tatá rī. Achí yá.

¹⁷ Yūcuán na te sava tēe cáscuáha jiín yá, ni caca-jnūhun jnáhan de:

¿Na jnūhun cóto jeē yáha jeē cahán yā jiín yó? Chi áchí yá jeē jecu na te ma cóto ga yō nuū yā, te jecu tucu quiví te coto tucu yó núū yā, chi siquī jeē quínuhun yā nuū

ndeé Tatá yā. ¹⁸ ¿Na jnūhun cóto jeē yáha jeē cahán yā, jecu na? Tu cájecūhun ni yō na vé cóto jeē cahán yā. Achí de.

¹⁹ Te ni jini Jesús jeē cá cuni de cajnúhun de ya. Te ni cahán yā jiín de:

¿A cácajnūhun jnáhan ró na vé cóto jeē ni cahán rī jiín ró jeē jecu na te ma cóto ga rō nuū rī, te jecu tucu quiví te coto tucu ró núū rī? ²⁰ Jendaá cahán rī jiín ró jeē ndahyū rō jijnáhan ró te cucuíhyá ni rō, te ñayuu ñayiví chi sa cusī ni i. Te vēsú cucuíhyá ni rō, te sa ndusī ni rō jeē cóto tucu ró núū rī. ²¹ Hñ ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúli, te tuá nahán ña jeē ní ndoho ña, chi cúsī ni ña jeē ní cacu sēhe ña. ²² Te suni súcuan cóto jeē cándoho ró vijna, chi cá cucuíhyá ni rō jiín rí. Te jecu-ni quiví te coto jnáhan tucu yó, te cusī ndasí ni rō. Te ni hñ ma cóto casi jeē cúsī ni rō.

²³ Te quiví ún chi tú na vé cacān gā rō nuū rī. Chi jendaá cahán rī jiín ró jeē nuū máá Tatá rī cacān rō, te sáha ya ndihi jeē cájicān rō, siquī jeē cá candíje ró rúhū. ²⁴ Nde vijna te ná tu cacān rō nuū Tatá rī jeē jiín síhví rí. Te vijna te na quéjéé ró cacān rō jiín síhví rí, te nihñ rō, návāha cusī ndasí ni rō.

Je ni quende yā poder ndihi jeneé cáhīyo ini ñayiví

²⁵ Tāca jnúhun yáha ní cahán yatá rí jiín ró. Te quee quiví jeē ma cahán yatá gá rí

jiín ró, chi sa suhva castūhun cájí rí nuū rō siquī Tatá rī. ²⁶ Te quivī ún chi cacān rō nuū Tatá rī siquī jeē cá candíje ró rúhū. Te tu cáhán rī jiín ró jeē cacán tahu rī jehē rō nuū Tatá rī. ²⁷ Chi máá Tatá rī je cúndáhú ni yā rohó siquī jeē cáhīyo manī rō jiín rí, te ni cacandíje ró jéē ndé nuū maá yá vēji rī. ²⁸ Ni quenda rī nde nuū Tatá rī, te ni quee rī ini ñayiví. Te vijna te quenda rī ini ñayiví, te nuhūn tucu rī nuū Tatá rī. Achí yá.

²⁹ Te ni cacahān tēe cáscuāha jiín yá:

Vijna te cáhán cají ní, te tuá cahán yatá ní. ³⁰ Vijna te cájini na jéē jini ni ndivii cuiti, te tuá jini ñúhún jéē cájnūhún ni in ná níhín. Jeē yúcuan cá candíje ná jéē vēji ní ndé nuū Yaā Dios. Achí de.

³¹ Te ni cahān Jesús jiín de:

¿A ndé vijna te cá candíje ró naún? ³² Te quiiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéē quéndōo máñúhún rí, chi Tatá rī íne ya jiín rí. ³³ Tāca jnúhun yáha ní cahān rī jiín ró návāha coo ndeyí coo sī ni rō siquī jeē cá candíje ró rúhū. Ini ñayiví chi cánuú coto ró jnúndóho. Te vēsú súcuan te na cóo sī ni rō, chi je ni quende rī poder tāca jéneé cáhīyo ini ñayiví. Achí yá.

Jeē ni jícān tahu Jesús jehē ñayuu cá candíje

17

¹ Te ná ni cahān Jesús tāca jnúhun yáha, te ni ndacoto ya ichi ándiví, te ni cahān yā:

Tátā, je ni quee quivī jeē ndóho ná. Vijna te steén ni jéē cujéhnu máá ná jeē cúu ná Séhe ní, návāha suni máá ná steén na jéē cujéhnu máá ní.

² Chi ni sáha ní jéē ndíso jniñu ná síquī tāca ñáyuu, návāha tāca ñáyuu jeē ni jéhe ní núu ná, cotecu i ní cáni sáha ná.

³ Te suhva cúu jnúhun cotecu i ní cáni: suu jeē na cúni i níhín jéē mañúhún-ni ní cúu Yaā ndaā, jiín jéē cúni i sañá jeē cúu ná Jesucristo, Yaā ní tají ní.

⁴ Je ni steén na núu ñáyuu ñayiví jéē cujéhnu ní, te je sínu ná jniñu ní ndacu ní núu ná.

⁵ Te vijna, Tátā, sáha ní jéē ndujéhnu tucu ná ndé nuū néne ní, nájnūhun cújéhnu ná jiín ní nde ná tu jecōo ñayiví.

⁶ Ñayuu jeē ní nacāji ní ini ñayiví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnúhun ní, te ni casquícu i. ⁷ Te vijna te cájini i jeē ndé nuū maá ní vēji tāca jéē iyó jiín ná. ⁸ Chi tāca jnúhun ni cahān ni jiín ná, ní castūhun ná núu i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandíje i jeē maá ní ni tají saña.

⁹ Te jícán tahu na jehē maá i jíjánhān i. Tu jícán tahu na jehē ñáyuu ñayiví jéē tu cá candíje, chi sa jehē maá ñáyuu ni jéhe ní núu ná, chi

cuenta maá ní cácuu i. ¹⁰ Te tãcã i jeē yãhi i ndaha máá ná, suni cuenta maá ní cúu. Te tãcã i jeē cúu i cuenta maá ní, suni cuenta maá ná cúu i. Te cástéén i ndese cújéhnu ná.

¹¹ "Te tuá condee ná ini ñayĩví. Te máá i chi quendõo i ini ñayĩví, te máá ná chi najeē ná condee na jíin ní. Yaã iĩ Yaã ndoo cúu ní, Tãtã. Te jíin poder ní condito ní táca ñayuu ni jéhe ni núu ná, návãha inuú na cóo ni i jíinãhan i, nãjnũhun cúu máá yó. ¹² Te jeē ní condee na jíin i ini ñayĩví, te jíin poder ni ní condito ná i. Tãca ñayuu ni jéhe ni núu ná, ni condito yúcún ná i. Te tu ní jéhe na jnúhun naa i jíinãhan i, chi máá ñn-ni tēe jeē je cúu de tēe jnahnũ ndetũ, návãha squícu jnúhun yósó núu tútu iĩ.

¹³ "Te vijna te najeē na núu ní, te cáhãn na táca jnúhun yãha jíin i níni jēē íne ga ná ini ñayĩví, návãha na cóo sã ndasí ni i nãjnũhun cúsi ni máá ná.

¹⁴ Ni castũhun ná jnúhun ní núu i. Te ni caquiti ni ñayuu ñayĩví núu i, chi tuá cácuu i cuenta ñayĩví, nãjnũhun máá ná tu cúu ná cuenta ñayĩví.

¹⁵ Te tu jíicãn tahú na jēē quénehen ní i ini ñayĩví, chi sa suhva jeē cóndito ní i nuũ jexeén. ¹⁶ Nasũu cuenta ñayĩví cácuu i, nãjnũhun máá ná jēē násũu cuenta ñayĩví cúu ná.

¹⁷ Jíin jnúhun ndaã ní te sãha ní jēē coo ndoo coo iĩ i nuũ ní. Tãca jnúhun cáhãn maá ní cúu jnúhun ndaã. ¹⁸ Te nãjnũhun ni tají ní sãña ní quiji ná ini ñayĩví, suni súcuan tají ná i nacani i jnúhun ní núu ñayuu

ñayĩví. ¹⁹ Te jehē maá i cúu jeē jéhe ná máá ná cuu ná, návãha suni máá i coo ndoo coo iĩ i nuũ ni jēē jíin jnúhun ndaã.

²⁰ "Te nasũu máá ñn-ni jehē ñayuu yãha jíicãn tahú na, chi suni jehē táca gã ñayuu jeē candíje i sãña núu na cúni sõho i jnúhun jeē nãcani máá i jíinãhan i. ²¹ Te jíicãn tahú na jēē inuú na cóo ni i jíinãhan i. Nãjnũhun ñn-ni cúu ní jíin ná, Tãtã, te ñn-ni cúu ná jíin máá ní, suni súcuan na cóo inuú i jíin yó. Te cúni na jēē inuú na cóo ni i, návãha na cándíje ñayuu ñayĩví jēē maá ní ni tají ní sãña. ²² Ni sajhẽnu ná i nãjnũhun ni sajhẽnu ní sãña, návãha inuú na cóo ni i, nãjnũhun inuú-ni cúu yó. ²³ Te ndúú ná jíin i, te ndúú ní jíin ná, te súcuan te inuú cuiti coo ni i jíinãhan i. Yũcuãn na te cuni ñayuu ñayĩví jēē maá ní ní tají ní sãña, jíin jēē maní ndasí ní jíin i nãjnũhun maní ni jíin ná.

²⁴ "Tãtã, máá ní ni jéhe ní i nuũ ná. Te cúni na jēē cóyũcú i jíin ná nuũ cóndee ná, návãha coto i ndese luu cújéhnu ná ni sãha ní. Chi íyó maní ndasí ní jíin ná nde ná tu jecõo ñayĩví te nde vijna. ²⁵ Yaã ndaã cúu ní, Tãtã, te ñayuu ñayĩví tu jíin i níhín, te máá ná chi jíin na níhín. Te ñayuu yãha chi cájini i jeē maá ní ni tají sãña. ²⁶ Ni steén na núu i jíinãhan i ndese Yaã cúu ní. Te steén gã na súcuan nuũ i, návãha na cóo maní ndasí i jíin jnãhan i, nãjnũhun íyó maní ndasí ní jíin ná, te návãha condee ná

ini anuá i. Achí yá.

Jeē ní cajñi de Jesús

(Mt. 26.47-56; Mr. 14.43-50;
Lc. 22.47-53)

18

¹ Te nuū ní cuu ni cahān Jesús tāca jñuhun yáha, te ni quenda ya jíin tēe cáscuáha jíin yá, cuahān yā inga lado yuu Cedrón. Te yūcuan íyó ñin huerto nuū ní quívi ya jíin tēe cáscuáha jíin yá. ² Te Judas, tēe jeē nastúu de ya, suni jíní de lugar un, chí cuehē jínu ni nataca Jesús yūcuan jíin tēe cáscuáha jíin yá. ³ Te ni jinū de yūcuan jíin ñin grupo soldado jíin jecu policía cándito templo, jeē ní catajái sutū cácujeñnu jíin tēe grupo fariseo. Te cándiso de machete, te cájni de linterna jíin yiti. ⁴ Te Jesús je jíní yā tāca jñundóho jeē véji siquí yā. Te ni quenda ya ichi núú de, te ni cahān yā:

¿Ndé ñin cámanducú ró?

⁵ Te ni cacahān de jíin yá:

Jesús tēe ñuu Nazaret cámanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíin tēe ún. ⁶ Te jeē súcuan ni cahān yā, máá rí cúu, te ni cajica yatá de, te ni cacotúu-ñi de. ⁷ Yūcuán na te ni cajñuhún tucu ya de:

¿Ndé ñin cámanducú ró?

Te ni cacahān de:

Jesús tēe ñuu Nazaret.

⁸ Te ni cahān Jesús:

Je ni cachi rí jeē máá rí cúu. Te núu ruhū cámanducú ró, te máá-ñi rí jñi ró, te tēe yáha na quíngoo de. Achí yá.

⁹ Súcuan ni cuu návāha na squícu jñuhun jeē ní cahān yā jíin Tátá yā: Tu ní jéhe na jñuhun naa ni ñin tēe jeē ní jéhe ní núū na, áchí yá. ¹⁰ Te Simón Pedro ndíso de ñin espada. Te ni tava de, te ni jehnde de sōho lado váha ñin tēe nání Malco. Te tēe un cúu de mozo maá sutū cujeñnu.

¹¹ Te ni cahān Jesús jíin Pedro: Nachuvāha espada rō ini cubierta. ¿A tu cánuú jéē ndóho rí jñundóho yáha jeē ní sándaā Tatá rí jeē ndóho rí? Achí yá.

Jeē ní indichi Jesús nuū sutú cujeñnu

(Mt. 26.57-58; Mr. 14.53-54;
Lc. 22.54)

¹² Yūcuán na te tācá soldado un, jíin capitán de, jíin tāca policía tēe hebreo un, ni cajñi de Jesús, te ni cajihni de ya.

¹³ Te xīhna gā vehe Anás cuangoo de jíin yá. Te tátá chíso Caifás cúu Anás. Te Caifás cúu máá sutū cujeñnu ga cuiyā ún. ¹⁴ Te suu de ni cachi nuū jñahan de hebreo jeē cánuú jéē cúu ñin tēe jehē nación de.

Jeē ní cachi Pedro jeē tu jíní de ya

(Mt. 26.69-70; Mr. 14.66-68;
Lc. 22.55-57)

¹⁵ Te Simón Pedro jíin inga tēe scuáha, cándiquin de Jesús cuangoo de yatā yā. Te inga tēe scuáha ún chí jíní jñahan de jíin sutū cujeñnu. Jeē yūcuan ní quívi de jíin Jesús ini patio vehe sutū cujeñnu ún. ¹⁶ Te Pedro ni quendōo de yatā yehyí. Te máá tēe scuáha jéē jíní jñahan jíin sutū cujeñnu ún, ni quenda de

ni cahān de jíin ñahan ndíto yéhyí, te ni squívi de Pedro ini patio. ¹⁷ Yūcuán na te ñahan ndíto yéhyí un ní cajnūhún ña Pedro:

¿A násūú ñn tēe scuáha jíin tēe índichi nuū sutū un cúu ró? Te ni cahān de:

Nasūu cúu rí, achí de.

¹⁸ Te táca mozo jíin policía un ní cascáyú de ñuhūn jíin tícāyi, chí mījin sáha. Te cáhīn de cánasaā de. Te suni índichi Pedro, násaā de jíin táca tēe ún.

Jeē ni stíchí sutū cujéhnū ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sutū cujéhnū un ní stíchí de Jesús ndé-ni cúu tēe cáscuáha jíin yá, jíin na jnūhun cúu jeē steén yā. ²⁰ Te ni cahān Jesús:

Níní ní cahān rī nuū chítú ñáyuu, ní cajini sōho ndíhi ñayuu. Te níní ní steén rī jnūhun ini táca vehe īi sinagoga jíin ini templo cáhnu nuū ndutútú ndivii jnáhan yó hebreo. Te tú ni ñn jnūhun ní cáhán sáhi rí. ²¹ ¿Te naun cajnūhun ró ruhū? Cajnūhun ñáyuu ní cajini sōho jnūhun ni cahān rī, te máá i cachi ndese ni cahān rī. Chí cajini i ndese ni cahān rī.

²² Te jeē ni cáhán Jesús súcuan, te ñn policía ndíto templo jeē índichi de yūcuán, ní cani-ni de nuū yā. Te ni cahān de jíin yá:

¿A súcuan cáhán rō jíin sūtū cujéhnū naún?

²³ Te ni cahān Jesús:

Núu ni cahān rī ñn jnūhun néé, cachi na jnūhun néé ní

cahān rī. Te núu tu ní cáhán rī ñn jnūhun néé, ¿te naun cani ró ruhū? achí yá.

²⁴ Yūcuán na te Anás, sutū cujéhnū un, ní tají de ya, núhni yā cuahān yā nuū Caifás, tēe cúu máá sūtū cujéhnū ga.

Jeē ní cachi tucu Pedro jeē tu jíin de ya

(Mt. 26.71-75; Mr. 14.69-72; Lc. 22.58-62)

²⁵ Te níní jeē súcuan cúu, te índichi-ni Pedro, násaā de yuñūhún. Te ni cacahān jíin de:

¿A násūú ñn tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu rí, achí de.

²⁶ Yūcuán na te ñn mozo sutū cujéhnū, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito rí jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní índichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quenda-coo de jíin Jesús vehe Caifás, cuangoo de jíin yá nde palacio tēe nación Roma jeē cúu gobernador. Te je cuacundi-jin. Te ñayuu hebreo tu ní quívi-coo i ini palacio, návāha tu stívi i ley i jeē cáhán jeē ma quívi i ini vehe ñn ñayuu jeē násūú hebreo cúu. Chí núu súcuan te ma cúu cuxíni i vico pascua jeē cóo inga quívi ún. ²⁹ Yūcuán na te ni quenda Pilato, tēe cúu gobernador, ni cahān de jíin i jíin náhan i:

¿Na cuēchi cájicān rō siquī tée yáha?

³⁰ Te ni cacahān i:

Núu jeē násūu tée cúnée cúu tēe yáha, te ma jnái ná de jeē quíndeca ná de nuū ni núu, áhí i.

³¹ Te ni cahān Pilato:

Cuāngoo jíjnáhan rō, te sándaā rō siquī de jíin ley cánevāha máá rō.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jéē cáhni ná ni ñin ñayuu.

³² Súcuau ni cacahān i návāha squícu jnūhun jeē ní cachí Jesús jeē quívi ya ndaha tēe Roma te cahni de ya jicā cruz. ³³ Te ni ndívi Pilato ini palacio, te ni cana de jeē na quíji Jesús. Te ni cajnūhún de ya:

¿A máá rō cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun rō ruhū jeē súcuau jéni ni máá rō, chí jéē ní cacastūhun ñayuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación máá rō jíin sūtū cácujuhnu ni cachíhi róhó ndaha rī. ¿Na vé ni sáha rō núu súcuau? Achí de.

³⁶ Te ni cahān Jesús:

Nasūu jéē ndácu ri jniñu nájñūhun cándacu tāca rey ñayívi yáha. Chi núu jeē ñayuu ñayívi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu

ñayívi yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñin rey cúu rō jéē súcuau?

Te ni cahān Jesús:

Rey cúu ri, nájñūhun cáhán rō. Ni quíji ri ni cacu ri ini ñayívi yáha návāha nacani ri jnūhun ndaā. Te ndíhi ñayuu cájetáhu jnūhun ndaā, cájini nahín i jnūhun cáhán rī. Achí yá.

³⁸ Te ni cahān Pilato:

¿Ndese cuni yō ndé ñin cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhán de jnūhun yáha, te ni quenda tucu de nuū ñayuu hebreo. Te ni cahān de jíin i:

Tú cuíti na cuēchi níhín rī siquī de. ³⁹ Te íyó costumbre máá rō jíjnáhan rō jéē vico pascua te siaá rī ñin tēe íne vecāa nuū rō. ¿Te á tu cácuu rō jeē siaá rī Rey rō nuū rō? Achí de.

⁴⁰ Yūcuán na te ndívi i ni cacana jee tucu i:

Ma siaá ni tēe jíñá, chí Barrabás siaá ni, áhí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jnái soldado Jesús, te caní de ya jíin cuarta ñi.

² Te ni casáha de ñin corona íñu, ni cachuhun de xiní yā. Te ni cachuhun de ya ñin sahma cuehé ndíhí jéē cúu sahma rey. ³ Te ni jecondichi

de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ñūhun ya corona iñu jíin sahma cuehé ndíhí un. Te ni cahān Pilato jíin i:

Yāhá condēhe ró de jíjnáhan ró.

⁶ Te nuū ní cajito sutū cácujuhnu jíin táca policia nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuán te najni máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná iin ley, te jeē siquī ley un cánuú jēé cúu de, chí sáha de máá de jeē Séhe Yāá Dios cúu de.

⁸ Te jeē ní jini sōho Pilato jñūhun yáha, te víhyá gā ni yūhú de. ⁹ Te ni ndīvicoo tucu de ini palacio, te ni cajñūhún de Jesús:

¿Ndé nuū véji ró?

Te tu ní cáhán cuiti Jesús jíin de. ¹⁰ Yūcuán na te ni cahān de jíin yá:

¿Naun tu cáhán rō jeē cahán rī? ¿A tu jíin rō jeē ndiso jniñu ri jeē cáhni rī rohó jíicā cruz, te suni ndiso jniñu ri jeē siaá rī rohó quíhín rō?

¹¹ Te ni cahān Jesús:

Núu tu ní sáha Yāá Dios jeē ndiso jniñu ró, te tú na vé cúu sáha ró siquī rī. Jeē yúcuán tēe jeē ní nacuāha ruhū ndaha ró, cuēchi xeēn gā condee siquī de vēsú maá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chi cácana jee i:

Núu siaá ni tée jíinā, te tu cúu ní amigo rey Roma jeē cujéhnu ndácu jniñu núu súcuán. Chi táca tée jeē sáha de rey maá de, núu súcuán te cúu de enemigo siquī rey un. Achí i.

¹³ Te jeē ní jini sōho Pilato jñūhun yáha, te ni ndacu de jniñu jeē na quenda Jesús ini vehe quiji ya. Te ni cucōo de silla nuū cúndaā jniñu, nuū máni máá yūu ni jecāva, te lugar un nání Gabata nuū yúhu hebreo. ¹⁴ Te cuacuu cahuxī uū, te jehíni quiví ún quejéé vico pascua. Te ni cahān Pilato jíin ñáyuu hebreo:

Yāha índichi maá rey rō.

¹⁵ Te ni cacana jee i:

Na cúu de. Cata caa ní de jicā cruz, achí i.

Te ni cahān Pilato jíin i:

¿A jēé cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíjnáhan ná, chí máá-ni rey Roma jeē cujéhnu ndácu jniñu nuū ná.

¹⁶ Yūcuán na te Pilato ni nacuāha de ya nuū i jeē na cúu yā jíicā cruz. Te ni cajni i ya cuango i jíin yá.

Jeē ní cacata caa de ya jicā cruz
(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yā, cuango de jíin yá iin lugar nuū naní Yiqui Xíní, te nuū yúhu hebreo naní Gólgota. ¹⁸ Te yūcuan ní cacata caa de ya jicā cruz. Te suni ni cacata caa de uū tēe nuū uū gā cruz, iin iin de iin lado yā, te máá Jesús mēhñú. ¹⁹ Te suni ni ndacu Pilato jniñu jeē na cóndee jnūhun xinī cruz yā, jeē cahán: Tēe yáha cúu Jesús ñuu Nazaret, Rey ñayuu hebreo, achí. ²⁰ Te cuehē ñayuu hebreo ni cacahu i jnūhun yáha, chi máá yajni yuñúu cúu nuū ní cacata caa de ya. Te jnūhun un yósó jíin yuhu hebreo jíin griego jíin latín. ²¹ Te tāca sūtū cácujeñnu nuū ñáyuu hebreo, ni cacahán de jíin Pilato:

Ma tēe ní jēe cúu de Rey ñayuu hebreo, chi sa suhva tee ní jēe maá de ni cahán jeē cúu de Rey ñayuu hebreo.

²² Te ni cahán Pilato:

Ma násama ri jeē jé ni ndacu ri jniñu ni jecondee.

²³ Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuñ parte, te iin iin parte ni cuu iin iin soldado un. Te suni ni caquihin de camisa yā. Te camisa un tu ní quícu, chi ni cunu hí. ²⁴ Te ni cacahán maá de:

Ma cáhnde yō, chi vāha ga na sāha yó sorteo, te na cóndēhe yó ndé iin yó níhñ, achí de.

Te súcuan ni squícu jnūhun yósó núu tútu iī nde jenahán jeē cahán Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

²⁵ Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. ²⁶ Te ni jito Jesús nuū naná yā jíin núu tēe scuáha jeē maní gā yā jíin, suni índichi de yūcuán. Te ni cahán yā jíin náná yā:

Nánā, nde vijna te máá de nucuñí de cuu de sēhe ní.

²⁷ Yūcuán na te ni cahán yā jíin tēe scuáha ún:

Nde vijna te cuu ña nájnūhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jihí Jesús

(Mt. 27.45-56; Mr. 15.33-41; Lc. 23.44-49)

²⁸ Yūcuán na te ni jini Jesús jeē jé ni jinu tācá jniñu jeē cánuú ndoho ya. Te návāha squícu jnūhun cáhán tutu iī, te ni cahán yā:

Jíchí rī ndute, áchí yá.

²⁹ Te yūcuan íin iin tindohō ñúhun chitú vinagre iyá. Te ni cachundaji de iin cachí nuū vinagre un, te ni catee de xiní iin ndaha yújnu hisopo, te ni catee de yuhu ya jeē cóho ya.

³⁰ Te ná ni jihí ya vinagre un, te ni cahán yā:

Je ni jinu, áchí yá.

Te ni cāyí-ni xiní yā, te ni jihí-ni ya.

Jeē ní cují soldado lanza xiin ya

³¹ Te inga quivī ún coo vico pascua. Te tēe hebreo tu cácu de jeē cóndita caa ndīyī ún jíca cruz quivī ndétátú un. Chi quivī ndétátú jeē cúu vico pascua, iī ndasí gá vésú táca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhin tēe cándita caa, te na cújiyo de jíca cruz. ³² Te ni quecoo soldado, te ni cajehnū de sīhin iin tēe jeē ndíta caa jíin yá, te suni súcuan inga de. ³³ Te nuū ní quecoo de nuū Jesús, te ni cajito de jeē jé ni jihī yā. Jeē yúcuan tu ní cájehnū de sīhin ya.

³⁴ Te iin soldado chi ni cují de lanza xiin ya, te ni cane-ni niñī jíin ndute. ³⁵ Te máa rí jeē tēe tutu yáha, ni jito ri jeē súcuan ni cuu, te nácani ndaā rī jnūhun ndese ni cuu. Te jíin rī jeē iyó ndaā jnūhun cáhán rī, návāha suni cándije máa ró jíin náhan ró. ³⁶ Chi súcuan ni cuu návāha squícu jnūhun cáhán tutu iī: Ma cahnú de ni iin yiqui ya, achí. ³⁷ Te suni inga jnūhun cáhán tutu iī: iin quivī te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸ Te ni cuu táca jēe yáha. Te iyó iin tēe ñuu Arimatea jeē naní José, te cúu de tēe cándije Jesús. Te yuhu-ni cándije de, chi yúhú de jnáhan de hebreo. Te ni cahān ndahú de jíin Pilato jeē na cuáha jnūhun quihīn de yiqui cúñu Jesús. Te ni jēhe Pilato jnūhun. Yūcuán

na te cuahān José, ni snúu de yiqui cúñu Jesús. ³⁹ Te suni ni jinū Nicodemo, tēe ni quiji nuū Jesús iin jecuāa. Te ndíso de nájnūhun ocō uxī kilo sūje uvuā jeē ní saca jnáhan jíin yúcū áloe. ⁴⁰ Te ndindúú de ni caquihin de yiqui cúñu Jesús, te ni cachusúcūn de jíin tira sahma jeē ni quivī yucū jeē jeén asīn ún, nájnūhun iyó costumbre maá ñáyuu hebreo jeē cáchindūji i ndīyī. ⁴¹ Te yajni nuū ni jíhī Jesús iyó iin huerto. Te nuū huerto un ndéé iin yaū jeē ní caan jeé jíca iin cava, nuū ná tu quindūji ndīyī. ⁴² Te yūcuán ní cachindūji de Jesús, chí íne yajni yaū ndīyī ún. Chi je yajni quejéé quivī ndétátú de jeē cácu de ñayuu hebreo, te tú na ley chindūji de ndīyī núu je ni quejéé quivī ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

¹ Te jenéhen quivī domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cuyiyo yuū ndihyú yuyáú ndīyī. ² Yūcuán na te jínu ña cuahān ña nuū Simón Pedro jíin núu inga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin inga tēe scuáha ún, cuácondéhé de yaū ndīyī. ⁴ Te

cájinu tayí ndindúú de. Te inga tēe scuáha ún, nīhin ga ni jinu de vēsú Pedro. Te xīhna gā de ni jinū yaū ndīyi. ⁵ Te ni scáyí de máá de, te ni jito nihni de ini yaū. Te ni jito de jeē tira sahma un cáyūcu máá na. Te tu ní quívi de. ⁶ Te sáá te ni jinū Simón Pedro jeē ndiquín jnáhan de vēji de jíin inga tēe ún. Te ni quívi de nuū ní yindūji Jesús. Te suni ni jito de jeē tira sahma cáyūcu máá na. ⁷ Te ni jito de sahma jeē ni ñúsúcún xínī Jesús, tu cátú jíin tira sahma, chi ni natuu te cátú sín. ⁸ Yūcuán na te suni ni quívi inga tēe scuáha jeē ni jinū xīhna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹ Chi nde ná tu jinūcoo de yaū ndīyi, te tu ní jécūhun ni de jnūhun cáhán tutu iī, jeē jíni ñúhún natecu yā núu je ni jihī yā. ¹⁰ Yūcuán na te ndindúú tēe cáscuáha ún cuanungoo de vehe de.

*Jeē ní nane ya nuū María
ñuu Magdala
(Mr. 16.9-11)*

¹¹ Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito nihni ña ini yaū ún. ¹² Te ni jito ña uū ndajéhé andiví, cáñuhun ya sahma cuijín. Te ñn ya néne ichi xíní, te inga ya néne ichi núu jehé nuū ni cātu yiqui cúñu Jesús. ¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíni na ndé nuū ní cachune de ya.

¹⁴ Te jeē ni cáhān ña sūcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nácuni ña jeē máá yá cúu. ¹⁵ Te ni cahān yā jíin ña:

¿Najehē ndahyú rō? ¿Ndé ñn nánducú ró? achí yá.

Te máá ña jéni ni ña jeē tēe ndíto huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

¹⁶ Te ni cahān Jesús jíin ña:

María, achí yá.

Te jeē ni cáhān yā sūcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jnūhun un cúni cahān, Maestro.

¹⁷ Te ni cahān Jesús jíin ña:

Ma quehé ró rúhū, chi ná tu ndaa rī quinhun rī nuū Tatá rī. Te cuáhán núu tēcá hermano rī, tēe ni cascuáha jíin rí, te cachi rō nuū de jeē ndaa rī quinhun rī nuū Tatá rī, jeē suni Tátá máá ró jijnáhan ró cúu. Te cúu ya Yaā Dios máá rí jíin Yaā Dios máá ró jijnáhan ró. Achí yá.

¹⁸ Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jēe ní jito ña nuū máá Jitoho yō jíin jēe ni cáhān yā jnūhun yáha jíin ña.

Jeē ní nane ya nuū téē cáscuáha jíin yá

(Mt. 28.16-20; Mr. 16.14-18; Lc. 24.36-49)

¹⁹ Te jeē ní cuaa máá quívī domingo un, te cáhīin tūtú téē cáscuáha ún ini ñn vehe. Te cándihyū yehyí, chí cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jíin xiin ya nuū de. Te ni cacusñ ni tēē cáscuáha un jēē ní cajito de nuū maá Jítoho yō. ²¹ Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájnūhun ni tají Tátá rī ruhū ini ñayívī, suni súcuan tájí rí rohó nacani ró jnūhun ri nuū ñáyuu. Achí yá.

²² Yūcuán na te ni tivī tachī yā nuū de jíjnáhan de. Te ni cahān yā:

Vijna te ni canihīn rō Espíritu Santo. ²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēē ni cacu cuatí, ñn jnáhan jeē uxí uū tēē cáscuáha jíin yá, tu ní íne de quívī jeē ní nane Jesús nuū tāca gá tēē cáscuáha. ²⁵ Yūcuán na te sava ga tēē cáscuáha un, ní cacahān de jíin Tomás:

Ni cajito ri nuū maá Jítoho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶ Te nuū uná quívī, te tēē cáscuáha un cáhīin tūtú tucu de ini ñn vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñ coo ni rō jijnáhan ró.

²⁷ Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chí sa suhva na cándíje ró.

²⁸ Yūcuán na te ni cahān Tomás jíin yá:

Aí, Jítoho maá ná jíin Yaā Dios maá ná cúu ní, áchí de.

²⁹ Te ni cahān Jesús jíin de:

Tomás, nde ni jito ró núu rī, te ni candíje ró. Te yōhoyo ndetū tāca ñáyuu jeē candíje ruhū vēsú tu ní jító i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhnu jeē ni steén yā poder yā nuū téē cáscuáha jíin yá, jeē tu yósó núu tútu yáha. ³¹ Te tācá jniñu yáha ní tee ri návaha candíje ró jijnáhan ró jēē Jesús cúu Cristo, maá Séhe Yaā Dios. Chi

jeē candíje ró yá, te cotecu rō ní cáni sáha ya.

Jeē ní nane ya nuū uxá tēe cáscuáha jíin yá

21

¹ Te ni cuu jecu quivī, te inga jínu ni nane Jesús nuū tēe cáscuáha jíin yá, jeē cáhīin de yumar Tiberias. Te suhva ni steén yā maá yá nuū de: ² Cáhīin tūtú Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañū Galilea, jíin ndindúú séhe Zebedeo, jíin úu gā tēe cáscuáha. ³ Te ni cahān Simón Pedro jíin de jíināhan de:

Quíjnī ri chācá.

Te ni cacahān de:

Suni quingoo ri jíin ró.

Te cuangoo de, te ni quívicoo de ñin barco. Te tu ní cánihīn cuiti de ti jecuáa yúcuan. ⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. ⁵ Yūcuán na te ni cahān yā jíin de:

Aá rō jíināhan ró, ¿á ní canihīn rō chācá caji yō?

Te ni cacahān de:

Tú cuiti, achí de.

⁶ Yūcuán na te ni cahān yā jíin de:

Síngava ñunu ró ichi lado váha barco, te nihīn rō tī.

Te ni casíngava de ñunu, te tuá ní cúu cuiti natava de, jeē ni quívicoo cuehē ndasí cháca. ⁷ Yūcuán na te tēe scuáha jeē maní gā Jesús jíin, ní cahān de jíin Pedro:

Máá Jítoho yō cúu, achí de.

Te jeē ní jini sōho Simón Pedro jeē maá Jítoho yō cúu,

te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸ Te tāca gā tēe cáscuáha ún, vendicoo de jíin barco yundúte, cástaa de ñunu ñuhun chitú cháca. Chi tu jíicá cáhīin de jíin ñuhun íchi, chí nájñuhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhūn, te íne staa jíin ñin chācá chíhyó. ¹⁰ Te ni cahān Jesús jíin de:

Cuáquihin jecu chācá jēe sa ní cajñī ró, na táu yó, achí yá.

¹¹ Te ni quívī Simón Pedro ini barco, te ni staa de ñunu, ni quee de jíin ndé nuū ñuhun íchi. Te ñuhun chitú cháca náhnu, ñin ciento uū xico uxī unī tī cúu. Te vēsú ñin súcuan ti ñuhun, te tu ní táhndé ñunu. ¹² Te ni cahān Jesús jíin de:

Nehen jíināhan ró na cási ni yō.

Te ni ñin tēe cáscuáha ún tu ní cūndeyí ni de cajñuhún de ya núu ndé ñin cúu ya. Chi je cājini de jeē maá Jítoho yō cúu ya. ¹³ Te ni quindēhe Jesús yuñuhún, te ni quihin ya staa ún, te ni jēhe ya nuū de, te suni súcuan chācá un.

¹⁴ Yāha cúu vuelta unī jeē ní nane Jesús nuū tēe cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajñuhun yá Simón Pedro:

Simón séhe Jonás, ¿á maní gā rō jíin rí vēsú tāca gā tēe yáha?

Te ni cahān de:

Je jíni ní jeē maní na jíin ní, achí de.

Te ní cahān yā jíin de:

Núu súcuan te stéén rō jnūhun ri nuū ñáyuu cácuu nájnūhun londe ri.

¹⁶ Te ní cajnūhun yá de vuelta uū:

Simón sēhe Jonás, ¿á manī rō jíin rí?

Te ní cahān de jíin yá:

Je jíni ní jeē maní na jíin ní, achí de.

Te ní cahān yā:

Condito rō ñáyuu cácuu nájnūhun lanchi ri núu súcuan.

¹⁷ Te ní cajnūhún tucu ya de vuelta unī:

Simón sēhe Jonás, ¿á manī rō jíin rí?

Te ní cucuíhyá ní Pedro jeē ní cajnūhun yá de vuelta unī núu manī de jíin yá. Te ní cahān de:

Máá ní jíni ní ndíhi, te jíni ní jeē maní na jíin ní.

Te ní cahān yā:

Núu súcuan te stéén rō jnūhun ri nuū ñáyuu cácuu nájnūhun lanchi ri. ¹⁸ Te

jendaá cahán rī jíin ró jeē nde ná suchí ró, te ní quihin máá ró sahma ró, te ní jica ró ndé nuū cuní maá ró. Te núu na yí ró, te nasūu jeē cuní maá ró, chi inga ñáyuu quindēca i róhó nuū tu cuní rō quihīn rō. Te scáá rō ndīndúú ndaha ró jeē cuu rō.

¹⁹ Jnūhun yáha ní cahān yā jeē ní stéén yā jeē cóndita caa de jicā cruz cuu de, te jeē súcuan cuatáhú de cúu jeē steén de jeē yóhoyo cújéhnú Yaa Dios. Yūcuán na te ní cahān gā yā:

Condiquīn rō ruhū jeē sáha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jíin

²⁰ Te ní ndió cóto Pedro, te ní jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ní cacuxíni de jíin yá, te ní cajnūhún de ya: ¿Ndé ĩn de cúu jeē nastúu níhín? ²¹ Te jeē ní jito Pedro nuū tēe ún, te ní cajnūhún de Jesús:

Te tēe yáha, ¿ndese coo jíin de?

²² Te ní cahān Jesús:

Núu cuní rī jeē cótecu de nde quivī ndíji ri, ¿te naun ndíhví ní rō? Máá ró chi condiquīn rō ruhū jeē sáha ró jniñu ní ndacu ri nuū rō, achí yá.

²³ Yūcuán na te jnūhun yáha ní jitē núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chi sa suhva ní cahān yā: Núu cuní rī jeē cótecu de nde quivī ndíji ri, ¿te naun ndíhví ní rō?

²⁴ Te tēe scuáha un jeē maní gā Jesús jíin, suu cúu ruhū jeē nácani jnūhun tācá jniñu yáha, te suu ri tēe tāca jnūhun yáha. Te cájini rō jijnáhan ró jeē iyó ndáā jnūhun nácani ri.

²⁵ Te suni íyó cuéhē ndasí gā jniñu ní sáha Jesús. Te núu tee yó ná ĩn ná ĩn, te ma cánda ní ñáyíví cuhun tutu jeē cóso jnūhun ún, jéni ní rī. Te ní cuu. Amén.

JNIÑU JEHNU JEE NI CASAHA TEE APOSTOL

*Jeē ni jéjnūhun ya quiji
Espíritu Santo*

¹ Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ² te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū tée un jíjnáhan de, te súcuan ni cajini de jeē iyó ndáa jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴ Te ná cáhīn tútú de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun máá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. ⁵ Chí Juan, jendaá jeē maá ndute-ni ni scuándute de ñayuu. Te rōhó jíjnáhan ró, jecu na quivī te nájnūhun cuandute ró jíin Espíritu Santo, cúu jeē condee yā ini anuá rō, achí yá.

*Jeē ní ndaa Jesús cuanuhun
yā andiví*

⁶ Yūcuán na te tēe cáhīn tútú jíin yá, ni cacajnūhún de ya:

¿A vijna te nasáha ní jéē ñáyuu ñuu yō Israel ndujéhu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quivī chí cuiyā jeē cóo jeē ni sándaā maá Tátá rī, chí máá ĩn-ni máá yá jiní yā na quivī sáha ya. ⁸ Te jeē cúni rō cúu jeē quée Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹ Te ni ndihī ni cahān yā táca jnúhun yáha. Te níni cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰ Te níni cáhīn de cájito ndaa de ichi ándiví núū ní ndaa ya cuahān yā, te uū jnáhan ndajéhé yā cañūhun ya sahma cuijín ní cajecuiñī yā xiin de jíjnáhan de, te cájito ya nájnūhun tēe. ¹¹ Te ni cacahān yā jíin de:

Róhó tée Galilea, ¿najehē cájito ndaa ró ichi ándiví? Chí máá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuahān yā andiví, áchí yá.

*Jeē ní canacāji de Matías jeē
nucuiñī de nuū Judas*

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén.

Te yajni-ni íne yucu un jíin ñuu Jerusalén, nájnūhun ñn kilómetro-ni, cūhva jeē ni jéhe ley permiso caca ñayuu quivī ndétātú. ¹³ Te ni ndivicoo de ini ñuu. Te ni ndacoo de cuarto xinī véhe nuū cáyūcu núu de. Te tācá de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnāhan grupo cananista, jíin Judas ñani Jacobo. ¹⁴ Tāca tēe yáha, níní cándutútú inuú de cájicān tahu de jíin tāca ñani Jesús jíin náná yā María jíin sava ga ñahan.

¹⁵ Te ñn quivī te ni jecondichi Pedro nuū tācá hermano cácadíje. Te cáhñn nájnūhun ciento ocō ñayuu. Te ni cahān de:

¹⁶ Hermano jijnāhan ní, ni squícu nahín jnúhun cáhán tutu ñi jeē ni cáhān David nde jenahán ní sáha Espíritu Santo. Te jnūhun un ní cuu síquī Judas jeē ní yosnúu núu tēe ni cajñi Jitoho yō Jesús. ¹⁷ Te suu tēe un ní jica de jíin yó, te ni chindéé ñahán jnāhan de jíin yó síquī jniñu ní jeni ya yohó. ¹⁸ Te ni cajeen ñn ñuhun jíin xúhun ní nihñn tēe un síquī jniñu neé ní sáha de. Te ni ñinga ndeyi de, te ni ndatā sáva chíji de, te ndihi yiti de ni jitē. ¹⁹ Te ni jitē jnūhun yáha núu tāca ñayuu cáyūcú ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi. ²⁰ Chí súcuan je yósó núu tútu Salmo síquī Judas:

Vehe de na quéndōo iyú,
te ma cóndee ni ñn ga ñayuu
ini vehe ún.

Te suni cáhán:
Jniñu ní condiso de na cóndiso
inga tēe.

Achí.

²¹ Núu súcuan te jíni ñúhún jeē núcuñi ñn tēe lugar maá de jíin yó. Te tēe nucuñi jíin yó un, nacāji yó de mēhñu tāca tēe ni cajica jíin yó tāca quivī jeē ní jica máá Jitoho yō Jesús jíin yó. ²² Te tēe nacāji yó un cúu tēe jeē ni íyo de jíin yó nde quivī ní jendute ya ni sáha Juan, te nde quivī ní ndaa ya cuanuhun yā andiví. Te tēe nucuñi jíin yó na cúu de testigo jíin yó jeē jé ni natecu yā, achí de.

²³ Te ni catee nuū de uū jnāhan tēe: Matías jíin José jeē naní de Barsabás te suni nání de Justo. ²⁴ Te ni cajicān tahu de:

Tātā Yaā Dios, máá ní chi jíni ní ndese cáa ánuá tāca ñayuu. Núu súcuan te jeē ndindúú tēe yáha, stéén ni ndé ñn de cúu jeē ní nacāji ní. ²⁵ Te condiso jniñu de cuu de apóstol. Te naquihin de jniñu ní stóo Judas, chí ni sáha de cuēchi te cuahān de lugar xeēn nuū cánuú quihñ de, achí de.

²⁶ Yūcuán na te ni casáha de ñn sorteo te ni jinū Matías, te ni nucuñi de ni nduu de jnāhan ndihúxí ñn apóstol.

Jeē ní quee Espíritu Santo

2

1 Te máá quivī víco Pentecostés ni cahñn tútú ñayuu cácadíje ñuu Jerusalén. ² Te

sanaa-ni te ni quejéé n̄hin vēji nde andiví nájñuhun tachī n̄hin quée, te tāca ñáyuu jeē cáyūcú ini vehe un ní cajini sōho i jeē n̄hin ún. ³ Te ni cajito i nájñuhun yáñuhūn jeē ní cajitē núu te ni cacucōo xinī ná ñn ná ñn i. ⁴ Te ndihī i, ni cunuú Espiritu Santo jín i, te ni quejéé i cácahān i s̄ñ s̄ñ yuhu, ndese ni steén maá Espiritu nuū ná ñn ná ñn i cahān i.

⁵ Te ñuu Jerusalén, suni cáhīn ñayuu hebreo, yíñuhún núu Yaā Dios, jeē ní quiijicoo i nde tācá nación ní cáhnu ñayiví. ⁶ Te jeē ni n̄hin súcuan te ni cacutútú cuéhē ñayuu ún. Te ni cunéé í ni i jínáhan i, chí ná ñn ná ñn i ní cajini sōho i jeē téé ni canihīn Espiritu Santo cácahān de jñuhun yuhu ñū jicá nuū véji i. ⁷ Te ni canaa ni i cajito i te ni cacahān i:

¿A násūu téé Galilea cácuu tāca téé yáha jéé cácahān de tācá yuhu ñū nuū véjicoo yó? ⁸ ¿Na vé ni cuu yáha núu súcuan? Chí ná ñn ná ñn yó cajini sōho yó cácahān de jñuhun yuhu ñū nuū ní cacacu yó. ⁹ Chi vējicoo yó ndé tācá ñuu jicá. Sava yó véji nde Partia jín Media jín Elam. Te sava ga yō vēji yó ndé Mesopotamia jín Judea jín Capadocia jín Ponto jín Asia. ¹⁰ Suni nde Frigia jín Panfilia jín Egipto jín t̄jni ñuu jeē íne nde yatā gā ñuu Cirene ñuhun Africa vējicoo yó. Te sava ga yō nde ñuu Roma vējicoo yó, te cáyūcu jñu-ni yó yáha. Te máá yó

jeē véjicoo ñuu Roma, sava yó cácuu máá ñáyuu hebreo te sava ga yō cácuu ñayuu s̄ñ ñuu, ni cacandije yó ndíquín yō ley ñayuu hebreo. ¹¹ Suni nde Creta jín Arabia vējicoo sava yó. Te cajini sōho yó jéé jín jñuhun yuhu ñū ná ñn ná ñn máá yó cácahān de tācá jñiñu jéñnu ní sáha Yaā Dios, achí i.

¹² Te ndihī i chí ni canaa í ni i cajini nahín i. Te ni candajnūhún i jín jñáhan i:

¿Na vé cúu jeē ní cuu núu súcuan jeē cácahān de yuhu ñū yō? achí i.

¹³ Te sava i ni cacahān catá i:
Tuú chí jeē cánajñi de, achí i.

Jeē ní nacani Pedro jñuhun nuū ñáyuu

¹⁴ Yūcuán na te ni candocuñi Pedro jín ndihúxi ñn ga apóstol, te ni cahān jee Pedro jín ñáyuu ún:

Níhín jñáhan ñuu yō hebreo, jín ndihī níhín jéé cáyūcu ní Jerusalén, jñuhun yáha na chūhun ni ní jínáhan ní, chí cuni nahín ní cahān na jín ní. ¹⁵ Chí máá ná jijnáhan ná, nasūu jéé cajini ná nájñuhun cájeni ní ní, chí sáá cahān jenéhen cúu, te nasūu hora cánajñi ñayuu cúu. ¹⁶ Chí sa suhva squícu jñiñu yáha nájñuhun ni cahān Joel, téé ni nacani jñuhun Yaā Dios nde jenahán, chí súcuan ni cahān de:

¹⁷ Achí Yáa Dios: Quiví sándihí na
te tají rí Espiritu rí cunuú yá jín táca ñáyuu,

te sēhe yí ró jíin séhe síhí ró,
nacani i jnūhun ri,
te tāca tée lulí chi coto ndijin
de jeē steén rī nuū de,
te tāca tée jéhnū chi sáha ri jeē
scóto jēni de.

18 Te quiví ún chi tají rí
Espíritu rī cunuú yá jíin
tāca mozo rī, cúu tēe
cúu ñahan,

te nacani i jnūhun ri.

19 Te ichi ándiví sáha ri jniñu
jéhnū jeē náā ni ñayuu
coto i,

te sáha ri jniñu jéhnū ini ñayiví
jēe steén jeē kujéhnū ri,
chi coo niñí jíin ñúhūn jíin
ñúhmā nájñūhun vicō.

Yūcuan cúu jeē sáha ri jeē cóo
jnūndóho xeēn.

20 Te nduu jnúú níandii te ma
cúndijin gā,

te yoō coto cuéhé nájñūhun
niñí.

Yūcuán na te quee quiví jeē
ndíji máá Jítóho rō
Jesús.

Quiví ún coo cuehē jniñu
jéhnū, te cuni ndihi
ñayuu jeē quiví máá
Jítóho rō cúu.

21 Te tāca ñáyuu jeē cahān
ndahú i jíin yá te jnama
ya i, áchí Yáā Dios.

Achí Joel ni nacani de jnūhun
ya.

22 Jeē yūcuan níhín tée ñuu
yō Israel, cuni nahín gá ni
jnūhun yáha jíjnáhan ní. Ni
steén Yaā Dios jeē ní tají yá
maá Jesús, Yaā ní jehnu ñuu
Nazaret, chi máá Yáā Dios ni
jēhe ya jeē ni sáha Jesús jniñu
jéhnū mēhñu máá ní, jíin jniñu
jeē steén jeē kujéhnū ya, te

jniñu un ní canaa ni ni ní ca-
jito ní. Te je cájini vāha ní jēe
súcuan ni cuu. 23 Te máá ní
ni cajniñí ní yá, te ni cajendēca
ní yá nuū tēe xeēn ni cajehni
de ya jicā cruz ni casáha ní.
Te nde jíin tiempo je ni jini
Yaā Dios jeē súcuan sáha ní
jíjnáhan ní, chi súcuan je ni
sándaā yā. 24 Te ni nastēcu
Yaā Dios Jesús te tuá ni cúu ya
ndīyi, chi jnūhun xeēn jeē jihí
ñayuu, tuá na vé cúu ga sáha
jíin yá. 25 Chi nde jenahán
suhva ni tee David jnūhun
ndese ni cahān Jesús jíin Yáā
Dios:

Jíní na núū maá ní jeē cúu
ní Jítóho ná, chi ní cáni
ndéé ní jíin ná,

chi ndéé ní ichi ndáváha ná,
cúu jeē chindéé ñáhán
ní sāñā náváha coo
ndeyí ni ná.

26 Jeē yūcuan cúsiñ ni ná te
cáhán na jnúhun siñ ni.

Jeē yūcuan ma nácani uhū ni
na síquī jnúhun cuu ná.

27 Chi ma cuáha ni jnúhun
quendōo ánuá na lugar
nuū cáyūcu ánuá ndīyi,
ni ma cuáha ni jnúhun tehyū
ná, chi jéjniñu ná núū
ní te maní ni jíin ná.

28 Te ni steén ni núū na jēe
nátecu ná,

te sáha ní jēe cusíñ teyí ni ná
condee na jíin ní ní
cáni.

Achí Jesús, ni achi David.

29 Tāca níhín jíjnáhan ní,
na cástūhun cájí ná nuū ni
jnūhun jí yō David, chi tu ní
cáhán de jnūhun yáha síquī
maá de. Chi ni jihí de te
ni quindūji de, te jíní yō nuū

yíndūji de nde vijna. ³⁰ Chi ni cuu de tēe ni nacani jñūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey. ³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyi, ni yiqui cúñu yā ma tehyú. ³² Chi Yaā Dios ni nastécu yā Jesús, te máá ná cácuu ná testigo jeē ní natecu yā. ³³ Te ni ndujéñnu tucu ya ni sáha Yaā Dios jíin poder yā. Te nde nuū maá Yáā Dios, Yaā cúu Tátá yā, ni nihīn Jesús Espíritu Santo, chi súcuu ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴ Te David, nasūu síquī maá de ní cáhán de tāca jñūhun yáha, chí tu ní ndáa yiqui cúñu de andiví. Chí síquī Cristo cúu jeē ni cáhān de suhva:

Máá Yáā Dios ni cahān yā jíin
Jítoho rī Cristo:

Cucōo ró ichi ndáváha ri jeē
steén jeē cujéñnu ró.

³⁵ Te na sáha ri jeē quende
rō poder tāca jéē cájito
uhū rohó, áchí yá.

Achí David.

³⁶ Núu súcuu te ndihí ní jéē
cácuu yó ñayuu Israel, na cúni
vāha ní jéē vēsú ni cajehni ni
yá jicā cruz, te Yaā Dios ni jeni
ya maá Jesús jeē cúu ya Jítoho
yō te suni cúu ya Cristo, Yaā
jñáma yóhó, áchí Pedro jíin i.

³⁷ Te jeē súcuu ni cajini
sōho i jñūhun yáha, te ni caj-
nahuhū ni anuá i. Te ni ca-
cajnūhún i Pedro jíin tāca gá
apóstol:

¿Te ndese sáha ná jíin áhan
ná núu súcuu? áchí i.

³⁸ Te ni cahān Pedro jíin i:

Nacani ni ni jéē stóo ni
cuéchi ní jíin áhan ní, te cuan-
dute ní jéē ní cacandíje ní Je-
sucristo, návāha cone cáhnu
ni Yaā Dios nuū cuéchi ní, te
cuāha Yaā Dios Espíritu Santo
yā condee yā ini anuá ni.
³⁹ Chi súcuu ni jejnūhun máá
Tátá yō Yaā Dios nuū yō jíin
núu séhe yó, te suni súcuu
ni jejnūhun ya nuū ñayuu tāca
gá nación, tācá i jeē cána ya i
candíje i.

⁴⁰ Te jíin cuéhē gā jñūhun
súcuu ni cahān cají Pedro, te
ni stihví ni de i:

Nducú ndéyí ní jeē na cácu
ní, chí jnahñū ndetū ñayuu
casáha jniñu néé, áchí de.

⁴¹ Yūcuán na te tācá i jeē ní
cajetáhú jñūhun ni cahān de,
ni cajendute i. Te quivī un ní
nducuehē gā ñayuu cácaandíje,
nájñūhun unī mil gā ñayuu.
⁴² Te ni cahīin nihīn i síquī
jñūhun cástéén apóstol. Te
inuú-ni cácaandíje mánī i te
cájicān tahu i, te ñn cáhnu-ni
cáyeji i pan, nájñūhun ni steén
maá Jítoho yō jeē núcūhun ni
yō síquī yā.

*Ndese ni coyūcu ñayuu jeē
ní cacandíje jeē xihna ñúhún*

⁴³ Te ndihí ñayuu ni cayūhú
i ni cajito i, chí cuehē jniñu
jéñnu jeē steén jeē cujéñnu
ya ni casáha tēe apóstol.
⁴⁴ Te inuú ní cahīyo ni ñayuu i.

cácandíje, te ni cacuu inuú i tāca jēē cánevāha i. ⁴⁵ Te ni caxīcō i na-ni na vé cánevāha i, te ni casaja i xūhún un nūū tāca jnāhan i, nūū ndese jīni ñúhún ñn ñn i. ⁴⁶ Te ndijnahan quivī ni candutútú i ini templo. Te manī ni cayeji cáhnu i pan tācá vehe jnāhan i nájñuhun ni steén yā, te ni cahīyo sī ni i. ⁴⁷ Te ni cacahān i jeē yóhoyo cújéhnu Yaā Dios. Te ndihi ñayuu ñuu un ní cajejnúhún i ñayuu CÁCANDÍJE. Te ndijnahan quivī ni jnama Jitoho yō sava ga ñayuu, te ni nduu inuú i jīn ñáyuu CÁCANDÍJE.

Jeē ní nduvāha tēe ríngo

3

¹ Te ñn quivī te máá cáhunī jehīni ni caa Pedro jīn Juan cuango de templo, chi hora un cájicān tahu jnāhan de hebreo. ² Te cájendēca ñayuu ñn tēe cáríngo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícān de caridad nuū tāca ñáyuu quívicoo ini templo. ³ Te tēe un ní jito de nuū Pedro jīn Juan jeē véji de quívicoo de ini templo, te ni jicān de caridad nuū Pedro jīn Juan. ⁴ Te Pedro jīn Juan ni cajito vāha de nuū tēe ún. Te ni cahān Pedro jīn de:

Condēhe núū rī jijnáhan ri, achí de.

⁵ Te máá tēe un ndétu tūhva de, ni jeni ni de jeē cuāha Pedro jīn Juan jecu xūhun núū de. ⁶ Te ni cahān Pedro:

Tú na xūhun plata ni xūhun oro cánevāha ri. Te íyó ñn jeē váha ga sáha ri jīn ró: jīn poder maá Jesucristo, Yaā ní jehnu ñuu Nazaret, cáhān rī jīn ró, ndocuiñī te caca ró, achí de.

⁷ Te ni jñi de ndavāha tēe ún, te ni ndonehen de. Te jehē de jīn súcūn jehé de ni nduvāha-ni. ⁸ Te ñn ni scānda de máá de ni ndocuiñī de, te ni quejéé de jíca de. Te ni quivī de jīn Pedro jīn Juan ini templo, jíca de, cánda de, te nácuatáhú de nuū Yaā Dios. ⁹ Te ni cajini tāca ñáyuu jeē jíca de te nácuatáhú de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jñuhun ini corredor jeē naní Salomón

¹¹ Te tēe ni nduvāha ún, tu siáá de Pedro jīn Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i.

¹² Te ni jito Pedro jeē ní cutútú ñáyuu ún, te ni cahān de jīn i:

Níhín tēe ñuu yō Israel jijnáhan ní, ¿najehē cánaa ni ni cájito ní jñiñu yáha? ¿Najehē cájito ní núū ná te cájeni ni ni jēē maá ná jijnáhan ná íyó poder na jēē sáha ná jēē nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní?

¹³ Tuú chi máá Yāā Dios jíy yō Abraham jīn Isaac jīn Jacob jīn táca gá jíy yō, ni sáha ya jñiñu yáha návāha cuni ñayuu

jeē cujéhnū Sēhe ya Jesús, Yaā jeē ní cajendēca ní núū téē cácujehnū. Te ná ni cuni Pilato jeē siaá de ya, te tu ní cájēhe ni jnūhun. ¹⁴Te ni casquéhichī ni yá vēsú cúu ya Yaā ndaā, Yaā ii. Te sa suhva in tēe jéhnī ndīyī ni cacahān ni jīn Pilato jeē na siaá de. ¹⁵Te ni cacahān ni jēē na cúū Yaā jeē sáha jeē técu ndīhi-ni. Te Yaā Dios ni nastécu yā Jesús jeē ní cuu ya ndīyī, te máá ná cácuu testigo jeē ní natecu yā. ¹⁶Te tēe yáha jēē cájito ní te cánacuni ní de, ni candíje de jīn ná jeē iyó poder Jesús nasávāha ya de, te jeē yúcuu ní nasávāha ya de. Te jeē súcuu ni cacandíje ná ní sáha ya, jeē yúcuu ní nduvāha vāha de nájñūhun cájito ndīhi ní.

¹⁷Te na cástūhun ná nuū ni jijnáhan ní, je jíní na jēē maá ní jijnáhan ní jīn téē cácujehnū nuū yō, tu ní cájecūhun ni ní, te jeē yúcuu ní cajehni ni yá. ¹⁸Te súcuu ni squícu jñūhun ni cahān Yaā Dios nde jehahán jēē cánuú ndoho Cristo siquī cuéchi ñayuu, chi ni sáha ya jeē súcuu ni cacahān tēe ni canacani jñūhun ya nde jehahán. ¹⁹Te na nácani ni ni jēē stóo ni cuéchi ní, te nasāma ini ní, te quivícoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ni sáha máá Jítoho yō. ²⁰Te natajī yá Jesús ndijī ya, chi cúu ya Cristo, Yaā ní jeni Yaā Dios jeē jnáma ya yohó. ²¹Te jíní ñúhún jēē cóo ya andivī ndé nasájeé yá táca jēē iyó, nájñūhun ni cacahān

tēe ndoo ni canacani jñūhun nde jehahán ní sáha Yaā Dios. ²²Chi suhva ni nacani jī yō Moisés jñūhun nuū táca jī yō: Máá Jítoho yō Yaā Dios cani ya Yaā nacani jñūhun nuū rō jijnáhan ró, nájñūhun ni jeni ya ruhū. Te cuu ya in jnáhan ñuu yō. Te na chúhun ni rō táca jñūhun jeē nácani ya ún. ²³Te núu ndé téē tú chuhun ni de jñūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴Te táca téē ni canacani jñūhun nde jehahán, nde tiempo ni quiji Samuel te ní gá nde vijna, suni ni canacani de jñūhun siquī táca jniñu cúu quivī yáha. ²⁵Yucūn maá téē ni canacani jñūhun ya nde jehahán cácuu yó, te suni siquī maá yó jijnáhan yó cúu jeē ni sáha Yaā Dios contrato jīn jī yō. Chi ni cahān yā jīn Abraham: Yucūn maá ró cane Yaā sáha jeē quendōo ndetū táca ñayuu ní cáhnu ñayivī, áchí yá. ²⁶Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quendōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

*Jeē ní cajendēca de Pedro
jīn Juan nuū tēē cácujehnū*

4

¹Te Pedro jīn Juan níni cácahān gā de jīn ñayuu ún te ni quecoo táca sūtū jīn téē grupo saduceo, jīn téē cácujehnū nuū téē cándito templo. ²Te yōhyo ni caquiti

ni de síquī jeē castéén Pedro jíin Juan nuū ñáyuu, jíin jéē cánacani de jnūhun jeē nátecu ndīyi chi je ni natecu Jesús. ³ Te ni cajñi ún de, te ni cachuhun ún de vecāa cone de nde cundijin inga quivī, chi je ni ini. ⁴ Te cuehe ñayuu jeē ní cajini sōho jnūhun ni cacahān Pedro jíin Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujeñnu nuū ñáyuu hebreo jíin tēe jéñnu cándiso jniñu jíin tēe cástéén jnūhun tutu ley yā, ni candutútú de ini ñuu Jerusalén. ⁶ Te suni ni candutútú de jíin Anás jeē cúu sutū cujeñnu ga, jíin Caifás jíin Juan jíin Alejandro jíin táca gá jeē cácuu jnáhan sutū cujeñnu ga ún. ⁷ Te ni candacu jniñu jeē na quíjicoo Pedro jíin Juan condichi de mēññú, te ni cacajnūhún de:

¿Ndé ñin ni tejniñu róhó te ndese ni nihín jniñu ró ní sáha ró jéē nduvāha tēe yáha? áchí.

⁸ Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca tēe ún:

Tāca níhín tēe cácujeñnu nuū ñūū yō Israel jíin táca níhín tēe jéñnu cándiso jniñu, ⁹ vijna te cástíchí ni sáña síquī ñin jniñu váha ní casáha ná jéē ní nduvāha tēe cúhú yāhá. ¹⁰ Te na cástūhun ná nuū nihín jéē cácujeñnu ní, návāha suni cuni ndihi jnáhan ñuu yō Israel jeē jíin poder maá Jesucristo, Yāá ní jehnu

ñuu Nazaret, ni nduvāha tēe índichi nuū ní yáha. Te suu ya cúu Yāá jeē ní cajehni ní jícā cruz, te ní sáha Yāá Dios jeē ní natecu yā. ¹¹ Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ní casquéhichí ní yá nájnūhun jeē cátejiyo ní yúū, chi tu ní cácujeñnu ní yá. Te ní sáha Yāá Dios jeē cúu ya nájnūhun yuū cánuú gá jeē quítuu vehe. ¹² Te tú cuiti inga jeē cúu jnama yóhó, chi tuá na inga jeē cujeñnu ní jéni Yāá Dios ini ñayivī yáha jéē cúu jnama yóhó, áchí Pedro.

¹³ Yūcuán na te ní cajini un jéē Pedro jíin Juan jéñnu-ni cacahān de. Te je cajini jeē tú tūhva de, chi tēe súcuu-ni cácuu de. Te ní canaa ní cájito nuū de, te ní casáha cuenta jeē ní cajica de jíin Jesús. ¹⁴ Te cándēhe núū tēe ní nduvāha un, índichi de jíin Pedro jíin Juan, te tu ní cánihín gā modo ndese ga cahān. ¹⁵ Yūcuán na te ní candacu jniñu jeē na quéndacoo sín de yatā véhe juzgado te ndajnūhun máá jijnáhan. ¹⁶ Te ní cacahān:

¿Ndese sáha yó jíin tēe yáha núu súcuu? Chi ní jitē jnūhun yáha núu tāca ñáyuu ñuu Jerusalén jeē súcuu ni casáha de ñin jniñu jéñnu, te ma cúu cahān yō jeē tu íyó ndāá. ¹⁷ Te návāha ma cuité ga jnūhun yáha, na cúxeēn yō nuū de jeē ma cahán cuiti gā de jnūhun Jesús nuū ní ñin ñayuu, áchí.

¹⁸ Te ní cacana ún de, te ní cacahān níhin jíin de jeē ma cahán cuiti gā de jnūhun Jesús

ni ma steén gā de jnūhun un nūū ní ñn ñayuu. ¹⁹ Yūcuán na te ni cacahān Pedro jín Juan:

Cani vāha ni ní te nūū núnahan ní Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. ²⁰ Chi ma cúu stóo ná jniñu jeē nácani ná jnūhun ní cajini sōho ná jín jniñu ní cajito ná, áchí de.

²¹ Yūcuán na te tēe ni cacutútú un ní cacuxeēn tucu de nuū Pedro jín Juan. Te ni casiáá de cuango de, chi tú cuiti na modo stóho de chi cáyūhu cájito ñayuu, chi síquī jniñu jéhu ni cuu ún te ndihi i cacahān i jeē yóhyo cújéhu Yaā Dios. ²² Chi tēe jeē ní sáha ya jniñu jéhu jín de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cáandíje

²³ Te ná ni casiáá un Pedro jín Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácujeñu jín tēe jéhu cándiso jniñu. ²⁴ Te jeē ní cajini sōho de jnūhun yúcuan, te inuú-ni ni cajicān tahú de nuū Yaā Dios:

Tátā Yaā Dios jeē cujéhu ní nūū ndihi, máá ní cúu Yaā Dios ni sáha andiví jín ñáyiví jín mar jín táca ndihi jeē iyó. ²⁵ Te jeē jín Espíritu Santo te ni sáha ní jēe ní cáhān mozo ní David nde jenahán:

¿Najehē cáquitī ndevāha ni ñayuu sín nación?

¿Te najehē cájeni sáá ni i jeē ndóna i síquī ní?

²⁶ Ni cacutútú jēe cácuu rey ñayiví jínáhan,

te tēe cácujeñu ni cacutútú de,

te inuú-ni ni candonda de síquī maá ní jeē cúu ní jitoho ná,

jín síquī Cristo, Yaā jeē ní jeni ní.

Achí David.

²⁷ Te jendaá chi Herodes jín Poncio Pilato jín táca tēe ñuu yō Israel jín tēe tāca gá nación, ni cacutútú de ini ñuu yáha ní candonda de síquī Séhe ñ ní Jesús, Yaā ní jeni ní. ²⁸ Te súcuan ni cuu návāha squícu táca jniñu jeē jín poder ni ní cundaā ni ni ndé jenahán jēe súcuan coo. ²⁹ Te vijna, Tátā, coto ní ndese cacahān xeēn de nuū na jínáhan ná, te cuāha ni fuerza ni nūū na jēe cácuu ná mozo ni, návāha jéhu-ni nacani ná jnūhun máá ní. ³⁰ Te jín poder ní nasávāha ni ñayuu cácuñu, te sáha ní jniñu jéhu jeē steén jeē cujéhu ní. Te tāca jēe yáha sáha ní jín poder Séhe ñ ní Jesús, áchí i jínáhan i.

³¹ Te nuū ní ndihi ni cajicān tahú i, te nuū cáyūcu tútú i un ní sáha ya jeē ni jnáa. Te ndihi i ni cunuú Espíritu Santo jín i, te ni jēhe ya fuerza te jéhu-ni ni canacani i jnūhun Yaā Dios.

Jeē ní canevāha cáhnu i ndajniñu

³² Te ñayuu cuehē jeē ní cacandíje chi inuú cáhīyo ni i jínáhan i. Te tú ni ñn i ní cáhān jeē ndajniñu jeē névāha máá i cuu máá-ni i, chi táca ndajniñu ni canevāha cáhnu

i. ³³ Te nīhin cánacani apóstol jnūhun jeē ní cajito de jeē ní natecu Jitoho yō Jesús. Te yōhyo ni chindéé ñáhán yá ñayuu cácadíje. ³⁴ Chi tú cuiti ni ñn i ní ndóho jeē cumanī nuū i, chi tāca ñáyuu cánevāha cuehē ñuhun chí vehe, ni caxīcō i sava te ni caquindeca i xūhún un. ³⁵ Te ni cajēhe i xūhún un núū tēe apóstol, te ni casaja tēe apóstol nuū ñáyuu cácadíje núu ndese jíni ñúhún ñn ñn i. ³⁶ Te íyó ñn tēe nání José jeē cúu yucūn Leví, ni cacu de Chipre, ñuhun jeē íne sūn nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnūhun ndeyí ni. ³⁷ Te ni xīcō de ñn ñuhun de, te ndáhá de xūhún un ní jēhe de nuū tēe apóstol.

Siqui cuēchi jeē ní casáha Ananías jíin Safira

5

¹ Te suni inga tēe nání Ananías jíin ñasihí de Safira, ni caxīcō de ñn ñuhun de. ² Te ni chuyāha de sava xūhún un cuu máa de jíin ña, chi súcuan ni candajnūhún de jíin ña, te ndáhá de inga sava nájnūhun jeē ndíhi cúu, te ni jēhe de nuū tēe cácuu apóstol. ³ Te ni cahān Pedro:

Ananías, ¿naun ni jēhe ro jnūhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīcō ró ñuhun ró te cuēchi ró cúu jeē tu ní cáchi ndaā rō jeē ní squéndōo ró jecu xūhún un cuajníñu máa ró, chi ni sáha

ró nájnūhun jeē ndíhi xūhun ní jēhe ró. ⁴ ¿Te á násūu cuenta maá ró cúu ñuhun un ndé ná tu xīcō ró? Te ná ni xīcō ró ¿te á násūu cuenta maá ró cúu xūhun jēe cuajníñu ró ndé nuū cuní máa ró? ¿Te naun ni jeni ni rō jeē stahú ró súcuan? Te nasūu máni máa tēe cúu jeē jícu ró stáhú ró, chi suni Yaa Dios, áhí Pedro.

⁵ Te ná ni jíni sōho Ananías tāca jnūhun yáha, te ni cotúu-ni de ni jihí de. Te tāca ñáyuu ní canihín jnūhun ún, yōhyo ni cayūhú i. ⁶ Te ni candocuiñí tēe suchí, te ni cachusúcūm de ndíyi un cuáchindūji de.

⁷ Te ni cunúu nájnūhun uní hora. Te ni jinū ñasihí ndíyi un ní quívi ña ini vehe ún, te tú na vé jíni cuiti ña. ⁸ Te Pedro ni cajnūhún de ña:

Cachi nuū rí, ¿á ñn súcuan-ni ni caxīcō ró ñuhun ró chí tuú? áhí de.

Te ni cachi ña:

Suu súcuan-ni ni caxīcō ná, áhí ña.

⁹ Te ni cahān Pedro jíin ña:

¿Naun ni casquínáhan jnūhun ró jēe cóto ndee rō Espíritu Santo maá Jitoho yō? Chi ni nducú ró stahú ró yā. Cuni nahín jēe cáhma nanecoo tēe cuachindūji yíi ró, te suni súcuan quichindūji de rōhó, áhí de.

¹⁰ Te ni cotúu-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jeē jé ni jihí ña, te ni caquenehen de ña, te ni jechindūji de ña xiin yí ña. ¹¹ Te yōhyo ni cayūhú ndívi ñayuu cácadíje jíin tāca

gá ñayuu jeē ní cajini jnūhun jeē súcuan ni cuu.

Cuehē jniñu jéhnū ni casáha apóstol

12 Te cuehē jniñu jéhnū jeē steén jeē kujéhnū Yaā Dios ni casáha tēe apóstol nuū ñayuu. Te tāca ñayuu cácañdije, inuū-ni cándutútú i ini corredor jeē naní Salomón. 13 Te tu ní cáchundeyí ni inga ñayuu quijnáhan jín i. Te cájejnúhún i ñayuu cácañdije. 14 Te ni nducuehē gā i, chí cúu tēe cúu ñahan ni cacandije i máá Jítóho yō. 15 Te cáquindaca ñayuu jnáhan i jeē cácuñū, te cájequin i ini calle cáca i nuū camilla jín núu yúu, chí cácuñi i vēsú ste cuándahū Pedro na yáha siquī i te nduváha i. 16 Te suni cuehē ñayuu táca ñuu cáhīyo yajni yūcuan ní quiijicoo i ñuu Jerusalén ni caquindaca i jnáhan i jeē cácuñū jín jéē cándoho tachī, te ndihī i ni canduváha i.

Jeē ní cajito xeēn i tēe cácuu apóstol

17 Yūcuán na te sutū kujéhnū ga jín táca gá jnáhan jeē cácañdije sahan saduceo, ni cacucuésún ni jeē siquí tēe cácuu apóstol. 18 Te ni cajni de tēe cácuu apóstol ni cachuhun de vecāa. 19 Te ñn ndajéhé máá Jítóho yō ni nune ya yehyí vecāa ún jecuáa, te ni quenehen ya de jíjnáhan de. Te ni cahān yā jín de:

20 Cuáhán te cuiñi ró ini templo, te yūcuán nacani cájí ró jnūhun nuū ñayuu siquī

ndese nihīn tahú i cotecu i ní cáni, áchí ndajéhé yā.

21 Te ni cajini sōho de jnūhun yáha. Te nuū ní cundijin te nehen ni quivicoo de ini templo, te cástéén de jnūhun ya nuū ñayuu.

Te níni cástéén de te sutū kujéhnū ga jín táca jnáhan de ni canastútú de tēe junta kujéhnū ga, jeē cúu ndihī tēe jéhnū cándiso jniñu nuū ñayuu nación Israel. Te ni catajī de policía cuaquenehen tēe apóstol ini vecāa. 22 Te nuū ni jínūcoo te tuá gā tēe apóstol. Te ni canandió cóo te ni cacachi:

23 Jendaá cúu jeē ní cajito ná ndési váha vecāa, te cáhīn tēe cándito yehyí un. Te nuū ní canune ná, te tú cuiñi gā tēe un cáhīn ini vecāa ún, áchí de.

24 Te sutū kujéhnū ga jín tēe cújéhnū nuū tēe cándito templo jín sutū cácuñéhnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. 25 Te ni quee-ni ñn tēe te ni cacachi:

Tēe jeē ní cachuhun ní vecāa, cáhīn de ini templo, te cástéén de jnūhun nuū ñayuu, áchí de.

26 Yūcuán na te tēe cácuñéhnū nuū tēe cándito templo, jín tēe cácuu policía de, ni jengoo de, te yúcún ní nacueca de tāca tēe apóstol vendicoo de jín, chí cáyūhú de jeē sanaa te cuāha ñayuu yuū xinī de núu sáha xeēn de jín táca tēe apóstol. 27 Te nuū ní najinūcoo de jín tēe apóstol, te ni cajecuiñi de nuū tēe casáha junta. Te sutū kujéhnū ga ni cahān:

28 Ni cacahān nīhin ri jīn ró jeē ma steén cuiṭi gā rō jnūhun tēe nání Jesús. ¿Te naun ni casáha ró jēe ní ndecāva jnūhun un ní űuu Jerusalén yāhá? Te cācuni rō staú yāhu ró rúhū jijnáhan ri siquī jeē ni jīhī tēe ún, áhí.

29 Te Pedro jīn táca gá apóstol ni cacahān de:

Cánuú jēe squīcu ná jniñu ní ndacu Yaā Dios nuū ná te nasūú jniñu nāndacu tēe. 30 Máá Yāā Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz. 31 Te ni sáha Yaā Dios jeē ní ndujéhnu tucu Jesús néne ya ichi ndáváha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios nāváha yóhó, jēe cácuu yó ñáyuu Israel, na nācani ni yō jeē stóo yó cuéchi yó, te cone cáhnu ni yā nuū tāca cuéchi yó. 32 Te máá ná ni cajito ná táca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá tāca ñáyuu jeē cájendetū nuū yā, achí de.

33 Te ná ni cajini sōho un jnúhun yáha, te yōhoyo ni caquīṭi ni, te cahni de cācuni nuú. 34 Te mēhñú un jijnáhan néne in tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájejnúhún i de. Te ni ndocuiñi de, te ni ndacu de jniñu jeē na cújiyo núu tēe apóstol. 35 Te ni cahān de:

Róhó jnáhan űuu yō Israel, cani vāha ni rō núu na vé

cācuni rō sáha ró jīn táca tēe yáha. 36 Chi nucūhun ni rō jeē in cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nājnūhun cuñn ciento tēe jīn de. Yūcuán na te ni cajehni ñayuu Teudas, te tāca jēe ní caquijnáhan jīn de ni cajitē núu cuangoo sáa-ni, te ni jecuiñi-ni jniñu ún. 37 Yūcuán na te quivī ni íyo censo te Judas, in tēe Galilea, ni ndonda de siquī gobierno, te ni cacutútú cuéhē tēe jīn de. Te suni ni cajehni ñayuu Judas, te tāca tēe jeē ní caquijnáhan jīn de ni cajitē núu cuangoo. 38 Te vijna na cuáha ri consejo rohó. Ma stáhān gā rō tēe yáha. Siáá de na quíngoo de. Chi núu ñayuu-ni ni squejéé jniñu yáha, te jecuiñi i. 39 Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áhí de.

40 Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jīn cuarta ñi te ni cacahān xeēn jīn de jeē ma cahán gā de jnūhun Jesús, te ni casiáá de cuangoo de. 41 Te máá apóstol ni quendacoo de nuū junta cuangoo de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácandíje de ya. 42 Te ndiquivī castéén de jnūhun vāha Jesucristo, te canacani de jnūhun ún ini templo jīn táca-ni vehe.

*Jeē ní cajeni de uxā tēe cua-
jniñu mēhñu ñáyuu cácandíje*

6

1 Te ni cucuehē ñayuu cácanđije. Te tiempo un te tē hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cániñn vāha ña staā jeē cása ja de tāca quívī cuu ña. 2 Yūcuán na te máá ndihúxí uū apóstol ni canastútú de tāca ñáyuu cácanđije, te ni cacahān de:

Tú vāha jeē jécuiñī jniñu jeē cánacani ri jñūhun Yaā Dios siquī jeē cása ja rī staā. 3 Nú sūcuan te rōhó, hermano, nacāji ró úxā jnáhan máá yó, te na cóndiso jniñu de sa ja de staā. Te nacāji ró tēe jeē cájejnúhún ñáyuu de, tē ndíchí jēé ní cunuú Espíritu Santo jíin de. 4 Te ruhū jijnáhan ri, máni cacān tahu rī jíin jēé nácani ri jñūhun ya, achí de.

5 Te ndihí ñayuu ni canu-jnahan ni i jñūhun ni cacahān de. Te ni canacāji i Esteban, tēe cándije vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándije sahan ñayuu hebreo nde ná tu candije de jñūhun Cristo. 6 Te ni cajeni i tāca tēe yáha núū tēe cácuu apóstol, te tēe apóstol un ní casoó de ndaha de xinī tāca tēe un ní cajicān tahu de nuū Yaā Dios siquī jniñu condiso de.

7 Te jñūhun Yaā Dios ni jitē gā cuahān, te ni nducuehē teyí ñáyuu cácanđije i jñūhun ya ini ñuu Jerusalén. Te suni cuehē sutū ni cacandije de jñūhun ya.

Jeē ní cajni de Esteban

8 Te ni chindéé ñáhán yá Esteban ni jēhe ya poder nuū de, te ni sáha de tācá jniñu jéhu nuū ñáyuu, jniñu jeē steén jeē cujéhu Yaā Dios. 9 Te ñayuu hebreo jeē ní cacuyāhu i te ni canduu libre i, íyó vehe iī sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnáhan de jíin Esteban. 10 Te tu ní cácundeyí jíin de, chi ndíchí ní cahān de ni sáha máá Espíritu Santo. 11 Yūcuán na te ni cascáhān sava tēe jeē na cáhān jñūhun stáhú siquī Esteban. Te ni cacahān jeē ní cajini sōho cáhān ndevāha Esteban siquī Moisés jíin siquī Yaā Dios. 12 Te jeē sūcuan ni cacahān te ni caquítī ni tāca ñáyuu jíin tēe jéhu cándiso jniñu jíin tēe cástéén jñūhun tutu ley yā. Te ndihí de ni candonda siquī Esteban, te ni cajni de cuangoo jíin de nde nuū junta cujéhu ga. 13 Te ni cajeni de tēe cahān jñūhun yáá siquī Esteban, te suhva ni cacahān:

Tēe yáha tu ndé jécuiñī de jeē cahān ndevāha de siquī templo iī yáha jíin siquī ley yā. 14 Chi ni cajini sōho ná cáhān de jeē Jesús, tēe ni jéhu ñuu Nazaret, canu de templo yáha te nasama de jeē tajnúni ley

yā jeē ni jéhe Moisés nuū yō, áchí.

¹⁵ Yūcuán na te ndihi tēe cáyūcu nuū junta un ní candacoto vāha nuū Esteban, te ni cajini jeē jito nuū de ná jito nuū ñn ndajéhé Yaā Dios.

Jnūhun ni nacani Esteban

7

¹ Te máá sūtū kujéhu ga ni cajnūhún Esteban:

¿A ndāā jeē súcuan ni sáha ró nájnūhun cácahān de yāhá? áchí.

² Te ni cahān Esteban:

Ndihi níhín jēe cácuu ní jnáhan ñuu yō, jíin ndihi níhín jēe cácujuhū ní núū ñúū yō, cuni nahín ní jnūhun cahān ná: Máá Yāā Dios jeē yóhyo cújéhu ya, ni steén yā maá yá nuū jíí yō Abraham nde na néne ga de región Mesopotamia, nde ná tu quihīn de condee de ñuu Harán. ³ Te ni cahān yā jíin de: Stóo ñuu rō jíin táca jnáhan ró te quihīn rō nuū cuáha ri condee rō, chí máá rí steén ichi nuū quihín rō, achí yá.

⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna. ⁵ Te tu ní jéhe ya ni ñn tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíin núū tāca séhe de, vēsú ná tu coo séhe de sáá. ⁶ Te súcuan ni cahān Yaā Dios jíin de: Séhe ró coyūcu jícá i ñnga ñuu, te cuñ ciento cuiyā sájniñu sáá-ni i te

stóho ñayuu yūcuan i. ⁷ Te siquī jeē súcuan sáha i jíin séhe ró, te máá rí chí stóho ri ñayuu ñuu ún. Te sáá te quendacoo séhe ró yūcuan, te nucoyūcú i yāhá chíñuhún i ruhū, achí yá. ⁸ Te ni cahān yā jíin Abraham jeē na cúu de circuncidar, jeē cúu ñn jnunī jeē ni sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te suni súcuan ni sáha Isaac jíin séhe de Jacob, te Jacob jíin séhe yí de jeē cácuu ndihúxí uū yucūn ñayuu Israel.

⁹ Te tāca séhe Jacob ni cacu-cuésún ni de jíin ñani maá de José, te ni caxícó de i nuū tēe jeē ní cajendēca i nde nación Egipto. Te Yaā Dios chí ni ndito ya José. ¹⁰ Te ni jnama ya i nuū tāca jnúndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusī ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñáyuu cáyūcú vehe Faraón.

¹¹ Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te tāca jíí yō ún, tuá ni cánihīn de jeē cáji de. ¹² Te ni nihīn Jacob jnūhun jeē iyó trigo nde nación Egipto, te ni tají de séhe de ni jengoo de ni ca-jeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jíjnahān de. Yūcuán na te ni jini rey Faraón ndé ñn jnáhan cúu José. ¹⁴ Te ni cahān

José jíin táca ñani de jeē na cóndeca de tátá de Jacob jíin ndihí jnáhan vehe de. Te ni ñyo unī xico xahūn i. ¹⁵ Te súcuan ni cuu jeē ni jíin Jacob ni condee de nación Egipto nde ni jihí de. Te suni yúcuan ní coyūcu séhe de jeē cácuu jíi yō un ndé ni cajihí maá de. ¹⁶ Te ná ni quee quiví jeē ndénehen ya táca yúcūn de jeē cáyūcu tátú de nación Egipto, te ni cacondiso de yiquí ndihúxí uū ndīyí jíi un jéē ndíji ñuu Siquem, te ni cachindūji de ini yaū ndīyí ndeé jícā cáva jeē ní jeen jíi yō Abraham nuū táca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quiví jeē squícu jnūhun ni cahān Yaā Dios jíin Abraham jeē quéndacoo séhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. ¹⁸ Yūcuán na te ni nucuñí inga rey ñuu Egipto jeē tu ní jíni de jeē váha ni sáha ndīyí José. ¹⁹ Te rey un ní stahú de táca jíi yō te ni sáha ndevāha de jíin i, chi ni sáha fuerza de i jeē ma cóto ga i séhe yiquín i te na cúu. ²⁰ Te tiempo un ní cacu Moisés, te ni cusí ni Yaā Dios jíin i. Te unī yoō ni condito sáhi náná i tátá i. ²¹ Te tuá ni cúu condito sáhi de i, te ni cachune de i nuū nanihīn séhe síhí Faraón i, te ni naquihīn séhe ña i ni scuéhnu ña i nájnūhun séhe máá ña. ²² Te ni cutūhva Moisés táca jnūhun ndíchí ñuu Egipto, te ni kujénu de jíin jnūhun cáhān de jíin jniñu

sáha de.

²³ Te nuū uú xico cuiyā de te ni jecondéhé de jnáhan de jeē cácuu ñayuu Israel. ²⁴ Te ni jito de nuū ñn tēe nación Egipto jeē sáha ndevāha jíin ñn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíin jnáhan de ún. ²⁵ Te máá Moisés jéni ni de jeē jécūhun ni táca jnáhan de jeē Yáa Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiti ni jnáhan de ún. ²⁶ Te inga quiví suni ni jito de nuū uú tēe Israel jeē cájejnáhan, te cúní de jeē na jécuiñí. Te jeē yúcuan ní cahān de jíin: ¿Najehē casáha ndevāha ró jíin jnáhan ró? Chi nájnūhun ñn ñani-ni cácuu ró, áchí de. ²⁷ Te máá tēe cáni tahū jnáhan un ní chundahá de Moisés te ni cahān de: ¿Ndeé ñn ni jeni róhó jéē kujénu ró nuū rī te sándaā rō jniñu ri jijnáhan ri? ²⁸ ¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹ Te nuū ní jini sōho Moisés jnūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yúcuan ní scácu ñasihí de uū séhe yí de.

³⁰ Te ni jinu uū xico cuiyā jeē néne de yūcuán. Yūcuán na te ñn ndajéhé Yaā Dios ni quenda ya nuū de nde nuū ñūhun téhé nuū ín yucu súcún Sinaí. Te ni quenda

ya nuū de xinī ñn yucū cuií cáhnu cándahá yáñuhūn, te tu ní cáyú yucū ún. ³¹ Yūcuán na te Moisés ni naa ni de jito de ún, te ni jehēn de nde nuū, návāha coto vāha de. Te ni jini sōho de jeē cahán maá Jítoho yō jíin de: ³² Máá rí cúu Yaā Dios tāca jíí rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuán tuá ni cúndeyí ni de coto de nuū. ³³ Te máá Jítoho yō ni cahán yā jíin de: Quenehen ndijēn rō chi nuū ín rō, ñuhun íí cúu. ³⁴ Je ni jini rī ñayuu maá rí jeē yóhoyo cándoho i nación Egipto, te suni jíini sōho rí jeē cájnana uhū i, te ni cuun rí vēji rí jeē jnáma rí i jíináhan i. Núu súcuán te vijna chi tají rí rohó ndicó rō quihīn rō nde nación Egipto, achí yá jíin de.

³⁵ Te nde ná tu quenda Moisés Egipto, te tāca jnáhan de ni casquéhichī i de jeē ní cacahán i jíin de: ¿Ndé ñn ni jeni róhó jéē kujéhnu ró núū rī te sándaā rō jniñu rí? ni cacahán i jíin de. Te vēsú súcuán te máá ndajéhé Yaā Dios ni quenda nuū Moisés un jéē cándahá cáyú yucū cuií ún. Te súcuán ni cuu jeē ní natajé yá de cuanuhun de nde Egipto jeē ndácu de jniñu nuū i te jnama de i. ³⁶ Te máá Moisés ni sáha de jeē ní quendacoo jnáhan ñuu de ini nación yúcuán, te ni cayāha de Mar Rojo, te ni cajica cuu de ñuhun téhé úū xico cuiyā. Te ní tiempo un ní sáha de cuehē jniñu jéhnu jeē steén jeē

cujéhnu Yaā Dios. ³⁷ Te máá Moisés cúu jeē suhva ni cahán de jnūhun yáha jíin jnáhan ñuu yō Israel: Máá Yáa Dios cani ya Yaā nacani jnūhun nuū rō jijnáhan ró nájnūhun ni jeni ya ruhū. Te cuu ya ñn jnáhan ñuu yō. Te na chúhun ni rō jnūhun cahán Yaā ún, achí. ³⁸ Te suni nde ná ni cajica cuu jíí yō nde nuū ñūhun téhé, te ni cahán ndajéhé yā jíin Moisés xinī yúcu súcún Sinaí, te ni nihīn de jnūhun jeē cahán ndese nihīn tahú yō cotecu yō, te ni nacani de jnūhun un núū tāca jíí yō, te ni quendōo jnūhun un núū yō.

³⁹ Te tāca jíí yō ún tu ní cácuñi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰ Te ni cacahán de jíin Aarón: Sáha ní tijni yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xinī yucu Sinaí, achí. ⁴¹ Yūcuán na te ni cajēhe de oro ni cuvāha ñn becerro oro, te nuū becerro ídolo un ní casocō de quiti, te ni cacusī ni de jíin ídolo ni casáha de ún. ⁴² Te Yaā Dios ni cujiyo ya cuahán yā, te ni stóo ya de na chíñúhún de nuū tāca jéē jito yó ín andiví, nájnūhun yósó núū tútu tēe ni canacani jnūhun Yaā Dios nde jenahán:

Ni cahán yā: Róhó ñáyuu Israel,

¿á cájeni ni rō jeē nuū ruhū ni casocō rō quiti

ná ni cajica cuu ró úū xico
cuiyā nde nuū ñúhun
téhé?

⁴³ Tuú, chi sa suhva ni ca-
condiso ró nicho jeē
íne ídolo jeē naní Moloc

jíin figura quími jeē naní
Renfán,

ídolo jeē ní casáha máá ró ni
cachiñúhún ró.

Jeē yúcuán cúu jeē siáha ri
rohó quíhín jicá ró nde
yatā ñúū Babilonia,
achí yá.

⁴⁴ Te ni ndacu ya jniñu
nuū Moisés jeē na sáha de
vehe ñi nuū chiñúhún de ya,
nájñuhun cáa jeē ní steén yā
nuū de. Te táca jíi yō, nde nuū
ñúhun téhé ní canevāha de
vehe íi un núū ní cachuvāha
de tabla yuū jeē yosó jnúhun
ley yā. ⁴⁵ Te ni castóo de vehe
un núū ndihi sēhe de jeē cúu
jíi yō. Te ni quívi Josué jíin
jíi yō ini nación yáha, te ni
sáha ya jeē ní cacundeyí de
jíin táca ñayuu jeē ní cacoyūcu
yáha ní cajinu i cuango i. Te
ni quívicoo de táca ñuu i jíin
vehe íi ún, te ni quendōo nde
quívi ní cuu David rey. ⁴⁶ Te
ni cusí ni Yaā Dios jíin rey
David. Te ni jicān de nuū yā
jeē sáha de ñin vehe íi yā nuú,
chi máá yá cúu Yaā Dios jíi de
Jacob. ⁴⁷ Te ni cuu jeē nde
sēhe yí de Salomón ni sáha
vehe íi yā. ⁴⁸ Te vēsú súcuán
ni cuu te Yaā kujéhu téyí, tu
ndéé yá máá vehe jeē casáha
ñayuu, nájñuhun ni cahān tēe
ni nacani jñuhun ya nde je-
nahán:

⁴⁹ Ni cahān yā:

Andiví cúu nájñuhun mesa
nuū ndácu ri jniñu

te ñayívi cúu nájñuhun ñin nuū
yítuu jehē rí.

Núu súcuán ¿te ndese cuu sáha
ró vehe jeē cóndee rí,

te ndese cuu sáha ró núū
ndétātu rí?

⁵⁰ ¿A násūu máá rí ní sáha
ndihi jeē iyó?

áchí máá Jítóho yō Yaā Dios.

⁵¹ Te cáhán gā Esteban:

Yōhyo cácuñhni ní ní, te tu
cácu ni ní chusóhó ní, te cácu
ní nájñuhun ñayuu táca nación
jeē tu cájini i jñuhun ya ni
tu cácandíje i ya. Chi níni
cájesi ní núū Espíritu Santo, te
nájñuhun ni casáha jíi yō je-
nahán, suni súcuán casáha ní
vijna. ⁵² ¿A ní íyo tēe nácani
jñuhun ya nde jenahán jeē tu
ní sáha ndevāha jíi yō jíin de?
Chi jíi yō ni cajehni de tēe ni
canacani jñuhun jeē quíji máá
Yāā ndaā. Te je ni quíji Yaā
ún, te máá ní ni canastúu ni yá
nuū tēe ni cajehni de ya. ⁵³ Te
vēsú nde jíin táca ndajéhé yā
ni jēhe ya ley yā nuū yō, te
máá ní chi tu cásquícu ní, achí
Esteban.

Jeē ní cajehni de Esteban

⁵⁴ Táca jnúhun yáha ní cajini
sōho, te yōhyo ni caquití ni, te
cánacayíhí yuhu cájito nuū Es-
teban. ⁵⁵ Te máá Esteban chi
ni cunuú Espíritu Santo jíin
de. Te ni jito de ichi ándiví, te
ni jini de jeē ndíndēe núū néne
Yaā Dios, te índichi Jesús ichi
ndávāha ya. ⁵⁶ Te ni cahān de:

Vijna te jító ri jeē núne
andiví, te jító ri nuū máá
Yāā ní nduu tēe, índichi yā

nuū cujéhnu ya lado váha Yaā Dios, áchí de.

⁵⁷ Yūcuán na te ni cajesi un sóho, te ni cacana cóhó, te inuú-ni ni candonda siquī Esteban. ⁵⁸ Te ni caquenehen Esteban cuango jín de nde yatā ñū. Te tē ni cacahān yaā un jín ndihí jñahan de ni cachucú de ticāchí de ndito ñin tē suchí nání Saulo, te ni cacani de yū xini Esteban. ⁵⁹ Te níni jēe cácani tāca tēe un yū xini de te ni jicān tahu de nuū yā:

Tátā Jesús jeē cúu ní Jitoho ná, naquihin ní ánuá na vijna, áchí de.

⁶⁰ Te ni jecuiñi yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jín ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cácanđje

8

¹ Te Saulo, ni nujnahan ni de jeē ni jihī Esteban.

Te quivī un ní caquejé de cájito xeēn ndasí de ñayuu cácanđje Jesús ini ñuu Jerusalén, te jeē yúcuan cúu jeē ní cajitē núu ñayuu cácanđje cuango i ní Judea jín ní Samaria. Te tē apóstol chi tu ní cajitē núu de. ² Te sava tēe yíñuhún núu Yaā Dios, ni cachindūji de Esteban. Te yōhyo ni candahyū de jeē ni jihī Esteban. ³ Te Saulo chi jito xeēn de ñayuu cácanđje, te quiví de ndijnahan vehe te

jñi de tēe, ñahan, chūhun de i vecāa.

Jeē ní canacani i jñuhun Yaā Dios ndañū Samaria

⁴ Te tācá ñuu nuū cuángoo tāca ñáyuu ní cajitē núu un ní canacani i jñuhun ndese jnáma Yaā Dios ñayuu. ⁵ Te ni jinū Felipe ñin ñuu ndañū Samaria, te nuū ñáyuu yúcuan ní nacani de jñuhun Cristo, Yaā ní jeni Yaā Dios jeē jnáma ya yohó. ⁶ Te tāca ñáyuu ní cacutútú un ní cajini nahín váha i tāca jñuhun ni nacani Felipe, te ni cajito i tācá jniñu jéhnu ni sáha de. ⁷ Chi cuehē ñayuu cándoho tachī ni canduvāha i, te cácana cóhó táchī un ní caquendacoo. Te cuehē ñayuu ni ñin jín ñáyuu ríngo ni canduvāha. ⁸ Te jeē yúcuan ní cacusi teyí ni ñayuu ñuu ún.

⁹ Te ini ñuu un néne ñin tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ñin tēe cújéhnu téyí cúu máa de. ¹⁰ Te nde tēe cácujuhnu jín ndivii cuiti ñayuu, cájetáhú ndasí i jñuhun cáhán de, te ni cajeni ni máa i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jñuhun cáhán de, chi cuehē tiempo ni sáha de jniñu stahú ní canaa ni i ni cajito i. ¹² Te nuū ni jinū Felipe, ni nacani de jñuhun váha ndese ndácu Yaā Dios jniñu, jín jñuhun Jesucristo, te ni cacandje i te ni cajen-dute i, cúu tēe cúu ñahan. ¹³ Te

suní máá Simón ni candíje de te ni jendute de, te ni jica cuu de jíin Felipe. Te ni naa ni de jito de táca jniñu jéhu jeē sáha Felipe jeē steén jeē cujéhu Yaā Dios.

¹⁴ Te cáyūcu tée apóstol ñuu Jerusalén, te ni canihīn de jñūhun jeē ñáyuu Samaria ni cacandíje i jñūhun Yaā Dios. Te ni catajī de Pedro jíin Juan cuangoo de yūcuán. ¹⁵ Te ni jinūcoo de, te ni cajicān tahu de jehē ñáyuu un návāha na quívi Espíritu Santo ini anuá i jíjnáhan í. ¹⁶ Chi ná tu quívi ya ini anuá ni ñn i, chi máá-ni jeē ní cajendute i jeē ní cacandíje i Jitoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíjnáhan i, te ni quívi Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī ñáyuu ún te súcuan quívi Espíritu Santo ini anuá i, te cúní de cuāha de xūhun núū tée apóstol návāha nihīn de poder un núū. ¹⁹ Chi ni cahān de:

Cúní na jéē cuāha ní poder yáha núū na, návāha núū ndé ñáyuu soó ná ndaha ná xinī i te quívi Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náā xūhun ró je jnahnū ndetū rō siquī jeē jéni ni rō jeē jíin xūhun te cuu cuan rō táhū jeē véji nuū Yaā Dios. ²¹ Ma nihīn tahu rō jeē sáha rō jniñu yáha, chi tu íyó ndáā anuá rō nuū Yaā Dios. ²² Núū súcuan te jíni ñūhún jeē stóo rō jñūhun jeē jéni néé ni rō

súcuan te cahān ndahú rō jíin Yáā Dios, te máá yá sanaa te cone cáhnu ni yā siquī jeē jéni néé ni rō súcuan. ²³ Chi jíni rī jeē cucuésún ni rō siquī jeē sáha ri jniñu yáha. Te táca jéē neé jéni ni rō ni cunuú un jíin rō, achí Pedro jíin de.

²⁴ Yūcuán na te ni cahān Simón jíin de:

Cacān tahu ni jéhē na jíjnáhan ní núū máá Jitoho yō návāha tú jnahnū ndetū na nájnūhun ni cahān ní, áchí de.

²⁵ Te Pedro jíin Juan ni cacahān cají de ndese cacandíje de jñūhun Yaā Dios. Te jeē cuánungoo de ichi ñūū Jerusalén, te tijni ndañūū Samaria ni canañani de jñūhun jeē jnáma ya ñayuu.

Felipe jíin tée nación Etiopía

²⁶ Yūcuán na te ni cahān ndajéhé máá Jitoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde ñuu Gaza, áchí yá.

Te ichi chúcuan chi máá ñuhun téhé cúu. ²⁷ Te ni quihin Felipe ichi cuahān de. Te nde nación Etiopía ni quiji ñn tēe eunuco jeē ndíso jniñu de cúu de tesorero nuū ñáhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jñūhun Yaā Dios nde jenahán. ²⁹ Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnūhun jeē cáhu ní chí tuú? áchí de.

³¹ Te ni cahān maá tēe un jín Felipe:

¿Te ndese jecūhun ni ná? Chí tú na tēe castūhun núu ná ndese cúu ún, áchí de.

Te ni cahān de jín Felipe jeē na cáa de conēne ndúú de jín de ini carreta.

³² Te jnūhun cáhu de tutu i un cáhán suhva:

Nájnūhun lanchi jeē cuahán tī nuū cúu tī, súcuan ni casáha ñayuu jín yá.

Te nájnūhun in londe quití sáte jeē tu ndáhyú tī, súcuan ni sáha ya,

chí tú na vé ni cáhán cuiti yā ná ni cajicān i cuēchi siquī yā.

³³ Te hora jeē ní cajēhe i jnūhun canu yā, tu ní casáha ndaā i siquī yā jín jnūhun ndaā,

te ni cajehni i ya ini ñayīvi yáha.

Te coo cuehē ñayuu candíje nuū yā jeē ma cánda ni in ñayuu cahu i ñayuu ún.

Achí.

³⁴ Yūcuán na te ni cahān tēe Etiopía un:

Cava vāha ni ní cachi ni núu ná, ¿ndé siquī cahān tēe ni nacani jnūhun yáha? ¿A siquī maá de chí siquī ŋga tēe? áchí de jín Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chí ni quejéé de ni castūhún de jnūhun jeē ní

cahu tēe ún, jín táca gá jnūhun jeē yosó núu tútu yā. ³⁶ Te níni cuāngoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje nīhin ni ndé jín ini jín ánuá ni táca jéé ni sáha Jitoho yō Jesús jehē yō, achí de.

Te ni cahān tēe Etiopía:

Cándíje ná jéé Jesucristo cúu máá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndíndúú de cuangoo de ichi véyí núu ñūhun ndute ún, te ni scuándute Felipe tēe Etiopía.

³⁹ Te nuū ní quendacoo de nuū ndúte, te Espiritu maá Jitoho yō ni sáha ya jeē ní ndoñūhún-ni Felipe. Te tēe Etiopía vēsú tuá ni jito de nuū Felipe, te cúsi ni de cuahān de. ⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo

(Hch. 22.6-16; 26.12-18)

9

¹ Te Saulo chí máni cáhán de jeē cáhni de táca ñayuu cácaníje i máá Jitoho yō, te jeē yúcuan ní jehēn de nuū sutú cujéhnu ga. ² Te ni jicān de carta jeē cahān jeē quihín de táca vehe i sinagoga ñuu Damasco te cuhni de tēe ñahan jeē cácaníje i Jesús,

quiji de jíin i ñuu Jerusalén nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēē ñn luz nuú de. ⁴ Te ni cotúú-ni de nuú ñúhun, te ni jini sōho de ñn jnūhun cáhán jíin de:

Saulo, Saulo, ¿najehe jíto xeēn rō ruhū? achí.

⁵ Te ni cahān maá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cá candíje i ruhū cúu jeē jíto xeēn rō ruhū. Te jeē sáha ró súcuan cúu nájnūhun sti quí jeē tu jéndíje tí te jéñú yatá tí xinī pulla, te súcuan stóho tí maá tí, achí yá.

⁶ Te maá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān maá Jítoho yō jíin de:

Ndocuñí, quívi ró ini ñuu, te yūcuan íyó ñn tēe jeē cachi nuú rō na vé cúu jeē cánuú sáha ró, achí yá.

⁷ Te tēe cuango jíin Saulo, ni canaa ndasí ni de cájini sōho de ndusu jeē cahán, te tu ní cájito cuítí de nuú jeē cahán un. ⁸ Yūcuán na te ni ndocuñí Saulo. Te ni nducú de coto de, te tuá cúu coto de, te ni cajni tēe ún ndaha de ni jinūcoo jíin de nde ini ñuu Damasco. ⁹ Te yūcuan ní condee de uní quívi. Te tu ní cúu cuítí coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñn tēe cándíje, nání de Ananías.

Te maá Jítoho yō ni steén ndijin ya maá yá nuú de te ni cahān yā jíin de:

Ananías, achí yá.

Te maá de ni cahān de jíin yá:

Naun ní sáña, Tátā, achí de.

¹¹ Te ni cahān maá Jítoho yō jíin de:

Quihin ichi te quihín rō calle jeē naní Calle Derecha, te vehe Judas cajnūhun ró ñn tēe nání Saulo ñuu Tarso, chí jícán tahu de. ¹² Te nájnūhun ni jito ndijin de jeē maá ró, Ananías, ni jinū rō, te ni soó ró ndaha ró xinī de, te ni nanune tinúu de, achí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yūcuan yōhyo jíto xeēn de ñayuu cá candíje i níhín ñuu Jerusalén. ¹⁴ Te vijna ni quee de yāhá, chí sutū cácujeñnu ni catejniñu de véji de jni de táca ñayuu cácahān ndahú i jíin ní, achí de.

¹⁵ Te ni cahān maá Jítoho yō jíin de:

Cuáhán, chí máá rí ni nacāji tēe un jéē quihín de nacani de jnūhun rí nuú táca ñayuu nación Israel jíin núu ñayuu táca gá nación nde jíin núu táca rey. ¹⁶ Chí steén rí nuú de jeē cánuú ndoho de cuehē jnūndóho jeē siquí rí, achí yá.

¹⁷ Yūcuán na te cuahān Ananías. Te ni quívi de ini vehe nuú néne Saulo, te ni soó de ndaha de xinī Saulo, te ni cahān de:

Hermano Saulo, máá Jítoho yō Jesús, Yaá ní quenda ndijin nuú ní ichi jeē véji ní, ni tají yá

sãña véji ná núū ni návāha na nánune tinūu ní, te návāha na cúnuú Espíritu Santo yā jíin ní, áchí de.

¹⁸ Te ni nanune-ni tinūu Saulo, chí ni nungoo-ni nájñuhun soō chācá ní condihyū tinūú de ún. Te ni ndocuñī de ni jendute de.

¹⁹ Yūcuán na te ni nacaji de staā, te ni nanihīn ni de. Te ni condee de jecu quivī jíin tée cá candíje jeē cáyūcú ini ñuu Damasco.

Jeē ní nacani Saulo jñuhun ini ñuu Damasco

²⁰ Te ni quejéé-ni de nácani de jñuhun Jesús ini tǎcá vehe īi sinagoga, áchí de jeē Jesús cúu Sēhe Yaā Dios. ²¹ Te tǎca ñáyuu ni cajini sōho jñuhun cáhán de ni canaa ni i, te ni cacahān i:

¿A násūu tée yáha cúu jeē yóhyo jíto xeēn de tǎca ñáyuu Jerusalén jeē cájicān tahu nuū Jesús? Te siquī yúcuan ní quee de yáha jéē cúhni de ñáyuu cá candíje, te quihīn de jíin i nuū sutú cácu jéhnú núú, áchí i.

²² Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tée hebreo jeē cáyūcú ñuu Damasco, tu ní cánihīn de modo cahān de jeē tu íyó ndáā jeē cahān Saulo.

Jeē ni cácu Saulo nuū jnáhan de hebreo

²³ Te ni yáha cuehē quivī. Te jnáhan de hebreo ni casquí jnáhan jñuhun de jeē cáhni de Saulo. ²⁴ Te ni nihīn Saulo jñuhun jeē cándito de

nduú ñuu tǎca yéhyí pared jeē ní condúū ndihyú ñuu ún. ²⁵ Yūcuán na te īin jecuáā te tée cá candíje ni caquihin de Saulo, te ini īin jīca cáhnu ni cascúun de Saulo jicā pared ún, te súcuan ni cácu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúni de najnáhan de jíin tée cá candíje. Te ni cayūhu tée un ní cajito de Saulo, chí tu ní cá candíje de jeē ní nduu Saulo tée cándíje nuū Jesús. ²⁷ Te Bernabé cuahān de jíin Saulo nuū cáyūcu tée apóstol, te ni nacani de jñuhun nuū tée ún ndese ni jini Saulo nuū maá Jítóho yō ichi nuū cuahān de, jíin jéē ni cáhān yā jíin de, jíin jéē jéhnú-ni ni nacani de jñuhun Jesús ini ñuu Damasco. ²⁸ Te ni condee Saulo ñuu Jerusalén ni jica de jíin tǎca tée apóstol. ²⁹ Te jéhnú-ni ni nacani de jñuhun máá Jítóho yō. Te jnáhan ñuu de hebreo jeē cácahān yuhu griego, ni castáhān jnáhan jíin de, te máá tée un cácu ni de cahni de Saulo. ³⁰ Te ni cajini tǎcá hermano cá candíje, te ni cajendēca de Saulo nde ñuu Cesarea. Te yúcuan ní canatajái de Saulo cuanuhun de nde ñuu de Tarso.

³¹ Te ñáyuu cá candíje Jesús jeē cáyūcú Judea jíin Galilea jíin Samaria, tuá ní cájito xeēn ñáyuu i. Te ni ije ga i jíin jñuhun ya, te cándiso īyo i nuū maá Jítóho yō. Te Espíritu

Santo ni chindéé ñáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cá candíje, te suni ni jécondéhé de ñayuu cá candíje cáyūcú ñuu Lida. ³³ Te yūcuan ní jini de nuū ñin tēe nání Eneas jeē ní cuu unā cuiyā cáa de chi ni ñjin de. ³⁴ Te ni cahān Pedro jín de:

Eneas, Jesucristo cúu Yaā nasávāha ya rohó. Ndocuiñi te natuu rō yuu ró, áchí de.

Te ni ndocuiñi-ni tēe ún. ³⁵ Te tāca ñayuu cáyūcú ñuu Lida jín ndúhvā Sarón ni cajito i jeē ní nacaca Eneas, te ni casquéndōo i tāca jnúhun jeē tu íyó ndāa te ni cacandíje i máá Jítoho yō.

Jeē ní natecu Dorcas

³⁶ Te nde ñuu Jope ni ñyo ñin ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmaní nuū. ³⁷ Te tiempo yúcuán ní quejéé cuéhyi jín ña, te ni jihí ña. Te ni cascúchi i ndíyí ún, te ni cajequin i ndíyí un ndé ini cuarto xiní véhe. ³⁸ Te yajni íne ñuu Lida jín ñuu Jope, te tēe cá candíje ñuu Jope ni cajini jnúhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhín yachí yō ñuu Jope, achí de.

³⁹ Yūcuán na te ni quihin Pedro ichi cuahān de jín tēe ún. Te nuū ni jínū de, te

ni cacao tēe un jín de nde xiní véhe nuū catú ndíyí ún. Te tācá ñahan viuda ni candicó ndūū ña de cándahyū ña, te cástéén ña tācá sahma jín tícāchi jeē ni sáha Dorcas te ni saja ña nde na técu ña. ⁴⁰ Yūcuán na te ni ndacu Pedro jniñu jeē na quéndacoo ndíhi ñayuu ún quingoo i nde yatā véhe. Te ni jecuiñi yití de ni jicān tahú de, te ni nandió cóto de nuū catú ndíyí ún, te ni cahān de:

Tabita, ndocuiñi ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. ⁴¹ Te ni jni de ndaha ña, te ni ndonehen de ña. Yūcuán na te ni nacana de xiní ñayuu cá candíje nde jín ñahan viuda ni ndívicoo i, te ni steén de ña nuū i jeē ní natecu ña. ⁴² Te ni jitē jnúhun jniñu yáha ní ñuu Jope cuahān, te cuehē ñayuu ni cá candíje i jnúhun máá Jítoho yō. ⁴³ Te cuehē quiví ni ndōo Pedro ini ñuu Jope, néne de vehe ñin tēe sáha curtir ñi, nání de Simón.

Pedro jín Cornelio

10

¹ Te ini ñuu Cesarea ni ñyo ñin tēe nání Cornelio, ni cuu de capitán grupo soldado jeē naní Italiano. ² Te cúu de tēe ndíso ñyo nuū Yaā Dios nde jín ndíhi ñayuu vehe de, te yōhyo caridad ni tēe cúu de, chi jéhe de xūhun núū ñayuu hebreo cándoho ndáhú, vésú nasūu tēe hebreo cúu de. Te níni jicān tahú de nuū Yaā Dios. ³ Te ñin quiví ni steén ndi-jin yā nuū tēe yáha nájnūhun

cahunī jehíni, te ni jito de jeē ñn ndajéhé maá Yáa Dios ni quiví ya nuū néne de. Te ni cahān yā jíin de:

Cornelio, achí yá.

⁴Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jicán tahu rō jíin jēé sáha ró caridad. ⁵Vijna te tají ró jecu tēe na quíngoo de nde ñuu Joje, quicana de Simón jeē suni nání de Pedro, na quíji de. ⁶Chi néne núu de vehe to-cayo de Simón, tēe sáha curtir ñii, te ndéé vehe ún yajni yumar. Te máá de castūhun núū rō na vé cúu inga jeē cánuú sáhá ró, achí ndajéhé yā.

⁷Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñn soldado jeē yíñuhún núū Yaā Dios, chi cúcáhnú ni de jeē squícu vāha tēe ún. ⁸Te ni nacani ndihi de jnūhun nuū tāca tēe ún, te ni tají de cuan-goo nde ñuu Joje.

⁹Te inga quiví un cájica de ichi cuangoo de, te cuacuya-jni de ñuu Joje. Te je yajni cahuxí uū cúu, te suu hora un ní caa Pedro siquí véhe chi cándaā, te yūcuan cácan tahu de. ¹⁰Te ni quee sōco chīji de, te ni cuni de caji de staā. Te sáá cásáha ña ndeyu te ni steén ndijin yā nuū de. ¹¹Te ni jito de jeē núne andiví. Te ni jito de nájñuhun ñn sahma manta jité cáhnú te núhni jnáhan ndicúún punta,

te ni cuun vēji nuū de. ¹²Te chīji un cáñuhun ndinuū quití, tācá quití cúún ndaha jíin tāca cōó jíin tāca quití cándava. ¹³Te ni jini sōho de ñn jnūhun ni cahān:

Pedro, ndocuiñi te cahni rō tācá quití jíñā, te caji rō tí, achí.

¹⁴Te ni cahān Pedro:

Ma cáji na, Tátā, chí tu yéji cuiti na tāca quití jeē cahán ley ni jēé tú vāha caji na tí, chí nájñuhun jeē tu cáhīyo ndoo tí nuū ní, achí de.

¹⁵Te ni cahān tucu jnūhun un jíin de:

Achí rí jeē iyó váha caji rō tācá quití jíñā, chí ni sándoo rí, te ma cahán maá ró jeē tu cáhīyo ndoo tí, achí. Te súcuan ni steén caji yá nuū de jeē cúu quihín de nuū ñáyuu vésú násūu jnáhan ñuu de hebreo cúu.

¹⁶Te uní jínu ni cahān súcuan jíin de. Te sahma un ní ndaa cuanuhun andiví. ¹⁷Te níni nácani ndasí ni Pedro na vé cuní cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹Te níni nácani ga ni Pedro siquí jeē ní jito ndijin de ún, te Espíritu Santo ni cahān yā jíin de:

Ni quecoo uní tēe cánanducú rōhó. ²⁰Ndocuiñi te nanuu ró, te ma cáni ni rō jeē tú vāha quihín rō jíin de, vésú násūu jnáhan ñuu rō hebreo cácuu de, chí máá rí ni tají rí de vējicoo de, achí yá.

²¹ Yūcuán na te ni nanuu Pedro nuū téé ni tají Cornelio, te ni cahān de:

Máá ná cúu tēe cánanducú ní. ¿Te na siquī vējicoo ní nuū na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sãñá. Te tēe ndaā, tēe ndíso Iyo nuū Yaā Dios cúu de, te táca ñáyuu hebreo suni cácahān i jeē téé vāha cúu de. Te ni cahān ñn ndajéhé yā jíin de jeē na cána de níhín jéé ní vehe de te chusóhó de jñūhun cahān ni jíin de.

²³ Yūcuán na te ni cahān Pedro jíin mozo un jéé na cúcōo de ini vehe ún, te ni candōo de yūcuán. Te nuū ní cundi-jin, te ni quihin Pedro ichi cuahān de jíin mozo un. Te suni cuango jecu hermano cácañíje ñuu Jope jíin de.

²⁴ Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de táca jñáhan de jíin táca amigo de jeē quijnáhan vāha ga de jíin. ²⁵ Te nuū ni jínū Pedro jijnáhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú.

²⁶ Te Pedro ni ndonehen de Cornelio, te ni cahān de:

Ndocuiñī ní, chi sãñá suni ñn tēe-ni cúu ná, áchí de.

²⁷ Te cándajnūhún de ni quivīcoo de ini vehe. Te ni jito Pedro jeē cáyūcu cuéhē ñayuu ini vehe de. ²⁸ Te ni cahān Pedro jíin ñáyuu ún:

Je cájini vāha ni jíjnáhan ní jéé ley jeē cánevāha sãña ñáyuu hebreo, cáhán jeē tú

vāha jeē quijnáhan ná jíin ní quivīcoo ná vehe ní siquī jeē cúu ní ñáyuu sãn nación. Te Yaā Dios chi ni steén yā nuū na jéé ma cujéé ni na núu ní ñn ñayuu. ²⁹ Jeē yúcuan cúu jeē vēji-ni ná, chi ni cana ní sãña, te tu ní sájéé ni ná. Te na cájnūhun ná nihín, ¿na siquī ni cana ní sãña? áchí Pedro.

³⁰ Yūcuán na te ni cahān Cornelio:

Vijna iyó cúun quivī nájñūhun máá hora yáha jéé cúu cahunī jehíni, te ndite ni ná chi súcuan chiñúhún ná nuū yā, te jicán tahú na ini vehe ná. Te ni quiji ñn ndajéhé yā nuū ná, te ndíndéé sahma ñūhún ya. ³¹ Te ni cahān yā jíin ná: Cornelio, je ni jini sōho Yaā Dios jeē jicán tahú rō, te chíhi ya cuenta jeē sáha ró caridad. ³² Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ññ, te yajni yumar ndeé vehe de. Te quee tēe ún te castūhún de nuū rō jñūhun cánuú, áchí yá jíin ná. ³³ Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jéé véji ní. Te vijna ni candutútú ná yāha návāha táca ná cuni sōho ná ndíhi jñūhun Jitoho yō Yaā Dios jeē ni jéhe ya cahān ní, áchí de.

Jeé ní nacani Pedro jñūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jēē Yaā Dios inuú-ni sáha ya jín táca ñáyuu, cúu ñayuu hebreo jín ñáyuu táca gá nación.³⁵ Chi cúsi ni yā jín ñáyuu táca-ni nación núu cándiso iyo i nuū ya te cásáha i jniñu ndaā.³⁶ Chi ni cahān yā jín ñáyuu Israel jeē ndívicoo táca ñáyuu nuū jnúhun manī yā jín i sáha Jesucristo. Te máá yá cúu Jitoho táca yóhó.³⁷ Máá ní je cájini ní ndese ni cuu. Chi ná ni jīnu ni nacani Juan jnúhun jín jēē ni scuándute de ñayuu, te ni quejéé Jesús nacani ya jnúhun nde Galilea, te ni jitē jnúhun un ní cáhnu Judea.³⁸ Te cájini ni jēē Yaā Dios ni jēhe ya Espíritu Santo jín poder nuū Jesús, Yaā ní jehnu ñuu Nazaret. Te cájini ni jēē ní jica cuu ya ni sáha ya jniñu váha, te ni nasávāha ya táca ñáyuu jeē cándoho i sáha jexeén, chi Yaā Dios ni chindéé ñáhán yá Jesús.³⁹ Chi máá ná canacani cájī ná jnúhun táca jniñu ní cajito ná ní sáha ya ní cáhnu Judea jín ini ñuu Jerusalén. Yūcuán na te ni cajehni i ya, chi ni cata caa i ya jicā cruz.⁴⁰ Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios.⁴¹ Te tu ní quíji ya nuū táca inga ñayuu, chi nuū maá-ni táca ná jeē jé ni nacāji Yaā Dios sãña jēē nacani ná jnúhun táca jniñu jeē ní cajito ná. Chi ni cayeji na stáa ni cajihī ná ndute jín yá ná ni nane ya jeē ní natecu yā.⁴² Te

ni ndacu ya jniñu nuū na jínáhan ná jēē na nacani ná jnúhun ya nuū táca ñáyuu te cahān cají ná jeē maá Yáā Dios ni jeni ya Jesús jeē sándaā yā jniñu ñayuu cátecu jín ñáyuu ní cajihī.⁴³ Chi jnúhun Jesús cúu jeē ní cacahān táca téē ni canacani jnúhun Yaā Dios nde jenahán. Chi ni cacahān de jeē táca ñáyuu jeē candíje i Jesús, cone cáhnu ni yā nuū cuéchi i, áchí Pedro.

Jeē ni quivī Espíritu Santo ini anuá ñayuu jeē násūú hebreo cácuu

⁴⁴ Te níni cáhán gā Pedro táca jnúhun yáha te ni quivī-ni Espíritu Santo ini anuá táca ñáyuu cájini nahín jnúhun ya jeē cahán de.⁴⁵ Te tēe hebreo jeē ni jínūcoo jín Pedro jeē suni cácandíje de Jesús, nahán ní canaa ni de ni cajito de jeē suni ni quivī Espíritu Santo ini anuá ñayuu jeē násūú hebreo cácuu.⁴⁶ Chi ni cajini sōho de cacahān ñayuu un sán yuhu, te cacahān i jeē yōhyo cújehnu Yaā Dios.⁴⁷ Yūcuán na te ni cahān Pedro:

¿Ndé in casi jeē ma cuándute ñayuu yáha? Chi ni quivī Espíritu Santo ini anuá maá i, nájnūhun ni quivī ya ini anuá maá yó, áchí de.

⁴⁸ Te ni cahān de jín i jeē na cuándute i siquī jeē ní candíje i Jesucristo. Yūcuán na te ni cacahān ndahú i jín Pedro jeē na quéndō de jecu quivī jín i.

Jeē ní nacūaha Pedro cuenta nuū ñáyuu cácandíje ini ñuu Jerusalén

11

1 Te tēe apóstol jín táca hermano cáyucú Judea, ni canihín de jñuhun jeē súni ñayuu sín nación ni cacandíje i jñuhun Yaā Dios. 2 Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

3 ¿Najehē ni condee ní vehe ñayuu jeē násūu ñáyuu nación yō cúu? Te ni yeji ní jín i, áchí.

4 Yūcuán na te ni nacani cájí Pedro jñuhun nuū tēe ún ndihi ndese ni cuu siquī tēe sín nación:

5 Néne ná ñuu Jope. Te níni jícán tahu na, te ni steén ndijin yā nuū ná, te ni jito ná nájnūhun in sahma manta jité cáhnu jeē nuhní jnáhan ndicúún punta, te nde ichi ándiví ní cuun ni quiji nuū ná.

6 Te ni jito vāha ná, te ni jini na jēe chíji un cáñuhun quití cúun ndaha jín quití xéén jín cóo jín quití cándava. 7 Te ni jini sōho ná in jñuhun ni cahān jín ná: Pedro, ndocuiñi te cahni rō táca quití jiñā, te caji rō tī, áchí jini ná. 8 Te ni cahān ná: Ma caji na, Tátā, chi tu yéji cuiñi na táca quití jeē cahán ley ni jēe tu cáhīyo ndoo tī nuū ní, áchí ná. 9 Yūcuán na te jñuhun jeē véji nde andiví ní cahān tucu jín ná: Ni sándoo máá rí tī, te ma cahán gā rō jeē tu cáhīyo ndoo tī, áchí jini ná. 10 Te unī jínu ni cahān súcuan. Yūcuán na te ni ndaa sahma un cuánuhun andiví.

11 Te hora un ní jinūcoo unī tēe vehe nuū ni cóndee ná un, cánanducú de sañá, te in jnáhan ñuu de Cesarea ni tají

de vējicoo de. 12 Te máá Espíritu ni cahān yā jín ná jeē ma cáni ni na jēe tú vāha quihín na jín de. Te suni inū hermano yáha ní jengoo jín ná, te ni quivicoo ná ini vehe tēe nání Cornelio. 13 Te tēe un ní nacani de jñuhun nuū na jínáhan ná jēe ní jito de in ndajéhé Yaā Dios, índichi yā ini vehe de, te ni cahān yā jín de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. 14 Te tēe ún cachi de nuū rō ndese jnama Yaā Dios rohó jín ndihi ñayuu cáyucú vehe ró, áchí yá. Achí Cornelio jín ná. 15 Te nuū ní quejéé ná cahán na, te ni quivi-ni Espíritu Santo ini anuá i jínáhan i, nájnūhun ni quivi ya ini anuá maá yó xīhna gā. 16 Yūcuán na te ni nucūhun ni na jnúhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te rohó jínáhan ró chi nájnūhun cuandute ró jín Espíritu Santo, cúu jeē cóndee yā ini anuá rō, áchí yá. 17 Te suni ni jēhe Yaā Dios Espíritu yā nuū maá i nájnūhun ni jēhe ya nuū maá yó jeē cácandíje yó Jítoho yō Jesucristo. Núu súcuan ¿te ndé in cúu ná jēe cási ná jniñu jeē sáha Yaā Dios? áchí Pedro.

18 Súcuan ni cajini sōho de jñuhun yáha, te tuá ni cácahān de nuū Pedro, chí sa suhva ni cacahān de jeē yóhio cújéhu Yaā Dios. Te ni cacahān de:

Suni ni jēhe Yaā Dios jñuhun jeē na nacani ni ñayuu táca gá nación jeē stóo i cuēchi i

návāha cotecu i ní cáni núu súcuan, áchí de.

Ñayuu cácanđije ini ñuu Antioquía

19 Te quiv̄ ní cajehni de Esteban ni quejé de cájito xeēn de ñayuu cácanđije, te jeē yúcuan ní cajitē núu ñayuu un táca ñuu cuango i, te ni jinūcoo i Fenicia jín Chipre jín ñuu Antioquía. Te ni canacani i jñuhun vāha ya nuū máni jñahan hebreo i jeē cáyūcu yúcuan, te tu ní canacani i jñuhun ya nuū ínga ñayuu. 20 Te jecu tēe cácanđije jeē cáyūcu Chipre jín ñuu Cirene ni jinūcoo de ñuu Antioquía, te suni nuū ñayuu tācá nación jeē tu cájini i jñuhun ya ni canacani de jñuhun máá Jítoho yō Jesús jeē jñama ya i. 21 Te máá Jítoho yō ni chindéé ñáhán yá de, te cuehē ñayuu ni castóo i jniñu jeē tu íyó ndāā te ni cacandije i máá Jítoho yō.

22 Te ñayuu cácanđije ini ñuu Jerusalén ni cajini jñuhun i, te ni catajī i Bernabé cuahān de nde ñuu Antioquía. 23 Te nuū ni jínū Bernabé yūcuán, te ni jini de jeē yóhyo vāha ni sáha Yaā Dios jín i, te ni cus̄ ndasí ni de. Te ni stihv̄i ni de táca ñayuu un jēe jín ini jín ánuá i na cóndihv̄i ni i squícu vāha i nuū máá Jítoho yō, te ma náyūhú i. 24 Chi tēe vāha cúu Bernabé, te ni cunuú Espiritu Santo jín de, te cándije ñihin de. Te ni cacandije cuehē ñayuu nuū máá Jítoho yō ni sáha de.

25 Yūcuán na te cuahān de nde ñuu Tarso cuananducú de Saulo. Te ni nanih̄n jñahan de jín Saulo, te ndéca de tēe un ní ndee de ñuu Antioquía. 26 Te ní ñin cuiyā ni candutútú de jín ñayuu cácanđije yūcuán, te ni castéén de jñuhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano siquī jeē ní cacandije i Cristo.

27 Te suni tiempo un ní quendacoo tēe canacani jñuhun Yaā Dios ñuu Jerusalén cuango de nde ñuu Antioquía. 28 Te ñin jñahan de jeē naní Agabo ni ndocuiñi nuū hermano cácanđije. Te ni steén Espiritu Santo nuū de, te ni castūhún de jeē cóo ñin jnamā xeē ní cáhnu. Te ni cuu jnamā ún ñin parte tiempo jeē ní ndacu Claudio jniñu jeē ní cuu de rey. 29 Yūcuán na te ni candajñuhun tēe cácanđije ñuu Antioquía jeē cuáha ñin ñin de naśaa canda de cuāha de te tajī de quih̄n cotecu hermano cáyūcú Judea. 30 Te súcuan ni casáha de. Te ni catajī de Bernabé jín Saulo ni cajendéca de nuū tēe jéhnu cándiso jniñu nuū ñayuu cácanđije cáyūcú Judea.

Jeē ní jehni Herodes Jacobo, te ni chune de Pedro vecāa

12

1 Te suu tiempo un ní quejé rey Herodes jito xeēn de sava ñayuu cácanđije. 2 Te ni ndacu de jniñu jeē jín espada na cáhni i Jacobo ñani Juan.

³ Te ni jini de jeē ní cacusiñ ni tēe hebreo jeē ni sáha de súcuan, te jeē yúcuan suni ni jñi de Pedro. Te máá quiví un ní cuu vico jeē yéji ñayuu pan jeē tu yíhi levadura. ⁴ Te nuū ní jñi de Pedro, te ni chune de vecāa, te ni jeni de cuūn grupo soldado jeē cóndito Pedro, cuūn cuūn soldado cúu jeē ññ grupo. Chi cúni Herodes jeē na yáha vico un jéē cúu vico pascua te quenehen de Pedro vecāa un stéén de nuū ñáyuu cuehē. ⁵ Te súcuan íne Pedro vecāa, te cándito soldado un de. Te ñayuu cáncandije chi ñihin ni cājicān tahu i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cúndijin inga quiví te quenehen de Pedro vecāa, te stéén de nuū ñáyuu un núu. Te núhni Pedro jín úu cadena, catú de quixí de mēhñu úu soldado jecuáa ún, te suni cáhīn ga soldado cándito yéhyí vecāa ún. ⁷ Te suu jecuáa ún te sanaa-ni te ni jinū ññ ndajéhé máá Jítóho yō, te ni ndindēé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñi rō, achí yá.

Te cadena nuhni ndaha de un ní canandaji-ni. ⁸ Te ni cahān ndajéhé yā jín de:

Nacuhni ñihin chíji ró, te nuquíhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jín de:

Condii ticāchi ró, te condiquin rō ruhū na quihín yō, achí yá.

⁹ Te ni quenda de ndíquín de ya cuahān de jín yá, te jéni ni de jeē násūu jéndaá cúu jeē sáha ndajéhé yā jín de, chi jéni ni de jeē ññ jeē ni stéén yā jito ndijin de cúu. ¹⁰ Te ni yāha ya jín de uū nuū cándito soldado. Te ni jinū yā jín de yéhyí cáa nuū quenda de caca de calle, te yéhyí un ní nune iñ-ni máá. Te ni quenda ya jín de, te ni yāha de ññ calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducáji ni Pedro te ni cahān máá ní cahān ññ de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jín núu tāca ñáyuu hebreo jeē cácuni i sáha xeēn i jín rí nuú, achí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhīn tútú cuehē ñayuu cājicān tahu i jehē Pedro. ¹³ Te cáhān Pedro ni jinū de yéhyí fuera, te ññ sūchi síhi nání Rode cuahān i jeē cúni i núu ndé ññ cúu jeē cahān. ¹⁴ Te ni nacuni i tachī Pedro, te jeē ní cusñ ni i te tu ní nune i yéhyí un, chi ni nandió cóo i te jínu i ni ndiví i ini cuarto. Te ni castūhún i jeē ní quee Pedro índichi de yéhyí fuera. ¹⁵ Te ni cacahān jín i:

Jeē cahān neé ró, achí.

Te máá i ñihin cáhān i jeē máá de cúu. Yūcuán na te ni cacahān:

Ndajéhé yā jeē ndító Pedro cúu núu súcuan, áchí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i.

¹⁷ Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núū Jacobo jíin núū tāca gá hermano jeē ní quenehen ya ruhū vecāa, áchí de.

Te ni quenda de cuahān de inga lugar.

¹⁸ Te nuū ní cundijin, te ni cacuvaā teyí soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jihī Herodes

²⁰ Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnūhún i jeē inuú-ni quīvicoo ndihī i nuū rey un. Te ni casáha i amigo i jíin Blasto, tēe cújéhu jéjníñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chi nde ñuu máá rey un cájeen i jeē cáyeji i. ²¹ Te ni jeni Herodes in quīvī. Te ni nucūhun de sahma yíñuhún de, te ni cucōo de mesa nuū ndácu de jniñu, te

ni cahān de in jnūhun jehū ni cajini sōho i. ²² Te ñayuu un ní caquejéé i cácahān jee i jnūhun yíñuhún jíin de:

Nasūu tēe-ni cúu ní, chi in yaā cúu ní, áchí i jijnáhan i.

²³ Te máá hora un ní sáha-ni in ndajéhé maá Jítóho yō jeē ní jni in cuehyī xeēn rey Herodes, te ni cayeji tindácú de, te ni jihī de, chi ni sandúxi-ni de máá de te tu ní cáhán de jeē Yaā Dios cúu jeē cujéhu.

²⁴ Te ni jitē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jīnu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ni caquejéé Bernabé jíin Saulo caca cuu de nacani de jnūhun ya

13

¹ Te mēñu grupo ñayuu cácaandíje ini ñuu Antioquía ni cahīyo tēe cástéén jíin tēe cánacani jnūhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea. ² Te in quīvī jeē cáhīyo ndite ni tēe yáha cáchiñuhún de nuū máá Jítóho yō, te ni cahān máá Espíritu Santo jíin de:

Cúní rī jeē sasín ró Bernabé jíin Saulo na quíngoo de jniñu jeē ní jeni ri de, áchí yá.

³ Yūcuán na te ni cajicān tahu ndite ni de, te ni casoó de ndaha de xinī Bernabé jíin Saulo, te súcuan ni catajǐ de ndindúú téé ún cuanacani de jnūhun nuū tāca ñáyuu.

Jeē ní canacani Bernabé jíin Saulo jnūhun ya nde Chipre

⁴ Te ni sáha Espíritu Santo jeē íchi ñūū Seleucia cuango de. Te yūcuan ní quívicoo de in barco cuango de nde Chipre, ñuhun jeē íne sñn nuū ndúte. ⁵ Te ni jinūcoo de ñuu Salamina nuū cájecuiñī barco, te ni canacani de jnūhun Yaā Dios ini tācá vehe īi sinagoga jnahan hebreo de. Te suni cuahān Juan chindéé ñáhán jíin de. ⁶ Te ni cajica nuu de nñ-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū in téē hebreo nání Barjesús. Te téē tásí cúu de, te cáhán stahú de jeē in téē nácani jnūhun Yaā Dios cúu de. ⁷ Te téē tásí un jéjníñu de nuū gobernador Sergio Paulo, te téē ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios. ⁸ Te téē tásí un suni nání de Elimaş. Te ndúcú ndéyí de casí de jeē ma cándije gobernador ún. ⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū téē tásí un. ¹⁰ Te ni cahān de:

Tēē sáha jniñu néé stahú ñáhán cúu ró, chí sēhe jexeén cúu ró te jésí rō nuū tācá jniñu ndaā. Te tu jécuiñī rō jeē sáca núu ró síquǐ jnūhun ndaā maá

Jítóho yō návāha ma cándije ñayuu nuū yā. ¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quiví, achí Pablo.

Te ni cunee-ni nuū téē tásí un, te quéndāha quéhiyú de cuahān de ndúcú de ndé vé jññ ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni cándije de jnūhun máá Jítóho yō, te náā ni de jíni sōho de jnūhun ya.

Jeē ní coyūcu Pablo jíin Bernabé Antioquía ndañúū Pisidia

¹³ Yūcuán na te ni quenda-coo Pablo jíin Bernabé jíin Juan ñuu Pafos, te ni quívicoo de barco te cuango de ñuu Perge ndañúū Panfilia. Te yūcuan ní cusñn Juan, te cuanhun de ñuu Jerusalén. ¹⁴ Te ni quendacoo Pablo jíin Bernabé ñuu Perge cuango de, te ni jinūcoo de ñuu Antioquía ndañúū Pisidia. Te quiví ndétātu ní quívicoo de ini vehe īi sinagoga, te ni cacucōo de. ¹⁵ Te ni cahu tutu ley yā jíin tutu ní cateē téē ni canacani jnūhun ya nde jenahán. Yūcuán na te téē cácujuhnu ini vehe īi sinagoga, vii-ni ni catajǐ de téē cahān jíin Pablo jíin Bernabé:

Amigo, núu iyó jnúhun cahān ni jéé stihví ni ni ñáyuu yáha, te cahān ní na cúni nahín i núu súcuan, achí de.

¹⁶ Yūcuán na te ni ndocuiñī Pablo te ni sáha de seña jíin ndaha de jeē nahín-ni coo ñayuu ún, te ni cahān de:

Níhín jnáhan ñuu yō Israel jíin níhín tée jeē suni cáchiñúhún ní Yaā Dios, cuni nahín ní jijnáhan ní. ¹⁷ Máá Yaā Dios yohó ñáyuu Israel, ni nacāji ya jíi yō jijnáhan de. Te níni jéē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. ¹⁸ Te uū xico cuiyā ni cajica de nuū ñúhun téhé, te ni jendeyí ni yā jíin de jeē ní castívi de. ¹⁹ Te ni snáa yā uxā nación Canaán, te ni jēhe ya ñuhun un núū táca jíi yō cúu tahū de. ²⁰ Yūcuán na te ni jeni ya táca tée ni candacu jniñu nuū de nájnūhun cuñ ciento uū xico uxí cuiyā, nde quiví ní cotecu Samuel, tée ni nacani jnūhun ya. ²¹ Yūcuán na te máá ñáyuu un ní cajicān i ñn rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jnūhun de: Cúsí ni rí jíin David sēhe Isaí, chí sáha de táca jéē cuní rí, achí yá.

²³ Te cáhán gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chí súcuan ni jejnūhun ya. ²⁴ Te nde ná tu quejéé Jesús nacani ya jnūhun nuū ñáyuu, te ni nacani Juan jnūhun nuū táca jnáhan ñuu yō Israel jeē na nacani ni i jeē stóo i cuēchi i, te cuandute i. ²⁵ Te nuū cuácuyajni jeē cúu

Juan, te ni cahān de: Cándētu ró jéē quíji Cristo, te jeni ni rō jeē ruhū cúu, te nasūu rí cúu. Chí quíji ya, te cújéhnú ndasí yá jeē ni ndijēn yā tu cújéhnú ri tava rí, achí de.

²⁶ 'Amigo jijnáhan ní, táca níhín jéē cácuu yó sēhe yucūn Abraham jíin táca níhín jéē suni cándiso Iyo ní núū Yaā Dios, chí cuní Yaā Dios jeē na cuní yō jnūhun yáha jeē cáhán ndese jnáma ya yohó. ²⁷ Chí táca ñáyuu ñuu Jerusalén jíin táca tée cácujehnú nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahān quiví ndétātu ní cajini sōho i jnūhun ni cacahu jeē ní catee tée ni canacani jnūhun Yaā Dios nde jenahán. Te vésú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquí táca jnūhun jeē ní cacahān tée ni canacani jnūhun ya nde jenahán. ²⁸ Vésú tu ní cánihín i ni ñn cuēchi siquí yā jeē cúu yā, te ni cacahān níhín i jíin Pilato jeē na cúu yā. ²⁹ Te ná ni jíinu ni squícu siquí yā táca jnūhun cáhán nuū tútu íi, te ni casnúu de ya jicā cruz, te ni cachindūji de ya ñn yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñáyuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quiví ná ni natecu yā, te ñáyuu un cácuu jeē cánacani cají jnūhun ya nuū táca gā jnáhan yó he-

breo vijna.

³² Te máá ná jijnáhan ná cánacani ná jnúhun vāha yáha núu ni jijnáhan ní jéē súcuan ni jejnūhun ya nuū tāca jíí yō. ³³ Te jnúhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jíín Séhe ya Jesús: Máá ró cúu Sēhe ri, te vijna ni sajhēnu ri rohó jéē cúu ri Tatá rō, achí yá. ³⁴ Te ni nastécu yā Séhe ya Jesús návāha ma tehyú cuiti yā, chi suhva cáhán tutu íi jeē ní cáhān Yaā Dios nde jenahán: Te nihīn maá ró tāca jéē váha ni jejnūhun ri nuū David, achí. ³⁵ Te suni súcuan cáhán inga salmo jeē ní tee David jnúhun jeē cahán Jesús jíín Yāā Dios: Ma cuáha ni jnúhun tehyū ná, chi jéjníñu ná núu ní te maní ni jíín ná, achí. ³⁶ Te David chí jíín yō jeē ní jejníñu de nuū ñayuu ní cotecu de jíín, nájnūhun ni cuni Yaā Dios. Te ni jihī de, te ni quindūji de nájnūhun ni quindūji tāca jíí yō, te ni tehyū de. ³⁷ Te Jesús, Yaā ní nastécu Yaā Dios, chí tu ní téhyú cuiti yā. ³⁸ Jeē yúcuan jíni ñúhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. ³⁹ Chí ni canducú ní ndahva ni cuéchi ní jéē squícu ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndihi cuéchi ñayuu jeē cácandíje í tāca jéē ní sáha ya jehē í. ⁴⁰ Núu súcuan te coto ní jijnáhan ní jéē ma ndóho

ní táca castigo jeē ní cacahān tēe ni canacani jnúhun Yaā Dios nde jenahán, chí suhva ní cahān Yaā Dios:

⁴¹ Tāca rōhó ñayuu jeē casacatā, na cóto ró na castigo xeēn quiji siquī rō,

te naa ni rō coto ró, te cuu rō. Chi tiempo maá ró te sáha ri jniñu xeēn

jeē ma cándíje cuiti rō jeē súcuan sáha ri vēsú nacani ñayuu jnúhun un núu rō, achí yá.

Achí Pablo.

⁴² Te ní quendacoo Pablo jíín táca jnáhan de vehe íi sinagoga jnáhan hebreo de. Te ñayuu sín nación ní cacahān ndahú í jíín de jeē inga quivī ndétátú nacani tucu de jnúhun yáha núu í. ⁴³ Te ní jité ñayuu un cuángoo í. Te cuehē ñayuu hebreo jíín ñayuu sín nación jeē ní cacandíje sahān hebreo te cáchiñúhún í nuū Yaā Dios, cuangoo í jíín Pablo jíín Bernabé. Te ní cacahān nīhin de jíín í jeē na cuíñi nīhin í jíín jnúhun jeē maní Yaā Dios jíín í.

⁴⁴ Te quivī ndétátú inga semana te je yajni ndihi ñayuu ñuu un ní candutútú í jeē cúni nahín í jnúhun Yaā Dios. ⁴⁵ Te nuū ní cajini tēe hebreo jeē ní candutútú cuehē ñayuu, te ní cacucuésún ni de, te ní cacahān de jeē násūu jnúhun vāha cúu jeē steén Pablo, te ní cacahān neé de nuū Pablo. ⁴⁶ Yūcuán na te jéhnū-ni ní cacahān Pablo jíín Bernabé, achí de:

Cánuú jéē xíhna gā nuū maá ní jeē cácuu ní jnáhan ñuu yō

hebreo nacani ná jnúhun Yaā Dios, te tu ní cájetáhú ní. Núu súcuan te cuēchi máá ní cúu jeē ma nihín tahú ni cotecu ni ní cáni. Te vijna te quinacani ná jnúhun ya nuū ñáyuu tācá nación jeē tu cájini i jnúhun ya. ⁴⁷ Chi suhva ni ndacu máá Jítóho yō jniñu nuū na jíjnáhan ná:

Ni jeni ri rohó jéē cúu ró nájnúhun luz jeē steén ini anuá ñayuu tācá nación,

chi ní ñayīvi steén rō jnúhun ri nuū ñáyuu jeē jnáma ri i, áchí yá.

Achí de.

⁴⁸ Te ñayuu sín nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhyo vāha jnúhun cúu jnúhun máá Jítóho yō, te tāca ñáyuu jeē ní nacāji Yaā Dios i jeē cótecu i ní cáni, ni cacandíje i. ⁴⁹ Te ni jite jnúhun máá Jítóho yō cuahān ní región yūcuán. ⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujuhnu ñuu ún, te ni cajito xeēn i Pablo jíjn Bernabé te nde ni cascúnu i de cuango de. ⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñayuu cacandíje un ní cunuú Espíritu Santo jíjn i, te cacusiñ teyí ni i.

14

¹ Te ñuu Iconio ni quīvicoo Pablo jíjn Bernabé ini vehe iī sinagoga jnáhan de hebreo. Te jíjn jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sín nación ni cacandíje i. ² Te jnáhan de hebreo jeē tu ní cacandíje, ni cascáhán de ñayuu sín nación, te ni cajeni ni i jeē násūu ñayuu váha cácuu ñayuu cacandíje. ³ Te ni caquendōo Pablo jíjn Bernabé yūcuan cuéhē gā quīvī. Te jénu-ni ni canacani de jnúhun Jítóho yō, chi cácuahnu ni de ya jeē váha quihín jniñu un sáha ya. Te máá yá chi ni steén yā jeē iyó ndáa jnúhun jeē yōhyo vāha ni yā jíjn i jeē cánacani de, chi ni jēhe ya jeē sáha de jniñu jénu jeē steén jeē cujénu ya. ⁴ Te ñayuu ñuu un ní cacusiñ ni i jíjnáhan i, sava i jíjn tēe hebreo jeē tu cacandíje de Jesús, te sava ga i jíjn tēe apóstol. ⁵ Te ñayuu hebreo jíjn ñáyuu sín nación jíjn tēe cácuu tohō ni casquijnáhan jnúhun jeē sáha xeēn jíjn Pablo jíjn Bernabé, jíjn jéē cuáha yuū xinī de núú. ⁶ Te ni cajini de jeē súcuan cácuu sáha, te ni cajinu de cuango de nde ñuu Litra jíjn ñuu Derbe ndañū Licaonia jíjn táca ñuu yajni yūcuán. ⁷ Te yūcuan ní canacani de jnúhun jeē jnáma ya yohó.

Jeē ní coyūcu Pablo jíjn Bernabé ñuu Iconio

Jeē ní cajēhe i yuū xinī Pablo ini ñuu Litra

⁸ Te ñuu Listra néne ñn tēe jeē tu cúu caca, te tu jíca cuiṭi de chi nde quiṽi ní cacu de cácójó de. ⁹ Tēe un ní jini sōho de jnūhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jēe ndúvāha de. ¹⁰ Te ni cahán jee Pablo jíin de:

Ndocuiñi, condichi rō, achí de.

Te ni scánda tēe un máá de ni nucōndichi-ni de, te ni quejé de caca de. ¹¹ Te ni cajini ñayuu ún jniñu jéhu jeē ni sáha Pablo, te ni cacahán jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, áchí i.

¹² Te ni cacahán i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnūhun. ¹³ Te yajni yuñúu un néne veñūhun yaā Júpiter. Te máá sūtū jejniñu ini veñūhun un ní quihin de stiṭiqui jijnáhan ti te ni scutú de ti ita te vēji de nde nuū quiṽi i yuñúu, te máá de jíin ñáyuu ñuu un cácuni de cahni de stiṭiqui un sócō de nuū Bernabé jíin Pablo nuú. ¹⁴ Te Bernabé jíin Pablo, tēe cácuu apóstol, ni cajito de jeē súcuan cácuni ñayuu un sáha i, te ni candatá de sahma de jeē steén de jeē castívi ndasí i jeē casáha i súcuan. Te ni quenendava de ni quiṽicoo de mēhñu ñáyuu cuehē ún, te ni cacana jee de:

¹⁵ Tátā jijnáhan ní, ma sáha cuiṭi ni súcuan, chi sãñá suni tēe-ni cácuu ná nájnūhun máá

ní jijnáhan ní. Te vējicoo ná nacani ná jnūhun vāha Yaā Dios nuū ní, chi cahán na jíin ní jeē ma sáha ga ni táca jniñu yáha jēe tu ndé jéjniñu cuiṭi, chi sa suhva na chíñúhún ní maá Yáa Dios, Yaā técu, Yaā ni sáha andiví jíin ñáyivi jíin ndute mar jíin táca gá jeē iyó ní cáhnu. ¹⁶ Te nde jenahán ní jēhe ya jnūhun jeē na sáha táca ñáyuu modo cácuni máá i. ¹⁷ Te vēsú súcuan te níni stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo sñi ni yō, achí ndindúu de.

¹⁸ Te vēsú súcuan ni cacahán de, te yōhyo uhū ni cajesi de nuū ñáyuu un návāha tú socō i stiṭiqui un núu de jeē chíñúhún i ndindúu de.

¹⁹ Yūcuán na te ni quecoo jecu tēe hebreo ñuu Antioquia jíin ñuu Iconio, te ni cascáhán de ñayuu cuehē ún, te ni cajēhe i yuū xiní Pablo. Te ni caquenehen i de yatā ñúu ún, chi ni cajeni ni i jeē jé ni jihí de. ²⁰ Te tēe cácandíje ni cacondúu de Pablo, te ni ndonda Pablo, te ni ndívi de ini ñuu. Te inga quiṽi ni quihin de ichi cuahán de jíin Bernabé nde ñuu Derbe.

²¹ Te ini ñuu un ní canacani de jnūhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanuhun de ñuu Listra jíin ñuu Iconio jíin ñuu Antioquia. ²² Te ni cahije ga ni ñayuu cácandíje yūcuan ní casáha de. Te ni castíhví ni de i jeē na cuiñi nihin i jíin

jnúhun ya, chi ni cacahān de jeē niní quiji cuehē jnūndóho siquī yō te yūcuán na te jinū yō ñuu nuū ndácu Yaā Dios jniñu. ²³ Te tācá ñuu ni caji de tēe jéhu cándiso jniñu condito de ñayuu cácadíje. Te ni cahīyo ndíte ni Pablo jíin Bernabé nuū yā, te ni cajicān tahu de, te ni cacahān de jíin máa Jítóho yō jeē na cóto ya ñayuu ún chi cácadíje i máa yá.

Jeē cuánuhun tucu Pablo jíin Bernabé ñuu Antioquía ndañúu Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jnūhun ya ini ñuu Perge región Panfilia, te sáa te cuango de ñuu Atalia. ²⁶ Te yūcuan ní quivicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chindéé ñáhán yá de jeē quíngoo de nacani de jnūhun. Te ni jīnu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jíin ñayuu cácadíje, te ni canacani de jnūhun tācá ndese cuehē jeē váha ni sáha Yaā Dios jíin de, chi ni jēhe ya jnūhun jeē suni candíje ñayuu tācá nación jeē tu ní cājini i jnūhun ya. ²⁸ Te ni caquendōo de yūcuan cuéhē quivī jíin ñayuu cácadíje.

Siquī junta ñuu Jerusalén

15

¹ Yūcuán na te jecu tēe Judea ni quijicoo de ñuu Antioquía, te ni castéen de nuū tācá hermano jeē núu tu sáha i circuncidar, nájnūhun cáhán ley jeē ni jéhe ya nuū Moisés, te tú na modo cācu i. ² Te Pablo jíin Bernabé ni catejnáhan de jíin tēe ún, te tu ní cūndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cácadíje un ndé ñuu Jerusalén, te yūcuán ndajnūhún de siquī jnūhun yáha jíin tēe cácu apóstol jíin tēe jéhu cándiso jniñu nuū ñayuu cácadíje yūcuán.

³ Te ñayuu cácadíje un ní canachuhun íchí i de. Te ni cayāha de ichi Fenicia jíin Samaria, te cánacani de jnūhun jeē suni ñayuu tācá gá nación jeē tu ní cājini i jnūhun ya, ni castóo i jniñu jeē tu íyó ndāā te ni cacandíje i Yaā Dios. Te yōhyo ni cacusiñi ni tācá hermano jeē ní canihīn de jnūhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cácadíje yūcuan jíin tēe apóstol jíin tēe jéhu cándiso jniñu nuū ñayuu un, ní cacusiñi ni de jeē ní najinūcoo jnáhan de ún. Te Pablo jíin Bernabé ni canacani de tācá jnūhun ndese cuehē jeē váha ni sáha ya siquī jniñu jeē ní canacani de jnūhun ya. ⁵ Te sava tēe grupo fariseo jeē cácadíje ni candocuiñi te ni cacahān:

Ñayuu sūn nación jeē cácadíje i Jesús, jíni ñúhún jéē

sáha i circuncidar nájñuhun cásaha máá yó, te cánuú ndacu yó jniñu nuū i jeē na squícu i ley jeē ni jēhe ya nuū Moisés, áchí.

⁶ Te tāca tēe apóstol jiín tāca tēe jēhnu cándiso jniñu nuū ñayuu cácañdije, ni candutútú de junta návāha ndajnūhún de te sándaā de síquī jñuhun yáha. ⁷ Te tācá de ni cacahān de ndese cájeni ni de. Yūcuán na te ni ndocuiñī Pedro, te ni cahān de:

Hermano jijnáhan ní, je cájini vāha ni jēe je íyó tiempo jeē ní nacāji Yaā Dios sãña jēe quihín na núū ñayuu sñn nación te nacani ná jñuhun nuū i jeē jnáma ya i, návāha candíje i Jesucristo. ⁸ Te Yaā Dios chi jini yā ndese cáa ánuá ndihī ñayuu, te ni steén yā jeē jetáhú yá i, chi suni ni jēhe ya Espíritu Santo nuū i jijnáhan i, nájñuhun ni jēhe ya nuū maá yó. ⁹ Te inuú-ni sáha ya jiín yó jiín máá i, chi síquī jeē suni ni cacandíje i jñuhun jeē jnáma ya i, te jeē yúcuán ní sándoo ya anuá i nuū tāca cuéchi i. ¹⁰ Te vijna žnaun cáconi ní ndacu ní jniñu jeē na squícu i ley un? Chi tu núnahan ni Yaā Dios jeē súcuán. Chi cáconi ní tee ní jniñu yí yáha síquī ñayuu cácañdije ún, te ni tāca jí yō tu ní cácuñdeyí de squícu de, te ni máá yó. ¹¹ Chi sa suhva cácañdije yó jēe jnáma ya yohó súcuán-ni síquī jeē yóhio vāha ni maá Jítoho yō Jesús jiín yó, te suni súcuán-ni jnáma ya maá i, nasūu síquī jeē squícu i ley un, áchí de.

¹² Yūcuán na te tēe cuehē

un ní cacuu nayúú de, te ni cajini nahín de jñuhun cácahān Bernabé jiín Pablo. Chi ni cacastūhún de jeē ni jēhe ya poder jeē ní casáha de tācá jniñu jēhnu jeē steén jeē cujēhnu ya, ni cajito ñayuu tācá nación jeē tu cájini i jñuhun ya. ¹³ Te nuū ni jinu ni cacahān Pablo jiín Bernabé, te ni cahān Jacobo:

Hermano jijnáhan ní, cuni sōho ní na cáhán na. ¹⁴ Ni nacani Simón Pedro jñuhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jñuhun ya, chi suni mēhñu máá i nacāji ya ñayuu jeē ndúu i ñayuu maá yá. ¹⁵ Te quijnáhan jñuhun ni cahān de yāha jiín jñuhun ni catee tēe ni canacani jñuhun Yaā Dios nde jenahán jeē yosó núu tútu i:

¹⁶ Achí Yáa Dios:

Nájñuhun ni cotúú vehe David cúu jeē tuá ndácu sēhe yucūn de jniñu,

nájñuhun ni ndacu máá de jniñu nde jenahán.

Te iñ quivī te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuán sáha ri návāha tāca gá ñayuu na nánducú i ruhū

nde jiín ñayuu tācá nación jeē tu cájini jñuhun ri, tācá i jeē cána ri i candíje i ruhū.

¹⁸ Súcuán cáhán maá Jítoho yō, te nde jenahán ní

steén yā jnūhun yáha
núū ñáyuu.

Achí tutu ì.

¹⁹ Jeē yúcuan jéni ni na jéē ñáyuu táca gá nación jeē ní castóo i jniñu jeē tu íyó ndáā te ni cacandíje i máá Yáā Dios, ma stáhān yō i jeē ndácu yó jniñu jeē squícu i ley Moisés.

²⁰ Chi sa suhva na téé yó carta quihīn nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñī tī, te ni ma cáji i niñī. ²¹ Jnūhun yáha-ni tee yó quihīn nuū i nájnūhun je cástéén nde jenahán. Chi nde jenahán je íyó téé cástéén jnūhun ley jeē ni jéhe ya nuū Moisés, te ndijnahan quivī ndétātu cácahu de ley un ini vehe ì ì sinagoga táca ñuu, áchí Jacobo.

²² Yūcuán na te tēe apóstol, jíin téé jéhnū cándiso jniñu, jíin ndivii ñáyuu cácaandíje, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga sihví de cúu Barsabás. Te cándiso jniñu de nuū táca hermano cácaandíje. ²³ Te ni cajendēca de carta jeē cahán suhva:

Máá ná cácuu tēe apóstol, jíin táca téé jéhnū cándiso jniñu nuū ñáyuu cácaandíje, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sín nación jeē cáyūcu ní ñuu Antioquía jíin Siria jíin Cilicia. Cuandeyí

ni ni jíjnáhan ní. ²⁴ Ni cajini jnūhun ná jéē ní quendacoo sava jnáhan ná yáha ní jengoo nuū ní, te jíin jnūhun jeē ní cacahān de te ni casáha jeē ní canacani ndasí ni ní, te ni cacuxí ni ní, chí cándacu de jniñu jeē sáha ní circuncidar jíin jéē squícu ní jniñu cáhán ley jenahán jéē ni jéhe ya nuū Moisés. Te nasūu sáña ní cátají téé un jéē jeé de nuū ní. ²⁵ Jeē yúcuan ní cajeni ni ná, te inuū-ni ni cacundaā ni ná, te ni nacāji ná téé cuajēcoo nuū ni jíin úū hermano yō jeē maní yō jíin, cúu Bernabé jíin Pablo. ²⁶ Te ndindúú de je ni catana de máá de nuū jnúndóho vēsú na cúu de jeē siquí jnūhun Jitoho yō Jesucristo. ²⁷ Núu súcuan te cátají ná Judas jíin Silas jeē nuū ní, te suni nájnūhun cáhán carta yáha suni súcuan castūhún de nuū ni jíjnáhan ní. ²⁸ Chi máá Espíritu Santo ni steén yā ñn modo jeē ní cacundaā ni na jéē ma téé ná táca jniñu yí ley Moisés siquí ní, chí máá-ni jniñu yáha jéē cánuú gá: ²⁹ Ma cáji ni táca jéē ní casocō nuū ídolo, ni ma cáji ni níñī ni quiti jeē jihí jeē tu jéti niñī tī, te ma cáca jnéni ní. Te vāha squícu ní núu tuá sáha ní táca jéē yáha. Súcuan na cóo te sándeýí ni ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ni cacana de xinī ñáyuu cácaandíje ni candutútú de junta, te ni cajéhe de carta un núu i. ³¹ Te ni cacahu i, te ni candusí ni i jeē ni níhīn i jnūhun ndeyí ni nuū carta ún.

³² Te suni tēe cānacani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tēcá hermano un, te ni cahije ga ni i jíin jnūhun ya. ³³ Te ni coyūcú de yūcuán jecu quivī. Yūcuán na te hermano yūcuan ní canacuatáhú i nuū de jeē quinhun de nuū tēe jeē ní catajǐ de. ³⁴ Te Silas ni nunahan ni de ni quendōo de yūcuán. ³⁵ Te suni ni caquendōo Pablo jíin Bernabé űuu Antioquía, te máá de jíin sava ga tēe ni castéén de te ni canacani de jnūhun vāha máá Jítóho yō.

Jeē quihín Pablo inga jíinu nacani de jnūhun ya

³⁶ Te ni cuu ga quivī, te ni cahān Pablo jíin Bernabé:

Vijna te na quícondēhe yó tēcá hermano yō ndijnahan űuu nuū ní nacani yó jnūhun máá Jítóho yō, na cóndēhe yó ndese cáhiyo i, áchí de.

³⁷ Te Juan jeē suni nání de Marcos, cúní Bernabé jeē quihín tēe un jíin de. ³⁸ Te tu ní cúní Pablo jeē quihín tēe un jíin de, chí nde Panfilia ni cusín Marcos nuū Pablo jíin Bernabé, chí tuá ni chindéé űáhán de ndíndúú tēe un síquǐ jniñu ya nde saá. ³⁹ Te nahán ní candajnūhun Pablo jíin Bernabé, te tu ní cácondaā ni de síquǐ Marcos, te ni cacusín de. Te Bernabé ni jeca de Marcos, te ni quívicoo de barco cuango de nde Chipre, űuhun jeē íne sín nuū ndúte. ⁴⁰ Te Pablo ni nacāji de Silas quihín jíin

de. Te tēcá hermano cácandíje ni cajicān tahu de nuū maá Jítóho yō jeē síquǐ jeē váha ni yā te na chindéé űáhán yá Pablo. Te cuahān Silas jíin Pablo. ⁴¹ Te ni cajica cuu de ní Siria jíin Cilicia. Te tēca grupo űayuu cácandíje ni cahije ga ni i jíin jnūhun ya ni casáha de.

Jeē cuahán Timoteo jíin Pablo jíin Silas

16

¹ Yūcuán na te sáá te ni jinū Pablo jíin Silas űuu Derbe jíin űuu Listra. Te yūcuan néne in tēe suchí cándíje, nání i Timoteo. Sēhe yí in űahan hebrea cúu i, te űahan cándíje cúu ña. Te tátá i chí tēe griego cúu de. ² Te tēcá hermano űuu Listra jíin űuu Iconio cácejnūhún de Timoteo. ³ Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chí tu cúní Pablo jeē cahān űayuu hebreo jeē tu ní síquǐcu Timoteo costumbre un, chí ndíhi űayuu cájini i jeē tēe griego cúu tátá i. ⁴ Te tēcá űuu nuū cuángoo de te ni cacastūhún de nuū űayuu cácandíje jeē na síquǐcu i máá jniñu jeē ní casándaā tēe apóstol jíin táca tēe jéhu cáyūcú űuu Jerusalén jeē cándiso jniñu nuū űayuu cácandíje. ⁵ Te űayuu cácandíje ni cahije ga ni i. Te ndijnahan quivī ni cacandíje cuéhē gā űayuu.

Jeē ní jito ndijin Pablo ñn tēe ñuu Macedonia

⁶ Te tu ní jéhe Espíritu Santo yā jñūhun jeē nácani de jñūhun ya ní Asia. Jeē yūcuan ní cayāha de ichi Frigia jíin Galacia cuangoo de. ⁷ Te ni jinūcoo de nuū quijnáhan Misia jíin Bitinia. Te cáconi de quingoo de Bitinia, te máá Espíritu Jesús tu ní jéhe ya jñūhun quingoo de. ⁸ Te ni cayāha de ñn lado Misia cuangoo de ñuu Troas jeē íne yajni yumar. ⁹ Te ñn jecuáa te nájñūhun ñn jēni ni jito ndijin Pablo, te ni jito de jeē índichi ñn tēe ñuu Macedonia nuū de cáhān ndahú jíin de: Nehen ní ñuu ná Macedonia te chindéé ñáhān ní sãña jíjnáhan ná, áchí. ¹⁰ Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quingoo ná Macedonia, chi ni cajini cají ná jeē maá Yāa Dios táji yá sãña jíjnáhan ná jéé castūhun ná nuū ñáyuu yūcuan jñūhun jnama ya i.

Jeē ní coyūcu Pablo jíin Silas ñuu Filipos

¹¹ Te jíin barco ni quenda-coo ná ñuu Troas, te cuangoo ndaā-ni ná ndé Samotracia, ñuhun jeē íne sñn nuū ndúte. Te inga quivī ni jinūcoo ná ñuu Neápolis. ¹² Te yūcuan ní quendacoo ná, te ni jinūcoo ná ñuu Filipos jeē cúu ñuu kujéhnu ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³ Te ñn quivī ndétātu ní quendacoo ná ñuu ún,

te ni jengoo ná ñn yuyúte, chi yūcuan cúu ñn lugar nuū cájicān tahuñayuu. Te ni cacucōo ná, te ni canacani ná jñūhun ya nuū tãcá ñahan ní canataca yūcuán. ¹⁴ Te ñn ña nání Lidia jeē véji ña ñuu Tiatira, xico ña sahma ndihí jéé yáhu ga ndeé. Te máá ña níni chíñúhún ña Yāa Dios. Te ni jini sōho ña jñūhun cánacani ná, te máá Jítóho yō Jesús ni sáha ya jeē ní candíje ña jñūhun jnama ya ña jeē ni cáhān Pablo. ¹⁵ Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cá cucáhnu ni ni jéé candíje ndije ná máá Jítóho yō, te cuajeé ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶ Te ñn quivī te cuangoo tucu ná suu lugar nuū jéngoo ñayuu cájicān tahuñ. Te ni canajnáhan ná jíin ñn sūchi síhí jéé ñūhun tachí ini i, te máá un sáha jeē cahān i tãcá ndese coo te cúndaā jeē cahān i. Te sūchí un ní cajeen patrón i, návāha nihñn de cuehē xūhun síquī jeē cástūhún i nuū ñn ñn ñayuu ndese coo ichi núú. ¹⁷ Te sūchí un ndíquín i sãña jíjnáhan ná cána jee i:

Tēe yáha cájejniñu de nuū Yāa Dios, Yāa kujéhnu téyí, te cácastūhún de ndese cācu ní núu cuéchi ní jíjnáhan ní, áchí i.

¹⁸ Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder maá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhīn gā i xūhún cuu de, te jeē yúcuan ní cajni de Pablo jíin Silas cuangoo jíin de nde vehe juzgado nuū cáyūcu tóhō. ²⁰ Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástonda de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnūhun, chi ñayuu nación Roma cácuu yó, achí.

²² Te suni ni candonda ñayuu siquī Pablo jíin Silas. Te tēe cácuu juez ni candacu de jniñu jeē na quénda sahma ndíndúú de te cani yujnu siquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún. ²⁴ Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄sin yujnu ndéé yaū te ni cajihni de.

²⁵ Te nuū ní cuu sava ñuú, te cájicān tahú Pablo jíin Silas, te cájita de yaa īi nuū maá Yāa Dios. Te ñayuu cáhīn jíin de vecāa un ní cajini nahín i. ²⁶ Te sanaa-ni te ni jnāa níhin téyí, te nde nuū cimientó

vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhnī tāca ñáyuu ún. ²⁷ Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de núú, chi ni jeni ni de jeē ndivii cuiti ñayuu cáhīn vecāa un cuángoo i. ²⁸ Te ni cana jee Pablo:

Ma cáhni ni máá ní, chi cáhīn ndihí ná, achí de.

²⁹ Yūcuán na te máá tēe ndíto vecāa ni cana de jeē na quíndeca i ñuhūn, te yachí ni quíví de ini vecāa. Te ni jecuíñí yití de nuū Pablo jíin Silas, te quísi i de jeē yūhú de. ³⁰ Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sāñá? achí de.

³¹ Te ni cacahān de jíin tēe ún:

Candíje ní táca jēē ni sáha Jítoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, achí de.

³² Te ni canacani de jnūhun máá Jítoho yō nuū tēe un jíin núú táca ñáyuu cáyūcú vehe de. ³³ Te suu máá jecuáā yúcuan ní nacate tēe ndíto vecāa un núú ní catujī Pablo jíin Silas jeē ní cacani yujnu siquī de. Yūcuán na te ni jendute de jíin ndihí ñayuu cáyūcú vehe de. ³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayeji de, te cácusī ni ndihí de vehe de jeē ní cacandíje de Yāa Dios.

³⁵ Te nuū ní cundijin, te tēe cácuu juez ni catajǎ de policǎa cuangoo jíin jnúhun jeē na siáá tēe ndító vecāa un Pablo jíin Silas quingoo de. ³⁶ Te tēe ndító vecāa un ní castúhún de jnúhun yáha núū Pablo:

Tēe cácuu juez ni catajǎ de jnúhun vēji jeē na siáá na níhín quíngoo ní. Núu súcuan te quendacoo ní quíhín ní, te cuandeyí ni ní, áchí de.

³⁷ Te ni cahān Pablo jíin policǎa:

Cuehē ñayuu ni cajito i jeē ní cacani de sǎñá, te ni tu ní cásandaā de xǎhna gā núu ndaā jeē iyó cuéchi ná. Te ni cachuhun de sǎñá vecāa, vēsú cácuu ná séhe nación Roma, te iyó ley jeē ma cúu sáha súcuan jíin ñayuu cácuu séhe nación Roma. Te vijna ¿á quenehen sǎhí de sǎña cácuni de naún? Ma cúu cuíti. Na quícoo máá de quenehen de sǎña jíin náhan ná, áchí Pablo.

³⁸ Te ni canandió cóo policǎa ni castúhún de jnúhun yáha núū tēe cácuu juez, te ni cayúhú de jeē ní cajini sōho de jnúhun jeē séhe nación Roma cácuu Pablo jíin Silas. ³⁹ Te ni quecoo tēe cácuu juez ún, te yōhoyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnúhun ndeyí ni jíin táca hermano. Te ni caquihin de ichi cuangoo de.

*Jeē ní cacuvaā ñayuu
Tesalónica*

17

¹ Te Pablo jíin Silas ni cayāha de ñuu Anfópolis jíin ñuu Apolonia cuangoo de, te ni jinūcoo de ñuu Tesalónica nuū iyó in vehe ii sinagoga jnáhan de hebreo. ² Te ni coyúcú de yūcuan únī semana, te tǎca quívī ndétātu jéhén Pablo vehe ii sinagoga, nájnūhun sáha sáha de, te ni nacani de jnúhun ya nuū tēe un. ³ Te jíin jnúhun cáhán tutu ii ni steén de jeē súcuan ni jini ñúhún ndoho Cristo jeē cúu yā te natecu yā. Te ni cahān de:

Jnúhun nácani ná núu ni cúu jnúhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵ Yūcuán na te yōhoyo ni cacucuésún ni jnáhan de hebreo jeē tu cacandíje, te ni castútú tēe cunéé jēe cájica cúxí-ni, te ni quejéé cácana ndee cuangoo. Te súcuan ni casaca núu de xinī ñáyuu ñuu ún. Te ni jengoo de vehe Jasón cánanducú de Pablo jíin Silas jeē jní de tēe un quíndēca de nuū ñayuu cuehē. ⁶ Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívi xínī ñáyuu ní ñáyívi, je ni quecoo de nde yāhá. ⁷ Te máá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñáyuu Roma, chi sa suhva cácahān de jeē cájetáhú de nuū inga rey jeē naní Jesús, achí de jíjnāhan de.

⁸ Te ñáyuu jíin tēe cácuu tohō ni cajini sōho i jnūhun yāha, te ni cacuvaā i siquī. ⁹ Te Jasón jíin táca gá hermano ni castóo de xūhún de, chi ni cacahān tohō un jíin de jeē nde núu tají de Pablo jíin Silas quingoo de inga ñuu, yūcuán na te nacuaāha tohō un xūhun de. Te súcuan te ni casiáá de Jasón jíin táca gá hermano cuangoo de.

Jeē ní coyūcu Pablo jíin Silas ñuu Berea

¹⁰ Yūcuán na te tēcá hermano un, yachī-ni ni cascáca de Pablo jíin Silas jecuáa un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe iī sinagoga jnāhan ñuu de hebreo. ¹¹ Te jnāhan ñuu de hebreo cáyūcu yúcuan, vāha ga ni maá de vēsú jnāhan ñuu de hebreo cáyūcú ñuu Tesalónica, chi vāha ni cacusiī ni de jíin jnūhun ni cacahān Pablo jíin Silas. Te ndijnahan quívi cánanducú yúcún de nuū tútu iī núu súcuan cáhán chí tuú. ¹² Jeē yúcuan ní cacandíje cuehē jnāhan ñuu de hebreo te suni nde jíin cuéhē ñáyuu griego, cúu tēe cúu ñahan cácuu nuū. ¹³ Te jnāhan ñuu de hebreo cáyūcú ñuu Tesalónica ni cajini jnūhun de

jeē suni nde ñuu Berea nácani Pablo jnūhun Yaā Dios, te ni caquihin de ichi cuangoo de Berea, te suni yúcuan ní castónda de ñáyuu siquī Pablo. ¹⁴ Yūcuán na te tēcá hermano ni catajī-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachī de nuū Pablo. Te vendicoo de ñuu Berea.

Jeē ní ine Pablo ñuu Atenas

¹⁶ Te níni ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cuíhyá ni de. ¹⁷ Te ini vehe iī sinagoga ni cahān de jnūhun ya jíin jnāhan ñuu de hebreo jíin táca gá tēe cáchiñúhún Yáa Dios. Te suni tēcá quívi ni nacani de jnūhun ya nuū tēcá ñáyuu cáhiin nuū yáhu. ¹⁸ Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caquejéé cácahān jíin Pablo. Te sava ni cacahān:

¿Na jnūhun cáhán tēe tólóhlé yāha? áchí.

Te sava ga de ni cacahān:

Tēe nácani jnūhun tēcá yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyi. ¹⁹ Te ni cajeca de Pablo cuangoo de, te ni jinūcoo de

nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéē steén ni. ²⁰ Chi cáhán ni jnúhun jeé ná tu cuni cuiti na jíjnáhan ná, te jeé yúcuan CÁCUNI ná jecūhun ni na síquī tāca jnúhun yáha, áchí jíin de.

²¹ Chi tāca ñáyuu ñuu Atenas jíin tāca ñáyuu inga ñuu jeé cáyūcu núu i yūcuán, tuá na inga jniñu cácusī gā ni i jíin chi máá-ni jeé cuni nahín i jnúhun jeé chí jéē cahán i jnúhun jeé.

²² Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnáhan ní, jito ná jéē yóhoyo cáchiñúhún ní yaā maá ní. ²³ Chi ni jica nuu ná, te ni jecondēhe ná nuū jeé cáchiñúhún ní, te ni jito ná ñn altar jeé yosó jnúhun yáha: Yáha cúu altar yaā jeé ná tu cuni yō jnúhun ya, achí. Te máá Yáa un jéē cáchiñúhún ní, vēsú ná tu cuni ni jnúhun ya, suu jnúhun Yaā un cúu jeé nácani ná núu ní vijna.

²⁴ 'Chi Yaā un cúu Yaā jeé ni sáha ñayīví jíin tāca ndihi jeé iyó, te máá yá cúu Jitoho andīví jíin ñayīví, te tu ndéé yá ini veñūhun cásáha ñayuu. ²⁵ Te ni tu cúmanī ni ñn nuū yā jeé cuáha ñayuu nuū yā, chi máá yá sáha jeé técu ñayuu, jíin jéē stáa i tachī i, jíin jéē nihín i ndihi jeé jíni ñúhún i.

²⁶ 'Te ni sáha ya jeé chíji ñn-ni yucūn ni tahū tāca ñáyuu jeé ní nduu tācá nación, návāha coyūcú i ní cáhnu

ñayīví, te ni tana yā cuiyā cotecu ñayuu jíin lugar coyūcú i jíjnáhan i. ²⁷ Te súcuan ni sáha ya chi cúní yā jeé nanducú yó yā, chi núu nanducú yó yā te cuni yō jeé iyó yá, chi yajni-ni cúu ya jíin ñn ñn yó. ²⁸ Chi máá yá sáha jeé iyó yó jíin jéē cátecu yō jíin jéē cácanda yō. Chi suni súcuan ni cacahān sava tēe ñuu ni jéē cátava yaa: Suni nde yucūn maá yá cácuu yó, áchí. ²⁹ Te núu yucūn Yaā Dios cácuu yó, te ma cáni ni yō jeé ídolo oro chí plata chí yúu cúu ya, chi cájeni ni ñayuu jeé súcuan cáa ya, te súcuan cásávāha i ídolo. ³⁰ Te ni jendeyí ni yā síquī jeé tu ní cájecūhun ni i ní ndé saá, te vijna chi ndácu ya jniñu jeé ñáyuu ní cáhnu ñayīví na nácani ni i jeé stóo i cuēchi i. ³¹ Chi Yaā Dios, je ni jeni ya quivī jeé ndaā sándaā yā síquī ñayuu ñayīví, te ni jeni ya Jesús jeé maá yá sándaā. Te je ni steén cají Yaā Dios nuū tāca ñáyuu jeé maá yá ni jeni Jesús, chí ni nastécu yā Jesús, achí Pablo.

³² Te jeé ní cajini sōho i jnúhun jeé nátecu ndīyī te sava i ni cacahān catá i, te sava ga i ni cacahān i:

Vāha te núu cuu cuni sōho na jnúhun cáhán ni ndé inga jínu, áchí i.

³³ Te ni quenda Pablo mēhñu ñáyuu un cuáhān de. ³⁴ Te cuahān jecu ñayuu jíin Pablo, te ni cacandíje. Te ñn de cúu Dionisio, tēe ndútútú jíin tēe cácujuhnu cásáha junta nuū naní Areópago, jíin ñn

ñahan nání Dámaris, jíin jecu gā i.

Jeē ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto. ² Te yūcuan ní jito de nuū ñn jnáhan ñuu de hebreo, nání Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyucú de ñuu Corinto. ³ Te suni jniñu sáha tēe un sáha Pablo, chi cáquicu de ññi cuu vehe. Te ni quendōo Pablo jíin tēe ún, te ni casájniñu de. ⁴ Te tāca quívī ndétātu ní jehēn Pablo vehe ñi sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñūhun ni i quiji ya. ⁶ Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te máá de ni caja de sahna de jeē cúu

seña jeē stóo de i jíin cuéchi i, te ni cahān de jíin i:

Cuéchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihīn na núu ñáyuu tācá nación jeē tu cájini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe ñi sinagoga, te ni jinū de vehe ñn tēe nání Justo ni condee de. Te chíñúhún tēe un Yáā Dios, te vehe tēe un néne yajni xiin véhe ñi sinagoga. ⁸ Te Crispo, tēe cújéhnū ini vehe ñi sinagoga, ni cándíje de máá Jítóho yō nde jíin ndihī ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹ Te ñn jecuáā ni sáha máá Jítóho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níní nacani ró jnūhun ri. ¹⁰ Chi ndíto ri rohó, te ma cúu sáha xeēn ni ñn ñayuu jíin ró. Nacani ró jnūhun ri, chi coo cuehē ñayuu cándíje jnūhun ri ñuu yáha, áchí yá.

¹¹ Te ni condee Pablo yūcuán ñn cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñn cáhnu-ni ni candonda i siquī Pablo. Te ni cajeca i de cuango i jíin de nde vehe juzgado. ¹³ Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo

chiñúhún i Yaā Dios, suu ñn modo jeē cúu contra siquī ley, achí i.

¹⁴ Te quejéé Pablo cahān de núu, te ni cahān-ni Galión jín ñáyuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín rí jñuhun cácahān rō núu. ¹⁵ Te tuú, chí máni siquī jñuhun-ni jín siquī ley maá ró jín siquī téé cástéēn cúu. Te na sándaā maá ró siquī jñíñu yáha, chí tu sándaā rí siquī maá ñn jeē súcuan-ni, achí de.

¹⁶ Te ni cahān de nuū i jeē na quíngoo i fuera. ¹⁷ Yūcuán na te ñayuu griego ni cajñi i Sóstenes, tēe cújéñnu ini vehe ñi sinagoga, te máá fuera yehyí vehe juzgado ni cacani i de, te Galión chí tu ní sáha cuiñi de cuenta.

Jeē ní najinū Pablo ñuu Antioquía, te cuahān de vuelta uní jeē nacani de jñuhun ya

¹⁸ Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tãcá hermano yúcuán, te Aquila jín ñasihí de Priscila cuangoo de jín Pablo, te ni jinūcoo de ñuu Cencrea. Te yūcuán ní saté ñi Pablo xinī de, te súcuan stéēn de jeē squícu de nuū Yaā Dios jeē ni jéjñuhun de. Te ni quivicoo de barco jín Aquila jín Priscila quihñ de región Siria. ¹⁹ Te ni jinūcoo de ñuu Efeso, te yūcuán ní caquendōo Aquila jín Priscila. Te ni jehēn-ni Pablo vehe ñi sinagoga, te ni cahān de jñuhun ya jín jñáhan ñuu de hebreo jeē

cándutútú yúcuán. ²⁰ Te ni cacahān ndahú i jín de jeē na cōnēne de jecu gā quivī jín i, te tu ní jéhe de jñuhun. ²¹ Chí ni nacuatáhú de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, achí de.

Te ni quenda de ñuu Efeso, te ni quiví de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jín grupo ñayuu cácañdije yūcuán, te cuanuhun de ñuu Antioquía. ²³ Te ni coyūcú de yūcuán jecu quiví, te sáá te ni quenda tucu de cuahān de ni jica cuu de ní Galacia jín Frigia. Te ñayuu cácañdije ni cahije ga ni i jín jñuhun ya ni sáha de.

Jeē ní nacani Apolos jñuhun Jesús ñuu Efeso

²⁴ Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jñuhun ya, chí vāha jíní de jñuhun jeē cahán tutu ñi. ²⁵ Te je ni cutūhva vāha tēe un jín jñuhun máá Jítoho yō Jesús, vēsú jiní de máni máá jñuhun ya jeē ni stéēn Juan ná ni scuándute de ñayuu, te ndihví ni de stéēn cají de jñuhun ya nuū ñáyuu. ²⁶ Te jéñnu-ni ni nácani de jñuhun ya ini vehe ñi sinagoga. Te ni cajini sōho Aquila jín Priscila jñuhun nácani de, te ni cajeca de Apolos cuangoo sñn de, te ni cacastūhun yúcún ndindúú de jñuhun ya

jeē ná tu cuni Apolos. ²⁷ Te cúní Apolos quih̄n de nde región Acaya. Te je cá candíje sava ñayuu yúcuan ní sáha Yaā Dios siquī jeē váha ni yā. Te t̄acá hermano ñuu Efeso ni cachindéé ñáhán i de, chi ni catee i carta quih̄n de jíin núū ñayuu cá candíje cá yūcú Acaya jeē na cuatáhú i Apolos. Te nuū ni jínū de yūcuán, te vāha ni chindéé ñáhán de tāca ñayuu cá candíje un jíin jnúhun ya. ²⁸ Te nuū tāca ñayuu ñuu un ndé jíin jnáhan ñuu de hebreo jeē cá yūcu yúcuan, ní steén cají de ndese cástívi tāca jnáhan hebreo de siquī jnúhun ya. Te tu ní cá nih̄n jnáhan de un jnúhun cahān siquī jeē ni steén de, chi jíin jéē cahán tutu iī ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yāha Pablo ichi síquí ñuu Efeso, te ni nanuu de ni jínū de máá ñuu ún. Te yūcuan ní nijnáhan de jíin tijni tēe cá candíje. ² Te ni cajnúhún de tēe ún:

¿A ní canih̄n ní Espíritu Santo ná ni cacandíje ní, chí ná tuú? áchí de.

Te ni cacahān de jíin Pablo:

Tuú, chi ni ná tu nih̄n na jnúhun jeē iyó Espíritu Santo, achí de.

³ Yūcuán na te ni cahān Pablo:

¿Na siquī ni cajendute ní núu súcuan? áchí de.

Te ni cacahān de:

Ni cajendute ná síquī jnúhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándíje i máá Yāā quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnúhun yáha, te ni cajendute de jeē ní cacandíje de máá Jítóho yō Jesús. ⁶ Te ni soó Pablo ndindúú ndaha de xinī tāca tēe ún, te ni quívi ni Espíritu Santo ini anuá de jíin náhan de, te ni cacahān de sín sín yuhu te ni canacani de jnúhun ya. ⁷ Te ni iyo nájnūhun uxī uū jnahán tēe.

⁸ Te unī yoō ni jehēn jehēn Pablo vehe iī sinagoga. Te jéhnú ni nacani de jnúhun ya, te ni nducú ndéyí de jeē na cándíje ñayuu jnúhun ndese ndácu Yaā Dios jniñu.

⁹ Yūcuán na te sava i ni cacunih̄ni ni i te tu ní cá candíje i, chí sa ni cacahān neé i siquī jnúhun vāha Yaā Dios jíin ñayuu cánataca. Jeē yúcuan ní cujiyo-ni Pablo nuū ñayuu ún, te ñayuu cá candíje cuangoo i jíin de. Te ndijnahan quívi ni steén de nuū ñayuu ún ini escuela iin tēe nání Tiranno.

¹⁰ Te súcuan ni sáha de uū cuiyā, te tāca ñayuu cá yūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jéhnú téyí. ¹² Te nde pañú jíin sahama jeē ní jni de ni cajengoo

jíin núū ñáyuu cácuĥū, te ni canduvāha-ni i cuehyī cándoho i, te ni quendacoo tachī ini i cuangoo.

¹³ Te jecu tēe hebreo cájica cuu de jeē quénehen de tachī ini ñayuu, te ni cajeni siquī ni de jeē suni jíin poder maá Jítóho yō Jesús quenehen de tachī, te suhva ni cacahān de jíin táca táchī:

Jíin poder Jesús jeē nácani Pablo jnūhun ya, cáhán nihin ri jíin ró jeē na quénda ró quiĥīn rō, achí de.

¹⁴ Te súcuan ni casáha uxā sēhe yīi ĩn tēe hebreo nání Esceva, cúu de ĩn sutū cujéĥnu.

¹⁵ Te ná ni casáha de, te ni cahān-ni tachī ún:

Je jíni rī Jesús, te suni jíni rī Pablo. Te róho jíjnáhan ró ĩndé tēe cácuu ró jēe cuatáhú rī rohó? áchí jíin de.

¹⁶ Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeēn ndasí de jíin ndé ni catujī te ni cacuvichí lā ni quendacoo vehe un ní cajinu cuangoo. ¹⁷ Te jnūhun yáha ní cajini táca ñáyuu cáyūcú ini ñuu Efeso, cúu ñayuu hebreo cúu ñayuu táca gá nación, te yōhyo ni cayūhú i, te ni cacahān i jeē yōhyo cújéĥnu maá Jítóho yō Jesús.

¹⁸ Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun táca jniĥnu neé ní casáha i. ¹⁹ Te cuehē i jeē ní casáha jniĥnu tásí ní jinūcoo i cándiso i tutu i, te ni cajehmu i tutu un jító nuū táca ñáyuu. Te ni catava i cuenta nasaa ndéé

tutu ni cáyū ún, te ni cajini i jeē uú xico uxī mil xūhun plata cúu. ²⁰ Te ni jitē jnūhun maá Jítóho yō cuahān, te ndihi ñayuu ni cajini i jeē cujéĥnu ndasí jnūhun ya.

²¹ Te nuū ní ndihi táca jniĥnu yáha, te jéni téyí ni Pablo jeē quiĥīn de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíni ñúhún quiĥīn de nde ñuu Roma. ²² Te uū tēe jeē cáchindéé ñáhán jíin Pablo cúu Timoteo jíin Erasto, te ni scándu de ndindúú tēe yáha cuángoo de nde Macedonia, te ni quendōo maá de Asia jecu gā quiĥī.

Jeē ní cacuvaā ñayuu ñuu Efeso

²³ Te suu quiĥī ún yōhyo ni candonda ñayuu siquī jnūhun ya. ²⁴ Chi ni iyo ĩn tēe sájniĥnu siquī plata, nání de Demetrio. Te maá de jíin ndihi tēe cásájniĥnu jíin de, cániĥīn de cuehē xūhún, chi jíin plata casáha de vehe lulí jēe modo veñūhun ídolo i jeē cúu yaā Diana. ²⁵ Te Demetrio ni nastútú de tēe cásájniĥnu jíin de jíin táca gá tēe jeē suni jniĥnu yúcuan casáha, te ni cahān de:

Tátā, cájini ni jēe siquī jniĥnu casáha yó yáha vāha cániĥīn yō xūhún. ²⁶ Te cájito ní te cájini sōho ní jēe ĩn tēe nání Pablo chi cáhán de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu maá ĩn-ni ñuu Efeso yáha chi ní cáĥnu Asia. ²⁷ Te

quíyūhú ni na jēē cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máa veñūhun yaā sihí Diana jeē kujéñnu, te suni sájēē ni i nuū yaā Diana, te ma cúu ga kujéñnu ya vēsú ndivii ñayuu Asia jíin ñáyuu ní cáhnu ñayiví cáchiñúhún i ya vijna, achí de.

28 Súcuan ni cajini sōho de jñūhun yáha te yōhyo ni caquiti ni de, te ni cacana jee de:

Cujéñnu téyí Diana, yaā cúu patrona ñuu yō Efeso, achí de.

29 Te ñayuu ñuu Efeso ni cacuvaā i, te ñin cáhnu-ni ni candonda i ni cajni i Gayo jíin Aristarco cuango i jíin de nde vehe nuū cándutútú ñáyuu casáha i junta. Te ndindúú téē un cácuu tē Macedonia, te cájica de jíin Pablo. 30 Te cúni Pablo quiví de nuū ñáyuu cuehē un cáhān de jíin i, te ñayuu cácandije tu ní cájēhe i jñūhun quihín de. 31 Te suni sava tohō jeē cácuu amigo de cáyūcu Asia, ni catajī jñūhun cuahān nuū de, cácahān ndahú jíin de jeē ma quihín de nuū ní cacutútú ñáyuu ún. 32 Te ñayuu ní cacutútú un, sava i ni cacana jee i ñin jñūhun te sava ga i inga jñūhun, te súcuan ni cacuvaā teyí i, te cuehē i ni tu cájini cuiti i na siquī cúu jeē ní cacutútú i. 33 Te sava téē hebreo ni cajeni de ñin jñáhan de jeē naní Alejandro nuū ñáyuu cuehē ún, te ni cacastūhún de nuū téē ún na siquī cúu jeē cacuvaā i. Yūcuán na te Alejandro ni

sáha de seña jíin ndaha de jeē na cúnayúú ñáyuu, chi cúni de cahān de jíin i jeē násūu cuēchi táca ñáyuu hebreo cúu. 34 Te ni canacuni ñayuu un jeē téē hebreo cúu de, te jeē yúcuan ní cacana jee téyí gá i nájnūhun uū hora:

Cujéñnu téyí Diana, yaā cúu patrona ñuu yō Efeso, achí i.

35 Yūcuán na te ni cacunahín ñáyuu ní sáha téē cúu secretario ñuu ún, te ni cahān de:

Nihín ñáyuu ñuu yō Efeso, ndihi ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. 36 Te ni ñin chi ma cúu cahān jeē tú ndaā jñūhun yáha. Núu súcuan te vāha ga na cási ní yuhu ní, te ma sáha yachí ní ñin jeē tu ní nácani vāha ni ni síquī. 37 Chi téē yáha ní caquindeca ní de yáhá vēsú tu ní casáha de ni ñin cuēchi siquī Diana yō, ni tu ní cácahān ndevāha de ni ñin jñūhun siquī. 38 Te Demetrio jíin táca gá téē jeē ñin-ni jniñu casáha jíin de, núu cácuni de cahān de cuēchi siquī ñin téē, te na quíngoo de nde vehe juzgado nuū cáyūcu juez, téē casándaā jniñu, te yūcuán cundaā siquī de jíjnáhan de. 39 Te núu iyó jñūhun jeē ma cúu cundaā yūcuán, te jíni ñúhún cundaā nuū ñin junta nájnūhun tájnúni ley. 40 Chi yúhú ná jeē sanaa te cahān táca tóhō Roma jeē siquí gobierno de ni candonda yó, chi ma nihín yō jñūhun castūhun yó na siquī cúu jeē

ní cacutútú yó ni cacuvaā yō vijna, áchí de.

⁴¹ Te nuū ní ndihi ni cahān secretario jnūhun yāha, te ni cajitē ñayuu un cuāngoo.

Jeē ni jéhēn Pablo Macedonia jín Grecia

20

¹ Te ná ni yāha jēē ní cacuvaā ñayuu, te ni cana Pablo ñayuu cácañdije, te ni jeni ichí de i. Te ni cañunundee jnáhan de jín Pablo jeē ní nacuatáhu de, te cuahān de Macedonia. ² Te ni jica cuu de tǎcá ñuu yúcuān. Te jín cuéhē jnūhun ni stihví ni de tǎcá hermano cácañdije. Te ni jinū de Grecia. ³ Te ni condee de yúcuān únī yoō. Te je yajni quihīn de jín barco nde Siria nuú, te máá quivī ún te ni nihīn de jnūhun jeē jnáhan ñuu de hebreo ni casquíjnáhan jnūhun jeē ndonda siquī de ichi nuū quihīn de, te jeē yúcuān ní nacani ni de te cuahān tucu de ichi Macedonia. ⁴ Te ni cahīyo sava tēe cájica jín Pablo, te cánani de Sópater ñuu Berea, Aristarco jín tēe nání Segundo nde ñuu Tesalónica, Gayo ñuu Derbe, Tíquico jín Trófimo nde Asia, jín Timoteo. ⁵ Te ni cacandu tēe yāha, te cándētu de Pablo jín sáña, Lucas, nde ñuu Troas.

⁶ Te nuū ni yāha vico jeē cáyeji i pan jeē tu yíhi levadura, te jín barco ni quendacoo ná ñuu Filipos, te nde nuū uhún quivī te ni canajnáhan ná jín de nde ñuu Troas. Te

ñuu yúcuān ní coyūcu ná uxā quivī.

Jeē ni ine Pablo ñuu Troas

⁷ Te máá quivī domingo ni candutútú ñáyuu cácañdije jeē cáji i pan, nájnūhun ni steén maá Jítoho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quivī un jíní ñúhún quenda de quihīn de, te nahán ní nacani de jnūhun nde ni cuñuú. ⁸ Te vehe yósó jnáhan cúu vehe ún. Te nde cuarto xinī nuū ní candutútú ná un ní iyo cuehē lámpara ni cundijin. ⁹ Te ñn sūchi yí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jí i mǎhná, te ni quixī-ni i. Te nde piso unī un ní ñinga i nde nuū ñúhún. Te je ni jihī i ni candonehen de i. ¹⁰ Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jínáhan ní, chi ni natecu i, áchí de.

¹¹ Te ni ndaa Pablo, te ni yeji de pan jín i jínáhan i jeē cáncūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹² Te Eutico chi íyó váha i cuanuhun i jín de jínáhan de, te ndivii ñayuu ún yōhyo cácusī ni i.

Jeē ní quenda Pablo ñuu Troas cuahān de ñuu Mileto

¹³ Te ni quivícoo ná ini barco cuāngoo ná. Te Pablo chi cúní de caca jéhé de, te ni cundaā jeē najnáhan ná

jín de nde ñuu Asón. ¹⁴ Te nuū ní canajnáhan ná jín de ñuu Asón, te ni quiví de barco te cuango ná jín de nde ñuu Mitilene. ¹⁵ Te yūcuan ní quendacoo tucu ná jín barco te inga quiví ni jinūcoo ná xiin Quío, ñuhun jeē íne sín nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, návāha ma cucuéé de Asia te naa tiempo nuú, chi núú de jinū yachí de ñuu Jerusalén cone de máá quiví Pentecostés núu na cúu.

Jeē ní jeni ichí Pablo tē jéhu cándiso jniñu nuū ñáyuu cácaandije ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quijicoo tē jéhu cándiso jniñu nuū ñáyuu cácaandije yūcuán. ¹⁸ Te nuū ní quecoo tē ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi ní tiempo jeē ni íne ná jín ní te nde vijna, jéjniñu vāha na síquī jnūhun máá Jítoho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i síquī ná. ²⁰ Te cájini ni jéē tu ní táñuhún ná ni ñn, vēsú ndese ga cácahān ñáyuu síquī

ná, chi ni nacani ná ndihí jnūhun ya jeē quéndōo vāha ní sáha. Te ni steén na jnūhun ya nuū ni jijnáhan ní, cúu nuū chitú cúu tācá vehe ní. ²¹ Te inuú-ni jnūhun ni nacani ná núu ndihí ní, cúu jnáhan ñuu ná hebreo cúu ñayuu tāca gá nación, chi ni cahān na jéē na nácani ni ni jéē stóo ni cuéchi ní te na cándije ní máá Jítoho yō Jesucristo. ²² Te vijna chi ñūhun ichí ná quihín ná ñuu Jerusalén, chi stíhví ni Espiritu Santo saña quihín ná. Te tu jíní ná ndese ga coo jín ná yūcuán. ²³ Te íyó ñn jeē jíní na, cúu jeē chune i sañá vecā te quiji jnúndóho síquī ná, chi Espiritu Santo súcuan cáhán jín ná ndijnahan ñuu nuū jíca ná. ²⁴ Te ni tu sáha ná cuenta vēsú na cáhni i sañá, chi jeē cuní na cúu jeē na sínu vāha ná jniñu jeē ní tee máá Jítoho yō Jesús síquī ná, te súcuan cusí ni ná. Te jniñu un cúu jeē nácani ná jnūhun vāha ya nuū tāca ñáyuu ndese vāha ni Yaā Dios jín yó.

²⁵ Te je ni jica cuu ná, ní nacani ná jnūhun ya nuū ní ndese ndácu Yaā Dios jniñu. Te vijna chi jíní na jéē ni ñn ní ma najnáhan ga yō nuū ñáyiví yáha. ²⁶ Jeē yūcuan cástūhun cájí ná nuū ni jijnáhan ní vijna jeē násūu cuéchi ná cúu núu ndé ñn ní stívi. ²⁷ Chi ni nacani ná núu ní ndihí jnūhun Yaā Dios jeē ni sándaā yā ndese coo, te tu ní quéndōo ni ñn jnūhun. ²⁸ Núu súcuan te coto vāha ní máá ní jín ndihí ñayuu cácaandije, chi Espiritu Santo ni jeni ya nihín jéē

cóndito ní ñáyuu maá Jítóho yō, chi ní nacuaan ya i jín níñi yā. ²⁹ Chi jeē quihín na te jíní na jéē quijicoo tēe cástáhú quívicoo mēhñu ní, te nducú de snāa de jnūhun ni cajetáhú ñáyuu cácañdije, te xeēn sáha jnūhun stáhú de nájñūhun xeēn sáha yihí jeē cájehni tī lanchi. ³⁰ Te suni nuū grupo maá ní quejéé sava de cahān de jnūhun stáhú, te stáhú de sava ñayuu cácañdije jeē na cóndiquīn i jnūhun stáhú stéén de. ³¹ Jeē yúcuan condito ní jéé ma cóo súcuan. Te ma náa ni ní jéé uní cuiyā ndiquivī ndíñuu ni condihvī ndasí ni na ndé ndahyú na jéhē ní, ní jeni ichí ná ñin ñin ní jínáhan ní.

³² Te vijna, hermano, jícán tahu na núu Yaā Dios jeē coto ya nihín. Chi jnūhun jeē váha ni yā ndíso poder sáha jeē íje ga ni jín, te suu sáha jeē ñin quivī te cuáha ya tahū jeē ndujéhnu luu ní ndé jín ndihí ñayuu ní nacāji ya jeē cóo ndoo coo i i nuū yā. ³³ Tu ní ndúcú ná jeē nihín na xūhun chí sahma nuū ní ñin i. ³⁴ Chi je cájini vāha ni jéē sa suhva ni sájniñu ñihin ná návāha nihín na jéē cótecu na ndé jín táca tēe cájica jín ná. ³⁵ Te níni ní steén na núu ni jéē súcuan jini ñúhún sájniñu yó návāha nihín yō jeē cuáha yó núu ñayuu cúmanī nuū. Te ma náa ni ní jnūhun jeē ni cahān maá Jítóho yō Jesús, chi suhva ni cahān yā: Ndetū gā quendōo yó jéē cuáha yó vésú jeē nihín yō, achí yá. Achí Pablo.

³⁶ Te ni ndihí ni cahān de

tāca jnūhun yáha, te ni jecuiñí yití de, te ni jicān tahu de jín ndihí tēe ún. ³⁷ Yūcuán na te ndihí de ni cajecunundee jnáhan de jín Pablo ni catechūhú de jeē cánacuatáhú de, te ni candahyū de. ³⁸ Chi cácuuhyá ndasí ni de jín jnūhun ni cahān Pablo jeē ma ndácoto jnáhan ga de. Te cuangoo-ni de jín Pablo nde núu ñin barco.

Jeē cuánuhun Pablo ñuu Jerusalén

21

¹ Yūcuán na te ni caque-ndōo tēcá hermano ñuu Efeso, te ni quívicoo ná barco, te cuangoo ndaā-ni ná ndé Cos. Te inga quivī ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. ² Te ni cane ñin barco jeē quihín Fenicia, te ni quívicoo ná cuángoo ná. ³ Te nuū ní cajito ná núu Chipre jeē íne sñin nuū ndúte, te ni quendōo ichi lado jecó barco, chi ní cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún. ⁴ Te ni jenanducú ná ñayuu cácañdije, te ni caquendōo ná jín i uxā quivī. Te máa Espiritu Santo ni steén nuū i jeē quíji jnūndóho siquī Pablo ñuu Jerusalén, te jeē yúcuan ní cacahān i jín de jeē ma quihín de. ⁵ Te ni yāha uxā quivī ún, te ni quendacoo ná. Te tāca tēe cácañdije jín ñasihí de jín séhe de ni cachuhun ichí de sñāa ní jengoo de jín ná nde yatā ñúu, te ni cajecuiñí yití

ná jíin de yumar te ni cajicān tahú na. ⁶ Te ni cañunundee jnáhan ná ní canacuatáhú ná yūcuán, te ni quivícoo ná barco cuango ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuango ná jíin barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jíin táca hermano, te ni caquendōo ná jíin de ñn quiví. ⁸ Te inga quiví un ní cajica jéhé ná jíin Pablo, te ni jinūcoo ná ñuu Cesarea, te ni quivícoo ná vehe Felipe, tē nácani jnūhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jíin de. ⁹ Te tēe un íyó cúun sēhe síhí de jeē cáhīyo máá i, te cánacani i jnūhun Yaā Dios. ¹⁰ Te ni coyūcu ná yūcuán tijni quiví. Te ichi Judea ni quiji ñn tēe nácani jnūhun Yaā Dios, nání de Agabo. ¹¹ Te ni quee de nuū ná. Te ni quihin de sanchí Pablo, te ni jihni de ndaha de jíin jéhē de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchí yáha ini ñuu Jerusalén, te nastúu i de nuū ñáyyuu sín nación, áchí de.

¹² Te jeē ní cajini sōho na jnūhun yáha te máá ná jíin táca tēe cácadíje cáyūcú ñuu Cesarea ni cacahān ndahú ná jíin Pablo jeē ma quihín de ñuu Jerusalén. ¹³ Yūcuán na te ni cahān Pablo:

¿Najehē cándahyū ni jíináhan ní, te cásáha ní jeē cucuíhyá ni ná? Chi sñáá je íyó túhva ná jeē násūu máá jeē cónuhñi ná ini ñuu Jerusalén, chi suni jeē vēsú na cúu na jeē siquí maá Jítoho yō Jesús, áchí de.

¹⁴ Te jeē tu ní cúu cuiti casícoo ná, yūcuán na te sa suhva ni cacahān ná:

Na cóo ndese cúní maá Jítoho yō nuu súcuan, áchí ná.

¹⁵ Yūcuan na te sáá te ni casátūhva ná, te cuango ná ñuu Jerusalén. ¹⁶ Te suni jecu tēe ñuu Cesarea jeē cácadíje cuango de jíin ná. Suni cuahān ñn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷ Te nuū ni jinūcoo ná ñuu Jerusalén, te hermano cáyūcú ñuu ún yōhyo ni cacusiñ ni de jeē ni jinūcoo ná. ¹⁸ Te inga quiví un ní cajengoo ná jíináhan ná jíin Pablo vehe Jacobo, te yūcuan ní candutútú táca tēe jéhnu cándīso jníñu nuū ñáyyuu cácadíje. ¹⁹ Te Pablo ni sáha de saludar tēe ún jíináhan de. Yūcuán na te ni castūhún de ndihí jniñu ní sáha Yaā Dios ná ni nacani de jnūhun ya nuū ñáyyuu táca nación jeē tu cájini i jnūhun ya. ²⁰ Te ni cajini sōho de jnūhun yáha, te ni cacahān de jeē yóhyo cújéhnu Yaā Dios. Te ni cacahān de jíin Pablo:

Hermano, vijna te jíiní ni náa cuehē míl jnáhan ñuu yō hebreo ni cacandíje i Jesús,

te cácahān nīhin i jeē cánuú squícu yó ley jeē ni jéhe ya nuū Moisés. ²¹ Te ni canihīn i jnūhun cácahān jeē stívi ní steén ni núū tāca jnáhan yó ñáyuu hebreo cáyūcu jíca i tāca gá nación, chí ni steén ni núú i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúni jenahán. ²² ¿Nde se sáha ní núú súcuan? Chi cuni ñayuu un jéē ní ndee ní te cutútú cuéhē i. ²³ Suhva sáha ní núú súcuan. Yáha íyó cúūn tēe jeē ní cajejnūhun de ñn jeē squícu de nuū Yaā Dios. ²⁴ Cueca ní tēe yáha quíhīn ni jíin de templo, te cuchí ní nasándoo ní máá ní jíin de nuū yā, te cuaan ní jeē socó de nuū Yaā Dios jijnáhan de. Yūcuán na te cuu sāté de xinī de, te suu stéén jeē ní casquícu de ndihi jeē ní cajejnūhun de nuū yā. Yūcuán na te cuni ndihi ñayuu jeē tú ndaā tāca jnúhun ni cajini sōho i síquī ní, chí coto i jeē suni máá ní sa squícu ní ley yā. ²⁵ Te ñayuu tācá nación jeē násūu ñáyuu hebreo cácuu i te ni cacandíje i ya, je ni catee ná carta cuahān nuū i jeē tu cánuú squícu i ley un, chí máá-ni jeē ma cáji i cūñu jeē ni sóco nuū ídolo ni niñī ni quití jeē jihí jeē tu jéti niñī tī, te ni ma cáca jnéni i, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachí de

nuū sutú na quivī jínu jeē nasándoo tēe un máá de nuū yā, te quindecá de quití jeē socó de nuū yā.

²⁷ Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihí ñayuu, te ni cajni i Pablo. ²⁸ Te ni cacana jee i:

Tēe ñuu yō Israel, cuāha núú ní ndaha jíjnáhan ní na jni yó tēe yáha. Chi máá de cúu tēe jíca cuu ní cáhnu stéén de nuū tāca ñáyuu, te cáhán de síquī nación yō jíin síquī ley jeē ni jéhe ya nuū Moisés jíin síquī templo yáha. Te suni je ni quivicoo de jíin jecu tēe griego ini templo i yāhá, te súcuan stívi de jnūhun i jeē cahán jeē ma cúu quiví ñayuu ini templo te núu nasūu ñáyuu hebreo cúu i, áchí.

²⁹ Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūu hebreo cúu de, te cájeni ni de jeē ni quiví tēe un jíin Pablo ini templo.

³⁰ Te ndihi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. ³¹ Te ni cacuni i cahni i de núú. Te general, tēe cújéhnu nuū ndihi soldado, ni nihīn de jnūhun jeē ndihi ñayuu ñuu Jerusalén ni candonda i cácuvaā i. ³² Te ni jeca general tācá soldado jíin capitán, te cájinu de cuango de nde nuū cáhīn ñayuu

cuehē ún. Te ná ni cajito ñayuu jeē ni jínūcoo general jín soldado, te ni cajecuiñi i jeē cácani i Pablo. ³³ Yūcuán na te ni quiñi general mēhñu ñáyuu, te ni jñi de Pablo, te ni ndacu de jñiñu jeē conuhnī de jín úu cadena. Yūcuán na te ni cajñuhún general ndé tēe cúu Pablo te na cuēchi ni sáha de. ³⁴ Te ni cacana ñayuu cuehē ún, sava i ñn jñuhun te sava ga i inga jñuhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jñiñu cuahān Pablo nde cuartel. ³⁵ Te nuū ni jínū Pablo escalera cuartel ún, te soldado ni cajñi de Pablo cándiso de siquī jeē cácuni ñayuu ún jñi i Pablo sáha xeēn i jín de. ³⁶ Chi ndihi i vējicoo i ichi yátá soldado, te cácana jee i:

Cahni ni tēe jíñá, achí i.

Jeē ni cahān Pablo jehē maá de nuū ñáyuu

³⁷ Te cásquivi de Pablo ini cuartel nuú, te jín jñuhun griego ni cahān Pablo jín general:

¿A cuáha ni jñuhun cahān ná ñn jñuhun jín ní? achí de.

Te ni cahān general jín de:

Te jíní rō cahān rō yuhu griego jeē súcuan. ³⁸ Núu súcuan te nasūu róhó cúu tēe Egipto jeē jé ni cuu quiñi ni ndonda siquī gobierno te ni quenehen cuūn mil tēe jéhni ndīyi cuangoo jín de nde nuū ñuhun téhé, achí.

³⁹ Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ñn

ñuu jeē cujéhnu ndañúu Cilicia. Te quiñuhun ni ni cuáha ní jñuhun na cáhān na jín ñáyuu yáha jínáhan i, achí de.

⁴⁰ Te general ni jēhe de jñuhun jeē cahān de. Te ni jecondichi Pablo nuū escalera, te ni sáha de seña jín ndaha de jeē na cúu nayúú ñáyuu ún. Te nuū ní cuu nayúú-ni i, te jín jñuhun yuhu ñúu de hebreo ni cahān de:

22

¹ Ndihi níhín jeē cácuu ní jnáhan ñuu yō jín ndihi níhín jeē cácujeéhnu ní núu ñúu yō, cuni sōho ní jñuhun cahān na jéhē maá ná, achí de.

² Te ni cajini sōho i jeē cahān Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutūhva ná núu Gamaliel, te ni steén de nuū ná ndihi siquī ley jeē ni jēhe ya nuū jí yō. Te nde jín ini jín ánuá na ní nducú ndéyi ná squícu ná súcuan nuū Yaā Dios, nájnūhun cásáha máá ní vijna. ⁴ Te ni jito xeēn na ñáyuu cácañdije i jñuhun Jesús te nde cuni na jēe na cúu ndihi i núu. Chi cúu tēe cúu ñahan ni jñi ná ni chuhun ná vecāa. ⁵ Te sutū cujéhnu ga jín táca tēe jéhnu cándiso jñiñu nuū ñúu yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jín jēe cuáha na núu táca jnáhan yó cáyūcú ñuu

Damasco. Chi cuahān ná ñuu un jēē jñi ná ñáyuu cácadíje i Jesús te quindeca ná i ñuu Jerusalén yāha, návāha ndoho i núú.

Jeē ní cachi Pablo ndese ni sama ya de

(Hch. 9.1-19; 26.12-18)

6 "Te ni quihin ná ichi cuahān ná, te cuacuyajni ná ñuu Damasco, te nájñuhun caxū cúu. Te ichi ándiví ní quiji ñn nduva ní ndindēē ndaxín núū ná. 7 Te ni cotúú-ni ná núū ñuhun, te ni jini sōho ná ñn jñuhun cáhán jín ná: Saulo, Saulo, ¿najehe jito xeēn rō ruhū? achí. 8 Yūcuán na te ni cahān ná: ¿Na nihín cúu jeē cahān, Tátā? achí ná. Te ni cahān yā jín ná: Máá rí cúu Jesús jeē ní jehnu ñuu Nazaret, te jeē jito xeēn rō ñayuu cácadíje i ruhū cúu jeē jito xeēn rō ruhū, achí yá. 9 Te tēe cuango jín ná ni cajini ndije de jeē ndindēē, te ni cayūhú de, te tu ní cájini sōho de ndese ni cahān yā jín ná. 10 Yūcuán na te ni cahān ná: Tátā, ¿na vé cuní ni jēē sáha ná? achí ná. Te ni cahān máá Jítoho yō jín ná: Ndocuñi te quihin rō ñuu Damasco, te yūcuan íyó ñn tēe jeē cachi nuū rō na vé cúu jeē cánuú sáha ró, achí yá jín ná. 11 Te jeē ní ndindēē un ní sacuaá núū ná, te tēe cuango jín ná un ní cajni de ndaha ná cuango de jín ná ní jinūcoo ná ndé ñuu Damasco.

12 "Te yūcuan ní condee ñn tēe nání Ananías, te táca jñahan yó hebreo yūcuan cácahān jeē tēe vāha cúu

Ananías, chi vāha squícu de ley jeē ni jéhe ya nuū Moisés. 13 Te ni quee tēe un núū néne ná, te ni cahān de jín ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. 14 Te ni cahān Ananías: Máá Yā Dios táca jí yō, je ni nacāji ya nihín návāha cuni ní na vé cuní yā jeē sáha ní, te coto ní núū maá Cristo, Yā ndaā, te cuni sōho ni jñuhun jeē cahān yā. 15 Te nacani ní jñuhun ya nuū ndivii ñayuu táca jēē ní jito ní jín jēē ní jini sōho ní. 16 Ma cúhuun ni ni núu súcuan, Ndocuñi ní, te cuandute ní te cahān ndahú ní jín máá Jítoho yō, návāha nacate ya anuá ni núū cuéchi, achí de jín ná.

Jeē ní cachi Pablo ndese ni taji Yā Dios de nuū ñáyuu táca gá nación

17 "Te ni nandió cóo na ní ndee ná ñuu Jerusalén. Te jícán tahu na ini templo, te ni sáha máá Jítoho yō jeē ní jito ndijin ná. 18 Te ni jini na núū yā ni cahān yā jín ná: Yachí quenda ró ñuu Jerusalén yāhá, chi ma cuatáhú ñáyuu yáha jēē nacani ró jñuhun ri nuū i, achí yá. 19 Te ni cahān na jín yá: Tuú, chi cuatáhú i, Tátā, chi je cájini i jeē ni quívi ná ndijnahan vehe i sinagoga ni jñi ná táca ñáyuu cácadíje i nihín, te ni cani ná i, te ni chuhun ná i vecāa. 20 Te je cájini i jeē quívi ní cajehni i Esteban, tēe ni nacani cáj jñuhun ní, suni

ni indichi na yúcuán, te ni je-njúhún ná jeē na cúu de, chi ni condito ná sahma tēe ni cajehni Esteban, áchí ná jín yá. ²¹ Te ni cahān yā jín ná: Cuáhán, chi máá rí tají rí rohó quíhīn jicá ró nde nuū ñáyuu tācá nación jeē tu cājini i jnúhun ri, achí yá jín ná. Achí Pablo.

Jeē ni íne Pablo nuū general

²² Te tāca ñáyuu ún vāha-ni ni cajini sōho i te nde jnúhun sandīhi yáha jēē ní tají yá de nuū ñáyuu tāca gá nación. Yūcuán na te ni cacuvaā i, te ni cacahān jee i:

Na cúu tēe jíñá, chi tú vāha jeē cótecu gā de, áchí i.

²³ Te súcuán cácana jee i, te ni cascádoó i ticāchí i, te ni cascánda i ticachā. Te súcuán cástēēn i jeē cáquiti xeēn ní i.

²⁴ Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jín cuarta ñii, návāha cujnúní ni general na síquī cúu jeē ní candonda ñayuu un síquī de. ²⁵ Te ni cajihni de Pablo návāha súcuán te cani de. Te ni cahān Pablo jín capitán jeē índichi tūhva:

¿A jéhe ley jnúhun jeē cani ní cuarta tēe cúu sēhe nación Roma núu ná tu sándaā ní núu iyó cuéchi de? áchí de.

²⁶ Te ni jini sōho capitán jnúhun yáha, te ni jecahān jín general:

Coto vāha ní jēē ma stívi ní sáha ní jín tēe yáha, chi cúu de sēhe nación Roma, achí.

²⁷ Yūcuán na te ni jinū general nuū Pablo, te ni cajnúhún de:

Cachí núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸ Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sāñá chi nde quívi ní cacu ná cúu ná sēhe nación yō Roma, achí de.

²⁹ Yūcuán na te tāca tēe jeē cácuani cani Pablo nuú, ni cacujiyo-ni cuangoo, te suni nde general ni yūhú de, chi ni stívi de jeē ní jihni de Pablo, chi tu iyó vāha sáha súcuán jín sēhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

³⁰ Te inga quívi un cúní general cundaā vāha ni de na síquī cúu jeē ní candonda tēe hebreo síquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtū cácujeñnu jín táca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

23

¹ Yūcuán na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vija vāha iyó ni anuá na jéé tú na cuéchi ná, jíto jínúu Yāā Dios, áchí de.

² Yūcuán na te Ananías, sutū cujéhnu ga, ni cahān jín tēe cáhīn yajni nuū de jeē na cátu maá yuhu de. ³ Te ni cahān Pablo jín sūtū cujéhnu ga ún:

Yaā Dios stóho ya nihín chi tēe stáhú-ni cúu ní, chi néne ní jēē sándaā ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

⁴ Te ni cacahān tēe cáhiin nuū de ún:

¿Naun cáhán rō súcuan jíin sūtū cujéhnu ga? Chi nuū Yaā Dios jejniñu de, áchí jíin de.

⁵ Te ni cahān Pablo:

Tátā jijnáhan ní, tu ní jíni na jēē sūtū cujéhnu ga cúu de, chi núu ní jíni na te ma cahān na súcuan núú, chi yósó núu tūtú i jeē ni cáhān yā jeē ma cahān neé yó coto yó táca tēe cácujuhnu nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān je de:

Tátā jijnáhan ní, máá ná cúu iñ jnáhan grupo fariseo, te suni súcuan ni iyo tátá na. Chi suni máá ná ñúhun ni na jēē nastécu yā ndíyi, te siquī yúcuan cúu jeē cácahān ni cuéchi siquī ná, áchí de.

⁷ Te jeē súcuan ni cahān de te ni cacusñ ni tēe junta jeē cácuu grupo fariseo jíin grupo saduceo, te ni cacahān nihin.

⁸ Chi cácahān tēe grupo saduceo jeē ma nátecu ndíyi, ni tu cáhiyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹ Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuiñi de, te ni cacahān de:

Tú ni iñ cuéchi cánihin na siquī tēe yáha. Sanaa te ni cahān ndije iñ ánuá jíin de chí

iñ ndajéhé yā. Ma sánihni ni yō nuū Yaā Dios nuu súcuan, áchí.

¹⁰ Te yōhyo ni catejnáhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹ Te jecuāa un ní quee-ni máá Jítoho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yáha, suni súcuan nacani nahín ró jnúhun ri ini ñuu Roma, áchí yá.

Jeē ní casquínáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquínáhan jnúhun, te ni cacahān teyí i jeē ma cáji cuiñi i ni iñ ni ma cóho cuiñi i nde núu tu cahni i Pablo. ¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sūtú cácujuhnu jíin núu tēe jéhnu cándiso jniñu nuū ñayuu hebreo, te ni cacahān jíin tēe ún:

Ni cacahān teyí ná jeē ma cáji cuiñi ná ni iñ níni nde ná tu cahni na Pablo. ¹⁵ Núu súcuan te máá ní jijnáhan ní jíin táca gá tēe casáha junta cujéhnu ga, cuácáhān ni jíin general jeē quenehen de Pablo na jéé de nuū junta sajnē, chi cachi ni jēē cácuñi ni stichí vāha ga ní de. Te máá ná jijnáhan ná cotúhva ná cahni ná de nde ná tu quee de nuū cáhiin tūtú ní, áchí.

16 Te sēhe yíí cuáha Pablo ni nihīn i jnūhun jeē súcuan ni cacahān, te ni jehēn i cuartel, te ni castūhún i nuū Pablo.
17 Te ni cana Pablo xinī ñn jnáhan capitán, te ni cahān de:

Condeca ní súchi yáha quíhīn ni jín i nuū general, chí íyó ñn jnūhun castūhún i nuū de, áchí de.

18 Te capitán un ní jeca de i cuahān i jín de nuū general, te ni cahān de:

Pablo, tēe íne vecāa, ni cana de sãhá, te ni cahān de jín ná jeē quíndeca ná súchi yáha núu ní, chí íyó ñn jnūhun cahān i jín ní, áchí de.

19 Te ni jñi general ndaha i cuahān de jín i ñn lado, te yuhu-ni ni cajnúhún de i:

Na jnūhun cúni rō cahān rō jín rí, áchí de.

20 Te ni cahān i:

Tēe hebreo ni casquíjnáhan jnūhun de jeē cahān ndahú de jín ní quenehen ní Pablo sajnē quíhīn de nuū tãca tēe cásaha junta cujéhnú ga, chí cahān-ni de jín ní jeē cáconi de jeē stichí vāha ga de Pablo.
21 Te ma cuáha ni jnúhun, chí víhyá gā uū xico de cándētu sãhí de ichi, te ni cacahān teyí de jeē ma cáji cuiti de ni ñn ni ma cóho cuiti de nde núu tú cahni de Pablo, te vijna je cándētu tūhva de jeē cuáha ni jnúhun quíhīn Pablo nuū junta, áchí i.

22 Te ni cahān general jín i jeē ma cáchi i nuū ní ñn ñayuu jeē ni cahān i jnūhun yáha jín de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

23 Yūcuán na te ni cana general uū capitán de, te ni ndacu de jniñu jeē sátūhva de uū ciento soldado cájica jéhé jín únī xico uxī jeē cáyōsó caballo jín úu ciento jeē cándāha lanza, chí cahñn jecuāa ún quendacoo de jín Pablo quingoo de nde ñuu Cesarea. 24 Te suni ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. 25 Te ni tee de ñn carta jeē cahán jnūhun yáha:

26 Máá ná cúu Claudio Lisias, te tēe ná carta yáha cuájeē nuū ní, señor Félix, gobernador cujéhnú. Ndese tahū cúu ní. 27 Ñayuu hebreo ni cajñi i tēe yáha, te je yajni cahni i de núu, te ni jnama ná de jín soldado, chí ni jini na jéé séhe nación Roma cúu de. 28 Te ni jendeca ná de nuū junta maá i jjnáhan i jeē sãndaā i núu ña cuēchi ni sáha de. 29 Te ni jini na jéé siquí ley maá i cúu cuēchi cácahān i siquí de, te tu nihín na ni ñn cuēchi siquí de jeē cúu de ni jeē cóne de vecāa. 30 Te ni nihīn na jnúhun jeē sava tēe hebreo ni casquíjnáhan jnūhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jín ñayuu cájicān cuēchi siquí de jecoo i nuū ní, te jiñā cahān i jín ní na cuēchi ni sáha de. Je ni cahān yō, achí carta.

31 Te ni cajeca ñuú-ni soldado Pablo cuango jín de nde ñuu Antípatris, nájñuhun ni tahū jniñu nuū de. 32 Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuango de jín Pablo. 33 Te ni jinūcoo ñuu Cesarea, te ni cachihī carta ndaha gobernador, te suni ni cajeni Pablo nuū de. 34 Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē tēe ndañū Cilicia cúu Pablo. 35 Te ni cahān de:

Nde na quécoo tēe cájequin cuēchi siquī rō te cuni nahín rí jñuhun cahān rō, áchí de.

Te ni cahān de jeē na quíndihyū Pablo ini palacio ndīyi Herodes.

Jeē ni cahān Pablo jehē maá de nuū Félix

24

1 Te nuū uhún quivī te Ananías, sutū cujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnáhan ñuu de hebreo jín in tēe cúu abogado, nání de Tértulo. Te ni quivīcoo de nuū gobernador jeē cahān de cuēchi siquī Pablo. 2 Te ni cana gobernador Pablo ni quee de. Te ni quejé Tértulo cahán de cuēchi siquī Pablo, chí suhva ni cahān de jín Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jñuhun cájejnáhan iyó, chí cáyūcu váha yó. 3 Te na

cútahū ná, chí tāca quivī váha cúu tāca núu ndácu ní jniñu jeē váha sáha ní, tátā Félix.

4 Te tu cúní na snáa na cuéhē tiempo ni, te cáhán ndahú ná jín ní cuni nahín ní jecu-ni jñuhun cahān na jín ní. 5 Chi ni cajini na tēe yáha jēe cúu de in tēe tixín, te sáha de jeē cánacuajnáhan máá jnáhan ñuu ná hebreo ní cáhnu-ni tāca lado, te cúu de tēe cújéhu nuū ñáyuu cascuáha jñuhun tēe nání Jesús jeē ní jehnu ñuu Nazaret. 6 Te suni je ndúcú de jeē stívī de tēcá jniñu ini templo iī, te ni cajñi ná de.

Te cácuni na sándaā na síquī de núú, nájñuhun cáhán ley ñuu ná. 7 Te ni jinū-ni general Lisias, te ni quende fuerza de tēe yáha núu na jíjnáhan ná.

8 Te ni ndacu de jniñu jeē tāca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jín jñuhun cahān maá de te cuni ni jēe ni sáha de cuēchi jeē cácahān na jín ní, áchí Tértulo.

9 Te suni ni cacahān tēe hebreo jeē ni jinūcoo jín de jeē iyó ndáa jeē súcuan cúu cuēchi Pablo. 10 Yūcuāñ na te ni sáha gobernador seña nuū Pablo jeē na cáhán de, te ni cahān Pablo:

Je jíní na jēe cuehē cuiyā cúu ní gobernador ñuu yáha, te jeē yúcuan nújnahan ni na jēe sándaā ni síquī ná. 11 Chi máá ní cuu nanducú ní te cuni ni jēe sáá máá úxī uū quivī ni cuu jeē ni jéhēn ná ñuu Jerusalén jeē chiñuhún ná Yaā Dios. 12 Te tu ní stáhān jnáhan ná jín ni in ñayuu,

ni tu ní stóna ná ñáyuu ini templo ni ini vehe iĩ sinagoga ni ini maá ñuu. ¹³ Ni tú na jíin stéén de jeē iyó ndáa jnūhun cácahān de siquī ná. ¹⁴ Te jnūhun cáhān cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te maá jnūhun yáha-ni cúu jeē cácahān de jeē stívi ná. Te cándije ná táca jnūhun yósó núu tútu ley yā jíin núu tútu jeē ní catee tēe ni canacani jnūhun ya nde jenahán. ¹⁵ Te inuú ñūhun ni na jíin de jeē sáha Yaā Dios jeē nátecu táca ndíyi, cúu ñayuu ní casáha vāha jíin ñáyuu ní casáha néé. ¹⁶ Te jeē yúcuan máni jeē vāha ndíhvī ni na sáha ná. Súcuán te vāha iyó ni anuá na jéé tú na cuēchi ndéé siquī na núu Yaā Dios ni nuū ñáyuu.

¹⁷ Te ni jica cuu ná táca ñuu jicá jecu cuiyā, te sáa te ni ndee na jíin xūhun jéé ní cajēhe táca ñáyuu jeē chindéé ñáhán i jnāhan ñuu na cáyūcú Jerusalén. Te suni ni ndee na jéé socó na quitī nuū Yaā Dios. ¹⁸ Te íne ná ini templo siquī jeē cuchī ná ndundoo ná núu Yaā Dios te socó ná. Te jecu jnāhan ñuu ná hebreo jeē véjicoo Asia ni cajito de sãhá ini templo, te tú na ñayuu cuehē ni cóyūcu jíin ná jeē sávaā i. ¹⁹ Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? ²⁰ Chí tēe ni quecoo yāhá na cáhān maá de núu na cuēchi ni canihīn de siquī na ná ni indíchi na núu junta tēe cácujuhnu ini

ñuu ná. ²¹ ¿Te chí cájequin de cuēchi siquī na jéé ni cáhān jee ná suhva ná ni iyo ná nuū junta naún? Chí ni achi na jéé cándije ná jéé nátecu táca ndíyi, te jeē yúcuan cájequin ni cuēchi siquī ná, ni achi na jíin de. Achí Pablo.

²² Te Félix chí je jíni vāha de ndese cácañdije ñayuu Cristo. Te jeē ní jini sōho de jnūhun yáha te ni stétu de un jíjnāhan, te ni cahān de:

Nde na quée general Lisias te cajnūhun gá rī siquī jniñū yáha, áchí de.

²³ Te ni ndacu de jniñū nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnāhan de jeē chindéé ñáhán i de.

²⁴ Te ni cuu jecu quivī, te ni quiji tucu Félix jíin ñasihi de Drusila, te ñahan hebrea cúu ña. Te ni ndacu de jniñū jeē na quíji Pablo návāha nacani de jnūhun ndese cándije yó Jesucristo. ²⁵ Te ni cahān Pablo jíin de jeē cánuú sáha yó jniñū ndaā, te cánuú coto yó máa yó jeē ma sáha yó jniñū stívi, chí quivī sándihí te sándaā Yaā Dios jniñū ndivii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne rī te cana rī rohó quiji ró, áchí de.

²⁶ Te ñūhun ni de jeē cuāha Pablo xūhun núu de te siáa de quenda de vecāa. Jeē yúcuan tijni jínu ni cana de Pablo ni candajnūhún de. ²⁷ Te súcuán ni cuu uū cuiyā, te sáa te ni nucuiñī Porcio Festo nuū Félix. Te cuní Félix jeē na cúsiñ

ni ñayuu hebreo jíin de, te jeē yúcuan ní squéndōo de Pablo vecāa.

Jeē ni índichi Pablo nuū Festo

25

¹ Te sáá únī quiṽi jeē ni quiṽi Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te tāca sūtū cácujuhnu jíin tée cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. ³ Te ni cacahān ndahú jíin Festo jeē núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquíjnāhan jñūhun jeē cahni Pablo ichi. ⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quiṽi te nuhūn maá de ñuu Cesarea. ⁵ Te jeē yúcuan ní cahān de jíin táca tée ún:

Tāca níhín jeē cándiso jñíñu, na quíngo yó nde Cesarea, te yúcuan cácan ni cuēchi siquī de te núu íyó cuēchi de, áchí de.

⁶ Te ni ine de yúcuan únā chí úxī-ni quiṽi, te ni ndee de ñuu Cesarea, te inga quiṽi ni cucōo de mesa nuū sándaā de jñíñu, te ni cahān de jeē na quíji Pablo. ⁷ Te je cáhīn tēe hebreo jeē ní quiijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejéé-ni casájnúhún téyí siquī de, te tú na jíin ní cástéén jeē íyó ndāā jñūhun cácahān.

⁸ Te ni cahān Pablo jehē maá de:

Tu ní sáha ná ni ñn cuēchi siquī ley ñuu na jéé cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chi cúní de jeē cusí ni ñayuu hebreo jíin de, te ni cajnūhún de Pablo:

¿A tu cúní rō quinuhun rō Jerusalén te yúcuan sándaā rī siquī rō? achí de.

¹⁰ Te ni cahān Pablo:

Je índichi na núu cúndaā jñíñu jeē ndácu máá tée cúu rey nación Roma, te yāha cúu nuū cánuú cundaā jñíñu ná. Máá ní je jíiní vāha ni jéé tú na cuēchi ní sáha ná siquī tāca jñáhan ñuu ná hebreo. ¹¹ Chi núu ni sáha ná ñn cuēchi xeēn jeē jíiní ñúhún cuu ná, te íyó vāha jeē cúu na núu súcuan. Te núu tu íyó ndāā jñūhun jeē casájnúhún tée yáha siquī ná, te ni ñn tēe ma cúu chíhi de sáñá ndaha tēe yáha jíjnáhan de. Núu súcuan te cúní na quíhīn na núu maá rey nación Roma sándaā de siquī na, áchí de.

¹² Te ni cajnūhun Festo ndese cájeni ni tēe cándiso jñíñu jíin de. Yūcuán na te ni cahān de jíin Pablo:

Je ni cahān rō jeē cúní rō quíhīn rō nuū maá rey nación Roma sándaā de siquī rō. Núu súcuan te quíhīn nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quiṽi, te rey Agripa jíin Berenice ni jecondéhé de Festo nde ñuu

Cesarea. ¹⁴ Te tijni quivī ni coyūcú de yūcuán. Te ni nacani Festo jñūhun siquī Pablo nuū rey un. Te suhva ni cahān de:

Félix jeē ní cuu de gobernador, ni stóo de iin tēe ine vecāa yāhá. ¹⁵ Te ná ni jehēn ná ñuu Jerusalén, te sutū cácejéhu jín ñáyuu jéhu cándiso jniñu nuū ñáyuu hebreo ni jinūcoo i nuū na cájequin i cuēchi siquī tēe ún, te cácuni i jeē na cúu de. ¹⁶ Te ni cahān na jín i jeē tu iyó costumbre tāca tóhō Roma jeē cahni de iin tēe súcuan-ni, chi jini ñúhún condichi de jín ñáyuu cájequin cuēchi siquī de, návaha cahān de jehē maá de te cundaā núu iyó cuēchi de. ¹⁷ Yūcuán na te ni quecoo tútu i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñu jeē na quíji tēe ún. ¹⁸ Te cáhiin ñayuu cájequin cuēchi siquī de. Te ni jeni ni na jēe iyó cuēchi xeēn cahān de siquī tēe un núu, te tú cuiti. ¹⁹ Chi jeē cácahān de cúu máni siquī jñūhun cácañije-ni máá de, jín síquī iin tēe nání Jesús jeē jé ni jihī de, te Pablo cahān nihin de jeē ní natecu ndije tēe ún. ²⁰ Te tu ní cújnúni cuiti ni ná ndese sándaā ná, te ni cajñūhun ná de núu cúní de quihīn de ñuu Jerusalén te yūcuán cundaā siquī de. ²¹ Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ni achi de. Te ni cahān na jēe

na cóne de vecāa nde tají ná de quihīn de nuū rey un, áchí Festo.

²² Yūcuán na te ni cahān Agripa jín Festo:

Suni cúní maá ná cuni sōho ná jēe cahān tēe un, áchí de.

Te ni cahān Festo:

Sajnē te cuni sōho ní jēe cahān de núu súcuan, áchí de.

²³ Te inga quivī un ní quecoo Agripa jín Berenice. Te cáñūhun de sahma cújéhu de, ni quivicoo de ini vehe juzgado jín táca general jín tēe cácejéhu ini ñuu ún. Te ni ndacu Festo jniñu jeē na quíji Pablo. ²⁴ Te ni cahān Festo:

Cahān na jín ní, tátā rey Agripa, jín ndihi níhín jēe cáyūcu jín yó yāhá vijna. Yāha cúu tēe jeē siquī de ni candonda ndivii jñáhan de hebreo ñuu Jerusalén jín ndé ñuu Cesarea yāhá, te máni cácahān i jeē tú vāha jeē cótecu gā de. ²⁵ Te jéni ni maá ná jēe tú na cuēchi xeēn ni sáha de jeē cúu de. Te je ni cahān de jeē cuní de quihīn de nuū rey Augusto jeē sándaā rey un síquī de, te jeē yūcuan ní cahān na jēe tají ná de quihīn de nuū rey un. ²⁶ Te tu cúcáhu ni ná na jñūhun tee ná núu tútu quihīn jín de nuū rey yō. Jeē yūcuan ní ndacu ná jniñu ni quee de nuū yō jijnáhan yó, te cánuú gá nuū maá ní, tátā rey Agripa. Te stíchí ni de návaha níhín na jñūhun tee ná síquī de, te quihīn jñūhun un jín de nuū rey. ²⁷ Chi tu jéjñiñu cuiti jeē tají ná iin preso quihīn te núu tú castūhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnūhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhān de, te suhva ni cahān de:

² Tātā rey Agripa, cúsi ni ná vijna jeē cúu cahān na jíin ní siquī ndihi jeē casájnūhún ñayuu ñuu yō hebreo siquī ná.

³ Chi je jíni vāha máá ní tāca jéé ní tajnúni ñayuu ñuu yō hebreo jíin tāca jnūhun jeē tu cáhān inuú i jíin. Jeē yúcuán cáhān ndahú ná jíin ní jeē coo paciencia ni cuni sōho ní jnūhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ 'Je cájini tāca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te núu cácuni maá de cahān ndaā de, te je cájini de sāña jéé ndé lulí ná ni quivi ná nuū grupo fariseo, te grupo un nihin ga cánducú ndéyi de squícu de ley yā vésú tāca gá grupo tēe nación yō.

⁶ Te ñūhun ni na jnūhun ni jejnūhun Yaā Dios nuū tāca jíi yō jeē nastécu yā ndīyi, te máá siquī tāca jnūhun yáha-ni cúu jeē cájequin de cuēchi siquī ná. ⁷ Chi máá yó jeē cácuu yó jnáhan ndihúxi uū yucūn ñayuu Israel, cáñūhun ni yō jnūhun ni jejnūhun ya jeē nastécu yā ndīyi, te jeē yúcuán

nduú ñuú cáchiñúhún yó Yaā Dios te cájejniñu yó núu yā. Te suni súcuán ñūhun ni maá ná, tátā rey Agripa, te siquī jeē nácani ná jnūhun jeē natecu ndīyi cúu jeē cájicān jnáhan ñuu yō hebreo cuēchi siquī ná. ⁸ ¿Te chí má nastécu Yaā Dios tāca ndīyi cájeni ni ní naún?

Jeē ní cachi Pablo ndese ni jito xeēn de ñayuu cácdánje

⁹ 'Te máá ná chi ni jeni ni na jéé jíni ñūhún ndonda ná siquī ñayuu cácdánje i Jesús, Yaā ní jehnu ñuu Nazaret. ¹⁰ Te súcuán ni sáha ná ini ñuu Jerusalén, chí tāca sūtū cácujeñnu ni cajēhe de jnūhun jeē cóndiso jniñu ná chuhun ná cuéhē ñayuu vecāa siquī jeē cácdánje i Jesús, te íyó váha ni na núu cájehni de i. ¹¹ Te tijni jínu ni sáha ndevāha na jíin i ini táca vehe i sinagoga jeē ni sáha fuerza na i jeē na stóo i jnūhun cácdánje i. Te xeēn ni quitī ni na núu i, chí nde ñuu jicá ní jehēn ná ni sáha xeēn na jíin i.

Jeē ní cachi tucu Pablo ndese ni sama ya ini de (Hch. 9.1-19; 22.6-16)

¹² 'Te sūtū cácujeñnu ni cajēhe de jnūhun jeē cóndiso jniñu ná quihān na sáha xeēn na jíin ñayuu cácdánje cáyūcú ñuu Damasco nuú. ¹³ Te cuahān ná ichi ún, tátā rey, te caxū cúu, te ichi ándivi ní quiji in nduva ni ndindéé ndaxín núu na jíin núu tēe cuangoó jíin ná, te víhyá gā ndīi vésú niāndii. ¹⁴ Te ndihi ná ní cacotúú ná nuū ñūhun. Te ni jini sōho ná in jnūhun ni

cahān jīn ná jīn jnūhun yuhu yó hebreo: Saulo, Saulo, ¿najehe jító xeēn rō ruhū? Chi jeē sāha ró súcuan cúu nájñuhun stiquī jeē tu jéndije ti, te jéñú yatá tí xinī pulla, te súcuan stóho ti maá tí, áchí. ¹⁵ Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítóho na ní cahān yā jīn ná: Máá rí cúu Jesús, te jeē jító xeēn rō ñayuu cácuandije i ruhū cúu jeē jító xeēn rō ruhū. ¹⁶ Ndonga condichi rō, chi vēji ri nuū rō jeē tejñū ri rohó sāha ró jñiñu cúní rī, te nacani cájí ró jñuhun tāca jéē ní jito ró vijna, jīn jéē steén gā rī nuū rō tāca quívi quíji. ¹⁷ Te jnama ri rohó nuū tāca jñáhan ñuu rō jīn núu ñáyuu tāca gá nación, chi nuū ñáyuu un tájí rí rohó quíhīn rō. ¹⁸ Te tájí rí rohó quíhīn rō nuū i, chi nájñuhun nanune ró tñūú i cúu jeē steén rō jñuhun ri nuū i te jecūhun ni i. Chi ñayuu ná tu candije i ruhū, nájñuhun cájica i nuū néē. Te jeē candije i ruhū, quívi i nuū luz rī, te tuá quíhi i chíji jñiñu jeē cuní jexeén jeē cúu Satanás, chi sa suhva quíhi i chíji jñiñu cúní maá rí. Te tájí rí rohó quíhīn rō nuū i, návāha candije i ruhū te cone cáhnu ni rī nuū cuéchi i. Yūcuán na te inuú nihín tahu i jīn tāca gá ñayuu jeē ní sándoo ri anuá i, áchí yá jīn ná.

Jeē ní cachi Pablo ndese ni jetáhú de jñuhun ni cahān yā

¹⁹ Jeē yúcuán tu ní sáníhni ni na núu jñuhun ni cahān yā ichi ándiví jīn ná, tátā rey

Agripa. ²⁰ Chi ni jetáhú ná, te ni nacani ná jñuhun ya xīhna gā nuū ñáyuu ñuu Damasco, te sáa te ni nacani ná jñuhun ya nuū ñáyuu ñuu Jerusalén jīn ní región Judea jīn núu ñáyuu tāca gá nación. Te jñuhun ni nacani ná núu i cúu jeē na nacani ni i jeē stóo i cuéchi i te nasāma ini i sāha Yaā Dios, te na sāha i jñiñu váha jeē steén jeē ní nasāma ini i. ²¹ Te siquī jeē súcuan ni nacani ná jñuhun te ni cajñi jñáhan ñuu yō hebreo sñáá ini templo, te ni cacuni i cahni i sñáa núu. ²² Te ni chindéé ñáhán Yáa Dios sñáá, te jeē yúcuán índichi nihin na ndé vijna nacani cájí ná jñuhun ya nuū ñáyuu cácujeñnu jīn núu tāca-ni ñayuu. Chi tu chíso gá na jñuhun siquī jñuhun jeē ní nacani Moisés jīn tāca gá tēe ni canacani jñuhun Yaā Dios nde jenahán. ²³ Te ni cundaā jñuhun ni canacani de un jéē cánuú ndoho Cristo nde cuu yā, te xīhna gā maá yá natecu vésú tāca gá ndīyi, te súcuan steén cájí yá nuū ñáyuu jeē jñáma ya i, cúu ñayuu nación yō Israel jīn ñáyuu tāca gá nación, áchí Pablo.

Jeē ní nducú ndéyi Pablo scandije de Agripa jñuhun Jesús

²⁴ Te súcuan ni cahān Pablo jehé maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuán ní tīvi xíní rō, áchí de.

²⁵ Te ni cahān Pablo:

Tu ní tīvi xíní na, tátā Festo, chí sa suhva iyó cájí ndáa jñuhun cáhán na. ²⁶ Te máa

rey Agripa je jíni vāha de tāca jniñu ní íyo jeē ní nacani ná, te tu yúhú ná cahān na táca jnúhun yáha, chí je jíni vāha na jēē jíni de tāca jnúhun yáha, chí tú sāhi ní cúu tācá jniñu yáha. ²⁷ Tātā rey Agripa, ¿á cándíje ní jnúhun jeē ní cacahān tēe ni canacani jnúhun ya nde jenahán? Jéni ni na jēē cándíje ní, áchí Pablo.

²⁸ Yūcuán na te ni cahān Agripa jíni Pablo:

Va jéni ni rō jeē jíni jecu jnúhun ni cahān rō te sāha ró jeē cándíje ri Cristo, achí de.

²⁹ Te ni cahān Pablo:

Vēsú jíni jecu-ni jnúhun chí jíni cuéhē, te jícan tahú na jēē máá ní jíni táca gá tēe cájini sōho jnúhun cáhán na vijna, na cándíje ní nájnūhun cándíje máá ná, te tu cúni na jēē cónuhni ní nájnūhun núhni na.

³⁰ Te ni ndihi ni cahān Pablo tāca jnúhun yáha. Te ni ndocuñi rey jíni gobernador jíni Berenice jíni táca gá tēe cácujeñu cáyūcu jíni de.

³¹ Te ni cacujiyo de, te ni candajnúhun sín máá de:

Tú ni ñni cuēchi ní sāha tēe yáha jēē cúu de ni jeē cóne ga de vecāa.

³² Te ni cahān Agripa jíni Festo:

Cuu siáá ni tēe yáha núu jeē tu ní cáhán máá de jeē quihín de nde nuū rey yō nación Roma nuú, áchí de.

Jeē ní catají de Pablo cuahān de ñuu Roma

27

¹ Te ni cundaā jeē quihín Pablo jíni barco nde Italia,

te suni quingoo ná jíni de. Te Pablo jíni sava ga tēe cáhīn vecāa ni quivicoo de ndaha ñni capitán naní Julio jeē quíndēca de tēe un ndé Italia. Te Julio cúu ñni jnáhan grupo soldado naní Augusto.

² Te nde ñuu Adramitio nuū cájecuñi barco ni quenda ñni barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíni ná, te máá de cúu tēe ñuu Tesalónica región Macedonia. ³ Te inga quiví ni jinūcoo ná ñuu Sidón nuū cájecuñi barco. Te Julio ni cundáhú ni de Pablo, te ni jēhe de jnúhun ni jecondēhe Pablo táca amigo de, te ni cachindéē ñahán i de. ⁴ Te ñuu yúcuán ní quenda barco cuahān jíni ná. Te siquī jeē níhin yíhi tachī te tu ní cúu quihín yohó barco, te ni tee xín barco cuahān jíni ná xiin isla Chipre, ñuhun jeē íne sín nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jíni Panfilia cuahān ná, te ni jinūcoo ná ñuu Mira ndañúu Licia.

⁶ Te ñuu yúcuán ní nihín capitán ñni barco jeē véji ñuu Alejandría te quihín ichi Italia, te ni cahān de jíni ná ni quivicoo ná barco un. ⁷ Te cuéhē quiví ni cahīn na núu ndúte jíni barco, chí cuéé ní jica, te fuerza-ni ni jinūcoo ná yuñúu Gnido. Te tuá ni jēhe tachī un jnúhun quihín yohó barco, te ni cayāha ná núu jnúhma tachī xiin ñúu

Salmón jeē íne nuū isla Creta. ⁸ Te yōhyo ni canducú ndéyí tée cáscáca barco un, ní yāha jíin ná ní yumar xiin Creta. Te ni jinūcoo ná ìin lugar naní Buenos Puertos nuū cájecuññi barco, te yajni un íne ñuu Lasea.

⁹ Te je ni cuu cuehē quivī ni cajica ná jíin barco. Te je yajni quejéé vico míjin, te yūcuan cúu tiempo jeē yí jíca barco te sanaa te coo jnūndóho nuū mar. Te ni cahān ñihin Pablo jíin de:

¹⁰ Tátā jijnáhan ní, jíni na jeē yóhyo yí coo viaje yáha, te quiji jnūndóho siquī barco, te naa barco jíin ndajníñu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tée chíi barco. ¹² Te siquī jeē tu íyó váha lugar nuū ni jécuiññi barco un jeē cóyūcú de ní vico míjin, te ni cajeni ni cuehē gā de jeē vāha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyūcú de vico míjin. Chi Fenice suni íne yundúte isla Creta nuū cájecuññi barco, te ndijin ichi noroeste jíin suroeste.

Jeē ni jéquīhi ìin tachī ñihin jeē stónda ndute mar

¹³ Te ni jequīhi vīta táchī ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. ¹⁴ Te ni cunúu jecu gā, te ni quejéé-ni ìin tachī ñihin ndasí jeē naní

táchī nordeste. ¹⁵ Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chūcuan cuahān barco jíin ndihí ná sáha tachī. ¹⁶ Te ni yāha jíin ná xiin isla lulí jeē naní Claudia, nuū jnūhma tachī. Te vésú súcuan te yōhyo uhū ni cascáa ná barco lulí jeē ndiquín yatā barco cáhnu. ¹⁷ Te ni casquívī ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jññ nuū ñíti, te jeē yūcuan ní casnúu de sahma cóquin jeē stechí te jíca barco. Te ni casiáá de jeē na quihín ndé chi chūndahá táchī. ¹⁸ Te tu jécuiññi cuiti jeē yíhi tachī ñihin. Te inga quivī un ní caquejéé de cájete de ndajníñu ndiso barco, návāha nduñama gā barco te ma quéé chīji ndute. ¹⁹ Te quivī uní ni cajēhe núu ná ndaha ni cajete ná máá ndajníñu jéjníñu barco. ²⁰ Te cuehē quivī tu ní cájito ná níandii ni quīmi siquī jeē ín vicō, ni tu jécuiññi cuiti tachī ñihin ún, te tuá cáñuhun ni na cácu ná.

²¹ Te ni cuu quivī jeē tuá cáyeji cuiti na stāa. Te ni jecondichi Pablo sava mēhñu téé ún, te ni cahān de:

Tátā jijnáhan ní, núu ní cájetáhú ní jnūhun jeē ni cahān ná te ma quéndacoo yó Creta nuú, te ni ma cóto yó jnūndóho yáha ni ma náā ndajníñu núu. ²² Te vijna cahān ñihin na jíin ní jeē cuandeyí ni ni jijnáhan ní, chi

ni ñn ní má cúū ní, vēsú naa barco. ²³ Chi jeē cúni ni quiji ñn ndajéhé jeē ní tají máá Yáa Dios nuū ná. Chi máá yá cúu Jitoho ná, te jéjníñu ná núū yā.

²⁴ Te ndajéhé yā ún suhva ni cahān yā jíin ná: Pablo, ma yūhu ró, chi vāha-ni jinū rō nuū rey nación Roma, te jeē siquí rohó te sáha Yaā Dios jeē cácu ndihí tēe cáhīn jíin ró ini barco yāhá, áchí yá jíin ná.

²⁵ Tātā jijnáhan ní, ma yūhu ní núu súcuan, chi máá ná cúcáhnū ni na Yáa Dios jeē coo nájnūhun ni cahān ndajéhé yā jíin ná. ²⁶ Te jinū nahín yó ñn isla, te ma jinú yachī yō nuū quíngoo yó, áchí de.

²⁷ Te ni cuu uxī cuñ jecuáā nde jeē ní quejéé táchī, te jica barco nuū mar Adria, te cháha chúcuan cuahān barco sáha tachī. Te máá jecuáā ún te jeē ní cuu sava ñuū te cájeni ni tēe cáscáca barco jeē jé cuacuyajni jinū barco ñuhun íchi. ²⁸ Te ni casínga de ñn jeē cáchicuāhá de nasaa cúnú ndute, te ni cajini de jeē iyó ócō xahūn ñn metro. Te ni jica barco jecu gā te ni casínga tucu de, te ni cajini de jeē iyó ócō uxā na metro.

²⁹ Te cáyūhú de jeē jécujnáhan barco jíin toto, te ni cajihni de cuñ cāa gancho náhnū yatā barco un, te ni cascāne de nde jehē ndúte návāha chituu te jecuiñi barco. Te yōhyo jnáā de jeē na cundijin yachī. ³⁰ Te tēe cáscáca barco un ní canducú de cunu de quíngoo de jíin barco lulí te cácu de nuū jnúndóho quiji siquí barco cáhnū núú. Jeē

yúcuan ní casnúu de barco lulí un núū ndúte, te cásáha-ni de nájnūhun jeē snúu de inga cāa gancho ichi núú barco návāha tú cuni ñayuu jeē cácuni de cunu de quíngoo de. ³¹ Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnū jíin yó, te ma cácu cuiti maá ní jijnáhan ní, áchí de.

³² Yūcuán na te soldado ni cajehnde de yoho núhni barco lulí, te ni jneni-ni cuahān.

³³ Te nuū cuácundijin te ni cahān Pablo jíin táca tēe un jéē na cáji de staā. Te suhva ni cahān de:

Vijna íyó úxī cuñ quiví jeē cándito ní te tu cáyeji cuiti ni stāā. ³⁴ Te cáhán ndahú ná jíin ní jeē na cáji ni stāā, návāha nanihīn ni ní te cácu ní, chi ni ñn yó má cúū, ni ma tují cuiti yō, achí de.

³⁵ Te ni ndihí ni cahān de jnūhun yáha, te ni quihin de ñn staā, te mēhñu táca ñayuu un ní nacuatáhu de nuū Yaā Dios, te ni tahú sáva de staā ún, te ni quejéé de yéji de.

³⁶ Yūcuán na te ni candusiñi ni ndihí de, te suni ni cayejí de staā. ³⁷ Te ndivii na jéē cáñūhun ná ini barco cúu uñ ciento uní xico xahūn ñn ná.

³⁸ Te ni cayejí vāha ndihí ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quéé barco chīi ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuñi ndute,

te suni máá ñíti cúu, te cájeni ni de jinū de yūcuan jíin barco núu na cúu núu. ⁴⁰ Te ni cajehnde de yoho núhni cāa gancho yūcuan, te ni caque-ndōo cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núu návāha chundahá táchī barco, te ni quejéé caca quihīn jíin de ichi núu iyó ñíti. ⁴¹ Te ni jinū barco nuú níhin náquijnáhan ndute. Te ni quēe barco nuū ñíti ñúhun chíi ndute, te ni jnā-ni ichi núu te tuá ni jíca cuiti, te yatā barco un ní cahya-ni jeē níhin ni caní suhmā ndute mar. ⁴² Yūcuán na te ni candajnūhún soldado jeē cáhni de tāca preso návāha ma sūte i te cunu i quingoo i. ⁴³ Te cúní capitán un jéē cācu Pablo, te ni jesicoo de. Chi sa ni cahān de núu ndé ñáyuu jiní sūté te xīhna gā i na nūngoo i sūté i nuū ndute, te na quēnda-ni i quihīn i nuū ñúhun íchi. ⁴⁴ Te suni sūcuan na quécoo ndihī i quihīn i, sava i coso candá i jíin yujnu cúnu te sava ga i jíin pedazo yujnu barco. Te sūcuan ni cacācu ndihī ná ní jinūcoo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñáyuu cāyūcu yūcuan ní cacachi i nuū na jéē isla un nání Malta. ² Te ñáyuu un ní cacundáhú ni i sāña jíjnáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chi mījin sáha jeē

cúun saū. ³ Te ni stutú Pablo jecu tujnu íchi. Te jeē jnāā de tujnu un núu ñuhún te ñn coō xeén jínu ti ni quenda ti tujnu un jéē ní cujihní, te ni chiyuhú-ni ti ndaha de. ⁴ Te ñáyuu cāyūcu yūcuan ní cajito i jeē ndita caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyi núu sūcuan, te vēsú je ni cācu de nuū mar, te máá yāā sándaā jniñu ñáyuu tu jéhe ga yā jnūhun jeē cótecu de, áchí i.

⁵ Te ni caja Pablo ndaha de, te ni ñinga coō un núu ñuhún, te tú na vé ni ndóho de. ⁶ Te cándētu tāca ñáyuu jeē chūhun i cuiñi de chí cotúú-ni de te cuu de. Te ni cunahán téyi cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

⁷ Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sāña jíjnáhan ná, te ni jéhe núu de vehe de ni coyūcu ná jíin de unī quivī, te ni jito yúcún de sāñá. ⁸ Te tátá Publio cāa de, chi ndóho de cuehyī quīji jíin cuehyī niñī. Te ni jecondēhe Pablo tēe ún, te ni jicān tahú de te ni soó de ndaha de siquī tēe ún, te ni nduyāha-ni de. ⁹ Yūcuán na te ni quijicoo ndihī ga ñáyuu cácuñu yūcuán, te suni sūcuan ni canduvāha-ni i. ¹⁰ Te ñáyuu un ní cajéhe i cuehē ndajniñu ni cacutahū ná. Te nuū ni jíin quivī jeē quingoo tucu ná jíin barco, te ni cajéhe i tāca ndajniñu cuu ná ichi.

Jeē ni jínū Pablo ñuu Roma

¹¹ Te unī yoō ni coyūcu ná Malta. Te ñn barco jeē véji ñuu Alejandría ni ine Malta ní vico míjin, te ichi núú barco un ndéé uū figura ídolo ñuu de nání Cástor jíin Pólux. Te ni quivícoo ná barco un cuángoo ná. ¹² Te ni jinūcoo ná ñuu Siracusa, te yūcuan ní coyūcu ná unī quiví. ¹³ Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te ñnga quiví ún vāha ni quiji tachī ichi sur, te ni quendacoo ná ñuu Regio, te uū quiví te ni jinūcoo ná ñuu Puteoli. ¹⁴ Te yūcuan ní caquijnáhan ná jíin jecu hermano cácandíje, te ni cacana de sãña ní coyūcu ná jíin de ñn semana. Yūcuán na te ni quendacoo ná jéē quihñ ná ñuu Roma. ¹⁵ Te hermano cáyūcú ini ñuu Roma, je ni canihñ de jñūhun jeē jinúcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíináhan de, te ni nacu-atáhú de nuū Yaā Dios, te ni ndundeyí ni de. ¹⁶ Te sáá te ni jinūcoo ná ini ñuu Roma, te capitán ni squívi de tãca preso ndaha tēe cújéhnū nuū tãcá soldado ñuu Roma. Te ni cajēhe de jñūhun jeē cone sñn Pablo te condito ñn soldado de.

Jeē ní nacani Pablo jñūhun ya ini ñuu Roma

¹⁷ Te nuū unī quiví te ni cana Pablo tãca tēe cácujehnū nuū jnáhan ñuu de hebreo

cáyūcú ini ñuu Roma. Te ni cacutútú de, te ni cahān Pablo jíin de:

Tátā jíináhan ní, tú cuítí na vé ni sáha ná síquí jnáhan yó hebreo ni síquí tãcá jniñu ní catajnúní jíi yō. Te vēsú súcuan te ni cajñi i sãña ndé ñuu Jerusalén ni casquívi i sãñá ndaha tēe ñuu Roma jíináhan de. ¹⁸ Te tēe ñuu Roma jeē cácujehnū cáyūcú Cesarea ni castíchí de sãñá, te cácuñi de siáá de sãña núú, chi ni cajini de jeē tú na cuēchi ná jéē cúū ná. ¹⁹ Te jnáhan ñuu yó hebreo tu ní cájēhe de jñūhun. Jeē yūcuan ní cahān na jéē quiji ná núū maá rey cujéhnū ga nde ñuu Roma yāhá te sãndaā maá de síquí ná. Te tú vēji ná jéē cáquin na cuēchi síquí ñayuu nación yō. ²⁰ Jeē yūcuan ní cana ná níhín jíináhan ní, návāha cuni na tãca ní te ndajñūhun yó. Chi yóhó ñayuu Israel cáñūhun ni yó jeē nátecu ndīyi, te suu jñūhun un nácani ná, te jeē yūcuan cúu jeē nuhñi na jíin cadena yáha, áchí de.

²¹ Te ni cacahān tēe un jíin Pablo:

Tú ni ñn carta ni cátají ñayuu cáyūcú Judea nuū na jéē cástūhún de jñūhun ní, te tãca jnáhan yó Judea jeē ní quijicoo yāhá, tú ni ñn jñūhun néé ní cácahān de síquí ní. ²² Te cánujnahān ni ná cuni sōho ná ndese cúu jñūhun jeē cahān ni, chi je cajini na jéē tãcá-ni lado cácahān ñayuu contra síquí jñūhun jeē jéē steén ni, áchí de.

23 Te ni cajeni de ñn quivī, te ni quijicoo cuehē de vehe nuū néne Pablo. Te ni nacani de jñūhun ndese ndácu Yaā Dios jniñu, te ni steén cají de jñūhun nde jenéhen te nde ni ini. Te súcuan ni nducú ndéyí de scándíje de táca tée un jñúhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jñúhun jeē ní catee tēe ni canacani jñūhun Yaā Dios nde jenahán.

24 Te ni cacandíje sava de jñūhun ni cahān Pablo, te sava ga de tu ní cájetáhú de.

25 Chi tú inuú cáhīyo ni de. Te sáá cánducú de quingoo de te ni cahān Pablo:

Ndaā cahán jñūhun jeē ni cáhān Isaías, tēe ni nacani jñūhun Yaā Dios nde jenahán, chi suhva ni cahān de jíin táca jíí yō ni sáha Espíritu Santo:

26 Ni cahān Yaā Dios:

Cuáhán núū jnáhan ñuu rō
yāhá te cahān rō jíin i:
Vēsú cuni nahín váha ró te ma
jécūhun ni rō,
te vēsú coto vāha ró te ma cúni
rō.

27 Chi yōhyo nīhni ni rō,
chi tu cácuni rō cuatáhú ró.
Te yōhyo uhū cájini sōho ró,
chi tu cánujnahan ni rō cuni
sōho ró jñúhun ri.

Te nájnūhun cájesi rō tinūu ró
cúu jeē tu cácuni rō nanducú
ró ndese cúu,
te tu cácuni rō jeē násāma ini
rō

návāha nasávāha ri anuá rō
nuū cuéchi ró, ní achi
Yaā Dios.

Achí tutu. 28 Núu súcuan te
na cástūhun ná nuū ni jéē
jñúhun ni tají Yáā Dios jeē
jnáma ya yohó, nde vijna te

tájí yá jñūhun yáha quihīn nuū
ñáyuu táca nación jeē tu cájini
i jñūhun ya, te máá i chi cuni
sōho i, áchí de.

29 Te ni jínu ni cahān de
jñūhun yáha, te cuangoo
jnáhan de hebreo, te yōhyo ni
cacahān de siquī jñúhun yáha
jjnáhan de.

30 Te ni condee Pablo uū
cuiyā vehe jeē ní quihin núu
de ún. Te ni cuşī ni de cahān
de jíin táca ñáyuu ní quiji-
coo nuū de. 31 Te jéhnū-ni
ni nacani de jñūhun ndese
ndácu Yaā Dios jniñu, te ni
steén de jñūhun máá Jítóho yō
Jesucristo, te tú ni ñn ní jési
jeē nácani de jñūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jenahán ndasí, te yósó núu tútu iī jeē ní catee tēe ni canacani jnūhun ya. ³ Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. ⁴ Te ni natecu yā mēhñu ndíyí ni sáha Espíritu iī, te súcuan ni steén Yaā Dios jeē cúu ya Sēhe ya jeē ndíso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnūhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo iī ró nuū yā. Te ñūhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rohó, te sáha ya jeē coo ndeyí coo siī ni ró.

Jeē cuní Pablo quihīn de ñuu Roma

⁸ Te xīhna gā cástūhun rí nuū ró jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rohó. Chi ní ñáyívi jíte núu jnūhun cuahān ndese váha cácadíje ró yá. ⁹ Te máá Yaā Dios jiní yā jeē niní jícan tahu rī jehē ró jijnáhan ró nuū jícan tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. ¹⁰ Te níni jícan tahu rī nuū yā jeē núu cúní yā te nde vijna te cuu jecondēhe rí rohó. ¹¹ Chi cúu ni rī coto ri nuū ró jijnáhan ró, te steén gā rī jnūhun ya nuū ró, návāha quendōo váha ga anuá ró te cuiñi nīhin ga ró jíin. ¹² Súcuan cúní rī návāha sáha yó jéē inuú coo ndeyí ni yō jijnáhan yó siquí jeē inuú cácadíje yó yá.

¹³ Hermano jijnáhan ró, cúní rī jeē na jécūhun ni ró jeē tíjni jínu ni cuu ni rī jecondēhe rí rohó, te nde vijna ná tu cuu. Chi cúní rī scuité núu ga rī jnūhun ya mēhñu ró, návāha ni sáha ri mēhñu ñayuu tāca gá nación. ¹⁴ Chi cúu ri tēe táu siquí jnūhun ya, chi táu rī nacūaha ri jnūhun ya nuū ndíhi ñayuu, cúu ñayuu jiní gā siquí ndíhi jeē iyó ñayívi jíin jéē tu jíni cuiti, cúu ñayuu tūhva jíin jéē tú tūhva. ¹⁵ Jeē yúcuan cúu jeē ndíhví ni rī jeē suni nuū rohó ñayuu ñuu Roma nacani ri jnūhun jnáma ya yohó.

Jeē ndíso jnūhun váha ya poder

16 Chi tu cúcanu rī siquī jnúhun vāha ya, chi yúcuan cúu poder Yaā Dios jeē jnáma ya tāca ñayuu cácan díje, xīhna gā ñayuu hebreo te suni tāca gá ñayuu. 17 Chi jnúhun vāha ya un stéén nuū yō jeē ndáhva Yaā Dios cuēchi yó síquī jeē candíje yó jéē sáha ya jehē yō, te máá jéē candíje yó ní cuáhān yō. Chi súcuan cáhān nuū tútu ī: Ñayuu jeē ní ndahva yā cuēchi ī, técu ī jeē candíje ī jeē sáha ya jehē ī, áchí.

Siquī jeē iyó ndasí cuéchi ñayuu

18 Chi jíní vāha yó jéē Yaā Dios andiví, cuāha ya castigo xeēn nuū tāca ñayuu tu cácan díje te máni cuēchi casáha. Chi jíin jniñu néé casáha ī te cájesi ī nuū jnúhun ndaā. 19 Te ma cúu cahān ī jeē tu jécūhun ni ī siquī ndese Yaā cúu Yaā Dios, chi máá yá ni steén nuū ī. 20 Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jító ī nuū. Chi nde ni jecōo ñayiví jíin ndé vijna te cúu jécūhun vāha ni ī jeē máá yá cúu Yaā Dios te iyó poder yā ní cáni. Te jeē yúcuan má cúu cuiti cahān ī jeē tu jíní ī jeē iyó yá. 21 Chi vēsú ni cajini ī ndese Yaā cúu ya, te tu ní cáchiñúhún ī ya jeē cúu ya Yaā Dios, te ni tu ní nácuatáhú ī nuū yā. Chi sa suhva ni nduu ī ñayuu cájeni cāhá ni, chi ni candunéé í ī, te ni quendōo nee ini anuá ī. 22 Cácahān ī jeē ndichí ī, te sa suhva cáacunéé ī. 23 Chi ni castóo ī Yaā Dios

jeē yóhyo luu cújéhnú, jeē ma cúu cuiti. Te ni cajetáhú ī tācá imagen jeē casáha ī, jeē cāa nájnūhun tēe cájihī, te suni nde imagen saa jíin cóo jíin quiti cájica ndicúún ndaha.

24 Te jeē yúcuan ní siaá Yaā Dios ī jeē na sáha ī tācá jniñu jnéhén jniñu néé jéē cuní ī. Te casáha ī jniñu néé jíin jnáhan ī jeē cúu máá jnúhun canu. 25 Chi tu ní cácan díje ī jnúhun ndaā Yaā Dios, chi sa ni cacandíje ī jnúhun stáhú. Te cáhiyo yíñúhún ī te cáchiñúhún ī nuū tāca jéē ni sáha ya, lugar jeē chiñúhún ī máá Yaā ni sáha ún, Yaā jeē cánuú cahān yō jeē cujéhnú ya ní cáni. Amén.

26 Jeē yúcuan ní siaá Yaā Dios ī jeē na sáha ī tācá jniñu néé jéē cándiyo ni ī jeē cúu máá jnúhun canu. Chi nde ñahan ni casama ña modo sihí, te ni quiví ña jíin modo neé. 27 Te suni súcuan tēe ni casiáá de modo chíjñiñu jíin ñahan. Te nde ni nduquijí de ni casáha ndiyí de jíin jnáhan yí de, te tēe jíin tée ni casáha de jniñu jnúhun canu. Te cándoho de castigo siquī jniñu néé ní casáha de.

28 Te jeē tu ní cácuni ī cuajnúhún ī Yaā Dios, jeē yúcuan ní siaá yā ī jeē na cáni néé ni ī, te sáha ī tācá jniñu jeē tu iyó váha. 29 Te máni máá na jniñu jeē tu iyó ndáā cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cáccucésún ni, cájehni ndiyí, cácejnáhan, cástáhú, casáhuñū jnáhan, casájnúhún siquī

jnáhan. ³⁰ Cácahān jnūhun néé síquī jnáhan, cájito uhū Yaā Dios, cácujeē ni, cásándúxí máá, cásátéyí máá, cájequin costumbre neé, tu cájendetū nuū tatá nuū naná. ³¹ Te tu cájecūhun cuīti ni, tu squícu jnūhun jéjnūhun, tu íyó mánī jín jnáhan, tu íne cáhnu ni nuū jnáhan, tu cúndáhú ni jnáhan. ³² Te je cájini vāha i jeē ni sándaā Yaā Dios jeē ñayuu casáha súcuan, cánuú jnahnū ndetū i. Te vēsú súcuan cájini i, te níní casáha i jniñu néé un, te suni cánujnahan ni i jeē casáha jnáhan i súcuan.

Ndaā sándaā Yaā Dios síquī cuéchi

2

¹ Núu súcuan te róhó jéē cahán cuēchi síquī jnáhan, núu na-ni ñayuu cúu ró, ma cúu cahán rō jeē tú na cuēchi máá ró. Chi jeē cahán rō cuēchi síquī jnáhan ró cúu jeē ndénehen ró cuéchi síquī maá ró. Chi róhó jéē cahán cuēchi, suni súcuan sáha máá ró cuēchi. ² Chi jíní yō jeē Yaā Dios, ndaā sáha ya jeē ndóna ya síquī cuéchi ñayuu casáha súcuan. ³ Te róhó jéē cahán cuēchi síquī ñayuu casáha cuēchi, te suni súcuan sáha máá ró, ¿te á jéni ni rō jeē cácu máá ró quívi ndóna Yaā Dios síquī cuéchi, chí naún? ⁴ ¿A cújeē ni rō nuū jnúhun jeē yóhoyo vāha ni Yaā Dios jín ró, jín jéē iyó paciencia yā jeē tú yachí cuāha ya castigo nuū rō? ¿Te á tu jécūhun ni rō jeē jnúhun jeē yóhoyo vāha ni yā sáha jeē nácani

ni rō síquī cuéchi ró? ⁵ Chi nīhni ni rō te tu nácani ni rō síquī cuéchi ró. Te jeē yúcuan cáyā gā rō castigo síquī rō quívi sáha Yaā Dios juicio, máá quívi jeē cóo ndijin jeē ndaā sándaā yā síquī cuéchi. ⁶ Chi chunaa yā nuū ná ñn ná ñn ñayuu núu ndese jniñu ni casáha i. ⁷ Te ñayuu jeē tu jécuiñi i jeē sáha i jniñu vāha, cuāha ya jnūhun jeē cótecu i ní cáni. Chi ndúcú i quívi i nuū ndujéhnú yíñúhún i, nuū ní cáni cotecu i. ⁸ Te quití ni yā te cuāha ya castigo nuū ñayuu cujeē ni nuū yā, te cúniñni ni nuū jnúhun ndaā, chi sa nuū jnúhun yacuá yóho jetáhú i. ⁹ Te tāca ñayuu casáha jniñu néé, chi nihīn i jnúndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tāca gá nación. ¹⁰ Te sa suhva tāca ñayuu casáha jniñu vāha, chi quívi i nuū ndujéhnú yíñúhún i, te coo ndeyí coo sī ni i, xīhna gā ñayuu hebreo te suni súcuan ñayuu tāca gá nación.

¹¹ Chi Yaā Dios tu sáha ya cuenta ndese cúu ñn ñn ñayuu, chi inuú sáha ya jín i. ¹² Chi tāca ñayuu jeē casáha cuēchi, vēsú tu cáyihī i chíji ley jeē ni jéhe ya nuū Moisés, te tu níní ley un te jnahnū ndetū i. Te tāca ñayuu cáyihī chíji ley Moisés te casáha cuēchi, jín ley un sándaā yā cuéchi i. ¹³ Chi tu ndáhva Yaā Dios cuēchi ñayuu jeē maá jéē cúni nahín-ni i jnūhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuéchi

i. ¹⁴ Chi ñayuu tācá nación jeē tu cánevāha tutu ley jeē ni jéhe ya nuū ñayuu hebreo, te núu cásquicu máá i ley yā, suu cúu jeē cánevāha i ley yā ini anuá i, vēsú tu cánevāha i tutu ley un. ¹⁵ Te súcuan cástéén i jeē jnúhun ndácu ley un chí ñúhun ini anuá i. Te tāca jéē cájeni ni i jín ánuá i, suu cúu jeē steén nuū i siquī núu ni sáha i cuēchi chí váha ni sáha i. ¹⁶ Te súcuan coo máá quívī jeē jín Jesucristo sándaā Yaā Dios siquī tāca jéē tu íyó váha jeē ní cajeni sáhi ni tāca ñáyuu. Súcuan cáhán jnúhun vāha ya jeē nácani ri.

Siquī jeē tu cásquicu ñayuu hebreo ley Moisés

¹⁷ Te róhó cácahān rō jeē tée hebreo cácuu rō, te cátenuū rō maá ley Moisés, te cácutéyí rō jeē siquí Yaā Dios. ¹⁸ Te cájeni ni rō jeē jíní rō ndese nújnahan ni yā, jín jéē cúu nácāji vāha rō ndé-ni cúu jniñu váha, chí ni cacutūhva rō ley un. ¹⁹ Te cájeni ni rō jeē maá rō cácuu tēe steén ichi Yaā Dios nuū ñáyuu tu cájini cuiti, jín jéē cúu sáha rō jéē cúndijin ini anuá ñayuu cájica nájnūhun nuū nēē. ²⁰ Te cájeni ni rō jeē cúu steén rō nuū ñáyuu tú tūhva jnúhun ya, jín jéē maá rō cácuu maestro nuū ñáyuu tu jécūhun ni. Chi jín tutu ley yā te cájini rō ndese cúu jnúhun ndíchí jnúhun ndaā, cájeni ni rō. ²¹ Núu súcuan te máá rō jeē castéén nuū ñáyuu, ¿te naun tu cástéén rō nuū maá rō? Te máá rō

jeē cácahān jeē ma sácúíhná i, ¿te naun cásácúíhná máá rō? ²² Te máá rō jeē cácahān jeē ma cósiquí ndēē i, ¿te naun cásiquí ndēē maá rō? Te máá rō jeē cácahān jeē cácuquini ni rō ídolo, ¿te naun cásácúíhná rō ndajniñu jeē yúcu ini vehe ídolo? ²³ Te cácutéyí rō jín ley Yaā Dios, te vēsú súcuan te cásáha rō jéē cácahān ñayuu siquí yā, chí tu cásquicu máá rō jnúhun ndácu ley yā ún. ²⁴ Chi súcuan yósó núu tútu i: Ñayuu tāca gá nación, máni cácahān ndevāha i siquí Yaā Dios, jeē siquí cuēchi róhó ñáyuu hebreo.

²⁵ Te núu cásquicu rō ley Moisés, yūcuán na te níhín jniñu ndije jeē ní canihīn rō jnunī circuncidar. Te núu tu cásquicu rō ley un, te vēsú ni cuu rō circuncidar, te nájnūhun jeē tu ní cúu rō. ²⁶ Te tēe tācá nación, núu cásquicu de jniñu ndácu ley un, vēsú tu ní cánihīn de jnunī circuncidar, núu súcuan te nájnūhun ni canihīn de jnunī circuncidar. ²⁷ Te tēe jeē tu ní cúu circuncidar yiquí cúñu de, te cásquicu de ley yā, máá de cahān cuēchi siquí rō. Chi tu cásquicu rō, vēsú cánevāha rō tutu ley un, te ni cuu rō circuncidar. ²⁸ Chi nasūu jéē cáca ichi siquí iñ tēe sáha jeē cúu ndije de tēe hebreo. Te ni nasūu jéē cúu circuncidar yiquí cúñu iñ tēe sáha jeē cúu de tēe ndaā. ²⁹ Chi sa suhva tēe cúu hebreo ndije, cúu jeē ini anuá de ñúhun jnúhun ndaā. Te tēe cúu circuncidar ndije, chí nde jín ini jín

ánuá de sáha de jniñu ndaā te nasūu jēē ndiso de jnuni circuncidar jeē cahán ley un cúu. Tēe cándāa súcuan, nasūu ñáyuu cájejnúhún i de, chi máá Yaā Dios.

3

1 ¿Núu súcuan te na vé iyó gá nuū ñáyuu hebreo jeē quéndōo vāha ga i? ¿Te ndé níhín jniñu jeē casáha i circuncidar? 2 Vāha ndasí níhín jniñu. Xihna gā níhín jniñu jeē ni jéhe Yaā Dios jnūhun ya nuū maá i. 3 Te vēsú sava i tu ní cá candíje, ¿te á suu sáha jeē ma squícu ga Yaā Dios jnūhun ni jejnūhun ya, chí naún? 4 Tú cuíti jeē súcuan, chí vēsú núu ndíhi ñáyuu castáhú i, te Yaā Dios chí iyó ndāā yā. Chí suhva yósó nuū tútu iī jeē ni cáhān ñn tēe jíin yá:

Cahān ñáyuu jeē iyó ndāā ni jíin táca jnúhun cáhān ni,
te cuni i jeē iyó ndāā ní vēsú núu cácahān i siquī ní.

Achí tutu.

5 Te cácahān sava ñáyuu jeē iyó vāha jeē sáha yó cuéchi, chí cuéchi yó jéjniñu stéen jeē iyó ndāā Yaā Dios. Núu súcuan ¿te á cuu cahān yō jeē tú vāha sáha Yaā Dios jeē jéhe ya castigo núu jéjniñu cuéchi yó súcuan? (Va cáhān-ni nde ri nájnūhun cácahān ñáyuu ñayīví.) 6 Tú cuíti jeē súcuan. Chí núu jeē tú vāha sáha Yaā Dios, ¿te ndese cuu sándaā yā cuéchi ñáyuu ñayīví?

7 Te núu jnūhun stáhú cácahān ñáyuu jéjniñu stéen jeē yóhyo cújéhnú Yaā Dios

siquī jeē máni cáhān ndaā yā, ¿te á cuu cahān yō jeē tú vāha jeē cahān yā jeē cuéchi cúu jeē castáhú i? 8 Tuú, chí núu jeē súcuan cúu, te cuu cahān yō jeē vetū-ni sáha yó jēē neé návāha quee jeē vāha núu. Te sava ñáyuu cácahān ndevāha i siquī rī jeē súcuan cástéén rī, te tú ndaā. Ñáyuu ún chí iyó vāha jeē ndénehen ya cuéchi siquī i.

Ndivii yō iyó cuéchi

9 Núu súcuan ¿te á vāha ga ñáyuu cácuu yóhó ñáyuu hebreo vēsú inga ñáyuu naún? Tú cuíti jeē súcuan. Chí je ni cacahān yō jeē vēsú ñáyuu hebreo chí ñáyuu tāca gá nación, ndivii yō yíhi chíji cuéchi. 10 Chí suhva cáhān tutu iī:

Tú cuíti na ñáyuu ndaā iyó, ni ñn i.

11 Te tú cuíti ñáyuu jécūhun ni iyó,

te tú ni ñn i nánducú i Yaā Dios.

12 Ndíhi i ni cascuíta i jnūhun ya,

te inuú-ni ni castívi ndíhi i máá i.

Te tú cuíti ñáyuu sáha jniñu vāha iyó, ni ñn i.

13 Yaū sucūn i cúu nájnūhun yaū ndīyi jeē núne,

chí máni jnūhun stáhú cácahān i.

Te nájnūhun veneno coō yíhi yuhu i,

14 chí máni máá jnúhun ndevāha jnūhun uvuā cácahān i.

15 Te yóhyo ñama jehē i jeē cáhni i ndīyi.

16 Te ndé-ni cúu-ni nuū cájica i te squívi i jnündóho jeē jnahnú ndetū ñayuu.

17 Te tu cájica cuíti i jín jnúhun coyūcu mánī i,

18 te ni tu cánacani ni i jeē cónso iyo i nuū Yaā Dios.

Achí tutu.

19 Te jínī yō jeē tāca jnúhun cáhán ley jenahán, chí cáhán nuū ñáyuu yíhi chíji ley un, návāha ndihī i ma cúu cahán i jehē i. Chí ndenehen Yaā Dios cuēchi siquī i nde jín ñáyuu ní ñáyiví. 20 Chí tú ni ñn ñayuu quendōo ndaā i nuū yā jeē nducú i squícu i jniñu ndácu ley un. Chí ley un jéjníñu máni návāha cuni yō jeē iyó cuēchi yó.

Jeē jnáma ya yohó síquī jeē candíje yó jéé sáha ya jehē yō

21 Te vijna te je cájini vāha yó ndese ndáhva Yaā Dios cuēchi yó. Te nasūu ley un sáha jeē quéndōo ndaā yō, vésú maá tutu ley jín téé ni canacani jnúhun ya, ni cacahán ndese ndáhva yā cuēchi ñayuu. 22 Chí tāca ñáyuu jeē cá candíje i jeē ni jíhī Jesucristo jeē chúnaa yā cuēchi i, chí ndahva Yaā Dios cuēchi i siquī jeē súcuan cá candíje i. Chí ñnuú-ni cúu tācá ndihī ñayuu. 23 Chí ndihī yó ni casáha cuēchi, te jeē yúcuan tu ní cúu quendōo ndaā yō nuū Yaā Dios. 24 Te siquī jeē yóhyo vāha ni Yaā Dios, jeē yúcuan ndáhva yā cuēchi yó súcuan-ni. Chí siquī jeē ni jíhī Cristo Jesús cúu jeē jnáma ya yohó. 25 Chí Yaā Dios ní jeni ya Cristo návāha socō yā

maá yá chunaa yā cuēchi yó jéé ni jíhī yā. Te jnáma ya yohó núu súcuan cándíje yó. Te súcuan ní sáha Yaā Dios návāha stéén yā jeē Yaā ndaā cúu ya. Chí ichi yátá ní iyo paciencia yā, te tu ní chíhi ya cuenta cuēchi ñayuu. 26 Te tiempo yáha stéén yā jeē Yaā ndaā cúu ya, chí ndaā sáha ya jeē squéndōo ndaā yā ñayuu cándíje vésú iyó cuēchi i, chí cá candíje i jeē ní chunaa Jesús cuēchi i ni ndahva yā.

27 Núu súcuan ¿te á cuu cutéyí gá yō siquī maá yó? Ma cúu cuíti, chí ma cúu cutéyí yó cani ni yō jeē vāha squícu yó ley yā. Chí jnáma ya yohó máá síquī jeē cándíje yó jéé sáha ya jehē yō. 28 Núu súcuan te je jínī yō jeē ndáhva Yaā Dios cuēchi yó síquī jeē súcuan cándíje yó, te nasūu jéé nducú yó squícu yó jéé ndácu ley.

29 ¿Te á núu maá-ni ñayuu hebreo cúu ya Yaā Dios, chí naún? Tuú, chí suni cúu ya Yaā Dios jeē jnáma ñayuu tāca gá nación. 30 Chí ñn-ni Yaā Dios iyó, te ndáhva yā cuēchi ñayuu cá candíje jeē ní sáha ya jehē i, cúu ñayuu ndíso jnuni circuncidar, cúu ñayuu jeē tuú. 31 Te jeē cándíje yó jéé jnáma ya yohó, ¿á sáha jeē tuá jínī ñúhún squícu yó ley yā, chí naún? Tú cuíti, chí sa suhva sáha jeē vāha ga cuu squícu yó ley yā.

Abraham cúu ñn ejemplo nuú yō

4

1 Núu súcuan ¿te ndese

cahān yō siquī tāca jēē ní cuu jíin jíi yō Abraham? ¿Ndesē ni ndahvā cuēchi de? ² Nasūu jēē ni sāha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē váha ni sāha de. Te tu ní cutéyí de, chi nasūu síquī jeē ni sāha máá de cúu jeē ní ndahva Yaā Dios cuēchi de. ³ ¿Chi ndese cáhán tutu íi? Cáhán jeē ní candíje Abraham jeē sāha ya jeē ni jéjnūhun ya nuū de, te jeē yúcuan ní ndahva yā cuēchi de. ⁴ Te ñin ñayuu sájniñu, te yāhu i chi nasūu jēē cútahū i cúu, chi jeē chúnaa yō nuū i cúu. ⁵ Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i. ⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sāha i ní ñin jniñu jeē quéndōo ndaā i nuū yā. ⁷ Chi ní cahān de:

Nacā ndetū ñayuu jeē íne cáhnu ni yā nuū jniñu neé ni sāha i,
te tu ndénehen ya cuēchi siquī i.

⁸ Te nacā ndetū tēe jeē tuá chíhi máá Jítoho yō cuenta cuēchi de.

Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi jeē ní cahān yō jeē ní candíje Abraham jeē sāha ya jeē ni

jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ní cuu de circuncidar, chí ndé ná tuú? Nasūu jēē je ní cuu de circuncidar, chí nde ná tuú. ¹¹ Te cuéé gá te ní nihín de jnūnī circuncidar. Te suu ni cuu ñin seña, nájñūhun ñin sello jeē ní ndahva yā cuēchi de siquī jeē súcuan ní candíje de. Te jeē yúcuan ní cahān yā jeē cuu de jíi nuū tāca ñáyuu jeē candíje i jeē sāha ya jehē i, suni nuū ñáyuu tu ní cúu circuncidar, chí suni ndahva yā cuēchi máá i. ¹² Te suni cúu de jíi nuū ñáyuu ní cuu circuncidar, te nasūu máni jeē ní cuu i circuncidar, chí suni jeē ní jñi i ejemplo de. Chi cá candíje i jeē sāha ya jehē i, nájñūhun ní candíje máá de nde ná tu cuu de circuncidar.

Núu candíje yó te sāha Yaā Dios jeē ní jéjnūhun ya

¹³ Chi ní jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu síquī jeē ní nducú de squícu de ley yā cúu jeē ní jejnūhun ya un núu de, chí sa suhva siquī jeē ní candíje de jeē ní jéjnūhun ya, te ní ndahva yā cuēchi de. ¹⁴ Chi núu jeē máni máá ñáyuu nducú squícu ley cúu jeē nihín jeē ní jéjnūhun ya, núu súcuan te cándíje cāha yó nuú, te ma nihín jniñu jeē ní jéjnūhun ya ún. ¹⁵ Te ley chí sāha jeē nihín ñayuu castigo siquī jeē tu cúu squícu i. Te núu jeē tu ley, te suni tú

na jnūhun stívi ñayuu siquī ley coo núú.

16 Núú súcuan te ni jejnūhun ya jeē sáha ya jeē váha jín ñáyuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núú maá-ni ñayuu jeē nducú squícu ley jenahán, chi suni nuū tāca ñáyuu cá candíje nájñūhun ni candíje Abraham. Te súcuan cúu de jíi nuū tāca yó jeē cá candíje yó. 17 Súcuan ni sáha Yaā Dios chi ni candíje de jeē sáha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñáyuu. Súcuan ni cahān maá Yaā jeē nastécu ndīyí te cáhán yā ndese coo tāca jéé ná tu coo.

18 Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núú. Te jeē yúcuan ní nduu de jíi nuū cuehē ndasí ñáyuu, nájñūhun ni cahān Yaā Dios: Súcuan nducuehē yucūn rō, achí yá jíin de. 19 Te je yajni jinū de ciento cuiyā, te vēsú súcuan te tu ní quénda de nuū jnúhun cándíje de, vēsú jiní de jeē maá de jíin ñasihí de Sara je jéhnu ndasí ndíndúú de jeē ma cúu ga coo sēhe de. 20 Te tu ní nácani siquí ni de jeē ma cándíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nīhin ga de, te ni nacuatáhú de nuū Yaā Dios. 21 Chi ni cucáhnu vāha ni de jeē cúu

squícu Yaā Dios ndihí jeē ni jéjnūhun ya. 22 Te jeē yúcuan ní ndahva yā cuēchi de siquí jeē súcuan ni candíje de.

23 Te nasūu máá-ni siquí Abraham cúu jeē yosó núú tútu jeē ní ndahva yā cuēchi de jeē ní candíje de. 24 Chi suni yósó jéé siquí yohó jíjnáhan yó. Chi suni ndáhva yā cuēchi máá yó jéé candíje yó jéé cúu ya Yaā ní nastécu Jitoho yō Jesús. 25 Chi ni jihí Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

1 Núú súcuan te je ni ndahva Yaā Dios cuēchi yó siquí jeē ní candíje yó jéé sáha ya jehē yō. Te jeē yúcuan ní sáha ya jeē ní ndīvi yó nuū jnúhun manī yā jíin yó, siquí jeē ni jíhí Jitoho yō Jesucristo jehē yō. 2 Chi máá Cristo ni sáha jeē ni quívicoo yó núú Yaā Dios, chi ni sáha ya jeē váha yóhó siquí jeē súcuan cándíje yó. Te cáhīn nīhin yó jíin jnúhun jeē sáha ya jeē váha yóhó. Te cúsi ni yō chí ñúhun ni yō jeē jinú yō nuū lúu kujéhnu yó jíin Yaā Dios. 3 Te nasūu máá yáha-ni, chi suni cúsi ni yō jeē ndóho yó jnúndóho. Chi jíin yō jeē maá jnúndóho sáha jeē jéndeýí ni yō. 4 Te jeē jéndeýí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē ñúhun ni yō tāca jéé váha jeē cóo. 5 Te tāca jéé ñúhun ni yō, chi nihīn nahín

yó. Chi jnūhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuiti jnama yó máá yó, te ni jihí Cristo jehē yohó jéē cúu yó ñayuu íyó cuéchi. Te ni jihí yā maá quíiví jeē jé ni jeni Yaā Dios. ⁷ Te yí cúu jeē cúu ñn ñayuu jehē inga ñayuu, vésú jehē ñn ñayuu ndaā. Chí sanaa te íyó jínu jeē chúndeyí ni ñn tēe cuu de jehē ñn tēe ndaā vāha. ⁸ Te máá Cristo chí ni jihí yā jehē yō náa máni cuéchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuéchi yó síquī jeē ni jihí Cristo jehē yō. Núu súcuan te suni jíni vāha yó jéē jnama Cristo yohó núu castigo quiji quíiví sáha Yaā Dios juicio. ¹⁰ Chi náa cúu ga yō enemigo Yaā Dios, te síquī jeē ni jihí Sēhe ya jehē yō, te ni sáha ya jeē ndíiví yó núu jnúhun maní yā jíin yó. Te jeē súcuan ní ndíiví yó nuū jnúhun maní yā jíin yó, te suni jíni vāha yó jéē cācu yó síquī jeē técu Cristo, nduú yá jíin yó. ¹¹ Te nasūu máá yáha-ni, chí suni cúsi ndasí ni yō jíin Yaā Dios síquī jeē ni sáha Jitoho yō Jesucristo jehē yō, chí máá yá ni sáha jeē ní ndíiví yó núu jnúhun maní Yaā Dios jíin yó.

Jnúhun Adán jíin jnúhun Cristo

¹² Núu súcuan te jíni yō jeē ni quíiví cuéchi ini ñayíiví ní sáha máá ñn-ni tēe Adán. Te

jeē síquī cuéchi yúcuan te ni jecōo cuehyí jéhni ñayuu. Te jeē yúcuan cúu jeē jihí ndihi ñayuu, chí ndihi i yáhi cuéchi. ¹³ Te nde ná tu cuāha ya ley nuū Moisés, te je íyó cuéchi ini ñayíiví. Te síquī jeē ná tu coo ley yā, te tu ní chíhi ya cuenta jeē castíiví i. ¹⁴ Te vésú súcuan te nde tiempo Adán te nde tiempo Moisés ni yíhi ñayuu chíhi cuehyí jeē jéhni i síquī jeē íyó cuéchi i. Chi ni jihí i síquī cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cuníhni ni de nuū ñn jniñu ní ndacu ya. Te Adán ni cuu de ñn muestra máá Yaā ní quiji cuéé gá.

¹⁵ Te jnūhun jeē ni sáha Adán cuéchi, tu quíjnáhan cuiti jíin táhū jeē jnáma Yaā Dios yohó. Chi jeē ni stíiví máá ñn-ni tēe ún, jeē yúcuan cúu jeē jihí ndihi yó. Te jnūhun jeē jnáma Yaā Dios yohó cújéhnu ndasí gá, chí síquī jeē ni sáha máá ñn-ni tēe Jesucristo cúu jeē súcuan-ni jnáma ya ndihi ñayuu candíje. ¹⁶ Te cuéchi jeē ni sáha máá ñn-ni Adán, tu quíjnáhan cuiti jíin jnúhun jeē jnáma Yaā Dios yohó. Chi síquī máá ñn-ni cuéchi ún te ni quíivícoo ñayuu chíhi jnúhun jnahnū ndetū i. Te jnūhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vésú yóhyo cuehē cuéchi ni casáha i. ¹⁷ Chí síquī jeē ni sáha máá ñn-ni tēe Adán cuéchi, te ni nihín poder cuehyí jéhni ñayuu. Te sa suhva síquī jeē ni jihí máá ñn-ni tēe Jesucristo, te víhyá gá ni nihín ñayuu máá yá

poder jeē cótecu i caca ndaā i jíin yá. Chi ni ndahva yā cuēchi i siquī jeē yóhyo vāha ni yā.

¹⁸ Núu súcuan te siquī jeē ni sáha máá ñn-ni tēe Adán cuēchi, te ni quīvicoo ndihi ñayuu chīji jnūhun jnahnū ndetū i. Te sa suhva siquī jeē ni sáha máá ñn-ni tēe Jesucristo ñn jniñu vāha ndasí, te ndáhva Yaā Dios cuēchi ndihi ñayuu te cotecu i ní cáni. ¹⁹ Chi siquī jeē tu ní jéndije máá ñn-ni tēe, te ni quīvicoo cuehē ndasí ñayuu chīji cuēchi. Te suni súcuan siquī jeē ní jendije máá ñn-ni tēe Jesucristo, te ndáhva Yaā Dios cuēchi cuehē ndasí ñayuu.

²⁰ Te ni jēhe ya ley yā návāha cuni yō jeē cuéhē cuēchi cásaha yó. Te jeē ní nducuehē cuēchi yó, te víhyá gā cuehē cúu jnūhun jeē vāha ni yā jeē íne cáhnu ni yā nuū yō. ²¹ Núu súcuan te nájnūhun ni nihīn poder cuehyī jéhni ñayuu siquī jeē iyó cuēchi i, suni súcuan iyó poder jnūhun jeē vāha ni yā jíin yó. Chi ndáhva yā cuēchi yó te cotecu yō ní cáni siquī jeē ni jíhī jítoho yō Jesucristo jehē yō.

Jeē tuá yíhi yó chíji cuēchi chí yíhi yó ndaha Cristo

6

¹ Núu súcuan ¿te ndese cahān yō? ¿A caca ga yō jíin cuēchi návāha víhyá gā sáha ya jeē vāha yóhó jéē cóne cáhnu ni yā nuū yō? ² Ma cúu cuiti. Chi nájnūhun je ni jíhī yō jeē tuá yíhi yó chíji cuēchi, te ma

cúu ga caca yó jíin cuēchi núu súcuan. ³ ¿A tu cájecūhun ni rō jeē tāca yó jeē ní jendute yó siquī jeē ni quívi yó ndaha Cristo Jesús, suni ni jendute yó siquī jeē ni quívi yó chíji jnūhun jeē ni jíhī yō jíin yá? ⁴ Chi jeē ní jendute yó cúu nájnūhun ni quindūji yó jéē ni jíhī yō jíin yá. Te vijna te cuu caca yó jíin vida jeé jeē ni jēhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhnu ndasí yá.

⁵ Chi núu ni cundúú yó jíin yá siquī jnūhun jeē ni jíhī yō jíin yá, te suni súcuan cundúú yó jíin yá siquī jnūhun jeē ní natecu yō jíin yá. ⁶ Chi jíni yō jeē ní naa modo maá yó jeē ni jíca yó jíin ichi yátá, chi ni quívi yó núu jnūhun jeē ni jíhī yō jíin Cristo jíca cruz. Te súcuan ni naa modo yō jeē cúu yó mozo nuū cuēchi, návāha tuá cuajniñu yó núu tācá jniñu jeē máni cuēchi cúu. ⁷ Chi ñayuu jeē jé ni cajihī, je ni quendacoo i chíji tāca cuēchi. ⁸ Te núu je ni jíhī yō jíin Cristo, te cándije yó jéē suni súcuan ni natecu yō jíin yá. ⁹ Chi jíni yō jeē ní natecu Cristo, te ma cúu cuiti ga yā, chi cuehyī jéhni yóhó, tuá na vé cúu sáha jíin yá. ¹⁰ Chi jeē ni jíhī yā, te ñn jínu-ni ni jíhī yā jeē siquí cuēchi ñayuu. Te jeē técu yā vijna, chi sáha ya jeē cuní Yaā Dios. ¹¹ Te suni súcuan róhó jíjnáhan ró, sáha ró cuenta jeē nájnūhun ni cajihī rō jeē ní quendacoo ró chíji cuēchi. Te

cátecu rō návāha sáha ró jéē cuní Yaā Dios, chi ndúú ró jín Jítóho yō Cristo Jesús.

¹² Núu súcuan te ma cuáha ga rō jñūhun quíhi ró chíji cuēchi jín yiqui cúñu rō jeē cúū. Chi cuēchi ún stíhví ní rohó jéē na sáha ró táca jéē ndíyo néé ní rō. ¹³ Te ma cuáha ró máá ró cuajníñu ró núū cuéchi jeē cócuu ró jín jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuāha ndihī ró máá ró nuū yā jeē cuajniñu ró núū jniñu ndaā. ¹⁴ Chi tuá na poder cuēchi jeē cundeyí jín ró, chi tuá cáyihī ró chíji ley jenahán, chi sa cáyihī ró chíji jñūhun jeē váha ní yā jín ró.

Jñūhun mozo jeē steén ndese quéndō ñayuu cácanđije

¹⁵ ¿Ndese sáha yó núu súcuan? ¿A caca ga yō jín cuéchi siquī jeē tuá yíhi yó chíji leyjenahán, chi sa yíhi yó chíji jñūhun jeē váha ní yā jín yó? Ma cúu cuiiti. ¹⁶ Chi cájini rō jeē núu cuāha ró máá ró jeē cuatáhú ró sájniñu ró núū ññ tēe, núu súcuan te cácuu ró mozo nuū téé ún, te cánuú cuandije ró núū de. Te suni súcuan núu cuāha ró máá ró jeē sáha ró cuéchi, te mozo cuēchi cácuu ró, te cuu rō. Te núu cuatáhú ró nuū máá yá, te mozo yā cácuu ró jéē cáca ndaā rō. ¹⁷ Te na cútahū yō nuū Yaā Dios, chi vésú ní cacuu ró mozo nuū cuéchi, te vijna chi nde jín ini jín ánuá rō ní cajetáhú ró nuū jñūhun ya jeē ní quávicoo ró

núū. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núū jniñu ndaā. ¹⁹ (Ni cahān rī ññ jñūhun ndese cúu siquī mozo ini ñayívi yáha, chi tu cájecūhun yachī ní rō siquī jñūhun ya.) Núu súcuan te nájnūhun ni cajēhe ró máá ró nde saá jeē ní cajejniñu ró núū tácá jniñu jnéhén jniñu néé, suni súcuan cuāha ró máá ró vijna jeē cuajniñu ró núū jniñu ndaā, návāha coo ndoo coo ññ rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájejniñu ró núū jniñu ndaā. ²¹ ¿Te na vé ni canihñ rō siquī cuéchi ni casáha ró un jéē cáccuanu rō vijna sáha? Tú cuiiti, chi máá jéē jnahnú ndetū rō ní cáni sáha. ²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núū Yaā Dios. Te suu sáha jeē quéndō vāha ró, chi cáhīyo ndoo cáhīyo ññ rō nuū yā, te nde sandíhí te cotecu rō ní cáni. ²³ Chi yāhu jeē nihín ñayuu siquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cáni andiví, siquī jeē nduú yó jín Jítóho yō Cristo Jesús.

Jñūhun ñasihí jín yñ jeē steén ndese quéndō ñayuu cácanđije

7

¹ Hermano, je cájini rō ndese cáhán ley yā, te cájini rō jeē yíhi ñayuu chíji ley maá-ni núu técu i ñayívi yáha. ² Te yāha cúu nájnūhun ññ ñahan

jeē ní quijnáhan, chi cáhán ley jeē yáhi ña ndaha yáhi ña maá-ni núu técu de. Te núu ni jihí yáhi ña, te je ni quenda ña chíji ley jeē ní quijnáhan ña jíin de. ³Núu súcuan te núu quijnáhan ña jíin inga tēe níni técu gā yáhi ña, te casíquí ndéē ña de. Te núu je ni jihí yáhi ña, te je ni quenda ña chíji ley un. Te cuu quijnáhan ña jíin inga tēe, chi nasūu jēē casíquí ndéē ña núu súcuan.

⁴ Te suni súcuan róhó jíjnáhan ró, ñánī mánī, chí ndúú ró jíin Cristo. Chí nájnūhun ni cajihí rō jíin Cristo, te ni quendacoo ró chíji ley jenahán. Te vijna chí nájnūhun ni quijnáhan ró jíin inga, cúu jeē ní quívicoo ró ndaha Cristo, Yaā ni natecu mēhñu ndíyi, návāha cuu sáha ró jniñu váha jeē cuní Yaā Dios. ⁵ Chi ná ni cajica yó jíin modo maá yó nde saá, te ley un ní sáha jeē ní ndíyo neé ni yō tāca jēē cuní yíqui cúñu yō jeē sáha yó. Te yūcuan ní sáha jeē jnahnú ndetū yō nuú. ⁶ Te vijna te je ni quenda yó chíji ley jenahán, chí nájnūhun je ni jihí yō jeē ma nihín gā poder síquī yō. Te súcuan te íyó libre yō jeē cuajniñu yó núu Yaā Dios. Te jíca yó jíin modo jeé jēē cuní maá Espíritu, chí tuá yáhi yó chíji ley jeē ní tee Moisés jenahán.

Síquī cuēchi jeē ñūhun ini anuá yō

⁷ ¿Ndese cahán yō núu súcuan? ¿A ley ndíso cuēchi? Tú cuiti jeē súcuan. Te núu jeē tú ley yā, te ma cúni cuiti rī

jeē iyó cuēchi rī. Chi ma cúni rī jeē cuēchi cúu jeē ndíyo ni rī ndajniñu jnáhan rī núu tu ní cáhán ley jeē ma ndíyo ni yō. ⁸ Te súcuan ni nihín cuēchi modo cocuu jíin rí. Chí síquī jeē ndácu ley jniñu jeē ma sáha yó cuēchi, te ni quejéé ndíyo ni rī sáha rī tāca jēē neé. Te núu jeē tu ley, te suni tú na jnūhun stívi yó síquī ley nuú. ⁹ Chi ni íyo tiempo jeē técu rī jeē ná tu jecūhun ni rī jeē cahán ley. Te ná ni quejéé rí jecūhun ni rī jniñu jeē ndácu ley, te ni jecūhun ni rī jeē iyó cuēchi rī, te ni nduu rī nájnūhun ndíyi. ¹⁰ Chi ni jini rī jeē ley jeē sáha jeē cótecu anuá rī nuú, te tuú chí sa ni sáha jeē jnahnú ndetū rī nuú. ¹¹ Chi jíin jēē ndácu ley un jniñu, te ni nihín cuēchi modo cocuu jíin rí, te ni stahú ruhū. Chí jíin jēē ndácu ley jniñu, te cuēchi ni sáha jeē ní quenda jnūhun jeē jnahnū ndetū rī.

¹² Núu súcuan te íyó ndáā maá ley, te tācá jniñu ndácu chí íyó ndoo íyó ndáā vāha. ¹³ Núu súcuan te ley jeē iyó váha ún, ¿á suu sáha jeē jnahnú ndetū rī naún? Tú cuiti. Chí sa suhva maá cuēchi cúu jeē sáha jeē jnahnú ndetū rī, te súcuan stúu cuēchi ndese íyó máá. Chí jíin jniñu váha jeē ndácu ley te ni natūu jniñu neé jēē cúu cuēchi.

¹⁴ Chi jíni yō jeē nuú maá Espíritu vēji ley. Te ruhū chí sa névāha rī ñn modo neé máá rí jeē ni squívi ruhū jejniñu cāha rí nuú cuēchi. ¹⁵ Chí tāca jēē sáha rī, tu jecūhun ni rī najehē cúu jeē sáha rī. Chí jniñu

váha jeē cuní rī sáha ri, tu ndé níhín rī fuerza sáha ri, chi sa suhva sáha ri jniñu neé jéē tu cúvāha ni rī sáha ri. ¹⁶ Te náa sáha ri jniñu neé jéē tu cuní rī sáha ri, núu súcuan te nácuni rī jeē iyó ndáā ley. ¹⁷ Núu súcuan te nasūu rúhū cúu jeē sáha jniñu neé un, chi modo neé jéē ñúhun ini anuá rī cúu jeē sáha cuēchi. ¹⁸ Chi jíni rī jeē modo maá rí jeē névāha ri ini anuá rī, tú cuiti na vé jeē váha iyó. Chi cuní rī sáha ri jniñu váha, te tu ndé níhín rī fuerza sáha ri. ¹⁹ Chi jniñu váha jeē cuní rī sáha ri, tu sáha ri. Te jniñu neé jéē tu cuní rī, sa yūcuan sáha ri. ²⁰ Te náa sáha ri jniñu jeē tu cuní rī sáha ri, te nasūu rúhū cúu jeē sáha, chi modo neé jéē ñúhun ini anuá rī cúu jeē sáha.

²¹ Núu súcuan te ni jini rī jeē súcuan cúu jíni rí: Vésú cuní rī sáha ri jniñu váha, te sa máni modo neé cúu jeē ñúhun ini anuá rī. ²² Chi cúsi ni rī jíni ley Yaā Dios nde jíni ini anuá rī. ²³ Te ni nacuni rī jeē iyó inga modo neé maá rí jeē jési nuū jeē cuní rī sáha ri jeē váha. Te cúu ri nájnūhun preso nuū cuéchi jeē jícu jíni rí.

²⁴ Nacā jeē ndahú gá cúu ri núu súcuan. ¿Ndé ññ jnama ruhū nuū modo neé maá rí jeē jícu jíni rí jeē jnahnú ndetū rí? ²⁵ Na cútahū ndasí rí nuū Yaā Dios, chi maá yá cúu jeē jnáma ruhū nuū modo neé rí siquī jeē ni jíhī Jitoho rī Jesucristo jehē rī. Núu súcuan te vésú cuní yō squícu yó ley Yaā Dios, te jeē jíni fuerza

maá yó ma cúu, chi modo neé maá yó sáha jeē jejniñu cāha yó nuū cuéchi.

Siquī jeē jícu yó jíni modo cuní Espíritu Yaā Dios

8

¹ Núu súcuan te ma ndénehen Yaā Dios cuéchi siquī ñayuu cáyihí ndaha Cristo. Chi tuá cájica i jíni modo neé maá i, chi sa suhva cájica i nájnūhun cuní maá Espíritu yā. ² Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jnūhun jeē ni yíhi yó chíji cuéchi jeē jnahnú ndetū yō nuú. ³ Chi ni sáha Yaā Dios jeē quéndōo vāha ñayuu jeē tu ní cúu quendōo vāha jíni ley Moisés, siquī jeē tú na fuerza i jíni modo maá i jeē squícu i ley un. Chi ni tají yá Sēhe ya ni quiji, te ni nduu ya nájnūhun ñayuu cáhīyo cuéchi, návāha socō yā maá yá siquī cuéchi, vésú tú na cuéchi ya. Te súcuan ni ndonda Yaā Dios siquī cuéchi jeē ní casáha ñayuu jíni modo neé maá i. ⁴ Súcuan ni cuu návāha cuu squícu yó táca jniñu ndaā jeē ndácu ley, chi tuá jícu yó jíni modo neé maá yó, chi jícu yó nájnūhun cuní maá Espíritu.

⁵ Chi ñayuu jeē cájica jíni modo neé maá, chi máni ndíhví ni i siquī jeē cuní maá i. Te ñayuu jeē cájica nájnūhun cuní Espíritu, chi máni ndíhví ni i siquī jniñu cuní maá Espíritu. ⁶ Te jeē ndíhví ni yō siquī modo cuní maá yó sáha

jeē jnahnú ndetū yō. Te jeē ndihví ni yō siquī jniñu cúní maá Espíritu, sa suhva sáha jeē cotecu yō ní cáni te coo ndeyí coo sī ni yō. ⁷ Chi ñayuu jeē ndihví ni siquī modo neé cúní maá i, chi jíto uhū i Yaā Dios, chi tu cúní i cuatáhú i ley Yaā Dios, te ni ma cúu squícu i. ⁸ Jeē yúcuan, ñayuu jíca jíin modo cuní maá, tu cúu sáha i jeē cúsi ni Yaā Dios jíin i.

⁹ Te máá ró jijnáhan ró, chi tuá cájica ró jíin modo cuní maá ró, chi cájica ró nájnūhun cúní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyih i ndaha ya. ¹⁰ Te núu ndéé Cristo ini rō, te vésú in quiví te cuu yiqui cúñu rō jeē siquí cuēchi, te cotecu anuá rō siquí jeē ní ndahva Yaā Dios cuēchi ró. ¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēñu ndíy i, yūcuán na te máá yá suni sáha ya jeē natecu yiqui cúñu rō jeē cúu. Te sáha ya súcuan jeē jíin máá Espíritu yā jeē ndeé ini rō.

¹² Núu súcuan, hermano jijnáhan ró, ndéé jniñu yó jéē caca ndaā yō, te nasūu jéē sáha yó modo neé cúní maá yó. ¹³ Chi núu caca ró jíin modo neé máá ró, te jnahnū ndetū rō. Te núu jíin fuerza maá Espíritu snáa rō táca jniñu cásáha ró jíin modo neé máá ró, te cotecu rō ní cáni.

¹⁴ Chi táca ñayuu jeē cándiquin modo jeē steén Espíritu Yaā Dios, máá i cácuu

sēhe Yaā Dios. ¹⁵ Chi Espíritu jeē ní canihin rō, tu ní sáha ya rohó jéē cuu ró nájnūhun mozo nuū yā jeē yūhú tucu ró núu yā, chi sa ni sáha ya jeē cúu yó sēhe ya. Te jeē yúcuan cúu jeē cahán jee yó: Tátá maá ná. ¹⁶ Te máá Espíritu steén yā ini anuá yō jeē cúu ndije yó sēhe Yaā Dios. ¹⁷ Te núu sēhe ya cácuu yó, te suni nihin yō maá táhū jeē ni jéjnūhun ya, te in cáhnu-ni coo tahū yō jíin Cristo. Chi núu ndóho yó jíin yá vijna, suni cujéhnu yó jíin yá andiví.

¹⁸ Núu súcuan te sáha ri cuenta jeē táca jnúndóho jeē ndóho yó vijna, lúli ndasí cúu nuū jnúhun jeē cujéhnu luu yó jíin yá cucuéé gá. ¹⁹ Chi ndihí jeē ni jécōo, yōhyo cándetu jeē na sáha Yaā Dios jeē nduvāha, quiví quenda ndijin jeē cujéhnu sēhe Yaā Dios jijnáhan i. ²⁰ Chi táca jéē ni jécōo, chi ni quiví chíj i jnúhun jeē tu quéndōo vāha. Te nasūu jéē ní castív i máá, chi ñayuu ni casáha cuēchi, te jeē yúcuan ní squéndōo Yaā Dios súcuan. Te máni cándetu jeē ndúvāha. ²¹ Chi in quiví te táca jéē ni jécōo, chi quenda chíj i jnúhun jeē tív i jíin jéē tehyú. Te nduluu ndasí nájnūhun coo táca sēhe Yaā Dios, chi cācu nuū jnúhun jeē tu quéndōo vāha. ²² Chi jíin yō jeē táca jéē ni jécōo, chi nde vijna te nájnūhun inuú-ni cándoho te cájitū ni jeē na ndúvāha ndihí. ²³ Te nasūu máá-ni táca jéē ni jécōo cúu jeē ndóho, chi suni nde maá yó ndóho yó,

vēsú je névāha yó Espíritu jeē cúu seña jeē ñn quivī te nihīn yō ndihī tahū yō. Chi yōhyo ndóho yó jnúndóho, te ndétu yó jēē náquihin séhe ya yohó te jnama ya yiquī cúñu yō jeē tuá ndoho yó jín. ²⁴ Chi ni jnama ya yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jín yó. Chi tuá ndétu yó te núu je ni cuu súcuan. ²⁵ Te núu ná tu coto yó jēē sáha ya jeē ñúhun ni yō, yūcuán na te jín paciencia ndétu yó jēē sáha ya.

²⁶ Te suni súcuan máá Espíritu chíndéé ñhán yá yohó jēē tú na fuerza ini yō. Chi tu jíní yō cacān tahú yō nájnūhun cánuú. Te máá Espíritu cahán ndahú yá jín Yaā Dios jehē yō síquī tāca jēē jítu ndasí ni yō te tu nihín yō jnūhun ndese cacān tahú yō. ²⁷ Te máá Yaā Dios jeē jító ndee anuá yō, chí jíní yā tāca jēē cuní maá Espíritu cahán yā jehē yō. Chi ñayuu cáyihī ndaha Yaā Dios, cáhán ndahú Espíritu jehē i nájnūhun cuní Yaā Dios.

Vāha-ni cúndeyí yó síquī ndihī jeneé

²⁸ Te jíní yō jeē tācā-ni jeē quíji nuū ñayuu manī jín Yaā Dios, jeē vāha chí jēē uhú, chí quéndōo vāha ga i nuū yā, sáha ya jín tāca jēē yúcuan. Chi cácuu i ñayuu jeē ní cana ya i ni quivīcoo i ndaha ya síquī jeē súcuan ni tee ni yā nde jenahán. ²⁹ Chi nde ná

tu coo i te je jíní yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Sēhe ya ñani jéhu nuū cuehē ñayuu cácuu ñani cácandíje. ³⁰ Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē kujéhu i.

³¹ ¿Te ndese ga cahán yō síquī jnúhun jéhu yáha núu súcuan? Chi núu íne Yaā Dios jín yó, ¿te ndé ñn cuu cahán síquī yō? Tú ni ñn. ³² Chi máá yá tu ní jnáma ya Sēhe ya jeē ma cúu yā, chí sa suhva ni jēhe ya Sēhe ya ni jihī yā jehē ndihī yó. Te núu súcuan ni jēhe ya Sēhe ya, te nagā ni cuu jeē ma cuáha ya tāca gá jeē jíní ñúhún yó. ³³ ¿Te ndé ñn cuu cahán cuēchi síquī ñayuu jeē ní nacāji Yaā Dios? Tú ni ñn. Chi máá yá ni ndahva yā cuēchi i. ³⁴ ¿Te ndé ñn cuu ndenehen cuēchi síquī yó núu súcuan? Tú ni ñn. Chi máá Cristo cúu jeē ni jihī yā jehē yō, te suni ni natecu yā. Te vijna te ndéé yá lado váha Yaā Dios nuū kujéhu ya, te cáhán ndahú yá jín Yaā Dios jehē yō. ³⁵ ¿Te ndé ñn cuu quenehen yóhó núu jnúhun cúndáhú ni Cristo yohó? ¿A jnúndóho, chí tāca jēē yí sáha, chí jēē cájito xeēn ñayuu yohó, chí jnámā, chí jēē cúmanī sahma, chí jnúhun yúhú, chí jēē cáhni i yóhó naún? Ni ñn tāca jēē yáha. ³⁶ Chi súcuan yósó núu tútu ñ jeē cácahán ñayuu cácandíje jín Yaā Dios: Jeē síquí maá ní te ndihī-ni

hora cáncuni i cahni i
sāñá.

Te cásáha i jíin ná nájñūhun
cásáha i jíin lanchi,
quiti cúu.

Achí tutu. ³⁷ Te tuú chi
vēsú cándoho yó táca jēē yáha,
te vāha-ni cūndeyí yó siquī
ndihi-ni, sáha máá Yaā jeē
ní cundáhú ni yohó. ³⁸ Jeē
yúcuan cúcáhnū ni rī jeē tú ni
ñin cuu quenehen yóhó núū
jnūhun cūndáhú ni Yaā Dios
yohó. Ni núu cuu yō, ni
núu cotecu yō, ni tācá ndajéhé
andiví, ni tāca jēē neé jēē
cácujuhnu jñí poder, ni jeē
iyó vijna, ni jeē cóo, ³⁹ ni jeē
iyó núū sūcún, ni jeē iyó núū
cūnú, ni tāca gá jeē ní jecōo,
ma cúu cuiti quenehen yóhó
núū Yaā Dios, jeē jíin Jítoho yō
Cristo Jesús ni cundáhú ni yā
yohó.

*Siquī ndese ni nacāji ya
yucūn Israel*

9

¹ Te cáhán ndaā rī chi cúu rī
tēe cándije Cristo, te tu stáhú
rí, te jíní rī ini anuá rī jeē
cahán ndaā rī sáha Espíritu
Santo. ² Yōhoyo cúcuíhyá ni
rī, te níní jñáhuñū ni anuá
rī ³ jeē siquí tāca jñáhan rī
ñayuu nación hebreo, chi
ñin-ni yucūn rī jijnáhan rī. Chi
jeē siquí máá i te cúu ni rī
jeē núu na cúu te cujiyo rī
nuū Cristo te jnahnū ndetū rī,
návāha jíin yúcuan te cuu cácu
ánuá máá i núú. ⁴ Chi cácu
i yucūn ñayuu Israel, te nde
jenahán ni sáha Yaā Dios jeē
cúu i sēhe ya, te mēhñu vícō
jeē ndíndēé ní condee yā jíin

i sáá. Te jíin máá i ni sáha ya
tācá contrato, te ni jēhe ya ley
yā nuū Moisés jeē cúu máá i,
te ni steén yā ndese chiñúhún
i ya ini templo, te nuū maá i
ni jejnūhun ya cuehē jñūhun.
⁵ Te máá i cácuu yucūn tāca
jíi yō jeē ní cacujéhnū, te suni
yucūn máá i ni cacu Cristo jeē
ní nduu ya tēe. Te máá yá cúu
Yaā Dios jeē jñí ndihi-ni, te ní
cáni cahān ñayuu jeē cujéhnū
ya. Amén.

⁶ Te nasūu jēē tu ní quée
ndaā tāca jñūhun jeē ni
jéjnūhun Yaā Dios nuū ñayuu
Israel. Chi ni quee ndaā
nahín núū vēsú jecu-ni i, chi
tú ndihi-ni yucūn Israel cúu
jeē cácandije. ⁷ Chi nasūu
ndihi yucūn Abraham cácuu
ndije sēhe de jeē ni jéjnūhun
ya. Chi ni cahān Yaā Dios
jíin de: Nuū maá-ni sēhe ró
Isaac cúu nuū coo yucūn rō
jeē ni jéjnūhun rī nuū rō. ⁸ Te
jnūhun yáha cúní cahān jeē ni
ñin ñayuu tu cúu i sēhe Yaā Dios
siquí jeē ní cacu i ñin yucūn jeē
jéni ni i jeē váha ga cúu. Chi
sa suhva máni yucūn jeē ni
jéjnūhun ya cúu ndije yucūn
jeē chíhi ya cuenta. ⁹ Chi yāha
cúu jñūhun jeē ni jéjnūhun ya
nuū Abraham: Máá tiempo
jeē ní jeni rī te quiiji rī, te cacu
ñin sēhe yí ñasihí ró Sara, achí
yá.

¹⁰ Te nasūu máá yáha-ni,
chi suni Rebeca ni cacu uū
sēhe yí ña, te ñin-ni tátá
ndíndúú i, jeē ní cuu jíi yō
Isaac. ¹¹⁻¹³ Te nde ná tu cacu
ndíndúú i, te ná tu sáha i jeē
váha jeē uhú, te je ni cahān
yā jíin Rebeca: Sūchi ní cacu

xīhna gā cuajniñu i nuū súchi sándihí, áchí yá. Chi suni súcuan cáhán tutu iī: Ni jito manī rī Jacob, te Esaú chi tuú, áchí Yaā Dios. Te súcuan jíní yō jeē maá Yaā Dios cuu nacāji ya ñayuu núu ndese tée ni maá yá, te nasūu síquī jniñu jeē sáha i, chi sa suhva síquī ndese cúní maá yá nacāji ya i.

14 ¿Ndese cahān yō núu súcuan? ¿A jēe tu íyó ndāā Yaā Dios jeē sáha ya súcuan, chí naún? Tú cuiti. 15 Chi nde jenahán ní cahān yā jín Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha rī jeē váha jín, te sáha rī jín, áchí yá. 16 Núu súcuan te nasūu síquī jeē cuní maá ñayuu, ni nasūu jēe nducú ndéyí máá i cúu, chi síquī ndese cúní maá yá cundáhú ni yā i. 17 Chi suni súcuan yósó núu tútu iī jeē ni cáhān yā jín rey ñuu Egipto: Ni jeni rī rohó jēe cúu ró rey, návāha jín rohó te stéén rī poder rī, te návāha cuitē núu síhví rí ní ñáyiví, áchí yá. 18 Núu súcuan te núu ndé ñn cúní yā cundáhú ni yā, te cundáhú ni yā. Te núu ndé ñn cúní yā jeē cunīhni ni, te sáha ya jeē cunīhni ni.

19 Te sanaa te cahān ñn ró jín rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. 20 Te sa suhva cáhán rī jín ró: Róhó, ¿ndé ñn cúu ró jēe jéni ni rō stió cuñí rō nuū Yaā Dios? ¿A cuu cahān quísi ñuhun jín tée ni sáha: Najehē ni sáha ró

rúhū súcuan? achi. 21 Chi tēe sáha quísi, cuu sáha de ndese cúní maá de, chi ñn-ni ñuhun cuu sáha de ñn quísi fino te inga quísi corriente.

22 ¿Te á tu jétáhú ró jeē suni súcuan sáha Yaā Dios jín ñayuu? Chi cúní yā steén yā ndese sáha ya juicio síquī ñayuu, te súcuan te cuní i poder yā. Te vésú súcuan te ni íyo paciencia ni yā jeē tu ní ndóna yachí yā síquī ñayuu jeē jnahnú ndetū. 23 Te sáha ya súcuan návāha stéén yā ndese yóhoyó luu cújéhu ya síquī jniñu sáha ya jín yóhó ñayuu cundáhú ni yā. Chi nde jenahán je ni sátühva ya yohó jēe luu cújéhu yó jín yá. 24 Chi ni cana ya yohó jēe candíje yó, te sava yó cúu ñayuu hebreo te sava yó cúu ñayuu tāca gá nación. 25 Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní íyo manī rī jín, vijna te cahān rī jeē cácuu i ñayuu jeē manī rī jín.

26 Te máá lugar nuū ni cáhān rī jeē násūu ñayuu rī cácuu i,

suu yūcuan cáhān ñayuu jeē cácuu i sēhe Yaā Dios, Yaā técu ní cáni.

Achí yá. 27 Te Isaías sa suhva ni cahān de jñuhun ñayuu Israel: Vésú ni cayā yucūn Israel nájnūhun ñítí yumar, te jecu-ni i jnama ya. 28 Chi Jitoho yō Yaā Dios, yachí sínu ya jniñu jeē sándaā yā cuēchi

ñayuu ñayīvī. Achí tutu. ²⁹ Chi nájnūhun ni cahān tucu Isaías: Máá Yáā cúu Jitoho nuū tācá ndajéhé andiví, núu tu ní jnáma ya jecu yucūn yō nuú,
te je ni ndoho yó nájnūhun ñayuu ñuu Sodoma jíin ñuu Gomorra, jeē ní naa ndihi.
Achí tutu.

Jeē tu cájetáhú ñayuu hebreo jnūhun jnama ya i

³⁰ ¿Ndese cahān yō núu súcuan? Suu jeē ñayuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi siquī jeē ní candíje i jeē ni jíhī Cristo jehē i cúu jeē ní ndahva yā cuēchi i. ³¹ Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cúndeyí i quendōo ndaā i. ³² ¿Te najehē? Siquī jeē tu cánducú i jeē ndahva yā cuēchi i jeē candíje i jeē ni jíhī Cristo jehē i, chi sa jéni ni i jeē squícu máá i ley te quendōo ndaā i. Te jeē stívī i súcuan cúu nájnūhun cácotúú i siquī maá yúu jeē cácachihī jehē, te suu cúu Cristo. ³³ Chi súcuan cáhán nuū tútu īi:
Nde ñuu rī Sion sáha ri jeē cóne maá Yaā jeē cúu nájnūhun yuū jeē cácachihī i jehē i.

Te cúu ya nájnūhun toto jeē cotúú i sáha.

Te sa suhva ñayuu cácdíje Yaā ún, chí jnama nahín yá i.

Achí Yaā Dios.

10

¹ Hermano jijnáhan ró, cúu ndasí ni rī te jícan tahu rī nuū Yaā Dios jehē ñayuu nación rī Israel, jeē na jnáma ya i jijnáhan i. ² Chi cáhán rī jeē vāha cásáha i jeē ndihví ni i cáchiñúhún i Yaā Dios. Te vēsú súcuan te cáchiñúhún cáhá i. ³ Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i. ⁴ Chi siquī jeē ní sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ní sáha Cristo jehē i.

⁵ Chi súcuan ni tee Moisés jnūhun ñayuu jeē cánducú quendōo ndaā jíin ley: Núu ññ ñayuu cuu squícu i tācá jniñu ndácu ley, te cotecu i núu, áchí. ⁶ Te jnūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chí sa suhva cáhán: Ma cáni ni rō jeē jíni ñúhún caa ró andiví nasnúu ró Cristo jeē ndahva yā cuēchi ró. ⁷ Ni ma cáni ni rō jeē jíni ñúhún cuun ró ndé nuū cúnú ndonehen ró Cristo mēhñu ndíyi, nájnūhun jeē tu ní nátecu yā. ⁸ ¿Te ndese cáhán jnūhun un núu súcuan? Yajni íyó jnúhun ya jíin ró, chí ñúhun ini yuhu ró jíin ini anuá rō, achí tutu. Te suu cúu jnūhun jeē na cándíje yó jēē jnáma ya yohó. Te jnūhun yáha cúu jeē cánacani rī. ⁹ Chi núu cahān rō jeē Jitoho rō cúu Jesús, te núu candíje ró jíin ini jíin ánuá rō jeē ní natecu yā mēhñu ndíyi ni sáha Yaā

Dios, yūcuán na te jnama ya rohó. ¹⁰ Chi jíin ini jíin ánuá yō cándíje yó jéē ni jíhī yā jehē yō, te súcuan te ndáhva Yaā Dios cuēchi yó. Te jeē cahán yō jeē Jítóho yō cúu Jesucristo, te súcuan te jnama ya yohó.

¹¹ Chi cáhán tutu iī: Tāca ñáyuu jeē candíje i ya, chi jnama nahín yá i, áchí. ¹² Chi inuú-ni cúu ñayuu hebreo jíin táca gá ñayuu, chi máá yá cúu Jítóho nuū ndihī yó, te cuehē jeē váha sáha ya jíin ñáyuu cácahān ndahú jíin yá. ¹³ Chi súcuan cáhán jnūhun ya: Ndihi ñayuu cácahān ndahú jíin máá Jítóho yō, chi jnama ya i, áchí. ¹⁴ ¿Te ndese cahān ndahú i jíin yá te núu tu ní cándíje i jeē jnama ya i? ¿Te ndese candíje i te núu tu ní jíni sōho i jnūhun ya? ¿Te ndese cuni sōho i te núu tú na ñayuu nacani jnūhun nuū i? ¹⁵ ¿Te ndese nacani ñayuu jnūhun ya te núu jeē tu tájí yá i quihīn i? Chi nájnūhun cáhán tutu iī: Yōhyo luu jniñu cásáha ñayuu cájica jíin jnūhun ndeyí sī ni jeē cánacani i jnūhun váha ya, achí.

¹⁶ Te nasūú ndihī i jétáhú nuū jnūhun jnama ya i. Chi ni cahān Isaías nde jenahán: Tátā Yaā Dios, ¿ndé ñáyuu ni candíje jnūhun jeē cánacani ná víi? áchí de. ¹⁷ Núu súcuan te núu cuni nahín ñayuu te cuu candíje i. Te jnūhun cuni nahín i cúu jnūhun Cristo.

¹⁸ Te cájnūhun rí: ¿A tu ní cájini sōho i jnūhun un núu súcuan? Tuú chi ni cajini sōho i, chi cáhán tutu iī:

Ní ñáyivī ní cajini sōho ñayuu jnūhun jeē ní canacani de.

Te nde nuū jicá gá tāca lado ni jinū jnūhun ún.

Achí tutu. ¹⁹ Te suni cájnūhun rí: ¿A tu ní cájecūhun ni ñayuu Israel jnūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhān Yaā Dios:

Cucuñí ró jijnáhan ró, chi cuáha ri jnūhun ri nuū inga ñayuu jeē násūú ñn nación cúu.

Te quiti ni rō coto ró jéē cuáha ri jnūhun ri nuū ñn nación jeē tu jécūhun ni.

²⁰ Te suni Isaías ni chundeyí ni de ni cachi cájí de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñáyuu jeē tu ní cácajnūhún, ni steén rī nuū i ndese Yaā cúu rí.

²¹ Te siquī ñáyuu Israel sa ni cahān de jeē ni cáhān yā: Ndiquivī ni cana ri i jeē quívicoo i nuū rī, te tu ní cácuu i, chi ñayuu nīhni ni, ñayuu jéē ni cácuu i. Achí yá, achí Isaías.

Jeē iyó jecu na ñayuu Israel jeē jnama ya

11

¹ Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu rí, te yucūn Abraham cúu rí, te Benjamín cúu jíi rī jenahán. ² Tu ní stóo Yaā Dios ñayuu

maá yá, chi je ni nacāji ya i nde jenahán. ¿A tu cájini rō ndese cáhán tutu i jnūhun Elías, tē ni nacani jnūhun ya jenahán? Chi náa jícán tahú de, te ni cahān de siquī ñáyuu Israel: ³ Tátā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñúhún na sāña ní quendōo, te vijna suni cácuni i cahni i sāña, áchí de. ⁴ Te Yaā Dios ni nastió cuíñí yā: Iyó nahín úxā mil ñáyuu cácandíje ruhū jeē tu ní cájecuñí yití i nuū ídolo naní Baal, achí yá. ⁵ Te suni súcuan vijna, chi iyó jecu na ñáyuu jeē ní nacāji ya siquī jeē váha ni yā jíin i. ⁶ Te núu ni nacāji ya i siquī jeē váha ni yā jíin i, te nasūu síquī jeē ní sáha i jniñu váha cúu. Chi núu siquī jeē ní sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cúndeyí i quendōo ndaā i nájnūhun ní canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i, ⁸ nájnūhun cáhán tutu i: Ni sáha Yaā Dios jeē tu jécūhun cuítí ni i siquī yā, ni tu jíin i jíin tñnúú i, ni tu jíin nahín i jnūhun ya, te súcuan cúu nde vijna. Achí tutu. ⁹ Te suni ni cahān David:

Vico jeē casáha i, na cóo
 nájnūhun in trampa
 chí in xeyū,

návāha nihīn i castigo xeēn
 siquī jeē castívi i casáha
 i cuēchi.

¹⁰ Te ánuá i na ndúnee,
 nájnūhun jeē tuá cúu
 coto i,
 te na jécostíhí jnūndóho siquī i
 ní cáni.
 Achí tutu.

*Siquī jeē jnáma ya ñáyuu tāca
 gá nación*

¹¹ Núu súcuan te cájnūhun rí:
 ¿A tuá cúu cuítí ndívi ñáyuu
 Israel nuū Yaā Dios jeē súcuan
 ni castívi i? Tú cuítí. Chi
 sa suhva jeē ní cacunīhni ni
 i, te sa ñáyuu tāca gá nación
 ni canihīn tahú máá i jnūhun
 jeē jnáma ya i. Te yūcuan
 sáha tucu jeē ñáyuu Israel
 condíhvī ni i jeē suni candíje
 máá i. ¹² Chi jeē ní castívi
 i, te sa ñáyuu ní cáhnu ñayívi
 ní canihīn maá i jnūhun ya.
 Te jeē ní cajica yátá i, suu
 ni sáha jeē ní canihīn ñáyuu
 tācá nación jnūhun ya. Núu
 súcuan te quívi jeē ndívicoo
 tucu ndíhi ñáyuu Israel ndaha
 ya, te ñáyuu ñayívi víhyá gá
 quendōo ndetū i sáha ún.

¹³ Te vijna te cáhán rī jíin
 róhó ñáyuu tācá nación jeē
 tu ní jíin jnūhun ya. Chi ni
 tají Yaā Dios ruhū jeē scáca
 rí jnūhun nuū rohó ñáyuu
 tācá nación. Te ndúcú rí
 jeē na cuájnuhún ró jijnáhan
 ró jniñu sáha rí jeē nácani rí
 jnūhun ya. ¹⁴ Chi cúní rī jeē
 jíin yúcuán te nacani ni sava
 jnáhan rí ñáyuu Israel jeē suni
 candíje máá i, te jnama ya
 i. ¹⁵ Chi jeē ní stóo ya ñáyuu
 Israel, jeē yúcuán cúu jeē sa
 ñáyuu ñayívi ní sáha ya jeē
 ndívicoo i nuū jnūhun maní
 yā jíin i. Núu súcuan te quívi

naquihin tucu ya ñayuu Israel, quivī ún suni vāha ndasí sáha ya jíin ñáyuu ní cáhnu ñayiví. Chi coo nájnūhun jeē natecu i jeē cúu i nájnūhun ndīyi. ¹⁶ Te ñayuu Israel cásocō i nuū Yaā Dios pan jeē quénda xīhna gā nuū ñujen, te súcuan stéén i jeē ndihī un cúu cuenta yā. Te ñin yujnu, núu yīhi jeē cuenta yā cúu, te suu cúu nde yoho jíin ndé ndihī ndaha. Te suni súcuan ñayuu Israel, yīhi cuenta i nuū yā, siquī jeē jíi i xīhna ñúhún, ni quívicoo de ndaha ya.

¹⁷ Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te rōhó ñáyuu tācá nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástaa ró ndúxi jíin cajin jeē véji nde yoho yújnu ún. ¹⁸ Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násūú jéē yoho stāa cajin nuū maá ró, chi sa máá ró stāa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. ²⁰ Ndaā, te ni quendē i siquī jeē tu ní cá candíje i Cristo. Te rōhó chi máni siquī jeē cá candíje ró, jeē yúcuan cúu jeē ni quívicoo ró lugar i. Te

ma sándúxi ró maá ró núu súcuan, chi sa suhva conso íyo ró núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jíin náhan ró te núu stíví ró. ²² Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castíví ún, te sa cundáhú ni yā rohó. Te cánuú cuiñi nīhin ro jíin jnūhun jeē váha ni yā jíin ró. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴ Núu súcuan te rōhó ñáyuu tācá nación jeē tu ní jíin jnūhun ya, ni quendē rō xīnī yújnu olivo yucú, te ni nachuhun ya rohó xīnī yujnu olivo váha, vēsú nasūú ndaha máá yujnu un cácuu ró. Te nagā ni cuu ñayuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

Ín quivī te jnama ya ndihī ñayuu nación Israel

²⁵ Hermano, cúní rī jeē na jécūhun ni rō jíin náhan ró ndese íyó jnūhun yáha jéē ní yisāhí, návāha ma cutéyí ró cani ni rō jeē ndichí xīnī maá ró: Chi sava ñayuu Israel ni ndunīhni ni i, te súcuan coo máá-ni nde quivī jínu candíje ñayuu tācá nación jeē tu jíin jnūhun ya. ²⁶ Te sáá te jnama ya ndihī ñayuu nación Israel, chi cáhán tutu íi: Ichi ñuu rī Sión quiiji Yaā jnáma ñayuu,

te sáha ya jeē tuá coo cuēchi
nuū tāca yúcūn Jacob.

27 Te yāha cúu contrato jeē
sándaā rī jín i,

quiŵi jeē quēnde rī cuēchi i
jínáhan i, áchí Yaā Dios.

Achí tutu.

28 Chi ñayuu hebreo un ní
nduu i nájnūhun enemigo Yaā
Dios siquī jeē tu ní cácañdije
i jnūhun jnáma ya i. Te
jeē yúcuan te cuu cuitē núu
jnūhun un núu tāca róhó. Te
vēsú súcuan te siquī jeē ní
nacāji ya tāca jíi i jenahán,
te cúndáhú gá ni yā i jeē ma
stóo ya i ní cáni. 29 Chi tu
nácani yátá ni yā jeē cána ya
ñayuu jín jeē jéhe ya tahū
i. 30 Te róhó jínáhan ró,
suni ni cahīyo níhni ni rō
nuū Yaā Dios nde saá. Te
vijna jeē ní cacunīhni ni maá
ñayuu hebreo, te cúndáhú ni
yā rohó. 31 Te suni súcuan
maá i, chi vēsú cácañhni ni
i vijna, te cundáhú tucu ni
yā i, nájnūhun cúndáhú ni yā
maá ró jínáhan ró. 32 Chi
Yaā Dios ni sáha ya jeē ní
quendōo ndivii ñayuu chīji
jnūhun cúnīhni ni i, návāha
suni cuu cundáhú ni yā ndivii
i.

33 Núu súcuan te náhan náā
ni yō jeē yóhō cuehē jnūhun
ndíchí iyó jíin Yaā Dios, te
ndihī cuiti jiní yā. Te ni ma
cúu cuiti castūhun yó ndese
tée ni yā sáha ya tācá-ni, te
ma cánda cuiti yō jecūhun ni
yō ndese cúu tāca jéē sáha maá
yá. 34 Chi cáhan tutu i: ¿Ndé
ñin ni jecūhun ni ndese jéni
ni maá Jítoho yō? ¿Chí ndé
ñin ni steén nuū yā? 35 ¿Ndé

ñin ni jéhe xīhna gā nuū maá
yá, návāha nachunaa yā nuū
i? 36 Chi nde nuū maá yá
vēji tāca jéē iyó, te maá yá ni
sáha ndihī, te jeē cúu maá yá
cúu. Te na cáhan yō jeē yóhō
luu cújéhnu Yaā Dios ní cáni.
Amén.

*Jeē na cóo ndoo ánuá yō
cuajniñu yó núu Yaā Dios*

12

1 Núu súcuan te cáhan
ndahú rī jíin ró jínáhan
ró, hermano, jeē siquī jeē
cúndáhú ni Yaā Dios yohó.
Na sócō rō maá ró núu yā,
coo ndoo coo iī rō cuajniñu
ró núu yā, nájnūhun cúsiñ ni
yā. Chi yāha cúu jeē chiñúhún
ró yā nde jíin ini jíin ánuá rō.
2 Te ma cáca ró jíin táca modo
casáha ñayuu ñayŵi yáha, chi
sa na sáma ró modo caní ni
rō, te ndujeé jéē níjnūní rō. Te
súcuan te cuu nacāji ró ndé-ni
cúu jeē váha jeē nújnahan ni
Yaā Dios, jeē cúsiñ ni yā, jíin
jéē ije ni rō jíin jnūhun ya.

3 Te siquī jeē váha ni yā ni
jéhe ya jniñu nácani rī jnūhun
ya, jeē yúcuan cáhan rī jíin
ndihī ró jéē ma cáni ni rō
jeē váha ga ñayuu cúu ró núu
cūhva jeē iyó ró. Chi ná ñin ná
ñin ró na cáni ndaā ni rō siquī
maá ró, te ma scáa ga rō caní
ni rō jeē váha ga ñayuu cúu
ró vēsú nuū cūhva jeē ni jéhe
Yaā Dios fuerza ini rō cándije
ró. 4 Chi cácuu yó nájnūhun
ñin yiqui cúñu jeē iyó cuehē
parte, te sán sán jéjníñu ñin
ñin. 5 Chi vēsú iyó cuehē
yō, te nájnūhun ñin-ni yiqui
cúñu cúu yó jéē yíhi yó ndaha

Cristo, chi ñn-ni ni nduu yó jijnáhan yó.

⁶ Te sñn sñn tahū ni jēhe Yaā Dios nuū yō jeē cuajniñu yó nūū yā, nūū ndese ni nujnahān ni yā ni jēhe ya nuū ñn ñn yó. Nūū súcuan te na cuajniñu vāha yó jín táhū ún. Nūū ni nihīn yō tahū jeē nácani yó jnúhun ya, te cánuú sáha yó ndé maá cúhva ni jēhe ya cándije yó. ⁷ Te nūū ni nihīn yō tahū jeē chindéé ñáhán yó jnáhan yó, te na sáha yúcún yó. Te nūū ni nihīn yō tahū jeē steén yō, te na cóndihvī ni yō steén yō. ⁸ Te ñayuu jeē stihví ni inga ñayuu, suni na sáha yúcún i. Te ñayuu jēhe nuū jnáhan, na cuáha i súcuan-ni. Te ñayuu ndíso jniñu, na ndácu vāha i jniñu. Te ñayuu jito ndáhú ñayuu ndahú, na cúsiñ ni i sáha i.

Ndese cánuú squícu ñayuu cándije

⁹ Te na cúndáhú ndije ni rō jnáhan ró, nasūū maá jēē cahán-ni ró. Te coto uhū rō jniñu néé, te condiquīn rō jniñu vāha. ¹⁰ Te cánuú coo manī rō jín jnáhan ró nájñuhun jēē manī rō jín ñani rō. Te nducú ró jeē quéndōo yíñuhún gá jnáhan ró vēsú maá ró.

¹¹ Te ma cucúxí ró jín jniñu casáha ró. Chi jín ini jín ánuá rō condihvī ni rō cuajniñu ró nūū maá Jítoho yō.

¹² Te na cúsiñ ni rō jeē cáñuhun ni rō tāca jēē vāha jeē cóo. Te na cuándeyí ni rō nūū ndóho ró jnúndóho. Te níni na cácan tahú rō.

¹³ Te coto ndáhú ró ñayuu cácdíje nūū cúmanī nuū i. Te cuáha nūū ró vehe nuū ñayuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵ Te nūū cúsiñ ni ñayuu, te suni na cúsiñ ni rō jín i. Te nūū cúcuíhyá ni ñayuu, te suni na cúcuíhyá ni rō jín i.

¹⁶ Na cóo ñnuú ni rō jín táca jnáhan ró. Te ma cundúxí ró, chi sa quijnáhan ró jín ñayuu nūū ga. Ma cáni ni rō jeē ndichí xínī rō.

¹⁷ Te ma nasáha ndevāha ró jín ni ñn ñayuu, nūū ni sáha ndevāha i jín ró. Na cóndihvī ni rō sáha ró jniñu vāha, jito jínūū tāca ñayuu.

¹⁸ Te na cóndihvī ni rō coyūcu manī rō jín táca ñayuu, vēsú ndese cándāa maá i. ¹⁹ Ñānī manī jijnáhan ró, ma nácuāha ró jēē ndútahū ñayuu casáha ndevāha jín ró, chi sa cuāha ró jnúhun jeē maá Yaā Dios cuāha ya castigo i. Chi cáhán tutu iī: Máá rí cuāha castigo i, máá rí nacuāha yāhu i, áchí Jítoho yō. ²⁰ Te suni cáhán tutu: Tēe jito uhū rohó, nūū jí de sōco, te cuāha ró jēē cáji de. Te nūū jíchí de, te cuāha ró jēē cóho de. Chi nūū sáha ró súcuan, te cucanu de te nacani uhū ni de jeē ni jito uhū de rohó. ²¹ Ma cuáha ró jnúhun jeē cúndeyí jniñu néé jín ró, chi sa jniñu vāha na sáha ró návāha ndahvā jniñu néé.

13

¹ Tāca ñayuu na cuátáhú i

nuū tohō cándiso jníñu ñuu. Chi ma cóo tēe cándiso jníñu te núu tu ní sáha máá Yaā Dios. Te tēe cándiso jníñu chi Yaā Dios ni tee jniñu siquī de. ² Te ñayuu jeē tu jétáhú núu tēe cándiso jníñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihīn i castigo. ³ Chi tāca tēe ndiso jníñu, nasūu jēē ndiso jníñu de jeē yūhú ñayuu casáha jniñu váha, chi sa jeē yūhú ñayuu casáha jniñu néé. Te núu cúní rō jeē ma cúxeēn tēe cándiso jníñu nuū rō, na sáha ró jniñu váha núu súcuan. Yūcuán na te cuajnúhún de rōhó. ⁴ Chi jéjníñu Yaā Dios de jijnáhan de, návāha coyūcu váha ró jijnáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jníñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu néé. ⁵ Jeē yúcuán cánuú jēē cuatáhú ró núu tēe cándiso jníñu, te nasūu máni jeē ma níhín rō castigo, chi suni jeē tú na cuēchi coo ánuá rō. ⁶ Te jeē yúcuán cúu jeē suni cájēhe ró xúhun núu tēe cándiso jníñu cuu jniñu ñuu. Chi jéjníñu Yaā Dios de, te máni jniñu yúcuán casáha de.

⁷ Te chunaa rō ndihī jeē cátaū rō nuū tāca ñayuu. Cuāha ró xúhun ñuu nuū tēe stútú xúhun ñuu, te cuāha ró xúhun renta nuū tēe stútú renta. Te na cóo respeto rō nuū ñayuu cánuú coo respeto rō. Te na cóo yíñúhún ró nuū ñayuu cánuú coo yíñúhún

ró. ⁸ Ma cótaū rō nuū ní ñn. Te íyó ñn jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihī jeē ndácu ley yā. ⁹ Chi súcuan ndácu ley jniñu: Ma cosíquí ndēē rō jnáhan ró, ma cáhni rō ndíyi, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin táca gá jniñu ndácu ley, ndihī-ni yíhi chíji jnúhun yáha: Cundáhú ni rō jnáhan ró nájñuhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñn jeē tu íyó váha nuū i. Núu súcuan te jeē cundáhú ni yō jnáhan yó, yúcuán cúu jeē squícu yó ní ley yā.

¹¹ Súcuan sáha ró jijnáhan ró, chi sáha ró cuenta jeē cuácuyajni quivī ndíji ya. Te ma cóo ga rō nájñuhun ñayuu quixí, jeē cúhuun ni rō. Chi vijna je ni cuyajni ga quivī jnáma ya yohó vésú quivī ní candíje yó jnúhun ya. ¹² Chi nájñuhun je yajni yāha jecuáa, te cuacundijin quivī jnáma ya yohó. Núu súcuan te na stóo yó jniñu jeē ni sáha yó núu néé, te na cúcutú yó jíin táca jniñu ndaā jeē caca yó jíin luz yā. ¹³ Na cáca yíñúhún yó nájñuhun cánuú caca yó jíin luz yā. Ma nájīni ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. ¹⁴ Chi sa suhva cuiñi cutú ró jíin fuerza maá Jítoho yō Jesucristo, jeē ma cuáha ga

rō jnūhun sáha ró jniñu cúní modo neé máá ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jín jnúhun ya, te ma tejnáhan ró jín i siquī tāca jnúhun jeē sín jéni ni i jín máá ró. ² Chi íyó ñayuu jeē jéni ni i jeē cúu caji i ndinuū-ni. Te íyó ñayuu jeē ná tu ije jín jnúhun ya, te cájeni ni i jeē tú vāha caji i cūñu, chi jeē ní casocō ñayuu nuū ídolo cúu. ³ Te rōhó téé jeē yéji ndinuū-ni, ma cahán rō coto ró téé jeē tu yéji ndinuū. Te rōhó téé jeē tu yéji ndinuū, ma cahán rō coto ró téé jeē yéji ndinuū. Chi Yaā Dios ni jetáhú yá tēe ún. ⁴ Te rōhó, ¿ndé ñn cúu ró jéé cahán neé ró jító ró mozo Yaā Dios? Chi núu vāha chí neé sáha de, te máá yá cúu jeē sándaā jín de, nasūu máá ró. Te tuú chi cuiñi vāha de, chi mozo máá Jítóho yō cúu de, te cuu sáha ya jeē ma stívi de.

⁵ Te suni íyó ñayuu jeē jéni ni jeē íi gā ñn quivī vēsú inga quivī. Te inga ñayuu chi jéni ni i jeē inuú-ni cúu tāca quivī. Te tāca i na cúndaā vāha ni máá i siquī jeē jéni ni i. ⁶ Chi tēe jeē neé ñn quivī, chíñúhún de máá Jítóho yō jeē sáha de súcuan. Te tēe jeē tu neé ñn quivī, suni chíñúhún de Jítóho yō jeē sáha de súcuan. Te tēe jeē yéji ndinuū-ni, chíñúhún de máá Jítóho yō jeē sáha de súcuan, chi nácuatáhú de nuū Yaā Dios. Te tēe jeē tu yéji

ndinuū, suni chíñúhún de Jítóho yō jeē sáha de súcuan, te suni nácuatáhú de nuū yā.

⁷ Chi ni ñn yó tu técu yō jeē vāha máá-ni yó, te ni ñn yó tu jíhi yō jeē cúní máá yó. ⁸ Chi núu técu yō, te técu yō jeē cuajniñu yó núu máá Jítóho yō. Te núu cuu yō, te suni cuu yō siquī jeē cúní máá Jítóho yō. Núu súcuan te núu jeē cótecu yō chí jéé cuu yō, te yíhi yó ndaha Jítóho yō. ⁹ Chi ni jihí Cristo te ni natecu yā, návāha cuu ya Jítóho nuū ñayuu ni jíhi jín ñayuu técu.

¹⁰ Te rōhó, ¿naun jéni neé ni rō jító ró jnáhan ró núu súcuan? ¿Te naun cújéé ni rō jító ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹ Chi suhva yósó núu tútu ñn:

Jendaá ndije chi nuū máá rí cuiñi yíti tāca ñayuu, te ndihi i cahán jeē máá rí cúu Yaā Dios, áchí máá Jítóho yō.

¹² Núu súcuan te ná ñn ná ñn yó nacuaña yo cuenta nuū Yaā Dios ndese jniñu ni casáha yó.

Ma sáha yó jéé quiví jnáhan yó cuéchi

¹³ Te jeē yúcuan ma cahán neé gá yō coto yó jnáhan yó. Chi sa tee ni rō jeē ma sáha ró ni ñn jniñu jeē sáha jeē stívi jnáhan ró te quiví i cuéchi. ¹⁴ Te jími rí jeē ni ñn jeē ni sáha Yaā Dios, tu stívi ánuá yō. Chi súcuan ni cucáhnu vāha ni rí siquī jeē candíje rí Jítóho yó Jesús. Te núu ñn ñayuu jéni ni i jeē íyó jéé stívi ánuá i,

yūcuán na te súcuan sáha un jíin máá i. ¹⁵ Te núu jnáhan ró tu cúvāha ni de jeē yéji rō cūñu ni casocō ñayuu nuū ídolo, chi jéni ni de jeē stívi un ánuá rō, núu súcuan te tu cúndáhú ni rō de jeē sáha ró súcuan. Coto má snáá rō anuá jnáhan ró síquī jeē yéji rō ñn jeē jéni ni de jeē cuēchi cúu. Chi suni jehē maá de ni jihī Cristo. ¹⁶ Ma sáha ró jniñu jeē cahán i síquī, vésú jiní maá ró jeē iyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva síquī jeē na sáha yó jniñu ndaā, te coyūcu mánī yō jíin jnáhan yó, te cusī ni yō sáha Espíritu Santo. ¹⁸ Te ñayuu jeē súcuan jéjniñu nuū Cristo, chi cusī ni Yaā Dios jíin i, te suni cájejnúhún ñayuu i.

¹⁹ Núu súcuan te na cóndihvī ni yō coyūcu mánī yō, návāha jíin yúcuan chindéé ñájnáhan yó ije yó jíin jnúhun ya. ²⁰ Te ma cuáha ró jnúhun jeē ndeyu yéji rō snáá jniñu ni sáha Yaā Dios jíin jnáhan ró. Chi iyó ndoo ndije ndihi jeē yéji yō, te vésú súcuan te tú vāha jeē yéji rō ndeyu jeē sáha jíin jnáhan ró jéé caji de jeē jéni ni de jeē cuēchi cúu. ²¹ Vāha ga ma caji rō cūñu, ni ma cóho ró vino, te ni ñn ma sáha ró jéé stívi ánuá jnáhan ró, te quīvi de cuēchi, te caca yátá de nuū jnúhun cándíje de. ²² Te núu cándíje ró jéé tú na vé sáha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. ²³ Te tēe yéji ñn jeē jéni ni

de sanaa te stívi ánuá de, núu súcuan te sáha de cuēchi, chi tu cándíje de jeē iyó váha jeē yéji de. Chi tāca jéé sáha yó, núu tu cándíje yó jéé iyó váha, te cuēchi cúu.

Jeē na sáha yó jéé cusī ni jnáhan yó

15

¹ Te yóhó jéé ni ije yó jíin jnúhun ya, cánuú condito yó ñáyuu jeē ná tu ije jíin jnúhun ya, návāha cándíje vāha i. Te ma sáha yó jéé maá-ni yó cusī ni. ² Chi ná ñn ná ñn yó na sáha yó jéé cusī ni jnáhan yó, návāha quendōo vāha i te ije i jíin jnúhun cándíje i. ³ Chi ni Cristo, tu ní sáha ya jeē cusī ni maá yá, chi sa suhva jeē cusī ni Tatá yā. Chi suhva cahán tutu iī: Tāca jnúhun ndevāha jeē cácahān ndevāha ñayuu síquī ní, ni ndīvi síquī maá ná, áchí Cristo jíin Tatá yā. ⁴ Chi tāca jnúhun jeē ni jécósō nuū tútu iī nde jenahán, chi ni jécósō návāha stéén nuū yō, te nihīn yō jnúhun jeē sáha jeē cuandeyí ni yō te ndusī ni yō. Te súcuan te cocuhun ni yō tāca jéé váha jeē cóo. ⁵ Te máá Yaā Dios jeē jéhe jnúhun cuandeyí ni jíin jnúhun ndúsī ni, na sáha ya jeē cóo inuú ni rō, nájnūhun cúní Cristo Jesús. ⁶ Te súcuan te ñn-ni coo ró te inuú-ni cuu cahān rō jeē yóhoyo vāha Yaā cúu Yaā Dios, Tatá Jitoho yō Jesucristo.

Jeē ni jítē jnúhun vāha ya nuū ñáyuu tācá nación

⁷ Núu súcuan te cuatáhú ró tāca jnáhan ró, nájnūhun ni

jetáhú Cristo yohó, návāha cuni ñayuu jeē luu cújéhnú Yaā Dios. ⁸ Chi cáhán rī jeē ní quiji Cristo Jesús, ni sāha ya tācá jniñu jeē quéndōo vāha ñayuu hebreo, návāha cundaā tāca jnūhun jeē ni jéjnūhun Yaā Dios nuū tāca jíí i. Te súcuan ni steén Cristo jeē squícu Yaā Dios tāca jéē ni jéjnūhun ya. ⁹ Te suni ni quiji ya návāha ñayuu tācá nación jeē tu jíni jnūhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu ī:

Núu súcuan te cahān na jéē yóhoyo vāha ni ní, cuni ñayuu tācá nación,

te cata ná yaa jeē chiñúhún ná nihín.

¹⁰ Te cáhán tucu tutu ī:

Róhó ñayuu tācá nación, inuú na cúsī ni rō jíin ñayuu maá yá.

¹¹ Te cáhán tucu:

Róhó ñayuu tācá nación, na cáhán rō jeē yóhoyo vāha ni Jitoho yō Yaā Dios,

te róhó ñayuu tācá-ni ñuu, suni na cáhán rō jee yóhoyo cújéhnú ya.

¹² Te suni ni tee Isaías jnūhun yáha:

Nuū yúcūn Isaí quiji ĩn jeē cújéhnú,

te ndacu ya jniñu nuū ñayuu tācá nación.

Te ñayuu ún chi cocuhun ni i tāca jéē sāha ya.

Achí tutu.

¹³ Te máá Yaā Dios jeē sāha jeē cáñuhun ni yō tāca jéē vāha jeē coo, na sāha ya jeē cóo sī ndasí ni rō jíin jéē cóo ndeyí ni rō siquī jeē cácdáje nihín

ró yá. Te súcuan te cocuhun teyí gá ni rō tāca jéē vāha jeē coo, sāha poder maá Espíritu Santo.

¹⁴ Ñánī mánī, cúcáhnú ni rī jeē vāha ndasí cándihvī ni rō jíin jniñu vāha, te vāha ndasí cájecūhun ni rō, te cúu stíhvī jnáhan ni rō. ¹⁵ Te ni jeni ni rī jeē tee ri carta yáha cáhān cají rí jíin ró jijnáhan ró, návāha víhyá gā na cócuhun ni rō tāca jnūhun yáha. Chi súcuan sāha ri siquī jeē vāha ni Yaā Dios te ni jēhe ya jniñu nuū rī ¹⁶ jeē jejniñu ri nuū Jesucristo, jeē nácani ri jnūhun nuū ñayuu tācá nación jeē tu jíni jnūhun ya. Te nácani ri jnūhun vāha Yaā Dios nuū i jeē jnáma ya i. Súcuan sāha ri návāha ñayuu tācá nación, cuu squívī ri i ndaha ya jeē cúu i nájnūhun ĩn jeē socó rī nuū yā jeē cúsī ni yā jíin. Chi ni sāha Espíritu Santo jeē iyó ndoo iyó lí i nuū yā.

¹⁷ Núu súcuan te siquī jeē candíje ri Cristo Jesús, te cúsī ni rī jeē jejniñu vāha ri nuū Yaā Dios. ¹⁸ Chi ma cúu cahān rī siquī jniñu cásáha inga tēe, chi máá-ni siquī ndese ni jejniñu Cristo ruhū jeē sāha ri jeē ñayuu tācá nación tu ní jíni jnūhun Yaā Dios, vijná jétáhú i nuū yā. Chi súcuan ni cuu jíin jnūhun ni cahān rī jíin jniñu ni sāha ri. ¹⁹ Chi ni sāha ri jniñu jéhnú ndíso poder jeē steén jeē cújéhnú ya, te ni ĩyo poder Espíritu Santo jíin rí. Te súcuan ni nacani ndihī ri jnūhun ndese jnáma Cristo ñayuu. Te ni nacani ri nde ĩnuu Jerusalén, jíin ndihī tācá

ñuu, jiín nde ní región Ilírico.
²⁰ Súcuán cúu jeē ní condihvī
 ni rī ni nacani ri jñūhun jeē
 jnáma ya ñayuu. Te ni jehēn
 rī nuū ñáyuu jeē ná tu cuni
 jñūhun Cristo, chi tu ní cúní
 rī nacani ri nuū ñáyuu jeē
 jé ni jini i ni canacani inga
 tēe. ²¹ Chi sa suhva ni sáha ri
 nájñūhun cáhán tutu i:

Tāca ñáyuu jeē tu ní quíji
 jñūhun ya nuū i, vijna
 chi cuni i jñūhun ya,
 te tāca ñáyuu jeē tu ní jíní
 cuiṭi jñūhun ya, vijna
 chi jecūhun ní i.

Achí tutu.

*Jeē ñūhun ni Pablo jeē
 quihín de Roma*

²² Te jeē yúcuán cúu jeē
 cuehē jínu ni cujnēñu ri, te
 tu ní cúu jecondēhe rí rohó
 jijnáhan ró. ²³ Te vijna chi ni
 ndihí jniñu ri ní cáhnu tācá
 región ndañūú yáha. Te je ni
 cuu cuehē cuiyā jeē cuní rī
 jeē rī nuū rō. ²⁴ Núu súcuán
 te ñūhun ni rī jecondēhe rí
 rohó jijnáhan ró núu na yáha
 ri quihín rī España. Te ñūhun
 ni rī jeē núu je ni cusī ni rī
 jeē ní jito jnáhan yó, yūcuán
 na te chindéé ñáhán ró ruhū
 jeē quihín gā rī. ²⁵ Te xīhna
 gā na quihín rī ñuu Jerusalén
 quindēca ri xūhún cuu her-
 mano cáyūcu yúcuán. ²⁶ Chi
 ñayuu Macedonia jiín Acaya
 ni cajeni ni i jeē cáquin i xūhun
 quihín nuū hermano cándoho
 ndáhú ñuu Jerusalén. ²⁷ Chi
 súcuán ni cacusī ni i ni casáha
 i. Te iyó váha jeē súcuán,
 chi máá i jeē cácuu i ñayuu
 tāca gá nación, táú i jeē sáha

váha i nuū ñáyuu hebreo un.
 Chi ñayuu hebreo ni casáha
 jeē ní quiji jñūhun Yaā Dios
 nuū i jeē quéndōo vāha ánuá
 i sáha. Jeē yúcuán cánuú jéē
 chindéé ñáhán i ñayuu hebreo
 cácuandije jiín ndajniñu ñayīvi
 yáha. ²⁸ Núu súcuán te jeē
 jínu jniñu yáha jéē quindēca ri
 xūhun yáha nuū i, yūcuán na
 te jecondēhe rí rohó jijnáhan
 ró jéē yáha ri quihín rī Es-
 paña. ²⁹ Te jíní váha ri jeē
 quivī jinú rī nuū rō, te váha
 ndasí quendōo ró jéē nacani
 ga rī jñūhun vāha Cristo nuū
 rō.

³⁰ Hermano jijnáhan ró,
 cáhán ndahú rí jiín ró jeē
 chindéé ñáhán ró ruhū
 cacān tahu rō jehē rī nuū
 Yaā Dios siquī jniñu ndúcú
 ndéyí rí. Súcuán sáha ró
 siquī jeē candíje yó Jítoho
 yó Jesucristo, jiín siquī jeē
 cundáhú ni yō jnáhan yó
 sáha máá Espíritu. ³¹ Te
 cacān tahu rō jeē na cácu ri
 nuū tēe región Judea jeē tu
 cácuandije, jiín jéē na cúsi ni
 tācá hermano ñuu Jerusalén
 jeē quindēca ri xūhun yáha
 cuu de. ³² Te súcuán te núu
 cúní Yaā Dios te jecondēhe rí
 rohó jijnáhan ró, te cusī ni yō,
 te nanihín ni rī jeē condee rī
 jiín ró. ³³ Te máá Yaā Dios jeē
 jéhe jñūhun ndeyí sī ni, na cóo
 ya jiín ró jijnáhan ró. Amén.

*Jeē cahán Pablo jeē sándeýí
 ni i*

16

¹ Te vijna te cáhán rī jiín
 ró jijnáhan ró jéē na chindéé
 ñáhán ró hermana Febe, chi

cúu ña ñahan jéjníñu jeē siquī jnúhun ya nuū ñáyuu cá candíje ñuu Cencrea. ² Te cuatáhú ró ña nájnūhun cúni maá Jítoho yō, chí súcuan cánuú sáha hermano cá candíje. Te chindéé ñáhán ró ña na-ni vé cúu jeē jíni ñúhún ña, chí súcuan ni chindéé ñáhán máá ña cuehē ñáyuu, te suni nde ruhū.

³ Cahān rō jín Priscila jín Aquila jeē sándeyí ni ndindúú de, áchí rí, chí cáchindéé ñájnáhan de jín rí siquī jníñu Cristo Jesús. ⁴ Chí ná ni iyo jnúndóho jeē cuu rí nuú, te ni cachundeyí ni de ni canducú de scácu de ruhū, vésú suni cuu maá de núú. Te nácuatáhú rí nuú ndindúú de, te nasūu máá-ni ruhū, chí suni táca grupo ñáyuu cá candíje táca nación. ⁵ Te suni cahān rō jín ñáyuu cá candíje ndútútú vehe de, sándeyí ni i, áchí rí. Te cahān rō jeē sándeyí ni Epeneto, tēe manī rí jín. Chí ñuu Acaya, máá de cúu jeē ní candíje xīhna gā nuū Cristo. ⁶ Suni cahān rō jeē sándeyí ni María, ñahan jeē ní jejniñu ndasí jeē siquī jnúhun ya mēhñu ró jijnáhan ró. ⁷ Te cahān rō jeē sándeyí ni Andrónico jín Junias, tēe cácuu jnáhan ñuu rí jeē ní cahīn jín rí vecā. Te táca apóstol chí cájejnúhún de ndindúú tēe jíná, te xīhna gā de ni cacandíje Cristo vésú maá rí.

⁸ Cahān rō jeē sándeyí ni Amplias, tēe manī rí jín, chí cándíje de Jítoho yō. ⁹ Te cahān rō jeē sándeyí ni Urbano, tēe chindéé ñájnáhan

jín yó siquī jníñu Cristo Jesús, te suni súcuan Estaquis, tēe jeē manī rí jín. ¹⁰ Suni cahān rō jeē sándeyí ni Apeles, tēe jeē ni stéén jeē candíje vāha de Cristo, te suni súcuan cahān rō jín ñáyuu vehe Aristóbulo. ¹¹ Cahān rō jeē sándeyí ni Herodión, tēe cúu jnáhan ñuu rí. Te suni súcuan ñáyuu vehe Narciso jeē cá candíje maá Jítoho yō. ¹² Te suni cahān rō jeē sándeyí ni Trifena jín Trifosa, ñahan cá sájniñu siquī jnúhun máá Jítoho yō. Te suni sándeyí ni Pérsida, hermana jeē maní yō jín, chí suni ní sájniñu ndasí ña siquī jnúhun Jítoho yō. ¹³ Te cahān rō jeē sándeyí ni Rufo, tēe cájejnúhún ñáyuu jeē vāha cándíje de máá Jítoho yō. Te suni súcuan cahān rō jín náná de, te máá ña suni ní jito ña ruhū nájnūhun jeē naná rí cúu ña. ¹⁴ Te cahān rō jeē sándeyí ni Asíncrito jín Flegonte jín Hermas jín Patrobas jín Hermes jín táca hermano jeē cáyūcu jín de. ¹⁵ Te suni súcuan Filólogo jín Julia jín Nereo jín cuáha de, jín Olimpas jín ndihí hermano cá candíje cáyūcu jín de jijnáhan de.

¹⁶ Te jeē cahán táca ró jín jnáhan ró, te yíñúhún techūhu ró ndaha i. Te táca grupo ñáyuu cá candíje nuū Cristo, cáhán i jeē na sándeyí ni rō.

¹⁷ Te cáhán ndahú rí jín ró, hermano jijnáhan ró, jēe cóto ró máá ró nuū ñáyuu cútuco ni te ndúcú stívi jnáhan jín jnúhun tu quíjnáhan jín jēe ní

cacutūhva ró. Te cujiyo ró nuū i jínáhan i. ¹⁸ Chi ñayuu súcuan, tu jéniñu i nuū Jítóho yō Jesucristo, chi máni ndíhví ni i siquī jeē cáji i. Te yōhyo ndúxí i jín jnūhun cácahān i, te súcuan stáhú i ñayuu jeē tu jíní vāha. ¹⁹ Te máá ró jijnáhan ró, chi je cájini ndíhi ñayuu ndese vāha cájetáhú ró nuū yā, te jeē yúcuan cúsiñ ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. ²⁰ Te máá Yaā Dios jeē jéhe jnūhun ndeyí sñ ni, yachí sáha ya jeē cúndeyí ró siquī jexeén jeē cúu Satanás. Te ñúhun ni rī jeē Jítóho yō Jesucristo na sáha ya jeē vāha róhó jijnáhan ró.

²¹ Sándeyí ni rō jijnáhan ró, áchí Timoteo, tēe chindéé ñáhán jín rí siquī jnūhun ya. Te suni súcuan cácahān jnáhan ñuu rī Lucio jín Jason jín Sosípater.

²² Te ruhū jeē naní Tercio, jeē tée rí carta yáha jéé cahán Pablo, suni cáhán rī jeē sándeyí ni rō jeē cácandíje ró Jítóho yō.

²³ Te Gayo, tēe ni jēhe núu vehe ndéé ruhū Pablo, cáhán de jeē sándeyí ni rō jijnáhan ró. Te suni jéhe núu de vehe nuū tāca ñáyuu cácandíje. Te suni súcuan cáhán Erasto, tēe cúu tesorero ñuu yáha, te suni súcuan cáhán hermano Cuarto.

²⁴ Te ñúhun ni rī jeē maá Jítóho yō Jesucristo, na sáha ya jeē vāha róhó jijnáhan ró. Amén.

Jnūhun sándíhi jéé cahán jeē yóhyo cújéhnu ya

²⁵ Te vijna na cáhán yō jeē yóhyo cújéhnu Yaā Dios. Chi máá yá cuu sáha jeē cuñi ñihin ga rō jijnáhan ró jín jnūhun jnáma ya rohó jeē nácani rí, jín jnūhun Jesucristo jeē steén rī. Chi súcuan ni steén Yaā Dios jnūhun sáhi yá, jeē ní yisáhi ní cáni nde ná tu jecōo ñayíví. ²⁶ Te vijna te je ni nane cáji. Chi jín tútu iñ jeē ní catee tēe ni canacani jnūhun ya, ni jítē núu jnūhun sáhi yáha nuū ñáyuu tācá nación, návāha candíje i te cuatáhú i. Chi Yaā Dios jeē técu ní cáni, súcuan ni ndacu ya jniñu.

²⁷ Te ní cáni na cáhán yō jeē yóhyo cújéhnu Yaā Dios siquī jniñu ní sáha ya jeē jín Jesucristo. Chi máá ñn-ni ya iyó te yōhyo ndíchí yá. Súcuan na cóo. Amén.

CARTA ĤN JEE NI TEE SAN PABLO APOSTOL NUU ÑAYUU ÑUU CORINTO

1 Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jñūhun ya. Te ndĩndúú rí jín hermano yō Sóstenes ² cátee ri carta yáha cuájeē nuū rohó ñáyuu ñuu Corinto jeē cácanđije ró Yaā Dios. Chi cácuu ró ñáyuu maá yá, chi cáyihĩ ró ndaha Cristo Jesús. Chi ni cana Yaā Dios rohó jijnáhan ró jéē coo ndoo coo iĩ ró nuū yā. Te ni cana ya rohó ndé jín táca gá ñáyuu jeē ndácunehen i máá Jítoho yō Jesucristo, ndé-ni cúu nuū cáhĩyo i. Chi Jítoho táca yó jín i cúu ya. ³ Te cáñuhun ni rĩ jeē Tatá yō Yaā Dios jín Jítoho yō Jesucristo na sáha ga yā jeē váha röhó, te sáha ya jeē coo ndeyí coo sī ni ró.

Cristo sáha ya táca jéē váha yóhó

⁴ Te níni nácuatáhú rí nuū Yaā Dios jeē siquí rohó jijnáhan ró, chi jeē jín Cristo Jesús ni sáha ya jeē váha röhó. ⁵ Chi cáyihĩ ró ndaha Cristo, te jeē yúcuani ní sáha Yaā Dios jeē cáhĩyo cúca ró jín táca jñūhun ya, chi cájecūhun váha ni ró te cúu nácani ró. ⁶ Chi súcuan cúu jeē cáhĩn nĩhin ró jín jñūhun Cristo jeē ní canacani ri nuū ró. ⁷ Te súcuan te tu cúmanĩ ni

ĩn tahū jeē jéhe ya cuu ánuá ró níni jéē cándetu ró quivĩ jeē quenda ndijin Jítoho yō Jesucristo. ⁸ Te máá yá chi sáha ya jeē cuiñi nĩhin ró nde na jínu quivĩ, návāha ma cóo cuēchi siquĩ ró quivĩ ndiji Jítoho yō Jesucristo. ⁹ Te squícu Yaā Dios táca jéē ni jéjnūhun ya, te ni cana ya rohó jijnáhan ró návāha cuni jñáhan ró jín Séhe ya, Yaā cúu Jítoho yō Jesucristo.

Siquĩ jeē ma cóo sñn ni i jín jñáhan i

¹⁰ Hermano, nde jín sñhvĩ Jítoho yō Jesucristo cahán ndahú rí jín ró jeē inuú-ni na ndájnūhun ró jijnáhan ró, te ma cóo sñn ni ró. Chi váha inuú na cóo ni ró jín táca jéē cájeni ni ró. ¹¹ Súcuan cáhán rĩ, ñánĩ mánĩ, chi ni cacastūhun ñáyuu vehe Cloé nuū rĩ jeē cátejñáhan ró. ¹² Chi táca ĩn ĩn ró sñn sñn cácahān rō: Ruhū chi jín Pablo índichi rĩ, cácahān sava ró. Te sava ga rō: Ruhū chi jín Apolos. Ruhū chi jín Pedro. Ruhū chi jín Cristo. Cácahān rō. ¹³ Te jeē cácahān rō súcuan ¿te á cájeni ni ró jeē sñn sñn Cristo iyó jéē cánacani ri jñūhun? ¿Te á ruhū Pablo ni jihĩ jicā cruz jehē rō? ¿Chí jín sñhvĩ ruhū ni cajendute ró, chí naún? ¹⁴ Tú cuiti. Te na cútahū rĩ nuū Yaā Dios jeē tú cuehē rō ni scuándute ri, chí máá Crispo jín Gayo-ni, ¹⁵ návāha ma cahán ni ĩn ró jéē jín sñhvĩ rí ni jendute ró. ¹⁶ Te sá núcūhun ni rĩ jeē suni ni scuándute ri Estéfanas jín ñáyuu vehe de. Te sanaa

te súcuan-ni cúu ñayuu ni scuándute ri, jéni ni rī. ¹⁷ Chi tu ní téjniñu Cristo ruhū jeē scuándute ri, chi sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rī nuū rō in modo ndichí jéē ma jécūhun ni rō, chi núu súcuan te ma cúu jecūhun vāha ni rō jnūhun jeē ni jīhī Cristo jicā cruz.

Jiín Cristo ni steén Yaā Dios poder yā jiín jnūhun ndichí yá

¹⁸ Te jnūhun jeē ni jīhī yā jicā cruz jeē jnáma ya ñayuu, chi jnūhun cánéé íi cúu nuū ñáyuu cuangoo nuū jnahnú ndetū. Te máá yó jeē cuahán yō nuū cácu yó, chi jíní yō jeē jnūhun Yaā Dios jeē ndíso poder cúu. ¹⁹ Chi suhva yósó núu tútu íi jeē ni cáhān Yaā Dios:

Na snāā rī jnūhun ndichí cácahān ñayuu ndichí cuenta ñayīvī yáha,
te ma cuátáhú rí jnūhun cácahān ñayuu jeē jéni ni jeē jíní vāha.

Achí yá.

²⁰ Núu súcuan ¿te ndé cuajniñu tēe ndichí cuenta ñayīvī yáha, jiín tēe cásteén tutu, jiín tēe cánanducú yúcún síquī jeē steén ñayuu ñayīvī yáha? Chi tāca jnūhun ndichí cuenta ñayīvī yáha, ni cahān Yaā Dios jeē jnūhun cánéé íi cúu. ²¹ Te yōhyo ndichí sáha Yaā Dios. Chi tāca jnūhun ndichí cájini ñayuu ñayīvī, ni cachi ya jeē tu jéjniñu jeē cúni i ndese Yaā cúu ya. Yūcuán na te ni nujnahan ni yā jeē jiín jnūhun ya jeē cánacani ri te jnama ya ñayuu

cácandíje, vēsú cájeni ni ñayuu ñayīvī jéē jnūhun cánéé íi cúu.

²² Chi ñayuu hebreo, máni cáconi i jeē sáha Yaā Dios cuehē jniñu jénu jeē steén poder yā. Te ñayuu griego chi máni síquī jnūhun ndichí cándihvī ni i. ²³ Te máá rí chi sa suhva cánacani ri jnūhun jeē ni jīhī Cristo jicā cruz jeē jnáma ya ñayuu. Te jnūhun yáha sáha jeē jnánini ni ñayuu hebreo, te ñayuu tāca gá nación chi cájeni ni i jeē jnūhun cánéé íi cúu.

²⁴ Te ñayuu jeē ní cana ya ni quīvicoo ndaha ya, vēsú ñayuu hebreo chí ñáyuu griego, chi jíní i jeē jiín Cristo ni steén Yaā Dios poder yā jiín jnūhun ndichí yá. ²⁵ Chi jnūhun Yaā Dios jeē cácahān ñayuu jeē jnūhun cánéé íi cúu, yōhyo ndichí gá vēsú jnūhun ndichí ñáyuu. Te cájeni ni ñayuu jeē tú na poder yā ná ni jīhī Jesús jeē jnáma ya yohó, te tuú chi nīhin téyí gá poder yā ún vēsú poder ñayuu.

²⁶ Hermano, máá ró cácuu jeē ní cana ya ni quīvicoo ró ndaha ya. Te condēhe ró jeē tú cuehē rō ndichí jiín jnūhun ñayīvī, ni tú cuehē rō cándacu jniñu, ni tú cuehē rō cácuu sēhe ñayuu cujénu. ²⁷ Chi sa suhva ni nacāji Yaā Dios tāca jéē cácahān ñayuu ñayīvī jéē tu ndichí cuiti, návāha coo jnūhun canu nuū tāca jéē ndichí. Te ni nacāji ya ñayuu tu téyí ini ñayīvī, návāha coo jnūhun canu nuū ñayuu teyí.

²⁸ Te suni ni nacāji Yaā Dios tāca jéē tu cujénu ini ñayīvī, jiín tāca jéē sajeē ni i nuū,

nde jín táca jéē tú jniñu cájeni ni i, návāha snúu ya táca jéē cujéhnu ini ñayīví. ²⁹ Súcuan ni sáha ya návāha ni ñn ñayuu ma cúu sátéyí i máá i nuū yā. ³⁰ Te máá ró jijnáhan ró chí ni sáha Yaā Dios jeē nduú ró jín Cristo Jesús. Chi nde nuū maá yá ni canihīn yō jnūhun ndíchí, te ni ndahva yā cuēchi yó, te ni sáha ya jeē iyó ndoo iyó lí yō nuū yā, chi ni jnama ya yohó. ³¹ Te jeē yúcuan na cóo nájñūhun cáhán tutu ī: Núu ñn ñayuu cuní i cutéyí i, te na cutéyí i síquī jeē ni sáha máá Jítóho yō jehē i, áhí.

Jeē nácani Pablo jnūhun jeē ni jīhī Cristo

2

¹ Te ruhū, hermano, ná ni jeē rī nuū rō jijnáhan ró jéē nácani ndaā rī jnūhun Yaā Dios, te tu ní nácani ri jnūhun ndíchí jéē ma jécūhun ni rō. ² Chi ná ni īyo ri jín ró te tú na inga jnūhun ní ndúcú rí castūhun rí nuū rō, chí máni máá jnūhun Jesucristo jeē ni jīhī yā jicā cruz jeē jnáma ya yohó. ³ Te ná ni jinū rī nuū rō jijnáhan ró, chí tú na fuerza rī, te yúhú rí, te quísi i ruhū. ⁴ Te ná ni nacani ri jnūhun nuū rō, chí nasūu jín jnūhun ndíchí ñayuu ñayīví ní scándije ri rohó, chí sa suhva jín máá poder Espíritu yā ni steén rī nuū rō jijnáhan ró, ⁵ návāha ma cuiñi ró síquī jnūhun ndíchí cácahān ñayuu, chí cuiñi ró síquī poder Yaā Dios.

Jín Espíritu te steén Yaā Dios ndese Yaā cúu ya

⁶ Te ndaā chí ndíchí cácahān rī jín ñayuu jeē jé ni ije jín jnūhun cándije i ya. Te nasūu jnūhun ndíchí jéē iyó ini ñayīví yáha, ni nasūu jnūhun ndíchí cácahān tēe cácujeñnu ñayīví yáha, chí tēe ún yāha-ni jeē cácujeñnu de. ⁷ Chi jnūhun cácahān rī cúu jnūhun ndíchí máá Yaā Dios jeē ní yisāhí. Chi jnūhun ndíchí un jéē ní yisāhí, ni jequin Yaā Dios nde ná tu jecōo ñayīví, návāha cācu yó jéē cótecu yō ní cáni sáha jnūhun ún. ⁸ Chi ni ñn tēe cújeñnu nuū ñayīví yáha, tu ní jécūhun ni de jnūhun ndíchí un. Chi núu ni jecūhun ni de núu, te ma cáhni cuiñi de máá Jítóho yō, Yaā cujeñnu luu. ⁹ Chi cúu nájñūhun cáhán tutu:

Tāca jéē ni sátūhva Yaā Dios jeē cúu ñayuu jeē maní jín yá,
ni ñn ún tu ní jító jínúū ñayuu,
ni tu ní jíní sōho i,
ni tu ní quíji jeē súcuan cani ni i.

Achí tutu. ¹⁰ Te máá yó jijnáhan yó chí ni steén Yaā Dios táca un núu yō jeē jín Espíritu yā. Chi máá Espíritu jíní vāha ya te steén yā ndihí, chí nde ndihí jeē ndíchí gá máá Yaā Dios.

¹¹ Chi ni ñn ñayuu ma cúu cuni i ndese jéni ni inga ñayuu, chí máá-ni i jín ánuá i cúu jeē jíní. Te suni súcuan ni ñn ñayuu tu jíní i ndese jéni ni Yaā Dios, chí máá-ni Espíritu Yaā Dios cúu jeē jíní. ¹² Te máá yó chí ni nihīn yō Espíritu un jéē

véji nuū Yaā Dios, te tu cájeni ni yō nájñūhun cájeni ni ñayuu ñayīví. Te jeē yúcuan cúu jeē cájecūhun ni yō ndese ni sáha Yaā Dios jeē váha yóhó síquī jeē váha ni yā. ¹³ Te suu síquī tāca jēē yáha cúu jeē cácahān rī, te nasūu jīn jñūhun jeē castéén ñayuu ndichí, chi jīn jñūhun jeē steén maá Espíritu. Chi cástéén rī jñūhun Espíritu nuū ñáyuu cánevāha Espíritu.

¹⁴ Te ñayuu ñayīví tu cájetáhú i tāca jñūhun jeē véji nuū Espíritu Yaā Dios, chi cájeni ni i jeē jñūhun cánéé íi cúu. Te ma cúu jecūhun ni i, chi tu cánevāha i máá Espíritu jeē sáha jeē jécūhun ni i. ¹⁵ Te ñayuu cánevāha Espíritu, chi cájecūhun ni i ndese íyó ndihi-ni. Te ñayuu ñayīví ma cúu jecūhun ni i ndese ñayuu cácuu ñayuu ún. ¹⁶ Chi suhva cáhán tutu īi: ¿Ndé ñn cuu cuni ndese jéni ni maá Jítóho yō? ¿Te ndé ñn cuu stéén nuū yā? Ni ñn ma cúu. Achí tutu. Te vēsú súcuan te máá yó chi cájeni ni yō nájñūhun jéni ni Cristo.

Jeē cáchindéé ñájñáhan de cájegniñu de nuū Yaā Dios

3

¹ Te ruhū, hermano, tu ní cúu cahān rī jīn ró jijnáhan ró nájñūhun cáhán rī jīn ñáyuu jíca jīn Espíritu. Chi ni cahān rī jīn ró nájñūhun jīn ñáyuu cájica jīn modo maá, chi cácuu ró nájñūhun sūchi lúlí jēē ná tu ije ró jīn jñūhun Cristo. ² Ni steén rī nuū rō jeē tú yí, chi cácuu ró nájñūhun sūchi lúlí jēē jéxin gā. Te tu

ní cáhán rī jīn ró jñūhun yí jeē cúu nájñūhun jeē ndáva jeē yéji ñayuu ni ije, chi ná tu canda ró jīn ndé saá. Te ni vijna ná tu canda ró jīn. ³ Chi cájica ga rō jīn modo neé máá ró. Chi cáccuésún ni rō, te cácajnáhan ró, te cácusín ni rō. Núu súcuan te cácuu ró nájñūhun ñayuu ñayīví jēē cájica jīn modo neé máá. ⁴ Chi ñn ró cáhán: Ruhū chi jīn Pablo índichi rī. Te inga rō cahán: Ruhū chi jīn Apolos. Te súcuan cúu jeē cájica ró jīn modo neé máá ró

⁵ ¿Te ndé ñn cúu ruhū, te ndé ñn cúu Apolos núu súcuan? Chi máá mozo-ni Yaā Dios cácuu rī, te ni jejñíñu ya ruhū návāha candíje ró máá Jítóho yō. Chi ná ñn ná ñn rī ni sáha jniñu ndese ni jēhe máá Jítóho yō nuū rī. ⁶ Ruhū, nájñūhun ni taji rī jñūhun ya ini anuá rō, te Apolos, nájñūhun ni chuhun de ndute cúu jeē ní steén gā de nuū rō. Te máá Yaā Dios cúu jeē ni scuéhnu jñūhun ini anuá rō. ⁷ Núu súcuan te tú na vé cúu sáha tēe táji ni tēe chūhun ndute, chi sa suhva máá Yaā Dios cúu jeē scuéhnu. ⁸ Te tēe táji jīn tēe chūhun ndute, ñn-ni cácuu de. Te tācá de chi cuāha ya yāhu nuū de ndese jniñu ni casáha ñn ñn de. ⁹ Chi ruhū jijnáhan rī chi tēe chindéé ñájñáhan cájegniñu nuū Yaā Dios cácuu rī. Te máá ró jijnáhan ró cácuu nájñūhun itu Yaā Dios jeē jícu ya jīn.

Te suni nájñūhun ñn vehe jeē sáha Yaā Dios cácuu ró. ¹⁰ Te ruhū chi cúu rī nájñūhun

ñin maestro albañil jeē ní je-quin rī cimientu vehe ún, cúu jeē ni scándije ri rohó. Te inga de cásama de siquī, cúu jeē castéén gā de nuū rō. Núu súcuan te ná ñin ná ñin de na cóo cuidado de ndese sáma de siquī. ¹¹ Te Jesucristo cúu cimientu vehe ún, te ni ñin ma cúu caquin inga cimientu, chi máá yá cúu jeē ní ndahva cuēchi rō. ¹² Te tāca ñayuu cácañdije, chi sáha i vehe siquī cimientu un, núu jín ndajniñu vāha nájñuhun oro chí plata chí yúu luu, chí jín jéē yachí naa, nájñuhun yujnu chí ite chí ndayóhō. ¹³ Te natūu jniñu un jéē ní sáha ñin ñin i, te suu cúu ndese ni condihvī ni i siquī maá yá. Chi máá quivī juicio jeē sándaā yā jniñu ñayuu, quivī ún natūu cáj jniñu i. Chi jín ñuhūn quiji quivī ún, te nájñuhun sáha ñuhūn jeē jéhu tāca jéē cúu cayū, súcuan coto ndee ya jniñu ñin ñin i. ¹⁴ Te núu tú cayū jniñu ní sáha i siquī cimientu un, te nihīn i tahū i. ¹⁵ Te núu tu ní condihvī ni i jín jniñu ya, te ma nihín i tahū i, chi nájñuhun cayū jniñu i. Te máá i chi cācu ánuá i, vēsú nájñuhun je yajni cayū i nuū yáñuhūn.

¹⁶ ¿A tu cājini rō jeē cácuu rō nájñuhun templo Yaā Dios, chi ndéé Espíritu Yaā Dios ini anuá rō? ¹⁷ Te núu ñin tēe stívī de templo Yaā Dios, te snáhnú ndetū yā tēe ún. Chi ndoo ndasí cúu templo yā, te suu cácuu máá rō.

¹⁸ Ni ñin rō ma stahú rō máá rō jín jéē jéni ni rō. Núu

ñin ñayuu jéni ni i jeē ndichí i jín jñuhun ñayivī yáha, vāha ga na siāā i ún, návāha coo ndichí ndije i jín jñuhun máá yá. ¹⁹ Chi jñuhun ndichí jéē iyó ini ñayivī yáha, jñuhun cánéé íi cúu nuū Yaā Dios. Chi cáhán nuū tútu íi: Ñayuu ndichí cuenta ñayivī, chi nájñi ya i siquī jñuhun ndichí i jeē jési i jñuhun ya, achí. ²⁰ Te cáhán tucu tutu: Máá Jítoho yō jini yā tāca jéē jéni ni ñayuu ndichí, chi máni jeē jéni cāhá ni i, achí. ²¹ Núu súcuan te ni ñin rō má cutéyí rō jeē siquī ni ñin tēe ndichí. Chi cuenta maá rō cúu ndihī-ni. ²² Cúu Pablo, cúu Apolos, cúu Pedro jeē castéén nuū rō. Cúu ndihī jeē iyó ini ñayivī, jeē iyó vijna jín jéē quiji. Te vēsú núu cotecu rō chí cuu rō, te ndihī-ni chi cuenta maá rō cúu. ²³ Te máá rō cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jñuhun ya

4

¹ Núu súcuan te na cáni ni rō jijnáhan rō jeē mozo-ni nuū Cristo cácuu ri, jeē ní tejniñu ya ruhū jeē steén rī jñuhun Yaā Dios jeē ní yisāhi ndé jehán. ² Te ndaā chi tēe jeē sájniñu siquī ún, íyó responsable ná ñin ná ñin de jeē squícu vāha de. ³ Te ruhū tu sáha ri cuenta núu cánanducú rō siquī rī ndese sáha ri, chí núu cánanducú ñayuu cácujuhūn ini ñayivī. Te ni máá rī tu chíhi rī cuenta siquī maá rī. ⁴ Chi vēsú jini rī jín ánuá rī jeē tú na cuēchi rī, te nasūu yúcuu cúu jeē quéndōo ndaā rī, chi

máá Jítóho yō cúu jeē jító ndee ruhū. ⁵ Jeē yúcuan ma nánducú ró siquī jniñu jnáhan ró, chi nde na quéē maá quívī te cuni rō. Chi nde na ndíji máá Jítóho yō te nastúu ndijin yā tācá jniñu jeē yísāhi núū néē, te stéén ndijin yā tāca jēē jéni ni ñayuu jín ánuá i. Yūcuán na te máá Yaā Dios cuajnúhún yá ná ñn ná ñn i ndese ni casáha i.

⁶ Hermano, tāca jnúhun yáha ní cahān rī návāha quendōo vāha ró jijnáhan ró. Te ni cachi rī jeē maá rí jín Apolos cácuu ri mozo-ni nuū yā, te súcuan cácuu ri ñn ejemplo nuū rō. Te cáhān rī jeē súcuan cácuu ri, návāha cutūhva ró canī ni rō maá-ni nájnūhun cáhān tutu ñ. Chi ma sandúxí ró jeē cuajnúhún ró ñn tēe stéén, te inga de tuú.

⁷ ¿Te naun cacutéyí ró nuū jnáhan ró núu súcuan? ¿Te na vé cúu jeē iyó núū rō jeē tu ní cacutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájnūhun jeē nasūu jēē ní cacutahū rō cúu?

⁸ Va je ni cacucúca ró, chi je cánevāha ró ndihī, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cacutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jín ró jijnáhan ri. ⁹ Te iyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájnūhun tēe núu ga nuū ñayuu, nájnūhun

tēe jeē jé ni cundaā jeē cúu. Te ní ñáyīvi jín andiví cándēhe vāha nuū rī, cúu ndajéhé Yaā Dios jín ñayuu. ¹⁰ Chi jeē siquí Cristo te cácahān i jeē tēe cánéé cácuu ri. Te tāca rōhó va ndíchí ró jín jnúhun Cristo, cájeni ni rō. Te tāca rúhū chi tu fuerza rī, te rōhó va iyó fuerza rō, cájeni ni rō. Te rōhó chi cáhīyo yíñúhún ñayuu nuū rō, te nuū rī chi casájéē ni i. ¹¹ Ní véjicoo ri cájiī rī sōco te nde vijna. Te cájichī rī ndute, te cúmanī sahma ri, te tu casáha vāha ñayuu jín rí, te ni tu cánevāha ri vehe. ¹² Te nīhin casájniñu ri jín ndaha ri. Cácahān neé i nuū rī, te cácahān vāha ri jín i. Cájito xeēn i ruhū, te cájendeyí ni rī. ¹³ Cácahān neé i siquí rī, te sa cácahān manī rī jín i. Te cácuu ri nájnūhun yācá ini ñayīví, te casquéhichī i ruhū nde vijna.

¹⁴ Te nasūu jēē tēe ri yāha jēē cúcanu rō, chi sa suhva jeē stihví ni rī rohó, chi cácuu ró nájnūhun sēhe ri chi manī rī jín ró. ¹⁵ Chi vēsú na cóo uxī mil tēe stéén jnúhun Cristo nuū rō, te ñn-ni tátá rō iyó. Te máá rí cúu nájnūhun tátá rō, chi ni scandíje ri rohó jēē ní nacani ri jnúhun vāha Cristo Jesús jeē jnáma ya yohó. ¹⁶ Núu súcuan te cáhān ndahú rí jín ró jeē na ndácu ró rúhū jijnáhan ró.

¹⁷ Te jeē yúcuan cúu jeē tají rí Timoteo cuajeē de nuū rō. Chi cúu de nájnūhun sēhe ri jeē maní rī jín de, te squícu vāha de nuū máá Jítóho yō. Te máá de nacachi tucu de nuū rō ndese jíca

ri jeē candíje ri Cristo, jíin ndese stéén rī nuū tāca grupo ñayuu cácadíje tāca lado. ¹⁸Te sava ró chi cásatéyí ró maá ró, chi cájeni ni rō jeē ma jée cuiti gā rī nuū rō. ¹⁹Te tuú chi yachī jeē rī nuū rō te núu súcuan cúní maá Jítoho yō. Yūcuán na te nanducú rí siquī tée cácutéyí, te ma sáha ri cuenta jnūhun cácahān-ni de, chi sa coto ndee rī de núu cuu squícu nde de. ²⁰Chi jeē ndácu Yaā Dios jniñu nuū yō, nasūu máá jēē cahán īi-ni yó cúu, chi jíni ñúhún condiso poder jnūhun cáhán yō jíin jniñu sáha yó. ²¹Núu súcuan ¿te ndese cácuti rō? ¿A jéē cuxeēn rī nuū rō núu na jéē rī, siquī jeē tu cánacani ni rō, chí nacani ni rō te jeē rī jíin jnūhun cúndáhú ni jíin jnūhun vitá ni?

Jeē sándaā Pablo siquī ñn cuēchi

5

¹Te ni nihīn rī jnūhun jeē jíca jnéni ñn tēe jeē íne mēhñu ró, chi ndéca de naná uū de. Te xeēn ndasí sáha tēe ún, chí ni ñayuu jeē tu cájini jnūhun Yaā Dios, tu cásáha i súcuan. ²Te vésú súcuan te cásatéyí ró maá ró jijnáhan ró. Vāha ga jeē na cúcuíhyá ndasí ni rō. Te cánuú jéē na quénehen ró tēe sáha cuēchi ún na quénda de mēhñu ró. ³Te ruhū, vésú tu íyó rí jíin ró, te nájnūhun jeē iyó rí jíin ró cúu jeē ñúhún ni rī rohó. Te je ni sándaā rī siquī tēe ni sáha cuēchi ún, chí nájnūhun jeē iyó rí jíin ró cúu. ⁴Núu súcuan te na

ndútútú ró jijnáhan ró, te máá Jítoho yō Jesucristo coo ya jíin ró. Te máá rí chi nájnūhun cone ri jíin ró, chí ñúhún ni rī rohó. Te poder maá Jítoho yō Jesús suni coo jíin ró. ⁵Te na chíhi yó tēe ún ndaha Satanás, návāha na ndóho yiqui cúñu de, te nacani ni de te cácu ánuá de quivī ndiji Jítoho yō Jesús.

⁶Tuú vāha jeē casatéyí ró maá ró. ¿A tu cájini rō jnūhun cáhán suhva? Vésú jecu-ni levadura te ndáa ní ñujen sáha, áchí. ⁷Núu súcuan te quenehen ró tēe un nájnūhun scáne ró levadura jeē ni tívi. Te súcuan te cuu ró nájnūhun pan jeē cúvāha jíin ñujen jéē jéē tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chí cúu ya nájnūhun londe pascua jeē ni jíhī. ⁸Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájnūhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájnūhun levadura jeē ni tívi.

⁹Nuū inga carta jeē ní tee ri nuū rō jijnáhan ró ni cahān rī jeē ma quívī nduu rō jíin ñáyuu cájica jnéni. ¹⁰Te tu ní cáchi rī jeē ma quíjnáhan cuiti rō jíin ñáyuu tu cácadíje jeē cájica jnéni, jeē ndíyo ni, jeē sácúhna, jeē chiñúhún ídolo. Chi núu súcuan te jíni ñúhún jeē quénda ró ini ñayivī núu, chí tuá na inga modo jeē

cújiyo ró núu i chi ndéé yó ñayīvi jíin i. ¹¹ Chi sa suhva ni cachi rī jeē ma quīvi nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chísó jnúhun i siquī jnáhan i, chí nájini i, chí cuīhná i. Te ni ma cáji cuiti rō staā jíin ñáyuu casáha súcuan. ¹²⁻¹³ Chi nasūú jniñu ri cúu jeē sándaā rī siquī ñáyuu jeē tu cáhiin jíin yó. Yaā Dios cúu jeē sándaā siquī i. Te ñayuu cáhiin jíin ró chí cánuú jēē sándaā rō siquī i. Núu súcuan te cánuú jēē quénehen ró téé ni sáha cuēchi un jēē íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácaandíje

6

¹ Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cácaandíje jíin yó? ¿Te naun tu cásándaā rō nuū jnáhan ró cácaandíje Yaā Dios? ² ¿A tu cájini rō jeē ñáyuu cácaandíje Yaā Dios chí ñn quivī te sándaā i jniñu ñayuu ñayīví? Te núu ñn quivī sándaā rō jniñu ñayuu ñayīví, ¿te á má cúu sándaā rō vijna siquī tāca cuéchi lúli cásáha jnáhan ró? ³ ¿A tu cájini rō jeē ñn quivī te sándaā yō nde jniñu tācá ndajéhé andiví? Te nagā ni cuu jniñu ñayīvi yáha jeē ma cúu sándaā yō. ⁴ Núu súcuan te núu jnáhan ró sáha de ñn cuēchi siquī rō, ¿te naun jéngoo ró sa nuū tāca téé jeē tu cúu de jnáhan ñayuu

cácaandíje jeē sándaā de siquī cuéchi ún? ⁵ Súcuan cáhān rī návāha na cúcanu rō jijnáhan ró. ¿A tu íyó ni ñn tēe jécūhun ni mēhñu ró jeē cuu sándaā de siquī rō? ⁶ Tú vāha jeē ñn hermano caquin cuēchi siquī inga hermano nuū tohó jeē tu cácaandíje.

⁷ Te jeē cájequin rō cuēchi siquī jnáhan ró, chí jeē castívī íi rō cúu. ¿A tú vāha ga cuandeyí ni rō na sáha i cuēchi siquī rō chí quende i ndajniñu ró? ⁸ Te tuú chí sa máá ró cásáha cuēchi te cáquende ró ndajniñu, te nuū tācá hermano rō cúu jeē casáha ró.

⁹⁻¹⁰ ¿A tu cájini rō jeē ñáyuu tu íyó ndāā, ma nihín tahú i quīvi i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chí ni ñayuu jeē jíca jnéni, ni ñayuu chíñúhún ídolo, ni ñayuu casíquí ndéē jnáhan, ni tēe sáha ndiyī jíin jnáhan yí, ni ñayuu cuīhná, ni ñayuu ndíyo ni, ni ñayuu nájini, ni ñayuu chísó jnúhun siquī jnáhan, ni ñayuu stahú jnáhan siquī xúhun, ma nihín tahú i quīvicoo i ñuu nuū ndácu Yaā Dios jniñu. ¹¹ Te súcuan ni candāa sava ró núú, te vijna chí je ni nacate ya rohó, te cáhiyo ndoo cáhiyo íi rō nuū yā. Chí je ni ndahva yā cuēchi ró jēē jíin máá Jítoho yō Jesús jíin Espiritu Yaā Dios.

Jeē íyó ndoo íyó líyiqui cúñu ñayuu cácaandíje

¹² Te ndāā cúu jeē cácahān jeē ndihi-ni jniñu íyó vāha sáha yó núu ndese cúní yō.

Te vēsú súcuan te nasūú ndihi sáha jeē quéndōo vāha ánuá yō. Ndihi chi cuu sáha yó, te vēsú súcuan te tu íyó vāha jeē quívi yó núū jniñu jeē stívi ánuá yō. ¹³ Te ndaā cúu jeē cácahān jeē ndeyu cúu jeē cúhun chīji, te chīji cúu jeē cúhun ndeyu. Te ñin quívi te tuá coo súcuan, chi naa ndíndúú un sáha Yaā Dios. Te nasūu síquī jeē cáca jnéni yó cúu jeē iyó yiqui cúñu yō, chi sa suhva jeē sáha yó jéē cuní maá Jítoho yō. Te Jítoho yō chi ndíto ya yiqui cúñu yō. ¹⁴ Te nájnūhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

¹⁵ ¿A tu cájini rō jeē yiqui cúñu tācá ñin ñin ró cúu nájnūhun tāca parte yiqui cúñu Cristo? Núu súcuan ¿te á cuu quende yó ñin parte yiqui cúñu Cristo te squíjnahan yó jíin ñin ñahan jíca jnéni? Ma cúu cuíti súcuan. ¹⁶ ¿A tu cájini rō jeē tēe quíjnahan jíin ñahan jíca jnéni, ñin na yiqui cúñu ni nduu de jíin ña? Chi cáhán tutu ñi: Jeē ndíndúú chi ñin na yiqui cúñu cuu, áchí. ¹⁷ Te ñayuu jeē quíjnahan jíin maá Jítoho yō, chi suni súcuan ñin na cúu i jíin yá síquī jeē candíje i ya.

¹⁸ Núu súcuan te cunu ró jéē ma quívi ró núū jnúhun jíca jnéni. Chi tāca gá cuēchi jeē sáha ñayuu, chi nasūú yiqui cúñu i stívi i. Te núu jíca jnéni i, te síquī yiqui cúñu i cúu jeē sáha i cuēchi. ¹⁹ ¿A tu cájini rō jeē yiqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá

ini rō? Te nasūu cuenta maá ró cácuu ró. ²⁰ Chi Yaā Dios yahu ni cuu jeē ní nacuaan ya rohó jíjnahan ró. Te jeē yúcuan cánuú jeē cáca yíñuhún ró nuū Yaā Dios jeē sáha ró jniñu vāha nde jíin yiqui cúñu rō jíin ini jíin ánuá rō, chi máni cuenta Yaā Dios cúu.

Jnúhun cástūhun síquī tēe jíin ñasihí

7

¹ Vijna te na cáchi rī síquī tāca jnúhun jeē ní cacajnúhun ró ruhū nuū carta. Jendaá jeē vāha ga quendōo ñin tēe núu tú condeca de ñahan. ² Te síquī jeē iyó jnúhun jnéni, te vāha ga jeē tāca tēe na cóo ñasihí máá de, te suni tācá ñahan coo yíi máá ña. ³ Te yíi na squícu vāha de nuū ñasihí de jeē cúu de yíi ña. Te suni súcuan ñasihí na squícu vāha ña nuū yíi ña. ⁴ Chi ñasihí chi tu cúu sáha ña jeē cuní ña jíin yiqui cúñu ña, chi suni jeē cuní yíi ña. Te suni súcuan yíi tu cúu sáha de jeē cuní de jíin yiqui cúñu de, chi suni jeē cuní ñasihí de. ⁵ Te ma sasáhán ró maá ró nuū jnahan ró. Te núu cácuu rō jeē vihyá gā cacān tahu rō jecu tiempo, te núu cáhīyo conforme ndíndúú ró, te cuu sasáhán ró maá ró nuū jnahan ró. Te yūcuán na te vāha ga naquíjnahan tucu ró, návāha ma cóto ndee Satanás rohó síquī jnúhun jnéni.

⁶ Te nasūu jéē ndácu ri jniñu jeē cánuú quíjnahan ró, chi jeē jéhe ri jnúhun cúu. ⁷ Chi nújnahan ni rī jeē tāca tēe na cóo máá ñin-ni de, nájnūhun iyó máá rí. Te sín sín ni

sáha Yaā Dios jín ñn ñn de ndese cúu máá de, chí sava de cuu quendōo máá ñn-ni de, te inga de chí tuú chí sán ni sáha ya jín de.

⁸ Núu súcuan te cáhán rī jín ñáyuu cáhīyo máá ñn-ni, jín ñahan ní caquendōo ndáhú, jeē vāha ga te núu quendōo máá ñn-ni i, nájñuhun íyó máá rí. ⁹ Te núu jíní i jeē ma cánda i quendōo máá ñn-ni i, te na quijnáhan i núu súcuan. Chí vāha ga jeē quijnáhan i vēsú jeē ndúquiji i.

¹⁰ Te nuū ñáyuu jeē jé ni quijnáhan chí ndácu ri jniñu jeē ñahan ma ndusín ña jín yī ña. Te nasūu rúhū cúu jeē ndácu jniñu, chí máá Jítóho yō.

¹¹ Te núu ñn ñahan ndusín ña jín yī ña, te na quéndōo máá ñn-ni ña, chí cuu naquijnáhan ña jín yī ña. Te yī suni ma ndusín de jín ñasihí de.

¹² Te jín sava ga ñayuu chí cahán rī yāha jēē jéni ní maá rí, te nasūu jēē ní cachi máá Jítóho yō cúu. Núu ñn hermano ndéca de ñahan jeē tu cándije, te núu nújnahan ni ña condee ña jín de, te ma ndusín de jín ña. ¹³ Te núu ñn ñahan ndéca ña tēe jeē tu cándije, te núu nújnahan ni de condee de jín ña, te ma ndusín ña jín de. ¹⁴ Chí tēe tu cándije, yīhi cuenta de nuū Yaā Dios siquī jeē ní quijnáhan de jín ñahan cándije. Te ñahan tu cándije, yīhi cuenta ña nuū Yaā Dios siquī jeē ní quijnáhan ña jín tēe cúu hermano cándije. Chí núu tu súcuan te sēhe i ma quīhi cuenta i nuū Yaā

Dios, te vijna chí yīhi cuenta i nuū yā. ¹⁵ Te yī chí ñasihí tu cándije, núu fuerza cuní i ndusín i jín jnáhan i, te na ndusín i. Chí núu súcuan cuní i, te hermano chí hermana cándije tu cánuú casi i jeē ndusín jnáhan i jeē tu cándije. Chí ni cana Yaā Dios yohó jēē condee manī yō jín jnáhan yó. ¹⁶ Te rōhó jēē cácuu ñasihí, tu cájini rō, sanaa te cándije yī rō sáha rō, te cācu de. Te suni súcuan rōhó jēē cácuu yī, tu cájini rō, sanaa te cándije ñasihí rō sáha rō, te cācu ña.

¹⁷ Te ná ñn ná ñn rō na quéndōo rō ndese ní sáha Jítóho yō jeē cúu rō, jín ndese íyó rō ná ni cana ya rohó ní cándije rō. Te súcuan ndácu ri nuū tāca grupo ñayuu cácandije. ¹⁸ Núu ni cana ya ñn tēe jeē ní cuu circuncidar, te súcuan na quéndōo de. Núu ni cana ya ñn tēe jeē tu ní cúu circuncidar, te ma cúu de circuncidar. ¹⁹ Chí tú na vé sáha núu cúu yó circuncidar chí tuú, chí jeē cánuú gá cúu jeē na squícu vāha yó jniñu cuní Yaā Dios. ²⁰ Ná ñn ná ñn rō na quéndōo rō ndese íyó rō ná ni cana ya rohó ní cándije rō. ²¹ Núu mozo jeē ní jeen ñayuu cúu rō ná ni cana ya rohó, te ma cóndihvī ni rō jeē quénda rō. Te núu íyó modo jeē quénda rō nduu libre rō, te íyó vāha jeē sáha rō. ²² Chí tēe cúu mozo jeē ní jeen ñayuu, te núu ni cana Jítóho yō de, te vijna chí ni nduu libre de nuū cuéchi de, jéjniñu de nuū máá Jítóho yō. Te suni súcuan tēe sájniñu cuenta máá, te

núu ni cana ya de, te vijna chi ni nduu de mozo jejníñu nuū Cristo jeē ní nacuaan ya de. ²³ Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhī Sēhe ya jehē rō. Núu súcuan te ma cuajníñu ró núu jníñu cāhá-ni jeē ndácu ñayuu ñayīví. ²⁴ Núu súcuan hermano, ná ñin ná ñin ró na quendōo ró núu Yaā Dios ndese iyó ró ná ni cana ya rohó.

²⁵ Te vijna te siquī ñayuu jeē iyó máa-ni, tú na jñūhun ní ndácu Jitoho yō nuū rī. Te na cāhán rī jeē jéni ni maá rí, chi ni cundáhú ni Jitoho yō ruhū, te ni sáha ya jeē cúu cahān ndaā rī. ²⁶ Jéni ni rī jeē vāha-ni núu quendōo-ni tēe ndese cāhīyo de, jeē siquī jeē iyó jñúndóho tiempo yáha. ²⁷ Núu iyó ñasihí ró, te ma ndusñin ró jíin ña. Te núu tu iyó ñasihí ró, te ma nducú ró ña. ²⁸ Te núu quijnáhan ró, te nasūu cuéchi cúu. Te núu quijnáhan sūchi síhí, te suni nasūu cuéchi cúu. Te ñayuu quijnáhan, chi nihīn i jñúndóho ñayīví yáha, te cúní rī jeē ma nihín rō jñúndóho.

²⁹ Hermano jijnáhan ró, jñūhun jeē cāhán rī yáha cúu jeē yachī-ni ndíhi tiempo jeē sáha yó jniñu ya. Núu súcuan te nde vijna te tēe iyó ñasihí, na cóndihvī gā ni de siquī jníñu máa yá vēsú siquī ña. ³⁰ Te ñayuu jeē ni jíhī jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūú

ndajníñu i cúu. Ma cuáha i jñūhun jeē cási tācá un jéē ma cúu condihvī ni i jniñu máa yá. ³¹ Te ñayuu jeē ní cacondihvī ni siquī ndajníñu ñayīví yáha, ma cujnéñu ga i jíin. Chi je yajni naa tāca jéē iyó ñayīví yáha.

³² Cúní rī jeē ma nácani ndasí ni rō siquī tāca jéē iyó ini ñayīví. Chi tēe cúu soltero, ndíhvī ni de jniñu máa Jitoho yō, ndese cusī ni Jitoho yō sáha de. ³³ Te tēe iyó ñasihí chi ndíhvī ni de jniñu iyó ñayīví, ndese cusī ni ñasihí de sáha de. ³⁴ Te suni súcuan síin síin jéni ni ñahan iyó yī jíin ñahan iyó máa. Chi ñahan iyó máa, ndíhvī ni ña jniñu máa Jitoho yō, chi cúní ña jeē coo ndoo coo i anuá ña jíin yiqui cúñu ña cuajníñu ña nuū yā. Te ñahan iyó yī chi ndíhvī ni ña jniñu iyó ñayīví, ndese cusī ni yī ña sáha ña.

³⁵ Jeē váha máa ró jijnáhan ró cúu jeē ni cāhán rī súcuan. Chi nasūu jéē nducú rí casi rī jeē quijnáhan ró, chi sa suhva cúní rī jeē caca yíñúhún ró te nune ró cuajníñu cutú ró núu máa Jitoho yō.

³⁶ Te núu ñin tēe iyó sēhe síhí de, te núu cuayī i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuáha de jñūhun quijnáhan i, chi nasūu cuéchi cúu. ³⁷ Te núu ñin tēe ni cundāā ni de jeē cóndee sēhe síhí de súcuan-ni, jeē ma cuáha de i vēsú fuerza jícan ñayuu i, núu súcuan te cuu quendōo i nájnūhun cúní de, chi jeē váha sáha de. ³⁸ Núu súcuan te tēe

jéhe jnūhun quijnáhan i, vāha sáha de. Te tēe tu jéhe jnūhun, chi vāha ga sáha de.

³⁹ Te ñahan ní quijnáhan, chi yíhi ña ndaha yí ña níni jeē técu de. Te núu je ni jihí yí ña, yūcuán na te je ni cuu libre ña jeē quijnáhan tucu ña jíin na-ni tēe cúu ni ña, te núu tēe cándije nuū Jítoho yō cúu de. ⁴⁰ Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espíritu Yaā Dios cúu jeē cahán rī.

Siquí cūñu ni sócō nuū ídolo

8

¹ Te vijna te na cáchi rī siquí cūñu ni sócō nuū ídolo. Ndaā chi tāca yó jéni ni yō jeē maá yó cúu jeē jiní ndese cúu. Te tāca jéē jiní yō ún, chi ndúcú sáha jeē cundúxí yó. Te sa suhva jeē cundáhú ni yō jnáhan yó, sáha un jéē íje i jíin jnúhun ya. ² Núu na-ni ñayuu jéni ni i jeē jiní vāha i, te tuú chi ná tu cuni cuiti i nájnūhun cánuú cuni i. ³ Te sa suhva ñayuu jeē maní i jíin Yaā Dios, máá i cúu jeē jetáhú yá.

⁴ Núu súcuan te na cástūhun rí siquí cūñu jeē ní casocō ñayuu nuū ídolo. Ndaā chi jiní yō jeē tāca ídolo ñayíví, tú ndaā cuiti. Te tú na inga yaā iyó, chi máá ñn-ni Yaā Dios. ⁵ Te ñayuu chi cájeni ni i jeē iyó táca yāá ini andíví jíin ñáyíví, chi cácahān i jeē iyó ndije cuehē yaā i jíin jítoho i. ⁶ Te nuū maá yó chi ñn-ni Yaā iyó, jeē cúu Tátá yō Yaā Dios. Te máá yá ni sáha tāca jéē iyó, te cuenta maá yá cúu yó jíjnáhan yó. Te

suní iyó ñn-ni Jítoho yō Jesu-cristo, te nde nuū maá yá vēji tāca jéē iyó, te suni máá yá ni sáha yóhó.

⁷ Te ñayuu cácañdije, chi tú ndíhi i jíni jnūhun yáha. Chi sava i ni cacāan i ni chíñúhún i ídolo nde ná tu candije i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquí jeē ná tu ije i jíin jnúhun Yaā Dios, te jéni ni i jeē cujnéhén ánuá i sáha cūñu jeē ni sócō nuū ídolo ún. ⁸ Te ndaā chi nasūu jéē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā. ⁹ Te vēsú tú ni ñn-jési jeē ma cúu caji rō cūñu ún, te coto ró jnáhan ró jéē ná tu ije jíin jnúhun ya, te ma sáha ró jéē suni caji i jeē jéni ni i jeē cuēchi cúu. ¹⁰ Vāha ga ma caji rō núu súcuan, chi sanaa te hermano rō jeē ná tu ije jíin jnúhun ya, coto de róhó jéē yéji rō ini vehe ídolo, chi jiní vāha ró jéē tú na vé sáha. Te súcuan te sáha ró jéē cájni ni de jeē suni caji maá de cūñu jeē ni sócō nuū ídolo, vēsú jéni ni de jeē cuēchi cúu. ¹¹ Te súcuan stívi ró anuá hermano rō jeē ná tu ije jíin jnúhun ya, vēsú jiní vāha máá ró jeē tú na vé sáha jeē caji rō. Te tú vāha sáha ró, chi suni jehē maá de ni jihí Cristo. ¹² Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquí Cristo cúu jeē

sáha ró cuéchi. ¹³ Núu súcuan te núu cūñu un sáha jeē quívi hermano rī cuéchi, te ma cáji cuiti ga rī cūñu ún, návāha ma sáha ri jeē quívi de cuéchi.

Siquī jeē iyó derecho tēe cácuu apóstol

9

¹ Te máá rí chi jíca libre rī, te iyó derecho rī siquī jeē cúu ri apóstol, tēe ni tají yá scáca jñuhun ya. Chi ni jito ri nuū máá Jítoho yō Jesús, te máá ró jijnáhan ró cácuu jniñu jeē ni sáha ri jeē ni squívi ri rohó ndaha Jítoho yō. ² Te núu sava ga ñayuu tu jétáhú i jeē cúu ri apóstol, te nuū máá ró chi suu cúu ndije ri. Chi siquī jeē ní scandíje ri rohó jijnáhan ró, te jeē yúcuan cácuu ró prueba jeē steén jeē ndíso jniñu ri cúu ri apóstol nuū máá Jítoho yō.

³ Te jñuhun yáha cáhán rī jehē máá rí nuū ñayuu cácahán siquī rī. ⁴ Achí rí: Iyó derecho rī caji rī coho ri jeē cájēhe ñayuu núu cúní rī. ⁵ Te suni iyó derecho rī núu jeē cuní rī condeca ri ñn hermana candíje cuu ñasihí rí, caca ña jíin rí, nájnñuhun iyó ñasihí Pedro jíin táca gá apóstol jíin tēe cácuu ñani máá Jítoho yō. ⁶ ¿Chí cájeni ni rō jeē máá rúhū-ni jíin Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jñuhun vāha ya, chí naún? ⁷ ¿A iyó soldado jeē técu de xühún vehe de? ¿A iyó tēe jeē jítu uva te tu yéji de ndehē ún? ¿A iyó tēe jeē ndító lanchi te tu jíhi de

leche tī? Tú cuiti. ¿Te á suni tu iyó derecho rī cotecu rī siquī jñuhun ya naún? ⁸ Te ma cáni ni rō jeē táca jéē cahán rī yáhá, máni máá jéē cácahán ñayuu ñayívi cúu. Chi nde máá ley yá jeē ni jēhe ya nuū Moisés, cáhán súcuan. ⁹ Chi cáhán nuū tútu ley yá: Ma chñuhun ró ñunu yuhu stíquī, quiti jéxín trigo, achí. Te ndaā chi nasūu máni siquī stíquī cúu jeē ni cáhán yá súcuan. ¹⁰ Chi suni siquī máá yó ní cahán yá. Chi ley un ní jēhe ya jeē váha máá yó, chi stéén jeē tēe jítu jíin tēe jéxín trigo cánuú jeē nihín de sava un quívi ndutútú. ¹¹ Te suni súcuan ruhū jijnáhan ri jeē ní cataji ri jñuhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō? ¹² Te núu sava ga tēe cástéén nuū rō, iyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rí jeē cáji rī, návāha ma cási rī jeē cáca jñuhun vāha Cristo. ¹³ Te cájini rō jeē sutū ni cajejníñu ini templo, ni cacotecu de siquī jeē ní casocō ñayuu ini templo. Chi sutū ni cajejníñu nuū altar nuū ní casocō i quiti, suni ni cayejí de sava quiti ún. ¹⁴ Te suni súcuan ni ndacu máá Jítoho yō jniñu jeē tēe cánacani jñuhun jeē jnáma ya yohó, siquī jniñu un níhín de jeē cótecu de. ¹⁵ Te ruhū tu ní jíicán cuiti rī derecho rī yáhá, te suni nasūu jéē tēe ri jñuhun yáha návāha cuāha ró núu rī

jijnáhan ró. Chi jéni ni rī jeē vāha ga núu na cúu rī nasūu jeē quíhin ri jeē cuáha ró, chi casi jeē cúshī ni rī scáca ri jnūhun ya sūcuan-ni.

16 Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi ñin jeē ní tejniñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. 17 Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chi máa Yaā Dios ni tee ya jniñu siquī rī. 18 Núu sūcuan te yāhu ri cúu jeē cúshī ni rī jeē sūcuan-ni nácani ri jnūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jnūhun ya.

19 Chi vēsú tú ni ñin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihīn rī cuehē i candíje i Cristo. 20 Núu íne ri jíin jnáhan ri hebreo te sáha ri nájnūhun cásáha i, návāha cuu scándíje ri i. Chi násáha ri maá rí nájnūhun tēe cáyihī chīji ley Moisés, návāha cuu scándíje ri i jeē cáyihī i chīji ley un, vēsú tuá yīhi ri chīji ley un. 21 Te suni násáha ri maá rí nájnūhun ñayuu tu cáyihī chīji ley Moisés, návāha cuu scándíje ri ñayuu ún. Te vēsú sūcuan te yīhi ri chīji ley Yaā Dios, chi suu cúu ley Cristo jeē squícu ri. 22 Te núu íne ri jíin ñayuu jeē ná tu ije jíin jnúhun ya, te sáha ri maá rí nájnūhun jeē ná tu ije ri jíin jnúhun ya, návāha cuu scándíje ga rī i.

Núu sūcuan te násáha ri maá rí núu ndese cándāa tāca ñayuu, návāha tācá-ni modo un te cuu scándíje ri sava i. 23 Tāca yáha sáha ri jeē siquī jnúhun jeē jnáma ya yohó, návāha suni nihīn rī tahū jeē ndíso jnūhun ya.

24 Je cájini rō jeē tēe cájinu carrera, jendaá chi ndihī de cájinu, te ñin-ni de cūndeyí nihīn premio. Te suni sūcuan nducú ndéyí máa ró squícu ró, návāha nihīn rō premio nuū yā. 25 Te tāca tēe cūní cūndeyí síquī ñin deporte, chī cáscuáha de te cándito de máa de. Sūcuan cásáha de návāha nihīn de ñin premio jeē cúu corona ndaha yújnu jeē náa yachī. Te máa yó chi sa suhva cánducú ndéyí yó návāha nihīn yō ñin premio jeē ma náa cuíti. 26 Te máa rí suni nducú ndéyí rí nájnūhun tēe cájinu, te tu nducú ndéyí cāha rī. Te sáha ri nájnūhun tēe cácajnáhan juego jeē tu jéhe iyú de, chi quée jniñu sáha ri. 27 Chi sa suhva stóho ri yiqui cúñu rī, te stíhvī ni rī maá rí squícu ri. Chi vēsú ni stíhvī ni rī ñinga ñayuu jeē nducú ndéyí i, te núu tu nducú ndéyí máa rí te snáa rī premio rī.

Siquī jeē ma chíñúhún i ídolo

10

1 Hermano jijnáhan ró, cūní rī jeē na jécūhun ni rō ndese ni cajica jíi yō jenahán. Chi ndihī de ni cajica chīji vicō jeē ni stéén ichi nuū de, te ndihī de ni cayāha mēhñú ndute Mar Rojo jeē ní cusñin, ni nune ichi. 2 Sūcuan cúu jeē

ní canduu inuú ndihi i jín Moisés, chi ni candiquin i de chíji vicō jín méhñu mar. ³ Te ndihi i chi inuú-ni ni cayeji i alimento jeē ni jéhe máá Espíritu. ⁴ Te suni ndihi i ni cajihí ndute jeē ni jéhe Espíritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájñuhun cava un jéē jéhe ya ndute cotecu yō ní cáni. ⁵ Te vēsú súcuan te cuehē i ni cunihni ni i, te tu ní cúsiñ ni Yaā Dios jín i, te jeē yúcuan ní cajihí i nuū ñuhun téhé.

⁶ Te tāca jéē ní cuu ún, in ejemplo cúu nuū yō, návāha ma ndíyo ni yō tāca jéē neé, nájñuhun ni candiyo ni ñayuu ún. ⁷ Te ma chiñúhún ró ídolo, nájñuhun ni casáha sava i. Chi súcuan cáhán nuū tútu ñi: Ni cacucōo ñayuu ún, ni cayeji i ni cajihí i vico ídolo, te ni ndocuiñi i ni cajita jéhé i, áchí. ⁸ Te ni ma cáca jnéni ró nájñuhun ni casáha sava i, te ni cajihí ocō unī mil i jeē in quiví-ni. ⁹ Te ni ma sáha ró jniñu jeē squiti ni rō Jitoho yō, nájñuhun ni casáha sava i, te ni cajihí i jeē ní catuu coō i, ni sáha ya. ¹⁰ Te ni ma cahán sōó ró siquī Yaā Dios, nájñuhun ni cacahán sōó sava i, te ni cajihí i jeē ní jehni ndajéhé yā i.

¹¹ Te tāca jéē ní cuu ún, chi in ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quiví cuándihi ñayiví. ¹² Núu súcuan te róhó jéē cájeni ni rō jeē cáhīn ñihin ró jéē ma sáha ró cuéchi, coto má quiví

ró cuéchi. ¹³ Chi máni íyó jéē nducú squiví róhó cuéchi, te inuú-ni cándoho ró súcuan nde jín táca gá ñayuu. Te cuu cucáhu ni rō Yaā Dios jeē ma cuáha ya jñuhun jeē vihyá gā coto ndee jexeén róhó vēsú jeē cúu cundeyí ró jín. Chi sa suhva núu vēji jeē nducú squiví róhó cuéchi, te chindéé ñáhán yá rohó quenda ró te cundeyí ró siquī.

¹⁴ Ñánī mánī, ma chiñúhún cuiti rō ídolo núu súcuan. ¹⁵ Cáhán rī jín ró jéē cúu ró ñayuu cájecūhun ni, te na sáha ró cuenta núu ndaā jñuhun cáhán rī. ¹⁶ Máá copa ñi jeē cájicān tahu yō jehē, suu cájihí cáhu yó jéē steén yō jeē inuú cúu ndihi yó, chi ni jeti ñiñi Cristo jeē siquí yō ná ni jihí yā jicā cruz. Te pan jeē sacuéchí yó cáyeji cáhu yó, steén jeē inuú cúu ndihi yó siquī jeē ni jéhe Cristo yiqui cúñu yā ni jihí yā jehē yō. ¹⁷ Te vēsú cuehē yō iyó, te in-ni ñayuu cácuu yó, chi in-ni pan un cáyeji cáhu yó siquī jeē cá candíje yó.

¹⁸ Condēhe ró ndese casáha ñayuu Israel. Tāca tée jeē yéji quiti jeē ni sócō nuū yā, chi inuú-ni cúu ndihi de siquī jeē cáyeji de jeē ni sócō ún. ¹⁹ Núu súcuan te cáhán rī jeē tu ndé jéjníñu ídolo, ni tu jéjníñu cúñu jeē ni sócō nuū ídolo, chi inuú cúu jín táca gá cúñu. ²⁰ Te suni cáhán rī jeē ñayuu tu cájini jñuhun Yaā Dios, núu cásocō i, te nuū tachí cásocō i, nasūu núu Yaā Dios. Te tu cúní rī jeē cuajníñu ró núu tachí. ²¹ Ma cúu coho ró copa

maá Jítoho yō te núu cájihi ró jeē ni sócō nuū tachī. Te ma cúu caji rō nuū mesa Jitoho yō te núu cáyeji rō jeē ni sócō nuū tachī. ²² Ma quívi nduu yō súcuan jíin táchī, návāha ma cucuíñi Jítoho yō jíin yó. ¿Chí téyi gá maá yó vēsú maá yá jeē ma cúu stóho ya yohó, cájeni ni rō, chí naún?

Ndihí chí sáha yó jíin jnúhun cúndáhú ni

²³ Te ndaā cúu jeē cácahān jeē ndihí-ni jniñu íyó váha sáha yó núu ndese cúní yō. Te tuú chí nasúu ndihí sáha jeē quéndō vāha ánuá yō. Ndihí chí cuu sáha yó, te vēsú súcuan te nasúu ndihí sáha jeē ije jnáhan yó jíin jnúhun ya. ²⁴ Chí cánuú sáha yó jeē váha jnáhan yó, nasūu máni máá jeē váha máá yó.

²⁵ Cuu caji rō ndihí-ni cūñu cúyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. ²⁶ Chí cuenta maá Jítoho yō cúu ñayívi jíin ndivii jeē iyó ini, te cuu cuajniñu yó.

²⁷ Te núu ñin tēe tu cándíje, cana de róhó caji rō jíin de, te núu cácuni rō quihīn rō, núu súcuan te caji rō táca jeē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. ²⁸ Te núu cachi ñin i nuū rō jeē cūñu ni sócō nuū ídolo cúu, yūcuán na te ma cáji rō, chí siquī jeē jéni ni i jeē cuēchi cúu, te tu cúní rō sáha ró jeē quívi i cuēchi. ²⁹ Te súcuan cáhān rī siquī jeē inga i cájeni ni i jeē cuēchi cúu, te

nasūu jeē súcuan cájeni ni maá ró.

Te sanaa te cahān ñin ró: ¿A tu íyó libre rī caji rī jeē cuní maá rí, vēsú cájeni ni inga i jeē cuēchi cúu? ³⁰ ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō. ³¹ Tuú chí ndihí jeē sáha ró, vēsú jeē caji rō chí jeē coho ró, chí na-ni jniñu sáha ró, ndihí na sáha yíñuhún ró jíin Yaā Dios, návāha cuni ñayuu jeē luu cújéhu ya. ³² Te ma sáha ró jniñu jeē squívi ró ñáyuu nuū cuēchi, cúu ñayuu hebreo, cúu ñayuu tēcá nación jeē tu jíin jnúhun ya, cúu ñayuu cácaadíje Yaā Dios. ³³ Te ruhū chí ndúcú rí jeē na cúsi ni táca ñáyuu jíin táca jniñu sáha rí. Tu ndúcú rí jeē váha máá-ni rí, chí sa ndúcú rí sáha rí jeē váha cuehē ñayuu, návāha cácu i.

11

¹ Te na ndácu ró ruhū jijnáhan ró, najnúhun ndácu máá rí Cristo.

Siquī ndese cánuú sáha ñahan cándutútú

² Váha cása ha ró, hermano, jeē niní cánucūhun ni rō ruhū, te cándihvī ni rō jíin táca jniñu jeē ni steén rī nuū rō. ³ Te cúní rī jeē na jécūhun ni rō jeē Cristo cúnuú yá nuū táca tēe. Te tēe cúnuú de nuū ñasihí de. Te Yaā Dios cúnuú yá nuū Cristo. ⁴ Núu ñin tēe ñuhun de lélú te jícán tahu de chí nácani de jnúhun nuū ndutútú ñáyuu cácaadíje, núu súcuan te jéhe de jnúhun canu máá de. ⁵ Te sa núu ñin ñahan tu ndési xiní

ña te jícán tahú ña chí nácani ña jnūhun, núu súcuan te jéhe ña jnūhun canu máá ña, chí ñin-ni cúu un núu ní sáte xīnī ña. ⁶ Chi núu tú casī ña xīnī ña, vāha ga na sáte ña ixi ña núu súcuan. Te núu cúcanu ña jeē sáte ña ixi ña chí jeē sáte lī ña, te na casī ña núu súcuan. ⁷ Te tēe chí ma casī de xīnī de, chí máá de cúu muestra jeē steén ndese cúu Yaā Dios jeē cujéhu ya. Te ñahan chí stéén ña jeē cujéhu tēe. ⁸ Chi ná ni sáha ya tēe, te nasūu jíin yiqui ñahan ni sáha ya, chí sa suhva jíin yiqui tēe ni sáha ya ñahan. ⁹ Te ñahan chí ni cuvāha ña jeē siquī tēe, nasūu tēe jeē siquī ñahan. ¹⁰ Te jeē yúcuan cánuú jēē cóndesi xīnī ñahan, te suu stéén jeē cujéhu tēe, chí suni cándehé ndajéhé yā ndese sáha ña. ¹¹ Te vēsú súcuan te yóhó jēē candíje yó, chí jíin yó jeē tu iyó tēe núu jeē tu iyó ñahan, te tu iyó ñahan núu jeē tu iyó tēe. ¹² Chi vēsú ni sáha ya ñahan jíin yiqui tēe, te vijna cácu tēe chíji ñahan, te máá Yaā Dios cúu jeē sáha tēcá-ni.

¹³ Na sáha máá ró cuenta ¿á iyó vāha núu tu ndési xīnī ñahan te jícán tahú ña nuū Yaā Dios? ¹⁴ Chi sáha yó cuenta jeē ini ñayīvi yáha, núu cáni ixi tēe te cúcanu de sáha. ¹⁵ Te ñahan chí sa vāha jíto ña te núu cáni ixi ña, chí suu ni jéhe ya jeē cóndesi xīnī ña.

¹⁶ Te núu ndé ñin ñayuu cuní i cahān i siquī jnūhun yáha, te ruhū jíin táca grupo ñayuu cáncandíje nuū Yaā Dios, tú na inga costumbre jejnūhún rí siquī jnūhun yáha.

Jeē castívi i siquī Cena Jitoho yō

¹⁷ Te iyó inga jnūhun cánuú cahān rī jíin ró, chí tu cúu cahān rī jeē vāha casáha ró. Chí nuū cándutútú ró te tu sáha jeē quéndōo vāha ga rō, chí sa jeē castívi ró. ¹⁸ Xihna jnūhun yáha cáhán rī, jeē nihín rī jnūhun jeē nuū cándutútú ró te cácusín ni rō. Te jéni ni rī jeē ndaā cúu. ¹⁹ Chi níni coo sava ró jēē cusín ni, návaha natūu ndé-ni cúu jeē cáncandíje vāha mēhū ró. ²⁰ Te jeē cácusín ró súcuan nuū cándutútú ró, te nasūu cena máá Jítoho yō cúu jeē cáyeji rō núu súcuan. ²¹ Chi núu cáyeji rō, te tēcá ñin ñin ró cúní caji xīhna gā vēsú jnáhan ró. Te súcuan te sava ró tu cánihín, te cájiī sōco, te sava ró cáncandíje jeē cájihi cuehē. ²² ¿A tu cánevāha ró vehe nuū caji rō coho ró, chí naún? Chí jeē casáha ró súcuan cúu jeē tu iyó yíñuhún ró ini vehe nuū cándutútú ñáyuu cáncandíje Yaā Dios, chí casáha ró jēē cáncuanu ñayuu jeē tú na vé névāha. ¿Ndesé cahān rī jíin ró núu súcuan? ¿A cáhán rī jeē vāha casáha ró? Tuú chí nasūu jēē vāha cúu jeē casáha ró súcuan.

Siquī jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

²³ Chi jnūhun yáha jēē ní nastéén rī nuū rō, chí nuū máá Jítoho yō ni nihín rī: Jeē máá jecuáa jeē ní nastúu de Jitoho yō Jesús, te ni quihin ya pan. ²⁴ Te ni nacuatáhu

yá, te ni tahú cuéchi yá, te ni cahān yā jín tée cáscuáha jín yá: Quihin te caji rō jijnáhan rō, chí yāha cúu yiqui cúñu rī jeē ni sócō rī jeē siquí rō. Te níní caji rō súcuan jeē cáñuhun ni rō ruhū jeē ni jíhi rī jehē rō. Achí yá. ²⁵ Te suni súcuan ni quihin ya copa ná ni cuu ni cuxíni ya jín de, te ni cahān yā: Jeē ñuhun copa yáha cúu niñi rī jeē sácútu contrato jeē jeē jnáma ri ñayuu. Te tāca jínu jeē cájhi rō, te nucūhun ni rō ruhū. Achí yá. ²⁶ Chi tāca jínu jeē cáyeji rō pan un te cájhi rō copa un, súcuan cástéén rō jeē ni jíhi Jitoho yō jehē yō. Te súcuan na sáha rō ndé quiví ndjí ya.

Ndese caji yíñúhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu íyó yíñúhún i siquí yiqui cúñu maá Jitoho yō jín siquí niñi yā. ²⁸ Núu súcuan te coto ndee rō maá rō núu íyó ndoo ánuá rō jeē tú cuéchi rō. Te sáa te cuu caji rō pan un te coho rō copa un. ²⁹ Chi núu ñin ñayuu tu yéji tu jíhi yíñúhún i te tu nucūhun ni i jeē yiqui cúñu yā cúu, ñayuu ún chí nihīn i castigo núu na cáji i coho i. ³⁰ Jeē yúcuan cúu jeē iyó cuéhē ñayuu cácuñu jín jéē ní cacuxíí, cáhiyo mēñu rō. Te sava i je ni cajihī. ³¹ Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³² Te

núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jín ñayuu ñayiví.

³³ Ñání mání, núu súcuan te jeē cándutútú rō jeē cáji rō Cena yā, te condetu rō te caji inuú rō. ³⁴ Te núu ñin ñayuu jí i sóco, te xīhna gā na cáji i vehe i návāha ma stívi i nuū cándutútú rō. Te súcuan te ma cuáha ya castigo i. Te quiví jécondēhe rí rohó te cachi rī ndese coo sava ga jniñu.

Siquí tāca táhū jeē jéhe Espíritu

12

¹ Hermano, cúni rī jeē na jécūhun ni rō siquí tāca táhū jeē jéhe Espíritu nuū yō, suu tāca modo jejniñu ñin ñin yó núu Yaā Dios.

² Te cájini rō jeē ná ni cuu rō ñayuu ná tu candíje, te ni cacondihvī ni rō ni cachiñúhún rō ídolo ñihín. ³ Te vijna te na jécūhun ni rō jeē núu ndé ñayuu cahán ndevāha i siquí Jesús, te nasūu jín poder Espíritu Yaā Dios cúu jeē cahán i súcuan. Te ni ñin i ma cúu cahān i jeē Jitoho i cúu Jesús, te núu tu ndéé poder Espíritu Santo ini i.

⁴ Te sín sín tahū jéhe ya jeē cuajniñu ñin ñin yó núu yā, te ñin-ni máá Espíritu cúu jeē jéhe. ⁵ Te sín sín jéjniñu yó, te nuū maá ñin-ni Jitoho yō jejniñu yó. ⁶ Te sín sín modo sáha yó jniñu ya, te ñin-ni Yaā Dios cúu jeē sáha jniñu un jín yó. ⁷ Te nuū ná ñin ná ñin yó ní jéhe Yaā Dios tahū jeē sáha Espíritu yā

jín yó, návāha na sāha yó jēe ije jnāhan yó jín jnūhun ya. ⁸ Chi sava yó ní canihīn tahū jeē ndichí cáhán yō jnūhun ya, sāha máá Espíritu. Te sava ga yō ni canihīn yō jeē cúu jécūhun vāha ni yō te castūhun yó, te suni máá Espíritu sāha. ⁹ Te nuū sava ga yō ni jēhe ya tahū jeē cúu cándije nihin yó jēe sāha ya jeē jicán yō, te sava ga yō cúu sāha yó jēe ndúvāha ñayuu cácuḥū, te suni máá Espíritu sāha. ¹⁰ Te sava ga yō cúu sāha jniñu jéḥnu jín fuerza Yaā Dios. Te sava ga yō cúu nácani jnūhun ya. Te sava ga yō ni sāha ya jeē náconi yō tāca jnūhun, núu vēji nuū Espíritu yā chí tuú. Te sava ga yō ni nihīn tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnūhun ni cahán jnāhan yó jín inga yuhu ún. ¹¹ Te tāca táhū yáha, chí ñn-ni máá Espíritu sája, te sīn sīn jēhe ya nuū ñn ñn yó, ndese nújnahan ni máá yá.

Ndihí yó cúu nájnūhun ñn na yiqui cúñu

¹² Chi nájnūhun ñn yiqui cúñu iyó cuéhē parte, súcuan cúu yó jín Cristo jeē cúu yó nájnūhun yiqui cúñu yā, chí ñn na cúu yó jín yá. Te vēsú cuehē parte cácuu yó te ñn-ni cúu yó, nájnūhun ñn yiqui cúñu jeē iyó cuéhē parte. ¹³ Chi ñn na ni canduu yó jín yá ni sāha ñn-ni máá Espíritu ná ni cajendute yó. Súcuan cúu vēsú cúu yó ñayuu hebreo chí ñayuu griego, vēsú mozo jeē ní jeen ñayuu chí

tée sájniñu cuenta maá. Te ndihí yó chí ñn-ni Espíritu ni canihīn yō.

¹⁴ Te ñn yiqui cúñu chí nasūú ñn-ni parte cúu, chí sa cuehē parte cúu. ¹⁵ Te núu jehē cahān: Nasūu cuenta yiqui cúñu cúu ri, chí nasūú ndaha cúu ri, te tuú chí parte yiqui cúñu cúu nahín. ¹⁶ Te núu sōho cahān: Nasūu cuenta yiqui cúñu cúu ri, chí nasūu tññu cúu ri, te tuú chí parte yiqui cúñu cúu nahín. ¹⁷ Núu ní yiqui cúñu yō cúu tññú, ¿te ndese cuni sōho yó núu súcuan? Te núu ní yiqui cúñu yō cúu sōho, ¿te ndese cuaan yó xícō núu súcuan? ¹⁸ Te Yaā Dios ni chujnáhan ya ñn ñn parte yiqui cúñu, nájnūhun cúní yā jeē coo. ¹⁹ Chí núu ñn-ni parte cúu ndihí, te nasūú ñn ní yiqui cúñu cúu núu súcuan. ²⁰ Te tuú chí cuehē parte iyó, te ñn-ni yiqui cúñu cúu.

²¹ Te ni ma cúu cahān tññu jín ndaha: Tu jini ññhún rí rohó. Te ni xiní ma cúu cahān jín jéhē: Tu jini ññhún rí rohó. ²² Chí sa suhva tāca parte yiqui cúñu jeē jeni ni yō jeē núu ga fuerza, suu cúu jeē cánuú gá. ²³ Te tāca parte yiqui cúñu jeē jeni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jesi yō. ²⁴ Chí parte jeē lúu cáa, tu cánuú jēe condihyū. Chí súcuan ni chujnáhan Yaā Dios yiqui cúñu, jeē yucún gá ndíto yó jēe tu cáa luu. ²⁵ Súcuan ni sāha ya návāha ma cusín tāca parte yiqui

cúñu, chi sa chindéé ñájnáhan vāha jíin jnáhan. ²⁶ Te núu jétú ñin parte yiqui cúñu, te suni ní cáhnu-ni jétú. Te núu ñin parte ndíto yúcún yó, te suni ndihi-ni parte quéndōo vāha.

²⁷ Te rōhó jíjnáhan ró chi nájnūhun yiqui cúñu Cristo cácuu ró, chi ñin na cúu yó jíin yá. Te ná ñin ná ñin ró cúu ñin ñin parte yā. ²⁸ Núu súcuan te sñn sñn jniñu ni jēhe Yaā Dios nuū tāca ñáyuu cácañdije jeē cácuu i nájnūhun ñin ñin parte yā: Te suu ñin parte yā cúu tācá apóstol jeē ní jeni ya xīhna gā jeē scāca de jnūhun ya. Yūcuán na te jeē uú, tēe cánacani jnūhun ya, te jeē uní, tēe cástéén. Yūcuán na te ñayuu casáha jniñu jéhnū jíin fuerza yā, jíin ñáyuu casáha jeē ndúvāha ñayuu cácuñū, jíin ñáyuu cachíndéé ñájnáhan, jíin ñáyuu cándiso jniñu, jíin ñáyuu cácañn sñn sñn yuhu jeē tu cájecūhun ni. ²⁹ ¿A ndihi yó cácuu apóstol, chí naún? ¿A ndihi yó cánacani jnūhun? ¿A ndihi yó cástéén? ¿A ndihi yó cuu sáha jniñu jéhnū? ³⁰ ¿A ndihi yó cuu sáha jeē ndúvāha ñayuu cácuñū? ¿A ndihi yó cuu cahān sñn sñn yuhu? ¿A ndihi yó cuu nacastūhún yuhu ún, chí naún? Tuú chí sñn sñn tahū ni canihñ yō. ³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ñin jeē váha ga nuū tāca gá tahū ún, suu jnūhun cundáhú ni jnáhan.

Jnūhun jeē cundáhú ni

jnáhan

13

¹ Vēsú núu cuu cahān yō tijni yuhu jeē cácañn ñayuu chí jēē cácañn ndajéhé Yaā Dios, te núu tu cundáhú ni yō jnáhan yó, te jnūhun cahān yō un cúu nájnūhun ñin tambor jeē ndaxín cáján chí ñin platillo jeē ndaxín cáxín sánee sōho ñayuu. ² Te vēsú cuu nacani vāha yó jnúhun ya, te cuu jecūhun ni yō tāca jnúhun sáhi yá jíin tāca jnúhun ndíchí, te núu tu cundáhú ni yō jnáhan yó, te tu ndé jéjníñu cuiti yō núu súcuan. Te vēsú cuu candije téyí yó jeē nde cuu cahān yō jeē cújiyo yucu, te núu tu cundáhú ni yō jnáhan yó, te tu ndé jéjníñu cuiti. ³ Te vēsú na sája yó ndihi jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jēē siquí jnúhun ya, te núu tu cundáhú ni yō jnáhan yó, te tu ndé jéjníñu cuiti.

⁴ Ñayuu cundáhú ni chi íyó paciencia jíin jnáhan, te íyó mánī ni, te tu cúcuésún ni. Te tu sándúxí, te tu sátéyí máá. ⁵ Tu sájéé ni, tu ndúcú jēé cúu máá-ni, tu quítí ni, tu ñūhun ni jnūhun quítí ni. ⁶ Tu cúsiñ ni jíto jniñu néé casáha jnáhan, chí sa cúsiñ ni jíin jniñu váha. ⁷ Ñayuu cundáhú ni chi ndihi jéhnū ni ndoho jehē jnáhan, te tu jécuiñī jeē candije jnáhan, jíin jēē ñūhun ni jeē squícu jnáhan, jíin jēē jéndeyí ni jíin jnáhan.

⁸ Jnūhun cundáhú ni chi ma nāa cuiti. Te quiji quiivī jeē tuá nacani i jnūhun, ni tuá cahān i tijni yuhu, ni tuá jini ñuhún jnūhun ndíhí. ⁹ Chi tu jini vāha vāha yó vijna, te jnūhun cánacani yó suni jecu-ni cúu. ¹⁰ Te núu na quiji quiivī jeē cúni yō ndihi, yūcuán na te tuá coo jeē jini yó jecu-ni.

¹¹ Ná ni cuu yó súchi lúli te ni cahān yō, ni jeni ni yō, ni jecūhun ni yō nájñūhun súchi lúli. Te ná ni jehnu yó te ni stóo yó modo súchi lúli. ¹² Te suni súcuan, jecu-ni jécūhun ni yō vijna, nájñūhun jeē jito yó núu ñn espejo jeē tú ndijin vāha. Te cúcuéé gá te jecūhun cáji ni yō ndihi. Te vijna chi jecu-ni jini yō, te cúcuéé gá te cuni vāha yó ndese Yaā cúu ya, nájñūhun jini vāha ya yohó ndese ñayuu cúu yó. ¹³ Núu súcuan te iyó únī jnūhun jeē quéndōo cutú ní cáni: Jeē candíje nihin yó jéē squícu ya jeē ni jéjnūhun ya, jeē cócuhun ni yō tāca jéē vāha coo, jín jéē cundáhú ni yō jnāhan yó. Te jnūhun cundáhú ni chi jehnu ndasí gá cúu nuū tāca jéē yáha.

Siquí jeē cácahān i tijni yuhu

14

¹ Na condihvī ni rō cundáhú ni rō jnāhan ró, te suni condihvī ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya. ² Chi tēe névāha tahū jeē cahán de tijni yuhu jeē tu jécūhun ni de, chi máa-ni Yaā Dios jini jeē cahán de, nasūu ñayuu. Chi ni

ñn i ma jécūhun ni jeē cahán de. Chi sāha Espíritu jeē cahán de tāca jnúhun yísāhí. ³ Te sa suhva tēe nácani jnūhun ya, chi jín ñáyuu cahán de návāha ije i jín jnúhun ya, te stíhví ni de i, te cáhán ndeyí ni de jín i. ⁴ Te tēe jeē cahán tijni yuhu, chi máa-ni de ije jín jnúhun ya. Te tēe jeē nácani jnūhun ya, chi sa suhva sāha de jeē ñáyuu cácaandíje ije i jín jnúhun ya.

⁵ Nújnahan ni rī jeē ndihi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jehnu ga jniñu sāha tēe nácani jnūhun ya vēsú tēe cáhán tijni yuhu. Chi núu tú tēe castūhun jnúhun cáhán de, te ma cuajniñu jeē ije ñayuu cácaandíje. ⁶ Jeē yúcuan hermano jijnáhan ró, núu na jéé rī nuū rō, te núu cahān rī tijni yuhu jeē tu jécūhun ni rō, ¿te ndé cuajniñu ún? Te núu na cáhán rī ñn jeē ni steén yā, chí ñn jeē cútūhva ró jnúhun ndaā, chí ñn jeē nácani rī jnúhun ya, chí ñn jeē steén rī nuū rō, yúcuan cúu jeē cuajniñu.

⁷ Sáha yó cuenta jeē nájñūhun instrumento música, vēsú tu técu, te cuu cata, nájñūhun flauta jín arpa. Te núu tu jíta sñn sñn nota, ¿te ndese cuni yō na yaa jíta? ⁸ Te núu corneta tu jécu cáji, te ni ñn tēe ma sátūhva de quihñ de guerra. ⁹ Te suni súcuan rōhó jijnáhan ró, núu tu cáhán cáji ró jnūhun jecūhun ni ñayuu, ¿te ndese

cuni i na vé cahán rō? Chi jñūhun cáhán rō ndíso tachī cuahān jín. ¹⁰ Te ndaā chi íyó cuéhē yuhu ini ñayīví, te tācá yuhu chi íyó ñáyuu jécūhun ni. ¹¹ Te núu tu jécūhun ni yō yuhu cáhán ñn tēe, te cúu yó nájñūhun tēe ñuu jicá núu tēe cáhán, te suni nájñūhun tēe ñuu jicá cúu de nuū maá yó. ¹² Jeē yúcuan rōhó jéē cácuni ndasí rō nihīn rō tahū jeē jéhe Espíritu, na cácan rō tahū jeē sáha jeē íje ñayuu cácandíje jín jñūhun ya.

¹³ Núu súcuan te ñayuu jeē cahán inga yuhu jeē tu jécūhun ni i, na cácan tahú i jeē cuu nacastūhún i yuhu ún. ¹⁴ Chi núu jicán tahú yō jín inga yuhu, te máá ánuá-ni yó cúu jeē jicán tahú, te tu ndé jéjñiñu nuū jeē níjnūní yō. ¹⁵ ¿Ndesé sáha yó núu súcuan? Na cácan tahú yō jín ánuá yō, te suni jín jéē níjnūní yō. Na cáta yó yaa ñ jín ánuá yō, te suni jín jéē níjnūní yō. ¹⁶ Chi núu nácuatáhú rō máni jñūhun jeē ní quiji nuū anuá rō te tu jécūhun ni rō, núu súcuan te tēe jini sōho te tu jécūhun ni, ma cúu nacuatáhú de jín rō. Chi tu jíní cuiti de na jñūhun cáhán rō. ¹⁷ Ndaā chi vāha nácuatáhú máá rō, te inga de chi tú na vé nihín de jeē íje de jín jñūhun ya. ¹⁸ Na cútahū rī nuū Yaā Dios jeē cahán gā rī jín tijní yuhu vēsú maá rō jijnáhan rō. ¹⁹ Te vēsú súcuan te núu íne rī nuū cáyūcu tūtú ñayuu cácandíje, te núnahan gā ni rī cahán rī uhūn-ni jñūhun jeē jécūhun ni i te stéen nuū i, vēsú jeē

cahán rī uxī mil jñūhun jín inga yuhu jeē tu jíní cuiti i.

²⁰ Hermano jijnáhan rō, ma cáni ni rō nájñūhun sūchi lúli, chi sa suhva na íje rō jéē jecūhun vāha ni rō. Te coo rō nájñūhun sūchi lúli jéē tu jíní i jniñu néé. ²¹ Te yósó núu tūtu ley yā jenahán: Jín jñūhun cácahān tēe inga yuhu, jín jñūhun cácahān tēe ñuu jicá, sáha rī jeē cúni sōho ñayuu yáha jñūhun rī. Te ni jín súcuan ma sáha i cuenta jñūhun cahán rī, achí máá Jítóho yō. ²² Núu súcuan te tahū jeē cahán yō tijní yuhu, yúcuan cúu ñn jeē steén poder Yaā Dios nuū ñáyuu tu cácandíje, nasūu núu ñáyuu cácandíje. Te jeē nácani yó jñūhun ya, yúcuan cúu jeē steén nuū ñáyuu cácandíje, nasūu núu ñáyuu tu cácandíje. ²³ Núu súcuan te núu ndihí rō ñáyuu cácandíje cáhīyo tūtú, te tāca rō cácahān sñn sñn yuhu, te quīvícoo ñayuu tu jécūhun ni jín ñáyuu tu cándíje, ¿te á má cahán i jeē ní canduu loco rō? ²⁴ Te núu tāca rō cánacani jñūhun ya, te núu quīví ñn tēe tu cándíje chí ñn tēe tu jécūhun ni, yūcuán na te nacuni de jeē tée íyó cuéchi cúu de, te coto ndee de máá de jín jñūhun cánacani rō. ²⁵ Te nucūhun ni de tāca jéē ní jeni yuhu ni de jín ánuá de. Yūcuán na te jecuiñí yití de te chiñúhún de Yaā Dios. Te cahán de jeē íne ndije Yaā Dios jín rō jijnáhan rō.

Siquí jeē yucún yñúhún na cóo nuū ndutútú yó

26 Núu súcuan hermano jijnáhan ró: Nuū cándutútú ró te tāca ró coo ñn yaa ñi cata ró, chí ñn jñūhun stéén rō, chí ñn jñūhun jeē ni sāha Yaa Dios jeē jécūhun ni rō, chí inga yuhu jeē cahán rō, chí jée nacastūhun ró jñūhun inga yuhu ún. Te ndihí ún na sāha ró návāha ije ñayuu cáncandíje jíin jñūhun ya. 27 Te núu cáhīyo tēe cahān inga yuhu, te na cahán uū de chí únī-ni de, te ná ñn ná ñn de na cahán. Te suni jíni ñūhún jée nacastūhún ñn tēe jñūhun ún. 28 Te núu tu íyó tēe jeē cúu nacastūhun jñūhun ún, te tēe cácahān inga yuhu, vāha ga ma cahán de nuū cándutútú ró, te na cahán maá-ni de jíin Yaa Dios. 29 Te suni súcuan tēe cáncani jñūhun, na cahán uū de chí únī de, te sava ga rō nacani ni rō núu íyó ndāā jeē cácahān tēe ún. 30 Te núu inga tēe néne ni nihīn de ñn jñūhun jeē ni stéén yā nuū de, núu súcuan te tēe cahán na jécuiñī jeē cahán de, návāha cahān inga tēe ún. 31 Te súcuan te ná ñn ná ñn ró cuu nacani ró jñūhun jeē steén yā nuū rō, návāha cutūhva ró te coo ndeyí ni rō. 32 Te tēe cáncani jñūhun, jíni ñūhún cuatáhú de jeē nacani inga tēe jñūhun te jecuiñī jeē cahán maá de. 33 Chí Yaa Dios cuní yā jeē coo nayúú méhñu ró, násūu jée sacā núu cuvaā rō.

Te nájnūhun cásaha tāca grupo hermano cáncandíje, 34 suni súcuan tācá ñahan cándutútú jíin ñáyuu cáncandíje, na cóo nayúú ña. Chí tú vāha

jeē cahán ña, chi sa cuatáhú ña nájnūhun cahán tutu ley yā. 35 Te núu cuní ña cucáhu ni ña ñn jñūhun, te nde vehe na cájnūhún ña yñ ña. Chí jñūhun canu cúu jeē cahán ñn ñahan méhñu núu cándutútú ró.

36 Te na sāha ró cuenta jeē tu ní quenda jñūhun Yaa Dios nuū maá ró jijnáhan ró, te nasūu máá ñn máá ró ní cánihīn jñūhun ya. 37 Núu ñn tēe jéni ni de jeē tēe nacani jñūhun ya jíin tēe névāha Espíritu cúu de, núu súcuan te na cuájñūhún de jeē jniñu ní ndacu Jitoho yō cúu jeē tēe ri yāhá. 38 Te núu tu jétáhú de jñūhun yāha, suni ma cuatáhú yó de.

39 Núu súcuan, ñānī mánī jijnáhan ró, na cóndihvī ni rō nacani ró jñūhun ya, te ma cāsī rō nuū tēe cácahān sīn sīn yuhu. 40 Te yúcún yíñūhún na sāha ró táca jniñu.

Jñūhun jeē ní natecu Cristo

15

1 Hermano jijnáhan ró, vijnā te nucūhun ni rō jñūhun jñāma ya yohó jeē ní nacani ri nuū rō. Te jñūhun ún chi je ni cajetáhú ró, te suni cáhīn nihīn ró jíin. 2 Te suni jíin jñūhun ún te ni jnama ya rohó, te núu cáhīn nihīn ró jíin jñūhun ni nacani ri nuū rō, te núu tu ní cáncandíje cāha ró.

3 Chí jñūhun cánuú gá jeē ni níhīn maá rí ni nastéén rī nuū rō: Jeē ni jíhī Cristo siquī cuéchi yó, nájnūhun je cahán tutu ñi nde jenahán. 4 Te ni quindūji ya, te ni natecu yā nuū uní quivī, nájnūhun

cáhán tutu iī. ⁵ Te ni nane ya nuū Pedro. Te sáá te ni nane ya nuū ndihúxí gā apóstol. ⁶ Te sáá te ni nane ya nuū vihyá gā uhūn ciento hermano jeē cáyūcu tūtú. Te sava i técu gā nde vijna, te sava i je ni jihī. ⁷ Te sáá te ni nane ya nuū Jacobo, yūcuán na te nuū ndihí ga apóstol.

⁸ Te jeē sándihí na te ni nane ya nuū maá rí. Te nájnūhun ñn jeē ní cacu yúte, súcuan cúu jeē ñn sanaa-ni te ni nduu ri apóstol. ⁹ Chi tēe núu ga nuū tāca gá apóstol cúu ri, te ni nasūu tée vāha cúu ri jeē cónaní rí apóstol, chi ni jito xeēn rī ñayuu cávandíje nuū Yaā Dios. ¹⁰ Te síquī jeē ni sáha Yaā Dios jeē vāha ruhū, jeē yúcuan cúu ri apóstol vijna. Te jeē ni sáha ya jeē vāha ruhū, chi tú cāha ní cúu, chi sa ni scáca ga rī jnūhun ya vēsú tāca gá tēe apóstol. Te nasūu máá rí ni sáha, chi Yaā Dios ni sáha ya jeē vāha un jín rí. ¹¹ Núu súcuan te vēsú ruhū chí tāca gá tēe ún, súcuan cánacani rī jnūhun, te súcuan ni cacandíje ró.

Jnūhun jeē natecu ndīyi

¹² Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jéé ma nátecu ndīyi? ¹³ Chi núu jeē tú natecu ndīyi, te suni tu ní nátecu Cristo nuú. ¹⁴ Te núu jeē tu ní nátecu Cristo, te cánacani cāha rí jnūhun ya nuú, te suni cávandíje cāha ró núu. ¹⁵ Chi núu jeē súcuan cúu núu, te cácuu ri tēe jeē tu cácahān ndaā jnūhun Yaā Dios, chí

ni cacachi rī jeē ní nastécu Yaā Dios Cristo. Te núu jeē tú natecu ndíje ndīyi, núu súcuan te tú ndaā jeē ní nastécu Yaā Dios Cristo. ¹⁶ Chi núu tú natecu ndīyi, te ni Cristo suni tu ní nátecu yā nuú. ¹⁷ Te núu tu ní nátecu Cristo, te cávandíje cāha ró te cándiso iī gā rō cuēchi ró núu. ¹⁸ Te núu jeē súcuan cúu núu, te suni je ni cajahnū ndetū ñayuu ni cacandíje Cristo. ¹⁹ Chi núu tú natecu ndīyi, te núu máá ñn-ni síquī vida yáha ñūhun ni yō jeē sáha Cristo jeē vāha yóhó, núu súcuan te ndahú ndasí gá cácuu yó vēsú tāca gá ñayuu, chí cávandíje cāha yó nuú.

²⁰ Te tuú chi íyó ndaā jeē ní natecu Cristo mēhñu ndīyi. Te máá yá cúu jeē xihna gā ni natecu nuū tāca gá ndīyi jeē natecu. ²¹ Chi síquī jeē ni stívi ñn-ni tēe Adán, te ni quejéé jíhí ñayuu. Te suni súcuan síquī jeē ni sáha ñn-ni tēe Cristo, te natecu ñayuu. ²² Chi nájnūhun cájihī ndihí yó síquī jeē cácuu yó yúcūn Adán, suni súcuan natecu ndihí yó síquī jeē yíhi yó ndaha Cristo. ²³ Te ná ñn ná ñn ndese ndíquín jnáhan máá: Xihna gā Cristo ni natecu yā, te sáá te quivī ndíji ya te natecu tāca ñayuu yíhi ndaha ya. ²⁴ Yūcuán na te jīnu tiempo, te snáā yā poder tāca enemigo jeē cujéhnu jín jéē ndácu jniñu jín jéē iyó poder. Te ndihí jeē ndácu ya jniñu nuū, nacuāha ya nuū Tatá yā Yaā Dios. ²⁵ Chi cánuú jéé ndacu Cristo jniñu nde quiji quivī jeē quénde

Yaā Dios poder tāca jéē jító uhū nuū Cristo, te stóho ya. ²⁶ Te jeē sándihí na te snáā yā cuehyi jéhni ñayuu. ²⁷ Chi cáhán tutu iī jeē sáha Yaā Dios jeē kujéhnú Cristo siquī ndihi, te cuatáhú núu yā. Te jeē cahán jeē kujéhnú ya nuū ndihi-ni, te jíní vāha yó jéē maá Yaā Dios ma quíhi ya ndaha Cristo, chi Yaā Dios cúu jeē ni chíhi tācá un ndaha Cristo. ²⁸ Te ná ni quívi ndihi ún ndaha Cristo, yūcuán na te suni máá Cristo jeē cúu ya Sēhe, quívi ya ndaha Tátá yā, Yaā jeē ní chíhi tācá un ndaha ya. Te súcuan te máá Yaā Dios jñi ya ndihi-ni.

²⁹ Te iyó ñayuu cájendute jehē ndíyi. Te núu tú natecu cuiti ndíyi, ¿te najehē cájendute i jehē ndíyi núu súcuan?

³⁰ Te ruhū jijnáhan ri, ¿najehē cúu jeē ndiquiví cájendeyí ni rī jító ri jnūndóho cuu rī, te núu tú natecu ndíyi? ³¹ Hermano, nájñuhun iyó ndáā jeē cúsi ni rī siquī jeē cácandíje ró Jítoho yō Jesucristo, suni súcuan iyó ndáā jeē ndiquiví nducú ñayuu cahni ruhū siquī jñiñu ya. ³² Te jeē ní ndoho ri ni casáha tēe xeēn ñuu Efeso, jeē cácuu de nájñuhun quiti xéén, ¿te na vé nihín rī siquī un núu súcuan? Chi núu tú natecu ndíyi, te cuu cahán yō nájñuhun áchí iñ jñuhun: Na cúsi ni yō caji yō coho yó, chi sanaa te sajnē te cuu yō, achi yō nuú.

³³ Ma cuáha ró jnúhun stáhú ñayuu rohó. Chi áchí

iñ jñuhun: Núu cájica ró jín ñayuu neé, te stívi i róhó jéē tuá caca ndaā rō. ³⁴ Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndíyi

³⁵ Te sanaa te cahán iñ ró: ¿Ndese natecu ndíyi? ¿Ndese coo yiqui cúñu i? achi rō.

³⁶ Tu jécūhun cuiti ni rō núu súcuan. Chi cúu nájñuhun jeē cátají ró táca tata chíhi ñuhun návāha nane yucū i. ³⁷ Te tata jeē quívi chíhi ñuhun, núu trigo chí inga tata, chi nasūu yúcū cúu, chí máá núní-ni cúu. ³⁸ Te cuéé gá te cane, chí Yaā Dios ni jēhe ya yucū tata ún, ndese ni nujnahan ni maá yá, te ná iñ ná iñ tata chí sín sín cáa yucū ni sáha ya. ³⁹ Te suni súcuan tācá yiqui cúñu, chí tú inuú cándāa, Chí sín cáa ñayuu, te sín cáa quiti, te sín cáa saa, te sín cáa chācá. ⁴⁰ Te suni súcuan cúu tāca jéē iñ andiví jín táca jéē iyó ñáyiví. Te sín luu cáa jeē iñ andiví, te sín luu cáa jeē iyó ñáyiví.

⁴¹ Te sín ndíndēe níāndii, te sín ndíndēe yóō, te sín ndíndēe táca quími. Te tācá iñ iñ quími chí suni sín sín ndíndēé. ⁴² Te suni súcuan coo jín ndíyi jeē natecu. Ndíyi jeē chindūji yó chí téhyū, te jeē nastécu yā chí ma cúu gā.

⁴³ Jeē chindūji yó chí ndáhú cáa, te jeē nastécu yā chí luu kujéhnú. Jeē chindūji yó chí tú na fuerza, te jeē nastécu yā chí coo fuerza. ⁴⁴ Jeē chindūji

yó chi ñn yiqui cúñu cuenta ñayiví cúu, te jeē nastécu yā chi ñn yiqui cúñu cuenta Espíritu yā cúu. Chi íyó yiqui cúñu cuenta ñayiví, te suni íyó yiqui cúñu cuenta Espíritu.

⁴⁵ Chi súcuan yósó núū tútu ñi: Adán, tēe xihna ñuhún, ni cuvāha de jín vida cuenta ñayiví, áchí. Te Cristo cúu nájñuhun inga Adán uū, te máá yá cúu Espíritu jeē jéhe vida. ⁴⁶ Te nasūū yiqui cúñu cuenta Espíritu cúu jeē ní cuvāha xihna gā, chi sa suhva yiqui cúñu cuenta ñayiví, te sáá te nduu cuenta Espíritu. ⁴⁷ Te cuenta ñayiví cúu tēe xihna ñuhún, chi ni cuvāha de jín tícachā ñuhun. Te Adán uū jeē cúu máá Jítoho yō, chi nde andiví ní quiiji ya. ⁴⁸ Te ñayuu ñayiví yáha, chi cúu i jñáhan Adán jeē ní cuvāha jín tícachā ñuhun. Te ñayuu jeē quivícoo andiví, chi ndúu i nájñuhun máá Yāā ní quiiji nde andiví. ⁴⁹ Chi jeē cáa yó nájñuhun tēe ni cuvāha jín tícachā ñuhun, suni súcuan coo yó nájñuhun cáa máá Yāā ní quiiji nde andiví.

⁵⁰ Jñuhun yáha cástūhun rí nuū rō jijnáhan rō, hermano, jeē yiqui cúñu yō cuenta ñayiví yáha, ma cúu quiví ñuu nuū ndácu Yāā Dios jniñu. Chi jeē jihí cúu, te ma cúu quiví nuū cótecu ñí cáni. ⁵¹ Te cúní rī jeē na jécūhun ni rō jñuhun yáha jeē ní yisāhí: Nasūú ndihi yó cuu, te ndihi yó chi nasāma yiqui cúñu yō. ⁵² Chi quiví jeē cuécu sandihí na trompeta, te ñn yachī-ni,

nájñuhun ñn jeē nácuenī-ni yó, te nasama ya yohó. Chi cuecu trompeta un, te natecu tāca ndíyí jeē ma cúū gā i. Te tāca yó jeē cátecu yō quiví ún, chi nasama ya yiqui cúñu yō. ⁵³ Chi jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúū cuiṭi gā. ⁵⁴ Chi jeē jihí jeē tehyú, chi quiiji quiví jeē nucūhun jeē ma cúū gā ma tehyú gā. Yūcuán na te cundaā jñuhun yósó núū tútu ñi: Jín poder yā ni snāā yā cuehyí jéñni ñayuu. ⁵⁵ Cuehyí jéñni yóhó ¿ndese ga cuu sáha xeēn jín yó? Chi natecu yō. ¿Te ndese ga cundeyí jín yó? Chi snāā yā. Achí tutu. ⁵⁶ Chi cuēchi cúu jeē sáha jeē cundeyí cuehyí jéñni ñayuu. Te ley yā jenahán sáha jeē náne cuēchi siquí yō. ⁵⁷ Te na cútahū yō nuū Yāā Dios, chi jín máá Jítoho yō Jesucristo sáha ya jeē cundeyí yó siquí cuēchi jín siquí jñuhun cuu yō.

⁵⁸ Jeē yúcuan, ñánī mánī, cuiñi nihin ró te ma cáca yátá ró jijnáhan ró. Te níní na sájñiñu vāha ró jín jniñu máá Jítoho yō. Chi je cájini rō jeē tu casájñiñu cāha ró jín máá Jítoho yō.

Siquí jeē cáquin i xūhún cuu tācá hermano

16

1 Te vijna te cahān rī siquí xūhun jéē cáquin rō cuu hermano cácandije cándoho ndáhú. Suni na sáha máá ró jijnáhan ró nájñuhun ni ndacu rí nuū tāca grupo ñayuu cácandije ichi Galacia.

² Tācá domingo te ná ñn ná ñn ró chuvāha sñn ró jecu xūhún, núu ndese ni nihīn maá ró, návāha quivī jeē jinú rī nuū rō te je iyó túhva. ³ Te jeē jeē rī, te cuāha rī carta nuū tāca tēe jeē nácāji ró, te tají rí de quingoo de nuū tācá hermano cáyūcú Jerusalén, quīsiāha de xūhun jēē ní casocō rō. ⁴ Te núu iyó váha jeē quihín rī, te suni quihīn rī jín de jijnáhan de.

Jeē cahán Pablo siquī jeē quīcondēhé de ñayuu cácanđije

⁵ Te jeē jeē rī nuū rō jijnáhan ró, te jini ñúhún jeē xíhna gā jeē rī región Macedonia, yūcuán na te jeē rī ñuu rō Corinto. ⁶ Te sanaa te quendōo rī jín ró jijnáhan ró jecu tiempo, chí sanaa te coyūcu yó ñí tiempo mījin. Yūcuán na te cuu chindéé ñáhán ró ruhū, núu ndé chí quihín tucu rī. ⁷ Chí tu cúní rī jeē rī nuū rō vijna te yāha yachī rī quihīn rī, chí ñúhun ni rī jeē quendōo rī jín ró jecu tiempo, te núu cuāha Jítoho yō jnūhun. ⁸ Te cone rī ñuu Efeso yāhá nde na yāha quivī Pentecostés. ⁹ Chí coo cuehē ñayuu scandíje rī, te vāha quihīn jniñu Jítoho yō. Te suni iyó cuehē ñayuu cácuu contra.

¹⁰ Te núu na jéé Timoteo, te sáha ró jéé coo sī ni de mēhñu ró, te ni ñn ma cáni ni de siquī. Chí suni jniñu máá Jítoho yō sáha de, nájñūhun máá rí. ¹¹ Núu súcuan te ni ñn ró má sajéé ni rō nuū de. Chí sa suhva chindéé ñájñáhan ró jín de jeē na quihín gā de, te coo ndeyí coo sī ni de,

návāha ndiji de coto jnáhan rī jín de. Chí ruhū jín sava ga hermano cándetu rī de.

¹² Te hermano Apolos chí ni cahān ndahú rí jín de jeē na jéé de jín sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándihí

¹³ Ndito coo ni rō jijnáhan ró, te cuiñi ñihin ro jín jnūhun cácanđije ró. Te téyí na cóo ni rō, te na cóo fuerza ini rō. ¹⁴ Te tāca jéé casáha ró, na sáha ró jín jnūhun cúndáhú ni jnáhan.

¹⁵ Hermano, cájini rō jeē xíhna gā ñayuu vehe Estéfanas ni cacandíje ichi Acaya. Te ni cajēhe i máá i nuū jniñu jeē chindéé ñáhán i tācá hermano cácanđije. ¹⁶ Te cúní rī jeē suni máá ró jijnáhan ró, cuatáhú váha ró ñáyuu casáha súcuan, jín táca ñáyuu cachindéé ñájñáhan te cásajniñu siquī jniñu ya. ¹⁷ Cúsī ni rī jeē ní quijicoo Estéfanas jín Fortunato jín Acaico, chí tēe yāha ni cajejñiñu de nuū rī jehē rō jeē tu ní cáhīyo ró jín rí. ¹⁸ Chí ni ndundeyí ni rī, te suni súcuan máá ró jijnáhan ró, ni casáha de. Te cánuú cuajnūhún ró tāca tēe cándāa súcuan.

¹⁹ Sándeyí ni rō jijnáhan ró, áchí táca grupo ñayuu cácanđije cáyūcu Asia. Aquila jín Priscila jín ñáyuu cácanđije jeē cándutútú vehe de, cácahān i jeē sándeyí ndasí ni rō jín jnūhun máá Jítoho yō. ²⁰ Te tācá hermano cácahān

i jeē sándeýí ni rō. Te jeē
cahán rō jíin táca jnáhan ró,
te yíñúhún techūhu ró ndaha
i.

²¹ Ruhū Pablo, jíin ndaha
maá rí téé ri jnūhun yáha jeē
na sándeýí ni rō jíjnáhan ró.

²² Te núu ndé ñn tu íyó mánī
jíin Jítoho yō Jesucristo, te na
jnhnú ndetū i núu súcuan. Te
na cáhán yō: Jítoho ná, cúní
na jéē yachī ndiji ní.

²³ Te ñúhun ni rī jeē maá
Jítoho yō Jesucristo na sáha ga
yā jeē váha róhó jíjnáhan ró.

²⁴ Te manī rī jíin ró jíjnáhan
ró jéē cácadíje ró Cristo Jesús.
Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jñūhun ya. Te ndĩndúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cáccandíje ró Yaā Dios, jín núū ndihí rohó jēé cáyihí ndaha Yaā Dios jeē cáyūcu ní cáhnu Acaya. ² Te cáñuhun ni rī jeē Tatá yō Yaā Dios jín Jítóho yō Jesucristo na sáha ga yā jeē váha rohó te sáha ya jeē coo ndeyí coo sī ni rō.

Siquī jeē ní ndoho Pablo jñūndóho

³ Na cáhán yō jeē yóhyo cújéhnu Yaā Dios, Yaā cúu Tatá máá Jítóho yō Jesucristo. Chi máá yá cúu Tatá yō jeē cundáhú ni yohó, te níni sáha ya jeē ndúsī ni yō. ⁴ Chi sáha ya jeē ndúsī ni yō siquī táca jñúndóho ndóho yó, návāha suni cuu sáha máá yó jeē ndúsī ni jñáhan yó jēé cándoho jñūndóho. Chi nájnūhun ni sáha ya jeē ndúsī ni maá yó, suni súcuan sáha yó jēé ndúsī ni i. ⁵ Chi jeē ndóho yó cuehē jñūndóho nájnūhun ni ndoho Cristo, suni súcuan nihīn yō cuehē jñūhun ndusī ni, sáha Cristo. ⁶ Jeē yúcuan núu cándoho ri jñúndóho te

súcuan te cuu sáha ri jeē ndúsī ni rō te quendōo vāha ga anuá rō. Te jeē sáha Yaā Dios jeē ndúsī ni rī, suu sáha tucu jeē ndúsī ni maá ró, te quendōo vāha ga anuá rō. Te súcuan te nihīn rō fuerza jeē cuándeyí ni rō jín táca jñúndóho nájnūhun cándoho ri. ⁷ Te cáñuhun ndasí ni rī jeē cúu rohó, chí cájini rī jeē nájnūhun cándoho ró jñúndóho jín rí, suni súcuan ndusī ni rō jín rí sáha máá Yaā Dios.

⁸ Hermano, cáccuni rī jeē na cúni rō jijnáhan ró ndese ni cándoho ri ichi Asia. Chi yóhyo xeēn jñúndóho ni cajito ri, nde je yajni tuá canda ri, te ni jeni ni rī jeē cuu rī nuú. ⁹ Te siquī jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma ténuū rī maá rí chí tú jniñu ri, chí sa suhva Yaā Dios jeē nastécu ndīyí tenuū rī. ¹⁰ Chi máá yá ni scácu ruhū jijnáhan ri nuū jñúndóho xeēn jeē jé yajni cuu rī nuú, te suni súcuan scácu ya ruhū vijna. Te ñūhun ni rī jeē suni scácu tucu ya ruhū ichi núu gā. ¹¹ Te suni na chíndéé ñáhán ró rúhū jijnáhan ri jeē cacān tahú rō jehē rī. Chi núu cuehē ñayuu cacān tahú jehē rī, te suni cuehē i cuu nacuatáhú jehē rī jeē ni sáha ya jeē váha ruhū.

Jeē ní cucuéé Pablo quihñ de ñuu Corinto

¹² Iyó ññ jeē sáha jeē cáccusī ni rī: Chi vāha íyó ni anuá rī jeē váha ndoo te ndaā ni cajica ri nuū ñáyuu ñayiví, te víhyá gā nuú maá ró jijnáhan ró. Chi siquī jeē váha ni Yaā

Dios, te ni chindéé ñáhán yá ruhū, te nasūu síquī jéē ndichí máá rí cúu jeē ní cajica ri súcuan. ¹³ Te jnūhun cátee ri nuū tāca carta rī, chi máni jeē cúu cahu ró te jecūhun ni rō cúu. Te ñūhun ni rī jeē jecūhun vāha ga ni rō, ¹⁴ nájñūhun je cájecūhun ni rō jecu. Te súcuan te cuu cusī ni rō síquī rī quivī ndíji Jitoho yō Jesús, nájñūhun cácusī ni rī síquī máá ró.

¹⁵ Te síquī jeē súcuan ni cucáhnū ni rī, te jeē yúcuan ní jeni ni rī jeē núu na quíhín rī Macedonia te jeē rī nuū máá ró xīhna gā, návāha cusī ni rō jeē jécondēhe rí rohó úu jínu núu. ¹⁶ Chi ni jeni ni rī jeē jécondēhe rí rohó, te yāha ri quihín rī Macedonia, te jeē nándicó rí Macedonia te ndíji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea nuú. ¹⁷ Te jeē súcuan ni jeni ni rī, ¿te á tée tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájñūhun ñayuu ñayīvi jéé yachī cahán jeē cuu, yūcuán na te tuú, chí naún? ¹⁸ Tuú chi máá Yaā Dios jíní yā jeē tu cáhán rī jín ró jeē cuu, te yachī nácahán rī jeē ma cúu. ¹⁹ Chi ruhū jín Silvano jín Timoteo ni canacani ri jñūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahán tucu ya jeē ma cúu. Chi squícu ya jeē cahán yā. ²⁰ Chi ndíhi jeē ni jéjñūhun Yaā Dios, squícu máá Cristo. Te jeē yúcuan cácahán yō jeē

yóhyo luu cújéhnū Yaā Dios, te cácahán yō Amén, chi ndíhi squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jín róhó jijnáhan ró, cáhīn ñihin yó jín Cristo, te ni sándoo ya yohó jéé cuajñīñu yó núu yā. ²² Te suni ni jēhe ya Espíritu yā jeē cóndee ini anuá yō, te cúu ya nájñūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndáā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájñūhun ni jeni ni rī, suu cúu síquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jíní jeē cahán ndaā rī. Te iyó vāha jeē na cúu rī te núu tu cáhán ndaā rī. ²⁴ Te nasūu jéé cácuni rī ndacu ñihin ri jñīñu nuū rō síquī jñūhun cácadíje ró yá, chi je cáhīn ñihin ro jín jñūhun ún. Chi sa suhva cácuni rī chindéé ñáhán rí rohó jéé na cúsi gā ni rō.

2

¹ Núu súcuan te ni jeni ni rī jeē ma jéé rī inga jínu nuū rō jín jñūhun cuxeēn rī te cucuíhyá ni rō sáha ri. ² Chi núu cucuíhyá ni rō sáha ri, ¿te ndé ñáyuu sáha jeē cusī ni máá rí? Tuá na inga ñayuu, chi máni máá róhó, te ndese cuu te núu ni sáha ri jeē cucuíhyá ni rō. ³ Te jeē yúcuan cúu jeē ní tee ri carta un núu rō, návāha nacani ni rō síquī cuéchi ró sáha, te ma cucuíhyá ni rī sáha cuéchi ró quivī jeē rī nuū rō. Chi sa suhva sáha ró jéé cúsi

ni rī. Te jíní vāha ri jeē núu cusī ni rī, te suni ndihī ró jijnáhan ró cusī ni rō. ⁴ Te jeē ní tee ri carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní téé ri jeē sáha ri jeē cucuíhyá ni rō, chi sa suhva návāha cuni rō ndese yōhyo manī rī jíní ró.

Jeē íne cáhnu ni Pablo nuū téé ni sáha cuēchi

⁵ Te jeē ní cucuíhyá ni rī ni sáha téé jeē ni sáha cuēchi ún, te nasūu máá-ni ri, chi suni nde máá ró jijnáhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí. ⁶ Te jíní jéé ní cacuxeēn rō nuū de ná ni candutútú ró, te jíní yúcuan-ni te ni cuu-ni. ⁷ Te vijna chi jíní nūhún jeē cóne cáhnu ni rō nuū de, te sáha ró jéé ndúsī ni de, chi sanaa te caa ga cucuíhyá ni de, te ma ndúsī gā ni de. ⁸ Núu súcuan te cáhán ndahú rí jíní ró jijnáhan ró jéé steén tucu ró jéé iyó manī rō jíní de. ⁹ Chi jeē siquí jniñu yáha cúu jeē ní tee ri carta un núu rō, návāha coto ndee rī rohó núu cuatáhú váha ró jniñu ndácu ri nuū rō. ¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan siquī jeē manī rī jíní ró jito jínúu Cristo. ¹¹ Chi cánuu cone cáhnu ni yō, chi tu cúní yō jeē nihín Satanás cuēchi siquī yō, chi je jíní vāha yó ndese ndúcú un stáhú yóhó sáha yó cuēchi.

Jeē tu ní íyo nayúu ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ni íyo modo jeē nácani ri jnūhun ya. ¹³ Te vēsú súcuan te tu ní íyo nayúu ni anuá rī, chi tu ní níjnáhan ri jíní hermano yō Tito. Yūcuán na te ni nacuatáhú rí nuū ñayuu yūcuán, te cuananducú rí de ichi Macedonia.

Jnūhun jeē cujéhnu ndúu yó jíní Cristo

¹⁴ Te na cútahū yō nuū Yaā Dios, chi níni ndéca vāha ya yohó cuángoo yó jíní Cristo Jesús, te ndúu yó jíní yá jeē cujéhnu ndasí yá snāa yā poder ndihī enemigo yā. Te jéjníñu ya yohó jéé scuité núu yó jnūhun ya tācá-ni lugar, nájnūhun jité núu ñn xicō asīn. ¹⁵ Te cúu yó nájnūhun ñn sūje jeē jeén asīn nuū Yaā Dios sáha Cristo. Te nájnūhun jeē jinú xicō un núu ñayuu cācu ánuá jíní núu ñayuu jnahnū ndetū. ¹⁶ Nuū ñayuu jnahnū ndetū chi cúu yó nájnūhun ñn xicō jeē cúu i sáha, te nuū ñayuu cācu ánuá chi cúu yó nájnūhun ñn xicō váha jeē cótecu i sáha. Te ni ñn yó ma cánda yó sáha yó jniñu yáha, te núu ma chindéé ñáhán yá yohó. ¹⁷ Te ruhū jijnáhan ri, tu cásáha ri nájnūhun cásáha cuehē téé jeē cánducú de nihín de xūhun siquī jnūhun Yaā Dios. Chi sa cánacani ndaā rī jnūhun ya, chi máá Yaā Dios ni tají rúhū, te máá yá jini jeē cánacani ndaā rī siquī jeē cáncandije ri Cristo.

*Jnūhun siquī contrato jeé***3**

¹ Te jeē cácahān rī sūcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jini ñúhún jeē steén rī carta recomendación nuū rō, chí jeē cacán rī cuāha ró núū rī jijnáhan ri, nájñūhun cásáha sava i? ² Tuú chi máa-ni ró cácuu nájñūhun ñn carta recomendación rī. Te jeē ñūhun ni rī jeē ní cacandíje vāha ró ni sáha ri, suu cúu nájñūhun jeē yosó jnúhun carta un ini anuá rī. Te ndihí ñayuu chí nájñūhun cáhu i, cúu jeē jiní i ndese ni nasāma ró. ³ Chi máa ró cácuu nájñūhun ñn carta jeē ní tee Cristo te cáscaca ri. Te nasūu jín tinta ni tee ya, chí sa suhva jín Espíritu Yaā Dios, Yaā técu. Te nasūu núū tabla yuū nájñūhun ni tee ya ley yā, chí sa suhva nuū anuá ñayuu ni tee ya.

⁴ Te cácahān rī sūcuan, chí cácucahnu ni rī Yaā Dios siquī jeē ni sáha Cristo. ⁵ Te nasūu jeē cájeni ni rī jeē cúu canda máa rí sáha ri jniñu ún. Chí sa suhva máa Yaā Dios sáha jeē cuu squícu ri. ⁶ Te máa yá ni sáha jeē cuu cuajniñu vāha ri siquī contrato jeé yá. Te contrato yáha tu cáhán jeē squícu yó ley jeē ní tee jín letra, chí sa suhva jeē caca yó jín vida jeé, suu jeē ni jéhe Espíritu yā. Chí contrato ley jeē yosó jín letra, jnahnū ndetū ñayuu sáha. Te jeē sáha máa Espíritu cúu jeē cótecu yō ní cáni.

⁷ Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhnu, te ni ndindēe ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú sūcuan te cuéé-ni cuéé-ni ni ndahvā jeē ndindēe núū de. Te núu sūcuan ni kujéhnu ndasí ley jeē sáha jeē cuu ñayuu te jnahnū ndetū i, ⁸ te sa víhyá gā kujéhnu ndasí gá jnūhun cotecu yō jeē jéhe Espíritu nuū yō. ⁹ Chí núu yōhyo ni kujéhnu ley un jéé jnahnú ndetū ñayuu sáha, te sa víhyá gā kujéhnu jnūhun jeē ndáhva Yaā Dios cuéchi yó. ¹⁰ Chí ley un jéé ní kujéhnu nde saá, tuá kujéhnu cuiti, siquī jeē kujéhnu ndasí gá jnūhun Espíritu jeē iyó vijna. ¹¹ Te núu sūcuan ni kujéhnu ley jeē ni íyo jecu-ni tiempo, te sa kujéhnu ndasí gá jnūhun jeē coo ní cáni.

¹² Te jeē sūcuan cáñuhun ni rī, jeē yúcuu cáhīyo téyí ni rī nácani ri jnūhun yáha. ¹³ Chí tu cásáha ri nájñūhun ni sáha Moisés jeē ní jesi de ñn sahmanuū de, návāha tú coto ñayuu Israel ndese cuandahvā jeē ní ndindēe núū de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chí nájñūhun jési sahmanuū jeē níjnūni i, te tu cújiyo cuiti. Chí nde jeē candíje i Cristo, yūcuán na te cujiyo. ¹⁵ Te suni sūcuan nde vijna núu cácahu i tutu ley Moisés, te nájñūhun jeē jési ñn sahmanuū

nuū jeē nǎjnūnǎ i. ¹⁶ Te jeē nāsāma ini ñn ñayuu quǎvǎ i nuū maá Jítóho yō Cristo, yūcuán na te cújiyo-ni jeē jési ún. ¹⁷ Chi Jítóho yō cúu máá Espírítu. Te nuū íne Espírítu máá Jítóho yō, yūcuan cúu nuū iyó libre ñayuu jeē tuá yǎhi i chǎji ley jenahán. ¹⁸ Te jeē yúcuán máá yó jijnáhan yó, tuá jési nuū jeē nǎjnūnǎ yō. Chi cácuu yó nǎjnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnú máá Jítóho yō. Te máá yó tāca quǎvǎ cuanasāma yó cuanduu luu ga anuá yō nǎjnūhun cáa máá yá. Chi máá Jítóho yō jeē cúu ya Espírítu, súcuan sáha ya jǎn yó.

4

¹ Núu súcuan te tu ndínuu ni rǎ cánacani rǎ jnūhun ya. Chi siquǎ jeē ní cundáhú ni yā ruhū jijnáhan ri te ni jéhe ya jniñu yáha nuū rǎ. ² Te tu cásáha ri jniñu néé jéé cúcanu yō sáha, ni tu cájica cuu ri jǎn jnúhun ndíchǎ stáhú, ni tu cásama ri jnūhun Yaā Dios. Chi sa suhva cácahán rǎ máni jnūhun ndaā. Te súcuan te cuu cuni tāca ñayuu ini anuá i jeē cácahán ndaā rǎ jító jínúū Yaā Dios. ³ Te núu íyó ñayuu tu jécūhun ni jnūhun jnama ya yohó jéé cánacani rǎ, te súcuan cúu nuū máni máá ñayuu jnahnū ndetū. ⁴ Te jeē tu cácañdije i, te máá jéxeén jeē ndácu jniñu ini ñayǎvǎ yáha, ní jesi nuū jeē nǎjnūnǎ i, náváha ma ndíndéé jnúhun Cristo ini anuá i, te ma cúni i jeē yóhyo luu cújéhnú Cristo,

Yaā jeē ínuú cáa jǎn Yaā Dios. ⁵ Te jeē cánacani rǎ jnūhun, te nasūu jnúhun máá rǎ, chi sa suhva jnūhun Jítóho yō Jesucristo cánacani rǎ. Te máá rǎ chi cácuu rǎ mozo-ni nuū rō jijnáhan ró jéé siquǎ jeē manǎ rǎ jǎn Jesús. ⁶ Chi ná ni sáha Yaā Dios ñayǎvǎ te ni cahán yā jeē na cúndijin nuū néé. Te suni súcuan ni sáha ya jeē ní cundijin nuū anuá yō jeē cájecūhun ni yō siquǎ Jesucristo, ndese ndíndéé núū yā, cúu jeē yōhyo luu cújéhnú ya nǎjnūhun cúu Yaā Dios.

Jeē cándiquǎn yō jnūhun cácañdije yó yá

⁷ Te tāca jnúhun yáha jeē yóhyo luu cújéhnú, chi nǎjnūhun jeē ñúhun ini ñn quǎsi ñuhun. Chi cácuu yó nǎjnūhun quǎsi ñuhun, chi tú na fuerza yō. Te jeē yúcuán cájini váha ri jeē máá Yaā Dios cúu jeē jéhe poder siquǎ jnúhun yáha jeē yóhyo luu cújéhnú, te nasūu fuerza máá rǎ cúu. ⁸ Te jeē yúcuán, vésú tāca lado cájito rǎ jnúndóho, te tu sáha jeē ma ndúsǎ gā ni rǎ. Te vésú cácuuǎhyá ni rǎ siquǎ jnúndóho, te cáñuhun ni rǎ jeē quee váha jniñu ri. ⁹ Te vésú cájito xeén ñayuu ruhū, te máá yá tu stóo ya ruhū jijnáhan ri. Te vésú cánducú i snáa i ruhū jǎn jniñu sáha ri, te ma cúu. ¹⁰ Te ndé-ni cúu nuū cuángoo ri, te nǎjnūhun ni ndoho Jesús jeē ni jíhǎ yā, suni súcuan cándoho rǎ jeē jé yajni cuu rǎ, náváha suni cuu stéén rǎ fuerza Jesús jeē técu yā ini yǎquǎ cúñu rǎ. ¹¹ Chi

jeē niní cátecu rī, te tāca quívī je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiqui cúñu rī jeē cúū. ¹² Núu súcuan te ruhū jijnáhan rī, níní cúu jeē jé yajni cuu rī siquí jnūhun ya, te yūcuan sáha jeē cotecu maá ró ní cáni jijnáhan ró.

¹³ Te yósó núu tútu iī: Ni candíje ri te jeē yúcuan ní cahān rī, achí. Te suni jeē cácandíje máá rí cúu jeē cánacani ri jnūhun ya. ¹⁴ Chi cájini rī jeē maá Yaā jeē ní nastécu Jítoho yō Jesús, suni súcuan nastécu yā ruhū, te sáha ya jeē ñn cáhnu ni cuiñi ndihi yó núū yā. ¹⁵ Chi tāca jnūndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē váha i. Yūcuán na te suni yōhyo cuehē i nacuatáhú i nuū Yaā Dios, te kujéhnu ga yā sáha.

¹⁶ Jeē yúcuan cúu jeē tu ndínuu ni rī, te vēsú cuandíhi fuerza yiqui cúñu rī, te sa suhva cuanduu fuerza gā anuá rī tāca quívī. ¹⁷ Chi jnūndóho jeē ndóho yó ñayivi yáha, tú-ni xeēn cúu, te yachī yāha. Te sáha jeē nihín yō ñn tahū jeē kujéhnu yó ní cáni jeē cáa ndasí gá vēsú jnūndóho ún. ¹⁸ Te tu táñúhún yó nuū tāca jnūndóho jító yó núū vijna, chi sa suhva táñúhún yó nuū tāca jéē váha jeē tu jító yó núū vijna. Chi tāca jéē jító yó núū vijna, chi yachī ndihi, te tāca jéē tu jító yó núū, chí coo ní cáni.

5

¹ Chi yiqui cúñu yō jeē ndeé yó ñayivi yáha, cúu nájnūhun ñn vehe jeē náā. Te cájini yō jeē núu na náā, te cuāha Yaā Dios ñn yiqui cúñu jeé, te suu cúu nájnūhun ñn vehe jeē coo ní cáni ichi ándivi. Te nasūú ñn vehe jeē sáha ñayuu cúu, chi jeē sáha Yaā Dios cúu. ² Te níní jéē ndeé yó vehe yáha jeē cúu yiqui cúñu yō, te cájitu ni yō sáha, chí yōhyo cúní yō jeē núcūhun yó yiqui cúñu jeé yó nde ándivi. ³ Chi jeē núcūhun yó un, te ma cóo máá na anuá yō jeē náā yiqui cúñu yō yáha. ⁴ Chi níní jéē iyó gá yō ini vehe yiqui cúñu yō yáha, te jítu ni yō te cúcuíhyá ni yō. Te nasūu jéē cuní yō jeē stóo yó yiqui cúñu yō te coo máá-ni ánuá yō. Chi sa suhva cúní yō núcūhun yó jéē jeé, návāha ndahvā yiqui cúñu yō jeē náā, te coo máá jéē cótecu ní cáni. ⁵ Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndáā ni yō jeē cuáha Yaā Dios tahū yō.

⁶ Núu súcuan te níní cúu jeē cá cucáhnu ni rī. Chi cájini rī jeē niní ndeé gá rī chíji yiqui cúñu yáha, te jícá cúu ri jijn núu ndeé máá Jítoho yō. ⁷ Chi vijna chí cácandíje ri jeē iyó yá jijn rí, vēsú ná tu coto ri nuū yā. ⁸ Te cá cucáhnu ni rī, chí sáha ri cuenta jeē váha ga núu na quénda ri chíji yiqui cúñu yáha te quihín rī condee rí jijn máá Jítoho yō. ⁹ Jeē yúcuan cúu jeē cánducú ndeyí rí sáha

ri jeē cusī ni yā jín rí, vēsú núu ndéé gá rī yiqui cúñu rī chí vēsú núu condee rī jín yá. ¹⁰ Chi cánuú jéē ndihi yó cuiñi yuhu mesa Cristo jeē sándaā yā jniñu yó. Te ná ñn ná ñn yó níñn yō siquī ndese ni casáha yó, á jéē váha chí jéē neé, ná ni condee yō chíji yiqui cúñu yō.

Siquī jeē ndivicoo yó núu jnúhun manī Yaā Dios jín yó

¹¹ Núu súcuan te cándiso iyo rí nuū maá Jítoho yō, te jeē yúcuan ndúcú ndéyí rí scandíje rí ñayuu. Te jíní Yaā Dios jeē cáhiyo ndaā rī, te ñúhun ni rī jeē suni súcuan cájini maá ró. ¹² Te nasūu jéē cánducú tucu rí cahān rī jeē váha ga tēe cácuu rí, chí sa suhva cástūhun rí jeē cuu cusī ni rō jeē siquī rī jijnáhan rí. Te súcuan te cuu stío cuiñi rō nuū ñáyuu jeē cutéyí i siquī ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeē tēe loco cácuu rí jeē cácahān rī súcuan. Te siquī jeē cándihvī ni rī jehē Yaā Dios cúu. Te tuú chí cáhiyo váha xinī rī, te jeē yúcuan cájejniñu rí jeē quéndōo váha ró. ¹⁴ Chi siquī jeē ní cundáhú ni Cristo ruhū jijnáhan rí cúu jeē cánuú nacani rí jnúhun ya. Chí cájini váha rí jeē ni jíhī mañúhún-ni ya jeē siquī ndihi yó, te jeē yúcuan nájnūhun ni jihī ndihi yó jín yá. ¹⁵ Chi ni jihī yā jeē siquī ndihi yó návāha tāca yó jéē técu, ma cótecu ga yō jeē sáha yó jéē cuní maá yó, chí sa suhva jeē cuní maá yá jeē ni jíhī yā te ni natecu yā jeē siquī

yō. ¹⁶ Jeē yúcuan tuá casáha rí cuenta ndese-ni cándāa ñayuu, nájnūhun casáha ñayuu ñayiví. Te vēsú súcuan ni casáha rí cuenta siquī Cristo nde saá, jeē ñn tēe-ni cúu ya, te vijna chí cájini rī jeē cúu ya Sēhe Yaā Dios. ¹⁷ Chi núu ñn ñayuu yíhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

¹⁸ Te Yaā Dios cúu jeē sáha ndihi jeē yáha, chí jín Cristo ni sáha ya jeē ní ndivicoo yó núu jnúhun manī yā jín yó. Te ni tejniñu ya ruhū jeē cánacani rí jnúhun jeē ndivicoo ñayuu nuū jnúhun manī yā jín i. ¹⁹ Chi jín Cristo te ni sáha Yaā Dios jeē ñáyuu ñayiví ndivicoo i nuū jnúhun manī yā jín i. Te tu ndácunehen ya cuēchi ni casáha ñayuu. Te ni tejniñu ya ruhū jeē cánacani rí jnúhun yáha ndese ndivicoo i nuū jnúhun manī yā jín i. ²⁰ Núu súcuan te cácuu rí tēe cájica jniñu máa Cristo. Te jeē cahán rī, te nájnūhun jeē maá Yaā Dios cahán ndahú yá jín ró. Núu súcuan te cácahān ndahú rí jín ró jeē cahán Cristo, jeē na ndivicoo ró núu jnúhun manī Yaā Dios jín ró. ²¹ Te Cristo, vēsú tú ni ñn cuēchi ya, te ni sáha Yaā Dios jeē ní nucondee cuēchi yó siquī yā. Te súcuan te yóhó jéē yíhi ndaha Cristo, ni nucondee siquī yō jeē iyó ndāa yō nájnūhun iyó ndāa Yaā Dios.

6

1 Núu súcuan te siquī jeē cácuu rī tēe cásajniñu jíin yá, te cácahān ndahú rī jíin ró jeē ma stóo uun ró jnúhun jeē ní sáha Yaā Dios jeē váha róhó.

2 Chi áchí yá nuū tútu iī:

Máa tiempo cuní maá rí te cuní sōho rí jnúhun cáhān ndahú ró jíin rí.

Te máa tiempo jnáma rī ñayuu, te jnama rī rohó.

Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quiiji Yaā jnáma yóhó.

3 Te cánducú rí jeē ma sáha rī ni ñn jniñu jeē casi jeē candíje ñayuu, návāha ma cahán i siquī jniñu ndíso rī.

4 Chi sa suhva cánducú rí jeē ndihí jeē sáha rī, steén jeē cácuu rī tēe cájejniñu nuū Yaā Dios. Jeē yúcuan cájendeyí ní rī jíin jéē ndóho rī jnúndóho, jíin jéē cúmanī nuū rī, jíin jéē yí sáha jíin rí. 5 Chi ní iyo tijni jínu jeē ní cacani i ruhū, jeē ní cachune i ruhū vecāa, jeē ní candonda i siquī rī, jeē ní casájniñu níhin rī, jeē ní cajehni rī mähna máa rí, jeē ní cahīyo ndite ní rī. 6 Te suni cánducú rí jeē cuajnúhún i ruhū siquī jeē ndoo cájica rī, te cájecūhun váha ní rī jnúhun ndaā, te cáhīyo paciencia ní rī, te váha ní rī, te ndéé Espíritu Santo ini rī, te cákundáhú ndije ní rī jnáhan rī. 7 Te cánacani ndaā rī jnúhun, te poder Yaā Dios íne jíin rí. Te jíin jnúhun ndaā cándahva rī táca jniñu néé, chi nájnūhun jeē cájejnáhan

rī siquī. Chi nájnūhun jeē ndónnda un siquī rī te ndónnda rī siquī. 8 Iyó jínu yíñúhún ñayuu jíin rí, te iyó jínu tuú. Iyó jínu jéjnúhún i ruhū, te iyó jínu cácahān i siquī rī. Iyó jínu cácahān i jeē tēe stáhú cácuu rī, te iyó jínu cácahān i jeē tēe ndaā cácuu rī. 9 Iyó jínu cásáha i nájnūhun jeē tu jíin i ruhū jijnáhan rī, te iyó jínu jeē jiní váha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha. 10 Te vēsú iyó jéē cácuuhyá ní rī, te níiní cácusī ní rī. Te vēsú tēe ndáhú cácuu rī, te sácúcá rí cuehē ñayuu jíin jnúhun ya. Te vēsú tú na vé cánevāha rī, te jíin máa yá te ndihí-ni cúu jeē cánevāha rī.

11 Hermano ñuu Corinto, súcuan cúu jeē cácahān cají rí jíin ró jijnáhan ró, chi siquī jeē maní rī jíin ró, jeē yúcuan cáchí ndihí rī ndese cándoho rī. 12 Máa rí jijnáhan rī cácahān cají rí siquī jeē maní ndasí rí jíin ró, te máa ró jijnáhan ró sanaa te tu súcuan cúu. 13 Nájnūhun cáhān tatá jíin séhe, súcuan cáhān ndahú rí jíin ró jeē nájnūhun iyó maní rī jíin ró, súcuan na cóo maní tucu ró jíin rí.

Siquī jeē cúu yó templo Yaā Dios

14 Ma quíví nduu rō jíin jniñu néé cásáha ñayuu tu cácandíje, chi ma cúu coo inuú ró jíin i. ¿Chi ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyūcú inuú ñayuu cájica

jíin luz yā jíin ñáyuu cájica nájñuhun nuū néē? ¹⁵ ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácandíje jíin ñáyuu tu cácandíje? ¹⁶ ¿Te ndese cuu quijnáhan templo Yaā Dios jíin ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájñuhun ni cahān yā:

Condee rī ini i te caca cuu ri mēhñú i,

te cuu ri Yaā Dios maá i,
te cuu i ñayuu maá rí.

¹⁷ Te jeē yúcuan ní cahān gā yā:

Ma quívi nduu rō jíin jniñu néé cásaha i,
te cusñn ró jijnáhan ró, áchí Jítóho yō.

Te ma jnái ró tāca jéē tú ndaā.
Yūcuán na te naquihin ri rohó,

¹⁸ te cuu ri Tatá rō jijnáhan ró,
te cuu ró séhe yíí rí jíin séhe síhí rí,

áchí Jítóho yō, Yaā jnái ndihi poder.

Achí tutu.

7

¹ Núu súcuan, ñánī mánī, cánevāha yó tāca jñuhun yáha jéē ni jéjñuhun ya. Jeē yúcuan na sándoo yó máá yó tāca jéē sajnehén yiqui cúñu yō jíin ánuá yō. Te na cónso íyo yó núu Yaā Dios, te coo ndoo coo íi yō nuū yā jíin ndihi jniñu cúní yā.

Jeē ní canacani ni ñayuu Corinto síquī cuéchi i

² Coo manī rō jíin rí jijnáhan ró víi. Chi tu ní sáha ri falta nuū ní ñn ró, te tu ní stíví rí

anuá ni ñn ró, te ni ñn ró tu ní stáhú rí. ³ Te nasūu jéē nducú rí cahān rī nuū rō cúu jeē cahān rī súcuan, chi je ni cahān rī jeē yóhyo manī rī jíin ró. Te níni ññuhun ni rī rohó, vēsú cuu yō chí cotecu yō. ⁴ Te cúcáhnu ndasí ni rī rohó jijnáhan ró, te cúsiñ teyí ni rī jeē síquí rō. Te vēsú cájito rī tāca jñúndóho yáha, te íyó ndeyí ni rī te cúsiñ ndasí ni rī jeē síquí rō.

⁵ Ná ni jengoo ri Macedo-
nia te tu ní íyo nayúú ni anuá rī, chi sa suhva yíí ní íyo jñúndóho jíin rí tāca lado. Chi ni íyo jeē ní castáhān jnáhan jíin rí, te ni cayūhu rí sanaa te caca yátá ñáyuu cácandíje. ⁶ Te Yaā Dios jeē sáha jeē ndúndeyí ni ñayuu cácuquíhyá ni, ni sáha ya jeē ní candundeyí ni rī, chi ni quiji Tito ni sáha ya. ⁷ Te ni candusiñ ni rī, nasūu máá ñn-ni síquí jeē ní quiji de, chi suni jeē ní ndundeyí ni de ni casáha ró. Chi ni castühún de jeē cáñuhun ni rō coto tucu ró rúhū, jíin jéē cácuquíhyá ni rō jeē síquí cuéchi ró, jíin jéē cánacani ni rō jehē rī. Te jeē yúcuan ní cusíñ gā ni rī.

⁸ Te carta jeē ní tají rí nuū rō, vēsú ni sáha jeē ní cacu-
quíhyá ni rō, te tuá nácani
quíhyá ni rī jeē ni sáha súcuan.
Chi vēsú ni cucuíhyá ni rī saá,
te vijna te tuá, chi jíní rī jeē
jecu-ni quiví ni cacuíhyá
ni rō ni sáha. ⁹ Te vijna te
cúsiñ ni rī, te nasūu síquí maá
jéē ní cacuíhyá ni rō. Chi
cúsiñ ni rī jeē ní jejniñu jeē ní
cacuíhyá ni rō, chi ni sáha
jeē ní canacani ni rō síquí

cuéchi ró. Chi ni cacucuíhyá ni rō nájñūhun cúní maá Yaā Dios, te nasūu jēē ni sáhuhū rī rohó. ¹⁰ Chi núu cúcuíhyá ni yō nájñūhun cúní Yaā Dios, te suu sáha jeē nácani ni yō siquī cuéchi yó te jnama ya yohó, te ma cóo ga jeē nácani cuíhyá ni yō. Te jeē cácuíhyá ni ñayuu tu cácadíje, tu jéjníñu jeē nácani ni i, chi sa jnahnū ndetū i. ¹¹ Te ni cacucuíhyá ni rō nájñūhun cúní Yaā Dios, te vijna te cájito ró náa vāha ni jejníñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū téē ni sáha cuēchi, te ni cayūhu ró jeē ní castívi ró núū yā. Yūcuán na te yōhyo ni cacuni rō coto tucu ró núū rī, te yōhyo ni candíhvī ni rō ni cacuxeēn rō nuū téē ni sáha cuēchi ún. Te súcuan ni castéén rō jeē tú cuēchi ró, chi tu ní cájejnúhún ró cuēchi ni sáha téē ún. ¹² Te jeē ní tee ri carta un, nasūu máá-ni jeē cúxeēn rī nuū téē ni sáha cuēchi ún, ni nasūu máá-ni jeē cahán rī jehē téē ni ndoho ni sáha de. Chi sa suhva ni tee ri nāvāha nucūhun ni rō ndese yōhyo ni canacani ni rō jehē rī jító jínúū Yaā Dios. ¹³ Jeē yúcuan ní candusī ni rī jeē siquí rō.

Te víhyá gā ni cacusī ni rī jeē ní jini rī jeē cúsi ni Tito, chi ni nduu nayúu ini de ni casáha ró. ¹⁴ Chi je ni cahán rī jín de jeē cúsi ni rī jeē vāha ñayuu cácuu ró, te vijna te tu ní quéndōo rī jñūhun canu jeē siquí rō. Chi nájñūhun ni cajini rō jeē iyó ndáa tāca

jñūhun ni cacahán rī jín ró, suni súcuan ni cundaā jñūhun ni cacahán rī jín Tito jeē cúsi ni rī siquí rō jeē vāha cáscuicu ró. ¹⁵ Te víhyá gā manī de jín ró vijna jeē ñūhun ni de jeē vāha ni cajetáhú ró jeē cahán de, te ni cahīyo yíñúhún ró ni candiso īyo ró núū de. ¹⁶ Núu súcuan te cúsi ni rī siquí jeē cucáhu ndasí ni rī rohó jínáhan ró.

Jeē na cúsi ni i socō i cuehē

8

¹ Hermano, vijna te suni cácuu rī castūhun rí nuū rō jínáhan ró ndese cuehē jeē vāha ni sáha Yaā Dios jín ñayuu cácadíje cáyūcú Macedonia. ² Chi vēsú yōhyo ni jito ndee jñúndóho i, te suni yōhyo ni cacusī ni i jín jñūhun ya. Te vēsú ñayuu ndahú ndasí cácuu i, te yōhyo vāha ni cajequin i cuehē xūhun jéē cúu ñayuu ndahú cácadíje. ³ Chi cúu ri testigo jeē ní cacusī ni maá i ni cajēhe i ndésaa ni canda i, te nde víhyá gā ni cajēhe i. ⁴ Chi ni cacahán ndahú ndasí i jín rí jeē na cuáha ri jñūhun chindéé ñáhán i jín yó cuāha i xūhún cuu hermano cándoho ndáhú. ⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i máá i nuū Jítoho yō, te sáa te ni cajēhe i máá i sáha i tāca jéē cácuu rī, ndihi ndese núnahan ni Yaā Dios. ⁶ Te jeē súcuan ni casáha ñayuu Macedonia, te ni castíhvī ni rī Tito jeē na jéē tucu de nuū maá ró, sáha de jeē jīnu jniñu jeē ni squéjéé de jín

ró jeē suni caquin rō cuehē xūhún cuu ñayuu ndahú. ⁷ Chi máá ró yōhyo vāha cásáha ró táca-ni, chi vāha cācandíje ró, vāha cānacani ró jnúhun, vāha cājecūhun ni rō, vāha cāndihvī ni rō, vāha manī rō jíin rí jijnáhan ri. Núu súcuan te suni cánuú sáha vāha ró jniñu yáha jeē cuáha ró jeē cúu ñayuu ndahú.

⁸ Te nasūu jeē cuní rī ndacu ri jniñu nuū rō, chi sa cástūhun rí nuū rō ndese yōhyo cācusī ni sava ga ñayuu jéhe i xūhún, te súcuan te cuni rī jeē suni máá ró cācundáhú ndije ni rō ñayuu ndahú. ⁹ Chi je cājini rō ndese yōhyo vāha ni Jítoho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cācucúca ró ndihi jeē ndíso jnūhun ya, siquī jeē ní nasáha ndáhú yá maá yá.

¹⁰ Te jeē vāha máá ró cúu jeē na cáchi rī ndese jéni ni rī siquī jniñu yáha. Vāha ni caquejeé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sáha ró. ¹¹ Núu súcuan te vijna te sínu ró. Te nájnūhun ni cacusī ni rō ni caquejeé ró jíin, suni súcuan na cúsī ni rō sínu ró, chi cuāha ró núu ndese cānevāha ró. ¹² Chi núu cúsī ni yō cuāha yó, te jétáhú yá núu ndese névāha yó, chi tu jícan yā jeē cuāha yó jeē tu névāha yó.

¹³ Te nasūu jeē cahán rī jeē cáhni ndahú ró máá ró jeē cáa ga nihīn i vēsú jeē ndóo nuū

maá ró. ¹⁴ Chi sa suhva jeē ñin cūhva-ni conevāha ró jíin i. Chi cānevāha cuehē rō vijna, te cuu cuāha ró jeē cúmanī nuū i. Yūcuán na te núu ndé ñin quivī conevāha i, te suni cuu cuāha i te núu ni cumanī nuū rō. Te súcuan te ñin cūhva-ni conevāha ró jíin áhan ró, ¹⁵ nájnūhun cáhán tutu i siquī ñayuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jíin úu gājnáhan de

¹⁶ Te na cútahū rī nuū Yaā Dios jeē ní sáha ya jeē ndihví ni Tito jehē rō nájnūhun cāndihvī ni maá rí. ¹⁷ Chi ni jétáhú de jeē ní cacahān rī jíin de jeē jeé de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cātájí rí ñin hermano cuajeē jíin Tito nuū rō. Te tāca grupo ñayuu cācandíje cājejnūhún i tēe un jéē vāha jéjníñu de siquī jnúhun jeē jnáma ya yohó. ¹⁹ Te tāca grupo ñayuu cācandíje suni ni catee i jniñu siquī de jeē cáca de jíin rí chindéé ñáhán de quindēca de xūhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítoho yō, chi cuni i ndese yōhyo cācusī ni rō cásocō rō xūhún. ²⁰ Te quingoo ndíndúú rí návāha ni ñin ñayuu ma tēe i cuēchi siquī rī siquī xūhun cásocō ñayuu.

21 Chi ndúcú rí jeē squícu ndaā rī tācá jniñu, nasūu máá ñn-ni nuū Yaā Dios, chi suni nuū ñáyuu.

22 Te suni cátají rí inga hermano yō cuajeē de jín ndindúú téé yáha. Te tijní jínu ni steén de jeē yóhyo cúsñ ni de ndíhví ni de tācá jniñu. Te vijna chi ndíhví gā ni de jehē rō, chi cúcáhnū ndasí ni de jeē cásquícu rō. 23 Te núu cácajnūhún ñayuu siquī Tito, te achi rō jeē cúu de tēe chindéé ñáhán jéjníñu jín rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácañdije, te cáhīyo yíñúhún de nuū Cristo. 24 Núu súcuan te steén rō nuū de jeē cáhīyo maní ndije rō jín de, návāha na cúni tāca grupo ñayuu cácañdije. Te súcuan cuni i jeē tu ní cácusñ cáhá ni rī siquī rō.

Siquī jeē cájequin i xūhún cuu tācá hermano

9

1 Te vijna te tuá jíní ñúhún tee rí nuū rō siquī xúhun jeē cájequin rō cuu tācá hermano cándoho ndáhú. 2 Chi je jíní rī jeē cánujnahan ni rō cuāha rō. Te jeē yúcuan máni cúsñ ni rī cahán rī jíní ñáyuu Macedonia jeē rohó ñáyuu Acaya, je ni casátúhva rō xúhun ndé jendujin. Te jeē súcuan ni cacúsñ ni máá rō, te jeē yúcuan cuehē ñayuu Macedonia ni cacondíhví ni i ni cajēhe máá i. 3 Te tájí rí ndinúní hermano yáha cuajeē máá de nuū rō

xíhna gā, návāha jeē jinú maá rí te ma quéndōo néé rí siquī jnúhun ni cahán rī jeē squícu vāha rō jín jniñu ún. Chi coo tūhva ndije rō jín xúhun nájñuhun ni cahán rī jín i. 4 Chi sanaa te jecoo jecu tēe Macedonia jín rí, te núu cuni de jeē tu cáhīyo tūhva rō, te coo jnúhun canu nuū rī, te suni nuū maá rō jijnáhan rō, chi ni cahán teyí rí jeē cáhīyo tūhva ndije rō. 5 Jeē yúcuan ní jeni ni rī jeē cánuú cahán rī jín táca hermano yáha jecoo de xíhna gā, te sáá te jinū rī, návāha stíhví ni de rohó jéé yáchí na cóo tūhva xúhun jéé ní cacahán rō jeē cuáha rō. Te súcuan te coo tūhva siquī jeē váha ni rō, te nasūu jéé safuerza rī rohó.

6 Cocuhun ni rō jnúhun yáha, jeē núu jecu-ni cuāha rō te suni jecu-ni nanihín rō: Chi tēe jeē tíhlí-ni táji, suni tíhlí-ni nastútú. Te tēe jeē táji cuehē, suni cuehē nastútú. Achí tutu. 7 Tācá ñn ñn rō cuāha rō ndésaa ni tee ni rō. Ma cúxíi ni rō cuāha rō, chi nasūu fuerza cúu. Chi Yaā Dios maní yā jíní ñáyuu jeē cúsñ ni cuāha. 8 Te máá Yaā Dios cuu sáha ya jeē nducuehē ndinuū jeē váha cuu rō jijnáhan rō, návāha níni coneváha rō ndihí tācá jeē jíní ñúhún rō, te coo sobra gā jeē cuāha rō jéé cúu tācá jniñu váha. 9 Chi súcuan cáhán tutu ñ siquī tāca ñáyuu jéhe: Ni scáa i ni jéhe i nuū ñáyuu ndahú. Te tācá jniñu váha sáha i, chi quendōo ní cáni. Achí tutu. 10 Te Yaā Dios jéhe

ya tata nuū tēe táji, te nihīn de staā jeē cāji de. Te suni súcuan cuāha ya ndīnuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹ Súcuan cucúcá ró jíin táca-ni, návāha cuu cuāha cuehē rō. Te xūhun jéē cuáha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios. ¹² Chi xūhun jéē cuáha ró nuū i, nasūu máá ĩn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios. ¹³ Te cahān i jeē yóhoyo váha Yaā cúu Yaā Dios, chi xūhun jéē ní cajēhe ró stéén jeē váha cácadíje ró jnúhun Cristo. Te suni sáha jeē cahān i jeē yóhoyo cújéhnu Yaā Dios siquī jeē ní cajēhe cuehē rō nuū i jíin núu sava ga ñayuu. ¹⁴ Te suni cacān tahú i jehē rō, chi coo manī ndasí i jíin ró siquī jeē yóhoyo váha ni sáha Yaā Dios jíin ró. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ĩn tahū cáhnu ndasí jéē ma cánda cuiti yō castūhún ndihi yó.

Jeē ndíso jniñu Pablo cúu de apóstol

10

¹ Te ruhū Pablo, cáhán ndahú rí jíin ró jijnáhan ró jíin modo máá Cristo jeē vítá ni yā te váha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiti rī cahān nihin rí jíin ró, cácahān rō. ² Núu súcuan te cáhán ndahú rí jíin ró jeē núu na jéé

rī te ma cahān rō jnúhun jeē sáha jeē cuxeēn rī nuū rō. Chi sava ró cácahān jeē casáha rí jniñu ya siquī jeē máni jeē na nihín rī siquī ún. Núu súcuan te iyó túhva rí cuxeēn rī nuū ñayuu cácahān súcuan. ³ Chi vésú cácuu rí ñayuu cáyūcú ini ñayīví, te tu cájejnáhan rí modo cájejnáhan ñayuu ñayīví. Chi nájnūhun jeē cájejnáhan rí siquī táca jniñu neé. ⁴ Chi nasūu ndajniñu ñayīví jéjníñu rí cájejnáhan rí, chi jíin poder Yaā Dios cájejnáhan rí snāā rī táca fuerza jeē cúu contra siquī yā. ⁵ Súcuan cásnāā rī táca jnúhun ndúxí jíin jnúhun téyí jeē nducú casi jeē ma cúní ñayuu ndese Yaā cúu Yaā Dios. Te cájesi rí nuū ndihi jeē tú váha jeē cájeni ni ñayuu, návāha cuandetū i nuū Cristo. ⁶ Te jeē jínu cuandetū váha máá ró, yūcuán na te coo túhva rí cuāha rí castigo nuū táca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. ⁸ Te núu ni cahān teyí rí jíin ró jeē ndíso jniñu rí, te tu cúcanu rí sáha. Chi máá Jítóho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jéē snāā rī. ⁹ Núu súcuan te tu cúní rī jeē cáni ni rō jeē nducú rí siúhú rí rohó jíin carta rī. ¹⁰ Chi cácahān sava ró jéē táca carta rí yóhoyo stíhví ni te nihin ndácu jniñu, te sa suhva núu

ndéé rí jín ró te tu cúndeyí ni rí ndacu nihin ri jniñu, te suni tu cúu cahān vāvihí rí, achí ró. ¹¹ Te ñayuu cácahān súcuan na sáha i cuenta jeē nájñuhun nihin cáhān carta rí jeē íne jíca rí, suni súcuan nihin ndacu ri jniñu nuū rō jeē cóndee rí jín ró.

¹² Te va ma chúndeyí cuiti ni nde ri jeē sajeñhu ri maá rí, nájñuhun casáha sava tēe un jéé cájeñuhún nde de maá de. Táca tēe ún chi cácuñé de jeē cájeni ni de jeē cujéñhu ga de vésú jnáhan de, te tu casáha de cuenta ndese cúní Yaā Dios jeē caca de. ¹³ Te ruhū jijnáhan ri, chi cutéyí nde ri maá cúhva-ni jniñu jeē ni jéhe Yaā Dios nuū rí, te ma yáha ga rí. Maá Yaā Dios ni tee cúhva yá ndésaa cúu jeē sáha ri, te maá yá ni jéhe jñuhun jeē ni jínū rí nuū rohó ñayuu ñuu Corinto. ¹⁴ Jeē yúcuan ná ni jinūcoo ri nuū rō jeē xíhna ñuhún te nasūu jéē ni yáha ri nuū cúhva jniñu ní jéhe ya nuū rí. Chi xíhna gā maá rí ni jinūcoo nuū rō ni canacani ri jñuhun vāha Cristo. ¹⁵ Te tu cácutéyí rí siquī jniñu ní casáha inga tēe, nájñuhun jeē jniñu maá rí cúu. Chi sa suhva cáñuhun ni rí jeē cuehē gā candíje ró, te súcuan te cuu sáha ri cuehē gā jniñu ya mēhñu ró, te níní maá cúhva jeē ni jéhe ya nuū rí. ¹⁶ Yūcuán na te cácuñi rí scuité núu ga rí jñuhun jnáma ya yohó núu táca gá ñuu yúcu ndé yūcuan gá. Te súcuan te ma quívi nduu rí cutéyí rí nuū jeē jé ni canacani inga tēe jñuhun.

¹⁷ Te núu ndé tēe cúní de cutéyí de, na cutéyí de siquī jeē sáha maá Jítóho yō, nasūu siquī jéē sáha maá de. ¹⁸ Chi nasūu tēe jeē jeñuhún maá cúu jeē quéndōo yíñuhún, chi sa suhva tēe jeē jeñuhún maá yá.

Jeē cahān Pablo siquī tēe cánacani jñuhun stáhú

11

¹ Cone cáhnu ni rō jijnáhan ró jeē cahān rí jecu jñuhun modo nájñuhun cácahān ñayuu canéé. Núu súcuan te cáhnu coo ni rō víi. ² Chi cúcuñí rí jehē rō jijnáhan ró, nájñuhun cúcuñí Yaā Dios. Chi cácuu ró nájñuhun ñn sūchi shí íyó ndoo, te ni sáha ri jeē quiñáhan ró jín Cristo, nájñuhun quiñáhan ñn sūchi shí jín máñuhún-ni yí i. ³ Te yúhú rí sanaa te cuáha ro jñuhun stáhú táca tēe un rohó, te siáá rō jñuhun jeē chiñuhún ndáá rō Cristo nde jín ini jín ánuá rō. Chi suni súcuan ni sáha Satanás jín Eva, chi ni quívi ini ñn coo, te ni stahú un ña jín jñuhun ndíchí stáhú. ⁴ Chi núu quíjicoo tēe nuū rō jeē tu cánacani ndaā de jñuhun Jesús nájñuhun ni canacani ri nuū rō, te va yōhoyo vāha cájetáhú nde ró de. Te suni súcuan vāha cájetáhú nde ró núu inga espíritu jín núu inga jñuhun jeē tu quiñáhan jín Espíritu jín jñuhun jeē ní cacandíje ró jéé jnáma ya rohó. ⁵ Te táca tēe cácuñi ró un jéé cácahān jeē apóstol cujéñhu ga cácuu, tú cuiti jeē cujéñhu ga nde de

nuū rī. ⁶ Chi vēsú tu níhín vāha nde ri modo cahān rī, te jécūhun vāha ni rī. Chi jín ndihī jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jícán rī xūhun núu rō siquī jeē ní nacani ri jñūhun jnáma ya yohó. Te súcuan ni cotecu ndahú rí návāha quendōo vāha ga maá ró jín jñūhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cácadíje ni quihīn ri xūhun jéē ní cajēhe i nuū rī, návāha súcuan-ni nacani ri jñūhun ya nuū rō jijnáhan ró. ⁹ Te ná ni condee rī jín ró te ni ndihī xūhun rí, te tu ní jícán cuiti rī nuū ní ñn ró. Chi hermano jeē ní quijicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiti rī. ¹⁰ Te nájnūhun cúcāhnu vāha ni rī jeē jiní rī jñūhun ndaā Cristo, suni súcuan jíní rī jeē ma quíhin ri xūhún nuū ni ñn ñayuu ní ndáñūū Acaya, návāha ma cási i jeē cúsiñi rī jeē súcuan-ni nacani ri jñūhun ya. ¹¹ ¿Te á siquī jeē tú manī rī jín ró cúu jeē cahán rī súcuan, jéni ni rō, chí naún? Tuú chi máá Yaā Dios jiní yā jeē maní rī jín ró jijnáhan ró.

¹² Te sáha ri ná-ni sáha ri, chi ma quíhin ri xūhun ró, návāha cási rī nuū jeē casátéyí tée un máá de jeē cácahān de jeē inuú casáha de jniñu ya jín rí. ¹³ Te tée ún chi nasūū apóstol ndaā cácuu de, chi máni máá jñūhun stáhú

cácahān de, te cásáha de máá de jeē cácuu de apóstol Cristo. ¹⁴ Te tu náā ni yō jító yó jéē casáha de súcuan, chi je jíní yō jeē suni Satanás násama máá te stáhú jéē sáha máá nájnūhun ñn ndajéhé Yaā Dios jeē jíca jín luz yā. ¹⁵ Te jeē yúcuan suni tu náā ni yō jító yó jéē tée cájejniñu nuū Satanás, cásáha de máá de jeē tée ndaā cácuu de. Te ñn quiṽi te nanihīn de siquī jniñu néé cásáha de.

Jñūdóho ni ndoho Pablo siquī jeē cúu de apóstol

¹⁶ Inga jínu cáhān rī jín ró jeē ni ñn ró ma cáni ni rō jeē tée cánéé cúu ri. Te núu súcuan cájeni ni rō, te va cutáhú nde ró jéē cahán rī nájnūhun tée cánéé, návāha suni cuu cutéyí nde ri jecu nájnūhun cásáha tée ún. ¹⁷ Jeē cahán rī vijna chi nasūu jéē ní ndacu máá Jítóho yō cúu, chi sa nájnūhun tée cánéé cáhān rī jeē cutéyí nde ri. ¹⁸ Chi cuehē de casátéyí de máá de modo jeē iyó ini ñayṽi, te suni súcuan na sátéyí nde ri maá rí núu súcuan. ¹⁹ Te va tée cáhīyo cájī xínī cácuu nde ró, te jeē yúcuan cúu vāha ni nde ró cuatáhú ró ñn tée cánéé núu súcuan. ²⁰ Chi va vāha-ni cájendeyí ni rō nuū tée un jéē casáfuerza de rōhó cuajniñu ró núu de, chí cásáha de jeē ndundáhú ró, chí cáquende de ndajniñu ró, chí casájéhnu de máá de nuū rō, chí ndé cácatu de nuū rō. ²¹ Te vēsú cúcanu nde ri cahān rī, te na cáhān rī jeē tu ní cúndeyí ni nde

ri satéyí rí maá rí nájñuhun casáha tēe ún.

Te vijna te núu íyó sava tēe chúndeyí ni de sátéyí de máa de, te va suni chundeyí ni nde máa rí núu súcuan. Te va cáhán rí nájñuhun cáhán ññ tēe cánéé. ²² Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cájejniññ nuū jnúhun Cristo cácuu de, te víhyá gā ruhū. Te va cáhán rí nájñuhun tēe cánéé jeē cutéyí rí súcuan. Chi ni caa ga ni sájñiññu ri vēsú maá de jíjnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacuni ñayuu cahni i ruhū. ²⁴ Te jnáhan ri hebreo, uhūn jínu ni cacani xeēn de ruhū jíjn cuarta ññ, ññ cūhva jeē jé yajni cuu rí sáha. ²⁵ Unī jínu ni cacani de ruhū jíjn yujnu xíi, te ññ jínu ni cajēhe de yuū xinī rí. Unī jínu ni quēe barco jeē ní jica ri siquī jnúhun ya. Te ññ jecuáa jíjn ññ ndiáca ni yosō candá rí nuū cunú ndute mar. ²⁶ Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuñhná. Ni cācu ri nuū ñáyuu nación rí jíjn núu ñáyuu ññu jíca. Ni cācu ri cháha chúcuan ná ni íyo ri ññu jíjn rancho jíjn mar. Ni cācu ri nuū táca jnáhan ri jeē tu íyó ndáa. ²⁷ Ni sájñiññu nñhin ri te yí ní ndoho rí. Cuehē jínu ni jehni rí maá rí máhná. Ni jíi rí sōco, ni jichī rí ndute. Cuehē

jínu ni íyo ndite ni rí, ni cuijnu rí, ni cumanī sahma ri

²⁸ Te siquī táca jeē yáha chi íyó gá. Chi ndiquivī ndóho ri jeē nácani ndasí ni rí jehē táca grupo ñayuu cácadíje. ²⁹ Núu ññ ñayuu tu fuerza ini i, te suni ndóho ri jehē i. Te núu ññ ñayuu quívi i cuēchi sáha jnáhan i, te ndóho ri jnúhun cúcanu jíjn jnúhun náxeēn ni. ³⁰ Núu súcuan te núu cánuú cutéyí nde ri, te va cutéyí rí siquī táca jeē steén jeē tú na fuerza ini rí. ³¹ Te Yaā Dios, Yaā cúu Tátá maá Jítóho yō Jesucristo, jíni yā jeē cahán ndaā rí. Te ní cáni na cáhán ñayuu jeē vāha ndasí Yaā cúu ya. ³² Ná ni íyo ri ññu Damasco, te gobernador jeē ndácu jniññu ndañūu jeē jnái rey Aretas, ni jeni de soldado ni cacondito táca yéhyí jeē ní condúu ndihyú ññu ún, chi jñi de ruhū quihñ rí vecāa ni cuni de núu. ³³ Te ni quívi ri chíji ññ jica, te ñayuu cácadíje ni cascúun i ruhū ventana ññ vehe jeē néne jíca jeē ndihyú ññu ún. Te súcuan ni cācu ri nuū tēe ún.

Jeē ní jito ndijin Pablo jeē ni stúu ya nuū de

12

¹ Te tu níhín jniññu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rí te ni steén ndijin yā nuū rí. ² Jíni rí ññ tēe cándíje Cristo, te je ni cuu uxī cuñ cuiyā jeē ní sáha ya jeē ní caa tēe un ní jehēn de nde andiví únī. Te tu jíni rí núu ni jehēn rí jíjn yiqui

cúnu rī, chí ní jehēn anuá-ni ri. Máá Yaā Dios cúu jeē jíní. ³ Te jíní rī jeē ní ndonehen ya ruhū. Te á ní jehēn rī jíní yiqui cúnu rī, chí ní ndōo, tu jíní rī, chí máá-ni Yaā Dios cúu jeē jíní. ⁴ Chi ní sáha ya jeē ní caa ri ní jehēn rī nde jardín andiví. Te yūcuan ní jini sōho ri tāca jnúhun sáhi ndasí jéē ma cúu castūhun yóhó ñáyuu. ⁵ Te siquī jeē ní sáha ya súcuan jíní rí cúu jeē cutéyí rí, te ma cutéyí rí siquī ndese cúu máá rí. Chi cutéyí rí máni jeē tú na fuerza ini rī. ⁶ Te núu cúní rī cutéyí rí siquī maá rí nuú, te nasūu jéē canéé rí núu sáha ri súcuan núu, chí ndaā cúu jeē iyó jeē cutéyí rí. Te ni ma sáha ri, chí tu cúní rī jeē caní ni ñayuu jeē kujénu ga rī vésú jeē ní jito i chí jéē ní jini i jnúhun rī.

⁷ Te tu cúní yā jeē yáha ri cutéyí rí siquī jeē ní stéén ndijín yā jniñu jénu ndasí un núu rī, te jeē yūcuan ní quiji ñn jnúndóho jeē ndiquín ruhū te stóho ruhū. Te ñn jeē ní jéhe ya jnúhun ni tají Satanás cúu, ñn jeē stóho ruhū, návaha ma yáha ri cutéyí rí. ⁸ Te unī jínu ni cahān ndahú rí jíní máá Jítóho yō jeē na téjiyo ya quihín. ⁹ Te ni cahān yā jíní rí: Tuú chí tu cúmaní jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achí yā. Núu súcuan te cúsiñ ni rī jeē tú na fuerza ini rī, chí súcuan te nducuehē gā fuerza Cristo ini rī. ¹⁰ Jeē yūcuan cúu jeē cúsiñ ni rī jeē tú

na fuerza rī, jíní jéē cácahān ndevāha ñayuu jíní rí, jíní jéē cúmaní nuú rī, jíní jéē cájito xeēn i ruhū, jíní jéē ndóho ri jnúndóho siquī Cristo. Chi jeē tú na fuerza maá rí, yūcuan sáha jeē nihín rī fuerza maá yá.

Jeē nácani ni Pablo siquī ñayuu cácañdije ñuu Corinto

¹¹ Te va tēe canéé cúu ri jeē ní sátéyí nde ri maá rí. Te siquī jeē tu cácañdije ró rúhū, jeē yūcuan ní sátéyí rí maá rí. Chi cánuú jéē máá ró cuajnúhún ró ruhū nuú. Chi vésú tú jniñu ri jeē maá rí, te va tu núu cuiti nde ri nuú tāca tée un jéē cácahān rō jeē apóstol kujénu cácuu de. ¹² Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíní cuéhē paciencia ni sáha ri tācá jniñu jénu jeē steén poder Yaā Dios, jíní tāca jniñu jeē nahán ní canaa ni rō ni cajito ró. ¹³ Te tu ní sáha ri jeē núu ga cácuu ró núu tāca gá grupo ñayuu cácañdije, chí máá ñn-ni jeē tu ní stáhān rī rohó jéē cuáha ro jéē jíní ñnúhún rí. Cone cáhnu ni rō núu súcuan ní sáha nde ri falta nuú rō ví.

¹⁴ Te vijna je iyó túhva ri jecondēhe rí rohó vuelta unī. Te suni tú na vé cacán rī nuú rō, chí nasūu ndajniñu ró cúu jeē cuní rī, chí sa suhva jeē quendōo vāha ró jíní jnúhun ya. Chi nájnūhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuáha de jeē quendōo vāha sēhe de. ¹⁵ Jeē yūcuan cúsiñ ni rī stíhi ri jeē névaha

ri, te nde stíhi ri fuerza maá rí, návāha sáha ri jeē quéndō vāha ánuá rō jijnáhan rō. Te manī gā coo ri jíin rō, vēsú sanaa te jecu-ni cáhīyo manī rō jíin rí.

16 Te íyó jecu rō cácahān jeē vēsú tú na vé ni jícán rī nuū rō, te tēe stáhú cúu ri, chí ni nducú rí modo ndichí nihīn rī xūhun rō, cácahān rō. 17 ¿A táca tēe ní tají rí nuū rō, á ñn máá de ni stahú de rōhó jēe nihín de xūhun rō cuu máá rí, chí naún? Tú cuiṭi. 18 Ni cahān ndahú rí jíin Tito jeē jécondēhé de rōhó, te ni tají rí ñn hermano ni jeē jíin de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chí inuú-ni casáha ndindúú rí, te ñn-ni ánuá ndindúú rí.

19 ¿Sanaa te cájeni ni rō jeē cahán rī jñūhun yáha návāha quendō vāha ri jíin rō, chí naún? Nasūu súcuan cúu, chí Yaā Dios jiní yā jeē cahán rī maá-ni jñūhun jeē cuní Cristo. Te ndihí jeē cahán rī chí nducú rí jeē ije rō jíin jñūhun ya, ñánī mánī. 20 Chí yúhú rí jeē núu na jéé rī, te sanaa te cuní rī jeē tu casáha rō jñiñu nújnahan ni rī. Te máá rō jijnáhan rō, suni ma nújnahan ni rō ruhū. Chí sanaa te cátejñahan rō, cáccucúésún ni rō, cáquitī ni rō, casándúxí rō, casájnúhún rō, cácahān rō siquī jñáhan rō, cácutéyí rō, cájica néé rō. 21 Te yúhú rí jeē núu na jéé tucu ri te cuāha Yaā Dios jñūhun canu nuū rī jeē súcuan casáha rō. Te sanaa te cucuíhyá ni rī

núu íyó cuéhē rō jeē ní casáha cuēchi ichi yátá, te tu nácani ni rō stóo rō jñiñu jñéhén jñiñu jíca jnéni jíin jñiñu néé ndasí ní casáha rō.

Saludo jíin jñūhun cástūhun Pablo jeē sándīhí

13

1 Yāha cúu vuelta unī jeē jécondēhe rí rohó. Te sándaā yō jñiñu nájnūhun cáhán tutu: Jíin jñūhun jeē cahán uū chí únī testigo te cundaā tācá jñiñu, áchí. 2 Te vijna jeē íne jícá rí te cáhán tucu ri nájnūhun ni cahán rī ná ni íne ri jíin rō. Cáhán rī nuū ñáyuu ni casáha cuēchi un jíin núu ndihí rō, jeē núu na jéé tucu ri te ma cóo vītá ni rī jíin rō. 3 Te yūcuán cuu prueba jeē cánducú rō, suu núu jendaá jeē cahán rī jíin fuerza Cristo. Chí Cristo tu cúmanī fuerza yā jeē sándaā yā jíin rō, chí stéén yā poder yā mēhñu rō. 4 Te vēsú tu ní stéén yā fuerza yā ná ni jihí yā jicá cruz, te vijna chí técu yā jíin poder Yaā Dios. Te nájnūhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jíin poder Yaā Dios cátecu rī jíin yá jeē cuajniñu ri nuū rō jeē siquí jñūhun ya.

5 Coto ndee rō maá rō núu cáhīn nihin rō jíin jñūhun cácandíje rō yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije rō? 6 Te ñūhun ni rī jeē suni cáccúhnu ni rō jeē maá rí cácandíje ndije ri. 7 Te

cájicān tahu rī nuū Yaā Dios jeē ma sáha ró ni ñn jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chí máni jeē na sáha ró jniñu ndaā cúu jeē cánducú rí. ⁸ Chi tu jési ri nuū jniñu ndaā, chí sa suhva scáca ri. ⁹ Núu súcuan te cácusī ni rī núu tú na fuerza maá rí, te núu íyó fuerza maá ró. Te níni cácan tahu rī jeē na íje ga ni rō jijnáhan ró jín jnúhun ya. ¹⁰ Te tée ri carta yáha nuū rō nde ná tu jeē rī, návāha núu na jéé rī te tuá jini ñúhún cuxeēn rī nuū rō. Chi ni jēhe Jitoho yō jniñu ndíso ri yáha jéé sáha ri jeē íje ánuá rō jín jnúhun ya, nasūu jéé snāā rī.

¹¹ Je ni cahān yō núu súcuan hermano, te na cóo jeē váha jín ró jijnáhan ró. Te na cóndihvī ni rō ije ró jín jnúhun ya, te coo ndeyí ni rō. Te na cóo inuú ni rō te coyūcu mánī rō jín jnáhan ró. Te Yaā ndíso jnúhun ndeyí sī ni jín jnúhun cúndáhú ni, coo ya jín ró jijnáhan ró. ¹² Te jeē cahán rō jín táca jnáhan ró, te yíñúhún techūhu ró ndaha i. ¹³ Sándeyí ni rō jijnáhan ró, áchí hermano cácandíje jeē cáyūcu yáha.

¹⁴ Te ñúhun ni rī jeē Jitoho yō Jesucristo na sáha ga yā jeē váha róhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jín ró. Súcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasūu ñayuu ni jéni ruhū ni nasūu ñayuu ni tájí ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyi. ² Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñayuu cácanđije ní región Galacia. ³ Te cáñuhun ni rí jeē Tátá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sīi ni rō. ⁴ Chi Jesús ni socō yā máá yá jeē ni jíhī yā jeē siquí cuéchi yó, návāha jnama ya yohó núu tāca jéē neé íyó ñayívi yáha, chi súcuan ni nujnahan ni máá Tátá yō Yaā Dios. ⁵ Jeē yúcuan na cáhán yō jeē yóhyo luu cújéhnu ya ní cáni. Súcuan na cóo. Amén.

Siquí jeē tuá na inga jnūhun cācu ñayuu

⁶ Te nánhán náā ni rí jíto ri jeē yóhyo yachī cánducú ró stóo ró Yaā Dios, Yaā ní cana rōhó jéē quívi ró ndaha ya siquí jeē cundáhú ni Cristo yohó. Chi ni candiquīn rō inga jnūhun jeē sīn cáhán. ⁷ Te tú cuiti na inga jnūhun jnama yóhó íyó. Te cáhīyo jecu ñayuu castáhān i rōhó, te cácuni i nasama i jnūhun ndese jnáma

Cristo yohó. ⁸ Te núu ñin ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnūhun ni canacani ri nuū rō xihna gā, na jnáhnú ndetū ñayuu ún. Te vésú maá rí chí ñin ndajéhé jeē quíji nde andiví nacani inga jnūhun núu, na jnáhnú ndetū. ⁹ Je ni cahān rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jíin jnūhun jeē ní cajetáhú ró, na jnáhnú ndetū tēe ún.

¹⁰ Te jeē cahān rí súcuan, ¿á ndúcú rí jeē cuajnúhún ñayuu ruhū, chí Yaā Dios? ¿Chí ndúcú rí jeē cúsi ni ñayuu jíin rí, cájeni ni rō? Núu ndúcú gá rí jeē cúsi ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹ Te cástūhun rí nuū rō, hermano jíjnáhan ró, jéē jnūhun jnáma ya yohó jéē nácani ri, nasūu jéē ní jeni ni máá rí jíin ñayuu cúu. ¹² Chi nasūu ñayuu ni stéen nuū rí, ni nasūu ñayuu ni sáha jeē ní cutūhva ri, chi sa suhva máá Jesucristo ni steén nuū rí.

¹³ Chi je ni cajini jnūhun ró ndese ni sáha ri nde saá, ná ni chíñúhún rí sahān jnáhan ri ñayuu hebreo. Te cájini rō jeē yóhyo ni jito xeēn rí ñayuu cácanđije nuū Yaā Dios, te ni condíhvī ni rí snāā rí i núu. ¹⁴ Te váha ga ni cutūhva ri sahān ún vésú cuehē gā tēe nación rí jeē ní cajehnu jíin rí, chi ni condíhvī gā ni rí siquí tāca jéē ní cajequin jíi

rī. ¹⁵ Te vēsú súcuan te Yaā Dios je ni nacāji ya ruhū nde ná tu cacu rī, te ñn quivī te ni cusī ni yā ni cana ya ruhū jeē quivī ri ndaha ya, siquī jeē yóhyo ni cundáhú ni yā ruhū. ¹⁶ Te ni steén yā Sēhe ya nuū rī, návāha nacani ri jnūhun ndese jnáma ya ñayuu tācá nación jeē tu jíní jnūhun ya. Yūcuán na te tu ní cájnūhun rí ni ñn ñayuu, ¹⁷ ni tu ní jéhén rī ñuu Jerusalén nuū téē cácuu apóstol xīhna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸ Yūcuán na te nde ni yāha unī cuiyā, te ni jehēn rī Jerusalén. Te ni jini jnáhan ri jín Pedro, te ni condee rī jín de xahūn-ni quivī. ¹⁹ Te tu ní jito ri nuū tāca gā apóstol, chi máá ñn-ni nuū Jacobo ñani maá Jítoho yō. ²⁰ Jnūhun yáha jéē téē ri cuajeē nuū rō, chi jíní Yaā Dios jeē ndaā cúu.

²¹ Yūcuán na te ni jehēn rī ñí región Siria jín Cilia. ²² Te ñayuu cá candíje jeē yíhi ndaha Cristo, jeē cáyūcú región Judea, ná tu coto cuiti i nuū rī saá. ²³ Chi máni jnūhun-ni ni cajini i cácahān ñayuu: Tēe ni jito xeēn yohó ndé saá, vijna chi nācani de jnūhun cándíje yó jéē ní nducú de snāa de nde saá, áchí. ²⁴ Te ni cacahān i jeē yóhyo cújéhu Yaā Dios jeē súcuan ni sáha ya jín rí.

Jeē ní cajetáhú táca gá apóstol un Pablo

2

¹ Yūcuán na te nde nuū uxí cuūn cuiyā, te ni jehēn tucu ri Jerusalén jín Bernabé, te suni ni jeca ri Tito ni jehēn de jín rí. ² Te ni jehēn rī chi máá Yaā Dios ni steén yā jeē jíní ñūhún quíhīn rī. Te ni candutútú sīn nene tēē cácujuhnu nuū ñayuu cá candíje ún. Te ni castūhun rí nuū de siquī jnūhun jnáma ya yohó jéē nācani ri nuū ñayuu tācá nación tu jíní jnūhun ya. Te súcuan ni sáha ri návāha cuajnúhún de jniñu ri, te ma quéndō cāhá jniñu sáha ri jín jéē ni sáha rí. ³ Te ni tu ní cásáha fuerza de Tito, tēe ni jica jín rí, jeē cóndee jnunī circuncidar de, vēsú nasūu téē hebreo cúu de. ⁴ Te súcuan ni cundaā, vēsú ni quivicoo jecu tēe stáhú jéē sáha de jeē hermano cácuu de. Te tēe un ní quivicoo de návāha yuhu-ni coto de ndese ni ndulibre yō nuū ley circuncidar siquī jeē yíhi yó ndaha Cristo Jesús. Chi cácuu de jeē squícu tucu yó ley un, nduu tucu yó mozo nuū ley un. ⁵ Te tu ní cájetáhú cuiti rī nuū téē ún, chi cúní rī jeē quéndō ñihin ró jijnáhan ró jín jnūhun jnáma ya yohó.

⁶ Te máá téē cácujuhnu nuū ñayuu cá candíje ún, tuá na inga jniñu jéē ní cándacu de nuū rī. Te máá rí chi tu ní chíhi ri cuenta siquī jeē cácujuhnu de, chi suni Yaā Dios tu sáha ya cuenta, chi inuú-ni cúu ndivii tēe nuū yā. ⁷ Chi sa suhva ni cajini de jeē jnūhun jnáma ya yohó, ndíso jniñu ri nacani ri nuū ñayuu tācá nación jeē tu cásáha cir-

cuncidar, nájnūhun nácani Pedro jnūhun un núū ñáyuu hebreo jeē casáha circuncidar. ⁸ Chi Yaā Dios jeē ní tají Pedro jeē nácani de jnūhun nuū ñáyuu hebreo, suni máá yá ni tají rúhū jeē nácani ri jnūhun nuū ñáyuu tācá nación tu jíní jnūhun ya.

⁹ Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cácañíje jeē maá de cácujeñnu ga. Te ni cajni de ndaha ri jíin ndaha Bernabé, jeē ní castéén de jeē cáhiyo manī de jíin rí, jíin jéē ní cacundaā ni de jeē maá rí quingōo nacani jnūhun nuū ñáyuu tāca gá nación, te máá de jíināhan de nuū ñáyuu hebreo. ¹⁰ Te máá ñn-ni jeē ní cajicān de cúu jeē cónahán rí chindéé ñáhán rí ñayuu cándoho ndáhú, te jniñu ún je ni condihvī ni rī ni sáha rī.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu. ¹² Chi nde ná tu quecoo sava jnāhan de hebreo jeē ní tají Jacobo, te yéji de staā jíin ñáyuu jeē násūú hebreo cácuu. Yūcuán na te nuū ní quecoo tēe ún, te ni cusíin de jeē tuá yéji de jíin i, chi yúhú de jeē cúni tāca tēe un jéē tuá squícu de ley jnāhan de hebreo. Chi áchí ley jeē ma cúu cají de staā jíin ñáyuu jeē tu casáha circuncidar. ¹³ Te sava ga tēe hebreo jeē cácañíje, suni ni cacujiyo de nuū i,

nájnūhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴ Yūcuán na te ni jini rī jeē ní canayūhú de cají de staā jíin ñáyuu ún, cúu jeē tuá jíca de jíin modo jeē cahán jnūhun jnáma ya yohó. Te ni cahān rī nuū Pedro, jito jíinúú tācá de: Róhó jéē cúu tēe nación yō hebreo, tuá squícu ró ley jnāhan yō hebreo, chi yéji rō jíin ñáyuu ún. ¿Te najehē safuerza rō i jeē squícu i ley jnāhan yo hebreo núu súcuan? ni achi rī.

Ñn-ni modo jnáma ya ñayuu hebreo jíin táca gá nación

¹⁵ Te yóhó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó. ¹⁶ Te vēsú súcuan te jíní yō jeē ní ñn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, násūu jíin jéē nducú yó squícu yó ley un. Chi áchí tutu ñi: Ni ñn ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, achí.

¹⁷ Te máá yó ñayuu hebreo, núu cúni yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájnūhun tāca gá ñayuu. Núu súcuan ¿te á cuéchi ni sáha

yó jeē ni stóo yó ley jenahán ná ni candíje yó Cristo? Tú cuiti jeē súcuan. ¹⁸ Chi sa núu naquihin tucu yó ley jeē ni stóo yó un, te súcuan tée yó cuēchi siquī maá yó. ¹⁹ Chi ruhū, nájnūhun ni jihī rī ni sáha ley un, te jeē yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰ Chi nájnūhun je ni jihī rī jicā cruz jiín Cristo, te vijna chi tuá técu rī jeē maá rí, chi máa Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī. ²¹ Núu súcuan te tu cuní rī casi rī nuū jnúhun jeē ndáhva Yaā Dios cuēchi yó siquī jeē yóhyo vāha ni yā jiín yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjníñu jeē ni jihī Cristo nuú.

Jnúhun ley jiín jnúhun candíje

3

¹ Róhó hermano ñuu Galacia, ¿naun tu cájecūhun ni rō? ¿Ndé tée ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jihī Jesucristo jicā cruz jehē rō. ² ĩn-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jéē ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun

jnáma ya rohó jéē ní cajini sōho ró. ³ ¿Ndese cúu jeē tu cájecūhun cuiti ni rō? Chi xīhna gā ni cacandíje ró jéē ni jihī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún? ⁴ Núu súcuan te tu ndé ní jéjníñu cuiti jeē ní castóho ñayuu rohó siquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē váha te núu jeē tu ní castóo ró, chi sa cácadíje ndije ró yá. ⁵ ¿Te na siquī cúu jeē jéhe Yaā Dios Espíritu yā nuū rō te sáha ya jniñu jéhnu mēhñu ró? Tu sáha ya siquī jeē cánducú ró squícu ró ley un, chi siquī jeē ní cacandíje ró jnúhun jnáma ya rohó jéē ní cajini sōho ró.

⁶ Abraham ni candíje de jeē sáha Yaā Dios jeē ni jéjnūhun ya, te jeē yúcuan ní ndahva yā cuēchi de. ⁷ Núu súcuan te na jécūhun ni rō jijnáhan ró jéē ñayuu cácadíje jeē sáha Yaā Dios jehē i, ndívi i yucūn Abraham siquī jeē súcuan cácadíje i. ⁸ Chi nde jenahán je cáhán tutu iī jeē ñayuu tācá nación tu jíni jnúhun Yaā Dios, ndahva yā cuēchi i núu candíje i ún. Te nde ná tu cuu tāca jéē yáha te je ni jejnūhun ya jnúhun vāha yáha nuū Abraham: Jeē rohó cúu jeē quendōo ndetū ñayuu tācá nación. ⁹ Núu súcuan te ñayuu cácadíje, quéndōo ndetū i jíni Abraham, tée ni candíje jeē ni jéjnūhun ya.

10 Te sa jnahnū ndetū ñayuu jeē cánducú i quendōo ndaā i jeē jíin ley Moisés. Chi súcuan yósó núū tútu i: Jnahnū ndetū tāca ñáyuu jeē tu squícu ndihí cuiti jnūhun yósó núū tútu ley, achí. 11 Núu súcuan te cájí cúu jeē ni ñn ñayuu ma quéndōo ndaā i nuū Yaā Dios síquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. 12 Te ley Moisés tu cáhán jeē cótecu yō ní cáni síquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

13 Te Cristo ni jnama ya yohó núū jnūhun cáhán ley jeē jnahnú ndetū yō síquī cuéchi yó, chi máá yá ni ndoho síquī jnūhun jeē jnahnú ndetū yō. Chi yósó núū tutu i: Tāca ñáyuu condita caa jicā yújnu, jnahnū ndetū i, achí. 14 Te Cristo Jesús ni jihí yā jicā yújnu cruz návāha quendōo ndetū ñayuu tācá nación sáha ya. Chi jnūhun jeē ni jéjnūhun ya quendōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjnūhun ya quiji.

Síquī ley jíin síquī contrato jeē ni jéjnūhun ya

15 Hermano, na cáhán rī ñn jnūhun ndese cásáha ñayuu ñayiví: Núu ñn tēe sáha de ñn contrato chí ñn acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. 16 Te

suní súcuan ni sáha Yaā Dios ñn contrato jeē ni jéjnūhun ya nuū Abraham jíin yúcūn de jeē quíji. Te tu cáhán tutu i síquī cuehē yucūn de, chi sa cáhán síquī ñn-ni yucūn de, te suu cúu Cristo. 17 Núu súcuan te jnūhun jeē cahán rī yáha cúu jeē xīhna gā ni sáha Yaā Dios ñn contrato jíin Abraham, jeē quiji Cristo jnama ya yohó, te ni sácutu yá. Yūcuán na te ni yáha cuūn ciento ocō uxī cuiyā, te sáá te ni jēhe ya ley nuū Moisés. Te ley un jéē ní quee cueé gá, ma cúu nacanū contrato un, ni ma cúu casi nuū jnūhun jeē ni jéjnūhun ya jeē jnama ya yohó. 18 Chi núu jeē jíin ley Moisés jnama Yaā Dios ñayuu, yūcuán na te nasūu síquī contrato jeē ni jéjnūhun ya cúu. Chi sa suhva síquī máá jéē ni jéjnūhun Yaā Dios nuū Abraham cúu jeē ní jnama ya de.

19 Núu súcuan ¿te ndese jéjníñu ley Moisés? Jéjníñu chi ni jēhe ya un cuéé gá návāha nastúu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núū ñayuu, te ni tají yá tācá ndajéhé yā ni cacastūhun núū Moisés, te Moisés ni nacachī nuū i. 20 Te síin cúu jnūhun jeē ni jéjnūhun ya nuū Abraham jeē quíji Cristo, chi máñuhún-ni ya ni jejnūhun, te tu ní jíni ñuhún ni ñn jeē nacachī nuū Abraham.

Síquī ndese jéjníñu ley jehnahán

21 Núu súcuan ¿te á cúní cahān jeē ley jeē ni jéhe Yaā Dios nuū Moisés, téjiyo jeē ni jéjnūhun ya ún? Tú cuiti jeē súcuan. Chi núu jeē ni jéhe Yaā Dios ñn ley jeē cótecu ñayuu níí cáni sáha, yūcuán na te quendōo ndaā i nuū yā siquī jeē squícu i jniñu ndácu ley un núu. 22 Te tuú chi yósó núu tútu ñi jeē ndihi ñayuu ñayīví, nájnūhun yīndihyū i vecāa chi cáyihí i chíji cuēchi. Te súcuan cúu návāha tǎcá i jeē candíje i jeē ni jíhí Jesucristo jehē i, nihīn i máá jēē ni jéjnūhun ya nuū i siquī jeē candíje i ún.

23 Chi nde ná tu quee jnūhun candíje yó Cristo, te nájnūhun ni yīndihyū yō ni sáha ley jenahán, návāha condetu yó quíví quiji Cristo, Yaā candíje yó. 24 Núu súcuan te ley ni cuu ñn jeē ndíto yóhó nájnūhun ñn mozo ndíto sūchi lúlí, te ni jejniñu nde quíví ní quiji Cristo, návāha candíje yó jēē ni jíhí yā jehē yō, te ndahva Yaā Dios cuēchi yó. 25 Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

26 Chi ndivii rō cácuu sēhe Yaā Dios siquī jeē ní cacandíje rō Cristo Jesús. 27 Chi tǎca rō jeē ní jendute rō síquī jeē ni quíví rō ndaha Cristo, ni sáha ya jeē ní nduu rō nájnūhun cúu máá yá. 28 Te vijna chí tuá cúu rō ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēē ni ñahan. Chi ñn na cúu rō núu

yā jeē cáyihí rō ndaha Cristo Jesús. 29 Te núu cáyihí rō ndaha Cristo, núu súcuan te yucūn Abraham cácuu ndije rō, te nihīn rō maá tǎhū jeē ni jéjnūhun ya.

4

1 Jeē cahán rī jíin rō jijnáhan rō cúu jeē yáha: ñn sūchi chíí tǎhū, vēsú maá i naquihin ndihi jeē névāha tǎtá i, te núu lúlí i chí inuú cúu i jíin mozo. 2 Chi yíhi i ndaha tǎca jēē ndíto i jíin jēē ndíto ndajniñu i, nde quee quíví jeē ní jeni tǎtá i, te sáá te nihīn i. 3 Te suni súcuan yóhó, chí nde ná tu jecūhun ni yō siquī Cristo te ni cuu yó nájnūhun sūchi lúlí, te ni yíhi yó chíji tǎcá costumbre jeē ní cajequin ñayuu ñayīví. 4 Te nde ná ni quee quíví jeē ní jeni Yaā Dios, te ni tají yá Sēhe ya, ni cacu ya chíji ñn ñahan, te ni cacu ya yucūn ñayuu nación hebreo jeē cáyihí chíji ley Moisés. 5 Súcuan ni cacu ya návāha jnama ya yohó jēē tuá quíhi yó chíji ley un, te návāha naquihin Yaā Dios yohó cuu yó sēhe ya.

6 Te siquī jeē cácuu rō sēhe ya, te ni tají Yaā Dios Espíritu Sēhe ya ni quívi ini anuá rō, te sáha ya jeē cácahān jee rō: Tǎtá maá ná. 7 Núu súcuan te tuá cácuu rō nájnūhun mozo, chí sēhe ya cácuu rō. Te jeē cácuu rō sēhe Yaā Dios, te suni nihīn rō maá tǎhū jeē ni jéjnūhun ya jeē jíin Cristo.

Jeē nácani ni Pablo siquī ñáyuu cacandíje

8 Chi nde saá, nde ná tu jecūhun ni rō ndese Yaā cúu

Yaā Dios, te ni cacuu ró mozo nuū tāca jēē násūu yāā ndaā cúu. ⁹ Te vijna chi je cājini rō ndese Yaā cúu ya, te vāha ga na cāhán rī jeē maá yá je jíni yā rohó. Núu súcuan ¿te najehē cācuni rō nandió cóo ró nduu tuçu ró mozo nuū tācá costumbre ñayuu ñayīvi jēē tu níhín jníñu cuiiti? ¹⁰ Chi máni jeē cánēe īi rō quivī jíin yóo jíin vico jíin cuiyā. ¹¹ Te yúhú rí sanaa te tu ní jéjníñu cuiiti jeē ní nacani ri jñūhun nuū rō.

¹² Cāhán ndahú rí jíin ró hermano, jeē na cáni ni rō nájñūhun jéni ni maá rí jeē tuá squícu ri costumbre ñayuu hebreo. Chi ruhū ni nasáha ri maá rí nájñūhun máá ró jeē tu ní cáyihí ró núu ley costumbre ñayuu hebreo. Te tú na vé ni casáha ró jēē cucuíhyá ni rī nde saá. ¹³ Chi cājini rō ndese ni cuu ná ni nacani núu rí jñūhun nuū rō ndese jnáma ya yohó. Chi síquī jeē cuhú rī te ni jecuiñī rī ñuu rō ni nacani ri jñūhun. ¹⁴ Te vēsú jñūndóho ni cuu jeē ní cocuhū rī, te tu ní casájēē ni rō nuū rī, ni tu ní casquéhichī ni rō ruhū. Chi sa ni cajetáhú ró ruhū nájñūhun jeē cúu ri ñin ndajéhé Yaā Dios, chí nájñūhun jeē cúu ri maá Cristo Jesús. ¹⁵ Núu súcuan ¿te najehē cúu jeē tuá cācusī ni rō jíin rí vijna? Chi nāhán rí jeē vāha ni casáha ró jēē ní cajnahuhū ni rō núu jeē cúu te tava rō tinūu vāha máá ró, cuāha ró nduu tinūu rí nuú. ¹⁶ Te vijna ¿á ní nduu ri enemigo rō síquī jeē cachí rí máni jñūhun ndaā nuū rō, chí

naún?

¹⁷ Te cáhīyo tēe jeē cándihvī ni síquī rō jíinánhan ró, te nasūu jēē quéndōo vāha ánuá rō, chí sa jeē cācuni de nasásīn de róhó jíin rúhū, návāha condihvī ni rō jeē cúu máá de. ¹⁸ Te íyó vāha jeē cándihvī ni de jehē rō, te núu jeē quéndōo vāha ánuá rō cúu núu. Chi níni jíni ñúhún sáha de jeē vāha róhó, vēsú núu íne ri jíin ró chí núu tú ri íne. ¹⁹ Séhē máni jíinánhan ró, jeē síquí rohó cúu jeē inga jínu jnāhuhū ni rī, chí nájñūhun ñin ñahan scácu sēhe, súcuan ndóho ri jehē rō. Te suu cúu jeē jnāhuhū ni rī ndétu ri jeē na ndúndaā anuá rō ndacu ró Cristo. ²⁰ Nacā jeē vāha núu jeē ndeé rí jíin ró vijna ñúhún, návāha cuu cahān manī rī jíin ró. Te tu cújñúní cuiiti ni rī ndese ga cúu jeē cáni ni rī síquī rō.

Jñūhun yátá síquī Agar jíin Sara

²¹ Róhó jíinánhan ró jēē cācuni rō quihí ró chíji ley Moisés, cachi nuū rī: ¿A tu ní cājini sōho ró ndese cāhán ley un? ²² Chi cāhán tutu īi jeē Abraham ni īyo uū sēhe yí de. Te ñin i cúu sēhe Agar, ñahan cúu mozo vehe de. Te inga i cúu sēhe ñahan íyó libre, suu ñasihí de Sara jeē ní cuu ña ñahan numá. ²³ Te sēhe ñahan cúu mozo, ni cacu i nájñūhun cácu tāca jíni sūchi lúli. Te sēhe ñahan cúu libre, ni cacu i máá síquī jeē súcuan ni jeñūhun Yaā Dios. ²⁴ Te yāha cúu ñin jñūhun yátá, chí ndindúú ñahan un cúu ña

nájnūhun ndindúú contrato jeē ni sáha Yaā Dios jíin ñáyuu. Máá ñahan nání Agar, cúu ña nájnūhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵ Chi Agar cúu nájnūhun ley jeē ni jéhe Yaā Dios xinī yucu Sinaí jeē íin nde Arabia. Te cúu ña nájnūhun Jerusalén, ñuu ñayuu hebreo, jeē iyó vijna, chí taca séhe ñuu Jerusalén, cácuu i nájnūhun mozo nuū ley un. ²⁶ Te Jerusalén jeē iyó andiví, chí sa suhva iyó libre nájnūhun Sara. Te yóhó ñayuu cácandíje, nájnūhun séhe un cácuu yó, chí iyó libre yō nuū contrato ley. ²⁷ Chi suhva yósó núu tútu ìi:

Róhó jeē ní cuu ró ñahan numá jéē tú séhe ró, na cúsi ni rō.

Róhó jéē tu ní jéhnde chíji ró jéē scácu ró, na cána jee ró jéē cúsi ni rō.

Chi coo cuehē gā séhe róhó jéē ní cuu ró ñahan numá vēsú ñahan jeē jé ni scácu séhe.

Achí tutu.

²⁸ Hermano, séhe Yaā Dios cácuu yó, chí súcuan ni jejnūhun ya nuū yō, nájnūhun ni jejnūhun ya nuū Abraham jeē cacu séhe de Isaac. ²⁹ Te nde saá te inga sūchi ní cacu nájnūhun cácu taca gā ñayuu, ni jito xeēn i Isaac, sūchi ní cacu ni sáha Espíritu. Te nájnūhun ni iyo sáá, suni súcuan cájito xeēn ñayuu taca séhe Yaā Dios nde vijna. ³⁰ ¿Te ndese cáhán tutu ìi? Achí: Quenehen ró ñahan cúu mozo

na quíhín ña jíin séhe ña. Chi séhe ñahan cúu mozo, ma nihín i tahū jíin séhe ñahan libre, achí yá jíin Abraham. ³¹ Núu súcuan hermano, tu cúu yó nájnūhun séhe ñahan cúu mozo, chí nájnūhun séhe ñahan libre cúu yó.

Na cuiñi ñihin yó jíin jnúhun jeē ni sáha libre yohó

5

¹ Te Cristo ni sáha libre yā yohó jéē tuá yáhi yó chíji ley Moisés. Núu súcuan te cuiñi ñihin ró jíin jnúhun jeē ni sáha libre yā yohó, te ma ndávicoo tucu ró cuu ró mozo nuū ley un.

² Sáha ró cuenta jijnáhan ró, chí ruhū Pablo cahán rī jíin ró jeē núu squícu ró ley circuncidar, yūcuán na te tu níhín jníñu cuiñi jeē ní candíje ró jéē ni jhī Cristo jehē rō.

³ Te inga jínu cáhán ñihin rí jíin taca tée cánducú cuu circuncidar, jeē núu súcuan te suni cánuú jéē squícu de ndivii cuiñi gā jnúhun cáhán ley Moisés. ⁴ Róhó jéē cánducú ró quendōo ndaā rō jeē squícu ró ley un, je ni casiáá rō Cristo núu súcuan. Je ni castóo ró jnúhun jeē ndahva yā cuēchi ró squíjeē cundáhú ni Yaā Dios rohó. ⁵ Te máá yó chí cájica yó jíin Espíritu, te cácandíje yó jéē ní ndahva yā cuēchi yó, te jeē yúcuan ñúhun ni yō jeē quendōo ndaā yō quiví cuiñi yó núu Yaā Dios.

⁶ Chi yóhó jéē cáyihí ndaha Cristo Jesús, vēsú núu jeē cúu yó circuncidar chí tu cúu yó, tú na vé níhín jníñu. Jeē nihín

jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

7 Váha ni cacandíje ró núú. ¿Te ndé ñn ni jesi jeē tuá cájetáhú ró jñūhun ndaā núú súcuan? 8 Jñūhun jeē ní cascáhán de róhó, chi tú vēji nuū maá Yaā ní cana róhó ní quivicoo ró ndaha ya. 9 Te ma náā ni rō jeē tēe cástáhú róhó, jñūhun cástéén de cúu nájnūhun levadura, chi vēsú jecu-ni levadura, te ndáa ndihi ñujen sáha. 10 Te cúcáhnú ni rī jeē maá Jítóho yō sáha ya jeē ma cándíje ró jijnáhan ró inga jñūhun jeē sñn cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

11 Te ruhū, hermano, núu jeē nácani ga rī jñūhun ley circuncidar nde vijna, te jnáhan ri ñayuu hebreo ma cóto xeēn i ruhū nuú. Chi ma quití ni i jeē nácani ri jñūhun jeē ni jhī Cristo jicā cruz, núu jeē súni nácani ri jñūhun circuncidar nuú. 12 Te tāca tēe jeē sáca núu xinī rō siquī jñūhun ún, váha ga na cáhnde gā de máá de núu súcuan.

13 Chi máá ró jijnáhan ró hermano, ni cana ya rohó návāha coo libre rō nuū ley un. Te vēsú iyó libre rō, te ma cáni ni rō jeē cúu quivicoo ró táca cuéchi jeē cúu modo neé cúní maá ró, chi sa suhva na sáha ró máá ró mozo jeē chindéé ñáhán ró jnáhan ró siquī jeē cundáhú ni rō i. 14 Chi je ni squícu ró ndihi ley núu squícu ró ñn-ni jñūhun

ndácu jniñu yáha: Cundáhú ni rō jnáhan ró nájnūhun cundáhú ni rō maá ró, achí. 15 Te núu máni jeē ndónnda xeēn rō siquī jnáhan ró jéē cuajnáhan ró, te coto ma snáā rō jniñu jeē ni sáha ya mēhñu ró jijnáhan ró.

Modo cuní ñayuu tu cándíje jín modo sáha Espíritu

16 Súcuan cáhán rī jín ró jijnáhan ró: Caca ró nájnūhun cúní maá Espíritu, te yūcuán na te ma sáha ga rō modo jeē cuní maá ró. 17 Chi tāca jéē cuní maá yó, yūcuan jesi nuū jeē cuní maá Espíritu. Te jeē cuní Espíritu, jesi nuū modo neé jéē cuní maá yó. Te jeē ndíndúú yáha chi cájesi nuū jnáhan, te jeē yūcuan tu cúu sáha ró jniñu váha jeē cuní rō sáha ró. 18 Te núu máá Espíritu steén nuū rō, núu súcuan te tuá cáyihí ró chíji ley jenahán.

19 Te iyó ndijin tācá jniñu cásáha ñayuu cájica jín modo neé máá, te yáha cúu: Cásiquí ndéē jnáhan i, cásáha i jniñu jnéhén, cásáha neé ndasí i. 20 Cáchiñúhún i ídolo, cásáha tásí i, cájito uhū jnáhan i, cájejnáhan i, cáccucuñí ni i. Te yachī cáquití ni i, te cándihvī ni i jeē cúu máá-ni i, te cátejnéhan i cásásñn i máá i. 21 Te cáccucúsún ni i, cájehni i ndīyi, cánajīni i, cásáha i vico neé, jín táca gá jeē súcuan. Te cáhán ñihin rī jín ró, nájnūhun je ni cahán rī jín ró saá, jeē ñayuu casáha súcuan, ma nihín tahu i quivicoo i ñuu nuū ndácu Yaā Dios jniñu.

22 Te ñayuu jeē nduú i jíin Espíritu, tācá jniñu yáha sáha ya jíin i: Jeē cundáhú ni jnáhan, jeē cúsi ni, jeē iyó ndeyí sñ ni, jeē iyó paciencia, jeē maní ni, jeē váha ni, jeē squícu váha, 23 jeē tu sáha jeē cujéhnú, jíin jéē jési modo jeē cuní maá. Te tú na ley cacān cuēchi siquī rō núu sáha ró táca jniñu yáha. 24 Te ñayuu cáyihí ndaha Cristo, nájñuhun je ni cajehni i modo neé máá i jicā cruz, nde jíin táca jéē ndíyo neé ni i te cútíndí. 25 Te jeē súcuan ni jéhe máá Espíritu ññ vida jeé núu yō, te suni na cáca yó jíin modo steén Espíritu.

26 Te ma sandúxí yó jéē squítí ni yō jnáhan yó, te ni ma cucuésún ni yō siquī jnáhan yó.

Jñuhun jeē chindéé ñáhán yó jnáhan yó

6

1 Hermano, núu ññ jnáhan ró ni sáha cuēchi, te rōhó jéē cájica jíin Espíritu, na náchuhun ichí ró i. Te jíin jñuhun vítá cahān rō jíin i, te suni condito ró máá ró jeē ma cacān ini rō sáha ró táca cuēchi. 2 Te chindéé ñáhán ró jnáhan ró núu na vé cúu jeē ndóho i, chí súcuan cúu jeē squícu ró ley Cristo.

3 Chi núu ññ ñayuu jéni ni i jeē ñáyuu teyí cúu i, vēsú nasūu súcuan cúu, te stáhú i máá i núu súcuan. 4 Te tācá ññ ññ ró na cóto ndee rō ndese cáca jniñu sáha ró. Te núu váha sáha ró, yūcuán na te cuu cusí ni rō jíin jéē sáha máá ró, te tu

níní jéē scáni jnáhan ró máá ró jíin jnáhan ró. 5 Chi tācá ññ yó cánuú squícu yó jíin jniñu ní jéhe ya nuū maá yó.

6 Te rōhó jéē cascuáha jñuhun váha ya, na chindéé ñáhán ró tēe cástéén nuū rō jíin táca jéē váha cáneváha ró.

7 Ma stívi ró caní ni rō jeē cuu sáha ró cuēchi. Chi ma cúu sácatā rō nuū Yaā Dios caní ni rō jeē tu sáha ya cuenta. Chi táca núu ndese sáha ñayuu, suu yūcuán nanihín i. 8 Chi ñayuu jeē sáha i jeē cuní modo neé máá i, nihín i jeē jnahnú ndetū i sáha modo jeē cuní maá i ún. Te ñayuu jeē sáha jeē cuní maá Espíritu, chí nihín i jeē cótecu i ní cáni andiví sáha Espíritu. 9 Te ma cuíta yó jeē sáha yó jniñu váha núu súcuan, chí jeē quée maá quíví te nanihín yō, te núu ma cuíta yó. 10 Núu súcuan te táca jínu jeē cúu sáha yó, te na sáha váha yó jíin táca ñáyuu, te hermano yō jeē cácaníje cúu jeē cánuú gá.

Saludo jíin jñuhun cástūhun Pablo jeē sándíhí

11 Condēhe ró jeē náhnu le-tra tēe ri cuajeē nuū rō jñáhan ró, chí ndaha máá rí tēe ri yáhá. 12 Te tēe jeē casáfuerza de rōhó cuu ró circuncidar, cásáha de siquī jeē cácuni de cuajnúhún ñáyuu de. Te cásáha de náváha ma cóto xeēn ñayuu de jeē cánacani de jñuhun jeē ni jíhí Cristo jehē yō. 13 Te ni máá de jeē casáha de circuncidar, suni tu squícu váha de ndihí ga ley jenahán. Te cácuni de jeē cuu ró circuncidar,

návāha cuu sátéyí de máá de núu quihin ró jnúnī circuncidar sáha de. ¹⁴ Te ruhū tu cúní rī satéyí rī maá rī siquī ní ìn jeē yúcuan, chi máá ìn-ni siquī jeē ni jīhī Jitoho yō Jesucristo jicā cruz. Chi siquī yūcuan cúu nájñūhun ni jīhī rī, chi ni siaá rī tāca jéē iyó ìni ñayiví, te suni nájñūhun ìn ndīyí cúu ri nuū ñayiví. ¹⁵ Chi núu yíhi yó ndaha Cristo Jesus, te tu níhín jníñu núu cúu yó circuncidar chí tuú. Chi jeē níhín jníñu cúu jeē ní nasájeé yá anuá yō. ¹⁶ Te ñúhun ni rī jeē tāca ró jeē jíca ró jíín modo yáha, na sáha ga yā jeē coo ndeyí coo sī ni rō, te cundáhú ni yā rohó. Te suni ñúhun ni rī jeē súcuan sáha ya jíín táca gá i jeē cúu ndije i ñayuu cácadíje Yaā Dios.

¹⁷ Te vijna jíín ní gá cuahān yō, cúní rī jeē ma stáhān gā ni ìn ñayuu ruhū. Chi yiqui cúñu rī ndíso seña jeē ni tújī rī ni ndoho ri jeē cúu ri mozo maá Jítoho yō Jesús.

¹⁸ Hermano, ñúhun ni rī jeē na sáha ga Jitoho yō Jesucristo jeē vāha rōhó jíínáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni taji yá ruhū. Te tée ri carta yáha cuájeē nuū rohó ñayuu ñuu Efeso, jeē cácuu ró ñayuu maá yá jeē cácandije ró Cristo Jesús. ² Te ñúhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō.

Jeē sáha Cristo jeē quéndōo vāha ánuá yō

3 Na cáhán yō jeē yóhoyo cújéhnu Yaā Dios, Yaā cúu Tatá Jítoho yō Jesucristo. Chi ni jēhe ya tāca jēē váha íyó andiví jēē quéndōo vāha ánuá yō, chi yíhi yó ndaha Cristo. ⁴ Chi nde ná tu jecōo ñayiví te ni nacāji ya yohó jēē quiví yó ndaha Cristo, návāha coo ndoo ánuá yō te caca ndaā yō nuū yā. ⁵ Je ni cundáhú ni yā yohó nde saá, te ni tana ya yohó jēē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. ⁶ Te jeē yúcuan níní na cáhán yō jeē yóhoyo cújéhnu ya, chi yóhoyo vāha ni sáha ya yohó jíin táca jēē váha ni yā, siquī jeē yíhi yó ndaha Cristo, Sēhe ya jeē maní yā jíin. ⁷ Te siquī jeē yóhoyo vāha

ni yā jíin yó, te Sēhe ya un ní jnama ya yohó jēē ni jíhi yā jehē yō, te ni ine cáhnu ni yā nuū cuéchi yó. ⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. ⁹ Te ni sáha ya jeē cuni yō ñn jnúhun ya jeē ní yisāhí, jeē tu ní sáha ya jeē cuni ñayuu jehahán. Chi súcuan ni tee ni yā nde saá, te nujnahan ni yā sáha ya. ¹⁰ Te yāha cúu jnúhun ún: Nde na quée tiempo te sáha ya jeē ndihi jeē yúcu andiví jíin jēē yúcu ñayiví, inuú-ni nduu, quíhi ndaha Cristo.

¹¹ Te siquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tāca-ni jeē jé ni cundaā ni yā jeē nujnahan ni yā sáha ya. ¹² Súcuan ni sáha ya návāha máá rí jeē xíhna gā ni cacandije ri Cristo, caca ndaā rī te súcuan sájéhnu ri yā jeē yóhoyo luu cújéhnu ya. ¹³ Te suni máá ró jíinahan ró, ni cajini ró jnúhun ndaā jnúhun vāha jeē jnáma ya rohó, te ni cacandije ró Cristo. Te ni canihīn rō Espíritu Santo jeē ni jéjnúhun ya jeē cuáha ya. Te ndéé Espíritu yā ún ini anuá yō, te cúu ya nájnúhun sello jeē steén jeē cúu yó séhe Yaā Dios. ¹⁴ Te sáha ya jeē jiní ndije yó jēē cucuée gá te cuáha Yaā Dios tahū yō, nde na sínu ya jniñu jeē jnáma ya ñayuu yā. Te quiví ún cahān yō jeē cújéhnu ya, chi yóhoyo luu cújéhnu ya.

Jeē jicán tahú Pablo jehē

ñáyuu cá candíje

15 Te ruhū ni jini jnūhun ri ndese cá candíje ró jēē ni sáha Jitoho yō Jesús jehē rō, jíin ndese cá cundáhú ni rō ndihi ñayuu cáyihī ndaha Yaā Dios. 16 Te jeē yúcuan tu jécuiñī rī jeē nácuatáhú rí jehē rō, te jeē jicán tahu rī te tu nāā ni rī cacān tahu rī jehē rō. 17 Chi jicán tahu rī jeē na sáha Yaā Dios jeē jécūhun vāha ni rō te ndundichí ró jíin jnūhun ya, te cuni gā rō ndese Yaā cúu ya. Chi máá yá cúu Yaā Dios Jitoho yō Jesucristo, te cúu ya Tatá yō jeē lúu ndasí cújéhu. 18 Te jicán tahu rī jeē na sándijin gā yā nuū jeē níjnūní rō, návāha jecūhun ni rō ndese cáa ndihi jeē cáñuhun ni rō nihīn rō siquī jeē ní cana ya rohó. Te jecūhun ni rō ndese cúcá cácuu ró jíin táca jnūhun jéhu luu ndíso jnūhun ya jeē cúu ñayuu maá yá. 19 Te jicán tahu rī jeē na jécūhun ni rō ndese yōhyo jéhu poder yā jeē sájniñu ya ini anuá yohó jēē cúu yó ñáyuu cá candíje. Chi tu ndíhi cuiti poder yā. 20 Te suu poder un cúu jeē ni stéén yā ná ni sáha ya ñn jniñu jéhu ga jeē ní nastécu yā Cristo mēhñu ndíyī te ni scúcōo ya lado váha ya nde andiví. 21 Te ni jeni ya Cristo siquī táca jēē cújéhu, jíin jēē ndíso jniñu, jíin jēē jnñ poder, jíin jēē ndácu jniñu, jíin síquī táca jeē cácahān ñayuu jēē cújéhu, cúu tiempo yáha, cúu tiempo quiiji. 22 Te ni jēhe ya jeē cújéhu Cristo

siquī ndivii. Te ni sáha ya jeē cúnuú yá cújéhu ya nuū ñáyuu cá candíje. 23 Te ñayuu cá candíje un cácuu i nájnūhun yiqui cúñu ya, chi ñn na cúu i jíin yá te ñūhun chitú yá ini anuá i, chi Yaā jeē ñūhun chitú ní cáhnu-ni cúu ya.

Ni cācu yó siquī jeē ní cundáhú ni yā yohó

2

1 Te ni sáha ya jeē cotecu rō ní cáni jíin Cristo. Chi je ni cacuu ró nájnūhun ndíyī nuū yā, ni sáha cuēchi ró jíin jniñu néé ní casáha ró. 2 Chi ni cajica ró jíin jniñu yúcuan nde saá, ná ni cacondiquīn rō jniñu ñayuu ñayiví, ná ni cajetáhú ró núu jexeén jeē ndácu jniñu nuū táca táchi xeén, te jica nuū tachí. Te suu cúu jeē scánda ini ñayuu níhni ni nuū Yaā Dios. 3 Te máá rí jijnáhan ri, suni súcuan ni cajica ri, chi ni casáha ri jniñu néé jēē cuni maá rí, jíin táca jēē jicán yiqui cúñu rī, jíin jēē cájeni néé ni rī nde saá. Jeē yúcuan suni ni cacuu ri ñayuu jeē nihīn castigo xeén jeē cuáha ya nuú, chi inuú-ni ni casáha ri nájnūhun casáha máá i. 4 Te Yaā Dios chi yōhyo cuehē ni cundáhú ni yā yohó, te vāha ndasí ni yā jíin yó. 5 Te náa cúu yó nájnūhun ndíyī nuū yā ni sáha cuēchi yó, te ni nastécu yā yohó jēē cótecu yō ní cáni jíin Cristo. Chi siquī jeē yóhyo vāha ni yā cúu jeē ní jnama ya yohó. 6 Te ni nastécu yā yohó jēē cótecu inuú yó jíin Cristo Jesús, te

scúcōo ya yohó jíin yá nde andiví. ⁷ Súcuan ni sáha ya návāha nī gá tiempo jeē quíji, te stéén yā ndese yōhyo manī yā jíin yó, jíin ndese vāha ni yā jíin yó jeē síquī Cristo Jesús. ⁸ Chi síquī jeē yóhyo manī yā jíin ró cúu jeē ní jnama ya rohó, chi ni cacandíje ró jéē sáha ya jehē rō. Te nasūu síquī jeē ní casáha máá ró cúu, chi tahū jeē ni jéhe ya nuū rō cúu. ⁹ Chi tú na jniñu vāha ní casáha yó jéē jnáma ya yohó, te jeē yúcuan ni ñin yó ma cúu sátéyí yó maá yó. ¹⁰ Chi cúu yó ñin jniñu luu jeē ní nasáha máá yá, chi ni nasáha ya yohó jéē cundúú yó jíin Cristo Jesús, návāha sáha yó táca jniñu vāha jeē jé ni sátūhva Yaā Dios jeē sáha yó.

Jeē sáha Cristo jeē ndívi yó núu jnúhun manī Yaā Dios jíin yó

¹¹ Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñayuu hebreo, chi sa suhva ni cacuu ró ñayuu táca nación jeē tu jíní jnúhun ya. Te ñayuu hebreo jeē casáha circuncidar yíquí cúñu, ni cacahān i jeē cácuu ró ñayuu tu sáha circuncidar. ¹² Na núcūhun ni rō jeē ndé saá tu ní cáhīin ró jíin Cristo, te ni cacuu ró ñayuu ñuu jicá núu nación Israel. Te tu ní cájini rō táca jnúhun contrato jeē ni jéjnūhun Yaā Dios. Te tu ní íne Yaā Dios jíin ró ñayívi yáha, te tú na vé jeē vāha ní cáñuhun ni rō jeē cóo. ¹³ Te vijna chi ni ndívicoo ró núu Yaā Dios jeē

tu ní cájini rō jnúhun ya nde saá, chi ni quívicoo ró ndaha Cristo síquī jeē ni jíhī yā jehē rō. ¹⁴ Chi Cristo cúu Yaā sáha jeē ndúmanī jnáhan yó. Chi ni sáha ya jeē ñáyuu hebreo jíin ñáyuu táca gá nación, ni nduu yó ñin na nuū yā. Chi ni sáha ya jeē tuá jito uhū jnáhan yó, te suu cúu nájñūhun jeē ní jenu ya ñin jeē ndihyú sava mēhñu yó jeē sásñin yóhó. ¹⁵ Chi ni socō yā maá yá ni jihī yā, te súcuan ni ndahva yā ley jenahán jíin jnúhun ndácu jniñu jíin jéē tajnúní ndíso máá. Chi ley un ní sásñin ñayuu hebreo jíin táca nación jeē tu ní jíní i ley un. Te ni nasquíjnanah ya ndihí yó jéē ní nduu yó ñin na nación jeé, yíhi yó ndaha ya. Te súcuan ni sáha ya jeē ní ndumanī jnáhan yó. ¹⁶ Te jíin jéē ni jíhī yā jicā cruz, te ni snāā yā jnúhun cájito uhū jnáhan ñayuu hebreo jíin táca gá nación. Te ni sáha ya jeē ndívicoo yó núu jnúhun manī Yaā Dios jíin yó, te ni nduu yó ñin na ñayuu maá yá.

¹⁷ Chi ni quiji Cristo ni nacani ya jnúhun vāha nuū táca ñáyuu jeē na ndívi i nuū jnúhun manī yā jíin i, cúu róhó ñáyuu tu ní cájini jnúhun ya, te suni ñayuu jnáhan ri hebreo jeē cájini jnúhun ya. ¹⁸ Te vijna te síquī jeē ni jíhī Cristo, te ndihí yó, cúu ñayuu hebreo chí ñáyuu táca gá nación, cuu quívicoo yó núu Tatá yō Yaā Dios, te ñin-ni Espíritu yā sáha. ¹⁹ Núu súcuan te tuá cúu ró nájñūhun

ñayuu ñuu jicá ni ñayuu tatú, chi ñn na ni nduu ró jíin ñáyuu ñuu maá yá. Te jnáhan ñayuu vehe Yaā Dios cácuu ró. ²⁰ Te cácuu ró nájñūhun ñn ñn parte ñn vehe cáhnu jeē cúvāha siquī cimientu, te cimientu un cúu jñūhun Cristo jeē ní canacani tācá apóstol jíin téu ni canacani jñūhun ya jenahán. Te máá Jesucristo cúu nájñūhun yuū cánuú gá jeē yítuu vehe. ²¹ Te ní vehe cúvāha vāha siquī maá yá, cúsucún cuáhān, cúu ñn templo íi jeē ndeé máá Jítóho yō. ²² Te suu cúu máá ró jíin náhan ró, chi ndúú ró jíin Cristo, te ñnuú-ni sáma ya rohó jíin tāca ñáyuu cácañdije, cácuu ró nájñūhun ñn ñn yuū templo. Te suu cúu jeē ndeé Espíritu Yaā Dios ñni rō nájñūhun ñni ñn templo.

Jeē ndíso jñíñu Pablo nácani de jñūhun nuū ñáyuu tu jíin jñūhun Yaā Dios

3

¹ Te jeē yúcuan ruhū Pablo, jíicán tahú rī nuū yā. Te íne ri vecāa siquī jeē ní nacani ri jñūhun Cristo Jesús nuū rohó ñáyuu tācá nación jeē tu ní jíin jñūhun ya nuú. ² Te jíin rī jeē ní cajini ró jñūhun ndese yōhyo vāha ni sáha Yaā Dios jíin rí, chi ni jēhe ya jñíñu nuū rī jeē nácani ri jñūhun vāha ya nuū rō. ³ Te jñūhun ya jeē ní yisāhí, ni nastúu ya nuū rī, nájñūhun je ni tee ri jecu siquī un núu rō. ⁴ Te núu na cáhu ró te cuu jecūhun ní rō jeē ní jini vāha ri jñūhun

Cristo jeē ní yisāhí un. ⁵ Te tu ní stéén yā jñūhun sāhí un núu ní ñn ñayuu tāca cuiyā ní quiji ichi yátá. Te vijna cúu jeē steén ndijin yā jíin Espíritu yā nuū tācá apóstol jeē ní jeni ndoo ya, jíin núu téu canacani jñūhun ya. ⁶ Te súcuan cáhán jñūhun ní yisāhí un: Ñayuu tāca gá nación, ñn cáhnu-ni nihīn i tahū i jíin ñáyuu hebreo, chi ni cacandije i jñūhun jeē jnáma ya i. Te ñnuú-ni ni nduu ndihí i, te ñn cáhnu-ni quéndōo ndetū anuá i sáha Cristo, nájñūhun ni jeññūhun Yaā Dios. ⁷ Te jeē siquī jñūhun yáha cúu jeē ní jeni ya ruhū jeē nácani ri jñūhun nuū rō. Chi ni cutahū rī jñíñu luu yáha jeē ní jēhe ya nuū rī. Te jíin poder yā ni sáha ya un jíin rí. ⁸ Te ruhū chi cúu ri téu núu ga nuū tāca ñáyuu núu ga jeē yíhi ndaha ya. Te vésú súcuan te nuū maá rí ni jēhe ya jñíñu luu yáha jē nácani ri jñūhun vāha ya nuū ñáyuu tācá nación jeē tu jíin, ndese yōhyo cúcá yó ndihí jeē ndíso jñūhun Cristo, jeē ma cánda cuiti yō jecūhun ni yō. ⁹ Chi ni jeni ya ruhū jeē steén cají rí jeē suni máá i jnama ya i. Te yúcuan cúu jñūhun Yaā Dios jeē ni yisāhi ndé jenahán ndasí, chi máá yá ni sáha ndihí-ni. ¹⁰ Te súcuan ni sáha ya jíin ñáyuu, návāha vijna te tāca jē cácujuhnu jíin jē ndíso jñíñu nuū sucún, na cúni ndese ndíchí ndasí Yaā Dios, Chi ndíchí ndasí ni sáha ya jíin ñáyuu cácañdije. ¹¹ Chi súcuan ni tee ni yā nde ní cání, te ni sáha ya jeē Jítóho

yō Cristo Jesús ni squícu ya ún. ¹² Te siquī jeē ni sáha Cristo, te vijna te jíni ndije yó jéē cúu quívi yó cáhān yō jíin Yaā Dios siquī jeē candíje yó Cristo. ¹³ Nūu súcuan te cáhān ndahú rí jíin ró jeē ma cucuíhyá ni rō siquī jnūndóho jeē ndóho ri jehē rō. Chi suu sáha jeē quéndōo ndetū anuá rō jijnáhan ró.

Cristo yōhyo cúndáhú ni yā yohó

¹⁴ Te jeē yúcuán cúu jeē jécuiñi yití rí nuū maá Yaā cúu Tátá Jitoho yō Jesucristo. ¹⁵ Te máá yá cúu Tátá nuū ndihi ñayuu yā jeē yúcu andiví jíin ñáyiví. ¹⁶ Te jícán tahu rí jeē jíin poder yā jeē kujéhu ndasí yá, na sáha ya jeē íje vāha ni rō jíin jnúhun ya, te coo fuerza ini anuá rō, sáha Espíritu yā. ¹⁷ Te jícán rí jeē candíje níhin ró Cristo, návāha condee yā ini anuá rō, te jñi vāha ró jnúhun jeē cundáhú ni yā rohó, te cuiñi níhin ró jíin. ¹⁸ Te súcuan te cuu jecūhun vāha ni rō jíin táca ñayuu candíje, ndese cáa jnúhun cúndáhú ni Cristo yohó. Chi yōhyo jíté, cáni, cúnú, súcún jnúhun ún, chí yōhyo cuehē sáha. ¹⁹ Te jícán rí jeē na cúni vāha ró ndese cúndáhú ni yā yohó, vēsú tu cúu cuiñi jecūhun ni yō ndihi ndihi. Te súcuan te cundúú ró jíin Yaā Dios jeē cunuú yá ini anuá rō.

²⁰ Nūu súcuan te na cáhān yō jeē yōhyo luu cújéhu ya, chí máá yá cúu Yaā iyó poder jeē sáha ya jeē vāha ndasí gá

vēsú ndihi jeē jicán yō chí jéē jéni ni yō. Te sáha ya un jíin poder yā jeē sájniñu ini anuá yō. ²¹ Te na cáhān yō jeē yōhyo luu cújéhu ya jeē siquī jeē ni sáha ya jehē ñayuu cácandíje jíin jéē siquī Cristo Jesús. Te súcuan ña cóo nde ní cáni cuiñi tiempo jeē quíji. Amén.

Inuú-ni cácuu ñayuu cácandíje sáha Espíritu

4

¹ Te ruhū jeē íne ri vecāa siquī jnúhun maá Jítoho yō, cáhān ndahú rí jíin ró jeē na cáca ndaā rō nájñuhun cánuú caca ró jéē cácuu ró ñayuu ni cana ya. ² Te níni na cóo suchí ni rō, te coo vítá ni rō. Te na cóo paciencia rō, te cuandeyí ni rō jíin jnáhan ró jéē cundáhú ni rō i. ³ Te na cóndihví ni rō coyūcu maní inuú ró, sáha máá Espíritu nuū véji jnúhun maní ni. ⁴ Chi ñin-ni cácuu ñayuu maá yá, te iyó ñin-ni Espíritu, te inuú cáñuhun ni yō jeē cóo jeē vāha siquī jeē ní cana ya yohó. ⁵ Te iyó ñin-ni Jitoho yō, jíin ñin-ni jnúhun cándíje yó, jíin ñin-ni jnúhun jéndute yó. ⁶ Te iyó ñin-ni Yaā Dios jeē cúu Tátá yō jijnáhan yó. Te máá yá kujéhu siquī ndihi yó, te sájniñu ya jíin ndihi yó, te ndéé yá ini ndihi yó.

⁷ Te tēcá ñin ñin yó ní ca-cutahū yō sñn sñn jniñu sáha yó, núu ndese ni tana Cristo cūhva tahū un núu yō. ⁸ Jeē yúcuán cáhān tutu ñi: Ná ni ndaa ya cuanuhun yā andiví, te ni stutú yá

cuehē jeē yíndihyū,
cuahān yā jín.

Te ni saja ya tahū nuū tāca
ñáyuu.

9 Te jeē cahán tutu jeē ní ndaa ya, suni cúní cahān jeē xīhna gā nde andiví ni cuun ya nde nuū cunú gá ñayīvi yáha. 10 Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni. 11 Te ni tana ya sīn sīn jniñu sáha ñayuu. Chi ni jeni ya sava ñayuu cuu apóstol, te sava ga nacani jnūhun ya, te sava ga scándije ñayuu jnūhun jeē jnáma ya i, te sava ga coo pastor condito ñayuu cácandije, te sava ga steén. 12 Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jín jnúhun ya. 13 Te súcuan coo nde nduu inuú-ni ndihí yó jín jnúhun cándije yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jín ndihí jnūhun jeē ñúhun chitú ini Cristo. 14 Te súcuan te ma cóo ga yō nájñūhun sūchi lúlí jéē yachī jéni yāha jéni yūcuán ni i, ni ma quívi nduu yō cháha chúcuan jín sīn sīn jnūhun jeé cástéén tēe stáhú jéē yóhyo ndito de squívi de yóhó nuū jnúhun stáhú. 15 Chi sa suhva na cóndiquīn yō jnūhun ndaā jín jnúhun cúndáhú ni. Te súcuan cuehnu yó jín táca jniñu cúní Cristo, Yaā cujéhnu nuū ñáyuu cácuu nájñūhun yiquí cúñu yā, chi ñn na cúu i jín yá. 16 Te sáha ya jeē nduu inuú ni táca i

jeē cáhije i cuahān i, chi cácuu i nájñūhun ñn na yiquí cúñu jín yá. Te jéjñiñu vāha táca ñn ñn i ndese ni nihīn jniñu i, návāha scuéhnu jnáhan te ije jínáhan jín jnúhun cúndáhú ni.

Jeē ndújeé yó sáha Cristo

17 Núu súcuan te yāha cúu jnūhun cahán rī jín ró, te jeē achí Jítoho yō cúu jeē cahán nīhin ri jín ró: jeē ma cáca ga rō nájñūhun cájica sava ga ñayuu jeē tu jíní i ndese Yaā cúu Yaā Dios, chi cájica i jín jnúhun jeē jéni sáa-ni máá i. 18 Te íyó nee nuū jeē níjnūní i, te tu névāha i Espíritu jeē véji nuū Yaā Dios, chi tu jíní i jnūhun ya, siquí jeē níhni ni i. 19 Te tuá cúcanu i, chi ni quívicoo i jín jniñu néé ndasí, te ndíhví ni i sáha i táca jniñu jnéhén. 20 Te róhó jínáhan ró, nasūu súcuan ní cáscuáha ró jnúhun Cristo, 21 te núu ndaā jeē ní cajini ró jnúhun ya jín jéé ní cacutūhva ró jín jnúhun ndaā Jesús. 22 Núu súcuan te na stóo ró táca jniñu ní casáha ró ichi yátá, ná ni casáha ró modo cuní maá ró jeē ní cu-jnéhén ánuá rō ni sáha jniñu néé stáhú jéé ní ndiyo ni rō. 23 Te na ndújeé ánuá rō jín jéé níjnūní rō. 24 Te na cuáha ró jnúhun ndujeé ró, chi nasáha Yaā Dios rohó nájñūhun cúní maá yá jeē cáca ndaā rō jín jniñu vāha jniñu ndoo.

25 Núu súcuan te ma cahán gā rō jnūhun stáhú, te na cahán ndaā rō jín táca jnáhan ró, chi ñn-ni cácuu ndihí yó.

²⁶ Núu vĕji ĩn jeĕ squítí ni rohó, te ma quití neé ni rō. Te ma quití ni rō nde quĕe niāndii. ²⁷ Ma cuáha ró jnúhun jeĕ sáha jexeén jeĕ quívi ró cuéchi.

²⁸ Ņayuu ní sacuíhná, ma sacuíhná gá i, chi sa suhva na sájniĭu i, te na cócuu i jíin jniĭu váha, návāha nihĭn i jeĕ cuáha i nuū űayuu cúmanĭ nuū.

²⁹ Ni ĩn jnúhun neé ma cahán rō, chi sa suhva na cahán rō jnúhun váha jeĕ scuĕhnu jnáhan jíin jnúhun ya, te sáha jeĕ quéndōo váha űayuu jíni sōho. ³⁰ Ma sáha ró cuéchi návāha ma cucuíhyá ni Espírĭtu Santo Yaā Dios. Chi Espírĭtu yā cúu nájnūhun sello jeĕ steén jeĕ cúu yó séhe Yaā Dios, nde quiĭi quívi jínu jniĭu jeĕ jnáma ya rohó.

³¹ Te na siáá rō tāca jnúhun cútu cu ni, jíin jnúhun xeĕn ni, jíin jnúhun quití ni, jíin jnúhun cahán ndevāha, jíin tāca jnúhun neé. ³² Chi sa suhva na cóo váha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájnūhun ni ĩne cáhnu ni Yaā Dios nuū rō siquĭ Cristo.

Ndese cánuú caca ndaā séhe Yaā Dios

5

¹ Núu súcu an te na ndácu ró Yaā Dios, chi cácuu ró séhe ya jeĕ maní yā jíin. ² Te níni cundáhú ni rō jnáhan ró, nájnūhun ni cundáhú ni Cristo yohó, te ni socō yā maá yá jehĕ yō, ni cuu ya nájnūhun

ĩn londe jeĕ jeén asĭn nuū Yaā Dios jeĕ ni sócō yā maá yá.

³ Te vijna jeĕ cácuu ró séhe Yaā Dios, te ni ma sáha ró ni ma ndájnuhun ró síquĭ jnúhun jíca jnéni, ni tācá jniĭu jnéhĕn, ni jnúhun ndĭyo ni ndajniĭu. ⁴ Te ni ma cahán rō tāca jnúhun sáha jeĕ cúcanu jnáhan, ni jnúhun cánéé íi, ni jnúhun jeĕ tu ndé jéjniĭu cuiti. Chi tācá un tu níhĭn jniĭu. Chi sa suhva na nácuatáhú ró nuū Yaā Dios. ⁵ Chi je cájini rō jeĕ ní ĩn űayuu cájica jnéni, ni jeĕ sáha jniĭu jnéhĕn, ni jeĕ ndĭyo ni tācá ndajniĭu, ma nihĭn tahú i quívi i ndaha Cristo jíin Yaā Dios jeĕ ndacu ya jniĭu nuū i. Chi tāca jĕĕ ndĭyo ni i cúu nájnūhun ídolo i jeĕ cáchiĭhún i. ⁶ Te coto ró jĕĕ ma stahú ni ĩn i rōhó jíin tāca jnúhun cahán saá ni i, chi siquĭ tāca jnúhun neé yáha cúu jeĕ quiĭi castigo xeĕn Yaā Dios nuū tāca űayuu níhni ni. ⁷ Ma quívi nduu rō jíin i núu súcu an.

⁸ Chi tāca quívi saá ni coyūcu ró nájnūhun nuū neé, te vijna chi cáyūcu ró jíin luz maá Jítoho yō, cúu jeĕ cájecūhun ni rō siquĭ yā. Te na cáca ró nájnūhun cájica űayuu jeĕ steén luz yā ĩni anuá i. ⁹ Chi jniĭu sáha luz yā jíin yó cúu tācá jniĭu manĭ ni, jniĭu ndaā, jíin jniĭu váha. ¹⁰ Scuáha ró sáha ró tāca jniĭu jeĕ nújnahan ni maá Jítoho yō. ¹¹ Te ma quívi nduu rō jíin tāca jeĕ tu níhĭn jniĭu jeĕ casáha űayuu cáyūcu nájnūhun nuū neé. Chi sa suhva stéén rō nuū i jeĕ tú váha casáha

i. ¹² Chi cúcanu yō cahān yō siquī jniñu cásaha yuhu maá

i. ¹³ Te luz yā sáha jeē nátū tācá jniñu néé cásaha i. Te núu cuatáhú i luz yā te caca i jíin luz ún. ¹⁴ Jeē yúcuan cáhán tutu:

Róhó jeē cúhuun ni, jeē nájñuhun quíxí, natahū ni,

te quenda ró méhñu ñáyuu jeē cácuu nájñuhun ndīyí.

Te Cristo steén yā luz yā ini anuá rō.

Achí tutu.

¹⁵ Núu súcuan te coto vāha ró ndese caca yúcún ró. Te ma cáca ró nájñuhun cájica ñayuu canéé, chí caca ró nájñuhun cájica tēe ndíchí. ¹⁶ Ma snāā rō tiempo, chí condihvī ni rō jíin jniñu ya, chí íyó cuéhē cuēchi quivī yáha. ¹⁷ Núu súcuan te ma cóo néé xínī rō, chí sa suhva na jécūhun vāha ni rō na jniñu nújnahān ni maá Jítóho yō. ¹⁸ Te ma nájñi ró, chí tīvī ró sáha. Chí sa suhva na ndúcú ró jeē cúnuú Espíritu Santo ini anuá rō. ¹⁹ Te cahān rō jíin jnáhan ró jíin salmo jíin himno, yaa íi jeē cahān jñuhun ya. Te ini anuá rō cahān rō jíin yá jíin táca yaa, chí yūcuan cúu jeē jíta ánuá rō nuū yā chíñúhún ró yā. ²⁰ Te níni nacuatáhú ró siquī tācá-ni nuū Tatá yō Yaa Dios te ndacunehen ró síhví maá Jítóho yō Jesucristo.

Ndese squícu vāha ñayuu cácandíje nuū jnáhan i

²¹ Te cuatáhú ró nuū jnáhan ró síquī jeē cáhīyo yíñúhún ró nuū Cristo.

²² Róhó ñahan cácuu ñasihí, cuatáhú ró nuū yíi ró, nájñuhun jétáhú ró nuū Jítóho yō. ²³ Chí yíi cújéñnu nuū ñasihí, nájñuhun cújéñnu Cristo nuū yohó ñáyuu cácandíje, jeē cácuu yó nájñuhun yiquí cúñu yā, chí ñin na cúu yó jíin yá. Te maá yá jnáma ya yohó. ²⁴ Chí nájñuhun ñayuu cácandíje cájetáhú i nuū Cristo, suni súcuan ñasihí cuatáhú ña ndíhi jeē cahān yíi ña.

²⁵ Te róhó tēe cácuu yíi, cundáhú ni rō ñasihí ró, nájñuhun ni cundáhú ni Cristo yohó ñáyuu cácandíje, te ni socō yā maá yá jehē yō. ²⁶ Súcuan ni sáha ya jeē cóo ndoo coo íi yō nuū yā, te ni nacate ya anuá yō jíin jnúhun ya jíin jéē ní jendute yó. ²⁷ Te yohó ñáyuu cácandíje chí cuiñi yó núu yā, te luu cújéñnu yó. Te ma cóndee cuēchi ánuá yō, ni jeē tú luu, ni ñin jeē súcuan, chí sa suhva coo ndoo coo íi yō nuū yā, te tú na vé cumaní gā. ²⁸ Te nájñuhun Cristo ni cundáhú ni yā ñayuu cácandíje, suni súcuan cánuú jéē cundáhú ni yíi ñasihí de, nájñuhun cundáhú ni de maá de. Chí tēe cundáhú ni de ñasihí de, maá de cundáhú ni de. ²⁹ Chí ni ñin tēe tu jító uhū de maá de, chí sa suhva yéji de te ndíto yúcún de maá de. Te suni súcuan sáha Cristo jíin yohó ñáyuu cácandíje nuū yā. ³⁰ Chí cácuu yó nájñuhun yiquí cúñu yā, te ñin ñin yó cácuu nájñuhun ñin ñin parte yiquí cúñu yā. ³¹ Te suu cúu nájñuhun tēe jeē stóo de tátá

de náná de, te quijnáhan de jíin ñasihí de, te ìn na cúu ndíndúú de. ³² Yóhyo jéhnú jnūhun sāhi yáha, te cáhán rī jeē ñáyuu cácadíje suni súcuan quijnáhan i jíin Cristo. ³³ Te suni súcuan ná ìn ná ìn ró cundáhú ní rō ñasihí ró, nájnūhun cundáhú ní rō maá ró. Te ñasihí na cúu yíñúhún ña jíin yí ña.

6

¹ Te rōhó séhe jíjnáhan ró, cuandíje ró núū tatá rō nuū naná rō, chi yūcuan cúu jeē váha sáha ró jéē candíje ró Jítóho yō. ² Chi yāha cúu ìn jnáhan jeē uxí jnūhun ndácu jniñu jeē ní jéhe ya, te xīhna gā jnūhun yáha ndíso tahū: Coó yíñúhún ró nuū tatá rō nuū naná rō, ³ návāha quendōo ndetū rō, te náhán cotecu rō ini ñayīvi yáha. Achí.

⁴ Te rōhó tátá jíjnáhan ró, ma squítí ní rō séhe ró, chi sa suhva scuéhnu ró i jíin jnúhun cuandíje i, te stéén rō nuū i jeē candíje i maá Jítóho yō.

⁵ Te rōhó mozo jíjnáhan ró, cuandíje ró núū patrón rō ñayīvi yáha, te coo yíñúhún ró te conso īyo ró núū de. Te na sájniñu ndaā sájniñu ndíje ró, caní ní rō jeē nuū Cristo cájejniñu ró. ⁶ Ma sájniñu ndúxí ró jeē maá jéē coto de te cuajnúhún de rōhó. Chi sa suhva sáha ró cuenta jeē mozo Cristo cácuu ró. Te sáha ró jéē nūjnahan ní Yaā Dios nde jíin ini jíin ánuá rō. ⁷ Te na cúsi ní rō sájniñu ró, te na cáni ní rō jeē nuū maá Jítóho yō cájejniñu ró, nasūu núū ñáyuu.

⁸ Chi je cájini rō jeē jniñu váha sáha ìn ìn ró, te nihín rō yāhu jniñu yúcuu núū maá Jítóho yō, vēsú cúu ró mozo chí téé sájniñu maá.

⁹ Te rōhó patrón jíjnáhan ró, suni súcuan sáha ró jíin mozo rō, te ma cahán xeēn rō jíin i. Chi na cócuhun ní rō jeē suni maá ró jíin maá i yíhi ró ndaha Jítóho yō, Yaā ndeé andiví. Te tu sáha ya cuenta ndese cúu ìn ìn ñáyuu, chi inuú sáha ya jíin i.

Na cúcutú yó jíin táca fuerza Yaā Dios

¹⁰ Te íyó inga jnūhun, hermano jíjnáhan ró. Nducú ró jeē na cóo fuerza ini rō jíin fuerza maá Jítóho yō jeē nduú yá jíin ró, chi íyó téyí poder yā. ¹¹ Na cúcutú ró jíin táca fuerza Yaā Dios, návāha cuu cuiñi nihín ró jéē ma stahú jexeén rōhó. ¹² Chi nájnūhun jeē cájejnáhan yó jíin táca jéē neé. Te nasūu ñáyuu cúu jeē cájejnáhan yó jíin, chi sa suhva jíin táca táchī cájica nuū sucún. Te yūcuan cúu jeē cácujehnú, jíin jéē cándiso jniñu, jíin jéē cándacu jniñu nuū ñáyuu ñayīvi yáha jeē nájnūhun cájica i nuū neé. ¹³ Núu súcuan te na cúcutú ró jíin ndíhi fuerza Yaā Dios, návāha cuu cuiñi nihín ró quívī jító ndee jexeén rohó. Te súcuan coo tūhva ró jíin táca ndíhi jeē cuiñi nihín ró jíin. ¹⁴ Núu súcuan te cuiñi nihín ró jíin jnúhun ndaā jeē cúu nájnūhun jeē yíhi nihín sanchíi chíji ró. Te sácutú ró maá ró jíin jnúhun caca ndaā rō, te suu cúu nájnūhun jeē

cúcutú soldado jíin sahma cáa jeē ndihyú de. ¹⁵ Te níni cotúhva ró nacani ró jnúhun ndeyí jnúhun siī ni jeē véji nuū Yaā Dios. Te suu cúu nájnūhun jeē chíhi soldado ndijēn jehē de. ¹⁶ Te jeē cánuú gá cúu jeē candíje ró jeē iyó yá jíin ró. Te yūcuan cúu nájnūhun jeē túhva ró máá ró yatā ñn escudo. Chi jíin jnúhun cándíje ró un te cuu ndahva rō ndihi jeē tají máá jéxeén, jeē cúu nájnūhun nduva jeē cayú yáñuhūn punta. ¹⁷ Te cuiñi ró jíin jnúhun ni jnama ya rohó, jeē cúu nájnūhun ñn lélú cáa. Te cuajniñu ró jnúhun jeē yosó núu tútu Yaā Dios jeē ni jéhe Espíritu Santo nuū rō. Chi yūcuan cúu nájnūhun jéjníñu soldado espada de. ¹⁸ Te níni cácan tahu rō nuū Yaā Dios siquī ndihi-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahu rō jehē tāca ñáyuu maá yá. ¹⁹ Te suni cahān rō jehē rī, návaha nihīn rī jnúhun cahān rī, te coo téyí ni rī nacani cájí rí jnúhun jeē jnáma ya yohó, suu jnúhun jeē ní yisāhí un. ²⁰ Chi ni tají yá ruhū jeē jíca rí nacani rí jnúhun ya ún, te jeē siquí un cúu jeē íne rí vecāa. Te na cácan tahu rō jeē coo téyí ni rī cahān rī jnúhun ya, nájnūhun cánuú cahān rī.

Saludo jeē sándihí

²¹ Tíquico cúu ñn hermano jeē maní yō jíin, te cúu de tēe squícu vāha chindéé ñájnañan jíin rí nuū jníñu máá Jítóho

yō. Te máá de castūhún ndihi ndese cuahān jniñu rí te ndese iyó rí. ²² Jeē yūcuan ní tají rí de cuajeē de nuū rō, návaha cachi de ndese cáhiyo rí, te coo ndeyí ni rō jijnáhan ró sáha de.

²³ Te ñúhun ni rī jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siī ni tāca rohó jéē cácuu hermano, te coo maní gā rō jíin yá, te candíje vāha ró. ²⁴ Te ñúhun ni rī jeē na sáha ga yā jeē vāha rohó jijnáhan ró jéē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

1 Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyūcú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tée cándiso jníñu cándito róhó, jíin núu tēe cájejníñu mēñu ró. ² Te cáñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha róhó, te sáha ya jeē coo ndeyí coo sīi ni rō.

Jeē jicán tahu Pablo jehē ñáyuu cácandíje

³ Tāca jínu jeē núcūhun ni rī rohó jíjnáhan ró, te nácuatáhú rí nuū Yaā Dios. ⁴ Te náa jicán tahu rī, te níni cúsiñi ni rī jicán tahu rī jehē rō. ⁵ Chi ni chindéé ñájnáhan ró jíin rí jeē scáca yó jnúhun váha ya, nde quivī ní cacandíje ró te nde vijna. ⁶ Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quivī ndíji Jesucristo, te sínu ndíhi ya. ⁷ Te íyó váha jeē súcuan jéni ni rī siquī tāca róhó, chi yōhyo manī rī jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tée cújéñu, cahān rī jehē jnúhun jeē jnáma ya yohó jéē jnúhun ndaā cúu. ⁸ Chi Yaā Dios jíni

yā ndese yōhyo manī rī jíin ró jíjnáhan ró, nájnūhun yōhyo manī Jesucristo jíin yó. ⁹ Te jicán tahu rī jeē na cáa ga jeē cundáhú ni rō jnáhan ró, jíin jéē na jécūhun ga ni rō te cundíchí ró jíin táca jnúhun ya. ¹⁰ Te súcuan te cuu nacāji ró táca jéē váha condiquīn rō, te caca ndaā rō, te ma cóo ni ññ cuēchi siquī rō quivī ndíji Cristo. ¹¹ Te súcuan te cayā cuehē jniñu váha jeē sáha Jesucristo jíin ró. Te sáha jeē coo yíñúhún ñáyuu jíin Yaā Dios te cahān i jeē yóhyo luu cújéñu ya.

Jnúhun jeē técu nduú yó jíin Cristo

¹² Hermano, cúni rī jeē na cúcáñu ni rō jíjnáhan ró ndese ni sáha jnúndóho ni ndoho ri. Chi ni sáha jeē ni jítē núu ga jnúhun jeē jnáma ya yohó. ¹³ Chi tācá soldado cáyūcú ini palacio, jíin táca gá ñayuu, cájini i jeē íne ri vecāa jeē siquī Cristo. ¹⁴ Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cácandíje nuū Jítoho yō. Te cáhīyo téyí gá ni de nácani de jnúhun ya, te tu ndé ndínuu ni de.

¹⁵ Te ndaā chí sava tēe cánacani de jnúhun Cristo siquī jeē cuesún ni de jíin jéē nduxí de. Te sava ga de chí sa suhva cánacani de jnúhun ya siquī jeē váha ni de. ¹⁶ Sava de cánacani jnúhun Cristo siquī jeē nducú de jeē váha máa-ni de, te tú ndije de, chí cácuni de jeē nihín gā rī jnúndóho jeē íne ri vecāa. ¹⁷ Te sava ga de chí cánacani de jnúhun siquī

jeē cundáhú ni de ruhū, chi cájini de jeē íne ri vecāa siquī jeē cahán rī jehē jnúhun jeē jnáma ya yohó. ¹⁸ Tú na vé sáha núu súcuan, chi tãcá-ni modo cascuíté núu de jnúhun Cristo, vēsú núu ndije de chí tuú. Te yáha cúu jeē cúsī ni rī sáha.

Te suni cusī̄ gā ni rī, ¹⁹ chi jíní rī jeē tãca jéē yáha sáha jeē váha ga coo jíin rí, chi cájicān tahú rō jehē rī, te Espírítu Jesucristo chíndéē ñáhán yá ruhū. ²⁰ Chi ñúhun ni rī te cúu ndasí ni rī jeē ma sáha ri ni ñin jeē sáha jeē cucanu ri nuū yā. Chi sa suhva coo téyí ni rī cahán rī jnúhun ya, návāha ndujéhnú ga Cristo sáha máá rí vijna, nájñuhun je ni sáha ri ní véji ri, te vēsú na cótecu rī chí vēsú na cúu rī. ²¹ Chi jeē técu rī cúu jeē nduú rí jíin Cristo, te jeē cúu rī cúu jeē vihyá gā vāha coo jíin rí. ²² Te núu cotecu gā rī, te cuu scáca ga rī jniñu máá Jítóho yō. Núu súcuan te tu cúcáhnú ni rī ndé ñin cúu jeē váha ga, núu jeē cótecu rī chí jéē cúu rī. ²³ Chi mēhñú ndindúú jnúhun yáha íne ñihin ri. Chi ñin cúu jeē cuní rī quihīn rī condee rī jíin Cristo, chi yūcuan cúu jeē vihyá gā vāha coo jíin rí. ²⁴ Te suni cánuú gá jeē cótecu gā rī jeē siquí rohó jíjnáhan ró. ²⁵ Núu súcuan te íyó ndáá ni rī jeē quéndōo ri condee gā rī jíin ró, návāha stéén gā rī nuū rō ndese caca vāha ga rō jíin yá, te cusī̄ gā ni rō jíin jnúhun cácandíje ró. ²⁶ Núu súcuan te condee tucu ri jíin ró, te cusī̄ teyí ni rō jeē siquí ruhū, sáha

máá Cristo Jesús.

²⁷ Te máá ñin-ni jeē condihvī ni rō caca ndaā rō, nájñuhun cánuú caca ró siquí jeē cácandíje ró jnúhun Cristo. Yūcuán na te vēsú na jínú rī coto jnáhan yó, chí condee jicá rí, te nihīn rī jnúhun ro jéē cáhīn ñihin ró jíin jnúhun ya, te cáhīyo inuú ni rō, te inuú-ni cánducú ndeyí ró siquí jnúhun jeē cácandíje yó jéē jnáma ya yohó. ²⁸ Te ma yūhú cuiti rō sáha jeē cájito uhū rohó. Chi jeē jító uhū i rōhó, yūcuan stéén jeē jnahnú ndetū i, te suni stéén jeē cācu ánuá máá ró jíjnáhan ró sáha Yaā Dios. ²⁹ Chi ni jēhe Cristo uū jeē váha nuū rō: nasūu máá ñin-ni jeē candíje ró yá, chi suni jeē na ndóho ró jéē siquí yā. ³⁰ Chi máá rí jíin rōhó jíjnáhan ró, nájñuhun jeē cájejnáhan yó jíin tãca jéē neé. Chi ni cajito ró jéē súcuan ni sáha máá rí, te cánihīn rō jnúhun jeē sáha ga rī nde vijna.

Jeē ni sáha suchí yá maá yá te ni ndujéhnú ya

2

¹ Núu súcuan te sáha Cristo jeē cáhīyo ndeyí ni rō, jíin jéē cúsī ni rō siquí jeē váha ni yā jíin ró. Te ndéé Espírítu yā jíin ró, te manī rō jíin jnáhan ró, te cájito ndáhú ró i. ² Núu súcuan te na cócu ga rō jíin tãca jnúhun yáha, návāha cusī̄ teyí ni rī. Te inuú-ni na cóo ni rō, te coyūcu mánī rō, te inuú na cóo ánuá rō, te inuú caní ni rō. ³ Te ni ñin jniñu ma sáha ró jéē nducú ró jeē

váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jnáhan ró vēsú maá ró. ⁴ Te ma cóndihvī ni rō maá-ni jniñu jeē quéndōo váha máá-ni ró, chi suni na cóndihvī ni rō jniñu jeē quéndōo váha jnáhan ró.

⁵ Te na cáni ni rō jijnáhan ró nájnūhun ni jeni ni Cristo Jesús. ⁶ Chi máá yá cujéhnū inuú yá jín Yaā Dios, te vēsú súcuan te tu ní jéni ni yā jeē cujéhnū inuú yá jín Yaā Dios. ⁷ Chi ni siaá yā jeē cujéhnū ya, te ni nduu ya nájnūhun índāa mozo, te ni cacu ya ni nduu ya tēe. ⁸ Te ná ni nduu inuú yá jín tée, te ni sáha suchí yá maá yá. Te ni jendije ya nde jín jnúhun jeē cúu yā, te nde jín jnúhun canu jeē cúu yā jicā cruz. ⁹ Jeē yúcuan ní sáha Yaā Dios jeē yóhō ni ndujéhnū luu ya, te síhvī yá cujéhnū ndasí gá nuū tāca gá síhvī. ¹⁰ Te tāca jēe cáhīn andiví jín ñáyiví jín chíji ñayiví, núu na cúni i síhvī Jesús te jecuiñī yití i. ¹¹ Te cahān ndaā ndivii i jeē Jesucristo cúu máá Jítóho. Te súcuan stéén i jeē yóhō cújéhnū máá Tátá yā Yaā Dios.

Ñayuu cácandije cúu i nájnūhun quimi jeē ndíndēe

¹² Núu súcuan hermano jijnáhan ró, nájnūhun níni ní cajendije ró jnúhun ni cahān rī ná ni condee rī jín ró, suni súcuan víhyá gā cuandije ró vijna jeē ndeé jicá rí jín ró. Te condihvī ni rō jeē caca ndaā rō jín jnúhun ní jnama

ya rohó, te caca yíñuhún ró conso iyo ró núu yā. ¹³ Chi Yaā Dios jicu ya jín ró jeē cúu ni rō sáha ró jniñu váha, te chíndēe ñáhán yá rohó jēe squicu ró jniñu nújnahan ni yā.

¹⁴ Ndihi jeē sáha ró, ma cahán sōo ró, ni ma tejnáhan ró, ¹⁵ návāha cuu ró séhe Yaā Dios jeē tú na cuēchi coo siquī rō te coo ndaā rō. Te caca ndoo ró méhñu ñáyuu nīhni ni jeē casáha néé. Chi mēhñu ñáyuu un stéén rō jniñu váha ró, te súcuan cácuu ró nájnūhun quimi jeē ndíndēe núu néé ñayiví. ¹⁶ Te stéén rō jnūhun ya nuū i jeē cótecu i ñí cáni sáha. Te súcuan te cusī teyí ni rī quiví ndíji Cristo, chí cuni rī jeē tu ní jica cāhá rí, ni tu ní sájniñu cāhá rí. ¹⁷ Te vēsú na cúu rī jeē socō rī maá rí nuū yā jeē siquí rohó, te yúcuan cúu jeē nducú rí scandije ga rī rohó, návāha socō rō maá ró sáha ró jniñu váha jeē cácandije ró yá. Jeē yúcuan cúsi ni rī, te cúni rī jeē suni cusī ni rō jín rí jijnáhan ró. ¹⁸ Núu súcuan te na cúsi ni maá ró jín rí, te inuú na cúsi ni yō jijnáhan yó.

Jnūhun Timoteo jín Epafrodito

¹⁹ Te ñúhun ni rī jeē cuáha máá Jítóho yō Jesús jnūhun jeē tají yáchī rī Timoteo jeē de nuū rō, návāha ndusi ni rī núu na níhín rī jnūhun ndese cáhīyo ró. ²⁰ Chi tuá na inga tēe iyó yáha jēe inuú jéni ni jín rí, nájnūhun máá de jeē ndihví ndije ni de jehē rō. ²¹ Chi tāca de cánducú de jeē cúu máá de,

te nasūu jēē cuní Cristo Jesús.
 22 Te je cájini rō jeē tēe vāha
 cúu Timoteo. Chi nájñuhun
 sēhe jíin tátá, súcuan ni jejníñu
 de jeē nácani de jñuhun vāha
 ya jíin rí. 23 Núu súcuan te
 ñuhun ni rī tají rí de jeē de
 nuū rō, te núu je ni cucáñnu
 ni rī ndese coo jíin rí. 24 Te
 jéni ndije ni rī jeē cuāha Jitoho
 yō jñuhun jeē suni máá rí jinū
 yachī rī nuū rō jijnáhan rō.

25 Te suni jéni ni rī jeē cánuú
 tají rí hermano yō Epafrodito
 jeē de, chi tēe sájñiñu jíin
 rí siquī jñuhun ya cúu de te
 chindéé ñájñáhan de jíin rí.
 Chi máá ró ni catají ró de jeē
 cuajñiñu de nuū rī tāca jēē
 cúmanī nuū rī. 26 Chi yōhyo
 cúu ni de ndacoto tucu de nuū
 rō jijnáhan rō. Te ni cucuíhyá
 ndasí ni de, chi ni canihīn
 rō jñuhun jeē ní cocuhū de.
 27 Chi jendaá ni cocuhū de,
 te je yajni cuu de núú. Te
 Yaā Dios ni cundáhú ni yā de,
 te nasūu máññuhún-ni de, chi
 suni ruhū, návāha tú caa ga
 cucuíhyá ni rī jehē de núú.
 28 Jeē yúcuan cúu jeē ndihví gā
 ni rī tají rí de nuū rō, návāha
 ndusī ni rō jeē ndácoto tucu
 ró núu de. Te suni ruhū ma
 cucuíhyá ndasí gā ni rī. 29 Núu
 súcuan te na cúsiñ ni rō jeē
 nájñiñu de nuū rō, chi cúu de
 hermano yō jeē candíje de
 máá Jitoho yō. Te coo yíññuhún
 ró jíin táca tēe índāa nájñuhun
 cáa de. 30 Chi jeē siquí jñiñu
 Cristo cúu jeē jé yajni cuu de
 núú. Chi ni chundeyí ni de
 jeē cúu de siquī jeē chindéé
 ñáhán de ruhū jíin jñiñu jeē
 tu ní iyo modo sáha máá ró

jijnáhan rō.

*Jñuhun jeē cáca ndaā vāha
 yó*

3

1 Te vijna, hermano ji-
 jnáhan rō, na cúsiñ ni rō jíin
 máá Jitoho yō. Ruhū chi
 tu jnánini ni rī jeē tēe tucu
 rí jñuhun yáha núu rō, chi
 cuajñiñu jeē quéndōo vāha
 ga rō. 2 Condito ró máá ró
 nuū tēe cásáha jñiñu néé,
 jeē cándāa ná cándāa ina.
 Chi cánducú de stújí de róhó
 jēē casáha de circuncidar,
 te tu cásáha de jñiñu ndaā.
 3 Te máá yó cácuu ñayuu ni
 cuu circuncidar ndije, chi
 cáchiññuhún yó nuū Yaā Dios
 nde jíin ini jíin ánuá yō, te
 cácusī ni yō jeē yihí yó ndaha
 Cristo Jesús, te tu tēnuū yō jeē
 quéndōo ndaā yō jíin jñiñu
 jeē sáha máá-ni yó. 4 Núu jeē
 súcuan cúu te ruhū chi suni
 cuu tenuū rī jñiñu jeē sáha
 máá-ni ri nuú. Chi núu ndé
 tēe jéni ni de jeē cuu tenuū
 de máá de, te ruhū chi víhyá
 gā cuu tenuū rī maá rí. 5 Chi
 ni casáha circuncidar ruhū
 nuū uná quiñví ná ni cacu rí.
 Te yucūn Israel cúu rí, te suni
 jnáhan yucūn Benjamín, te ññ
 hebreo sēhe hebreo cúu rí.
 Te suni ni cuu rí tēe grupo
 fariseo jeē ni squícu rí tāca
 ley jnáhan ñuu rī hebreo. 6 Te
 ni jito xeēn rī ñayuu cá candíje,
 chi yōhyo ni condihví ni rī jeē
 ma sáma i modo ley jenahán.
 Te ni ññ tu ní cúu cahān jeē tu
 squícu rí ley un, chi ni squícu
 vāha rí. 7 Te tāca jēē ní tenuū
 rī un, chi sáha rí cuenta jeē tu

ndé níhín jníñu cuiti, chi vijna te ni candíje ri Cristo. ⁸ Te suni chíhi ri cuenta jeē vāha ga na náā ndíhi jeē ní tenuū rī ún, chi vāha ndasí gá cúu jeē ni quívi ri ndaha máá Jítoho rī Cristo Jesús. Te jeē siquí maá yá te ni siaá rī ndíhi ún, te sáha ri cuenta jeē nájnūhun yācá-ni cúu. Chi ni quívi ri ndaha Cristo, ⁹ te ndúú yá jín rí. Te tuá nducú rí quendō ndaā rī jeē jín ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndō ndaā yā ñayuu cácdíje. ¹⁰ Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jín rí. Te cúní rī ndoho ri jín yá, te nde jinū rī ndoho ri nájnūhun ni ndoho máá yá jeē ni jíhi yā. ¹¹ Chi yōhyo ñūhun ni rī natecu rī nájnūhun ni natecu yā.

Jeē nducú ndéyí Pablo sínu de carrera de

¹² Te ná tu nihīn rī ndíhi jeē ni cáhān rī ún, ni ná tu ije ri jín. Te ndúcú ndéyí rí siquí ún, chi ñūhun ni rī jeē níhín rī tācá un, chi jeē yúcuan cúu jeē ni níhín Cristo Jesús ruhū xīhna gā. ¹³ Hermano jijnáhan ró, tu sáha ri cuenta jeē jé ni nihīn rī ndíhi ún. Te iyó ñn jeē sáha ri, cúu jeē squéndō ri tāca jéé ní cuu ichi yátá, te ndúcú ndéyí rí nihīn rī tāca jéé iyó ichi núú. ¹⁴ Chi cúu un nájnūhun jeē jínu ri ñn carrera cuahān rī nde jinū rī andívi, te nihīn rī premio jeē cuáha Yaā Dios. Chi ni cana ya yohó

jeē quihín yō nuū yā andívi siquí jeē yíhi yó ndaha Cristo Jesús.

¹⁵ Te tāca yó jeē jé ni ije vāha yó jín jnúhun cándíje yó, súcuan na cáni ni yō. Te núu ndé ñn ró sñn jéni ni rō, te Yaā Dios suni stéén yā nuū rō jeē násūu súcuan cúu. ¹⁶ Te jíní ñūhún cani ni yō te caca yó modo jeē quijnáhan jín jéé jé ni nihīn yō.

¹⁷ Hermano, na ndácu ró rúhū jijnáhan ró. Te condēhe váha ró ndese cájica ñayuu ndaā, chi cájica i nájnūhun ni castéén rī nuū rō. ¹⁸ Te je ni cuu tijní jínu ni cahān rī jín ró, te nde ndahyú rī cahán tucu ri vijna, jeē iyó cuéhē ñayuu cájica i ñn modo jeē steén jeē jito uhū i jnūhun jeē ni jíhi Cristo jicā cruz. ¹⁹ Te ñn quívi te jnahnū ndetū ñayuu ún. Chi máni jeē cáji vāha i cúu jeē cáchiñūhún i. Te sátéyí i máá i jín jniñu néé jeē jéhe jnūhun canu. Te máni máá jéé iyó ini ñayívi cúu jeē ndíhvi ni i. ²⁰ Te máá yó chi ñayuu coyūcú andívi cúu yó, te cándetu yó jéé nde yūcuán ndiji Jítoho yō Jesucristo, Yaā jnáma yohó. ²¹ Te máá yá nasama ya yiqui cúñu ndahú yó, návāha nduu yó nájnūhun cáa máá yá jeē lúu cújéhnu ya. Te súcuan sáha ya jín poder yā jeē cújéhnu ya siquí ndíhi-ni.

Níní na cúsh ni yō jín Jítoho yō

4

¹ Núu súcuan hermano jijnáhan ró, cuiñi nihīn ró jín

jnūhun máá Jítóho yō. Chi yōhyo manī rī jín ró, te cúní rī jeē coto jnáhan yó, te cúsī ni rī jín ró, te nájñūhun premio rī cácuu ró.

² Te cáhán ndahú rí jín róhó Evodia jín Síntique jeē inuú na cóo ni rō, chi cácuu ró hermana jeē cácandije ró máá Jítóho yō. ³ Te suni cáhán ndahú rí jín róhó, tée jeē ní chindéé ñáhnáhan vāha jín rí, jeē na chindéé ñáhán ró hermana un, chi ni casájñiñu nīhin ña jín rí siquī jnūhun jeē jnáma ya yohó. Te suni súcuu ni sáha Clemente jín sava ga ñayuu ni sájñiñu jín rí. Te ni jecosō sihvī i nuū libro jeē yosó síhvī ñayuu cotecu ní cáni.

⁴ Te níní na cúsī ni rō jinnáhan ró jín máá Jítóho yō. Te inga jínu cáhán rī jeē na cúsī ni rō. ⁵ Sáha vāha ró jín táca ñáyuu, návāha cuni i jeē súcuu vāha ni rō. Chi máá Jítóho yō, yajni-ni cúu ya jín ró.

⁶ Ma nácani ndasí ni rō siquī ni ñn. Chi sa cahān rō jín Yaā Dios siquī táca jéé nácani ni rō. Chi cacān tahú rō, te cahān ndahú ró, te suni nacuatáhú ró nuū yā. ⁷ Yūcuán na te sáha Yaā Dios jeē cóo ndeyí coo sī ndasí ni rō, te súcuu coo jín ró nde cūhva jeē ma jécūhun ni rō ndese cúu jeē sáha ya ún. Te condito vāha ya anuá rō jín jéé níjnūní rō, coo cuehē jnūhun ndeyí jnūhun sī ni jín ró, siquī jeē yñi ró ndaha Cristo Jesús.

Jeē na cáni ni yō siquī táca jéé vāha

⁸ Te ñn na jnūhun íyó, hermano jinnáhan ró. Na cáni ni rō siquī táca jéé iyó ndáa, jín jéé sáha yñūhún, jín táca jñiñu sáha vāha, jín jñiñu íyó ndoo, jín táca jéé iyó mání ni, jín jéé lúu sáha. Te máni na núcūhun ni rō táca jéé vāha jeē sáha jeē nácuatáhú ró nuū yā.

⁹ Táca jéé ni stéén rī nuū rō, jeē ní cacutūhva ró núu rī, jín jéé ní cajini ró ní cahān rī, jín jéé ní cajito ró ni sáha ri, táca yúcuu suni na sáha máá ró. Yūcuán na te máá Yaā jeē jéhe jnūhun ndeyí sī ni, coo ya jín ró.

Jeē ní casocō ñayuu Filipos nuū Pablo

¹⁰ Te yōhyo cúsī ni rī sáha máá Jítóho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéé ní naa ni rō sáha ró súcuu, chi siquī jeē tu ní íyo modo. ¹¹ Te nasūu jéé cahān rī siquī jeē ndóho ndáhú rí, chi je ni cutūhva ri cusī ni rī jín jéé névāha ri. ¹² Jíní rī cotecu ndahú rí, te jíní rī cotecu cucá rí. Chi ni cān ri jín táca-ni, núu jeē ndutú chíji ri chí jéé ndóho ri sōco, núu jeē cónevāha cuehē rī chí jéé cúmaní nuū rī. ¹³ Ndihi-ni cúu sáha ri, chi máá Cristo jéhe ya fuerza ini rī. ¹⁴ Te vésú súcuu te vāha ni casáha ró jéé ní chindéé ñáhán ró ruhū jín jnúndóho jeē ndóho ri.

¹⁵ Te róhó ñáyuu ñuu Filipos, je cájini rō ndese ni cuu. Chi nde quivī ní quejéé rí nácani ri jnūhun jeē jnáma ya yohó, ná ni quenda ri Macedonia vēji ri,

te ni casocō rō xūhun nūū rī siquī jeē ní canihīn rō jnūhun ya ni nacani rī. Te ni ñn grupo ñayuu cá candíje tu ní sáha súcuan, chi máá-ni róhó jíjnáhan ró. ¹⁶ Te ná íne rī ñuu Tesalónica, te ni catají ró jecu jeē jíni ñúhún rí, ní jinū ñn uū jínu. ¹⁷ Te nasūu jeē nducú rí jeē cuáha ró nūū rī, chi sa ndúcú rí jeē na cáyá gā jniñu váha ró, návāha cayā tahū rō nuū Yaā Dios. ¹⁸ Chi je ni nihīn rī ndihí jeē jíni ñúhún rí, te ndóo ga. Te íyó cuéhē nuū rī, chi ni nihīn rī jeē ní catají ró vēji jíin Epafrodito. Te jeē ní catají ró cúu nájnūhun ñn ofrenda jeē asín jeén, ni casocō rō nuū Yaā Dios, te cúshī ni yā jíin. ¹⁹ Te Yaā Dios chi cuáha ya nuū rō tāca jéē cúmanī nuū rō, chi cúcá ndasí yá jíin tāca jéē váha jeē lúu íyó nūū Cristo Jesús. ²⁰ Te na cáhán yō jeē yóhyo luu cújéhnū Tátá yō Yaā Dios ní cáni. Amén.

Saludo jeē sándihí

²¹ Cachí rō nuū tāca ñayuu maá yá jeē sándeýí ní i, áchí rí, chi cá candíje í Jesucristo. Te hermano yō cáyūcu jíin rí yáha, cácahān de jeē sándeýí ní rō jíjnáhan ró. ²² Te tāca ñayuu maá yá jeē cáhīyo yáha, suni cácahān í jeē sándeýí ní rō. Te ñayuu cáyūcú vehe rey cújéhnū ñuu Roma yáha, máá í cácahān gā súcuan.

²³ Te ñúhun ní rī jeē maá Jítóho yō Jesucristo, na sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

1 Máá rí cúu Pablo, apóstol Jesucristo, chi súcuan ni nujnahan ni Yaā Dios ni taji yá ruhū. Te jíin hermano yō Timoteo ² cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cávandíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha rōhó, te sáha ya jeē coo ndeyí coo siī ni rō.

Jeē jicán tahú Pablo jehē ñáyuu cávandíje

3 Te jeē cájicān tahú rī nuū Yaā Dios, Yaā cúu Tatá maá Jítóho yō Jesucristo, te níni cánacuatahú rí nuū yā jeē siquí rohó jíjnáhan ró. ⁴ Chi ni cajini jñuhun ri ndese vāha cávandíje ró Cristo Jesús, jíin ndese cávandíje ní rō táca ñáyuu maá yá. ⁵ Chi cáñuhun ni rō nihīn rō jeē ñúhun vāha nde andiví cuu ró. Chi ná ni cajini ró jñuhun ndaā jeē jnama ya rohó, te ni caquejéé ró ñúhun ni rō. ⁶ Te jñuhun un jéē ní canacani nuū rō, chi ndúcuehē cuahān te níhín jñíñu ní cáhnu ñayíví. Te suni súcuan ni sáha jíin rōhó jíjnáhan ró ndé quiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíin ró. ⁷ Te jñuhun un cúu jeē ni stéén Epafras

nuū rō, tēe sájniñu jíin rí jeē maní rī jíin. Chi cúu de tēe jéjñíñu squícu vāha nuū Cristo jeē ndíto de rōhó. ⁸ Te maá de ni castūhun núu rī siquí rohó, ndese cávandíje ní rō jnáhan ró sáha maá yá.

⁹ Jeē yúcuān suni tu cájecuñí rī jeē cájicān tahú rī jehē rō, nde quiví ni níhín rī jñuhun ún te nde vijna. Te cájicān rī nuū yā jeē na jécūhun vāha ni rō te coo ndíhí ró jíin jñuhun ya, sáha maá Espíritu, návāha cuni rō ndíhi ndese nújnahan ni maá yá. ¹⁰ Te cájicān rī jeē caca ndaā rō nájnūhun cánuú caca ró jéē cácuu ró ñáyuu maá Jítóho yō. Te súcuan te sáha ró ndíhi jeē nújnahan ni yā, te níhín jñíñu ró jíin táca jñíñu vāha, te jecūhun ga ni rō ndese Yaā cúu Yaā Dios. ¹¹ Te cájicān rī jeē cuáha ya fuerza ini rō, nájnūhun iyó fuerza maá yá jeē cujéhnu luu ya. Te súcuan te cuu cuandeyí ni rō jíin táca-ni jñúndóho, te cusí teyí ni rō. ¹² Te cuu nacuatáhu ró nuū Tatá yō, chi maá yá ni chíhi fuerza yohó jéē ñn cáhnu-ni jíin táca ñáyuu maá yá níhín yō tahū yō. Chi cájica yó jíin luz yā jeē yáhi yó ndaha ya. ¹³ Chi ní jnama ya yohó jéē ni yáhi yó ndaha maá jéē jñí poder nuū néē, te ni squívi ya yohó ndaha Séhe ya jeē maní yā jíin, ndácu ya jñíñu nuū yō. ¹⁴ Chi Séhe ya un ní jnama ya yohó jéē ní jíhí yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní

ndīvi yó núū jnúhun manī Yaā Dios jīn yó

15 Yaā Dios jeē tu cúu coto yó, ni sáha ya jeē ní quiji Sēhe ya, te súcuan ni jito yó máá yá. Te Sēhe ya ún, je iyó yá nde ná tu jecōo tāca jéē iyó. 16 Chi jīn Sēhe ya ni sáha Yaā Dios ndihī jeē ni jécōo, ndihī jeē iyó andiví jīn jéē iyó ñayīví, jeē jiní yō nuū jīn jéē tu jiní yō nuū. Te suni ni sáha ya tācá ndajéhé jeē cándacu jniñu, jīn jéē cándiso jniñu, jīn jéē cácujuhnu, jīn jéē cájni poder. Jīn Cristo ni sáha Yaā Dios jeē ni jécōo ndihī, te jeē cúu Cristo cúu. 17 Te je iyó Cristo nde ná tu coo ndihī jeē iyó. Te ndaha máá yá yhi vāha ndihī-ni. 18 Te máá yá cújéhnu nuū ñáyuu cácdíje, nájñuhun cújéhnu xinī nuū yiqui cúñu, chi nájñuhun yiqui cúñu yā cácuu i, cúu jeē in na cúu i jīn yá. Te máá yá sáha jeē cotecu i ní cáni, te xīhna gā máá yá ni natecu mēñu ndíyí, návāha cujéhnu ya nuū tācá-ni. 19 Chi ni cusī ni Yaā Dios jeē ndihī ndese cúu máá yá, suni súcuan cúu Cristo. 20 Te siquī jeē ni jīhī Cristo, te ni cusī ni Yaā Dios sáha ya jeē ndívicoo tācá-ni nuū jnúhun manī yā jīn, tāca jéē yúcu ñayīví jīn jéē yúcu andiví. Chi jīn jéē ni jīhī Cristo jicā cruz, te ni sáha Yaā Dios jeē ndívicoo tācá-ni nuū jnúhun manī yā jīn.

21 Te máá ró jijnáhan ró, chi sīn siquī ni cahīn ró ndé saá, te ni cajito uhū rō yā ini anuá rō, chi máni jniñu

néé ní casáha ró. Te vijna chi je ni sáha Yaā Dios jeē ní ndívicoo ró núū jnúhun manī yā jīn ró. 22 Súcuan ni sáha ya siquī jeē ni sócō Cristo maá yá ni jihī yā, návāha coo ndoo coo i rō cuiñi ró núū yā, te ma cóo jnéhén ró, te tú na cuēchi coo siquī rō. 23 Te súcuan sáha ya núu cuiñi nihin ró jéē candíje vāha ró, te núu quendōo nihin ró jīn jnúhun vāha jeē cáñuhun ni rō jeē jnáma ya rohó, te ma siaá cuiti rō. Chi jnúhun un ní cajini ró, te ni jite núu ní cáhnu ñayīví. Te ruhū Pablo suni jéjniñu ri jeē nácani ri jnúhun ún.

Jeē jéjniñu Pablo siquī ñáyuu cácdíje

24 Te vijna te cúsi ni rī jeē ndóho ri jehē rō jijnáhan ró. Chi jīn yiqui cúñu rī ndóho ri jeē cúmanī gā ndoho ri jīn Cristo jehē ñáyuu cácdíje, suu ñáyuu cúu nájñuhun yiqui cúñu yā. 25 Te cúu ri tē jéjniñu siquī ñáyuu cácdíje, chi súcuan ni tejniñu Yaā Dios ruhū, návāha nacani ndihī ri jnúhun ya nuū rō te quendōo vāha ró. 26 Te nácani ri jnúhun ya jeē ní yisāhí, jeē tu ní cájini ñáyuu nde jenahán ndasí te nde ní cáni vēji. Te vijna te je ni steén cají yá jnúhun un núu ñáyuu máá yá. 27 Chi ni cusī ni yā jeē steén yā nuū i ndese cúcúca ndasí i jīn ndihī jeē ndíso jnúhun sāhi yáha jéē lúu cújéhnu, te cuitē núu quihīn nuū tācá nación jeē tu jiní. Te jnúhun sāhi yáha cúu jeē ndeé Cristo ini anuá rō, ndúu yá

jíin ró, te jeē yúcuān cáñuhun ni rō tāca jeē lúu jéhnú jeē coo.

²⁸ Te jnūhun Cristo un cúu jeē cánacani rī, te cástíhvī ni rī tāca ñáyuu, te cástéén rī jnūhun ya návāha jecūhun vāha ni i. Te súcuān te ije vāha ni ndivīi i jeē yíhi i ndaha Cristo Jesús. ²⁹ Te siquī yúcuān cúu jeē sájniñu rī, chi ndíhvī ni rī nácani rī jnūhun jíin táca fuerza Cristo jeē chindéé ñájnáhan ya jíin rī.

2

¹ Chi cúní rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñayuu ñuu Laodicea, jíin ndé tāca ñáyuu jeē tu ní cájini cuiñi nuū rī. ² Chi cúní rī jeē coo ndeyí ni anuá i, te inuú-ni coyūcu mánī i, te jecūhun ndíhi ni i ndese yōhyo cúcá i jíin jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnūhun Yaā Dios jeē ni yísāhí un. ³ Te ini Cristo yísāhí tāca jnúhun jeē cucúcá ró jíin, suu jnūhun ndíchí jíin jnúhun jécūhun ni. ⁴ Te jnūhun yáha cáhán rī jíin ró jijnáhan ró, návāha ma stahú ni ñn i rōhó jíin táca jnúhun stáhú jéé lúu cáhán. ⁵ Chi vēsú ndeé jíicá rí jíin ró, te ñūhun ni rī rōhó, te cúsiñi ni rī jeē jiní rī ndese cájica ndaā rō te cácandíje nīhin ró Cristo.

⁶ Núu súcuān te nájnūhun ni cajetáhú ró jeē Jítóho rō cúu Jesucristo, suni súcuān na cáca ndaā rō jíin yá. ⁷ Te na jnā vāha jnūhun ya ini rō, te na ije vāha ró jíin jnúhun cácandíje ró yá, nájnūhun je ni

cajini rō. Te níní nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ñn ñayuu rōhó jíin jnúhun ndíchí jéé tu jéjniñu, jíin jnúhun ndúxí stáhú. Chi tu cácandíje i jnūhun Cristo, chi sa cácandíje i tāca jeē tajnúni ñayuu, modo jeē castéén ini ñayivī yáha.

⁹ Chi ndíhi ndese cúu máá Yaā Dios, suni súcuān cúu Cristo. ¹⁰ Te ndíhi ndese cúu Cristo, suni súcuān ró jíin náhan ró, chi cáyihí ró ndaha ya. Te máá yá cújéhnú nuū tāca jeē cújéhnú jíin jéé ndíso jniñu andivī. ¹¹ Te siquī jeē cáyihí ró ndaha ya, suu cúu jeē nájnūhun ni cuu ró circuncidar. Te jeē súcuān ni sáha ya circuncidar rōhó, chi nasūú ñn jnunī jeē yíhi yiqui cúñu rō cúu, chi sa suhva jeē ní sándoo ya tāca cuéchi ni casáha ró jíin modo neé máá ró. Chi súcuān cúu jeē sáha Cristo circuncidar rōhó. ¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jéé jíin poder Yaā Dios ni nastécu yā Cristo mēhñu ndíyí. ¹³ Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuéchi ró. ¹⁴ Te nájnūhun jeē iyó ñn acta jeē jicán cuéchi siquī yō jeē ni stívi yó ley yā. Te ni ndahva yā

acta un, chi ni chunaa Cristo cuēchi yó jéē ni jīhī yā jicā cruz. ¹⁵ Chi ná ni jihī yā jicā cruz, te ni quende yā ndihi poder tāca jéneé jéē cácujuhnu jíin jéē cájni poder. Te ni quende yā jeē tuá cujéhu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

¹⁶ Núu súcuan te ma cuatáhú ró núu cácahān ñayuu cuēchi siquī rō, siquī ñin jeē yéji rō chí síquī ñin jeē jíhi ró, chí jéē tu nées ñi rō quiví víco jíin quiví núcosō yoō jíin quiví ndétátú. ¹⁷ Chi tāca ley siquī un ní jejníñu máá ndé ná tu quiji Cristo. Te vijna te ni quiji ya te tuá jíni ñúhún táca ún. ¹⁸ Ma cuáha ro jnúhun jeē cásí ni ñin ñayuu jeē nihín rō tahū rō, Chi cáchiñúhún i táca ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndáa jnúhun cánacani i, te tuú. Te súcuan cásáha téyí sáá-ni i máá i, chí cájini néé ni i. ¹⁹ Te tu cáhīn i jíin Cristo, Yaā cujéhu nuū ñáyuu cácuu nájnūhun yiqui cúñu yā chí ñin na cúu i jíin yá. Chí máá yá scuéhnu ya i jíin jnúhun ya, te nduu ñnuú ni táca i jeē cáhije i cuahān i, nájnūhun ni jeni ni Yaā Dios.

²⁰ Núu súcuan te nájnūhun jeē je ni cajihī rō jíin Cristo, cúu jeē ní casiáá rō tāca jéē tajnúni jeē castéén ini ñayiví. Núu súcuan ¿te naun cásáha ga rō nájnūhun cásáha ñayuu ñayiví jéē jéndije ró táca jéē

tajnúni i? ²¹ Chí cácahān i: Ma quehé ró ma cáji rō jeē yáha chí jéē yúcuan, ni ma jñí ró, áchí i. ²² Te máni jeē tajnúni ñayuu jíin costumbre maá i cúu te tu níhín jñíñu jeē quéndōo ndáa ñayuu. ²³ Te ndáa chí cájini ni i jeē jnúhun ndíchí cúu ún, chí sáha jíin i jeē chíñúhún níhín i, jíin jéē sáha suchí i máá i, jíin jéē stóho i yiqui cúñu i. Te tu níhín jñíñu cuiti jeē casi táca jñíñu néé jéē cuní i sáha i.

3

¹ Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndiyi ni sáha cuēchi ró. Te na cóndihvī ni rō siquī tāca jéē iyó andiví núu ndeé Cristo lado váha Yaā Dios nuū cujéhu ya. ² Te na cáni ni rō siquī tāca jéē iyó andiví, nasūu síquī jeē iyó ini ñayiví. ³ Chí nájnūhun je ni cajihī rō jíin Cristo, te vijna chí nájnūhun cátecu rō jíin yá andiví, chí cáyihí ró ini ndaha Yaā Dios. ⁴ Te quiví ndíji Cristo, Yaā sáha jeē cótecu yō ní cáni, yūcuán na te suni quendacoo ndijin maá ró jíin yá, te cujéhu luu ró jíin yá.

Ñayuu jíca jíin modo cuní maá, jíin ñáyuu ní ndujeé

⁵ Núu súcuan te casi rō táca modo cuní maá ró jeē cáhīyo ró ini ñayiví yáha. Chí ma cáca jnéni ró, ma sáha ró jñíñu jnéhén, ma ndíyo ni rō sáha ró táca jñíñu néé, ma cutóo ró, ma ndíyo ni rō ndajníñu. Chí táca ndajníñu jeē ndíyo ni yō cúu nájnūhun ídolo yō jeē

chiñúhún yó. ⁶ Chi síquī tācá jniñu yáha cúu jeē cuāha Yaā Dios castigo xeēn nuū ñayuu nīhni ni nuū yā. ⁷ Te suni jín jniñu yáha ní cajica ró ndé saá, ná ni casáha ró súcuan. ⁸ Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndeváha nuū jnáhan, jín jéē cahán tāca jnúhun tú vāha. ⁹ Ma stahú ró jnáhan ró, chi yūcuan cúu modo maá ró jeē ní cajica ró jín ndé saá, te je ni castóo ró. ¹⁰ Te ni canduu ró ñayuu jeé, cuandacu ró máa Yaā ni sáha róhó, te cuajecūhun vāha ni rō ndese Yaā cúu ya. ¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndihi i nuū yā. Chi Cristo cúu Jitoho ndihi i, te ndéé yá ini anuá ndihi i, ndúú yá jín i.

¹² Chi ni nacāji Yaā Dios rohó jínáhan ró jeē cúu ró ñayuu maá yá jeē maní yā jín. Núu súcuan te níni cundáhú ni rō jnáhan ró, te coo vāha ni rō jín jnáhan ró. Te coo suchí ni rō, te coo vītá ni rō, te coo paciencia ni rō. ¹³ Cuandeyí ni rō jín jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máa ró. ¹⁴ Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni

rō te lje vāha ni rō jín jniñu vāha. ¹⁵ Te jnúhun coyūcu mánī na cúnuú ini anuá rō sáha Yaā Dios. Chi ni cana ya rohó jéē nduu ró in na ñayuu jéē cóyūcu mánī rō. Te níni na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jín táca jnúhun ndíchí yá. Te jín salmo jín himno, yaa i jeē cahán jnúhun ya, na cáta luu ró jéē nácuatáhú ró ini anuá rō nuū Yaā Dios. ¹⁷ Te tācá jniñu sáha ró, núu jeē cahán rō chí jéē sáha ró cúu, ndihi na sáha ró jéē ndujéhnu síhví máa Jitoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cácuandije nuū jnáhan i

¹⁸ Róhó ñahan cácuu ñasihí, cuatáhú ró nuū yí ró, chí súcuan cánuú sáha ró síquī jeē candije ró Jitoho yō. ¹⁹ Te róhó téé cácuu yí, cundáhú ni rō ñasihí ró, te ma cútucu ni rō jín ña. ²⁰ Róhó séhe jínáhan ró, tācá-ni jniñu cuandije ró núu tatá rō nuū naná rō, chí súcuan cúsí ni maá Jitoho yō. ²¹ Te róhó tátá jínáhan ró, ma squítí ni rō séhe ró, návāha ma cucuíhyá ni i. ²² Róhó mozo jínáhan ró, tācá-ni jniñu cuandije ró núu patrón rō ñayívi yáha. Ma sájniñu ndúxí ró jeē maá jéē coto de te cuajnúhún de róhó. Chi na sájniñu ndaā sájniñu ndije ró, te conso iyo ró núu Yaā Dios. ²³ Te tācá jniñu sáha

ró, na cúsi ni rō sáha ró, te na cáni ni rō jeē nuū Jítoho yō cájejniñu ró, nasūu nuū ñáyuu. ²⁴ Chi je cájini rō jeē maá Jítoho yō cuáha ya cuehē tahū cuu ró ní cáni. Chi nuū maá Cristo cájejniñu ró, chí maá yá cúu Jítoho rō. ²⁵ Te ñayuu casáha jniñu néé, chí sa suhva ndutahū i siquī jeē ni sáha i. Chi tu sáha Yaā Dios cuenta ndese cúu in in ñayuu, chí inuú sáha ya jíin i.

4

¹ Róhó patrón jijnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítoho maá ró, Yaā ndeé andiví.

² Te ndivii rō ma jécuiñi rō jeē jicán tahú rō, chí coo ndito ni rō jíin, te nacuatáhú ró núu Yaā Dios. ³ Te suni cacān tahú rō jehē rī jijnáhan rī, jeē na sáha Yaā Dios jeē cóo ga modo nacani rī jnūhun, návāha cuu cahān rī jnūhun Cristo jeē ní yisáhí, jeē tu ní cájini ñayuu jenahán. Te siquī jnūhun un cúu jeē íne rī vecāa. ⁴ Te cacān tahú rō jeē cuu cahān cají rī ndese cánuú cáhān rī.

⁵ Sáha yúcún váha ró jíin ñáyuu tu cacandíje. Ma cúhuun ni rō siquī i, chí condihví ni rō scandíje ró i. ⁶ Te máni cahān váha ró jíin ñáyuu, te cahān rō jnūhun cuajniñu jeē quéndōo váha i sáha. Te cani ni rō ndese váha nastió cuíñi rō jnūhun nuū in in i.

Saludo jeē sándihí

⁷ Tíquico cúu in hermano jeē maní yō jíin, te tēe squícu váha chindéé ñájnáhan jíin rí

cúu de, te jéjniñu de jíin rí nuū maá Jítoho yō. Te maá de castūhún ndihi nuū rō ndese cuahān jniñu rī. ⁸ Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhīyo rī jíin jniñu, te coo ndeyí ni rō sáha de. ⁹ Te suni cuajeē Onésimo jíin de, tēe cúu jnáhan maá ró jijnáhan ró. Te cúu de hermano jeē squícu váha jeē maní yō jíin. Te ndindúú de castūhun núu rō ndese cuahān tēcá jniñu ichi cháha.

¹⁰ Sándeyí ni rō jijnáhan ró, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu rī jniñu nuū rō siquī Marcos, te núu ni jecondēhé de róhó te sáha váha ró jíin de. ¹¹ Te suni súcuan cáhán Jesús, tēe jeē suni nání Justo, jeē sándeyí ni rō. Te maá-ni de cácuu tēe hebreo cacandíje jeē chindéé ñáhán cánacani jnūhun jíin rí siquī ndese ndácu Yaā Dios jniñu. Te yōhoyo ndeyí íyó ni rī casáha de. ¹² Sándeyí ni rō jijnáhan ró, áchí Epafras, tēe cúu jnáhan maá ró, te mozo Cristo cúu de. Te níni jicán tahú ndasí de jehē rō, jeē na cuíñi níhin ró, te ije váha ni rō jeē squícu váha ró ndihi jniñu cúni Yaā Dios. ¹³ Chí cáhán ndaā rī jeē yōhoyo ndihví ni de jehē rō jijnáhan ró, jíin jehē ñáyuu ñuu Laodicea jíin Hierápolis. ¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tēcá hermano ñuu Laodicea jeē

sándeýí ni i, áchí rí. Te suni súcuan cahān rō jíin Ninfas, jíin táca ñáyuu cácadíje cándutútú vehe ña. ¹⁶ Te ná ni jíinu ni cacahu ró carta yáha, te suni tají ró na cáhu ñayuu cácadíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. ¹⁷ Te cachí rō nuū Arquipo jeē na ndúcú ndéýí de squícu de jniñu ní tee Jitoño yō siquí de, áchí rí.

¹⁸ Ruhū Pablo, yāhá-ni cúu jeē téé ri jíin ndaha máá rí, jeē sándeýí ni rō. Te nucūhun ni rō ruhū jeē íne ri vecāa. Te ñúhun ni rī jeē na sáha ga Yaā Díos jeē váha róhó jíjnáhan ró. Súcuan na cóo. Amén.

CARTA ÌN JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō jijnáhan ró.

Ñayuu Tesalónica cúu i ñ ejemplo váha

2 Níní cánacuatahú rí nuū Yaā Dios jeē siquí rohó jíjnáhan ró, te tu náā ni rī cacān tahu rī jehē rō jeē cájicān tahu rī. 3 Te níní ndácunehen ri rohó núū Tatá yō Yaā Dios, jeē váha cásáha ró táca jniñu chi cácanđije ró, jíin jéē váha cájejniñu ró núū yā chi manī rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. 4 Chi manī Yaā Dios jíin ró jíjnáhan ró hermano, te cájini rī jeē ní nacāji ya rohó. 5 Chi ná ni canacani ri jñuhun nuū rō jeē jnáma ya rohó, te nasūu jéē ni cáhān rī súcuan-ni, chi ni nacani ri jíin poder Espíritu Santo, te ni cacucáñnu váha ni rī jeē jñuhun ndaā cúu. Te cájini rō ndese ni casáha váha

ri ná ni coyūcu rí jíin ró, chi ni nducú rí jeē quéndōo váha ró.

6 Te rōhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusī ni rō ni sáha Espíritu Santo, vēsú ni cajito ró cuehē jñundóho siquí ún. 7 Te súcuan cácuu ró ñ ejemplo nuū ndihí ñayuu cácanđije jeē cáyucú región Macedonia jíin Acaya jíñā. 8 Chi jeē siquí rohó jíjnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni ni jité núu jñuhun ndese cácanđije ró Yaā Dios. Te jeē yúcuan tuá jíni ñúhún jeē nácani máá rí jñuhun nuū i. 9 Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quívicoo ró ndaha Yaā Dios, Yaā ndaā Yaā técu, jeē cuajniñu ró núū yā. 10 Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quiji.

Jniñu jeē ni sáha Pablo ñuu Tesalónica

2

1 Chi cájini rō hermano, jeē tu ní jecoo cáhá-ni ri nuū rō. 2 Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsú súcuan te máá Yaā Dios ni chindéé ñáhān yá ruhū, ni sáha ya jeē ni iyo ndeyí ni rī, te ni jecoo ri ñuu rō ni canacani ri jñuhun jeē jnáma ya rohó.

Súcuan ni casáha ri vésú xeēn ni iyo jnūndóho. ³ Te jnūhun ni canacani ri, nasūu jnūhun ni castívi ri cúu, ni nasūu jéē nihín rī siquī rō, ni nasūu jéē ní castáhú rí rohó. ⁴ Chi máá Yaā Dios ni jito ndee yā ruhū, te ni tejniñu ya ruhū jeē nácani ri jnūhun jeē jnáma ya rohó. Te jeē yúcuan cúu jeē cácahān rī. Te tu cácahān rī jnūhun jeē núnjahan ni ñayuu, chi sa jeē núnjahan ni Yaā Dios, chi máá yá jító ndee anuá rī. ⁵ Te cájini rō jeē tu ní cánducú rí cuajnúhún rí rohó ñn modo stahú, ni tu ní cácahān rī jeē cúsi ni rī jín rō návāha nihín rī xūhun ró. Te jíní Yaā Dios jeē súcuan cúu. ⁶ Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vésú súcuan cánuú coo núú, chi apóstol Cristo cácuu ri. ⁷ Chi sa suhva vīta ní cacahān rī jín rō, nájñūhun sáha ñahan ndéca yiquín jéē yucún ndító ña sēhe ña. ⁸ Te siquī jeē cákundáhú ndasí ni rī rohó, jeē yúcuan ní cacondihvi ni rī nacani ri jnūhun vāha Yaā Dios nuū rō. Te nasūu máá yúcuan-ni, chi suni nde vida rī cuāha ri jeē siquí rō nuú, chi yōhyo manī rī jín rō. ⁹ Te cánahan ró hermano, jeē tú ni ñn ró ní stáhān rī jeē cacān rī nuū rō ná ni canacani ri jnūhun vāha Yaā Dios nuū rō. Chi ni canducú ndéyí rí ni casájniñu ndasí rí siquī jeē cótecu rī. Te nduú ñuú ni casájniñu rī.

¹⁰ Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó

ñáyuu cácañdije. Te ni ñn tu cúu cahān cuēchi siquī rī. ¹¹ Te suni cájini rō ndese ni castíhvi ni rī ná ñn ná ñn ró, te ni cacahān rī jnūhun ndeyí ni jín rō, nájñūhun sáha ñn tátá jín séhe de. ¹² Te ni cacahān nihín rí jín ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jéē quíngoo ró núú ndácu ya jniñu, nuū luu cujéñu ró jín yá.

¹³ Te jeē yúcuan níni nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnūhun ñn tēe cúu, chi jnūhun Yaā Dios cúu. Te máá jéndaá jeē jnūhun un sájniñu ini anuá rohó ñáyuu cácañdije nde ndacu ró yá. ¹⁴ Hermano, ñayuu ñuu rō ni cajito xeēn i róhó, te súcuan ni candoho ró nájñūhun ni candoho ñayuu cácañdije cáyūcú región Judea jeē cáyihí ndaha Yaā Dios jín Cristo Jesús. Chi nájñūhun ni candoho i ni sáha jnáhan i ñayuu hebreo, suni súcuan ni candoho ró. ¹⁵ Chi suu ñayuu hebreo ni cajehni de máá Jítóho yō Jesús, nájñūhun ni cajehni de tāca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu núnjahan ni Yaā Dios, te cúu de contra siquī tāca ñáyuu. ¹⁶ Chi jésicoo de jeē ma nácani ri jnūhun nuū ñáyuu tāca nación jeē tu jíní, návāha tú cácu i. Te súcuan sáha de jeē nducuehē gā cuēchi siquī de.

Te vijna te yachī quiji quivī jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷ Hermano, ni cacujiyo ri ñin núnúu-ni nuū rō jijnáhan rō. Te vēsú tu cájito jnáhan yó, te níní cañuhun ni rī rohó. Te yōhyo ni cacuu ni rī ndacoto ri nuū rō jijnáhan rō. ¹⁸ Te jeē yúcuan ní cajeni ni rī jecoo ri nuū rō nuū. Te ruhū Pablo, tijní jínu ni nducú rí modo jeē rī, te Satanás ni jesi ichi ri jijnáhan ri. ¹⁹ Chi tuá na inga cañuhun ni rī, te tuá na inga cácusī ni rī, chi suu máá rō jijnáhan rō. Te jeē siquí maá rō cúu jeē nihín rī premio rī te cusī teyí ni rī cuiñi yó núu maá Jítoho yō Jesucristo quivī ndíji ya. ²⁰ Suu jeē siquí rohó cúu jeē cácusī teyí ni rī.

3

¹ Te jeē yúcuan tuá ni cáanda ri condetu ri nde nihín rī jnūhun ndese cáhīyo rō. Te ni casándaā rī jeē quéndōo máá-ni ri ñuu Atenas. ² Te ni catajī rí hermano yō Timoteo, tēe jéjníñu jíin rí nuū Yaā Dios siquí jnúhun jeē jnáma Cristo yohó. Te ni jecondēhé de rōhó návāha sáha de jeē cuiñi nihin ró te coo ndeyí ni rō jíin jnúhun cácandíje rō. ³ Te ni jeē de návāha ma náyūhú ni ñin ró síquī tāca jnúndóho jeē sáha ñayuu. Chi je cájini rō jeē súcuan cánuú ndoho yó. ⁴ Chi nde ná ni coyūcu rí jíin ró, te ni cacastūhun rí nuū rō jeē nihín nahín yó jnúndóho. Te

je cájini rō jeē súcuan ni cuu, nájñūhun ni cacahān rī. ⁵ Te jeē yúcuan, náa tuá ni cánda ri condetu ri jeē nihín rī jnūhun ndese cáhīyo ró, te ni tají rí de ni jeē de, návāha cuní rī núu cácandíje nahín ró. Chi ni jeni ni rī á sanaa te jexeén jeē jito ndee yohó ní cundeyí jíin ró, te naa cáhá-ni jniñu jeē ní casáha ri jíin ró.

⁶ Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē cácandíje vāha ró, te cácundáhú ni rō jnáhan rō. Te ni cachi de jeē cañuhun ni rō ruhū, chi cáhīyo manī rō jíin rí. Te cácuni rō ndacoto ró núu rī, nájñūhun cácuni rī ndacoto ri nuū rō. ⁷ Te jeē yúcuan ní candusī ni rī siquí jeē cácandíje vāha ró, hermano, vēsú xeēn iyó jnúndóho siquí rī. ⁸ Te vijna je ni cananihín ni rī, chi cáhīn nihin ró jíin máá Jítoho yō. ⁹ Núu súcuan te tu jínu cuiñi nacuatáhú rí nuū Yaā Dios jeē siquí rohó jijnáhan rō. Chi jito ya jeē cácusī ndasí ni rī jeē súcuan cáhīyo rō. ¹⁰ Te nduú ñuu cájicān tahu ndasí rí jeē ndácoto tucu ri nuū rō, te stéén gā rī na-ni jnūhun cúmanī jecūhun ni rō siquí jnúhun cácandíje yó.

¹¹ Te cácuni rī jeē maá Tátá yō Yaā Dios jíin Jítoho yō Jesucristo, na núne ya ichi jeē cuu jecoo tucu ri nuū rō. ¹² Te na sáha máá Jítoho yō jeē cuehē ndasí gá cundáhú ni rō jnáhan ró jíin tāca gá ñayuu, nájñūhun cácundáhú ni rī rohó jijnáhan rō. ¹³ Te na sáha ya jeē íje ánuá

rō jeē cuiñi nīhin rō, návāha coo ndoo rō jēē ma cóo cuēchi rō nuū maá Tátá yō Yaā Dios, quiṽī ndīji Jitoho yō Jesucristo jiín táca ñāyuu yihi ndaha ya.

Siquī jeē caca ndaā yō modo jeē cúshī ni yā

4

¹ Te vijna hermano, íyó inga jñūhun jeē cácahān ndahú rí jiín rō te cáhán nīhin rí jiín rō, chi súcuan cúní maá Jítoho yō Jesús. Je ni castéén rī nuū rō ndese cánuú caca ndaā rō návāha cusī ni Yaā Dios. Te cácahān ndahú rí jiín rō jeē sa víhyá gā na cáca rō súcuan.

² Chi je cájini rō na jniñu ni candacu rí nuū rō jeē ní ndacu máá Jítoho yō Jesús.

³ Te cúní Yaā Dios jeē na cóo ndoo coo iī rō nuū yā, te ma cáca jnéni rō. ⁴ Te ná ñn ná ñn rō na cóndeca yññuhún rō ñasihí máá rō, te súcuan caca ndoo rō. ⁵ Te ma sáha rō jniñu néé jēē ndíyo ni rō jesihí, nájnūhun cásaħa ñayuu tācá nación jeē tu cájini i jñūhun Yaā Dios. ⁶ Ni ñn rō ma sáha rō cuēchi jeē quēnde rō ñasihí jnáhan rō. Chi máá Jítoho yō cuāha ya castigo xeēn nuū ñayuu casáha tācá jniñu súcuan, nájnūhun je ni cacahān nīhin rí ni castūhun rí nuū rō. ⁷ Chi tu ní cána Yaā Dios yohó jēē sáha yó jniñu jnéhén, chi sa jeē caca ndoo yó. ⁸ Núu súcuan te ñayuu jeē squéhichī jñūhun yáha, nasūu jñūhun ñn tēe squéhichī i, chi sa jñūhun Yaā Dios, Yaā ni jéhe Espíritu Santo nuū yō.

⁹ Te tu jini ññuhún jēē tēe rí nuū carta yáha jēē coo manī rō jiín táca hermano, chi je ni steén Yaā Dios nuū rō jeē coo manī rō jiín jnáhan rō. ¹⁰ Te je cáhiyo manī rō súcuan jiín táca hermano cáyūcu ní cáhnu Macedonia jiñā. Te cáhán ndahú rí jiín rō hermano, jeē sa víhyá gā na cóo manī rō jiín i. ¹¹ Te na cóndihvī ni rō coyūcú nayúú rō, te ma cóndihvī ni rō siquī ndese cásaħa jnáhan rō, chi condihvī ni rō sáha rō jniñu máá rō, nájnūhun ni candacu rí nuū rō. ¹² Súcuan na sáha rō návāha ñayuu tu cándije, cuatáhú i róhó, te suni ma cúmanī jeē cotecu rō.

Siquī jeē ndīji Jitoho yō

¹³ Suni cácumí rī, hermano, jeē na jécūhun ni rō jijnáhan rō síquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndīyi. ¹⁴ Chi nájnūhun cácandije yó jēē ni jñhī Jesús te ni natecu yā, suni súcuan cácandije yó jēē nastécu Yaā Dios tāca ñayuu ni ca-candije nuū Jesús te ni cajihī.

¹⁵ Jeē yúcuan cácastūhun rí ñn jñūhun jeē ní castūhun máá Jítoho yō nuū rī: Jeē yóhó jēē cátecu gā quiṽī ndīji máá Jítoho yō, nasūu máá yó cosnūu jēē ndaa yó quiñhīn yō. Chi xīhna gā ñayuu je ni cajihī ndaa i quiñhīn i. ¹⁶ Chi máá Jítoho yō nuu ya quiji ya ichi ándiví, te cana jee ya jeē máá yá ndácu jniñu, te cana jee ndajéhe cujéñnu ga, te cuecu trompeta Yaā Dios. Te xīhna

gā natecu tāca ndíyi jeē ní cacandíje Cristo. ¹⁷ Yūcuán na te yóhó jeē cátecu gā yō quivī ndíji ya, suni ndonehen ya yohó jíin i, quihīn yō mēhñu vícō. Te naquijnáhan yó jíin máá Jítóho yō sava andiví. Te súcuan condee yō ní cáni jíin máá Jítóho yō. ¹⁸ Núu súcuan te jíin jnúhun yáha cahān ndeyí ni rō jíin táca jnáhan ró.

5

¹ Te tu jíini ñúhún jeē tée ri nuū carta yáha síquī cuiyā chí quivī jeē coo tācá un, hermano. ² Chi je cájini vāha ró jéē ñn sanaa ni yō te quee quivī ndíji máá Jítóho yō, nájnūhun ñn sanaa ni yō te quíji ñacuīhná jecuáā. ³ Chi ná-ni cácahān ñayuu jeē nayúú-ni ñn te tú na jnūndóho coo, te ná-ni cácahān i súcuan te ñn sanaa ni i te quíji jnūndóho síquī i jeē nāā i, te ma cácu cuiti i. Chi quíji quivī un nájnūhun ñn sanaa-ni te quéjéé jéhdē chíji ñn ñahan scácu sēhe. ⁴ Te róhó hermano, tu cácuu ró ñayuu cájica nájnūhun nuū néē jeē ñn sanaa-ni te quíji quivī un síquī rō nájnūhun quíji ñacuīhná. ⁵ Chi ndihi ró cácuu ñayuu jeē nájnūhun cájica ró nduú, chi stéén luz yā ini anuá rō. Chi tu cácuu yó nájnūhun ñayuu jeē tu jécūhun ni síquī Yaā Dios, jeē nájnūhun cájica i nuū néē. ⁶ Núu súcuan te ma cúhuun ni yō nájnūhun ñayuu cáquixī, chí sa ndito na cóo ni yō te coo cájí xínī yō. ⁷ Chi jecuáā cúu jeē cáquixī ñayuu, te suni jecuáā cúu jeē

nájīni i. ⁸ Te máá yó chi nájnūhun jeē cájica yó nduú, te na cóo cájí xínī yō. Te na cúcutú yó jíin jnúhun cándíje ñhin yó jíin jnúhun cúndáhú ni yō jnáhan yó, nájnūhun cúcutú soldado jíin sahma cáa. Te na cúcutú yó jíin jnúhun jeē cáñuhun ni yō jeē cácu yó, nájnūhun cúcutú soldado jeē ñúhun lélú cāa xinī de. ⁹ Chi Yaā Dios tu ní jéni ya yohó jéē cuáha ya castigo yohó, chi sa suhva jeē jnama ya yohó sáha máá Jítóho yō Jesucristo. ¹⁰ Te máá yá ni jihī yā jehē yō, návāha cotecu inuú yó jíin yá, vēsú núu cotecu gā yō ñayiví yáha chí cúu yō. ¹¹ Núu súcuan te cahān rō jnúhun ndeyí ni jíin táca jnáhan ró, te scuéhnu jnáhan ró jíin jnúhun ya, nájnūhun je casáha ró.

Jeē jéni ichí Pablo tācá hermano

¹² Te cácahān ndahú rí jíin ró hermano, jeē cuatáhú ró tée cájejniñu cándito róhó, jeē cácujeñnu de nuū rō jíin jniñu máá Jítóho yō, te cájini ichí de róhó. ¹³ Te coo yíñúhún ndasí ró nuū de, te coo manī rō jíin de síquī jniñu ya jeē casáha de. Te na cóyūcu manī rō jíin táca jnáhan ró.

¹⁴ Te suni cácahān ndahú rí jíin ró hermano, jeē na stíhvi ni rō ñayuu cájica cúxí. Te cahān rō jnúhun ndeyí ni jíin ñayuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni rō jíin ndihi ñayuu.

¹⁵ Te coto má nasáha ndevāha rō jíin ni ñn ñayuu

te núu sáha ndevāha i jíin ró. Chi máni jeē váha nducú ró sáha ró jíin táca jnáhan ró jíin ndihi-ni ñayuu.

¹⁶ Níní na cóo sī ni rō jijnáhan ró. ¹⁷ Te níní na cacán tahu rō. ¹⁸ Te nacuatáhú ró jeē siquí tǎcá-ni. Chi súcuan cúní Yaā Dios jeē sáha ró jéē cǎcandíje ró Cristo Jesús.

¹⁹ Te ma cási rō nuū jniñu jeē sáha Espíritu Santo jíin ró. ²⁰ Te ni ma cujéē ni rō nuū jnúhun cǎcāhān tēe cǎnacani jnūhun Yaā Dios. ²¹ Chi coto ndee rō tǎca jnúhun, te núu jeē váha cúu, te cuatáhú ró. ²² Te ma quívi nduu rō jíin ni ñn jniñu néé.

²³ Te máá Yaā Dios jeē jéhe jnūhun ndeyí sī ni, ñúhun ni rī jeē sáha ndihi ya jeē cóo ndoo coo ī rō nuū yā. Te ñúhun ni rī jeē cóndito váha ya anuá rō jíin jéē níjnūní rō, jíin yíqui cúñu rō, návāha tú na cuēchi coo siquí rō quívi ndíji máá Jítóho yō Jesucristo. ²⁴ Chi Yaā jeē ní cana róhó, sáha ya ndihi un jíin ró, chi squícu ya jeē ni jéjnūhun ya.

Saludo jíin bendición jeē sándihí

²⁵ Hermano jijnáhan ró, cacān tahu rō jehē rī jijnáhan rī.

²⁶ Te núu na cǎhán rō jíin táca hermano, te techūhu yíñúhún ró ndaha i.

²⁷ Te cǎhán ñihin ri jíin ró, chi súcuan cúní máá Jítóho yō, jeē na cáhu ró carta yáha núu tǎcá hermano.

²⁸ Te ñúhun ni rī jeē máá Jítóho yō Jesucristo na sáha ga

yā jeē váha róhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee rí carta yáha cuájeē nuū rohó ñáyuu cácaandíje ñuu Tesalónica, jeē cáyihí ró ndaha Tátá yō Yaā Dios jíin Jítoho yō Jesucristo. ² Te cáñuhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te sáha ya jeē coo ndeyí coo sī ni rō jijnáhan ró.

Jeē sándaā yā cuēchi quivī ndíji Cristo

³ Cánúú jéē niní nacuatáhú rí nuū Yaā Dios jeē siquí rohó jijnáhan ró hermano. Chi súcuan íyó váha, chi yōhyo váha cuahije ró jíin jnúhun jeē cácaandíje ró yá, te yōhyo cuanducuehē jeē cácaandíje ní rō táca jnáhan ró. ⁴ Te jeē yúcuan cúu jeē cácusī teyí ni rī cácanani rí jnúhun ró núu táca grupo ñayuu cácaandíje nuū Yaā Dios. Chi váha cácaandíje ró, te váha cájendeyí ni rō jeē cájito xeēn ñayuu rohó jíin jéē cándoho ró táca gá jnúndóho. ⁵ Te jíin táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi siquí ñuu un cúu jeē cándoho ró. Te jeē súcuan chíhi ya cuenta siquí

rō, yáha stéén nuū yō jeē váha Yaā cúu ya.

⁶ Te suni íyó váha jeē nastóho ya ñayuu castóho rōhó. ⁷ Te quivī ndíji Jítoho yō Jesús, quivī un sáha Yaā Dios jeē ndétātu rōhó jéē cándoho, te suni ruhū jijnáhan rí. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder. ⁸ Te cuáha ya castigo nuū ñáyuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítoho yō Jesucristo jeē jnáma ya i. ⁹ Te ñayuu ún chi ndoho i ní cáni, chi cujiyo i nuū maá Jítoho yō, te ma cúu quívicoo i nuū lúu ndasí cújéhnú ya jíin poder yā. ¹⁰ Súcuan sáha ya quivī ndíji ya jeē lúu cújéhnú ya sáha ñayuu cácaandíje jeē yíhi ndaha ya. Te nahán naa ni i coto i nuū yā. Te suni súcuan rōhó jijnáhan ró, chi ni cácaandíje ró jnúhun jeē ní canacani rí nuū rō. ¹¹ Te jeē yúcuan cúu jeē niní cájicān tahu rí jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquī jeē cácaandíje ró. ¹² Te súcuan te cújéhnú máá Jítoho yō Jesucristo sáha ró, te suni cújéhnú máá ró jijnáhan ró sáha ya. Chi Yaā Dios yō jíin Jítoho yō Jesucristo, súcuan cúu jeē sáha ya jeē váha yóhó.

Jnúhun siquí maá téé sáha xeēn cuēchi

2

¹ Vijna te cahān rī siquī jeē ndiji máá Jítoho yō Jesucristo jíin jéē ndutútú yó núū yā. Cácahān ndahú rí jíin ró jijnáhan ró hermano, ² jeē ma cuáha ró jnúhun sacā nuu cani ni rō, ni ma cunéé ni rō núu cácahān ñayuu jeē jé ni quee quivī ndiji máá Jítoho yō. Ma candije cuiti rō vésú núu cahān i jeē ni níhīn i ñn jnúhun siquī un núu Espíritu, chí ñn jnúhun jeē ni cáhān inga, chí núu cachi i jeē ruhú jijnáhan ri ni tají ñn carta jeē cahán súcuan. ³ Ma cuáha cuiti rō jnúhun jeē stahú ni ñn i róhó. Chi nde ná tu quiji quivī ún te xīhna gā ndunīhni ni cuehē ñayuu nuū yā, te quenda ndijin máá téé sáha xeēn cuēchi, te téé jnáhnū ndetū cúu máá téé ún. ⁴ Chi téé jito uhū Yaā Dios cúu de, te ndonda de contra siquī táca jéé casnání i yaā i jíin táca jeē cáchiñuhún i. Te xeēn gā sáha de, chí nde cucōo de ini templo Yaā Dios jeē iyó Jerusalén, te cahān de jeē maá de cúu Yaā Dios.

⁵ ¿A canahán ró jnúhun yáha? Chi súcuan ni cahān rí jíin ró ná ni iyo ri jíin ró. ⁶ Te je cájini rō ndé vé cúu jeē jési jeē ná tu quenda ndijin téé ún, chí nde na quee quivī maá de. ⁷ Chi je jícu sáhi táca cuēchi xeēn ini ñayiví, te vijna chí iyó jéé jési nuū, návāha ma cáa ndasí gá cuēchi, chí nde na cújiyo máá jéé jési nuū. ⁸ Te sáá te quenda ndijin maá téé xeēn ún. Te máá Jítoho yō Jesús cahni ya téé un jíin táchī yuhu-ni ya, te jíin jéé ndíndēe

yá ndiji ya te snáhnú ndetū yā de. ⁹ Te jeē quíji téé xeēn ún chí máá Satanás sáha. Te quiji de jíin cuéhē poder, te sáha de táca jniñu jéhu jeē stahú de, jeē nahán naa ni ñayuu coto i. ¹⁰ Te jíin táca jniñu néé te stahú ndasí de ñayuu jeē jnahnú ndetū, chí tu ní cúní i cuatáhú i jnúhun ndaā jeē cácu i núú. ¹¹ Te jeē yúcuan cuáha Yaā Dios jnúhun jeē cuatáhú i jnúhun jeē tú ndaā cuiti, te candije i jnúhun stahú un. ¹² Te súcuan te jecondee cuēchi siquī ndihi i jeē tu ní cácañdije i jnúhun ndaā, chí sa jniñu néé ni cacushī ni i jíin.

Ñayuu jeē ní nacāji ya jeē cācu i

¹³ Te cánuú jéé niní nacuatáhú rí jijnáhan ri nuū Yaā Dios jeē siquí rohó jéé cácuu ró hermano jeē maní Jítoho yō jíin. Chí nde ná ni jecōo ñayiví, te je ni nacāji Yaā Dios rohó jéé jnáma ya rohó. Chí sáha Espíritu yā jeē cáhiyo ndoo cáhiyo i rō nuū yā te cácañdije ró jnúhun ndaā. ¹⁴ Chi jeē yúcuan ní cana ya rohó jíin jnúhun jeē jnáma ya yohó jeē ní canacani ri, návāha quivícoo ró núu kujéhu luu ró jíin máá Jítoho yō Jesucristo.

¹⁵ Núu súcuan te cuiñi níhīn ró hermano, te conahán váha ró jnúhun jeē ní cacutūhva ró núu rī, núu jeē ní cacahān rī chí jéé ní tee ri nuū carta. ¹⁶ Máá Jítoho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo shī ni yō ní cáni, jíin jéé

ñúhun ni yō tāca jēē váha jeē coo siquī jeē váha ni yā jíin yó. ¹⁷ Te na sáha ga yā jeē cóo ndeyí ni anuá rō jijnáhan rō, te na sáha ya jeē íje rō cáhān rō tāca jnúhun váha ya, te sáha rō tāca jniñu váha.

Jeē na cácan tahu i jehē de

3

¹ Te íyó inga jnúhun cánuú, hermano. Na cácan tahu rō jehē rī jijnáhan ri, návāha yachī cuitē núu jnúhun máá Jítoho yō, te cuatáhu váha ñayuu, nájnūhun ni cajetáhu máá rō. ² Te suni cacān tahu rō jeē na cácu ri nuū tāca téé casáha néé jēē cátejnhān jíin rí. Chi tú ndihí téé cácan díje jnúhun ya. ³ Te máá Jítoho yō chi váha squícu ya jeē ni jéjnūhun ya, te sáha ya jeē íje ni tāca rō jíin jnúhun ya, te coto ya rohó núu jeneé. ⁴ Te cácu cáhnu ni rī sáha máá Jítoho yō, jeē cócuu rō jíin jniñu jeē ní candacu ri nuū rō, te suni cocuu ga rō jíin. ⁵ Te ñúhun ni rī jeē maá Jítoho yō steén gā yā ndese coo manī gā rō jíin Yaā Dios nde jíin ini jíin ánuá rō, jíin jēé cuándeyí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chi súcuan ni ndacu máá Jítoho yō Jesucristo, jeē na cújiyo rō núu táca hermano cájica cúxí te tu cájica váha de nájnūhun ni castéén rī nuū rō. ⁷ Chi je cájini rō ndese cánuú ndacu rō rúhū jijnáhan ri, chi tu ní cájica cúxí rí ná ni cahīyo ri jíin rō. ⁸ Ni

tu ní cáyeji rī staā ni ñn rō súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn rō. ⁹ Te vēsú íyó derecho rī jeē cacán rī nuū rō nuú, te tu ní cájicān rī, chi súcuan ni casáha ri návāha cuu ri ñn ejemplo nuū rō ndese sáha rō jijnáhan rō. ¹⁰ Chi ná ni coyūcu rí jíin rō, te ni candacu ri jniñu yáha nuū rō: Núu ndé ñn ñayuu tu cúní i sájniñu i, te suni ma cáji i núu súcuan. ¹¹ Chi ni canihīn rī jnúhun jeē cájica cúxí sava rō, te tu casájniñu rō, chi yáha yúcuan-ni sáha rō. ¹² Te cándacu ri jniñu nuū rohó jēé casáha súcuan, te cástáhví ni rī rohó jeē na cóo nayúú rō te sájniñu rō, návāha nihīn rō jeē cáji rō siquī jniñu sáha máá rō. Chi súcuan ndácu máá Jítoho yō Jesucristo jniñu.

¹³ Hermano, ma ndínuu ni rō jijnáhan rō sáha rō táca jniñu váha. ¹⁴ Te núu ndé ñn i tu jétáhu i jnúhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jíin i, návāha na cúcanu i te nacani ni i. ¹⁵ Te nasūu jēé cóto uhū rō i, chi sa cahān rō jíin i nájnūhun jíin ñani rō jeē na sájniñu váha i.

Bendición jeē sándihí

¹⁶ Te ñúhun ni rī jeē maá Jítoho yō, Yaā jeē jéhe jnúhun ndeyí sīñ ni, níní na sáha ya jeē coo ndeyí coo sīñ ni rō siquī táca-ni, te coo ya jíin rō jijnáhan rō.

¹⁷ Ruhū Pablo, yáhā-ni cúu jeē téé ri jíin ndaha máá rí jeē cahán rī jeē sándeyí ni rō

jijnáhan ró. Te súcuan jéhe
rí firma nuū tāca carta rī,
návāha cuni rō jeē carta maá
rí cúu. Súcuan cáa letra rī.
¹⁸Te ñúhun ni rī jeē maá Jítóho
yō Jesucristo, na sáha ga yā
jeē váha ró jijnáhan ró. Súcuan
na cóo. Amén.

CARTA HN JEE NI TEE SAN PABLO APOSTOL NUU TIMOTEO

1 Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñūhun ni yō coto yó, ni catají yá ruhū jeē nácani ri jñūhun ya. 2 Te téé ri carta yáha cuájeē nuū rō Timoteo, chi cúu ndije ró nájñūhun sēhe ri siquī jeē ni scándije ri rohó. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siī ni rō.

Jeē ma candije i tāca jñūhun stáhú

3 Ná ni quihin ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān ñihin ró jíin sava ñayuu yúcuan jeē ma stéén i inga jñūhun jeē tú ndaā. 4 Te ma cuatáhú i tāca jñūhun jeē cúu máá cuento-ni, jíin jñūhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajnūhún i siquī, te tu ndé jéjñiñu, te tu sáha jeē íje i squícu i nuū Yaā Dios siquī jñūhun cáncandije yó.

5 Te ndácu ri jniñu yáha chi cúní rī jeē na cundáhú ni i jñahan i siquī jeē iyó ndoo íyó ndaā anuá i, te cáncandije ndije i ya. 6 Te sava ñayuu chi ni

cajica yátá i, te ni cascuíta i jñūhun ya, ni quívicoo i nuū tāca jñūhun jeē tu ndé jéjñiñu. 7 Chi cácuñi i cuu i maestro ley yā, te ni tu cájecūhun ni i na jñūhun cúu jeē cácahān i, jíin na vé cúu jeē castéén ñihin i.

8 Te jíiní yō jeē iyó váha ley un, te núu jecūhun ni yō ndese jéjñiñu. 9 Chi cánuú sáha yó cuenta jeē tu ní jécōo ni ñin ley jeē siquī ñayuu ndaā, chi sa suhva siquī ñayuu jeē tu cájetáhú, jeē níhni ni, jeē casáha jniñu néé, jeē casáha cuēchi, jeē tu cáchiñūhún Yaā Dios ni tu cáncandije ley yā, jeē cájehni tatá jíin náná, jíin jéē cájehni ndíyi. 10 Te suni ni jecōo siquī ñayuu cájica jnéni, jíin téé cásaáha ndiyī jíin jñahan yí, jíin ñayuu casáculhána inga ñayuu, jíin ñayuu castáhú, jíin ñayuu cácahān ñihin jñūhun yáá. Te ni jecōo siquī tāca gá ñayuu jeē casáha jniñu tu quíjñahan jíin jñūhun ya jeē steén ndaā váha. 11 Te jñūhun ya un cúu jñūhun yōhyo jéhnu jeē jnáma Yaā Dios yohó. Te yōhyo ndetū Yaā cúu ya. Te ni tejniñu ya ruhū nácani ri jñūhun ya.

Jeē nácuatáhú Pablo siquī jeē ní cundáhú ni yā de

12 Te nácuatáhú rí nuū Jítóho yō Jesucristo, Yaā ni jēhe fuerza ini rī, chi ni quihin ya ruhū ni sáha ya jeē cuu squícu ri, te ni tejniñu ya ruhū nácani ri jñūhun ya. 13 Te súcuan ni sáha ya jíin rí vēsú ni cahān ndevāha ri siquī yā nde saá, te ni sáha ndevāha ri jíin ñayuu cáncandije, te xeēn ni sáha ri. Te

vēsú súcuan te ni cundáhú ni yā ruhū, chi ná tu candíje ri yā nde saá, te tu ní jécūhun ni rī na vé cúu jeē sáha ri. ¹⁴ Súcuan ni sáha Jitoho yō jeē váha ndasí jíin rí. Te ni sáha ya jeē candíje ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

¹⁵ Te ndaā ndije cúu jnūhun yáha, te jeē cánuú candíje ndihi ñayuu cúu: jeē ní quiji Cristo Jesús ini ñayīvi návāha jnama ya ñayuu iyó cuēchi. Te ruhū cúu tēe jeē vihyá gā ni sáha cuēchi. ¹⁶ Te ni cundáhú ni Yaā Dios ruhū, návāha jíin ruhū jeē vihyá gā ni sáha cuēchi te stéen Jesucristo ndese yōhyo íne cáhnu ni yā. Te súcuan ni sáha ya jeē cúu ri ñn ejemplo nuū tāca ñáyuu candíje ní cuáhān yō, návāha nihīn tahu i cotecu i ní cáni. ¹⁷ Núu súcuan te ní cáni na cáhān yíñúhún yó jeē yóhyo luu cújéhnu máá Yaā jeē cúu Rey siquī ndihi, jeē técu ní cáni, jeē tu náā cuiti. Te tu cúu coto yó núu yā vijna, te máá ñn-ni ya iyó, te ndíchí yá. Amén.

¹⁸ Nájnūhun sēhe ri cúu ró Timoteo, te jniñu yáha téjniñu ri rohó, jéē na ndúcú ndéyí ró síquī jniñu váha. Te na cándíje váha ró, te na cóo ndaā anuá rō. Chi nde saá je ni cacahān tācá hermano jíin jnúhun Yaā Dios jeē súcuan condiso jniñu ró. ¹⁹ Chi sava ñayuu tuá iyó ndáā anuá i nuū yā, te ni casnáa i jnūhun cácandíje i. ²⁰ Himeneo jíin Alejandro cúu uū tēe ni casáha súcuan. Te je ni siaá rī de nuū Satanás,

jeē stóho ún de, návāha jíin jnúndóho ún te cutūhva de jeē ma cáhān ndevāha ga de siquī Yaā Dios.

Siquī ndese cacān tahu yō

2

¹ Núu súcuan te xīhna gā ndácu ri jeē cacān tahu rō jehē tāca ñáyuu. Te cahān ndahú ró jehē i, te cacān rō na-ni na vé jíni ñúhún i, te nacuatáhú ró nuū yā jeē síquí i. ² Te cacān tahu rō jehē tāca tēe cácujeñu jíin jéē ndácu jniñu, návāha sáha de jeē cuu coyūcu váha yó te tú na jnúndóho coo siquī yō, te cuu chiñúhún váha yó Yaā Dios te sáha yíñúhún yó jíin tāca-ni. ³ Chi yáha cúu jeē váha jeē nújnahan ni Yaā Dios, Yaā jnáma yóhó. ⁴ Chi máá yá cuni yā jnama ya tāca ñáyuu te cuni i ndese iyó jnúhun ndaā yā. ⁵ Chi iyó ñn-ni Yaā Dios, te suni iyó ñn-ni Yaā jeē cahān jíin Yaā Dios jehē ñáyuu. Te Yaā un cúu máá Jesucristo jeē ní nduu tēe. ⁶ Te ni socō yā maá yá ni jihī yā jeē ní chunaa yā cuēchi ndihi yó. Te ná ni quiji máá quívi ún, te ni quejéé ní canacani jnūhun ún. ⁷ Te jeē síquí yúcuan ní jeni ya ruhū cúu ri apóstol jeē nácani ri jnūhun ya, návāha stéen rī nuū ñáyuu tācá nación jeē tu jíni jnūhun ya, jeē na cándíje i jnūhun ún te sáha i jniñu ndaā. Te siquī jeē candíje ri Cristo te ndaā cúu jeē cahān rī.

⁸ Núu súcuan te cúní rī jeē ndihi-ni lugar na cacān tahu tāca tēe. Te na cóo ndoo

ánuá de jeē ma quití ni de ni ma tejnáhan de. ⁹ Te suni súcuan tǎcá ñahan, na cásí vāha ña máá ña nájñuhun cánuú, návāha ma cóo jñuhun canu. Te ma cóndihví ni ña jeē sáha luu ndasí ña xiní ña, chí jéē cuhun ña siquī oro chí perla chí sahma váha ga. ¹⁰ Chi sa suhva na quéndōo luu ánuá ña jíin jniñu váha sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios. ¹¹ Te núu cáhīn ña jíin ñáyuu cascuáha jñuhun ya, te na cúni nahín ña te cuatáhú ña. ¹² Chi tu jéhe ri jñuhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúni nahín ña. ¹³ Chi xīhna gā Adán ni sáha ya, te sáa te ni sáha ya Eva. ¹⁴ Te tu ní stáhú jexeén Adán, chí sa suhva ni stáhú un ñasihí de, te ni sáha ña cuēchi. ¹⁵ Te jeē scácu tǎcá ña sēhe te coo vāha ña, te núu na quéndōo ña jíin jñuhun cándíje ña ya, jíin jéē cundáhú ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

Ndese cánuú coo tēe cándiso jniñu nuū ñáyuu cándíje

3

¹ Ndaā cúu jñuhun yáha: Núu ñn tēe cúni de condiso jniñu de condito de ñáyuu cándíje, te vāha jniñu ndúcú de sáha de. ² Núu súcuan te tēe ndíso jniñu nuū ñáyuu cándíje, cánuú jeē ma cóo ni ñn jeē nihín ñáyuu cuēchi siquī de. Te na cóo ñn-ni ñasihí de, te cájí coo ni de, te ndito coo xiní de, te sáha yíñúhún

de. Te cánuú jeē niní cuanúu de vehe nuū ñáyuu cájica, te niní steén vāha de jñuhun ya. ³ Te ma cúu de tēe nájñi, te ma tejnáhan de, te ma ndíyo ni de xūhún. Chi sa suhva coo vāha ni de, te coo vītá ni de, te ma cutóo ni de siquī xūhun. ⁴ Te cánuú jéē na ndácu vāha de jniñu ini vehe de, te sáha de jeē squícu vāha sēhe de te coo yíñúhún i nuū de. ⁵ Chi núu ñn tēe tu jíni de ndacu vāha de jniñu ini vehe de, ¿te ndese cuu condiso jniñu de nuū ñáyuu cándíje nuū Yaā Dios? ⁶ Núu súcuan te tēe ndíso jniñu nuū ñáyuu cándíje, ma cúu de tēe jeē saá ní cándíje, chí núu súcuan te sanaa te sándúxí de máá de, te ñnuú-ni cuēchi jecondee siquī de jíin jéxeén. ⁷ Te cánuú cuu de tēe jeē suni nde ñáyuu tu cándíje, cuajnúhún i de, návāha ma nihín i cuēchi siquī de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cándíje

⁸ Te suni súcuan tēe cájejniñu mēhñu ñáyuu cándíje, cánuú jéē na cóo yíñúhún de, te na squícu de jíin jñuhun cáhán de. Te ma cúu de tēe nájñi, te ni ma ndíyo ni de xūhún. ⁹ Te na cuñi nihin de jíin jñuhun cándíje yó jéē ní yisāhi ndé jenahán, te na cóo ndoo anuá de. ¹⁰ Te cánuú jéē xīhna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cándíje. ¹¹ Te suni súcuan ñasihí de jíin náhan

ña, cánuú coo yíñúhún ña, te ma sajnúhún ña, te cájí coo ni ña, te squícu vāha ña tǎcá-ni jniñu. ¹² Te tēe cájejniñu mēhñu ñáyuu cácañdije, na cóo iin-ni ñasihí de, te na ndácu vāha de jniñu nuū séhe de jíin núu ñáyuu vehe de. ¹³ Chi tǎca tēe cájejniñu vāha mēhñu ñáyuu cácañdije, chi vāha quéndōo yíñúhún de, te níhín de modo jeē caji gá nácani de jñuhun Cristo Jesús jeē cácañdije yó.

Jñuhun sāhi yá jeē cácañdije yó

¹⁴ Te vēsú ñuhun ni rī cua-jeē yachī rī coto jnáhan yó, te tēe ri jñuhun yáha cuájeē nuū rō, ¹⁵ návāha núu cucuéé rí, te je jíiní rō ndese cánuú sáha vāha ñáyuu cácuu séhe Yaā Dios. Chi máá i cácuu ñáyuu cácañdije nuū Yaā Dios, Yaā técu. Te máá i cásáha jeē iyó cutú jñuhun ndaā, chi cáhiin nihin i jíin. ¹⁶ Te jendaá ndije chi jéhnu ndasí cúu jñuhun yáha jeē cácañdije yó, jeē ní yisāhi ndé jenahán:

Yaā Dios ni steén yā maá yá,
chi ni nduu ya tēe,
te Espíritu ni steén jeē iyó
ndáā jniñu ni sáha ya,
te tǎcá ndajéhé andiví ní ca-
jito jniñu ní sáha ya.
Te ni jítē núu jñuhun ya nuū
ñáyuu tǎcá nacióñ,
te ni cacandije ñáyuu ní ñáyiví
núu yā,
te ni ndaa ya cuanuhun yā
andiví.

*Siquí ñáyuu cájica yátá nuū
jñuhun cácañdije yó*

4

¹ Te cájí stéén Espíritu Yaā Dios jeē quiví cuándihi te coo sava ñayuu caca yátá i nuū jñuhun cácañdije yó. Te cuatáhú i tǎca jeē cácahān jñuhun stáhú jíin jñuhun ní castéén tachī. ² Chi cuni nahín i jñuhun cástéén tēe cástáhú-ni, jeē tu cácahān ndaā de. Chi tēe un ní cahije ndasí ni de jíin jñuhun stáhú, te tuá sáha jíin ánuá de jeē nácani ni de. ³ Te cahān de jeē cuēchi cúu jeē coo ñasihí tēe, te suni súcuan núu caji ñáyuu sava ndeyu. Te ndeyu ún chi ni sáha Yaā Dios jeē cúu ñáyuu cácañdije jeē jíiní jñuhun ndaā, návāha caji i te nacuatáhú i nuū yā. ⁴ Chi ndihi jeē ni sáha Yaā Dios, iyó vāha, te ma squexícó yō ni iin, chi sa nacuatáhú yó te caji yō. ⁵ Chi jíin jéē cáhu yó jñuhun Yaā Dios jíin jéē nácuatáhú yó nuū yā, te iyó ndoo ndihi-ni.

*Tēe jéjniñu vāha nuū Jesu-
cristo*

⁶ Te núu stéén rō jñuhun yáha núu tǎcá hermano, núu súcuan te cuu ró tēe jéjniñu vāha nuū Jesucristo, te ije ró jíin jñuhun vāha ya jeē candije ró, chi ni cutühva ró te ndíquín rō. ⁷ Te ma quiví nduu rō jíin tǎca jñuhun jeē cúu cuento-ni jeē cájeni cāhá ni ñayuu. Chi níiní na scuáha ró ndese chiñúhún vāha ró Yaā Dios. ⁸ Chi jeē scuáha yó ejercicio jeē cóo ndacuī yiqui cúñu yō, jecu-ni níhín jniñu. Te jeē scuáha yó chiñúhún vāha yó yá, suu yūcuan cúu jeē vāha níhín jniñu siquí tǎcá-ni, jeē cúu vida yáha jíin

vida quiji. ⁹ Te ndaā ndije cúu jnūhun yáha, te jeē cánuú candíje ndihi ñayuu cúu. ¹⁰ Te jeē siquí yáha cúu jeē sájniñu nīhin yó siquī jnūhun ya te ndóho yó jeē cácahān ndevāha i nuū yō. Chi ñúhún ni yō jeē coto yó núu maá Yaā Dios, Yaā técu. Te máá yá cúu Yaā jnáma tāca ñáyuu, te ñayuu cácaandíje jnūhun cúndáhú ni yā i, máá i cúu jeē jnáma ya.

¹¹ Tāca jnúhun yáha cánuú jeē ndacu ró núu i te stéén rō. ¹² Ma cuáha ro jnúhun jeē cujéē ni ni ñn i nuū rō siquī jeē suchí ró. Chi sa coo ró ñn ejemplo nuū ñáyuu cácaandíje, jeē cúni i ndese vāha cáhán rō, ndese vāha sáha ró, ndese cúndáhú ni rō jnáhan ró, ndese cándíje ró, ndese íyó ndoo ánuá rō. ¹³ Te níni ndé ná tu jinū rī nuū rō, te condihví ni rō jeē cáhu ró tutu iī nuū hermano cándutútú, jín jéē stihví ni rō i, jín jéē steén rō nuū i. ¹⁴ Ma cúhuun ni rō jín táhū jeē ni jéhe Yaā Dios nuū rō jeē nácani ró jnúhun ya. Chi tāca téé jéhu cándiso jniñu nuū ñáyuu cácaandíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

¹⁵ Núu súcuan te cocuu ró jín táca jniñu yáha, te condihví ni rō jín, návāha cuni tāca ñáyuu jeē váha íje ró cuáhān rō jín. ¹⁶ Coo cuidado rō jeē caca ndaā rō jín jéē steén vāha ró jnúhun ya, te cuiñi nīhin ró jín ndihi. Chi núu súcuan sáha ró te quendōo vāha ánuá maá ró

jín ñáyuu chuhun ni jnūhun cáhán rō.

Ndese sáha vāha yó jín ñáyuu cácaandíje

5

¹ Ma cúxeēn rō nuū tāca téé jéhu, chi sa cahān vāha ró jín de jeē ma stívi de, nájñūhun cáhán rō jín tátá rō. Te tāca téé suchí, suni cahān vāha ró jín de nájñūhun jín ñani rō. ² Te suni súcuan cahān rō jín táca ñahan jéhu, nájñūhun jín náná rō. Te suni súcuan jín táca ñahan súchí, nájñūhun jín cuáha ró, te yñúhún nda-jnūhun ró jín ña.

³ Te ñayuu cácaandíje na cuáha i jeē jini ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. ⁴ Chi ñn ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácoto i náná i tátá i siquī jeē ní cacondito ña i. Chi yāha cúu jniñu vāha jeē nújñahan ni Yaā Dios. ⁵ Te ñn ñahan ní quendōo ndáhú ndije jeē máá ñn na ña, ñúhún ni ña jeē máá Yaā Dios condito ya ña, te tu jécuiñi ña jeē jicán tahu ña nduú ñuú. ⁶ Te sa suhva núu máni ndihví ni ña siquī tāca jéé cúsiñi ni maá-ni ña, yūcuán na te vésú técu ña, te nájñūhun je ni jihī ña. ⁷ Jniñu yáha ndacu ró núu ñáyuu, návāha ma cóo cuēchi siquī i. ⁸ Te núu ñn ñayuu tu ndito i jnáhan vehe i, te víhyá gā ñayuu ini vehe

i, núu súcuan te sáha i jniñu jeē tu quíjnáhan jíin jnúhun cándíje yó, te cúu i ñn jeē neé gá vésú ñáyuu tu cácandíje.

⁹ Te ñahan viuda cuu quívi síhví ña nuū lista ñayuu jeē cáchindéé ñáhán ró jíin xúhun, te núu je ni jíinu ña unī xico cuiyā, te núu ni íyo ñn-ni yíi ña. ¹⁰ Te suni cánuú jéē cuajnúhún ñáyuu ña jeē váha jniñu ni sáha ña, núu jeē ni scuéhnu váha ña sēhe ña, jíin jéē ní jēhe núu ña vehe nuū ñáyuu cájica, jíin jéē ní jejniñu ña nuū hermano cácandíje, jíin jéē ní chindéé ñáhán ña ñayuu cándoho jnúndóho, jíin jéē ni sáha ña táca gá jniñu váha.

¹¹ Te táca ñahan viuda jeē iyó suchí gá, chí ma soó ró síhví ña nuū lista. Chí sanaa te nducú ña jeē cúsi ni maá-ni ña, te ma cándíhví ni ña síquí Cristo, chí cuu ni ña condeca tucu ña tēe. ¹² Te súcuan jecondee cuēchi síquí ña, chí tu ní squícu ña jeē ni jéjnūhun ña ná ni jecosó síhví ña nuū lista. ¹³ Te suni caca cuu ña táca-ni vehe te quee cúxí ña. Te nasūu máni jeē cáca cúxí ña, chí suni síquí jeē sajnúhún ña, te quívi nduu ña cahān ña jnúhun jeē tu iyó váha jeē cahán ña. ¹⁴ Jeē yúcuan cúní rī jeē táca ñahan viuda jeē iyó suchí, na nándaña ña, te scuéhnu ña sēhe, te coto váha ña vehe ña, návāha ñayuu cácuu contra ma cúu cahān i síquí ña. ¹⁵ Chí sava ñahan viuda je ni cajica yátá ña te sáha ña jniñu jeē cuní Satanás.

¹⁶ Te núu ñn tēe chí ñn ñahan

cándíje, núu iyó ñahan viuda vehe i, te na cóto máa i ña. Te ma cóndee gasto ña síquí grupo ñayuu cácandíje, návāha cuu cuāha váha i nuū ñahan viuda jeē tu ndé ñn coto ña.

¹⁷ Te táca tēe jéhnú cándito ñayuu cácandíje, na jécunaā doble yāhu de, te núu cándíhví ni de cástéén de cánacani váha de jnúhun ya. ¹⁸ Chí cúu nájnūhun cáhán tutu íi: Ma cánda síquí caxīn tī trigo, núu ma cuāha ró jéē cáji tī. Te suni cáhán: Tēe jeē sájniñu tátú, jíni ñúhún quiyāhu de, áchí.

¹⁹ Ma cuajnúhún ró te núu jéquin ñayuu cuēchi síquí ñn tēe jéhnú cándito ñayuu cácandíje te núu tu iyó úu chí únī testigo. ²⁰ Te núu casáha ñayuu cuēchi, te cánuú cuxeēn rō nuū i, jíto jínuū ndíhi ñayuu, návāha na cónso íyo sava ga i. ²¹ Te cáhán níhin rí jíin ró, jíto máa Yā Dios jíin Jítoho yō Jesucristo jíin táca ndajéhe yā jeē ní nacáji ya: Squícu váha ró jniñu yáha, te ma sáha ró cuenta ndese cúu ñn ñn i, chí inuú-ni sándaā rō síquí ndíhi-ni i. ²² Ma cáni yachí rō ñn tēe jeē condiso jniñu de nuū ñáyuu cácandíje, chí xīhna gā coto ndee rō de. Chí sanaa te stívi de, te cuēchi de suni condee síquí rō jíin de. Te coto ró máa ró jeē ma quívi ró jíin jniñu neé.

²³ Te síquí jeē núu-ni núu-ni cúhú chíji ró, te ma cóho ga rō máni ndute, chí suni coho ró jecu vino.

²⁴ Cuēchi sava ñayuu chí je iyó ndíjin nde ná tu quívi i nuū cúndaā cuēchi i. Te cuēchi

sava ga i chi cúcuéé te natū nahín. ²⁵ Te suni súcuan tãcá jniñu váha, chi íyó ndijin. Te vésú ná tu natū jniñu váha ún, te ma cúu quisãhi ní cáni, chi natū nahín.

6

¹ Tãca ñáyuu cácuu mozo, na cóo yíñúhún váha i nuū patrón i, návãha ma cahán neé ñayuu siquī Yaã Dios jíin síquī jñuhun ya jeé castéén yō. ² Te mozo jeé yíhi nuū patrón cácadíje, ma cáni ni i jeé cūhva-ni sãha yíñúhún i nuū de siquī jeé hermano cácadíje cácuu de. Chi sa cua-jniñu váha ga i nuū de, chi tēe cándíje tēe manī i jíin cúu tãca tēe un jēe sãjniñu i nuū. Jñuhun yãha stéén rō te stíhvī ni rō i.

Siquī jeé chiñúhún váha yó yá te cusī ni yō jíin cūhva jeé névãha-ni yó

³ Te núu ndé tēe stéén de jñuhun tú ndaã jeé tu quíjnãhan jíin jnúhun váha ndaã maá Jítoho yō Jesucristo, jíin jnúhun ni steén Yaã Dios jeé cácadíje yó, ⁴ núu súcuan te máni tēe ndúxí tēe tu jécūhun cuítī ni cúu de. Chi cánéé xínī de, chi máni cúní de tejnãhan de siquī tãca jnúhun stéén de. Te tãcá un sãha jeé cácuuésún ni, jíin jéé cátejñãhan, jíin jéé cácahãn ndevãha, jíin jéé cájeni neé ni siquī jnãhan, ⁵ jíin jéé máni cástãhãn jnãhan. Súcuan cása ha tēe jeé ní ndunéé xínī, jeé tu cájini jñuhun ndaã. Te cájeni ni de jeé nihín de cuehē xūhun síquī jnúhun cácadíje

de stéén de. Na cújiyo ró núu ñáyuu cándãa súcuan. ⁶ Te jendaá jeé yóhoyo váha quéndōo yó te núu chíñúhún váha yó yá, te núu cúsi ni yō jíin cūhva jeé névãha-ni yó. ⁷ Chi tú na vé ni cácu yó jíin ñayívi yãha, ni tú na vé condiso yó quíhín yō jíin núu na cúu yō. ⁸ Te núu íyó jēe cáji yō jeé cusúcún yó, te na cúsi ni yō jíin yúcuan-ni. ⁹ Chi ñayuu jeé cuní cucúcá, chi yachī quívi i cuēchi jeé jító ndee jexeén i. Te quívi i jíin cuéhē jniñu cánéé jniñu stívi jēe ndíyo ni i. Te tãcá un sãha jeé tívi ñáyuu te jnahnū ndetū i. ¹⁰ Chi jeé ndíyo ni yō xūhún, yūcuan sãha jeé quejéé táca jniñu neé. Te sava ñayuu jeé ndíyo ni xūhún, ni castóo i jñuhun cácadíje i, te ni canihín i cuehē ndasi jnúndóho.

Jeé na ndúcú ndéyí yó siquī jñuhun cándíje yó

¹¹ Te róhó chi tēe jéjniñu nuū Yaã Dios cúu ró, te cunu ró coto ró táca cuēchi yãha. Te condiquín rō jniñu ndaã, te chiñúhún váha ró Yaã Dios, te candíje váha ró, te cundáhú ni rō jnãhan ró, te cuandeyí ni rō, te coo vítá ni rō. ¹² Te nducú ndéyí ró siquī jnúhun cándíje yó yá. Te cuiñi ñihin ró jíin jnúhun jeé ni níhín tahú yō cotecu yō ní cáni. Chi jeé yúcuan cúu jeé ní cana ya rohó, te cájī ní cahãn rō jeé váha cándíje ró yá, jító jínúu cuehē ñayuu. ¹³ Te cáhãn ñihin rí jíin ró, jító maá Yaã Dios, Yaã jeé sãha jeé técu

tācá-ni, jíin Jesucristo, Yaā jeē cají ní cahān yā ni nacani ya jnūhun vāha nuū Poncio Pilato. ¹⁴ Squícu vāha ró jniñu ndácu ya nuū rō, te ma stívi ró sáha ró, návāha ma cahán ñayuu cuēchi siquī rō. Te súcuan sáha ró ní ndé quívi ndíji Jitoho yō Jesucristo. ¹⁵ Chi quiji ndijin yā maá quívi jeē ní jeni Yaā Dios. Te Yaā Dios chi máá ñn-ni ya cúu Yaā yōhyo ndetū, te jnái ya ndihi poder. Te cúu ya Rey nuū tāca rey, jíin Jitoho nuū tāca jítoho. ¹⁶ Te máñúhún-ni ya cúu jeē iyó ní cáni. Te ndéé yá ñn lugar nuū ndí ndaxín, nuū ma cúu quívi yó. Te ni ñn ñayuu ñayívi yáha tu ní jito cuiti i nuū yā, te ni ma cúu coto i nuū yā. Te ní cáni na cóo yáñúhún yó nuū yā, chi jnái máá yá poder ní cáni. Amén.

¹⁷ Te cahān rō jíin ñáyuu cucá ndajniñu ñayívi yáha, jéē ma cúndúxí i. Te ma ténuū i xūhún i, chi yachí naa ún. Chi sa suhva na ténuū i jeē coo vāha i sáha Yaā Dios, Yaā técu, chi máá yá jéhe cuehē yā tācá-ni jeē cúsi ni yō jíin. ¹⁸ Te ndacu ró jniñu nuū i jeē na sáha vāha i, chi jeē sacúcá ndije i máá i cúu jeē sáha i tācá jniñu vāha. Te na cúu i ñayuu vāha ni jeē cuáha i jeē cúu jnáhan i. ¹⁹ Te súcuan caya i cuehē jniñu vāha jeē coo cúcá i nuū yā ní tiempo jeē quíji. Te nihín tahu i cotecu i ní cáni.

Jniñu sándihi ndácu Pablo nuū Timoteo

²⁰ Te róhó Timoteo, condito ró táca jniñu ní chihí ya

ndaha ró. Te ma quívi nduu rō jíin táca jnūhun cāhá-ni, cuenta ñayívi yáha, jíin táca jnūhun stáhú jéē cácahān i jeē jnūhun ndíchí ndāa cúu. ²¹ Chi sava ñayuu cándiquín tāca jnūhun yáha, ni cajica yátá i ni castóo i jnūhun cácañde i ya.

Te ñūhun ni rī jeē Yaā Dios na sáha ga yā jeē vāha róhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nuj-nahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. ² Te tée ri carta yáha cuájeē nuū rō Timoteo, chi cúu ro nájñūhun sēhe ri jeē maní rī jíin. Te ñūhun ni rī jeē Tatá yō Yaā Dios jíin Jítoho yō Jesucristo, na sáha ga yā jeē váha rōhó, te cundáhú ni yā rohó, te sáha ya jeē coo ndeyí coo sīi ni rō.

Jeē nácani de jnūhun Cristo

³ Níni tu náā ni rī cacān tahu rī jehē rō nuū Yaā Dios nduú ñuú, te nácuatáhú rí nuū yā jeē siquí rō. Chi nuū maá yá jejñíñu ri, nájñūhun ni casáha tāca jíi rī, te íyó ndoo ánuá rī nuū yā. ⁴ Te núcūhun ni rī jeē ni ndáhyū rō ná ni quenda ri cuahān rī. Te cúu ní rī ndacoto jnáhan yó, návāha cusīi ndasí ni rī. ⁵ Te núcūhun ni rī jeē váha ndije cándije ró Cristo, nájñūhun ni cándije náná jéhnu ró Loida, jíin náná rō Eunice xīhna gā. Te cúcáhnu ni rī jeē suni súcuan cándije máá ró vijna.

⁶ Te jeē yúcuan nástíhví ni rī rohó jéé na cóndihví gā ni rō jíin táhū jeē ni jéhe Yaā Dios nuū rō jeē nácani ró jnūhun ya. Te tahū un ní nihīn rō

ná ni tee ri ndaha ri xinī rō. ⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnūhun, chi sa sáha jeē iyó fuerza ini yō, jíin jeē cundáhú ni yō jnáhan yó, jíin jeē ndíto íyó xinī yō. ⁸ Núu súcuan te ma cúcanu rō nacani ndaā rō jnūhun máá Jítoho yō. Te suni ma cúcanu rō jeē siquí maá rí jeē íne ri vecāa siquī jnūhun ya. Chi sa cuāha ró jnūhun ndoho ró jíin rí siquī jeē cánacani yó jnūhun jnáma ya yohó, núu ndese ni jéhe Yaā Dios fuerza ini yō. ⁹ Chi ni jnama ya yohó, te ni cana ya yohó jéé coo ndoo ánuá yō cuajñíñu yó núu yā. Te tu ní cána ya yohó síquī jeē váha ni sáha yó, chi siquī jeē ní tee ni maá yá jeē cundáhú ni yā yohó jéé yíhi yó ndaha Cristo Jesús. Chi nde ná tu jecōo ñayíví, te je cundáhú ni yā yohó. ¹⁰ Te vijna jeē ní quenda ndijin Jesucristo, Yaā jnáma yohó, te ni steén cají Yaā Dios jeē cundáhú ni yā yohó. Chi máá Cristo ni snáa yā poder cuehyí jéhni yohó, chi jíin jnūhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rī nuū ñáyuu tāca nación jeē tu jíni jnūhun ya. ¹² Te siquī un cúu jeē ndóho ri tāca jnúndóho yáha íne ri vecāa. Te tu cúcanu rī, chi jíni rī ndese Yaā cúu Yaā cándije ri, te cúcáhnu ni rī jeē cúu coto ya jniñu jeē ní chihi ya ndaha

ri nde vijna te nde quivī ndíji ya.

¹³ Te cuiñi nihin ró jín táca jnúhun ya jeē steén ndaā, suu jnúhun jeē ni steén rī nuū rō. Te caca ró jín jnúhun cándíje yó, te cundáhú ni rō jnáhan ró siquī jeē yíhi ró ndaha Cristo Jesús. ¹⁴ Te condito ró táca jniñu váha jeē ní chihí ya ndaha ró, sáha poder maá Espíritu Santo jeē ndeé ini yō.

¹⁵ Je jíní rō jeē táca ñayuu cáyūcu Asia ni castóo i ruhū. Te uū i cúu Figelo jín Hermógenes. ¹⁶ Te jícán tahu rī jeē cundáhú ni Jítoho yō ñayuu vehe Onesíforo, chí cuehē jínu ni nanihín ni rī ni sáha de, te tu ní cúcanu de siquī rī jeē ní ine ri vecāa. ¹⁷ Chí sa suhva ná ni quiji de ñuu Roma, te ni nanducú yúcún de ruhū nde ni nanihín de ruhū. ¹⁸ Te jícán tahu rī jeē maá Jítoho yō cundáhú ni yā de quivī ndíji ya. Te je jíní vāha máá ró ndese yōhyo ni chindéé ñáhán de ruhū ná ni cahíyo ri ñuu Efeso.

Jeē cúu yó nájnūhun soldado vāha nuū Jesucristo

2

¹ Núu súcuan te róhó, séhé mánī, na cóo fuerza ni rō siquī jeē yíhi ró ndaha Cristo Jesús te sáha ya jeē váha róhó.

² Te táca jnúhun jeē ní jini ró ní cahán rī, jító jínúū ñayuu cuehē, jnúhun ún na nástéén rō nuū tēe cásqúcu vāha, návāha suni cuu steén tucu máá de nuū sáva ga i.

³ Te róhó na cuándeyí ni rō coto ró jnúndóho, chí cúu

ró nájnūhun ñn soldado vāha nuū Jesucristo. ⁴ Ni ñn soldado jeē ín nuū guerra, tu sájnéñu de máá de jín jniñu máá de, chí cánuú jeē sáha de máni máá jēē ndácu tēe ní tejníñu de. ⁵ Te suni súcuan tēe cásiquí deporte, ma nihín de premio te núu tú condihvī ni de cosíquí váha de máá modo chíjniñu. ⁶ Te tēe sájniñu nihin ñuhun, máá de cúu jeē nihín xihna gā jeē cuáha itu. ⁷ Nacani ni rō siquī jeē cahán rī, te máá Jítoho yō sáha ya jeē jécūhun ni rō siquī ndihí.

⁸ Te cocuhun ndasí ni rō Jesucristo, Yaā ní quiji yucún rey David, te ni natecu yā mēhñu ndíyí, nájnūhun cáhán jnúhun jnáma ya yohó jēē nácani ri. ⁹ Te jeē siquī jnúhun un ndóho ri jnúndóho, te nde ni cajihni i ruhū íne ri vecāa nájnūhun ñn tēe ni sáha cuēchi xeēn. Te jnúhun Yaā Dios chí ma cúu cuhni i jeē ma cuité núu. ¹⁰ Núu súcuan te jéndeyí ni rī jító ri táca jnúndóho yáha síquí jeē cundáhú ni rī ñayuu jeē ní nacāji ya, návāha suni cācu máá i jeē quivī i ndaha Cristo Jesús, te quihín i nuū cujéñu i hí cáni. ¹¹ Chí ndaā cahán jnúhun yáha:

Núu vēsú na cúu yō jeē siquī yā, te suni cotecu yō jín yá,

¹² te núu cuandeyí ni yō ndoho yó, te suni ndacu yó jniñu jín yá.

Te núu ma cuajnúhún yó yā, te suni ma cuajnúhún yá yohó.

13 Te vēsú tu squícu vāha yó, te máá yá chi máni squícu ya,
chi tu cúu sáfalta yā, chi squícu ya jeē ni cáhān yā.

Tēe sájniñu squícu vāha jíin jnúhun ya

14 Jnúhun yáha na násthví ni rō ñayuu, te cahān nihin ro jíin i, jíto máá Jítoho yō, jeē ma téjñáhan i siquī tāca jnúhun sáá-ni. Chi tu ndé jéjñiñu cuiti, chi sa stívi ñayuu jíni sōho. 15 Te nducú ndéyí ró jeē cuajnúhún Yaā Dios rohó, jéē cúu ró tée sájniñu squícu vāha jíin jnúhun ya, návāha ma cúcanu rō nuū yā siquī ní ñn, chi vāha nacani ró jnúhun ndaā yā. 16 Te ma quívi nduu rō jíin táca jnúhun sáá-ni ñayívi yáha, chi suu sáha jeē ndúcuehē gā jniñu néé quívicoo ñayuu cácahān. 17 Te táca jnúhun cástéén i chi cúu nájnūhun ñn ndíhyi xeēn jeē sacáhú gá cuahān. Te Himeneo jíin Fileto cúu uū tée jeē casáha súcuan. 18 Chi tée un ní cajica yátá de nuū jnúhun ndaā, te cácahān de jeē jé ni cuu ni canatecu ndíyi. Te súcuan cásaca nuu de xini sava ñayuu cácañdije. 19 Te Yaā Dios ni jeni ya ñayuu máá yá, te íyó cutú ndáā i jeē ma cáca yátá i, nájnūhun yósó núu tútu ñi: Je jíni Jítoho yō Yaā Dios táca ñayuu jeē yíhi ndaha máá yá. Te suni cáhān: Tāca ñayuu jeē ndácunehen síhví Cristo, na cújiyo i nuū jniñu néé, áchí.

20 Te ini ñn vehe cáhnu íyó cuéhē cohō, nasūu máni cohō oro cohō plata, chi suni cohō

yujnu cohō ñuhun. Te íyó jéē fino te íyó jéē corriente. 21 Te núu ñn ñayuu sándoo i máá i jeē quénda i nuū tācá jniñu néé, te cuu i nájnūhun ñn cohō fino. Te coo ndoo coo ñi i nuū Jítoho yō, te nihñ jniñu i ndese cúni máá yá. Te coo tūhva i jeē sáha i tācá jniñu vāha.

22 Núu súcuan te cunu ró coto ró táca jéē tú vāha jeē cándiyo ni tée suchí. Te condiquin rō jniñu ndaā, jíin jnúhun cándije ró yá, jíin jnúhun cúndáhú ni, jíin jnúhun coyūcu mání jíin jñáhan. Te súcuan sáha ró ndé jíin táca ñayuu ndoo ánuá jeē ndácunehen síhví máá Jítoho yō. 23 Te ma quívi nduu rō jíin táca jnúhun cánéé ñi jeē tu íyó cájí, chi je jíni rō jeē sáha jeē tejñáhan ñayuu. 24 Te mozo máá Jítoho yō, tú vāha jeē tejñáhan de, chi sa suhva cánuú jéē coo vāha ni de jíin táca ñayuu. Te coo vāha ni de stéén de, te cuandeyí ni de jíin i. 25 Te jíin jéē víta ni de te caní ichí de ñayuu nihin ni. Chi sanaa te nacani ni i sáha Yaā Dios, te jecūhun ni i ndese íyó jnúhun ndaā. 26 Te nducájí ni i te cācu i nuū jexeén jeē ní jñi ún i, chi ni cundeyí jíin i jeē sáha i jeē cuní máá.

Siquī ndese coo ñayuu sáha néé quívi cuándihi

3

1 Te suni na jécūhun ni rō jeē quívi cuándihi te quee quívi coo jnúndóho. 2 Chi coo ñayuu jeē chíñuhún máá, te ndiyo ni i xūhún, te sátéyí i

máa i, te sándúxí i máa i. Te cahān neé i siquī Yaā Dios, te cunīhni ni i nuū tatá i nuū naná i, te ma nácuatáhú i, te ma chiñúhún i Yaā Dios. ³ Te ma cóo manī i jín jnāhan i ni ma cundáhú ni i. Te sájnúhún i, te ma cúu casi i tāca jēē ndíyo neé ni i, te yōhyo xeēn coo i, te quitī ni i coto i tācá jniñu váha. ⁴ Te suni nastúu i jnāhan i, te ma yūhú i sáha i cuēchi, te coo ndúxí ndasí i, te nducú i jeē cúsi ni maá-ni i, te ma nducú i quīvi i nuū Yaā Dios. ⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jín ñayuu casáha súcuan. ⁶ Chi sava tēe ún quīvi de vehe te stáhú de tācá ñahan cánéé jēe iyó ndasí cuēchi. Te yachī quívicoo ña jín tāca jnūhun tú ndaā jeē cúsi ni ña jín. ⁷ Te vēsú niní scuáha ña na-ni jnūhun, te tu cúu cuiti jecūhun ni ña jnūhun ndaā yā. ⁸ Te nájnūhun ni casáha tēe tásí Janes jín Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnūhun ndaā. Chi coo nee jeē níjnūní de, chi ma candíje ndije de jnūhun cándíje yó. ⁹ Te ma quée jniñu sáha de, chi cuni tāca ñayuu jeē tēe cánéé xíní cácuu de, nájnūhun ni cajini ñayuu jeē ni íyo neé xíní ndíndúú tēe jeē ní nducú casi nuū Moisés.

Jniñu sándīhi ndácu Pablo nuū Timoteo

¹⁰ Te rōhó chi je ni cutūhva vāha ró ndese stēen rī, ndese jíca ndaā rī, ndese tēe ni rī

sáha ri, ndese cándíje ri yā, ndese nee ri paciencia, ndese cúndáhú ni rī jnāhan ri, jín ndese jéndeyí ni rī. ¹¹ Chi ni cajito xeēn ñayuu ruhū, te ni ndoho ri jnūndóho. Te jíní rō tāca jēe ní ndoho ri ñuu Antioquía, ñuu Iconio, jín ñuu Listra. Te jíní rō ndese ni cajito xeēn i ruhū. Te máa Jítoho yō ni jnama ya ruhū nuū ndihí ún. ¹² Chi ndaā cúu jeē tāca ñayuu jeē ndihví ni cuajniñu vāha nuū Cristo Jesús, ndoho i jeē coto xeēn ñayuu i. ¹³ Te ñayuu casáha jniñu neé jín ñayuu castáhú, chi sa víhyá gā cocuu i jín jniñu neé, chi stáhú i ñayuu, te suni candíje máa i jnūhun stáhú.

¹⁴ Te rōhó chi sa cuiñi nihin ró jín jēe ní cutūhva ró jín jēe ní cucáhnu vāha ni rō. Chi jíní rō ndese ñayuu cúu jeē ní castéen nuū rō. ¹⁵ Chi nde ná lulí ró, te je jíní rō ndese cáhán tutu i jeē steen nuū rō ndese candíje ró jeē ni jíhí Cristo Jesús jehē rō návāha cācu ró. ¹⁶ Te ní tutu i cúu jnūhun jeē ni cáhān Yaā Dios, te vāha níhín jniñu jeē steen nuū yō, jeē cahán nuū yō, jeē náchuhun ichí yóhó, jín jēe scuéhnu yóhó jín jniñu ndaā, ¹⁷ návāha tēe cájejniñu nuū Yaā Dios, ije ni de te coo tūhva vāha de sáha de tācá jniñu váha.

4

¹ Te cáhán rī jín ró, jíto Yaā Dios jín Jítoho yō Jesucristo, Yaā quiji ndacu jniñu, te sándaā yā jniñu ñayuu cátecu jín ñayuu ní cajihí. ² Cáhán

nīhin ri jeē na nácani ró jnúhun ya, te stíhvī ni rō i candíje i. Te níní sáha ró súcuan núu núne i chí vēsú tu núne i. Te sáha ró jēē na jécūhun ni i, te cahān rō nuū i, te cani ichí váha ró i, te jíin cuéhē paciencia steén rō nuū i. ³ Chi quee tiempo jeē ma cuájnúhún cuiti ñayuu jnúhun ya jeē steén ndaā váha, chí sa cuajnúhún i jnúhun cúsiñ ni maá i, te nducú i cuehē maestro jeē steén nuū i máni jnúhun jeē nújnahan ni i cuni nahín i. ⁴ Te cujiyo i nuū jnúhun ndaā, te condihvī ni i tāca jnúhun jeē maá cuento-ni cúu. ⁵ Te róhó chi níní coo ndito ni rō, te cuandeyí ni rō jíin jnúndóho, te condihvī ni rō nacani ró jnúhun jnáma ya yohó, te squícu váha ró jíin jniñu ya jeē sáha ró.

⁶ Te ruhū chi je ni socō rī maá rí jeē cúu rī, te je cuacuyajni quivī cuu rī. ⁷ Te je ni cundeyí rí jeē ní nducú ndeyí rí siquī jniñu váha, te je ni jíinu ni jica rí ñayīvi yáha, te tu ní siáá rī jnúhun cándíje rí yā. ⁸ Te vijna je íyó túhva premio jeē nihín rī siquī jeē ní jica ndaā rī. Chi Jitoho yō cuāha ya un núu rī maá quivī sándaā yā jniñu, chí maá yá cúu juez ndaā. Te nasūu núu maá ñn ruhū cuāha ya, chí suni cuāha ya nuū tāca ñáyuu jeē cúu ni i jeē ndíji ya chí manī i jíin yá.

Jeē cána Pablo quiji Timoteo nuū de

⁹ Nducú ndeyí ró quiji yachī rō nuū rī. ¹⁰ Chi Demas ni stóo

de ruhū, chí ndíyo ni de ndajniñu ñayīvi yáha, te cuahān de ñuu Tesalónica. Te Crescente chí cuahān de Galacia, te Tito cuahān de Dalmacia. ¹¹ Te maá ñn na Lucas íne jíin rí. Te jeē quíji ró, te condeca ró Marcos quiji ró jíin de, chí váha cuajniñu de jeē chindéé ñáhán de ruhū jíin jniñu ya. ¹² Tíquico ni tají rí de cuahān de ñuu Efeso. ¹³ Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tāca libro, te jeē cánuú gá cúu tācá tutu ní tee maá rí.

¹⁴ Alejandro, tēe cúu herrero, yōhoyo xeēn ni sáha de jíin rí. Te maá Jitoho yō cuāha ya yāhu de jeē súcuan ní sáha de. ¹⁵ Te condito ró maá ró nuū de, chí yōhoyo ni cuu de contra siquī jnúhun cástéén yó.

¹⁶ Te ná ni ine ri jeē xíhna ñúhún núu tāca tóhō, te tú ni ñn tēe ní índichi jíin rí, chí ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de. ¹⁷ Te vēsú súcuan te maá Jitoho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñáyuu tācá nación tu jíin jnúhun ya. Súcuan ni jnama Jitoho yō ruhū nuū tāca tēe xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quivī ri andiví núu ndácu ya jniñu. Te na cáhán yō jeē yóhoyo luu cújéhnu ya ní cáni. Amén.

Saludo jíin bendición jeē

sándihí

¹⁹ Te cahān rō jeē sándeýí ni Prisca jíin Aquila, jíin ñáyuu vehe Onesíforo, achí rí. ²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹ Te condihvī ni rō quiji ró nde ná tu quejéé vico míjin. Sándeýí ni rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhun ni rī jeē maá Jítóho yō Jesucristo na cóo ya jíin ró, te Yaā Dios sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jín apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó,² te cocuhun ni i jeē cótecu i ní cáni. Chi nde ná tu jecōo ñayívi te ni jejnūhun Yaā Dios jeē cótecu yō, te íyó ndáā jnūhun ni cahān yā.³ Te vijna jeē ní quee tiempo ni jeni ya, te stéén caji yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya.⁴ Te téé ri carta yáha cuájeē nuū rō Tito, chi nájñūhun sēhe ri cúu ndije ró síquī jeē ínuú-ni cándíje yó yá. Te ñūhun ni rī jeē Tatá yō Yaā Dios jín Jítoho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sī ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmanī gā cundaā, te caní ró táca téé jéñu condito ñayuu cáncandíje táca ñuu, nájñūhun ni ndacu ri jniñu nuū rō.⁶ Te téé jéñu un cánuú jeē ma cóo ni ñin jeē nihín ñayuu cuēchi síquī de. Te cánuú coo ñin-ni ñasihí de. Te sēhe de cánuú cuu i sūchi

cáncandíje jeē ma nihín ñayuu cuēchi síquī i jeē tu sáha vāha i chí jeē níñni ni i nuū de.⁷ Chi téé cáncujéñu cáncandíje jniñu nuū ñayuu cáncandíje, cánuú caca ndaā de chí cáncandíje jniñu de síquī jniñu Yaā Dios. Te ma satéyí de máá de, ma quití yachī ni de, ma cúu de téé nájñni, ma cuajnáhan de, te ma ndíyo ni de xūhún.⁸ Chi sa cánuú jéé niní cuāha núu de vehe nuū ñayuu cájica, te níní sáha de jniñu váha, te ndito coo xiní de, te coo de téé ndaā, te coo ndoo ánuá de, te casi de modo jeē cuní maá de.⁹ Te cánuú cuiñi nihin de jín jnūhun ndaā jeē ni scuáha de, návāha cuu stáhví ni de ñayuu jín táca jnūhun ndaā vāha, te suni cuu sáha de jeē jécūhun ni ñayuu cácuu contra, te casi i yuhu i.

¹⁰ Chi íyó cuéhē ñayuu níñni ni, te cástéén i ñnga modo jéni ni maá i jeē súcuan cácu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan.¹¹ Te cánuú jéé casi rō yuhu táca téé ún, chí cástéén de jnūhun jeē tu íyó váha stéén de, chí cuní de nihín de xūhun síquī ún. Te súcuan sáca nuu de xiní ndihí ñayuu táca vehe.

¹² Te ñin téé isla Creta jeé nácani jnūhun, ni cahān de síquī jnáhan ñuu de: Jnáhan yó ñayuu Creta, chí máni ñayuu stáhú cácuu i, te nájñūhun quití xéén casáha i, te máni ndáhví ni i caji cuehē i, te cúxí i, áchí de.¹³ Te ndaā cúu jnūhun ni cahān téé ún. Jeé yúcuan na cúxeén rō nuū i,

návāha ndaā vāha na cándíje i. ¹⁴ Te ma sáha i cuenta tāca jnúhun ni catava jnáhan yó hebreo, jeē maá cuento-ni cúu, ni ma squícu i jniñu cándacu tēe ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i tācá-ni. Te ñayuu tu cándíje jeē tu ní ndúndoo jeē níjnūní, máni jéni ni i ñin modo tú ndoo tú vāha siquī tāca jéē jíto i. Chi nde jeē níjnūní i jíin ánuá i íyó jnéhen. ¹⁶ Te vésú cácahān i jeē jíni i Yaā Dios, te jíin jniñu cásáha i te jíni yō jeē tú ndije i. Chi ñayuu ndevāha ñayuu nīhni ni cácuu i, te tu cúu sáha i ni ñin jniñu váha.

Jnúhun ya jeē steén ndaā vāha

2

¹ Te máá ró chi níni na cáhān rō tāca jnúhun jeē qui-jnáhan jíin jnúhun ya jeē steén ndaā vāha. ² Te cahān rō jíin tāca tēe jéhu jeē na cóo cáji ni de, te sáha yíñúhún de, te ndito coo xinī de, te cándíje nīhin de jnúhun cúndáhú ni yā de, te cundáhú ni de jnáhan de, te cuandeyí ni de. ³ Te suni súcuan tācá ñahan jéhu, na sáha yíñúhún ña, te ma sajnúhún ña, te ma nájini ña. Te na stéén ña tāca jéē váha. ⁴ Te na stéén ña nuū tācá ñahan súchí jéē coo manī ña jíin yī ña jíin séhe ña. ⁵ Te ndito coo xinī ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yī ña, návāha

ma cahān neé ñáyuu siquī jnúhun Yaā Dios.

⁶ Te suni súcuan stíhví ni rō tāca tēe suchí jeē ndito na cóo xinī de. ⁷ Te rōhó, cuu ró ñin ejemplo nuū de jeē sáha ró tāca jniñu váha. Te jeē steén rō nuū de te ndaā steén rō te coo ndije ni rō. ⁸ Te ndaā vāha stéén rō, návāha ma cúu cahān ñayuu siquī. Te súcuan te cucanu ñayuu cácuu contra, chi ma cúu cahān i ni ñin cuēchi siquī rō.

⁹ Te cahān rō jíin ñáyuu cácuu mozo jeē na cuatáhú i nuū patrón i, te na sáha i tācá jniñu jeē nújnahan ni de, te ma cahān maá i núu ndácu de jniñu nuū i. ¹⁰ Te ma sacuíhná i ndajniñu de, chi na cúu i ñayuu ndaā ndije, návāha jíin tāca jniñu jeē sáha i, te cuni tāca ñáyuu jeē yóhyo luu cúu jnúhun jeē steén siquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sáha ya jeē váha ñayuu, chi cúni yā jnama ya ndihí ñayuu ñayívi. ¹² Te jnúhun jeē váha ni yā jíin yó, suu stéén nuū yō jeē na siáá yō jniñu neé jíin tāca jéē ndíyo neé ni yō. Te ndito na cóo xinī yō ini ñayívi yáha, te caca ndaā yō, te chiñúhún váha yó Yaā Dios. ¹³ Te suni stéén nuū yō jeē cocuhun ni yō jeē quéndōo ndetū yō jeē quíji máá quívi jéhu jeē quénda ndijin Yaā Dios, Yaā cujéhu ndasí, suu Jesucristo, Yaā jnáma yóhó. ¹⁴ Chi ni socō yā maá yá jehē yō, návāha jnama ya yohó núu tāca jniñu neé, te sándoo ndihí ya anuá yō

jeē cuu yó ñáyuu maá yá, te condihvī ni yō sáha yó jniñu váha.

¹⁵ Tāca jnúhun yáha cánuú stéén rō, te stíhvī ni rō i, te cahān rō nuū i, chi súcuan ndíso jniñu ró. Te ma cuáha ro jnúhun jeē sajeē ni ni ñn i nuū rō.

Ndese cánuú sáha ñayuu cácañdije

3

¹ Te na nástíhvī ni rō i jeē cuatáhú váha i nuū tēe cácujeñnu jíin tēe cándiso jniñu ñuu. Te na squícu i jniñu cándacu de, te coo ñamā ni i sáha i tācá jniñu váha. ² Te ma cahán neé i siquī ni ñn ñayuu, te coyūcu máni i jíin ñáyuu, te coo vāha ni i, te coo vítá ni i jíin ndihi ñayuu.

³ Chi máá yó suni ni cuu yó ñáyuu canéé jeē tu jécūhun ni nde saá, te ni cacunihni ni yō nuū Yaā Dios. Te ni cacandije yó táca jnúhun tú ndaā, te ni cajejniñu sáa-ni yó núu tāca jēe ní ndiyo neé ni yō jíin na-ni jniñu ni cusī ni yō. Te ni cajica yó jíin jniñu neé jíin jnúhun cuésún ni. Chi ni cajito uhū ñayuu yohó, te ni cajito uhū yō i. ⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndihi ñayuu ñayiví. ⁵ Te ni jnama ya yohó, te tú na jniñu váha ní casáha yó jēe jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sáha ya jíin máá Espiritu Santo. ⁶ Te yōhyo ni cunuú

Espiritu Santo ini anuá yō, jeē ni sáha Yaā Dios jeē jíin Jesucristo, Yaā jnáma yóhó. ⁷ Te súcuan te ni ndahva yā cuēchi yó síquī jeē váha ni yā, te nihīn tahú yō cotecu yō níí cáni, nájnūhun ñūhun ni yō.

⁸ Ndaā cúu jnúhun yáha, te cúní rī jeē niní cahān nihin ro táca jnúhun yáha, návāha ñayuu cácañdije Yaā Dios, na cóndihvī ni i cocuu i jíin jniñu váha. Chi íyó váha tāca jēe váha, te níhín jniñu jeē quéndōo vāha ánuá ndihi ñayuu. ⁹ Te ma quívī nduu rō jíin táca jnúhun cánée íi, jíin jnúhun siquī ndese vēji tāca jíi yō, jíin táca jnúhun sáha jeē cátejñáhan i cácahān i jeē cánuú squícu yó ley Moisés. Chi máni jnúhun cáhá-ni jeē tu níhín jniñu cúu.

¹⁰ Te núu íyó ñáyuu jeē sáha jeē ndusīn ini ñayuu cácañdije, te cahān rō nuū i ñn uū jínu, te núu ma chúhun ni i, te quenehen ró i. ¹¹ Chi jíni rō jeē ñn ñayuu sáha súcuan, stívī ndasí i chi jíni i jeē tú vāha sáha i, te jeē yúcuan jécondee cuēchi siquī i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuan condee rī tiempo mījin. ¹³ Te condihvī ni rō chindéé ñáhán ró Zenas, tēe cúu abogado, te suni súcuan Apolos. Chi cuáha ró jēe jíni ñúhún de jeē quíngoo ga de ichi nuū quihín

de. Te coto ró jéē ma cúmanī
ni ñn nuū de. ¹⁴ Te ñayuu
cáhīin jīn yó, cánuú cutūhva
i sáha i tǎcá jniñu váha, te
chindéé ñáhán i ñayuu cúmanī
nuū, návāha ma cótecu saá-ni
i.

*Saludo jīn bendición jeē
sándīhí*

¹⁵ Tāca ñáyuu cáyūcu jīn rí
yáha, cácahān i jeē sándeyí ni
rō. Te cahān rō jeē achí rí
jeē sándeyí ni ñayuu jīñā jeē
maní yō jīn síquī jeē cácandíje
yó. Te ñúhun ni rī jeē na
sáha ga Yaā Dios jeē váha róhó
jijnáhan ró. Súcuan na cóo.
Amén.

CARTA JEE NI TEE SAN PABLO APOSTOL NUU FILEMON

¹ Máá rí cúu Pablo, te íne ri vecāa jeē siquí jnúhun Cristo Jesús. Te jín hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhīyo manī rī jín, chi chéndéé ñájnáhan ró jín rí siquí jníñu Yaā Dios. ² Te suni cátee ri carta yáha nuū ñáyuu cá candíje cándutútú ini vehe ró, te suni nuū hermana yō Apia, jín núu Arquipo, tēe chéndéé ñájnáhan jín yó siquí jníñu cánducú ndeyí yó jín. ³ Te cáñuhun ni rī jeē Tatá yō Yaā Dios jín Jítoho yō Jesucristo, na sáha ga yā jeē váha róhó jínáhan ró, te sáha ya jeē coo ndeyí coo sī ni rō.

Tēe cúndáhú ni te cándíje váha cúu Filemón

⁴ Te jeē jicán tahu rī nuū Yaā Dios te tu náa ni rī cacān tahu rī jehē rō, te ní ní nácuatáhú rí nuū yā jeē siquí rō. ⁵ Chi níhín rī jnúhun jeē váha cándíje ró jnúhun cúndáhú ni Jítoho yō Jesús rohó, te cúndáhú ni rō tāca ñáyuu yíhi ndaha Yaā Dios. ⁶ Te jicán tahu rī jeē ñáyuu ni cacandíje siquí jeē candíje máá ró, na jécūhun váha ga ni i siquí tāca jéē váha jeē sáha ya yohó jeē jín Cristo Jesús. ⁷ Chi cúsi ndasí ni rī te íyó ndeyí ni rī, hermano, siquí jeē cúndáhú ni rō ñáyuu

cá candíje. Chi máá ró ni sáha jeē ní ndusi ni i.

Jeē jicán Pablo ñn favor jehē Onésimo

⁸ Núu súcuan te cáhán ndahú rí jín ró, vēsú cuu ndacu ri nuū rō ndese cánuú sáha ró, chi cúu ri apóstol Cristo. ⁹ Te tuú chi sa cáhán ndahú rí jín ró siquí jeē cáhīyo manī yō. Te cúndáhú ni rō ruhū sáha ró jéē cuní ruhū Pablo, chi je jéhu ri, te íne ri vecāa jeē siquí jnúhun Cristo Jesús. ¹⁰ Te cáhán ndahú rí jín ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi váha cuajníñu i nuū rō jín núu rī. ¹² Te nátají rí i najeē i nuū rō. Núu súcuan te cáhán váha ró jín i, te sáha ró cuenta jeē nájnūhun máá rí ni najinū, chi yōhyo manī rī jín i. ¹³ Te cusí ni rī núu jeē na cúu quendōo i jín rí yāhá, návāha cuajníñu i nuū rī lugar máá ró ní jéé íne ri vecāa jeē siquí jnúhun váha ya. ¹⁴ Te tu ní cúní rí sáha ri súcuan, chi nde cuāha máá ró jnúhun. Chi nasūu jéé safuerza rī rohó, chi jeē váha ni rō te sáha ró favor jín rí, nájnūhun cúsi ni máá ró. ¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendōo i jín ró sáha Yaā Dios. ¹⁶ Te vijna tuá cúu i ñn mozo jeē ní jeen ró, chi ni nduu i ñn jeē váha ga, suu ñn

hermano jeē maní rō jín. Te ruhū chi yōhyo manī rī jín i, te nagā ni cuu máá ró jeē ma cóo manī rō jín i. Te nasūu jeē maní rō jín in tēe súcuan-ni, chi siquī jeē cúu i in hermano jeē candíje nuū Jítóho yō.

17 Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jín i jeē jinú i nuū rō, nájnuhun jeē ruhū cahān rō jín. 18 Núu na-ni falta ni sáha i nuū rō, chí núu táu i nuū rō, te cacān rō chunaa maá rí. 19 Ruhū Pablo, jín ndaha máá rí tēe ri yāha jēe maá rí nachunaa. Súcuan cáhán rī vēsú cuu cahān rī jeē sa máá ró taú nuū rī sáha ró jēe cúsi ni rī siquī jeē ni scándíje ri rohó te ni cācu ánuá rō. 20 Núu súcuan, hermano, sáha ró favor yāha jín rí siquī jeē candíje ró Jítóho yō. Sáha ró jēe ndúsi ni rī, siquī jeē cúu ró hermano candíje Cristo.

21 Te tēe ri yāha núu rō, chi cúcáhnū vāha ni rī jeē cuatáhú ró, te nde vihyá gā sáha ró vēsú jeē ni jícān rī. 22 Te suni jícān rī jeē sátūhva ró núu cóndee rī, chi ñúhun ni rī jeē quénda ri yāhá te jeē rī nuū rō sáha Yaā Dios siquī jeē cájicān tahu rō jehē rī.

Saludo jín bendición jeē sándihí

23 Epafra, tēe íne jín rí vecāa jeē siquí jnúhun Cristo Jesús, cáhán de jeē sándeyí ni rō. 24 Te suni súcuan cácahān Marcos, jín Aristarco, jín Demas, jín Lucas, tēe cáchindéē ñájnáhan jín rí siquī jníñu ya.

25 Te ñúhun ni rī jeē Jítóho yō Jesucristo na sáha ga yā jeē vāha róhó jínáhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní taji Yaā Dios Sēhe ya ni nacani ya jnūhun

¹ Tijnī jīnu te tijnī modo ni cahān Yaā Dios jīn táca jí yō nde jenahán, chi ni taji yá tēe ni canacani jnūhun ya.

² Te vijna te tiempo cuándihi yāha ní taji yá maá Sēhe ya ni nacani ya jnūhun nuū yō. Te jīn Sēhe ya ni sáha ya ñayīví jīn táca gá, te ndiví jeē iyó ní chihi ya ndaha Sēhe ya.

³ Te Sēhe ya yōhyo luu cújēhnu ya, nájñūhun luu cújēhnu maá yá. Te ndihi ndese cúu maá yá, suni súcuan cúu Sēhe ya. Te jīn poder jnūhun ni cahān Sēhe ya te iyó cutú ndihi-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cújēhnu nde andiví.

Jeē cújēhnu ga Sēhe Yaā Dios vēsú tēcá ndajéhé yā

⁴ Te ni ndujéhnu ndasí gá Sēhe ya vēsú tēcá ndajéhé andiví, chi ni nihīn yā tahū jeē ndiso ya jniñu jēhnu ndasí gá vēsú jniñu cándiso ndajéhé.

⁵ Chi súcuan ni cahān Yaā Dios jīn Sēhe ya, te nasūu jīn ndajéhé yā:

Máá ró cúu Sēhe ri,
te vijna te ni sajuhnu ri roho
jēe cúu ri Tatá rō.

Te suni ni cahān yā jnūhun Sēhe ya, te nasūu jnūhun ndajéhé yā:

Máá rí cúu Tatá nuū Sēhe ri,
te máá i cúu Sēhe nuū rī.

⁶ Te suni ná ni taji yá Sēhe ya cújēhnu, ni quiji ini ñayīví yáha, te ni cahān yā:

Ndihī ndajéhé rī na chíñúhún
i Sēhe ri.

⁷ Te ni cahān tucu ya jnūhun ndajéhé yā:

Nájñūhun quée tachī, súcuan
cájica ndajéhé rī sáha ri,
te tēcá un jēe cájejnīñu nuū
rī, nájñūhun yáñuhūn
cácuu.

⁸ Te jnūhun Sēhe ya chi sa
suhva cáhán yā:

Máá ró cúu Yaā Dios, te ndacu
ró jniñu ní cáni,
te jniñu ndacu ró, máni jniñu
ndaā cúu.

⁹ Cúsī ni rō jīn jniñu váha, te
jito uhū rō jniñu née.

Jeē yúcuan ruhū, Yaā Dios
maá ró, ni sáha ri
jeē yōhyo ga cúsi ni rō vēsú
tēcá gá jeē iyó andiví.

¹⁰ Te suni cáhán yā:

Máá ró cúu Jitoho, te nde
xīhna ñúhún ni sáha ró
jēe ni jécōo ñayīví.

Te andiví chi suni jeē ni sáha
ró cúu.

¹¹ Te tēcá un chi naa, te máá
ró chí ní cáni iyó ró.

Te tēcá un chí cutúhú
nájñūhun cutúhú ññ
sahma,

¹² te nacaquin jnahnū rō te
nasama ró jíjnāhan.

Te máá ró chí ma sáma cuiti
rō,

te quiví cótecu rō ma ndihī
cuiti.

¹³ Te súcuan ni cahān tucu
yā jīn Sēhe ya, te nasūu jīn
ndajéhé yā:

Cucōo ró lado váha ri nuū
cújēhnu ró,

te na sáha ri jeē quende rō poder tāca jēē cájito uhū rohó.

Achí yá. ¹⁴ Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jín jnúhun jnama ya yohó

2

¹ Núu súcuan te cánuú jēē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó.

² Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndáá. Te ñayuu nihni ni jín ñáyuu tu ní cájendetū jnúhun ún, vetū-ni ni canihín i castigo. ³ Te núu súcuan ni cuu, te yóhó, ¿ndese cācu yó núu ma chúhun ni yō jnúhun cánuú gá jeē jnama ya yohó? Chi xihna gā maá Jítoho yō ni nacani ya jnúhun yáha, te sáá te tēe jeē ní cajini nahín ni canacani ndáá tucu maá de nuū yō. ⁴ Te Yaā Dios suni ni chindéé ñáhán yá de jeē ní canacani de jnúhun ya. Chi ni sáha ya jín de jeē ní casáha de sún sún jniñu jéhu jeē nahán náá ni yō jíto yó poder yā. Te suni ni jēhe ya Espíritu Santo yā nuū ñn ñn yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnúhun jeē condiso jniñu siquī ñayivi jēē quíji, chi sa suhva nuū

Séhe ya Cristo ni jēhe ya. Te siquī ñayivi un cúu jeē cahán rī yáhá. ⁶ Chi suhva yósó núu tútu jeē ni cáhán David jín yá: ¿Na vé cúu ñayuu jeē ñúhun ni ní i?

Te ndíhví ni ni siquī i, te máá ñáyuu cúu í.

⁷ Chi jecu-ni tiempo ni sáha ní jeē núu i nuū tāca ndajéhé ni.

Yūcuán na te sajuhnu ní i te squéndōo yíñúhún ní i, te cani ní i jeē ndacu i jniñu nuū tāca jēē ni sáha ní.

⁸ Te ndíhi jeē iyó chi sáha ní jēē cujéhu i siquī.

Achí tutu. Te jeē ni sáha Yaā Dios jeē cujéhu i siquī ndíhi, núu súcuan te ma quéndōo ni ñn jeē ma cújéhu i siquī. Te vésú súcuan te vijna te ná tu coto yó jēē cujéhu i siquī ndíhi jeē iyó. ⁹ Te jeē jini yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yá jehē yō, te jeē yúcuan ní ndujéhu luu tucu ya, te ndíhi cáhíyo yíñúhún núu yā. Chi jeē váha ni Yaā Dios jín yó, jeē yúcuan ní jihí Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máá yá ni sáha. Te suni ndéca ya cuehē ndasí séhe ya jeē quihín i andiví núu luu cujéhu i jín yá. Te váha níhín jniñu jeē ni jēhe ya jnúndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máá i jeē ní candundoo i, chi ñn-ni Tátá i jín yá. Te jeē yúcuan

tu cúcanu Jesús jeē cahán yā hermano yā jíin i, vēsú ndasí núu i. ¹² Chi yósó núu tútu jeē ni cáhān yā jíin Tátá yā:

Cachi na jnúhun ní núu tācá hermano na,
te mēhñu núu cándutútú i cata
ná ndese cújéhnú ní.

¹³ Te suni cáhán yā nájñuhun cácahān hermano yā:

Ruhū chi cándíje ri yā.

Te cáhán tucu yā:

Yāha íne ri jíin táca gá sēhe Yāā Dios jeē ni jéhe ya nuū rī.

Achí Jesús.

¹⁴ Te nájñuhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhí i. ¹⁵ Te ni cacu ya súcuan návāha cuu quenehen ya tāca ñáyuu chíji jñuhun jeē yuhú i cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhán yā tācá ndajéhé yā, chi sa suhva jeē chindéé ñáhán yā ñayuu cácañíje jeē ní nduu yucūn Abraham. ¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū cujéhnú jeē squícu vāha ya tācá jniñu jehē i nuū Yāā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸ Chi suni maá yá ni ndoho ya jeē ní jito ndee jñúndóho ya, te jeē yúcuan cuu chindéé ñáhán yā ñayuu jeē jíto ndee jñúndóho i.

Cújéhnú ga Jesús vēsú Moisés

3

¹ Hermano, ni cana Yāā Dios rohó, te cácuu ró ñáyuu ndoo maá yá. Núu súcuan te na nácani vāha ni rō siquī Cristo Jesús, Yāā cúu apóstol jeē ní tejníñu Yāā Dios, te suni cúu ya sutū cujéhnú siquī jnúhun cácañíje yó. ² Chi ni squícu vāha ya nuū Yāā Dios, Yāā ní tee jniñu un siquī yā, nájñuhun ni squícu vāha Moisés nuū ñáyuu jeē ni cáhān Yāā Dios jeē cácuu i ñayuu vehe ya. ³ Chi cújéhnú ndasí gá Jesús vēsú Moisés, nájñuhun cújéhnú ndasí gá tēe sáha vehe nasūu maá vehe. ⁴ Chi tācá vehe íyó tée ni sáha. Te maá Yāā Dios cúu jeē ni sáha tāca jéé iyó. ⁵ Te Moisés ni squícu vāha de jíin jniñu jeē ní cuu de mozo ni condito de ñayuu vehe Yāā Dios. Te ni castühún de siquī tāca jnúhun jeē steén yā tiempo quiji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ní jéjñuhun ya nuū i. Te suni maá yó cácuu ñayuu vehe ya, te núu na cuíñi níhin yó jíin jnúhun cácañíje yó ndé quiví sándihí, te núu cúsiñi ni yō jeē ñúhún ni yō tāca jéé váha jeē coo.

Jñuhun jeē ndetātu ñáyuu Yāā Dios

⁷ Núu súcuan te ña chúhun ni yō jeē cahán Espíritu Santo nuū tútu i:

Vijna te núu cuni sōho ró jéé cahán Yāā Dios,

⁸ te ma cúnihni ni rō nájñuhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yūcuan ní casáha jíi rō jniñu jeē ni quítī ni rī, achí yá,

vēsú ni cajito i tāca jniñu ni sáha ri uū xico cuiyā.

¹⁰ Jeē yūcuan ní quítī ni rī jíin ñáyuu tiempo un.

Te ni cahān rī jeē máni jeē castóo i ichi ndaā,

chi tu cáconi i condiquīn i jnūhun ri.

¹¹ Te jeē yūcuan ní quítī ni rī, te ni cahān teyí rí

jeē ma quívicoo cuiṭi i nuū ndetātú i sáha ri.

Achí yá.

¹² Núu súcuan hermano, coto má conéé ánuá ni ñn ró jéē cáca yátá ró jeē tuá candíje ró Yaā Dios, Yaā técu.

¹³ Chi sa suhva tāca quívī na stáhvī jnáhan ni rō, níni gá iyó tiempo, návāha ma cúnīhni ni ni ñn ró te stáhú rōhó sáha ró cuéchi. ¹⁴ Te núu na cuíñi nīhin yó ndé quívī sándīhi jíin jnūhun jeē ní quejéé yó jíin, yūcuán na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jéē cahán Yaā Dios,

te ma cúnīhni ni rō návjñūhun ni cúnīhni ni ñáyuu jenahán.

Achí. ¹⁶ ¿Te ndé-ni cúu ñáyuu jeē ní jini jnūhun ya te ni cúnīhni ni? Suu ndihi ñáyuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñáyuu jeē ni quítī ni yā nuū uū xico cuiyā? Suu ñáyuu jeē ní casáha cuéchi, te ni cajihī i nuū ñúhun téhé.

¹⁸ ¿Te ndé-ni i cúu jeē ni cáhān teyí yá jeē ma quívicoo cuiṭi i nuū ndetātú i sáha ya? Suu máá ñáyuu jeē tu ní cájendetū nuū yā. ¹⁹ Núu súcuan te jíni yō jeē tu ní cúu quívicoo i nuū ndetātú i, siquī jeē tu ní cácanđije i ya.

4

¹ Te níni íyó gá jnūhun jeē ni jéjñūhun ya jeē quívicoo ñáyuu nuū ndetātú i sáha ya, te na cónso íyo yó jéē ma stívi yó, návāha tú coo jíin sava ró jéē ma nihín rō quívī ró. ² Chi suni máá yó ni cajini sōho yó jnūhun jeē jnáma ya yohó, návjñūhun ñáyuu jenahán un. Te nuū máa i tu ní jéjñūhun jnūhun ni cajini i ún, siquī jeē tu ní cácanđije i. ³ Te yohó jéē cácanđije, máá yó cúu jeē quívicoo yó núu ndetātu yó. Te siquī ñáyuu tu cácanđije ni cahān yā suhva:

Jeē yūcuan ní quítī ni rī, te ni cahān teyí rí

jeē ma quívicoo cuiṭi i nuū ndetātú i sáha ri.

Te súcuan ni cahān yā vēsú je íyó túhva nuū ndetātú i nde ná ni jecōo ñayíví. ⁴ Chi súcuan yósó jnūhun nuū tútu ñ siquī quívī uxá:

Ni sínu Yaā Dios tāca jéē ni sáha ya, te ni ndetātu yá quívī uxá.

⁵ Te suni nuū tútu un yósó tucu:

Ma quívicoo cuiṭi i nuū ndetātú i sáha ri.

Achí yá. ⁶ Núu súcuan te sava ñáyuu chí quívicoo nahín i nuū ndetātú i. Te ñáyuu jenahán jéē ní cajini jnūhun jeē

jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yúcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni yāha cuehē tiempo jeē ni cáhān yā jíin ñáyuu jenahán, te yósó núu tútu jeē ni sáha ya jeē suni ni cahān David suhva:

Vijna te núu cuni sōho ró jée cahán yā,

te ma cúnihni ni rō núu súcuan.

Achí tutu. ⁸ Te nde jenahán ní squívi Josué ñayuu Israel un ñuu nuū ndetátú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quivī jeē quívicoo i nuū ndetátú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájnūhun ni ndetātu máá yá. ¹⁰ Chi ñayuu jeē quívicoo nuū ndetátú i jíin yá, chi ndetátú i jeē ní casájniñu i, nájnūhun ni ndetátú Yaā Dios nuū jniñu ni sáha máá yá. ¹¹ Núu súcuan te na ndúcú ndéyí yó quivī yó núu ndetātu yó un, te ma sáha ni ñn yó cuēchi jeē ma cándije yó, nájnūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájnūhun ñn espada jeē xeén ndíndúú lado, chi nástúu cájí ndese íyó jée níjnūní yó jíin ánuá yó, nájnūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndihí ndese jéni ni yó jíin ndese cúní yó sáha yó. ¹³ Te tu íyó ni ñn jeē

yísāhí jeē tu jíin maá Yaā jeē náquihin cuenta, chi ndihí-ni jíin vāha ya, te ndihí-ni túu ndijin nuū yā.

Jesús cúu sutū kujénu ga

¹⁴ Te cánevāha yó ñn sutū kujénu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi ñihin yó jíin jnúhun jeē ní cándije yó. ¹⁵ Chi névāha yó ñn sutū kujénu jeē jíto ndáhú yóhó jeē tu fuerza yó squícu vāha yó. Chi nájnūhun ndóho yó jée jíto ndee jexeén yohó, suni súcuan ni ndoho ya jeē ní jíto ndee un yá, vēsú tú cuiti cuēchi ya. ¹⁶ Núu súcuan te ma yūhu yó, chi na quívi yó yuhu mesa yā, cúu jeē cacān tahú yó. Chi maní yā jíin yó, te cúndáhú ni yā yohó, te siquī jeē vāha ni yā te chíndée ñáhán yá yohó táca jínu jeē jíni ñúhún yó.

5

¹ Chi tāca sūtū jeē ní kujénu jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñayuu, te socō de ndajniñu jíin quiti nuū yā jeē siquí cuēchi i. ² Te cuu cahān vītá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quiti nuū yā jeē siquí cuēchi máá de, nasūu máá-ni jeē siquí cuēchi ñayuu.

⁴ Te ni ñn tēe tu cúu sájénu de máá de jeē cuu de sutū kujénu, chi sa máá Yaā Dios

cúu jeē nácāji ya de, nájñuhun ni nacāji ya Aarón nde jehahán. ⁵Te suni sícuan Cristo, tu ní sájéhnú ya maá yá jeē cuu ya sutū cujéhnú, chi sa Yaā Dios ni sáha, chi ni cahān yā jñuhun yáha:

Máá ró cúu Sēhe ri,
te vijna te ni sajehnú ri rohó
jéē cúu ri Tatá ró.

⁶ Te suni cáhán tucu ya nuū tútu i:

Níí cáni cúu ró sūtū,
nájñuhun sutū Melquisedec
jenahán.

⁷ Te Cristo, ná ni condee ya ñayiví, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te síquī jeē yíñuhún ní chiñuhún yá Yaā Dios, te ni chindéé ñájnáhan Yaā Dios jíin yá nuū jñundóho ún. ⁸ Chi vésú Sēhe Yaā Dios cúu ya, te ni jendetū yā ni ndoho ya ini ñayiví, te sícuan ni jini yā ndese cúu jñuhun jendetū.

⁹ Te ná ni cuu ni squícu ndihi ya jeē ní jendetū yā, te ni cucutú jñuhun jeē jnáma ya tāca ñayuu jendetū nuū yā, te cotecu i níí cáni. ¹⁰ Chi ni jeni Yaā Dios yā jeē cúu ya sutū cujéhnú nájñuhun sutū Melquisedec.

Síquī jeē ma cáca yátá i

¹¹ Te iyó cuéhē jñuhun jeē castūhun rí síquī tāca jéē yáha. Te yí cúu jeē jécūhun ni rō sáha ri, síquī jeē tu cáconi rō chuhun ni rō. ¹² Te je ni cunahán cácandíje ró, te jini ñuhún jéē cúu ró téē stéén

nuú. Te tuú chi sa cájini ñuhún tucu máá ró téē stéén nuú rō tāca jñuhun Yaā Dios jeē tú yí cuítí. Chi sa ni canduu ró nájñuhun sūchi yíquín jéē jíni ñuhún caxin i, chi ná tu ije i caji i jeē ndáva. Sícuan cácuu ró chi ná tu ije ró jíin jñuhun yí gá. ¹³ Chi núu máni máá nájñuhun sūchi yíquín jéxin cácuu ró, núu sícuan te tu cúu jecūhun vāha ni rō jñuhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē váha jíin jéē neé.

6

¹ Núu sícuan te na yáha yó núu tāca jñuhun Cristo jeē tú-ni yí, te na quíhín yō nuū jñuhun yí gá, návāha na íje vāha ni yō jíin jñuhun ya. Te ma ndejéé tucu yó jíin jñuhun jeē ni scuáha yó xíhna gā, suu jñuhun jeē nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, ² jíin síquī jeē jéndute, jíin síquī jeē soó ndaha xiní ñayuu, jíin síquī jeē nátecu ndīyi, jíin síquī jeē jnahnú ndetū ñayuu níí cáni. ³ Núu sícuan te na yáha yó núu tāca jéē yáha te quívi yó núu jñuhun yí gá, te núu cuāha Yaā Dios jñuhun.

⁴ Chi iyó ñayuu jeē jé ni jecūhun ni i, te je ni jini i tāca jéē jéhe Yaā Dios, te je ni quívi i nuū jñuhun stéén Espíritu Santo, ⁵ te suni je ni jini i jñuhun vāha Yaā Dios jíin ndese coo poder yā tiempo quiiji. ⁶ Te ñayuu un núu caca yátá i, te ma cúu gá ndejéé

jeé i jeē nácani ni i. Chi jeē cáca yátá i cúu nájñuhun jeē nácanni tucu i Sēhe Yaā Dios jicā cruz, te cájēhe i jñuhun canu yā cájito ñayuu. ⁷ Te ñayuu chi cácuu i nájñuhun ñuhun jeē cúun vāha saū nuū te ndóyo vāha. Te núu cánecoo jeē vāha caji tēe cásájñiñu, yūcuán na te cúshī ni Yaā Dios jín. ⁸ Te núu máni iñu yóquin jín yucū sajnéñu cánecoo nuū, núu súcuan te tu jéjñiñu cuiti, te squéndōo iī yā, te iñ quivī te cayū. Súcuan jnahnū ndetū ñayuu cájica yátá.

Jeē ñuhun ni yō tāca jéē vāha jeé coo

⁹ Te máá ró jijnáhan ró hermano, vēsú cácahān rī súcuan jín ró, te cácucahnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náā ni yā jñiñu cásáha ró. Chi siquī jeē cáhīyo manī rō jín yá te ni cacundáhú ni rō hermano rō cácucahnu, te ni cachindéé ñáhán ró i, te súcuan cásáha ró ndé vijna. ¹¹ Te cácuu rī jeē niní súcuan sáha ga ná iñ ná iñ ró ndé quivī sándihí, chi jeē sáha ró súcuan te nihīn rō ndihī jeē cáñuhun ni rō. ¹² Te cácuu rī jeē ma cúhuun ni rō, chi sa ndacu ró ñayuu cácucahnu jeē jín paciencia cándetu i, te jeē yúcuu nihīn tahu i tāca jéē ni jéjñuhun ya.

¹³ Chi quivī jeē ni jéjñuhun Yaā Dios nuū Abraham, te ni ndacunehen ya maá yá jeē ni jéjñuhun téyí yá, chi tuá na inga ndacunehen ya jeē

cujéhnu ga vēsú maá yá jeē cuu testigo yā. ¹⁴ Te ni cahān yā: Jendaá ndije jeē vāha ndasí sáha ri jín ró, te sáha ri jeē nducuehē ndasí yúcuu rō, achí yá jín Abraham. ¹⁵ Te jín paciencia ni condetu de, te súcuan te ni nihīn de jeē ní jéjñuhun ya. ¹⁶ Te núu cáhán teyí ñayuu, te ndacunehen i síhvī iñ jeē kujéhnu ga vēsú maá i. Te núu íyo iñ jñuhun jeē tu cácucahnu jnahan, te núu iñ tēe cáhán teyí de jín síhvī Yaā Dios, yūcuán na te jécuiñi jeē cácucahnu. ¹⁷ Te suni súcuan Yaā Dios, chi ni jéjñuhun téyí yá nuū ñayuu jeē cuáha ya tahu i. Chi ni cuni yá jeē cucáhnu vāha ni i jeē ma nácani yátá ni yá siquī jeē ni jéjñuhun ya nuū i. ¹⁸ Chi ma nácani yátá cuiti ni yá siquī jñuhun jeē ni cáhān yā uū jín, iñ jeē ni jéjñuhun ya, te inga jeē ni cáhān teyí tucu ya siquī suni jñuhun ún. Chi tu stáhú cuiti yā. Te jeē yúcuu máá yó jeē ní tūhva yó yá, chi yōhō íyo ndeyí ni yō, te cáñuhun teyí ni yō jeē siquī ya jeē ni cáhān yā. ¹⁹ Te siquī jeē súcuan ñuhun ni yō, te suu sáha jeē quéndōo ñihin ánuá yō jín jñuhun ya, te quéndōo ndaā ni yō, nájñuhun quéndōo ñihin barco jeē jñi gancho yuū. Te sáha jeē cúu quivī yó andiví núu iī gā, nájñuhun cuarto iī gā jeē ni íyo ichi yátá sahma ni ndita caa ini vehe iī jenahán. ²⁰ Te ini yūcuán chi xīhna gā Jesús ni quivī, návāha nune ya ichi quivīcoo yó. Te jeē yúcuu ní cáni

cúu ya sutū cujéhnū nájñūhun
sutū Melquisedec.

*Jeē cúu Jesús sutū nájñūhun
Melquisedec*

7

¹ Te máá Melquisedec ni
cúu de rey ñuu Salem, te
ni cúu de sutū nuū Yaā
Dios, Yaā cujéhnū téyí. Te
ni jejnahan de Abraham ná
ni nandicó Abraham jeē ní
cundeyí de ni cajejnáhan de
jín táca rey. Te ni jicān tahu
de jehē Abraham. ² Te táca
úxí ndajñíñu jeē ní quende
Abraham nuū táca rey un,
ni jēhe de ññ siquī un
núu Melquisedec. Te sñví
Melquisedec cuní cahān: rey
jeē sáha jñíñu ndaā. Te suni
nání de rey Salem, te jñūhun
Salem cuní cahān: jeē iyó
ndeyí sñ ni. Te jeē yúcuan
suni nání de: rey jeē sáha jeē
iyó ndeyí sñ ni ñayuu. ³ Te tu
cáhán tutu jñūhun tátá de ni
náná de ni táca jí de. Ni tu
cáhán núu ni cacu de, ni núu
ni jihí de. Chi cúu de nájñūhun
Jesús, Sēhe Yaā Dios, chi ní
cáni cúu de sutū.

⁴ Te condēhe jijnáhan ró náa
jéhnū ni cúu Melquisedec,
chi jí jéhnū yó Abraham ni
jēhe de ññ siquī táca jéē
uxí nuū de siquī táca jéē ní
quende de nuū rey un. ⁵ Te
jíní yō jeē táca úxí ndajñíñu
ni canihñ ñayuu, ni cajēhe i
ññ siquī un ní caquihin
tēe cácuu sutū yucūn Leví,
nájñūhun cáhán ley Moisés.
Te ni caquihin de nuū ñayuu
cácuu jñáhan de, chi ññ-ni
yucūn Abraham cácuu de

jín i. ⁶ Te Melquisedec
nasūu yúcūn Leví cúu de,
te vēsú súcuan te ni quihin
de ññ siquī táca jéē uxí
nuū Abraham. Te suni ni
jicān tahu de jehē Abraham,
vēsú cúu Abraham tēe jeē ni
jéñūhun ya nuū. ⁷ Te jíní vāha
yó jéē tēe cújéhnū ga cúu jeē
jicān tahu jehē tēe núu ga.
⁸ Te ñayívi yáha chi táca sūtū
cáquihin de ññ siquī táca
jéē uxí nuū ñayuu, vēsú cácuu
te tēe cájihí. Te Melquisedec
suni ni quihin de, te máá de
chi cáhán tutu ññ jeē técu de.
⁹ Te suni cúu cahān yō jeē
Leví, tēe jeē ní quihin ññ siquī
táca jéē uxí nuū ñayuu,
suni nájñūhun nuū maá
de ni quihin Melquisedec
ññ siquī táca jéē uxí.
Chi jeē ni jēhe Abraham
nuū Melquisedec, suu cúu
nájñūhun jeē suni ni jēhe de
jeē siquí Leví jín ndihí ga
yucūn de jeē quíji. ¹⁰ Chi
yucūn Abraham cúu Leví,
te vēsú ná tu cacu de quiví
jeē ni jéjnahan Melquisedec
Abraham, te nájñūhun jeē ni
jēhe máá de cúu jeē ni jēhe
Abraham.

¹¹ Te yucūn Leví ni cane
sutū Aarón jín táca gá sutū
ní quijicoo. Te ni castéén
de ley yā nuū ñayuu Israel
jenahán. Te núu ní cúu
sáha de jeē quendōo ndaā
ñayuu jín ley un núu, te tuá
cánúu jeē núcuiñí inga clase
sutū lugar Aarón jín yúcūn
de. Te inga clase sutū cúu
Cristo jeē cúu ya nájñūhun
sutū Melquisedec. ¹² Te núu
nucuiñí inga clase sutū, te

suní cánuú sáma ley siquī yucūn de. ¹³ Núu súcuan te ní sáma ley un, chí cáhán tutu īi jeē Jítoho yō Jesús cúu inga clase sutū ún, te ní cacu ya chíji inga yucūn. Te yucūn ní quiji ya ún, tú ní ĩn ní cúu sutū. ¹⁴ Chí jíni vāha yó jeē chíji yucūn Judá ní cacu Jítoho yō. Te yucūn ún chí tu ní cáhán cuiti Moisés jeē cánecoo sutū.

¹⁵ Te cáji cúu jeē ní nucuiñī Cristo jeē cúu ya inga clase sutū nájnūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájnūhun cáhán ley jenahán. Chí cúu ya sutū siquī jeē ndíso ya poder cotecu yā ní cáni te ma cúu cuiti yā. ¹⁷ Chí súcuan ní cahān Yaā Dios jnūhun ya:

Ní cáni cúu ró sūtū,
nájnūhun sutū Melquisedec.

¹⁸ Núu súcuan te jniñu jeē ní ndacu ley jenahán siquī sutū, chí ní naa vijna, chí tu ní níhín jniñu quendōo ní cáni. ¹⁹ Chí ley Moisés tu ní sáha jeē quéndōo ndaā ñayuu. Te ní nihīn yō ĩn jnūhun vāha ga jeē ñúhun ní yō jeē ndáhva Cristo cuēchi yó, te súcuan ní cuyajni yó núu Yaā Dios.

²⁰ Te jíin jēē ní cahān teyí Yaā Dios te cúu Jesús sutū.

²¹ Chí tāca gá tēe ún, nasūu jíin jnúhun jeē ní cahān teyí yá ní cúu de sutū. Te Jesús chí ní cahān teyí Yaā Dios jeē cuu ya sutū, chí súcuan cáhán tutu:

Ní cahān teyí máá Jítoho yō
Yaā Dios, te ma nácani
yátá ní yā:

Ní cáni cúu ró sūtū,

nájnūhun sutū Melquisedec.
Achí yá. ²² Núu súcuan te jíin Jesús ní cucutú ĩn contrato vāha ga vēsú ley jenahán. ²³ Te tāca gá sutū ún, chí ní ĩyo cuehē de, chí siquī jeē cájihī de te tu ní cúu cuiñī de ní cáni. ²⁴ Te Jesús chí cúu ya sutū jeē cuiñī ní cáni, chí técu yā ní cáni. ²⁵ Jeē yúcuan ndíso jniñu ya jnama ya ñayuu quíjicoo nuū Yaā Dios, cotecu i ní cáni. Chí ní cáni técu yā te cáhán yā jehē i jíin Yaā Dios.

²⁶ Núu súcuan te vāha ndasí sutū cujéhu cúu Jesús, jeē nájnūhun jíni ñúhún yó. Chí sutū īi cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cújéhu téyí yá nde nuū sucún gá andiví. ²⁷ Te máá yá tu jíni ñúhún sáha ya nájnūhun ní casáha sutū cácujeñu jenahán, jeē ndiquiví ní casocō de quiti siquī cuēchi máá de xīhna gā, te sáá te siquī cuēchi ñayuu. Chí ĩn jínu-ni ní socō yā maá yá jehē yō, te ní cuu-ni. ²⁸ Chí ní jeni ley Moisés tāca sutū cujéhu jeē tú na fuerza squícu vāha. Yūcuán na te cuéé gá te ní cahān teyí Yaā Dios. Te jíin jēē ní cahān teyí yá, te ní jeni ya Sēhe ya jeē cúu ya sutū cujéhu, te sutū ndaā sutū vāha cúu ya ní cáni.

Jeē ndíso jniñu Cristo siquī ĩn contrato jeé

8

¹ Núu súcuan te jnūhun cánuú gá jeē jé ní cahān rī cúu yāhá: Névhā yó ĩn sutū

cujéhnú nájñūhun ni cahān rī, te ndéé yá lado váha mesa nuū ndácu jniñu máá Yaā kujéhnú nde andiví. ² Te vijna te cúu ya sutū nde andiví, jeē cúu ndije lugar iī jeē ni sáha máá Jítóho yō Yaā Dios, nasūu ñáyuu. Chi tu cáa nájñūhun vehe iī jenahán jeē ní casáha ñayuu. ³ Te tāca sūtū kujéhnú ni jeconaā de jeē socó de ndajniñu jíin quiñi nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴ Te núu ní iyo ga yā ini ñayiví, te ni ma quiñáhan jeē cúu ya sutū jíin tāca gá sutū, chi níni cásocó gā de quiñi nájñūhun cáhán ley Moisés. ⁵ Te jniñu casáha de, tu quiñáhan jíin jéé iyó andiví. Chi cúu ñn muestra-ni jeē steén siquī andiví. Te cúu nájñūhun jeē ni cáhān Yaā Dios jíin Moisés quiñi ní quejéé de sáha de vehe iī jenahán: Coto váha ró jéé sáha ró tāca ndajniñu nájñūhun jító jeē ni steén rī nuū rō nde xinī yúcu, áchí Yaā Dios jíin de. ⁶ Te vijna te sáha Cristo jniñu jéhnú ndasí gá vésú jeē casáha tāca sūtū ún, chi ndíso jniñu ya siquī contrato jeé jéé yóhyo váha ga, chi ndíso jñūhun jéhnú ga jeē ni jéñūhun Yaā Dios.

⁷ Chi contrato ley xīhna ñúhún, núu jeē ni sáha jeé quéé váha jniñu núu, te tuá cánuú jéé cóo contrato uū. ⁸ Chi ñayuu jenahán un jéé tu ní cáquendō ndaā, suhva ni cahān Yaā Dios jíin i, áchí tutu: Quiji quiñi jeē nasáha ri ñn

contrato jeé jíin ñáyuu Israel jíin ñáyuu Judá, áchí Jítóho yō Yaā Dios.

⁹ Te ma cóo nájñūhun contrato jeē ni sáha ri jíin jíi i jenahán,

quiñi jeē ní jñi ri ndaha de jíñáhan de,

te ni quenehen ri de ini nación Egipto.

Chi tu ní cásquicu váha de jíin contrato ley rī.

Jeé yúcu tuá ní táñúhún rí de, áchí Yaā Dios.

¹⁰ Núu súcuan te suhva cóo contrato jeé nasáha ri jíin ñáyuu Israel,

nde na quiñi quiñi yúcu, áchí Jítóho yō Yaā Dios:

Sáha ri jeé jécūhun ley rī nuū jeé níñúní i,

te suni ini anuá i tee ri jñūhun ley rī.

Te cuu ri Yaā Dios maá i, te maá i cuu ñayuu maá rí.

¹¹ Te tuá jíni ñúhún steén i nuū jñáhan i nuū ñáni i,

náváha cuni i ndese Yaā cúu Jítóho i.

Chi ndíhi i cuni ndese Yaā cúu rí,

nde ñayuu núu ga jíin ndé ñayuu kujéhnú ga.

¹² Chi cone cáhnú ni rī nuū i jeé ní casáha i jniñu néé,

te ni ma núcūhun ga ni rī cuēchi ni casáha i.

Achí Yaā Dios. ¹³ Te jeé ni cáhān yā jeé cuáha ya ñn contrato jeé cúu jeé ní cachi yā jeé tuá cuajniñu contrato xīhna ñúhún. Te ñn jeé ní cutúhú jéé tuá jeñiñu, chi jíni yō jeé je yajni naa.

Vehe iĩ ñayĩvi yáha ní steén ndese cáa andiví

9

¹ Te ndaā chi contrato xīhna ñúhún ní ndacu jniñu ndese chiñúhún i ya, jín ndese coo ñin vehe iĩ ini ñayĩvi yáha. ² Te ni cuvāha vehe iĩ ún, te ni iyo uũ cuarto. Te cuarto xīhna ñúhún jéē naní cuarto iĩ, ni ñin candelero oro jín mesa oro jín pan iĩ. ³ Te ni iyo sahna jeē ndíta caa jeē ndihyú inga cuarto jeē naní cuarto iĩ ndasí gá. ⁴ Te ini un ní iyo ñin altar oro nuũ cayú sūje cūtú, jín yéjnū jeē ñúhún contrato ley, te máni oro cúu ní síquĩ yejnú. Te ini yejnū un íne ñin tijehēn oro jeē ñúhún maná jeē ní cuun andiví. Te suni íne vara Aarón jeē ní nane numa, jín tabla yuũ jeē yosó jnúhún contrato ley. ⁵ Te síquĩ yejnú un ní cahīin ndindúú figura ndajéhé querubín jeē steén jeē íne Yaā Dios. Te ni sáha cuandahū síquĩ tapa yejnū nuũ ni cóso yuyú níñi jeē ndáhva cuēchi. Te tu núne yó cáhān gā yō síquĩ tāca yúcuan vijna.

⁶ Te ná ni jīnu tācá un, te núu-ni núu-ni quívicoo sutū ini cuarto xīhna ñúhún jéē casáha de jniñu jeē cúu de sutū. ⁷ Te ini cuarto uũ, chi tu cúu quívicoo na-ni sutū jín inga ñayuu, chi máñúhún-ni sutū kujéhnu ga cúu jeē quíví, te suni ñin-ni vuelta jeē cuiyá. Te suni ma cúu quíví de núu tú níñi quiti jeē socó de nuũ Yaā Dios jeē síquĩ cuēchi máa de jín síquĩ cuēchi ñayuu. ⁸ Te jín

yúcuan steén Espíritu Santo nuũ yō jeē ná ni iyo ga cuarto iĩ xīhna ñúhún ini ñayĩvi, te tu ní núne ichi jeē quíví ñayuu ini lugar iĩ ndasí jeē cúu andiví. ⁹ Chi tāca yúcuan cúu jeē ni steén ndese cúu tiempo vijna. Chi jeē ní casocō i ndajniñu jín quiti nuũ Yaā Dios, chi tu ní cúu cuiti sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquĩ yiqui cúñu yō, ndese caji yō, ndese coho yó, ndese ndundoo yó. Te ni jejníñu máa-ni nde ni quiji Cristo jín ñin modo vāha ga.

¹¹ Chi vijna je ni quiji Cristo, te cúu ya sutū kujéhnu ga jeē ndíso jniñu ya síquĩ tāca jéē vāha jeē ní quiji vijna. Te cúu ya sutū ini lugar iĩ nde andiví jéē kujéhnu ga te vāha ga vésú cuarto iĩ jenahán. Te nasūu jéē ní casáha ñayuu cúu, chi nasūu cuenta ñayĩvi yáha cúu. ¹² Te jeē ni quíví ya ini lugar iĩ ndasí gá nde andiví, te nasūu jín níñi ndixúhú ni níñi becerro, chi jín níñi maá yá ni quíví ya, ni socō yā ñin jīnu-ni jeē ní cáni. Te súcuan ni jnama ya yohó jéē cótecu yō ní cáni. ¹³ Chi nde jenahán te níñi stíquĩ jín níñi ndixúhú jín yāa becerro jeē ni cáyū nuũ altar, ni cacosō yuyú de síquĩ ñáyuu jeē tu íyó ndoo ánuá i, te súcuan ni ndundoo i nuũ yā. ¹⁴ Te núu ni nihīn jniñu níñi tācá quiti ún, te nagā ni cuu níñi maá Cristo. Chi Yaā ndoo cúu ya, te ni socō yā maá yá nuũ Yaā Dios, ni sáha Espíritu jeē iyó ní cáni.

Te niñi yā nácate ánuá yō nuū jniñu néé jéē cúū yō sáha. Te súcuan te cuu cuajniñu yó nuū Yaā Dios, Yaā técu.

¹⁵ Jeē yúcuan cúū jeē ndíso jniñu ya siquī ñn contrato jeé. Chi ni jihī yā, te súcuan ni quende yā cuēchi ni casáha ñayuu ná ni Iyo i chīji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ní cáni, nájñuhun ni jejnūhun ya. ¹⁶ Chi cúū nájñuhun núu sáha ñn tēe acta jeé cahán siquī tahū, te nde na cúū de te níhín jniñu. ¹⁷ Chi núu técu gā tēe ni sáha, te tu níhín jniñu. Te nde núu ni jihī de, te sáa te jéjñiñu. ¹⁸ Te suni súcuan contrato xīhna ñúhún, suni ni jini ñúhún cucutú jín níñi quiti ní jihī. Te contrato jeé chi ni cucutú jín níñi Cristo jeē ni jihī yā. ¹⁹ Chi ná ni cuu ni cachi Moisés táca jniñu ndácu contrato ley un núu ndivii ñayuu, te ni quihin de niñi becerro jín níñi ndixúhú jín ndute, te jín ixi cácuéhé jín yúcū hisopo ni cosō yuyú de siquī libro ley jín siquī ndivii ñayuu. ²⁰ Te ni cahán de: Yáha cúū niñi jeē cúcutú contrato ley jeé ní sáha Yaā Dios jín yó, achí de. ²¹ Te suni niñi un ní cosō yuyú de nde maá vehe ñ jín táca ndajniñu ni cajejniñu de jeē cáchiñúhún de ya. ²² Te je yajni ndihī ndajniñu, chi cahán ley un jeē jini ñúhún ndundoo jín níñi. Te núu ma cáti niñi te ma cóne cáhnu ni yā nuū cuēchi núú.

Jeē ni sócō Cristo maá yá

jeē quénde yā cuēchi

²³ Núu súcuan te táca ndajniñu un jéē cácuu muestra táca jéē iyó andiví, ni jini ñúhún ndundoo jín níñi quiti. Te táca maá jéē iyó andiví, chi ni jini ñúhún ndundoo jín níñi Cristo jeē yóhyo vāha ga. ²⁴ Te Cristo chi tu ní quívi ya ini lugar ñi jeē ní casáha ñayuu, chi ñn muestra-ñi ni cuu un jéē steén ndese iyó lugar ñi ndije nde andiví. Chi maá andiví ní quívi ya, te vijna íne ya nuū Yaā Dios jeē cahán yā jehē yō. ²⁵ Te maá sūtū cujéhnu ga quívi de táca cuíyā ini cuarto ñi gā jeē socó de niñi quiti. Te Cristo tu ní sócō yā maá yá cuehē jínu, chi ñn jínu-ni. ²⁶ Chi núu jeē súcuan te cánuú jéē cuehē jínu ndoho ya nde ná ni jecōo ñayiví te nde vijna núú. Te tuú chi sa tiempo cuándihī yāhá ni quenda ndijin yā ñn jínu-ni jeē ní cáni, ni sócō yā maá yá jeē ní quende yā cuēchi. ²⁷ Te nájñuhun ni cundaā jeē cúū táca ñáyuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihī yā ñn jínu-ni jeē ní sócō yā maá yá jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jéē socó tucu ya maá yá jeē quénde yā cuēchi, chi sa suhva jeē jnáma ya ñayuu jeē cándetu i jeē ndíji ya.

10

¹ Chi ley Moisés ni cuu ñn muestra-ñi táca jéē váha jeé ní quiji jín Cristo, ñn jeē steén-ñi ndese coo maá jéē

váha. Jeē yúcuān tu cúu cuiti sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quiti nuū cuiyá nuū cuiyá. ² Chi núu ní cúu sáha ley un jéē quéndōo ndaā i, te jecuiñī jeē cásocō i quiti núú. Chi núu ní cúu, te ñn jínu-ni te je ni quendōo ndoo ánuá ñayuu cásocō ún, te ma yūhu gá anuá i jeē ni sáha i cuēchi núú. ³ Te tuú chi jeē cásocō i quiti ún táca cuiyá, sa sáha jeē núcūhun ni i cuēchi i. ⁴ Chi ññī stíquī jín ññī ndixúhú, ma cúu cuiti quende cuēchi.

⁵ Jeē yúcuān ná ni quiiji Cristo ini ñayiví, te ni cahān yā jín Yaā Dios:

Jeē jéhi i quiti jín jéē jéhe i ofrenda nuū ní, chi tu ní nújnahan ni ní.

Te ni sátūhva ní yiqui cúñu maá ná jeē socó na.

⁶ Te tu ní cúsi ni ni jéē jéhu i quiti te sócō i ti jeē ndúndoo cuēchi i núú.

⁷ Yūcuān na te ni cahān ná: Yāha véji ná jéē squícu ná jniñu jeē nújnahan ni ní, Tátā Yaā Dios.

Chi súcuān je yósó jnúhun na núú tútu.

Achí Jesús. ⁸ Xíhna gā ni cahān yā jeē tu ní nújnahan ni Yaā Dios te tu ní cúsi ni yā jeē jéhi i quiti te jéhe i ofrenda, jín jéē jéhu i ti te sócō i ti jeē ndúndoo cuēchi i núú, nájnūhun ndácu ley jehán jniñu. ⁹ Te ni cahān gā yā: Yāha véji ná jéē squícu ná jniñu jeē nújnahan ni ní, Tátā Yaā Dios. Te jeē ni cahān yā súcuān, te ni sáha ya jeē jecuiñī

jeē cásocō i quiti, chi ni socō yā maá yá. ¹⁰ Te ni sáha Yaā Dios jeē iyó ndoo íyō íi yō nuū yā siquī jeē ni sáha Jesucristo jeē nújnahan ni Yaā Dios, suu jeē ni sócō yā yiqui cúñu yā ñn jínu-ni jeē ní cáni.

¹¹ Te táca sūtū ún ndiquiví ni cahān de ni cajejniñu de nuū yā, te cuehē jínu cájehni de suu quiti jeē socó socó de. Te táca un chi ma cúu cuiti quende cuēchi. ¹² Te Cristo chi ñn jínu-ni jeē ní cáni ni socō yā maá yá jeē siquí cuéchi yó. Te sáa te ni cucōo ya lado váha Yaā Dios nuū cujéhu ya.

¹³ Te yūcuān ndétu ya vijna nde quiiji quiví jeē quende yā poder táca jéē jito uhū nuū yā. ¹⁴ Chi jeē ni sócō yā maá yá ñn jínu-ni, te ni sáha ya jeē ní cáni quendōo ndaā ñayuu ni sándoo ya. ¹⁵ Te máá Espíritu Santo suni cáji cáhán yā siquī jnúhun yāha, chi xíhna gā cahān yā:

¹⁶ Suhva coo contrato jeē nasáha ri jín i,

nde na quiiji quiví yúcuān, áchí Jítoho yō Yaā Dios:

Sáha ri jeē jécūhun ley rī ini anuá i,

te suni nuū jeē níjnūní i tee ri jnúhun ley rī.

¹⁷ Yūcuān na te cáhán gā yā:

Ma núcūhun cuiti gā ni rī táca cuéchi jín jniñu néé ní casáha i.

Achí yá. ¹⁸ Núu súcuān te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquí cuéchi yó.

Jeē ní nune ichi quiví yó núu Yaā Dios

19 Jeē yúcuan hermano, ma ñn jeē cáni ni yō, chi cuu quiví yó lugar ñ ndasí ndé nuū iyó Yaā Dios, siquī jeē ní jeti ññ Jesucristo. 20 Chi ni nune ya ñn ichi jée jée cótecu yō ñí cáni sáha ya. Chi ná ni jihí yā te ni tahndē sahma ndíta caa jeē ndihyú lugar ñ ndasí gā ñni vehe ñ. Te súcuan ni steén Yaā Dios jeē núne quiví yó lugar ñ ndasí gā nuū iyó yá. 21 Te Jesús cúu sutū kujéhu ndasí jeē ndíto yóhó ñayuu cácuu sēhe Yaā Dios. 22 Núu súcuan te na quívicoo yó núu Yaā Dios, te na cóo ndije ndaā anuá yō, te na cándije ñhin yó jée iyó ndaā ndihí jñuhun ya. Chi jín ññ Cristo ni ndundoo ánuá yō nuū tāca cuéchi ni casáha yó, nájñuhun ni ndundoo yó núu yā jeē ní jendute yó jín ndute. 23 Te na cuiñi ñhin yó jín jñuhun jeē cácahān yō jeē ñuhun ni yō jeē sáha ya jeē váha jín yó. Te ma cáca yátá yó, chi váha squícu máá Yaā Dios jeē ní jéjñuhun ya nuū yō. 24 Te na nácani ni yō ndese sthví jnáhan ni yō jeē cundáhú gā ni yō jnáhan yó, jín jée sáha yó jññu váha. 25 Te níni na ndútútú yó chiñúhún yó yā, te ma cúhuun ni yō nájñuhun casáha sava i, chi sa víhyá gā na sthví jnáhan ni yō, chi je cájini yō jeē cuácuyajni quiví ndíji ya.

26 Te núu je ni jecūhun ni yō te ni jetáhú yó jñuhun ndaā, te núu máni sáha sáha-ñi yó cuéchi, núu súcuan te tuá na ñga iyó jée cúu siquī cuéchi yó. 27 Chi sa quéndō máni ga

jñuhun xeēn siquī yō jeē quiji quiví juicio te quiji yáñuhūn xeēn jeē cayū ñayuu jeē cájito uhū i ya. 28 Ñayuu squéhichí ley Moisés, te núu uū chí úní ñayuu cahán cuéchi siquī i, te cuu nahín i, te tuá na jñuhun cundáhú ni iyó. 29 Te nagā ni cuu jeē ma ndóho xeēn gā ñayuu jeē squéhichí i máá Séhe Yaā Dios, chi nájñuhun jeē jeñú níhnu i siquī yā. Te sáha i jeē tu ndé jéjññu ññ yā jeē ní jeti siquī contrato jeē ndúndoo i nuū yā nuú. Te súcuan sáha ndevāha i nuū máá Espiritu Yaā Dios jeē sáha jeē váha yóhó. 30 Chi je jíní yō jeē ní cáhān máá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítoho yō. Te suni cáhān: Máá Jítoho yō sándaā yā siquī cuéchi ñayuu yā. 31 Núu súcuan te xeēn ndasí cúu jeē quiví ñayuu ñni ndaha Yaā Dios, Yaā técu, jeē ndútahū i siquī cuéchi i.

32 Te na núcūhun ni rō ndese ni cuu ichi yátá, nde náa sá ní quejée ró caca ró jín luz yā, te ni cajendeyí ni rō ni candoho ró tijni jñúndóho xeēn. 33 Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jñuhun cuiñi ró jín ñayuu ni candoho súcuan. 34 Chi ni cacundáhú ni rō ñayuu ní cahñ vecā jeē siquí yā, te ni cacusñi ni rō vésú ni caquende ñayuu ndajññu ró. Chi ni casáha ró cuenta jeē ndé andiví cánevāha ró ñn tahū jeē váha ndasí gā jeē coo ñí

cáni. ³⁵ Núu súcuan te ma siaá rō jnūhun jeē ní candíje ndije ró jéē váha ni yā, chí cuehē ndasí táhū nihīn rō siquī ún.

³⁶ Chí cánuú jéē cuándeýi ní rō návāha sáha ró jéē núnjahan ni Yaā Dios, te nihīn rō jeē ní jéjnūhun ya. ³⁷ Chí cáhán tutu īi:

Ĥin núnúu-ni te ndee Yaā ndiji, te ma cucuéé yá.

³⁸ Te ñayuu jeē ní ndahva rī cuēchi i, cotecu i jeē candíje i jeē sáha ri jehē i.

Te núu na cáca yátá i, te ma cúsi Ĥi ní rī jín i.

Achí Yaā Dios. ³⁹ Te yóhó tu cácuu yó jnāhan ñayuu cájica yátá jeē jnahnú ndetū i. Chí sa cácandíje yó jéē nihín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cúndaā ndije ni yō jeē nihín yō tāca jéē ñūhun ni yō, jín jéē jiní váha yó jéē iyó ndije tāca jéē tu cájito yó núu vijna. ² Te ñayuu jenahán chí ni jéjnūhún yá i siquī jeē súcuan ní cacandíje níhin i.

³ Siquī jeē candíje yó cúu jeē jécūhun ni yō jeē ní sáha Yaā Dios ñayivi jín jnūhun ní cahān-ni ya. Te jín poder Yaā Dios jeē tu jító yó núu, ní jecōo tāca jéē jító yó núu.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vēsú Caín. Te jeē yúcuan ní jéjnūhún yá jeē iyó ndāā de, chí ní jetáhú yá jeē ní sócō de quití nuū yā. Te vēsú ní jihī

de, te cáhán gā ejemplo de jín yó nde vijna, chí ní candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andiví, te tu ní jhí de. Te tu ní cánanihīn ñayuu de, chí ní ndoñúhún-ni de ní sáha ya. Te áchí tutu jeē nde ná tu naquihin ya de te ní cusī ni yā jín táca jéē ní sáha de. ⁶ Te núu tu cándíje yó jéē sáha ya jehē yō, te tú na modo cusī ni Yaā Dios jín yó. Chí ñayuu jeē cuní quivicoo ndaha ya, cánuú jéē candíje ndaā i jeē iyó yá jín jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sáha Yaā Dios jehē de, ná ní castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ní sáha de barco cáhnu jeē naní arca, návāha cācu de jín ní vehe de. Te jeē súcuan ní candíje de, te ní cane cuēchi siquī ñayuu jeē tu ní cándíje i ya. Te ní ndahva yā cuēchi de siquī jeē ní candíje de jeē sáha ya jehē de.

⁸ Te Abraham ní candíje de jeē sáha ya jehē de, te jeē yúcuan ní jetáhú de ná ní cahān yā jín de jeē quihín de ĩn lugar nuū cuáha ya cuu tahū de. Te ní quenda de cuahān de, vēsú tu jín de ndé nuū quihín de. ⁹ Ni candíje de jeē sáha ya jehē de, te jeē yúcuan ní condee tatú de nuū ñūhun jeē ní jéjnūhun ya jeē cuáha ya nuū de. Te ní condee de vehe ñi, te suni súcuan

Isaac jíin Jacob, chi sēhe de ún suni inuú níhīn tahū i jíin de jeē ni jéjnūhun ya. ¹⁰ Chi ni ñuhun ni de condee de máá ñuu andiví jéē iyó cutú cimientó, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sáha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu in sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sáha in-ni Abraham, vésú je jéhnū ndasí de. Te yucūn de ni nducuehē ndasí, nájnūhun quīmi andiví, jíin ñíti yumar, jeē ma cúu cuiñi cahu yó.

¹³ Te tāca téē candíje un, ní cajihī de. Te vésú tu ní cájito de jeē ni jéjnūhun ya, te ni cajini vāha de jeē cóo, te ni cacusī ni de jeē cóto de inga tiempo. Te súcuan ni cacahān de jeē ñáyuu ñuu jicá ñáyuu tatú cácuu de ini ñayiví yāha. ¹⁴ Te tāca téē jeē cahān súcuan, chi stéén cají de jeē nducú de in ñuu jeē cúu andiví núu cúu ñuu maá de. ¹⁵ Chi núu jeē cánacani ni de siquī ñúu nuú ní quendacoo de, te iyó modo jeē nándicó cóo de te núu jeē cácuu de núu. ¹⁶ Te tuú chi ni cacuu ndasí ni de coyūcú de inga ñuu vāha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sátūhva ya in ñuu nuú cóyūcú de.

¹⁷ Ni candíje Abraham jeē sáha ya jehē de, te jeē yúcuan

ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhún ni i nuú de, vésú ni nihīn de jnūhun jeē ni jéjnūhun ya suhva siquī i: ¹⁸ Isaac cúu téē jeē squejéé rí yucūn rō quihīn, achí jnúhun ni jejnūhun ya. ¹⁹ Te ni sáha de cuenta jeē cúu nastécu Yaā Dios i. Te nájnūhun súcuan ni cuu, chi cuu cahān yō jeē nájnūhun ni jihī i te ni natecu i nuú de, chi ni jesi-ni ya jeē ma cáhni de i.

²⁰ Ni candíje Isaac jeē sáha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. ²¹ Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú séhe yí José. Te yítuu de vara de, ni chiñúhún de Yaā Dios. ²² Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yúcūn Israel, in quiví quendacoo i nación Egipto. Te ni ndacu de jniñu jeē chíndūji i yiqui de ñuu nuú quívicoo i.

²³ Te ná ni cacu Moisés, te tátá i náná i ni cacandíje de jeē sáha ya jehē de, te jeē yúcuan ní cacondito sáhi de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sáha rey jeē na cúu tāca súchi yí. ²⁴ Te suni súcuan ni candíje Moisés, te jeē yúcuan ná ni jehnu de te tuá ni jéhe de jnūhun cuu de sēhe ñahan cúu sēhe síhi rey Egipto. ²⁵ Chi sa

ni cuu ni de ndoho de jín táca jnáhan de ñayuu Yaā Dios, nasūu jeē cusī ni de jecu-ni tiempo jín cuéchi. ²⁶ Chi ni sáha de cuenta jeē núu cahān neé ñayuu siquī de jeē siquī Cristo, te yúcuan sáha jeē cucá ndasí gá de ndihi jeē ndíso jnūhun Yaā Dios, vésú jeē nihín de ndihi ndajniñu cucá íyó nación Egipto. Chi ni ñuhun ni de jeē cuáha ya tahū de. ²⁷ Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni iin nihin de siquī jniñu sáha de, chi ni sáha de cuenta jeē je jíto de nuū Yaā jeē tu cúu coto yó núu vijna.

²⁸ Te jeē súcuan ni candíje de, te jeē yúcuan ní cahān de jeē na cáhni ñayuu londe pas-cua. Te ni ndacu de jniñu jeē na cóso yuyú i niñī tī yehyí i, návāha núu na quíji ndajéhe jeē cáhni yā táca séhe nuū ñáyuu Egipto, te ma cáhni yā séhe nuū ñáyuu Israel. ²⁹ Te siquī jeē ní cacandíje ñayuu Israel jeē sáha ya jehē i, te ni cayāha-ni i mēhñu Mar Rojo, chi ni nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ni cajihī de.

³⁰ Ni cacandíje soldado jeē sáha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quivī. ³¹ Te Rahab, vésú ñahan tíjni ni ni cuu ña, te ni candíje ña jeē sáha ya jehē ña. Te ni chindéé ñáhán

ña tēe Israel jeē ní quiijicoo ni condēhé yuhu ndese íyó ñuu ña. Te jeē yúcuan tu ní jíhi ña jín ñáyuu niñni ni ñuu ña ún.

³² ¿Te ndé jnūhun ga cahān rī núu súcuan? Chi tuá na tiempo jeē nácani ga rī jnūhun Gedeón jín Barac jín Sansón jín Jefe jín David jín Samuel jín táca tēe ni canacani jnūhun ya nde jenahán. ³³ Ni cacandíje de jeē sáha ya jehē de jíjnáhan de, te jeē yúcuan ní cacundeyí de ni canajni de táca ñuu náhnu, te vāha ni candacu de jniñu nuū, te ni chindéé ñáhán yá de nájñuhun ni jejnūhun ya. Te nuū sava de ni jesi Yaā Dios yuhu ndícaha jeē tu ní cáyeji tī de. ³⁴ Te sava de tu ní cáyú de sáha ñuhūn jeē cayú xeēn. Te sava de ni cācu de jeē tu ní jíhi de jíin espada. Te sava de ni nanihīn ni de náa tuá fuerza de núú, te ndacuī teyí ní íyo de nuū guerra, te ni cacundeyí de siquī soldado táca ñuu jicá jéé jíto uhū ún de. ³⁵ Te sava ñahan ni natecu séhe ña jeē ni jíhi i.

Te sava ga ñayuu chi sa suhva ni candoho xeēn i nde ni cajihī i. Te tu ní cájehe i jnūhun jeē siaá i jnūhun ya te cācu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni cacunuhni cadena i ni cahīn i vecāa. ³⁷ Te ni cajéhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha

chúcuan, te máá ñi lánchi máá ñi ndíxuhú ní cañuhun i. Ni candoho ndáhú i, ni cajito i jñúndóho, ni castóho ñayuu i. ³⁸ Váha ndasí ñayuu ni cacuu i jeē tú cuiti ñayuu ñayivi súcuan, te vésú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahiin i yaū cava jíin yāu ñuhun. ³⁹ Te tāca ñayuu yáha, vésú ni jejnúhún yá i jeē ní cacandíje nihin i jeē sáha ya jehē i, te tu ní cájito i nuū jeē ni jéjnúhun ya. ⁴⁰ Chi ni sátúhva Yaā Dios in jñiñu váha ga, te suu cúu jeē sáha Cristo jíin yó, náváha in cáhnu-ni nihin yō tahū yō jíin i, te jeē yúcuan cúu jeē ná tu nihin i ndihi tahū i.

Jeē na cócunuū yō nuū maá in-ni Jesús

12

¹ Te íyó cuéhē ndasí ñayuu un jéē ní cacandíje nihin i jeē sáha ya jehē i, te nájñuhun ni jicó ndúū i yóhó, cástéén gā i nuū yō nde vijna jeē suni súcuan na cándíje yó. Núu súcuan te suni máá yó, na téjiyo yó táca jéē sajnēñu jíin cuéchi jeē ni cáan yó jíin. Te na cuándeýí ni yō cunu yó jíin carrera jeē ni jéhe ya jeē cunu yó. ² Te na cócunuū váha yó Jesús, Yaā jeē ni scándíje yóhó te sáha ya jeē íje váha yó jíin jnúhun ya nde jínu ije yó. Chi máá yá ni jendeýí ni yā ni ndoho ya jicā cruz. Te vésú jnúhun canu cúu jeē súcuan cuu yā, te tu ní sáha ya cuenta. Chi ni ñuhun ni yā jeē sa cusí ndasí ni yā ná ni cuu ni ndoho

ya. Yūcuán na te ni cucōo ya lado váha mesa nuū ndácu Yaā Dios jñiñu.

³ Te na nácani ni rō ndese ni jendeýí ni yā ni ndoho ya jeē ni sáha ndeváha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jñúndóho. ⁴ Chi ni ná tu ndoho ró jéē ndé cuu rō jeē cánducú ndéýí ró snāā rō cuéchi. ⁵ Te sanaa te je ni canaa ni rō jnúhun cáhán tutu i, jeē stihví ni Yaā Dios rohó jéē cácuu ró séhe ya:

Séhē, ma quití ni rō jeē snahnú Jitoho yō rohó, te ni ma ndínuu ni rō núu cáhán yā nuū rō.

⁶ Chi Jitoho yō snahnú yā ñayuu jeē maní yā jíin, te jéhe ya castigo tāca jéē náquihin ya cuu séhe ya.

Achí tutu. ⁷ Núu súcuan te na cuándeýí ni rō jeē snahnú Yaā Dios rohó, chi sáha ya jíin ró nájñuhun sáha tátá jíin séhe. Chi tú na séhe íyó jéē tu snahnú tátá i. ⁸ Te núu ma snahnú yā rohó, nájñuhun ndóho tāca séhe, núu súcuan te nájñuhun séhe ndáhú cácuu ró, nasūu séhe ndije ya. ⁹ Te tátá yō ñayivi yáha, suni ni snahnú de yóhó, te ni íyo yíñuhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te cotecu yō níf cáni. ¹⁰ Te ndaā chi máá de ni casnahnú de yóhó jecu-ni quiví, ndese ni cuu ni maá de. Te máá yá chi snahnú yā yohó in modo jeē quéndōo váha ga yō, náváha coo ndoo yó nájñuhun íyó ndoo máá yá.

11 Te ndaā chi tu cácusī ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quendōo ndaā yō te coo ndeyí sī ni yō jeē ni snáhnú yā yohó.

Siquī ñáyuu jeē casquéhichī i jnūhun cáhán Yaā Dios

12 Núu súcuan te ma cóo ró nájñūhun tēe ni cuíta íi ndaha te quísi i xinī yití, chi sa ndacuī na sáha ró máá ró nuū jnúndóho. 13 Te sáha ró ichi ndóo caca ndaā rō, návāha nduvāha róhó jéē tu fuerza ini, jeē cácuu ró nájñūhun tēe chácuá jeē tu cúu caca vāha.

14 Te na cóndihvī ni rō jeē condee manī rō jíin táca ñáyuu, jíin jéē cóo ndoo coo íi rō nuū yā. Chi ma cúu coto ni ññ ñayuu nuū maá Jítoho yō te núu tu iyó ndoo i. 15 Te coto má cáca yátá ni ññ ró te scuíta ró jnúhun jeē sáha Yaā Dios jeē váha róhó, návāha tú cuu ró nájñūhun ññ yucū uvuá jeē stívi te sáha daño jíin cuéhē ñayuu. 16 Te ni ññ ró ma cáca jnéni. Te ni ma cóo jéē ni rō nuū Yaā Dios, nájñūhun ni ñyo Esaú. Chi máá ññ cohō ndeyu ni jicān de nuū ñáni de, ni sama de jíin derecho de jeē cúu de sūchi núú, te súcuan ni xīcó de derecho de. 17 Te cájini rō jeē cucuéé gá te ni cuni de jeē na cáhán tatá de jeē váha tahū nihīn de, te tu ní cúu, chí tuá ni táñúhún Yaā Dios de. Chi tu ní nihīn jñíñu jeē ní nacani ni de, vēsú ni nducú ndeyí de te nde ndahyú de.

18 Te róhó jíjnáhan ró tu ní quíjicoo ró núu ñyo cúu, nájñūhun ñyo ni cuu máá yucu

nuū ni jéhe ya ley yā nuū ñáyuu Israel. Chi ni cane yáñuhūn yucu Sinaí, te nee lúchi jnúú jíto, te quée tachī xeén. 19 Te ni jecu trompeta, te ni cahān Yaā Dios. Te ñayuu jeē ní cajini sōho jeē cahán yā, ni cacahān ndahú i jeē ma cahán gā yā jíin i. 20 Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vēsú ññ quiti-ni núu quívi ti yucu yáha, jíni ñúhún cuu tī jíin yúu chí jíin lanza, achí yá. 21 Te siquī jeē ñyo ndasí cúu jeē cájito i ún, te ni cahān Moisés: Quísi i ruhū jeē yuhú rí, achí de.

22 Te vijna róhó jéē cácandíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quívicoo ró. Te ñuu un cúu Jerusalén jeē iyó andiví, nuū cáhīyo tútú cuéhē ndasí mil ndajéhé cáchiñúhún Yaā Dios. 23 Te ni quívicoo ró núu cáyūcu tútú ñáyuu cácandíje jeē cácuu sēhe Yaā Dios, jeē iyó lista i andiví. Te ni quívicoo ró núu Yaā Dios, Yaā sándaā jniñu ndihī ñayuu, jíin núu cáhīyo ánuá ñayuu vāha jeē jé ni squéndōo ndaā yā i. 24 Te suni nuū maá Jesús, Yaā ndíso jniñu siquī contrato jeé ní quívicoo ró. Te yahu ndasí gá jniñu sáha niñī yā jeē ní jéti jeē ndáhva cuēchi yó, nasūu niñī Abel jeē ni jicān cuēchi.

25 Núu súcuan te coto má squéhichī rō jnúhun jeē cahán yā jíin ró jíjnáhan ró. Chi ñayuu jeē tu ní cájetáhú ná ni

cahān yā jīn i ñayīvi yáha, tu ní cácau i. Te xeēn gā ndoho yóhó te núu ma cuatáhu yó nuū yā jeē cahán yā nde ichi ándiví núu súcuan. ²⁶ Te nde saá ní quisi i ñayīvi jéē ní cáhān yā. Te vijna chi cáhān yā: ñin na jínu quisi ri ñayīvi, te nasūu máa-ni ñayīvi, chi suni táca jéē in andiví, áchí yá. ²⁷ Te jnūhun yáha jéē cahán, ñin na jínu, chi cúní cahán jeē téjiyo ya táca jéē tu íyó cutú, suu jeē ní cuvāha, návāha na quéndōo jeē cóo cutú ní cáni. ²⁸ Núu súcuan te cuāha Yaā Dios ñin ñuu nuū yō jeē cóo cutú ní cáni. Te jeē yúcuan, na nácuatáhu yó nuū yā, te na chíñúhún yó yā, te na cóo yíñúhún yó, návāha cusī ni yā jīn yó. ²⁹ Chi Yaā Dios maá yó cóo nájnūhun ñin ñuhūn jeē snāā ndihi jeē neé.

Ndese sáha yó te cusī ni Yaā Dios

13

¹ Ma jécuiñī rō jijnáhan rō jéē cundáhu ni rō hermano rō cácaudije. ² Conahán rō jeē cánuú cuáha núu rō vehe nuū ñayuu cájica. Chi íyó jínu jeē súcuan ni cajēhe núu ñayuu vehe, te tu ní cájini i jeē nuū maá ndajéhé andiví ní cajēhe núu i vehe.

³ Te conahán rō chindéé ñáhán rō ñayuu cáhīn vecāa, chi sáha rō cuenta jeē nájnūhun cáhīn cáhnu rō jīn i vecāa. Te suni nacani ni rō jehē jnāhan rō jéē cándoho i sáha ñayuu, chi núu súcuan coo jīn máa rō te suni ndoho rō.

⁴ Coo yíñúhún rō síquī jnūhun quíjnáhan ñayuu, te ma cósíquí ndéē jnāhan rō. Chi máa Yaā Dios sándaā yā cuēchi ñayuu tijni ni jīn ñayuu casíquí ndéē jnāhan.

⁵ Te ma ndíyo ni rō xūhún, chi na cóo sī ni rō jīn jéē cánevāha rō. Chi máa yá ni cahán: Ma siaá cuiti rī rohó, ni ma stóo cuiti rī rohó, áchí yá. ⁶ Núu súcuan te ma ñin jeē cáni ni yō, chi cuu cahán yō: Máa Jítoho rī chindéé ñáhán yá ruhū, te ma yūhu rí núu na vé cuni ñayuu sáha i jīn rí. Achi yō.

⁷ Te na núcūhun ni rō táca pastor rō, jeē ní castéén de jnūhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te na ndácu rō de jeē ní candáje de jeē sáha ya jehē de.

⁸ Te Jesucristo chi ñin-ni cáa ya ichi yátá jīn vijna jīn ní cáni. ⁹ Núu súcuan te ma cuáha rō jnūhun candáje rō táca jnūhun jeē sīn cáhán jeē tu quíjnáhan jīn jnūhun máa yá. Chi íyó váha jeē na íje ánuá yō sáha jnūhun jeē váha ni yā jīn yó. Te tu jīni ñúhún yó jnūhun jeē tajnúni síquī jeē yéji yō, chi tu níhín jníñu cuiti jīn ñayuu cáhīn jīn.

¹⁰ Te máa yó chi cánevāha yó ñin jeē ni sócō máa jéhē yō, cóo Cristo. Te táca sūtū jeē cásocō gā de modo jeē cahán ley jenahán, tú na vé nihín de nuū yā jeē ni sócō yā maá yá. ¹¹ Te sūtū cujéhnu ga, ná ni sócō de niñī táca quiti ini cuarto iī gā jeē síquí cuéchi,

te yiqui cúñu tī ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jíin níñi maá yá te sándoo ya ñayuu. ¹³ Núu súcuan te ma cóo inuú gá ni yō jíin ñáyuu tu cácañdije, chi nájnūhun quihīn yō jíin yá ichi yátá ñuu, te na ndóho yó jíin yá jeē sácatá i. ¹⁴ Chi ñayivī yáha tu íyó ñuu nuū coo yó ní cáni, chi sa cánducú yó máá ñuu nuū cóyūcu yó quivī quíji. ¹⁵ Núu súcuan te jeē jíin Jesucristo te níni na cáhán yō jeē yóhoyo cújehnu Yaā Dios, chi suu cúu nájnūhun ĩn jeē socó yō nuū yā, suu jeē nácuatáhú yó nuū yā. ¹⁶ Te ma náā ni rō sáha vāha ró núū jnáhan ró, te cuāha ró jeē cúmanī nuū i. Chi nájnūhun ĩn jeē cásocō rō nuū Yaā Dios cúu táca jeē yáha, te cúsiñ ni yā jíin.

¹⁷ Te cuandije ró núū tēe cácuu pastor rō, te cuandetū rō nuū de. Chi cándito de róhó jeē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusīñ ni de siquī rō te ma cucuíhyá ni de siquī rō. Chi núu tu súcuan te ma cóo jeē vāha jíin rō.

¹⁸ Te cacān tahu rō jehē rī jijnáhan rī. Chi vāha íyó ni anuá rī jeē tú na cuēchi rī. Chi cácuni rī caca yíñúhún rī jíin táca jniñu. ¹⁹ Te suni cáhán ndahú rī jíin ró jeē cacán tahu ndasí ró jehē maá rī, návāha cuāha ya jnūhun jeē yachī gā cuajeē tucu rī nuū rō.

sándihí

²⁰ Te máá Yaā jeē jéhe jnūhun ndeyí sīñ ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor cújehnu jeē ndíto ñayuu cácuu nájnūhun lanchi ya. Chi jíin níñi yā ni sácutú yá contrato jeé yá jeē coo ní cáni. ²¹ Te ñúhun ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhun ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñáyuu cúsiñ ni yā jíin. Te na cáhán yō jeē yóhoyo luu cújehnu ya ní cáni. Amén.

²² Hermano jijnáhan ró, cáhán ndahú rī jíin ró jeē cone cáhnu ni rō jeē stihvī ni rī rohó jíin jecu-ni jnūhun ni tee rī nuū carta yáha. ²³ Te cástūhun rī jeē hermano yō Timoteo, je ni quenda de vecā. Te núu yachī quíji de yāhá, te cuajecoo ndindúú rī nuū rō coto jnáhan yó.

²⁴ Te cahān rō jíin táca tēe cácuu pastor rō jíin táca hermano cácañdije jeē sándeyí ni de, áchí rī. Te ñayuu Italia suni cácahān i jeē sándeyí ni rō.

²⁵ Te ñúhun ni rī jeē na sáha ga Yaā Dios jeē vāha róhó jijnáhan ró. Súcuan na cóo. Amén.

Bendición jíin saludo jeē

CARTA JEE NI TEE SANTIAGO NUU ÑAYUU CACANDIJE

1 Máá rí cúu Santiago, mozo Yaā Dios jíin Jítóho yō Jesucristo. Te téé rí carta yáha cuájeē nuū rohó ñayuu cacandije jeē cácuu ró ndihúxí uū yucūn Israel, te ni cajitē núu ró ní ñáyiví. Sándeyí ni rō jijnáhan ró.

Yaā Dios sáha jeē jécūhun ni yō

2 Ñánī mánī, na cúsi ndasí ni rō jijnáhan ró núu quiji tijni táca jnūndóho siquí rō. ³Chi cájini rō jeē núu jíto ndee jnūndóho róhó núu cacandije vāha ró, te yūcuan sáha jeē cútūhva ró cuándeyí ni rō. ⁴Te na cuándeyí ni rō nde ije vāha ró jíin, návāha cuu sáha ró ndihí jniñu vāha, te ma cúmanī jeē squícu vāha ró núu yā.

⁵Te núu ndé ñin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihí jeē cájicān ñayuu, te tu cúxeēn yā nuū i jeē jicán i. ⁶Te jeē jicán rō, te cánuú candije ró jéé sáha ya jeē jicán rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chūcuan sáha tachī. ⁷Ñayuu ún ma cáni ni i jeē sáha Jítóho yō jeē jicán i. ⁸Chi ñayuu jeē jéni ñin jéni

uū ni, chi máni násāma ni i jíin táca jniñu cásáha i.

⁹Tācá hermano ndahú, na cúsi ni de jeē sáha Yaā Dios jeē kujénu de. ¹⁰Te hermano cucá, na cúsi ni de núu ni ndundáhú de. Chi táca téé cucá, yachī naa jeē cucá de, nájnūhun náā ita yucū. ¹¹Chi núu ni cane niāndii te cújihni, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho táca téé cucá níni sá jicu de jíin jniñu de.

Siquí jeē jíto ndee jnūndóho yóhó

¹²Yōhyo ndetū téé jeē jéndeyí ni de núu jíto ndee jnūndóho de. Chi núu je ni cundeyí de jíin, te nihīn de premio jeē kujénu de cotecu de ní cáni. Chi súcuan ni jéjnūhun Yaā Dios jeē cuáha ya nuū ñayuu jeē maní jíin yá. ¹³Núu ñin ñayuu jicán ini i jeē sáha i cuēchi, te ma cáni ni i jeē nuū Yaā Dios vēji jeē jicán sáha i cuēchi. Chi ni ñin ma cúu cuiti sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuēchi. ¹⁴Chi sa suhva jeē ndíyo néé ni máá i, suu sáha jeē jicán ini i sáha i cuēchi, te scánda ini i chí stáhú un i. ¹⁵Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶Núu súcuan te ma stívi ró caní ni rō jijnáhan ró, ñánī mánī.

¹⁷Tāca jéé cútahū yō jeē vāha jeē lúu íyó, chí vēji nde andiví núu máá Yaā Dios, Yaā ni sáha táca jéé ndíndee ñin andiví. Te máá yá tu násāma

cuiti ini yā nájñuhun násāma nduva jíin cuándahū. ¹⁸ Te ni sáha ya jeē cótecu yō ní cáni, chi ní candíje yó jñuhun ndaā yā. Te ni nduu yó nájñuhun sēhe nuū yá nuū tāca gá sēhe ya jeē quíji, chi súcuan ni nuj-nahan ni yā sáha ya.

Siquī ndese chiñúhún ndáā yō yā

¹⁹ Núu súcuan te tāca róhó ñánī mánī, ñama na chúsóhó ró jñuhun ya, te sa suhva ma cahán yachī rō, ni ma quití yachī ni rō. ²⁰ Chi ñayuu cáquití ni, tu sáha i jñiñu ndaā jeē cuní Yaā Dios. ²¹ Núu súcuan te na siáá rō tācá jñiñu jnéhén jíin jñiñu néé jēé ni cáyā jíin ró. Te na cóo vítá ni rō te cuatáhú ró jñuhun ya jeē ni quívi ini anuá rō. Chi jñuhun un ndíso poder jeē cācu ánuá rō.

²² Te na squícu ró jēé steén jñuhun ún, te nasūu máá jēé cūni sōho ró súcuan-ni, chi núu súcuan te cástáhú ró maá ró, chi tu nihín jñiñu núu tu squícu ró. ²³ Chi tēe jeē jíni sōho de jñuhun ya súcuan-ni, te tu squícu de, cúu de nájñuhun ñn tēe jeē jíto de nuū espejo ndese cáa nuū de. ²⁴ Te jíto vāha de nuū de, te cuahān-ni de, te náā ni de ndese cáa nuū de. ²⁵ Te núu ñn tēe tu náā ni de jñuhun jíni sōho de, chi sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jñiñu vāha jeē sáha de.

²⁶ Te núu ndé ñn ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjñiñu jeē chiñúhún ró yā. ²⁷ Ñayuu jeē chiñúhún ndoo chiñúhún ndáā i máá Tátá yō Yaā Dios, chi jñiñu yáha sáha i: Chíndéé ñhán i sūchi ní caquendōo ndáhú jíin ñahan ní caquendōo ndáhú, núu na-ni jññndóho íyó. Te tu sájñéhén i ánuá i jíin jñiñu néé íyó ñáyīví.

Ma cúhichī ni yō coto yó ñayuu ndahú

2

¹ Ñánī mánī, cá candíje ró Jítoho yō Jesucristo jeē cujéhnu luu ya. Núu súcuan te ma sáha ró cuenta ndese cúu ñn ñn ñayuu, chi inuú sáha ró jíin ndíhi i. ² Chi íyó jínu quívi ñn tēe ini vehe nuū cándutútú ró, te yíhi xehyu oro ndaha de, te ñuhun de sahma vāha. Te suni íyó jínu quívi ñn tēe ndáhú, te ñuhun de sahma tahndé. ³ Te tú vāha núu sáha yíñúhún ró jíin tēe ñuhun sahma vāha, te cahán rō jíin de: Cucōo ní lugar vāha yāhá. Te cahán rō jíin tēe ndáhú: Yūcuán cuiñi ní, chí yáha cucōo ní nuū ñuhun, achi rō. ⁴ Chi núu casáha ró súcuan, te tu jéni vāha ni rō siquī jñahan ró, chí sñn sáha ró jíin tēe cúca jíin tēe ndáhú.

⁵ Ñánī mánī, chusóhó ró jñuhun cáhán rī: Yaā Dios ni nacāji ya ñayuu ndahú ini ñayīví yáha jēé cóo cúca i jíin jñuhun cá candíje i ya, te nihín i tahú i ñuu nuū ndácu ya jñiñu.

Chi ni jejnūhun ya cuāha ya un nūū ñáyuu jeē maní jín yá. ⁶ Te máá ró chi sa suhva cájēhe ró jnūhun canu ñayuu ndahú. ¿Te á násūu tēe cúcá cúu jeē castáhú róhó síquī jeē nihín de xūhun ró, te yachī jéquin de cuēchi síquī rō nuū tohó? ⁷ Te suni cácahān neé de síquī Cristo, te suu síhví máá yá cúu jeē cánaní ró cristiano.

⁸ Vāha cásáha ró te nūu cásquicu ndije ró máá jnūhun jēhnu ga jeē cahán ley, nájñūhun yósó nūū tútu īi: Cundáhú ni rō jnáhan ró nájñūhun cundáhú ni rō maá ró, achí. ⁹ Te nūu sín sáha ró jín ñáyuu cucá jín ñáyuu ndahú, nūu súcuan te cuēchi cásáha ró, te jécondee cuēchi síquī rō jeē stívi ró ley Yaā Dios. ¹⁰ Chi nūu īin ñayuu stívi i īin-ni jniñu ndácu ley, te vēsú na squícu i ndíhi ga, te nájñūhun ni stívi i ndíhi ley, te ndíhi un jécondee cuēchi síquī i. ¹¹ Chi Yaā jeē ni cáhān jeē ma cósíquí ndēē jnáhan ró, suni ni cahān yā jeē ma cáhni rō ndíyi. Te vēsú tu ní cásíquí ndēē jnáhan ró, te nūu ni jehni rō ndíyi, nūu súcuan te je ni stívi ndíhi ró ley. ¹² Te tāca jēē cahán rō jín jēē sáha ró, chi sáha ró cuenta jeē sándaā yā ndíhi un jín máá ley Jesús jeē ni sáha libre rohó. ¹³ Chi quívī sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ni cundáhú ni jnáhan, cusī ni i jeē ní ndahva yā cuēchi i máá quívī sándaā yā jniñu.

Tu jéjníñu jeē candíje yó nūu tu squícu yó

¹⁴ Ñánī mánī, nūu cáhān īin tēe jeē candíje de jeē sáha ya jehē de, te nūu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jín jēē cahán-ni de jeē candíje de, te nūu tu sáha de jniñu váha? ¹⁵ Te nūu īin hermano yō chí hermana yō, cúmanī sahma i jín jēē cáji i tāca quívī, ¹⁶ te nūu īin ró cáhān jín i: Cuandeyí ni rō, te cusúcun váha ró te caji váha ró, achí rō jín i, te nūu tu ní jēhe ro jēē jini ñūhūn i cotecu i, ¿te ndé jéjníñu jeē cahán rō súcuan? ¹⁷ Te suni súcuan cúu jeē nūu achí ró jeē candíje ró jeē sáha ya jehē rō, te nūu tu sáha ró jniñu váha, nūu súcuan te tu ndé jéjníñu cuiti jeē cahán-ni ró jēē candíje ró.

¹⁸ Te sanaa te cahān īin ñayuu: Róhó chi cándíje ró jēē sáha ya jehē rō, te ruhū chi sáha ri jniñu váha. ¿Na jín stéén rō jeē candíje ró jeē sáha ya jehē rō, te nūu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī. ¹⁹ Ndaā chi cándíje ró jeē iyó īin-ni Yaā Dios. Te va íyó váha nūu súcuan. Te tachī chi suni súcuan cácaandíje, te cáquísi i jeē cáyūhú, chi tu cásáha jniñu váha. ²⁰ ¿Te naun tu jécūhun ni rō? ¿A tu jín rō jeē nūu tu sáha ró jniñu váha, te tu ndé jéjníñu cuiti jeē cahán rō jeē candíje ró? ²¹ Te jí yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú

de jeē ni cāhān yā jeē cahni de sēhe de Isaac socō de i nuū altar. ²² Te jécūhun ni rō jeē siquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cāhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de. ²³ Te súcuan ni cundaā jnūhun cāhán tutu i: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha siquī jeē cá candíje i jeē sáha ya jehē i, te nasūu máá jēē cāhán-ni i jeē candíje i. ²⁵ Te suni súcuan Rahab, vēsú ñahan tǎjni ni ni cuu ña xīhna gā, te ni ndahva yā cuēchi ña siquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de inga ichi, návāha cācu de nuū téē cánducú cahni de. Te jeē yúcuan ní ndahva Yaā Dios cuēchi ña. ²⁶ Te ñin ñayuu núu tuá anuá i nuū yiqui cúñu i, te ndīyí cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájnūhun ndīyí cúu yó.

Jnūhun siquī yaá yó

3

¹ Ñánī mánī, ma cáni ni cuehē rō cuu ró maestro steén jnūhun ya. Chi cájini rō jeē yóhó jēē steén jnūhun,

cuehē gā cuēchi ndenehen ya siquī yō. ² Chi ndihí yó stívi cuēhē jniñu. Te núu ñin téē cuu condito de yáá de jeē ma stívi de jíin ni ñin jeē cāhán de, núu súcuan te yōhyo váha téē cúu de, te suni cuu condito de ní gá de jeē ma stívi de.

³ Chi cúu nájnūhun jeē chíhi yó freno yuhu caballo, te súcuan snáhnú yō ní tí jeē quihín tǎ jíin yó ndé nuū cuní yō.

⁴ Te suni súcuan tāca barco, vēsú náhnu ndasí, te vēsú nīhin chūndahá táchī, te jíin ñin timón lulí-ni te cuu scuicó téē scáca, te quihín de jíin ndé nuū cuní de.

⁵ Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíin yó jeē ñin ñuhūn lulí cuu jñi jeē cayú ñin yucu cāhnu ndasí. ⁶ Te suni súcuan yáá yó, chi sáha nájnūhun ñin ñuhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jnūhun néé jíin yáá yó, te yáá yó scuíquín cuehē jniñu néé ní tiempo jeē iyó yó ini ñayívi. ⁷ Te ñayuu chi cuu snáhnú i tācá quití jíin saa jíin cóo jíin quití ñuhūn nuū mar, te je ni snahnú i cuehē tǎ. ⁸ Te ni ñin ñayuu ma cúu condito i yáá i. Chi ñin jeē neé jēē ma cúu condito i cúu. Te nájnūhun yuhu cóo jeē ñuhūn chitú veneno jeē jéhni, súcuan cúu yáá yó. ⁹ Jíin yáá yó chiñúhún yó Tatá yō Yaā Dios, te suni jíin yáá yó cāhán ndevāha yo siquī ñayuu jeē ni sáha ya ánuá i nájnūhun iyó máá yá. ¹⁰ ñin-ni yuhu

cáne jnūhun chíñúhún yó yá jíin jnúhun cáhán ndevāha yó. Nānī mánī, tu íyó váha cuiti jeē súcuan. ¹¹ ¿A ñin-ni tesōcó cáne ndute váha jíin ndute úvuá, chí naún? ¹² Nānī mánī, ¿a cuu cuun ndehē oliva xinī yújnu higo, te á cuu cuun ndehē higo xinī yoyúcú uva, chí naún? Te suni súcuan ñin tesōcó ma cúu cane ndute úhvuá jíin ndute váha.

Jnūhun ndíchí jéē véji nuū Yaā Dios

¹³ Te núu ndé ñin ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jnūhun ndíchí yá. ¹⁴ Te núu cáucuésún teyí ni rō te ndúcú ró jéē kujéhnu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra síquī jnúhun ndaā. ¹⁵ Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayīví, jíin cuenta anuá neé ñayuu, jíin cuenta maá jéxeén cúu. ¹⁶ Chi nuū iyó ñayuu cucuésún ni jíin ñayuu nducú jéē kujéhnu máá, suni yūcuan íyó jnúhun sáca núu jíin táca jniñu neé. ¹⁷ Te jnūhun ndíchí jeē véji nuū Yaā Dios, núu ni sáha jeē ní ndundíchí ñayuu, yūcuán na te íyó ndoo ánuá i. Te suni yúcu manī i jíin jnáhan i, te vītá ni i, te tú ñihni ni i. Te cúndáhú ni i jnáhan i, te sáha i jniñu váha. Te suni íyó ndáa i, te tu stáhú i. ¹⁸ Te ñayuu cáyūcu mánī jíin jnáhan, jíin jnúhun manī casáha i táca

jniñu ndaā, te nanihīn i jeē quéndōo ndaā i.

Jeē ma cutóo ni yō jeē iyó ini ñayīví

4

¹ ¿Te ndese quéjéé jeē cájejnáhan ró jíin jéē cátejnáhan ró? Quéjéé síquī jeē cándiyo neé ni rō, te yōhyo scánda ini anuá rō. ² Chi cándiyo ni rō, te tu cánevāha ró, te suu sáha jeē cájehni rō ndīyi. Cándiyo ni rō jeē névāha jnáhan ró, te tu níhīn rō, te suu sáha jeē cátejnáhan ró te cájejnáhan ró. Te tu cánihīn rō jeē cuní rō, chi tu cájicān rō nuū Yaā Dios. ³ Te núu cájicān rō, te tu cánihīn rō, chi tu cájicān vāha ró, chi mánī jeē cusī ni maá ró cúu jeē cájicān rō nuū yā. ⁴ Ñayuu castóo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayīví, ndúu i ñayuu jíto uhū nuū Yaā Dios. ⁵ Te tu cáhán saá-ni jnūhun yáha jéē yosó núu tútu iī: Máá Espíritu jeē ni jéhe Yaā Dios jeē ndeé ini yō, cúcuíñí ni yā jeē súcuan casáha yó, chi manī yā jíin yó, achí. ⁶ Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhán tutu iī: Yaā Dios jési yā nuū ñayuu casáha téyí máá, te vāha ni yā chindéé ñáhán yá ñayuu casáha suchí máá, áchí. ⁷ Núu súcuan te cuandetū rō nuū Yaā Dios. Te cuñiñi ñihni ró jéē ma cuatáhú ró jexeén, te cunu coto róhó jíjnáhan ró.

⁸ Manī gā coo ró jíin Yaā Dios, te víhyā gā steén yā jeē manī yā jíin ró. Róhó jéē casáha cuēchi, na sándoo ró máá ró, stóo ró cuēchi. Te róhó jéē cáculi rō coo manī rō jíin Yaā Dios níni jéē cáculi rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan. ⁹ Na jnáhuū ni rō, te cucuíhyá ni rō, te na ndáhyú rō siquī jeē iyó cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusiñi ni rō, te vijna na ndúcuíhyá ni rō. ¹⁰ Na sásuchí ró máá ró nuū Yaā Dios, te sájéhu ya rohó.

Ma cóndihvī ni yō siquī cuēchi jnáhan yó

¹¹ Hermano jijnáhan ró, ma cahán neé ró siquī jnáhan ró. Chi tēe jeē cahán neé siquī jnáhan, chí jéē ndihví ni siquī cuēchi jnáhan, nájnūhun jeē siquī ley yā cahán neé de, chí tu squícu de ley jeē cundáhú ni yō jnáhan yó, te nájnūhun cáhán de jeē tu iyó ndáā ley yā. Te núu cáhán rō jeē tu iyó ndáā ley yā, núu súcuan te nasūu jéē squícu ró, chí sa jeē cahán rō siquī. ¹² Iyó ñni-ni Yaā jeē ni jéhe ley, te máá-ni ya cúu jeē sándaā siquī cuēchi. Te jnama ya ñayuu cáculi je te snáhnú ndetū yā ñayuu tu cáculi je. Núu súcuan ¿te na jniñu ndíso ró jéē sándaā rō siquī jnáhan ró?

Tú vāha jeē satéyí yó maá yó

¹³ Vijna te cáhán rī jíin róhó jéē cáculi: Vijna chí sájnē te quihñi yō ñuu yúcuan, te

coyūcu yó ñni cuiyā, te cuaan yó xíco yó, te nihñi yō siquī, achí ró. ¹⁴ Te tu jíni cuiti rō ndese coo sájnē. ¿Chi na vé va víhi cúu vida rō? Cúu nájnūhun ñni vicō nūhūn jéē ñni núnúu-ni núcūhun, te yūcuán na te ndéchí-ni cuahān. ¹⁵ Chi sa vāha ga na cáhán rō: Núu cúni máá Jítoho yō te cotecu yō te sáha yó jéē yáha chí jéē yúcuan, achí rō. ¹⁶ Te sa suhva máni cáculi je ni rō cáculi rō. Te tú vāha jeē súcuan cáculi je ni rō. ¹⁷ Te núu ñni ñayuu jíni i sáha i jniñu vāha, te núu tu sáha i, te cuēchi cúu núu súcuan.

Jnūhun cáhán nuū tēe cúcá

5

¹ Te cáhán rī jíin táca róhó tēe cúcá, jéē na ndáhyú rō te ndahyū cohó ró siquī jnūndóho jeē quíji nuū rō. ² Chi ndajniñu cúcá cánevāha ró, je téhyú. Te sahma vāha ró, je tēe tiquíxin. ³ Te oro jíin plata cánevāha ró, chí je cáne xehyu. Te xehyu un stéén je ní casáha ró jniñu stáhú jíin xūhun ró. Te yúcuan cúu jeē ndúnñhin cuēchi siquī rō, nájnūhun ñni ñuhūn jeē snáā yiqui cúñu rō. Chi ni cacaya cuehē rō ndajniñu vāha quivī cuándihi yáha. ⁴ Te táca tēe ni cajehnde trigo rō, tu ní cáchunaa vāha ró yáhu de. Te vijna cáculi jee de nuū Yaā Dios, Yaā cúu Jítoho nuū táca ndajéhe andiví, jeē súcuan ni casáha ró. Te jíni sōho ya jeē cáculi jee tēe ni cajehnde ún. ⁵ Cátecu vāha ndasí ró ini ñayīví yáha, te casáha ró táca

jeē cácusī ni maá ró. Te cájito yúcún ró maá ró, te cúu ró nájnūhun quiiti néñu jeē ndétu quiiví cúu. ⁶ Te ni catee ró cuēchi siquī ñáyuu ndaā, te nde ni cajehni rō i. Te tu ní cúu casi i jeē casáha ró.

Jeē na cóo paciencia ni yō te cacān tahu yō

⁷ Hermano, núu súcuan te coo paciencia ni rō condetu ró ndé quiiví ndíji máá Jítoho yō. Tēe sájniñu ñuhun, cánuú coo paciencia ni de condetu de nde quiji saū néhen jíin saū néñu isa, te sáa te nihīn de nunī váha jeē jéhe itu. ⁸ Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítoho yō. ⁹ Te ma cahán sōo ró siquī jeē sáha jnáhan ró, hermano, návāha ma jécondee cuēchi siquī rō. Chi máá Yaā jeē sándaā cuēchi, je yajni ndiji ya. ¹⁰ Nánī mánī, conahan ró jijnáhan ró ndese ni casáha tēe ni canacani jnūhun máá Jítoho yō nde jenahán, chi ni cacuu de ñin ejemplo nuū yō. Chi vēsú ni candoho de, te ni ñyo paciencia ni de. ¹¹ Te cáhán yō jeē ñáyuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhvo vāha ga ni quendōo de ni sáha máá Jítoho yō ná ni yāha jnúndóho. Chi yóhvo cúndáhú ni yā yohó, te vāha ndasí ni yā jíin yó.

¹² Nánī mánī, jeē cánuú gá cúu jeē ma cahán cāha ró sihví

Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chií ñayiví, te ni ñin ga jnūhun súcuan ma cahán teyí ró. Chi núu cahán rō jeē cuu, te súcuan-ni cahán rō. Te núu cahán rō jeē tuú, te súcuan-ni cahán rō, ma scáa gā rō cahán rō, návāha ma ndénehen Yaā Dios cuēchi siquī rō.

¹³ Te núu íyó ñin ró jéē ndóho jnúndóho, te na cácan tahu rō. Te núu íyó ñin ró jéē cúsiñi ni, te na cáta ró yaa jeē chiñúhún ró yá. ¹⁴ Te núu íyó ñin ró jéē cuhú, te na cána ró tēe jéhnu cándito ñayuu cácandíje. Te na cácan tahu de jehē ñayuu cuhú. Te jíin síhví máá Jítoho yō na chíhi de aceite i. ¹⁵ Te núu cácandíje de jeē sáha Jítoho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶ Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró návāha nduvāha ró jijnáhan ró. Chi núu ñin tēe ndaā ndíhví ni de jicán tahu de, te yóhvo vāha nihín jniñu, chi sáha ya jeē jicán de. ¹⁷ Chi Elías, tēe ni nacani jnūhun Yaā Dios jenahán, suni ñin tēe jeē nájnūhun íyó máá yó ni cuu de. Te ni jicán tahu ndasí de jeē ma cúun saū, te tu ní cúun saū unī cuiyā iñu yō. ¹⁸ Yūcuán na te ni jicán tahu tucu de, te ni cuun saū, te ni canecoo tucu tāca jéé jéhe ñuhun.

19 Ñánī mánī, núu ìn ró ni
stóo ichi ndaā, te núu inga
rō nachuhichí ró jnáhan ró,
20 núu súcuan te cuni rō jeē
núu ni nachuhichí ró tēe ni
quīvi cuēchi, te je ni jnama ró
de jeē jnahnú ndetū de núú,
te súcuan íyó jnúhun cáhnu ni
nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

1 Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró ní Ponto, Galacia, Capadocia, Asia, jíin Bitinia. 2 Te máá Tátá yō Yaā Dios ní nacāji ya rohó, chí súcuan ní tee ní yā nde ná tu jecōo ñayiví. Te jíin Espíritu Santo ní sáha ya jeē iyó ndoo íyó íi rō cájetáhú ró núu yā, te ní nacate ya anuá rō jíin níñi Jesucristo. Te ñúhun ní rī jeē na cáyá gā tāca jéē váha jeē sáha ya rohó, jíin jéē coo ndeyí coo sīi ní rō jíináhan ró.

Jeē ñúhun ní yō tāca jéē váha jeē cóo andiví

3 Na cáhán yō jeē yóhyo cújéhu Yaā Dios, Yaā cúu Tátá maá Jítoho yō Jesucristo. Chí ní cundáhú ndasí ní yā yohó, te ní sáha ya jeē ní nacacu jeé yó, siquí jeē ní natecu Jesucristo mēhñu ndíyi. Te jeē yúcuan níni cáñuhun ní yō tāca jéē váha jeē coo. 4 Chí nihīn rō tahū jeē ñúhun váha ini andiví jeē cúu ró jíináhan ró. Te tahū un má náá cuiti, ní ma tívi cuiti, ní ma ndíhi cuiti. 5 Chí cávandíje ró jéē sáha Yaā Dios jehē rō, te jeē yúcuan ndíto ya rohó jíin poder yā, náváha jnama

ya rohó quíiví sándihí, chí ní sándaā yā jeē súcuan coo.

6 Jeē yúcuan cácusī ndasí ní rō, vēsú cájito ró cuéhē ndinuū jñúndóho jecu-ni quíiví. 7 Chí nájnūhun jeē stuhvá ñayuu oro jíin ñúhūn, jíto ndee i núu jeē váha cúu, suni súcuan cánuú coto ndee jñúndóho rōhó núu cávandíje níhin ró chí tuú. Chí jeē cávandíje níhin ró, chí yahu ndasí gá cúu vēsú oro, ndajníñu jeē náā. Te yúcuan cúu jeē cuajnúhún yá rohó, te sájéhu ya rohó, te squéndōo yíñúhún yá rohó quíiví quenda ndijin Jesucristo.

8 Te vēsú tu ní cájito ró núu yā, te cáhīyo maní ndasí ró jíin yá. Te cávandíje níhin ró yá vēsú tu cájito ró núu yā vīna. Te yōhyo luu cácusī ndasí ní rō, chí nde tuá níhín cuiti yō jñūhun castūhun yó ndese cúsi ní yō. 9 Te nihīn tahú rō jeē cácu ánuá rō, chí jeē yúcuan cúu jeē cávandíje ró.

10 Te tée ní canacani jñūhun Yaā Dios nde jenahán, ní cananducú yúcún de ní caca-jñūhun váha de siquí jñūhun ndese jnama ya yohó. Te ní cacachi de ndese sáha Yaā Dios jeē váha rōhó jíináhan ró. 11 Chí nde ná tu coo, te ní steén Espíritu Cristo nuū de jíináhan de ndese quiiji jñúndóho siquí Cristo jíin ndese luu ndujéhu tucu ya jeē yáha jñúndóho ún. Te ní cananducú yúcún de jeē na jécūhun ní de ndé quíiví quiiji Cristo te ndese coo tāca jéē ní cáhán maá Espíritu jeē ndeé

ini de. ¹² Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jñūhun ún, chi tāca téé nácani jñūhun jnáma ya yohó, ni canacani de nuū rō, ni sáha poder Espíritu Santo jeē ní quiji ichi andiví. Te jñūhun ún chi nde maá ndajéhé Yaā Dios cánanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xiní rō jijnáhan ró, te cáji coo ni rō. Te cocuhun ndasí ni rō jeē nihín rō tāca jéé váha jeē sáha Yaā Dios rohó quíví quenda ndijin Jesucristo. ¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusí ni rō sáha ró nde ná tu jecūhun ni rō jñūhun Yaā Dios. ¹⁵ Chi sa suhva na cóo ndoo ánuá rō jín táca jniñu cásáha ró, chi Yaā ní cana rōhó, Yaā iyó ndoo cúu ya. ¹⁶ Chi súcuan cáhán tutu íi: Na cóo ndoo ró jijnáhan ró, chi ruhū iyó ndoo ri, achí yá.

¹⁷ Te núu cácahān rō Tata rō jín Yaā Dios, núu súcuan te na cáca yíñúhún ró nuū yā tāca quíví jéé cájica ró ñayiví yáha. Chi máá yá sándaā siquí ndese ni casáha ñn ñn yó, te tu sáha ya cuenta ndese cúu ñn ñn yó, chi inuú sáha ya jín ndihí yó. ¹⁸ Chi ni jnama ya rohó núu tācá costumbre jeē ní cajequin jí rō, jeē ní cajejníñu cāha ró núu. Te cájini váha ró jéé yahu cúu jeē ní

jnama ya rohó. Chi tu ní chúnaa yā jín ndajniñu jeē náá, nájñūhun oro jín plata, ¹⁹ chi sa suhva jín níñi Cristo jeē yáhu ndasí gá cúu. Chi ni socō yā maá yá nájñūhun ñn londe, quiti iyó váha iyó ndoo. ²⁰ Chi jeē yúcuan ní jeni Yaā Dios maá Cristo nde ná tu jecōo ñayiví, te ni cane ndijin Cristo maá tiempo cuándihí yáha, návāha quendōo váha ánuá rō jijnáhan ró. ²¹ Te jeē jín Cristo te cácandije ró Yaā Dios. Chi ni sáha Yaā Dios jeē ní natecu yā mēñu ndíyí jín jéé ní ndujéhu ya. Te jeē yúcuan cácandije ró Yaā Dios, te cáñuhun ni rō coto ró yá.

²² Te vijna chi je ni candundoo ánuá rō, chi ni cajetáhú ró jñūhun ndaā ni sáha Espíritu jín ró, návāha cundáhú ndije ni rō hermano cácandije. Núu súcuan te na cundáhú ndasí ni rō jnáhan ró nde jín ini jín ánuá rō. ²³ Chi je ni canacacu jeé ró, te nasūu chíji yucūn ñayuu jeē cúu. Chi sa jñūhun Yaā Dios jeē ndíto técu ní cáni ni sáha jeē ní nacacu ró. ²⁴ Chi súcuan cáhán tutu íi:

Nájñūhun yucū cúu ndihí tāca ñayuu, chi jecu-ni quíví técu í.

Te nájñūhun ita yucū cúu jeē cujéhu í.

Chi íchí-ni yucū, te ndáhvá-ni ita.

²⁵ Te jñūhun Jitoho yō Yaā Dios, sa quéndōo ní cáni.

Achí tutu. Te jñūhun un cúu máá jñūhun jnáma ya yohó jéé ní canacani ri nuū rō.

2

¹ Núu súcuan te na siáá rō tāca jniñu nées, tāca jéē stahú, jéē tú ndije, jeē cucuésún ni, jíin jéē sajnúhún síquī jnáhan. ² Te nájnūhun sūchi yíquín sá ní cacu jeē jéxin te jéhnu, súcuan na cóndihvī ni rō scuáha ró jnúhun ndaā yā, návāha cuehnu ró jíin te cācu ánuá rō. ³ Chi je cájini rō jeē yóhyo vāha ni maá Jítoho yō.

Cristo cúu nájnūhun yuū yítuu vehe

⁴ Núu súcuan te manī gā coo ró jíin náhan ró jíin Jítoho yō Cristo. Chi cácuu ró nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñin yuū cánuú gá jeē yítuu yíquī templo, te sáha ya jeē cótecu rō ní cáni. Te ñayuu vésú ni casquéhichī i ya, te Yaā Dios chí je ni nacāji ya Cristo chí cánuú ndasí yá, nájnūhun nacāji yó ñin yuū vāha jeē quítuu yíquī vehe. ⁵ Te máá ró chí cácuu ró nájnūhun ñin ñin yuū jeē cúvāha templo Yaā Dios, te cotecu rō ní cáni. Te na cuáha ró jnúhun jeē sama ya rohó jíin náhan ró jéē cúvāha templo yā, cúu jeē ndeé Espíritu yā ini anuá rō nájnūhun ini ñin templo. Te suni cúní Yaā Dios jeē cuu ró sūtū cáhīyo ndoo cájejniñu nuū yā. Chí síquī jeē ní sáha Jesucristo jehē rō, te na sócō rō maá ró jeē cuajniñu ró núū yā sáha ró táca jniñu vāha jeē nújnahan ni Yaā Dios. ⁶ Chí súcuan cáhan tutu ñi:

Vijna te nde ñuu rī Sion jéquin rī ñin yuū jeē cánuú gá jeē quítuu yíquī vehe, chí ni nacāji ri yā nájnūhun ñin yuū vāha jeē cánuú téyí. Te ñayuu jeē candíje i ya, jnama nahín yá i.

Achí Yaā Dios, áchí tutu. ⁷ Te máá ró jeē cácandíje ró, chí yuū vāha jeē cánuú téyí cúu ya nuū rō. Te nuū ñayuu tu cácandíje chí tuú, chí sa cúndaā jeē cahán tutu ñi:

Máá yūū jeē ní casquéhichī tēe cāsama vehe, suu cúu yuū cánuú gá yítuu yíquī vehe.

⁸ Te suni cúndaā jnúhun jeē cahán tutu síquī ñayuu tu cácandíje:

Cúu ya nájnūhun ñin yuū jeē cácachihī i jehē i, nájnūhun toto jeē cotúú i sáha. Achí. Chí jeē cácachihī i jehē i cúu jeē casánihni ni i nuū jnúhun ya. Te je ni cundaā jeē jnahnú ndetū i síquī jeē cáacunihni ni i.

Jnúhun ñayuu maá Yaā Dios

⁹ Te máá ró cácuu ñayuu jeē ní nacāji Yaā Dios. Te suni cácuu ró sūtū cájejniñu nuū maá Yaā cúu Rey, te ñayuu cáhīyo ndoo, jíin ñayuu maá yá cácuu ró. Súcuan ni sáha Yaā Dios rohó návāha nacani ró jnúhun ndese yóhyo jéhnu jniñu sáha ya, chí máá yá ni cana rōhó ná ni coyūcu ró nájnūhun nuū nées. Te ni squívicoo ya rohó núū luz yā jeē yóhyo vāha stéen yā ini anuá rō. ¹⁰ Chí nde saá te nasūu ñayuu Yaā Dios cácuu ró, te vijna je ni nduu ró

ñáyuu maá yá. Te nde saá chi ná tu cundáhú ni yā rohó, te vijna je cundáhú ni yā rohó jijnáhan ró.

Jeē cuajniñu vāha yó núū Yaā Dios

¹¹ Nánī mánī, ini ñayīvi yáha cácuu ró nájnūhun ñayuu ñuu jicá jéē cájica cuu tátú. Núu súcuan te cáhán ndahú rí jijn ró jéē ma sáha ró táca jniñu jeē ndíyo néé ni rō jijn modo maá ró. Chi táca un cájejnáhan jijn ró, ndúcú jéē jnahnū ndetū anuá rō. ¹² Te ndaā na cáca ró méhñu ñáyuu tu jíní jnūhun Yaā Dios. Chi vēsú cácahān i siquī rō, nájnūhun cácahān i siquī ñáyuu casáha jniñu néé, te núu na cóto i jniñu váha casáha ró, te quivī sándaā Yaā Dios jniñu te cahān i jeē yóhyo cújéhnu ya.

¹³ Jeē siquī maá Jítóho yō te cuatáhú ró nuū táca tóhō cándiso jniñu nuū ñáyuu. Cuatáhú ró nuū maá rey, chi tēe cújéhnu ga cúu de. ¹⁴ Te cuatáhú ró nuū táca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu váha. ¹⁵ Chi cúní Yaā Dios jeē sáha ró jniñu váha, te jeē súcuan sáha ró te táca ñáyuu canéé jéē tu cájecūhun ni, casi i yuhu i.

¹⁶ Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu vāha ró núū yā. ¹⁷ Coó respeto rō nuū táca ñáyuu. Cundáhú ni rō hermano cácañdije. Conso Iyo ró

núū Yaā Dios. Coó yíñúhún ró nuū maá rey.

Jeē na ndóho yó jéhē jnáhan yó nájnūhun ni ndoho Cristo

¹⁸ Róhó jéē cácuu mozo, cuatáhú ró nuū patrón rō, te coó respeto rō nuū de. Te nasūu máa-ni nuū tēe vāha ni jijn tēe vītá ni, chi suni nuū tēe xeēn ni. ¹⁹ Chi ñn jeē váha cúu núu jéndeýí ni ñn tēe jeē stóho cáha ñáyuu de siquī jeē squícu de nuū Yaā Dios. ²⁰ Chi núu cástóho i róhó jéē casáha ró cuéchi, te ni ñn ma cuajnúhún róhó núu jéndeýí ni rō jijn jeē ndóho ró. Te núu cástóho i róhó jéē casáha ró jniñu váha, te núu jéndeýí ni rō jijn, yáha cúu jeē váha jeē nújnahan ni Yaā Dios. ²¹ Chi jeē yúcuan cúu jeē ní cana ya rohó jijnáhan ró. Chi suni máa Cristo ni ndoho ya jeē siquī rō, te súcuan ni cuu ya ñn ejemplo nuū rō jeē na ndóho ró jéhē jnáhan ró, te súcuan condiquin rō ichi ya. ²² Te máa yá tú cuiti na cuéchi ní sáha ya, ni tú cuiti na jnūhun stáhú ní cáhán yā. ²³ Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnahan ya jijn i, chi sa ni chihi ya maá yá ndaha Yaā Dios, Yaā sándaā vāha siquī ndihi ún. ²⁴ Te ni condiso máa Cristo cuéchi yó jijn yiqui cúñu yā ná ni jihī yā jicā cruz, návāha quenda yó chíji cuéchi te caca ndaā yō. Chi ni tujī yā, te jeē yúcuan ní canduvāha ánuá rō. ²⁵ Chi ni casana ró nájnūhun lanchi, te vijna je ni candicó

ró ni ndīvicoo ró núū Cristo, Yaā cúu pastor rō te ndíto vāha ya anuá rō.

Ndese cánuú coyūcu váha yīi jīn ñasihí

3

¹ Suni súcuan róhó ñasihí jijnáhan ró, cuatáhú ró nuū yīi ró, návāha núu cúu de tēe tu cándije jnūhun ya, te cuu scándije ró de, jeē tuá niní jīn jēē cahán rō, chí máá jīn jēē casáha vāha ró. ² Chi cuni de jeē cájica ndaā rō te cáhīyo respeto rō. ³ Te jeē casáha luu ró máá ró, chí nasūu máni máá ichi síquī rō sáha ró, jeē sáha luu ndasí ró xinī rō, chí jēē cúhun ró síquī oro chí sahma váha ga. ⁴ Chi sa nducú ró jeē quéndōo luu ánuá rō, te coo luu ró ñn modo jeē ma náá cuiti, suu jeē cóo vītá ni rō te coo nahín ni rō. Chí yāha cúu jeē yahu ndasí gá nuū Yaā Dios. ⁵ Chi ñahan ní cahīyo ndoo ánuá nde jehahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yīi ña. ⁶ Te súcuan ni sáha Sara, chí ni jetáhú ña nuū yīi ña Abraham, te ni cahān yīñúhún ña jīn de. Te róhó jijnáhan ró, núu sáha vāha ró te núu ma yūhu ró ni ñn, yūcuán na te coo ró nájñūhun ni iyo Sara.

⁷ Te suni súcuan róhó yīi, na cóo vītá ni rō jīn ñasihí ró. Te yīñúhún coo ró jīn ña, síquī jeē núu ga fuerza ña vēsú rohó, te suni síquī jeē inuú ní canihīn tahú rō cotecu rō ní cáni síquī jeē váha ni Yaā Dios.

Te súcuan sáha ró návāha tú casi nuū jnūhun jícān tahú rō.

Jnūhun ñayuu cándoho síquī jeē cájica ndaā

⁸ Núu súcuan te inuú na cáni ni rō jijnáhan ró, te cucuíhyá ni rō jeē ndóho jnáhan ró, te cundáhú ni rō i nájñūhun ñani rō. Te na cóo manī rō te cani suchí ni rō. ⁹ Núu casáha néé ñayuu jīn ró, te ma nasáha néé ró jīn i. Te núu cácahān néé i nuū rō, te ma nácahān néé ró núu i. Chí sa suhva cacān tahú rō jeē na quéndōo vāha i. Chí Yaā Dios ni cana ya rohó jēē suni súcuan quéndōo vāha ró. ¹⁰ Chí súcuan cáhán tutu i:

Ñayuu cácuni cotecu vāha te cusī ni táca quívī, na cóto i yuhu i jeē ma cáhán néé i, te na cóto i jeē ma cáhán i jnūhun stáhú.

¹¹ Na cújiyo i nuū jniñu néé, te na sáha i jniñu váha.

Na ndúcú i coyūcu máni i, te na cóndihvī ni i jīn.

¹² Chí máá Jítoho yō ndíto ya ñayuu ndaā,

te jīni nahín yá jeē cájicān tahú i.

Te ñayuu casáha jniñu néé, chí tu jetáhú yá i.

Achí tutu.

¹³ Te ni ñn ma sáha néé jīn ró te núu máni jniñu váha cándihvī ni rō sáha ró. ¹⁴ Te vēsú núu ndóho ró síquī jeē cájica ndaā rō, te yōhoy ndetū cácuu ró. Núu súcuan te ma yūhu ró coto ró i, ni ma cunéé ni rō. ¹⁵ Chí sa jīn ini jīn ánuá rō chíñúhún ró máá Jítoho yō Cristo. Te níni coo tūhva ró nastió cuíñi vīta

ró te cahān yĩñúhún ró jín ñáyuu jeē castíchí rohó síquī tāca jēē cáñuhun ni rō. ¹⁶ Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáú yáhu i rōhó jēē cájica ndaā rō chi cácañdije ró Cristo. ¹⁷ Chi núu cúní Yaā Dios te vāha ga jeē ndóho ró síquī jeē casáha ró jniñu vāha vēsú síquī núu sáha ró jniñu neé.

¹⁸ Chi máá Cristo suni ni ndoho ya, te ñin jĩnu-ni ni jihĩ yā jeē síquī cuēchi ndihĩ yó. Yaā vāha cúu ya, te ni ndoho ya jehē yohó ñáyuu ní casáha jniñu neé, návāha quĩvicoo yó núu Yaā Dios sáha ya. Chi ni jihĩ yĩquĩ cúñu yā, te ánuá yā chi técu-ni ní cáni. ¹⁹ Te ná ni jihĩ yā te ni jehēn anuá yā ni nacani ya jñūhun nuū anuá ñayuu cáyĩndihyū. ²⁰ Chi nde jenahán tu ní cájetáhú i, ná ni ñyo paciencia ni Yaā Dios te ni condetu ya níni sáha Noé barco jeē naní arca. Te jín arca un ní cácu jecu-ni ñayuu, chi unā-ni i ni cácu nuū ndúte. ²¹ Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yó. Te jeē jéndute yó, nasūu jēē ndúndoo yĩquĩ cúñu yó, chi sa jeē jicán yó nuū Yaā Dios jeē ndúndoo ánuá yó. Te súcuan te cācu yó, chi ni cundúú yó jín Jesucristo nuū jnúhun ni natecu yā. ²² Te ni ndaa ya cuanuhun yā andiví, te ndéé yá ichi ndáváha Yaā Dios nuū cujéhnua ya. Te tācá ndajéhé andiví, jín jēē cándacu jniñu, jín jēē cájni poder, cájendetū

nuū yā.

Jeē na cuájniñu yó jín táhū jeē ni jéhe ya nuū yó

4

¹ Núu súcuan te nájnūhun ni ndoho Cristo jehē yó jín yĩquĩ cúñu yā, suni súcuan na táva ni maá ró ndoho ró. Chi ñayuu jeē ní ndoho jín yĩquĩ cúñu, tuá sáha i cuēchi. ² Núu súcuan te ní tiempo jeē cuahán gā rō, na sáha ró jniñu jeē cuní Yaā Dios, te ma sáha ga rō jniñu jeē ndíyo neé ni rō jín modo maá ró. ³ Chi nde ní véji ró, te ni casáha ró cuéhē cuēchi jeē cánujnahan ni rō síquī jeē tu ní cájini rō jñūhun Yaā Dios. Te tiempo un máni máá jēē neé ni casáha ró, te ni candiyo ni rō tāca jēē neé, ni canajĩni ró, ni casáha ró vico neé, ni cajihĩ ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó. ⁴ Te cácnéé ni i jeē tuá cájica ró jín i jeē sáha ró táca cuēchi xeēn jín i. Te jeē yúcuan cúu jeē cácahān neé i síquī rō. ⁵ Te máá i chi ñin quivĩ te nacuāha i cuenta nuū maá Yaā jeē iyó túhva ya sándaā yā jniñu ñayuu técu jín ñáyuu ní cajihĩ. ⁶ Chi jeē yúcuan suni ni quiji jñūhun vāha ya nuū tāca ndíyĩ ná ni cotecu i. Te ni cundaā síquī cuēchi ni casáha i ñayivĩ yáha, nájnūhun cundaā síquī ndihĩ ñayuu, návāha nacani ni i te cotecu anuá i ní cáni nájnūhun técu Yaā Dios.

⁷ Te je cuacuyajni quivĩ jeē náā tāca jēē iyó. Núu súcuan te ndito na cóo xinĩ rō jijnáhan

ró, te condihvī ni rō cacān tahu rō. ⁸ Te jeē cānuú gá cúu jeē cundáhú ndasí ni rō jnáhan ró. Chi núu cundáhú ni yō jnáhan yó, te iyó jnúhun cáhnu ni nuū cuehē cuēchi. ⁹ Sáha vāha ró jíin ñáyuu jeē jinú i vehe ró, te ma cúxī ni rō. ¹⁰ Tāca ró cuajniñu ró núu jnáhan ró, núu ndese iyó máá táhū rō jeē ni jéhe Yaā Dios jeē cuajniñu ró núu yā. Te squícu vāha ró jíin táhū jeē sīn sīn ni jéhe ya nuū ñn ñn ró. ¹¹ Núu tahu jeē nácani ró jnúhun cúu, te na cáhán rō nájnūhun jeē maá Yaā Dios cahán. Te núu tahu jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihi jeē casáha ró te cahán ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhán yō jeē luu cújéhnu Cristo te jnái ya poder ní cáni. Amén.

Jeē ndóho yó siquī jeē candíje yó Cristo

¹² Nánī mánī, núu vēji jnūndóho xeēn jeē coto ndee rohó, te ma cunéé ni rō cani ni rō jeē maá ró ni nihīn jnūndóho xeēn gā. ¹³ Chi sa cusī ni rō jeē cándoho ró jecu jnūndóho jeē ní ndoho Cristo, návāha suni cusī ndasí ni rō quivī quéndá ndijin yā jeē kujéhnu luu ya. ¹⁴ Te yóhoyo ndetū rō te núu cácahān neé i nuū rō siquī jeē cácandíje ró Cristo. Chi máá Espíritu Yaā Dios jeē kujéhnu ndasí, ndéé yá ini rō. Máá i chi cácahān neé i siquī yā, te máá ró chi cáchiñúhún ró yā. ¹⁵ Te núu

ndoho ró, te na ndóho ró síquī jeē cácandíje ró Cristo. Te ma ndóho ró síquī tāca cuéchi nájnūhun cándoho ñayuu jéhni ndīyi, ñayuu sacuíhná, ñayuu sáha jniñu neé, jíin ñáyuu quivī nduu nuū jniñu jnáhan jeē tu cānuú quivī nduu. ¹⁶ Te sa núu ñn ró ndóho siquī jeē candíje ró Cristo, te ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

¹⁷ Chi je ni jinū quivī jeē quejéé sándaā Yaā Dios cuéchi, te xīhna gā ñayuu cácuu sēhe ya sándaā yā cuéchi. Te núu xīhna gā cuéchi máá yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñáyuu jeē tu ní jétáhú jnúhun vāha ya. ¹⁸ Te núu yóhoyo yí cácu ñayuu vāha, núu súcuan ¿te ndese cácu ñayuu casáha jniñu neé jíin táca cuéchi? ¹⁹ Núu súcuan te róhó jéē cándoho siquī jeē súcuan cúní Yaā Dios, ma jécuiñī rō sáha ró jniñu vāha, te na chíhi ró máá ró ndaha máá Yaā jeē ni sáha róhó, chi squícu ya jeē ni jéjnūhun ya.

Jeē jéhe de consejo ñayuu cácandíje

5

¹ Vijna te na cáhán rī jíin táca róhó téé jéhnu cándito ñayuu cácandíje, chi suni tēe jéhnu ndíto ñayuu cácandíje cúu máá rí. Te cúu rí testigo jeē ní jito rí ndese ni ndoho Cristo. Te suni ndujéhnu rí jíin ró sáha Cristo quivī

quénda ndijin yā. ² Na coto yúcun ró ñayuu jeē ndeé jniñu ró condito ró, jeē cácuu i nájnūhun lanchi Yaā Dios. Te na cúsi ni rō condito ró i, chi súcuan cúní Yaā Dios. Te nasūu síquī jeē sáfuerza yā rohó, ni nasūu síquī jeē nihín rō xūhún, chi sa síquī jeē cuní rō cuajniñu ró. ³ Te nasūu jēē ndacu nihin ró jniñu nuū ñayuu cándito ró, chi sa nducú ró cuu ró in ejemplo nuū i jeē cácuu i lanchi ya. ⁴ Yūcuán na te quivī quénda ndijin maá Yaā cúu Pastor kujénu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhoyo luu te ma náā cuiti.

⁵ Te suni rohó táca téé suchí, na cuándetū rō nuū táca téé jénu jina. Te ndihi rōhó ñayuu cácdije, cuandetū rō nuū jnáhan ró, te cani suchí ni rō. Chi suhva cáhan tutu: Yaā Dios jési yā nuū ñayuu casáha téyí maá, te vāha ni yā chindéé ñáhan yá ñayuu casáha suchí maá.

Achí. ⁶ Núu súcuan te na cáni suchí ni rō, chi cáyihí ró ndaha Yaā Dios jeē jni poder. Te sájénu ya rohó, na jínú maá quivī. ⁷ Táca jéé cáncani ndasí ni rō síquī, chihi ró ndaha maá yá te maá yá coto, chi ndito ya rohó.

⁸ Te cájí na cóo xinī rō te ndito coo ni rō. Chi jexeén jeē jito uhū rohó, jica cuu ndúcú squivi rōhó jijnáhan ró núu cuéchi. Te xeén gā sáha vésú ndicaha jeē iyo ndáhyú. ⁹ Te cuiñi nihin ró jéé ma

cúndeyí jexeén jín ró, te nihin candije ró jnúhun cúndahú ni yā rohó. Chi cájini rō jeē suni súcuan cándoho hermano rō jeē cáyūcu ní cáhnu ñayiví. ¹⁰ Te núu ni jīnu jeē ndoho ró jecu-ni tiempo, te Yaā Dios chí sáha ya jeē ije vāha ni rō jín jnúhun ya, jín jéé cuiñi nihin ró, te cuāha ya fuerza ini rō, te quendōo cutú ró ní cáni. Chi máá yá cúu jeē sáha táca jéé vāha yóhó, te ni cana ya yohó jéé kujénu luu yó jín yá ní cáni, síquī jeē nduú yó jín Jesucristo. ¹¹ Te na cáhan yō jeé yóhoyo luu kujénu ya te jni ya poder ní cáni. Amén.

Saludo jeē sándihí

¹² Jíní rī jeē Silvano cúu in hermano jeē squicu vāha. Te máá de cuajeē nuū rō jín carta yáha jéé ní tee ri jecu jnúhun. Te jín yáha stihví ni rī rohó, te cáhan rī jín ró jeē ndaá cúu jeē táca jéé vāha ni sáha Yaā Dios rohó, suu stéén nuū rō jeē cundahú ndije ni yā rohó. Te na cuiñi nihin ró jín jnúhun yáha.

¹³ Ñayuu cácdije jeē cáyūcú ñuu Babilonia, jeé ní nacāji ya i nájnūhun ni nacāji ya rohó, cácahan i jeē sándeyí ni rō. Te Marcos, téé cúu nájnūhun sēhe ri, suni súcuan cáhan de. ¹⁴ Te núu na cáhan rō jín jnáhan ró, te techūhu manī rō ndaha i.

Te na cóo ndeyí coo si ni ndihi ró jéé cáyihí ró ndaha Jesucristo. Súcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te téu ri carta yáha cuájee nuū rō jijnáhan rō, jeē ni sáha Yaā Dios jeē inuú-ni jín rí jijnáhan ri ni canihín rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ² Te ñúhun ni rī jeē na sáha ga yā jeē váha ndasí rōhó jín jéé yóhyo coo ndeyí coo sī ni rō siquī jeē cájecūhun váha ni rō ndese Yaā cúu Yaā Dios jín Jítoho yō Jesús.

Siquī ndese cánuú coo ñayuu cácanđije

³ Te Yaā Dios, jín poder yā ni jēhe ya nuū yō tāca jéé sáha jeē cúu caca ndaā yō nuū yā jín jéé chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnú ya jín táca jniñu jéhnú sáha ya. ⁴ Jeē yúcuan ní jejnūhun ya tāca jéé yóhyo jéhnú yóhyo váha sáha ya yóhó, návāha jín táca ún te nduu rō nájñūhun íyó máá yá, te cācu rō núu jniñu jeē cácanđiyo néé ni ñayuu casáha i ini ñayiví yáha. ⁵ Núu súcuan te na ndúcú ndeyí rō jín jnúhun yáha. Te jeē cácanđije rō, te

siquī ún na chísóó rō jeē caca ndaā rō. Te jeē cájica ndaā rō, te siquī ún chísóó rō jeē cóndihvī ni rō jecūhun váha ni rō. ⁶ Te siquī ún chísóó rō jeē casi rō modo jeē cuní maá rō. Te siquī ún chísóó rō jnūhun cuandeyí ni rō, te siquī ún chísóó rō jeē chiñúhún váha rō Yaā Dios. ⁷ Te siquī ún chísóó rō jeē cóo manī rō jín jnáhan rō, te siquī ún chísóó rō jeē cundáhú ni rō jnáhan rō.

⁸ Chi núu cayā tācá jniñu yáha jín rō, te suu sáha jeē ma cótecu saá-ni rō, chi sa quee váha jniñu sáha rō, siquī jeē cájecūhun ni rō ndese Yaā cúu Jítoho yō Jesucristo. ⁹ Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰ Jeē yúcuan na ndúcú ndeyí rō hermano, návāha coo seguro jeē ní cana ya rohó jín jéé ní nacāji ya rohó. Chi núu sáha rō táca jniñu yáha, te ma cáca yátá cuiñi rō. ¹¹ Yūcuán na te nune váha ichi quiví rō ini ñuu maá Jítoho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñi rī sáha ri jeē núcūhun ni rō táca jnúhun yáha, vēsú je cájini rō te cáhīn nihin rō jín jnúhun ndaā jeē cácanđije rō. ¹³ Chi jéni ni rī jeē iyó váha sthví ni rī rohó vijna técu gā rī, návāha nucūhun ni rō. ¹⁴ Chi máá Jítoho yō Jesucristo ni castūhun yá nuū rī jeē tuá cotecu nahán rí

ñayīvi yáha. ¹⁵ Jeē yúcuan na ndúcú ndéyí gá rī stihví ni rī rohó, návāha núu je ni jihī rī, te níní nucūhun ni rō tāca jnūhun yáha.

Jeē ní cajito de jeē cujéhnu Cristo

¹⁶ Ná ni castéén rī jnūhun máá Jítóho yō Jesucristo nuū rō, ndese ndiji ya jíin poder yā, te tu ní cácahān rī ñin cuento-ni jeē ní catava ndichí ñáyuu. Chi ná ni cahīyo ri jíin yá xinī yúcu, te ni cajito jíin núu rī jeē tucu ni nduu ya jeē ní nduluu jéhnu ya. ¹⁷ Chi ni cajini rī jeē Tatá yō Yaā Dios ni cahān yīñúhún yá jíin Jesús, te ni sajeéhnu ya Jesús. Chi ichi ándiví ní quiji jnūhun luu, ni cahān Yaā Dios: Yāha cúu Sēhe ri jeē maní ndasí rī jíin, te cúsi ni rī jíin, áchí yá. ¹⁸ Te ni cajini sōho ri jnūhun un jéē ni cáhān ichi ándiví, chi ni cahīin ri jíin máá Jítóho yō xinī yúcu ī ún.

¹⁹ Te súcuan cájini yō jeē iyó ndáā ndije tāca jnūhun ni catee tēe ni canacani jnūhun ya nde jenahán. Te vāha jeē na chúhun ni rō jnūhun un jíināhan ró, chi suu cúu nájñūhun ñin luz jeē cayú nuū néē, nde na cúndijin quivī ndíji ya, te stéén yā ini anuá rō nájñūhun jeē ndíndéé lucero. ²⁰ Te xīhna gā na jécūhun ni rō jeē ni ñin jnūhun cáhān tutu ī, nasūu jéē súcuan-ni ni cajeni ni tēe cúu. ²¹ Chi tāca tēe ndoo jeē ní canacani jnūhun ya nde jenahán, tu ní cácahān cuiñi de jnūhun jeē cúu ni maá de. Chi sa suhva ni canacani de jnūhun Yaā Dios jeē ni stéén Espíritu Santo nuū de.

Siquī tēe cástéén jnūhun stáhú
(Judas 4-13)

2

¹ Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuan coo tēe stéén jnūhun stáhú méhñu ró. Te squiví de jnūhun stáhú jéē tiví ñáyuu sáha. Te ni ma cuajnúhún de Jítóho yō jeē jnáma ya de, te súcuan sáha de jeē jnahnú ndetū yachī de. ² Te cuehē ñayuu condiquin i modo neé jéē castéén de. Te sáha de jeē cahán neé ñáyuu siquī jnūhun vāha ya jeē cúu ichi ndaā. ³ Te siquī jeē cándiyo ni de xūhún, te quende de xūhun ró siquī jnūhun stáhú stéén de nuū rō. Te tu quixín jñúndóho jnahnú ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū táca ndajéhé yā jeē ní casáha cuéchi, chi sa ni jnaa yā infierno cáyindihyū nuū néē, cánuhnī jíin cadena. Te ni chindihyū yā nde quiví sándaā yā siquī. ⁵ Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha néé un. Te máá-ni Noé, tēe ni nacani jnūhun ndaā, ni scácu ya de jíin úxā gā ñayuu. ⁶ Te suni ni ndonda ya siquī cuéchi ñayuu ñuu Sodoma jíin ñuu Gomorra, te ni cayū ñuu i ni nduu máá yā na. Te súcuan cúu i ñin ejemplo nuū tāca gá ñayuu sáha néé jéē quiji ga. ⁷ Te ni scácu ya Lot, chi tēe

ndaā ni cuu de, te ni cucuíhyá ndasí ni de ni jito de jniñu neé ní casáha ñayuu neé un. ⁸ Chi tēe vāha un ní condee de mēhñu ñayuu ún, te ndiquivī ni nacani cuíhyá ni de jeē ní jini sōho de ni jito de tācá jniñu neé ní casáha i. ⁹ Núu súcuan te máá Jítoho yō chi jnáma ya ñayuu cáchiñúhún núu yā, te núu vēji jnūndóho siquī i. Te chíndihyū yā ñayuu casáha neé, návāha ndoho i castigo quivī sándaā yā cuēchi i.

¹⁰ Te víhyá gā stóho ya tēe casáha jniñu jnéhén jéē ndíyo neé ni de, te cácuu jéē ni de siquī jniñu ndácu máá Jítoho yō. Nihni ndasí ni de, te cáchundeyí ni de sáha de jeē cácuu maá de, te tu cáyūhú de cahān ndevāha de siquī tāca jéē cácujuhnu nuū sucún. ¹¹ Te ni máá ndajéhé jeē cáhīn nuū Jítoho yō, vēsú cácujuhnu ga yā jíin fuerza jíin jniñu ndiso ya, te tu cácahān ndevāha ya siquī tāca jéē cácujuhnu ún.

¹² Te tēe ún chi cácuu de nájñuhun quití yúcú jéē ni jéconā tī jíin modo sáha tī, te cátaħū tī návāha nihīn ñayuu tī cahni i tī. Chi cácahān neé de siquī tāca jéē tu cájecūhun ni de. Te cuu de nájñuhun jíhí tācá quití ún. ¹³ Te jeē ní castóho de ñayuu, suni súcuan nanihīn de ndoho de. Te cácusī ni de jíin tāca jéē cácajni ni de, te casáha de tācá jniñu jeē cándiyo neé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níní cácusī ni de jíin jniñu neé

jniñu stáhú.

¹⁴ Te cándiyo ni de cájito de ñahan, te tu cájecuīñi de sáha de cuēchi. Te cástáhú de ñayuu tahya ni. Chi ni cacāan de jíin jñuhun ndíyo ni de tācá ndajniñu. Te tēe jnahnū ndetū cácuu de. ¹⁵ Te ni casana de, chi ni castóo de jñuhun jeē cúu ichi ndaā. Te ni candiquīn de modo Balaam, tēe ni nacani jñuhun nde jenahán, séhe Beor. Chi tēe un ní cusī ni de nihīn de xūhun siquī jñuhun neé jéē cahān de. ¹⁶ Te ĩn burro ni cahān tī nájñuhun ĩn ñayuu, vēsú quití nihīn cúu tī. Te ni cahān tī nuū tēe ún, te súcuan ni jesi tī jeē ma quihín de cahān de tāca jñuhun neé stívi.

¹⁷ Te tāca tēe súcuan chi cácuu de nájñuhun tesōco íchi, nájñuhun vicō jeē stechí táchī. Te jnahnū ndetū de quivicoo de nuū neé nuū lúchi jnúu coyúcú de ní cáni. ¹⁸ Chi yōhyo casándúxí de máá de jíin jñuhun cácahān saá-ni de. Te cánducú de squiví tucu de sava ñayuu nuū jniñu neé jniñu ndíyo ni. Te súcuan cástáhú de ñayuu jeē sa ní quenda i ni cácu i nuū ñayuu casáha jniñu neé. ¹⁹ Te cácahān de jeē cáhīyo libre i sáha i ndese-ni cúní maá i, te ni máá de tu cáhīyo libre de, chi cácuu de mozo nuū cuēchi, chi máni jniñu jnéhén casáha de. Chi tācá jniñu jeē cúndeyí jíin ĩn tēe jeē sáha de, suu yūcuan ndúu de mozo nuū. ²⁰ Chi núu je ni cajini de ndese Yaā cúu máá Jítoho yō Jesucristo, Yaā jnáma yóhó, te

núu súcuan ni quenda de ni cācu de nuū jniñu jnehén iyó ini ñayiví, te yūcuán na te núu ndívicoo tucu de nuū jniñu un jéē cúndeyí tucu jíin de, núu súcuan te néé gá quendōo de jeē sándihí vésú jeē xihna ñuhún. ²¹ Chi vāha ga núu jeē tu ní cájini de jnūhun ichi ndaā nuú, vésú jeē ní cajini de, te stóo tucu de jniñu ndoo jeē ní ndacu ya nuū de. ²² Chi cūndaā jíin de nájñūhun cáhán ñin jnūhun jenahán: Ina ni nacaji tī jeē ní ndujen ti. Te quini ní ndundoo, ni nacuchi tucu ti ndehyū, achí.

Siquí jeē ndíji Jitoho yō

3

¹ Ñání mání, yāha cúu carta uū jeē tée ri nuū rō. Te jíin ndíndúú carta yāha cúní rī jeē nacani ni rō siquí ndihi jeē váha ndaā jeē jení ichí rí rohó. ² Te na núcūhun ni rō tāca jnūhun jeē ní canacani tēe ndoo Yaā Dios nde jenahán, jíin jniñu ní ndacu máá Jitoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³ Te xihna gā jnūhun yāha na jécūhun ni rō: Jeē nuū cuándihi quiví te quijicoo tēe sácata siquí jnūhun ndaā yā, chi sáha de tācá jniñu néé jéē ndíyo ni maá de. ⁴ Te cahán de jíjnáhan de: ¿Najehē cúu jeē tu ndíji Cristo nájñūhun ni jejnūhun ya? Chi nde quiví ní cajihí jíi yō te nde vijna, tu ndé sáma cuiti ndihi jeē iyó ndé ná ni jecōo ñayiví, achí de. ⁵ Chi tu cácuuni de

jecūhun ni de jeē ndé jenahán ní cuvāha andiví jíin jnūhun ni cahán Yaā Dios. Te ni ndacu ya jniñu jeē na cuvāha ñayiví jíin ndute, te mēhñú ndute ni nane ñuhun íchi. ⁶ Te suni jíin ndute ni naa ñayiví jenahán, chi ni ndaa ndute jeē ní cuun saū xeén. ⁷ Te suni súcuan jíin jnūhun ni cahán Yaā Dios ní sátūhva ya jeē cayú andiví jíin ñáyiví iyó vijna. Chi máá quiví juicio te cayū ndihi, te jnahnū ndetū ñayuu ni casáha néé.

⁸ Te suni ma náā ni rō jnūhun yāha, ñání mání: Jeē nuū maá Jitoho yō chi ñin quiví cúu nájñūhun mil cuiyā, te mil cuiyā cúu nájñūhun ñin quiví-ni. ⁹ Chi nasūu jéē cucuéé máá Jitoho yō siquí jnūhun ni jejnūhun ya, nájñūhun cájeni ni sava ñayuu. Chi sa suhva iyó paciencia ni yā nuū yō, chi tu cúní yā jeē jnahnú ndetū ni ñin yó, chi sa cúní yā jeē ndihi yó nacani ni yō stóo yó cuéchi yó.

¹⁰ Te quiví ndíji máá Jitoho yō, ñin sanaa-ni te quee, nájñūhun ñin sanaa-ni te quee ñacuñhá jecuáā. Te quiví ún chi ñihin ndasí andiví, te naa-ni. Te ndihi jeē iyó andiví chi naa sáha ñuhún. Te ñayiví jíin táca jéē iyó ini, ndihi cayū.

¹¹ Te núu súcuan naa tāca un, te cánuú ndasí jéē coo ndoo ánuá rō te chíñuhún váha ro yá jíjnáhan rō. ¹² Te condetu rō te condihví ni rō jeē na quee yachí quiví ndíji Yaā Dios. Te quiví ún cayū andiví te naa-ni, te tāca jéē iyó chi ndute sáha yáñuhún. ¹³ Te máá yó chi cándetu yó andiví

jéé jíín ñáyīvi jéé, chi súcuan ni jejnūhun Yaā Dios. Te yūcuán chi máni jniñu ndaā jíín jniñu váha coo.

¹⁴ Nūu súcuan, ñánī mánī, níni jéē cándetu ró jéē squícu tācá jniñu yáha, te na ndúcú ndéyí ró návāha quivī ndíji ya te nihīn yā rohó jéē cáyūcu mánī rō, te coo ndoo ró jéé tú na cuēchi ró. ¹⁵ Te na jécūhun ni rō jeē siquī jeē iyó paciencia ni maá Jítóho yō, jeē yúcuan cácu yó. Chi hermano yō Pablo jeē maní yō jíín, suni súcuan ni tee de nuū rō, chi súcuan ni steén Yaā Dios jnūhun ndíchí yá nuū de. ¹⁶ Te cáhán de siquī jnúhun yáha núu tāca carta jeē ní tee de. Te nuū carta de un íyó jecu jnūhun jeē yí jécūhun ni yō. Te ñayuu tu jécūhun ni jíín ñáyuu tu íje jíín jnúhun cándíje, cánasama i modo steén jnūhun yí un, nájnuhun násama i jeē cahán sava ga tutu īi. Te súcuan sáha i jeē jnahnú ndetū maá i.

¹⁷ Te rōhó ñánī mánī, vija te je ni cajini rō ndese coo tācá jniñu yáha. Nūu súcuan te coto má condiquīn rō jnūhun stáhú cástéén ñayuu casáha néé. Chi núu tuú te snáā rō jnūhun cáhīin nīhin ró jíín. ¹⁸ Chi sa na cóndihvī gā ni rō cuni rō ndese Yaā cúu máá Jítóho yō Jesucristo, Yaā jnáma yóhó. Te na íje ga ni rō jíín jnúhun cúndáhú ni yā rohó. Te na cáhán yō jeē yóhyo luu cújéhnū ya nde vijna jíín ní cáni. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jñūhun cotecu yō ñí cáni

¹ Jñūhun cátee ri cuajeē nuū rō jijnáhan ró cúu jñūhun máa Yaā jeē je íyó ndé ná tu jecōo táca jée iyó. Te ni cajini sōho ri jeē ni cáhān yā, te ni cajito jínūū rī yā, chi ni cajito vāha rī nuū yā, te ni cajñi rī yā. Te máá yá cúu Jñūhun cotecu yō ñí cáni. ² Chi Yaā yáha jée sáha ya jeē cótecu yō, ni quenda ndijin yā. Te cácahān rī jñūhun ya, chi ni cajito ri yā. Te cácastūhun rí nuū rō jijnáhan ró síquī Yaā cúu Jñūhun cotecu yō ñí cáni, Yaā ni condee jín Tátá yō Yaā Dios, te ni quenda ndijin yā nuū rī jijnáhan rī. ³ Jeē ní cajito ri jín jée ní cajini sōho ri, yūcuan cúu jeē cácastūhun rí nuū rō, návāha coo inuú ni rō jín yó jijnáhan yó. Te jendaá chi cáhīyo inuú ni yō jín máa Tátá yō Yaā Dios jín Séhe ya Jesucristo. ⁴ Te jñūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yāha cúu jñūhun ni steén Jesucristo nuū rī, te vjna cácastūhun rí nuū rō: Yaā Dios cúu luz, chi yōhyo ndaā yā, te tú cuiti na jñiñu néé íyó jín yá. ⁶ Núu cácahān yō jeē cáhīyo inuú ni yō jín yá,

te núu cájica yó nájñūhun nuū néé jeē sáha yó jñiñu néé, núu súcuan te cástáhú yó, te nasūú jñiñu ndaā casáha yó. ⁷ Te núu cájica yó jín luz yā jeē casáha yó jñiñu ndaā, nájñūhun íyó máá yá jín luz yā jeē sáha ya jñiñu ndaā, yūcuán na te cáhīyo inuú ni yō jín táca jnáhan yó. Te ñiñi máa Séhe ya Jesucristo sándoo yóhó núu ndihi cuēchi yó.

⁸ Núu cácahān yō jeē tú na cuēchi yó, te cástáhú yó máá yó jeē jéni ni yō súcuan, te tu ñūhun jñūhun ndaā ini yō. ⁹ Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndihi jeē neé casáha yó. Chi jín yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te nájñūhun sáha yó jée Yaā stahú cúu ya, te tu cándije ndije yó jñūhun ya.

Cristo cúu Yaā cahán jehē yō

2

¹ Táca jñūhun yáha téé ri cuajeē nuū rohó jée cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé ñn ró ní sáha cuēchi, te íyó máá Yaā cahán jehē yō nuū máa Tátá yō Yaā Dios. Jesucristo Yaā ndaā cúu ya. ² Te ni socō yā máá yá jeē ndahva yā cuēchi yó, te nasūu cuēchi máá-ni yó, chi suni cuēchi ñayuu ñí ñáyiví.

³ Núu squícu yó jñiñu ndácu Yaā Dios nuū yō, jín yúcuu cúcáhnu ni yō jeē jini ndije yó

ndese Yaā cúu ya. ⁴ Te núu cáhán ñn ñayuu: Ruhū chi jíni rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jíni yá. Súcuan te cuni yō núu ndúú yó jíni yá chí tuú. ⁶ Núu cáhán ñn ñayuu jeē ndúú i jíni yá, cánuú jéē caca ndaā i nájnūhun ni jica Jesucristo.

Jniñu jéé ndácu ya nuū yō

⁷ Hermano, nasūú ñn jniñu jéé ndácu ri nuū rō jeē cahán rī jeē na cúndáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candíje ró. ⁸ Te vēsú súcuan, te níni jniñu jéé cúu, te jniñu ndaā cúu nuū Cristo jíni núu maá ró jijnáhan ró. Chi je cuayāha jniñu néé jéé iyó núu néé, te je stéén maá luz ndaā ini anuá yō vijna.

⁹ Núu ñn ñayuu cahán i jeē jíca i jíni luz yā, te núu jíto uhū i jnáhan i, ñayuu ún chi jíca ga i nájnūhun nuū néé jíni cuéchi. ¹⁰ Te ñayuu jeē cundáhú ni jnáhan, chí jíca i jíni luz yā, cúu jeē sáha i jniñu váha. Te ni ñn ma cúu sáha jeē quiví i cuéchi. ¹¹ Te ñayuu jíto uhū jnáhan, chí iyó i nuū néé, te jíca i nuū néé. Te tu jíni i ndé chi quihín i, chí nuū néé un ní jesi jeē tu jécūhun ni i.

¹² Róhó jéé cácuu sēhe, téé ri jnūhun yáha cuájeē nuū rō,

chí jeē siquí Jesucristo te ni ine cáhnu ni Yaā Dios nuū cuéchi ró. ¹³ Róhó tátá jijnáhan ró, suni téé ri nuū rō, chí cájini rō ndese Yaā cúu Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chí ni cacundeyí ró jeē tu ní cúu squívi jexeén rohó cuéchi.

Róhó jéé cácuu sēhe, téé ri jnūhun yáha cuájeē nuū rō, chí cájini rō ndese Yaā cúu maá Tátá yō Yaā Dios. ¹⁴ Róhó tátá jijnáhan ró, suni téé ri nuū rō, chí cájini rō Yaā iyó ndé xīhna ñúhún. Róhó téé suchí jijnáhan ró, suni téé ri nuū rō, chí cáhīn nīhin ró, te cácandíje ró jnúhun Yaā Dios, te ni cacundeyí ró síquí jexeén.

¹⁵ Ma cutóo ni rō siquí ñayiví, ni táca jéé iyó ini ñayiví. Chí núu ndé ñayuu cutóo ni i siquí ñayiví, ñayuu ún tu iyó mání i jíni Tátá yō Yaā Dios. ¹⁶ Chí táca jéé cúu cuenta ñayiví, nasūu ndé nuū Tátá yō Yaā Dios vēji, chí cuenta ñayiví cúu. Te yūcuan cúu táca jéé cájni ni yō jeē cuni modo neé maá yó, jíni jéé ndíyo ni yō jeē jíto yó núu, jíni jéé sandúxí yó maá yó siquí ndajniñu névāha yó. ¹⁷ Te cuandihí ñayiví jíni táca jéé ndíyo néé ni yō. Te ñayuu casáha jeē cuni maá Yaā Dios, chí cotecu i ní cáni.

Jnūhun ndaā jíni jnúhun stáhú

¹⁸ Róhó jéé cácuu nájnūhun sēhe ri, cáhán rī jíni ró jeē cuandihí quiví. Te je ni cajini jnūhun ró jéé quíji maá téé

cuu contra siquī Cristo. Te nde vijna je ni canecoo cuehē tēe jeē cácuu contra siquī Cristo. Te jeē yúcuan jíní yō jeē cuándihī quivī. ¹⁹ Mēhñu máá yó ni quendacoo de, te nasūu jnáhan yó cá candíje cácuu de. Chi núu jeē jnáhan yó cácuu de, te quendōo de jíin yó nuú. Te ni quenda de cuangoo de, návāha cuni cají yó jēē násūu jnáhan yó cácuu ndihī de.

²⁰ Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yúcuan cájini rō jnūhun ndaā. ²¹ Núu súcuan te tēe ri yāha cuájeē nuū rō, siquī jeē cájini rō jnūhun ndaā, nasūu siquī jeē tu cájini rō. Te cájini rō jeē tú na jnūhun stáhú íyó nuū jnúhun ndaā.

²² ¿Ndé ñn cúu jeē cahán máni jnūhun stáhú? Suu tēe jeē cahán jeē Jesús, tu cúu ndije ya Cristo, Yaā ní tají Yaā Dios. Yúcuan cúu tēe jeē cúu contra siquī Cristo, chi tu jéjnuhún de máá Tátá yō Yaā Dios jíin Séhe ya. ²³ Tāca ñáyuu jeē tu jéjnuhún i Séhe ya, suni tu íyó máá Tátá jíin i. Te ñayuu jeē jejnuhún i Séhe ya, suni íyó máá Tátá jíin i.

²⁴ Núu súcuan te chuhun vāha ni rō maá jnúhun ni cajini sōho ró ndé jeē xíhna ñúhún. Te núu ñúhún vāha ni rō jnūhun ní cajini sōho ró ndé jeē xíhna ñúhún, yūcuán na te suni ndúú ró jíin máá Tátá yō jíin Séhe ya. ²⁵ Te yāha cúu jnūhun jeē ni jéjnuhún Jesucristo nuū yō: jeē cótecu yō níí cáni sáha ya.

²⁶ Jnūhun yáha ní tee ri nuū rō jeē cástūhun rí siquī ñáyuu cánducú stáhú róhó. ²⁷ Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yúcuan tu jíin ñúhún jēē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndihī nuū rō, te steén yā jnūhun ndaā, chi tu stáhú cuiti yā. Núu súcuan te caca ndúú ró jíin Cristo, nájnūhun stéén Espíritu nuū rō.

²⁸ Séhē jijnáhan ró, vijna te na cáca ndúú ró jíin Cristo, návāha núu na quénda ndijin yā, te ma yūhu yó, ni ma cúcanu yō nuū yā quivī ndíji ya. ²⁹ Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

¹ Nacā jeē yóhoyo ni cundáhú ni Tatá yō Yaā Dios yohó, chi ni nihīn yō jnūhun cuu yó séhe ya, te suu cúu ndije yó. Jeē yúcuan, ñáyuu ñayiví tu cájini i jeē cúu yó séhe ya, chi tu jíin i ndese Yaā cúu máá yá. ² Nánī mánī, vijna te cúu yó séhe Yaā Dios, te ná tu cuni yō ndese coo yó níí cáni. Te je jíin yō jeē quivī quénda ndijin Jesucristo, te nduu yó nájnūhun íyó máá yá, chi coto yó núu yā ndese íyó yá. ³ Te tāca ñáyuu jeē súcuan ñúhún ni i, chí sándoo i ánuá i, nájnūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuéchi, te stívi yó ley yā. ⁵ Te je cájini rō jeē ní quiji Jesucristo ini ñayívi návāha quende yā cuēchi yó. Te máá yá tú na cuēchi ya. ⁶ Te tāca ñáyuu jeē nduú i jíin yá, tu cájica i jíin cuéchi. Te tāca ñáyuu cájica jíin cuéchi, tu jíin i ya, ni tu jécūhun ni i ndese Yaā cúu ya. ⁷ Séhē jijnáhan ró, coto ró jéē ma stáhú ni iin i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájñūhun íyó ndāā maá yá. ⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñúhún. Jeē yúcuan ní quiji Sēhe Yaā Dios, jeē snāā yā tācá jniñu néé sáha jexeén.

⁹ Ni iin ñayuu jeē cúu sēhe Yaā Dios, tu jíca i jíin cuéchi, chi ni sáha Yaā Dios jeē ní nduu i nájñūhun íyó máá yá. Te ma cúu ga caca i jíin cuéchi, chi sēhe Yaā Dios cácuu i. ¹⁰ Súcuan cuni yō ndé iin cúu sēhe Yaā Dios jíin sēhe jexeén: Tāca ñáyuu jeē tu sáha jniñu ndaā, jíin jéē tu cúndáhú ni jnáhan, nasūu sēhe Yaā Dios cúu i.

Jeē na cúndáhú ni yō jnáhan yó

¹¹ Yāha cúu jñūhun jeē ní cajini sōho ró ndé jeē xíhna ñúhún: jeē na cúndáhú ni yō jnáhan yó. ¹² Te ma sáha yó nájñūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siqūi jeē ñani de ni

sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayívi cáquitī ni i nuū rō. ¹⁴ Te máá yó chi siqūi jeē cundáhú ni yō jnáhan yó, súcuan jíin yō jeē jé ni cácu yó jéē cótecu yō ní cáni. Te ñayuu jeē tu cúndáhú ni jnáhan, íyó i jíin jñūhun jnahnū ndetū i. ¹⁵ Chi tāca ñáyuu quitī ni nuū jnáhan, nájñūhun ñayuu jéhni ndīyi cúu i. Te cájini rō jeē ñáyuu jéhni ndīyi, ma nihín tahú i cotecu i ní cáni. ¹⁶ Jeē ni jíhī Cristo jehē yō, yúcuan cúu jeē steén cají ndese cúu jñūhun cúndáhú ni. Te máá yó, chi suni súcuan jíin ñúhún cundáhú ni yō jnáhan yó vésú na cúu yō jehē i. ¹⁷ Te núu névāha yó jéē cótecu yō ñayívi, te núu jíin yō jeē cúmanī nuū jnáhan yó, te núu tú cundáhú ni yō i cuāha yó jéē jíin ñúhún i, núu súcuan ¿te á íyó mánī yō jíin Yaā Dios, chí naún? ¹⁸ Séhē jijnáhan ró, ma cundáhú ni yō jíin máá jñūhun cáhán-ni yó, chí sa suhva na cúndáhú ndije ni yō nde jíin jniñu sáha yó.

Ndese cucáhnū ni yō jeē váha sáha yó núu Yaā Dios

¹⁹ Te súcuan cundaā ni yō jeē squícu yó jñūhun ndaā, te cucáhnū ni yō jeē váha sáha yó núu yā. ²⁰ Chi núu ánuá yó tú vāha sáha siqūi jeē iyó cuéchi yó, te Yaā Dios chí cújéhnū ga yā vésú anuá yō, te jíin ndihī ya tācá un. ²¹ Núu súcuan ñánī mánī, núu vāha sáha ánuá yō siqūi jeē tú na cuēchi yó,

yūcuán na te cúcáhnū ni yō jeē váha sáha yó núū Yaā Dios. ²² Te tāca jeē cacán yō nuū yā, te sáha ya jeē cahán yō, chí squícu yó jniñu ndácu ya te sáha yó jniñu jeē cúsiñ ni yā. ²³ Te yáha cúu jniñu ndácu ya: jeē na cándíje yó jéē ni sáha Sēhe ya Jesucristo jehē yō, jíin jéē na cúndáhú ni yō jnáhan yó, nájnūhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, ndúú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuán te jíiní yō jeē ndeé Yaā Dios ini yō.

Jnūhun jeē véji nuū Espíritu jíin jnūhun cáhán contra Cristo

4

¹ Ñání mání, ma candíje ró táca téé jéé cácahán de jeē jíin Espíritu Yaā Dios cánacani de jnūhun. Chí sa suhva coto ndee rō de, núu nde nuū Yaā Dios véji jnūhun cácahán de, chí tuú. Chí ini ñayiví je ni canecoo cuehē tēe cánacani jnūhun stáhú, te cácahán de jeē ndé nuū Yaā Dios véji. ² Te súcuán nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahán ndaā jeē ní quiji Jesucristo, ni nduu ya tēe, máá i cúu jeē jíin Espíritu Yaā Dios cácahán. ³ Te tāca ñáyuu jeē tu cájejnúhún jeē súcuán ni nduu ya tēe, máá i chí nasūu jíin Espíritu Yaā Dios cácahán i. Chí sa suhva cácuu i contra síquī Cristo. Te je ni cajini jnūhun ró jéé quijicoo ñayuu súcuán, te vijna je cáhíyo i ini ñayiví.

⁴ Séhē jijnáhan ró, máá ró cácuu sēhe Yaā Dios, te je ni cacundeyí ró síquī téé cástáhú un. Chí jéhnū ga cúu poder maá Yaā jeē ndeé ini rō, vésú poder maá jéē ndeé jíin ñáyuu ñayiví jéé castáhú. ⁵ Máá i cácuu cuenta ñayiví, te jeē yúcuán cácahán i jnūhun cuenta ñayiví. Te ñayuu cácuu cuenta ñayiví, cájini nahín i jnūhun ún. ⁶ Te máá yó chí sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahán yō. Te ñayuu jeē násūu sēhe Yaā Dios cácuu, máá i tu cájini nahín i jnūhun cácahán yō. Te súcuán nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cúndáhú ni iyó jíin Yaā Dios

⁷ Ñání mání, na cúndáhú ni yō jnáhan yó, chí jnūhun cúndáhú ni, nde nuū Yaā Dios véji. Te tāca ñáyuu cundáhú ni jnáhan, chí sēhe Yaā Dios cúu i, te jíin i ndese Yaā cúu Yaā Dios. ⁸ Te ñayuu jeē tu cúndáhú ni jnáhan, tu jíin i ndese Yaā cúu Yaā Dios, chí máni jnūhun cúndáhú ni iyó jíin Yaā Dios. ⁹ Súcuán ni steén Yaā Dios ndese cúndáhú ni yā yohó, chí ni tají yá Sēhe ya ni quiji ini ñayiví yáha, vésú mañúhún-ni ya iyó, návaha cotecu yō ní cáni sáha ya. ¹⁰ Te yáha cúu jnūhun cúndáhú ni: nasūu jéé xíhna maá yó ni íyo maní yō jíin Yaā Dios, chí sa suhva máá yá cúu jeē

ní cundáhú ni yā yohó. Te ni tají yá Sēhe ya ni quiji, návāha socō yā maá yá jeē quende yā cuēchi yó.

11 Ñánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. 12 Ni ññ ñayuu tu ní jíto cuítī nuū Yaā Dios. Te núu cundáhú ni yō jnáhan yó, te ndéé Yaā Dios ini anuá yō, te je ni ije vāha ni yō jíin jnúhun cundáhú ni. 13 Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndéé Yaā Dios ini yō. 14 Te ni cajito ri te cácastūhun rí jeē maá Tátá yō ni tají yá Sēhe ya ni quiji návāha jnama ya ñayuu ñayīví. 15 Te núu ndé ñáyuu jejnúhún i jeē Séhe Yaā Dios cúu Jesús, te ndúú i jíin Yaā Dios, te Yaā Dios ndeé yá ini i.

16 Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnúhun cundáhú ni iyó jíin Yaā Dios. Te ñayuu cundáhú ni jnáhan, ndúú i jíin Yaā Dios, te ndéé yá ini anuá i. 17 Te súcuan cúu jeē íje vāha ni yō jíin jnúhun cundáhú ni, návāha ma yūhu yó quivī sándaā yā jniñu yó. Chi nájnūhun cundáhú ni Cristo, suni súcuan cándāa máá yó ini ñayīví yáha. 18 Te núu manī yō jíin yá, te tu yúhú yó nuū yā. Chi núu ni ije yó jíin jnúhun manī yō jíin yá, te tú na síquī yuhú yó nuū yā. Chi jnúhun yúhú un cúu jeē yuhú yó ndoho yó castigo. Jeē

yúcuan ñayuu cáyūhú chi ná tu íje vāha i jíin jnúhun manī i jíin yá.

19 Te yóhó chi manī ndasí yó jíin Yaā Dios, chi xihna gā maá yá ni cundáhú ni yā yohó. 20 Te núu ññ ñayuu cahán i jeē maní i jíin Yaā Dios, te núu quítī ni i nuū jnáhan i, núu súcuan te ñayuu stahú-ni cúu i. Chi núu ññ ñayuu tu íyó mánī i jíin jnáhan i jeē jíto i nuū, te ni ma cúu coo manī i jíin Yaā Dios jeē tu jíto i nuū yā. 21 Chi je ni ndacu ya jniñu yáha nuū yó: Ñayuu jeē maní i jíin Yaā Dios, suni na cóo manī i jíin jnáhan i.

Jeē cundeyí yó síquī jeneé íyó ini ñayīví

5

1 Tāca ñáyuu jeē cá candíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu manī jíin Yaā cúu Tátá, suni cá cundáhú ni i ñayuu cácuu sēhe ya. 2 Súcuan jíní yō jeē cundáhú ni yō ñayuu cácuu sēhe ya, núu manī yō jíin yá te síquī yó jniñu ndácu ya. 3 Chi jeē síquī yó jniñu ndácu Yaā Dios cúu jeē maní yō jíin yá. Te jniñu ndácu ya chi tú veyi. 4 Chi tāca ñáyuu cúu sēhe Yaā Dios, cundeyí i síquī jeneé íyó ini ñayīví. Te jeē candíje yó jéē cundáhú ni yā yohó, yūcuan cúu fuerza jeē sáha jeē cundeyí yó. 5 Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí síquī jeneé íyó ini ñayīví.

Jnūhun cáhán ndaā siquī Séhe Yaā Dios

⁶ Te jeē ní quiji Jesucristo ini ñayīví, chi ní jendute ya jíin ndute, te ní jeti niñī yā jeē ní jíhī yā jehē yō. Te nasūu máá ñn-ni jeē ní jendute ya jíin ndute, chi suni ní jeti niñī yā. Te máá Espíritu Yaā Dios cáhán ndaā siquī yā, chi nuū máá Espíritu vēji jnūhun ndaā. ⁷ Chi ini andiví iyó únī jeē cácahān ndaā siquī jnūhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndinúni yá, chi ñn-ni cúu ya. ⁸ Te ini ñayīví suni iyó únī jeē steén ndaā: máá Espíritu, jíin jéē ní jendute Jesús, jíin jéē ní jeti niñī yā. Te ndinúni yáha, chi inuú-ni steén siquī yā. ⁹ Te cájetáhú yó jnūhun cácahān ndaā tēe, te jéhu ga cúu jnūhun cáhán máá Yaā Dios. Te jnūhun ní cahān yā cúu jnūhun siquī Séhe ya. ¹⁰ Ñayuu cácañdije jeē Séhe Yaā Dios cúu Jesús, je ní cacundaā ní i jnūhun yáha jeē ní cáhān Yaā Dios. Te ñayuu jeē tu cácañdije jeē ní cáhān Yaā Dios, nájnūhun cásáha i jeē Yaā stahú cúu ya, chi tu cácañdije i jnūhun ní cahān ndaā yā siquī Séhe ya. ¹¹ Te jnūhun ndaā un cúu jeē ní sáha ya jeē cótecu yō ní cáni, te Séhe ya ndíso jnūhun cotecu yō. ¹² Ñayuu jeē iyó Séhe ya jíin i, je ní nihín tahú i cotecu i. Te ñayuu jeē tu iyó Séhe ya jíin i, ma nihín tahú i cotecu i.

Jnūhun consejo jeē sándihí

¹³ Jnūhun yáha tēe ri nuū rohó ñayuu cácañdije Séhe Yaā Dios, návāha cucáhnū ní rō jeē ní níhín tahú rō cotecu rō ní cáni.

¹⁴ Te cúcáhnū ní yō Yaā Dios, chi jíni yō jeē núu na vé jícán yō nuū yā jeē suni cúní maá yá, te jíni nahín yá jeē jícán yō. ¹⁵ Te núu jíni yō jeē jíni nahín yá jeē jícán yō, núu súcuan te suni jíni yō jeē sáha ya jeē jícán yō.

¹⁶ Núu ñn ñayuu jíni i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhán rī jeē cacán tahú rō jehē ñayuu sáha cuēchi súcuan. ¹⁷ Tācá jniñū néé cúu cuēchi, te iyó cuēchi jeē násūu jéē jnahnú ndetū i cúu.

¹⁸ Te jíni yō jeē tāca ñayuu cácuu séhe Yaā Dios, tu jíca i jíin cuēchi. Chi Yaā cúu Séhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíni yō jeē séhe Yaā Dios cácuu yó. Te ñayuu ní ñayīví yíhi i ndaha jexeén.

²⁰ Te suni jíni yō jeē ní quiji Séhe Yaā Dios, te ní sáha ya jeē jécūhun ní yō, návāha cuni yō ndese Yaā cúu máá Yaā ndaā. Te ndúu yó jíin Yaā ndaā, suu jíin máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ní cáni. ²¹ Séhē jijnáhan ró, na cújiyo ró núu tāca jéē násūu

Yaā ndaā cúu. Súcuan na cóo.
Amén.

CARTA UU JEE NI TEE SAN JUAN APOSTOL

Jnūhun ndaā jīn jnūhun cúndáhú ni

¹ Máá ná cúu tēe jéhnū ndíso jníñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jīn núu séhe ní jīnánhan i. Te manī na jīn ní jīnánhan ní sáha jnūhun ndaā yā, te nasūu máá-ni ná, chi suni tāca ñáyuu jíní jnūhun ndaā. ² Te manī na jīn ní jīnánhan ní síquī jeē cácañdije yó jnūhun ndaā yā jeē iyó ini anuá yō, te coo jīn yó ní cáni. ³ Te ñúhun ni na jēē Tátá yō Yaā Dios jīn Séhe ya Jitoho yō Jesucristo, na sáha ga yā jeē váha níhín, te cundáhú ni yā nihín, te sáha ya jeē coo ndeyí coo sīñ ni ní, jīn jnūhun ndaā jīn jnūhun cúndáhú ni.

⁴ Yōhyo ni cusīñ ni ná, chi ni jini na jēē sava séhe ní cájica i jīn jnūhun ndaā, nájnūhun ni ndacu máá Tátá yō Yaā Dios jniñu nuū yō. ⁵ Hermana, cáhán ndahú ná jīn ní jeē na cúndáhú ni yō jnánhan yó. Te jnūhun tēe ná yáha cuájeē nuū ní, nasūu ñn jniñu jéé sá ndácu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶ Te jeē cundáhú ni yō jnánhan yó cúu jeē caca yó nájnūhun ni ndacu ya jniñu nuū yō. Te jniñu ní ndacu ya cúu jeē caca ní jīn jnūhun cúndáhú

ni, nájnūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnūhún de jeē ní quiji Jesucristo ni nduu ya tēe. Te tēe tu cájejnūhún súcuan, cácuu de tēe stáhú, te cácuu de contra síquī Cristo. ⁸ Coto ní jēē ma snáa ni táhū síquī jniñu váha ni casáha ní, chí sa suhva jeē na níhín ni ndihí tahū ní.

⁹ Núu ndé ñáyuu jñí inga jnūhun, te tu quéndōo i jīn jnūhun ni steén Cristo, núu súcuan te tu íyó Yaā Dios jīn i. Te ñáyuu quéndōo jīn jnūhun ni steén Cristo, chí íyó Tátá yō jīn i, te suni íyó Séhe ya jīn i. ¹⁰ Te núu jínū ñn ñáyuu vehe ní, te núu tu quíjnánhan jnūhun steén i jīn jnūhun yáha, te ma cuáha ní jnūhun condee i vehe ní, ni ma cahán ni jnūhun ndeyí ni jīn i. ¹¹ Chí ñáyuu cahán jnūhun ndeyí ni jīn i, chíndéé ñájnánhan jīn i síquī jniñu néé casáha i.

Jnūhun sandīhí

¹² Iyó cuehē gā jnūhun cahán na jīn ní jīnánhan ní, te tu cúní na tee ná núu tútu jīn tinta. Chí ñúhun ni na cuájeē ná coto jnánhan yó, te ndajnūhun yó, návāha cusīñ ndasí ni yō.

¹³ Tāca séhe cuhū ní, ñahan jeē suni ni nacāji ya, cácahán i jeē sándeýí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

*Jeē jejnūhún de tēe nání
Gayo*

¹ Máá rí cúu tēe jéhnū ndíso jniñu, te tēe rí carta yáha cuájeē nuū rō, amigo Gayo, chí manī rí jíin ró sáha jnūhun ndaā.

² Nánī mánī, jícan tahu rí jeē vāha na quihín tēcá jniñu sáha ró, jíin jéē na cóo vāha ró, nájnūhun íyó váha ánuá rō jíin jnūhun ya. ³ Yōhyo ni cusī ni rí ná ni quecoo sava hermano te ni cacastūhún de nuū rí ndese vāha squícu ró táca jniñu ndaā, chí jíca ndaā rō.

⁴ Tuá na inga sáha jeē cúsi gā ni rí, chí mánī jeē nihín rí jnūhun jeē cájica ndaā ñayuu cácuu nájnūhun sēhe rí siquī jeē ni scándije rí i.

⁵ Nánī mánī, yōhyo vāha sáha ró jeē chindéé ñáhán ró tēcá hermano, te víhyá gā núu tēe ñuu jíca cácuu de.

⁶ Chí tēe un ní canacani de jnūhun nuū ñayuu cácandije yáhá, ndese cúndáhú ni rō de. Te jícan rí jeē chindéé ñáhán gá rō de, núu na vé jíni ñúhún de jeē caca ga de ichi nuū quihín de, nájnūhun núnahan ni Yaā Dios. ⁷ Chí tēe un ní quendacoo de cájica de siquī jniñu Jesucristo. Te tú na vé cáquihín de nuū ñayuu jeē tu jíni jnūhun Yaā Dios. ⁸ Jeē yúcuan cánutú coto yó

de, chindéé ñáhán yó de jeē canacani de jnūhun ndaā.

*Siquī jeē tú vāha sáha
Diótfrefes*

⁹ Je ni tee rí in carta nuū ñáyuu cácandije jíñā. Te Diótfrefes, tu jétáhú de jnūhun cáhán rí, siquī jeē cuní de kujéhnū máá de nuū i. ¹⁰ Jeē yúcuan, núu na jéé rí te cahán rí nuū de siquī jniñu sáha de, chí yōhyo sájnūhún de te cáhán de jnūhun stáhú síquī rí jíinahan rí. Te nasūu máá yúcuan-ni sáha de, chí suni tu jétáhú de tēcá hermano jéngoo nuū de, te jési de jeē ma cuátáhú ñáyuu nuū tēcá hermano un. Te ñayuu cájetáhú nuū hermano un, quénehen de i nuū cándutútú ñayuu cácandije.

¹¹ Nánī mánī, ma ndácu ró ñáyuu casáha jniñu néé, chí sa suhva ñayuu casáha jniñu váha. Chí sēhe Yaā Dios cácuu ñayuu casáha jniñu váha. Te ñayuu casáha jniñu néé, tu cájini i ndese Yaā cúu Yaā Dios.

*Jeē cácahán i jeē vāha sáha
Demetrio*

¹² Táca ñáyuu chí cácahán i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahán maá rí, te cájini rō jeē iyó ndaā jnūhun cáhán rí.

Jnūhun sandíhí

¹³ Iyó cuéhē gā jnūhun cahán rí jíin ró, te tu cuní rí tee rí jíin tinta jíin pluma. ¹⁴ Chí ñúhún ni rí cuajeē yachí rí

coto jnáhan yó, te ndajnūhun
yó.

¹⁵ Te ñúhun ni rī jeē na cóo
ndeyí coo sī ni rō. Tācá amigo
yō yāha cácahān i jeē sándeýí
ni rō. Te suni cahān rō jíín ñn
ñn amigo jíñā jeē sándeýí ni i,
áchí rí, te cocahān yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jín. Te Jesucristo ndíto vāha ya rohó jéē cáyihí ró ndaha ya. ² Te ñúhun ni rī jeē na cúndáhú gá ni yā rohó, te sáha ya jeē coo ndeyí coo sīi ni rō, te coo manī ndasí yá jín ró, te na ndúcuehē gā tāca jéē yáha núu rō.

Siquī tēe cástéén jnūhun stáhú
(2 Pedro 2.1-17)

³ Ñānī manī, yōhyo ní cuu ni rī tee ri nuū rō siquī jnūhun ni jnama ya rohó jín rúhū jijnáhan yó. Te ni jini rī jeē cánuú gá tee ri carta jeē stihví ni rī rohó návāha nducú ndéyí ró jeē ma cási ñáyuu nuū jnūhun cácandíje yó. Te jnūhun ún chi je ni jēhe ya ñin jínu-ni nuū tāca ñáyuu maá yá. ⁴ Chi sava tēe ni castáhú de rohó ní quivicoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jniñu casáha de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de

jniñu néé, cácahān de. Te tu cájejnúhún ndije de Jitoho yō Jesucristo jín Yaā Dios, jeē mañúhún-ni ya cujéhnu nuū yō.

⁵ Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jitoho yō. Chi ni jnama ya ñayuu Israel jenahán, ni chindéé ñájnáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snáā yā sava i jeē tu ní cácandíje i. ⁶ Te suni nucūhun ni rō siquī ndajéhe yā jeē ní castóo jniñu ndíso, te ni castóo nuū ní ndeē andiví. Te Yaā Dios ni chindihiyū yā jijnáhan, te cándetu nde quiji quiví cáhnu jeē sándaā yā jniñu. Te cánuhñi jín cadena, cáyūcu ní cáni nuū cunú núu néē. ⁷ Te suni ni stóho ya ñayuu ñuu Sodoma jín ñuu Gomorra jín sava ga ñuu jeē ní iyo yajni, chi suni ni casáha néé i nájnūhun ni casáha tāca ndajéhe un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihñi i castigo ñuhūn jeē cayú ní cáni, te súcuan cúu i ñin ejemplo nuū ndihí ñayuu.

⁸ Te tēe cástáhú jeē ní quivicoo mēhñu ró, vēsú cájini de jeē súcuan ni sáha ya, te cájeni cáhá ni de, te casáha jnéhén de yiqui cúñu de, te cásquéhichí ni de tēe cándacu jniñu Jitoho yō, te cácahān ndevāha de siquī tāca jéē cácujeñnu nuū sucún. ⁹ Te nasūu súcuan ní sáha ndajéhe Miguel, vēsú ndajéhe cujéhnu ga cúu ya. Chi tu ní

cáhán ndevāha ya ni tu ní ndácunehen ya cuēchi siquī jexeén ná ni casásáhán jnáhan ya jín jéxeén un jeē siquī yiqui cúñu Moisés ná ni jihī de. Chi suhva-ni ni cahān yā: Máá Yaā Dios, Yaā cúu Jítoho, cuxeēn yā nuū rō, ni achi Miguel. ¹⁰ Te tēe cástáhú yáha chi cácahān neé de siquī tāca jēe tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcu jēe sá cáa ti, suu yūcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácu ni de nihīn de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihī siquī jeē ní cunīhni ni de. ¹² Tēe yáha núu cándutútú de jín ró jeē cáyeji manī rō, te cásáha de jniñu cúcanu rō. Chi cáyeji cájihī sī ni de, te tu cásáha de cuenta ndese caji inga ñayuu, chi máni máá de ndíhvī ni de caji vāha de. Te cácu de nájnūhun vicō íchi jēe stechí táchī. Te suni cácu de nájnūhun yujnu jeē tu jéhe ndehē maá tiempo. Te cácu de nájnūhun yujnu jeē ní quenda nde jín yoho, te tú cuiti gā na modo nane numa. ¹³ Te nájnūhun jeē jisó cóyo ndute mar te cáne tiñū, súcuan jícu de jín jniñu neé jēe cúu jnūhun canu. Te cácu de nájnūhun quimi jeē ní sana ichi. Te je íyó túhva nuū neé nuū lúchi jnúú coyúcu de ní cáni.

¹⁴ Te jeē ní yāha iñū yucūn Adán, te ni cacu Enoc, te ni nacani de jnūhun jeē ni stéén Yaā Dios nuū de siquī tāca tēe yáha, áchí de: Máá Jítoho yō ni steén yā nuū rī jeē ñn quivī te quiji ya jín cuéhē mil ñayuu maá yá. ¹⁵ Te sándaā yā jniñu tāca ñayuu, te snáhnú ndetū yā tāca ñayuu casáha neé. Chi máni jniñu neé cásáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶ Tāca tēe yáha máni cácahān sōó de, te cácahān de siquī ñayuu. Te máni jeē cúsi ni maá de cánducú de. Te cácahān de jeē tēe téyí cácu de, te cácahān yíñuhún de jín ñayuu návāha nihīn de jecu nuū i.

Jeē stihví ni Judas ñayuu cácañdije

¹⁷ Te máá ró jijnáhan ró ñánī manī, na núcūhun ni rō jnūhun jeē jé ni canacani tēe cácu apóstol maá Jítoho yō Jesucristo. ¹⁸ Chi ni cacahān de: Nde nuū cuándihī quivī te quijicoo tēe sácatā siquī jnúhun ndaā yā, te sáha de táca jniñu neé jēe ndíyo ni maá de. Súcuan ni castūhún apóstol. ¹⁹ Tēe un cúu jeē casásin ñayuu. Te máni cándihví ni de tāca jēe cutíndí ni maá de, chi tu ndéé Espíritu yā jín de.

²⁰ Te máá ró ñánī manī, na íje vāha ni rō jín jnúhun ndoo ndasí jēe cácañdije ró. Te cacān tahu rō jín fuerza Espíritu Santo. ²¹ Te quendōo nihin ró jín jnúhun jeē cundáhú ni Yaā Dios rohó.

Te condetu ró quívī jeē cótecu rō ní cáni sáha máá Jítóho yō Jesucristo siquī jeē cundáhú ni yā rohó.

²² Te sava ñayuu jeē cájeni siquí ni, nducú ró modo scandíje ró i. ²³ Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnehén jíin jniñu néé cásáha i.

Jnūhun cújéhnu Yaā Dios ní cáni

²⁴ Te Yaā Dios chi máñuhún-ni máá yá cúu Yaā ndichí, Yaā jnáma yóhó. Te íyó poder yā jeē coto ya rohó jéē ma quívī ró cuéchi, jíin jéē sáha ya jeē cuíñi ró núū ndíndēe yá, te quívī ún coo ndoo ró núū yā, te cusī ndasí ni rō sáha ya. ²⁵ Te na cáhán yō jeē yóhoyo luu cújéhnu ya siquī jeē ni sáha ya jíin Jítóho yō Jesucristo. Te na cáhán yō jeē cujéhnu téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé ní cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, návāha nacastūhun yá nuū ñáyuu cácadíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núū ruhū Juan jeē cúu ri mozo yā. ² Te máá rí cástūhun ndáā rī siquī tāca jéē ní jito ri ún, te nácani ndaā rī jnūhun Yaā Dios jíin jnúhun jeē ní cahān ndaā Jesucristo.

³ Yóhoyo ndetū ñayuu cahu tutu yáha, te suni yóhoyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quiví coo tācá jniñu yósó núū tútu yáha.

Jeē téé Juan carta nuū ndihúxá grupo ñayuu cácadíje

⁴ Máá rí cúu Juan, te téé ri jnūhun yáha cuájeē nuū rohó, ndihúxá grupo ñayuu cácadíje jeē cáyūcu Asia. Te ñúhun ni rī jeē máá Yaā Dios na sáha ga yā jeē váha róhó jíjnáhan ró, te sáha ya jeē coo ndeyí coo siī ni rō. Chi máá yá cúu Yaā iyó vijna, te ni iyo ya ní cání, te coo ya ní cání. Te ñúhun ni rī jeē suni súcuan sáha ndihúxá

Espíritu jeē cáhiin ya yuhu mesa nuū ndácu Yaā Dios jniñu. ⁵ Te ñúhun ni rī jeē suni súcuan sáha Jesucristo, Yaā cahán ndaā tāca jnúhun. Te xīhna gā maá yá ni natecu mēhñu ndíyi. Te cújéhnú ya nuū tāca rey jeē iyó ñayívi. Te máá yá cúndáhú ni yā yohó, te ni nacate ya yohó núū cuéchi yó jíin níñi yā. ⁶ Te ni sáha ya jeē ní nduu yó rey jíin sūtū cácejniñu nuū Tatá yā Yaā Dios. Te na cahán yō jeē yóhoyo luu cújéhnú ya te jnñi ya poder ní cání. Amén.

⁷ Cuni sōho jíjnáhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñáyuu jeē ní castújí i ya. Te tāca raza ñayuu ní cáhnu ñayívi ndahyū i jeē tu ní cácadíje i ya. Súcuan nahín coo.

⁸ Suhva cáhán maá Jítoho yō, Yaā jnñi ndihi poder: Máá rí cúu nájnūhun letra A xīhna ñúhún jíin letra Z jeē sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cání, te coo ya ní cání.

Jeē ní jito Juan jeē cújéhnú luu Cristo

⁹ Máá rí cúu hermano rō Juan jíjnáhan ró. Te inuú-ni ndóho ri jnūndóho jíin ró siquī jeē cácadíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndaā rī jnūhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní

Patmos. ¹⁰ Te ñn domingo ni jito ndijin rī jeē ni stéen maá Espíritu Santo nuū rī. Te ni jini sōho ri ñn jeē cána jee nñhin ichi yátá rī nájñūhun jeē tívī trompeta. ¹¹ Te ni cahān jíin rí:

Máá rí cúu nájñūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ñí cáni. Te na tée ró núū ñn tutu tāca jéē cóto ró, te taji ró quihñ nuū ndihúxá grupo ñayuu cácañdije jeē cáyūcú i ñí cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yūcuán na te ni ndicó cóto ri jeē cóto ri ndé ñn cúu jeē cahān jíin rí. Te ná ni ndicó cóto ri te ni jito ri uxā candelero oro. ¹³ Te mēhñú ndihúxá candelero un índichi maá Yaā ní nduu tēe. Te ñúhūn ya ñn sahna cáni jeē jinú nde nuū jehé yā. Te núhñi ñn cinturón oro jicā yā. ¹⁴ Te ixí xíní yā chi yaa nájñūhun ixí lánchi, nájñūhun yuhvā volcán. Te tinūu ya ndíndēe nájñūhun yáñuhūn. ¹⁵ Te jehé yā xíñú jíto nájñūhun cāa cuaán jéē ni ndúhvä nuū horno. Te nñhin ndasí cáhán yā, nájñūhun nñhin cuehē yūte náhnu. ¹⁶ Te ndaváha ya jñí ya uxā quími. Te yuhu ya quénda jeē cáa nájñūhun espada jeē xeén ndíndúú lado, te suu cúu jñūhun ya jeē niní sándaā yā siquī cuéchi. Te nuū yā cáa nájñūhun niándii jeē nándii ndaxín.

¹⁷ Te ná ni jito ri yā te ni

cotúu rí nuū jéhē yā nájñūhun jeē ni jíhī rī. Te ni soó yā ndaváha ya siquī rī, te ni cahān yā:

Ma yūhu ró. Máá rí cúu Yaā iyó ndé xīhna ñúhún te coo ri ñí cáni. ¹⁸ Te Yaā técu cúu ri. Chi ni jíhī rī te ni natecu rī, te vijna chi técu rī ñí cáni. Te máá rí jñí poder siquī cuéhyī jéhni ñayuu jíin siquī lugar nuū cáyūcu ánuá ndíyī. ¹⁹ Núu súcuan te tee ró núū tútu tāca jéē ní jito ró, jeē cúu vijna jíin jéē cóo ichi núú. ²⁰ Te yāha cúu jñūhun sāhi siquī ndihúxá quími ni jito ró jñí ndaváha rī, jíin siquī ndihúxá candelero oro. Ndhúxá quími ún cúu nájñūhun ndihúxá jeē cácujeñnu nuū ndihúxá grupo ñayuu cácañdije. Te ndihúxá candelero cúu nájñūhun ndihúxá grupo ñayuu cácañdije.

Jñūhun cuahān nuū ndihúxá grupo ñayuu cácañdije:

Jñūhun cuahān ñuu Efeso

2

¹ Tee ró jñūhun yāha na quíhñ nuū jeē cujeñnu nuū ñayuu cácañdije ñuu Efeso: Súcuan cáhán ruhū, Yaā jeē jñí ndihúxá quími jíin ndaváha ri, te jíca cuu ri mēhñú ndihúxá candelero oro. ² Je jíni rī tācá jñiñu váha casáha ró, jeē cándihvī ni rō siquī jñūhun ri, jíin jéē cájendeyí ni rō. Te jíni rī jeē tu cájehe ró jñūhun quívicoo ñayuu casáha néé mēhñu ró. Te jíni rī jeē ní cajito ndee rō

tēe cástáhú jeē cácahān de jeē cúu de apóstol, te ni cajini rō jeē tée stáhú cácuu de. ³ Te ni cajendeyí ni rō ni candoho ró jnúndóho, te tu ní ndínuu ni rō jeē cácuu ndasí ró jín jniñu ri. ⁴ Te vēsú súcuan te íyó jecu jeē cahán rī nuū rō, chí tuá cáhīyo manī vāha ró jín rí nájnūhun ni íyo manī rō jín rí quivī jehé. ⁵ Núu súcuan te nucūhun ni rō ndese ni castóo ró jnúhun jeē ni íyo manī rō jín rí, te nacani ni rō, te na sáha ró nájnūhun ni casáha ró ndé quivī ún. Te núu ma nácani ni rō, te yachī jeē rī te stáa ri candelero rō nuū ín, cúu jeē ma cuñi ga rō jín ñáyuu cácadíje. ⁶ Te vēsú súcuan te íyó in jeē váha casáha ró, chí tu cánujnahan cuiti ni rō cájito ró jniñu néé casáha ñáyuu cándiquin jnúhun jeē steén Nicolás. Te suni máa rí tu nájnahan cuiti ni rī jito ri. ⁷ Ñáyuu iyó sóho na chúsóhó i jeē cahán maá Espíritu Santo jín táca grupo ñáyuu cácadíje. Táca ñáyuu jeē cúndeyí síquī jeneé, cuāha ri jnúhun caji i ndehē jeē cúun xinī yúnju jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

Jnúhun cuahān ñuu Esmirna

⁸ Te tee ró jnúhun yáha na quíhín nuū jeē cujéhnu nuū ñáyuu cácadíje ñuu Esmirna: Súcuan cáhán ruhū, Yaā jeē iyó ndé xīhna ñúhún te coo ri ní cáni, te ni jihī rī te ni natecu rī. ⁹ Je jín rī táca jniñu váha casáha ró, jín jnúndóho

cándoho ró, jín jeē cándoho ndáhú ró. Te vēsú súcuan te cúca ró ndihī jeē ndíso jnúhun ri. Te jín rī jeē cácahān neé ñáyuu síquī rō jijnáhan ró. Ñáyuu un cácahān i jeē ñáyuu hebreo, ñáyuu maá Yaā Dios cácuu i, te tuú chí cástáhú-ni i, chí sa ñáyuu yihī ndaha Satanás cácuu i. ¹⁰ Te ma yūhú cuiti rō táca jeē ndoho ró. Chí jexeén je yajni sáha jeē quivícoo sava ró vecāa jeē cóto ndee rohó jijnáhan ró, te ndoho ró jnúndóho uxī quiví. Te na cuñi nihin ró ndé cuu rō, te cuāha ri premio jeē cótecu rō ní cáni. ¹¹ Ñáyuu iyó sóho na chúsóhó i jeē cahán maá Espíritu Santo jín táca grupo ñáyuu cácadíje. Táca ñáyuu jeē cúndeyí síquī jeneé, ma nihín i jnúndóho jeē jnahnú ndetū i cuu i vuelta uū, achí yá.

Jnúhun cuahān ñuu Pérgamo

¹² Te tee ró jnúhun yáha na quíhín nuū jeē cujéhnu nuū ñáyuu cácadíje ñuu Pérgamo: Súcuan cáhán ruhū, Yaā jeē névāha espada jeē xeén ndindúú lado, te suu cúu jnúhun ri jeē sándaā rī síquī cuéchi. ¹³ Je jín rī táca jniñu váha casáha ró, te jín rī jeē cáyūcu ró mēhñu ñáyuu jeē ndácu Satanás jniñu nuū. Te vēsú súcuan te cáhīn nihin ró jín jnúhun ri, te tu ní cánayūhu ró jeē cácadíje ró rúhū, ni quiví ni jihī Antipas, tēe ni squícu vāha ni nacani ndaā jnúhun ri. Chí ñuu rō cáyūcu ñáyuu cájejniñu nuū Satanás, te ni cajehni i

Antipas. ¹⁴ Te vēsú súcuan te íyó jecu jeē cahán rī nuū rō jijnáhan ró. Chi mēhñu róhó ñáyuu ñuu Pérgamo iyó sava ñáyuu cándiquñ jñuhun ni steén Balaam. Chi tēe un ní steén de nuū Balac ndese squívi de ñáyuu Israel cuēchi jeē cáji i jeē ni sócō nuū ídolo jín jēe cosíquí ndēe jnáhan i. ¹⁵ Te suni íyó sava ñáyuu mēhñu ró jeē cácandíje ga i jñuhun ni steén Nicolás, te jñuhun ún chi tu nújnahan cuiñi ni rī. ¹⁶ Núu súcuan te nacani ni rō síquī cuēchi ró. Chi núu tuú te yachī jeē rī jín espada jeē quénda yuhu rī, te suu cúu jñuhun rī jeē sándaā rī síquī cuēchi. Te jín yúcuan te stóho rī ñáyuu jeē candíje ga jñuhun neé un. ¹⁷ Ñáyuu iyó sóho na chúsóhó i jñuhun jeē cahán maá Espiritu Santo jín táca grupo ñáyuu cácandíje. Táca ñáyuu jeē cúndeyí síquī jeneé, scáji rī i maná jeē yísahí ichi ándiví. Te suni cuāha rī ñin yuū cuijín núu i, te nuū ún condee ñin síhví jéé, te ni ñin ñáyuu ma cúní síhví un, chí máá-ni i jeē nihín. Achí yá.

Jñuhun cuahān ñuu Tiatira

¹⁸ Te tee ró jñuhun yáha na quíhín nuū jeē cujéhnu nuū ñáyuu cácandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájñuhun yáñuhūn. Te jehē rī xínú jíto nájñuhun cāa cuaán jēe ni ndúhvā. ¹⁹ Je jíní rī táca jñiñu váha cásáha ró, chí cácundáhú ni rō jnáhan ró, te cácandíje ñihin ró ruhū, te cácejñiñu ró núu rī, te cájendeyí

ni rō. Te jíní rī jeē vihyá gā cásáha ró vijna vēsú nde quiví jehé. ²⁰ Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jēe naní Jezabel, te cájēhe ró jñuhun steén ña nuū rō. Te áchí ña jeē nácani ña jñuhun Yaā Dios. Te tuú chí jín jñuhun steén ña te stáhú ña ñáyuu cácandíje jeē cácuu i mozo rī. Te sáha ña jeē casíquí ndēe jnáhan i, jín jēe cáyeji i jeē ni sócō nuū ídolo. ²¹ Te ni jēhe rī tiempo jeē na nácani ni ña, te tu cúní ña nacani ni ña stóo ña jeē casíquí ndēe ña. ²² Núu súcuan te na sáha rī jeē jécava ña jín cuéhyí. Te táca ñáyuu casíquí ndēe jín ña, suni cuāha rī jñundóho xeēn nuū i, te núu ma nácani ni i stóo i jñiñu neé nájñuhun sáha ña. ²³ Te sáha rī jeē cúu ñáyuu jeē ni scándíje ña. Te súcuan cuni táca grupo ñáyuu cácandíje jeē maá rí cúu Yaā jíní ndihí ndese cáa jeē nájñuní jín ánuá ñáyuu. Te cuāha rī yāhu ñin ñin ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jñuhun steén ñahan ún, ni tu ní cájñi ró jñuhun jeē cácahān i jeē jñuhun sāhi gá Satanás cúu, jín máá ró cahán rī jeē ma tée ga rī inga jñiñu síquī rō. ²⁵ Chi máá-ni jeē na quéndōo ñihin ró jín jñuhun ndaā cácandíje ró, te quéndōo ñihin ró jín ndé quiví ndíji rī. ²⁶ Táca ñáyuu jeē cúndeyí síquī jeneé, jín jēe squícu váha jñiñu cúní rī nde vijna

te nde quivī sándihí, sáha ri jeē cujéhnū i ndacu i jniñu nuū tācá nación, ²⁷ nájnūhun ni sáha Tátá rī jeē cujéhnū ri ndácu ri jniñu. Te ndacu nīhin i jniñu nuū tācá nación. Te nájnūhun cúun yúu i quīsi tahu, súcuan squéhichī i ñayuu tu cájendetū nuū rī. ²⁸ Te sáha ri jeē coto i ruhū jeē luu cujéhnū ri quenda ndijin rī, nájnūhun jíto i lucero jeē cáne cúndijin. ²⁹ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Achí yá.

Jnūhun cuahān ñuu Sardis

3

¹ Te tee ró jnúhun yáha na quíhín nuū jeē cujéhnū nuū ñáyuu cácandíje ñuu Sardis: Súcuan cáhán ruhū, maá Yaā jeē névāha ndihúxá Espíritu Yaā Dios jíin ndihúxá quēmi. Je jíin rī tācá jniñu cásáha ró, te cácahān ñayuu jeē cátecu rō, te nuū rī chí nájnūhun ndīyī cácuu ró. ² Na nátahū ni rō, te ndejéé níhin ró jíin jniñu jeē jecu na iyó te ndúcú naa. Chí je jíin rī jeē tu squícu vāha vāha ró núu Yaā Dios. ³ Te na núcūhun ni rō tāca jnúhun jeē ní castéén nuū rō. Te cuatáhú ró jnúhun ún te nacani ni rō síquī cuéchi ró. Chí núu tú natahū ni rō, te cuajeē rī nuū rō ñin sanaa-ni nájnūhun jeē ñin sanaa-ni te quíji ñacuīhná, te ma cúni rō na hora jinū rī nuū rō. ⁴ Te vésú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájnūhun

jeē tu ní sájnéhén ró sahma ró. Jeē yúcuan cujín yaa coo sahma ró caca ró jíin rí, chí ñayuu vāha cácuu ró. ⁵ Chí tāca ñáyuu jeē cúndeyí síquī jeneé, cuāha ri sahma cujín yaa cuhun i. Te ma ndáhva rī síhvī i nuū libro jeē yosó síhvī ñáyuu cotecu ní cáni. Te cuajnúhún rí i nuū Tátá rī jíin núu tācá ndajéhé yā. ⁶ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácandíje. Achí yá.

Jnūhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnū nuū ñáyuu cácandíje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máa rí núne jeē quivī ñayuu nuū ndácu ri jniñu, te ni ñin ma cúu casi, te máa rí jési, te ni ñin ma cúu nune. ⁸ Je jíin rī tācá jniñu vāha cásáha ró. Te ni nune ri nájnūhun ñin yéhyí quívicoo ró, te ni ñin ma cúu casi. Chí vésú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jéē cácandíje ró rúhū. ⁹ Te íyó sava ñayuu yíhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chí cástáhú-ni i. Núu súcuan te sáha ri jeē jécoo i nuū rō te jecuíñi yití i nuū rō, te cuni i jeē maní rī jíin ró. ¹⁰ Te vāha ni casquícu ró jnúhun ní cahán rī jeē cuándeyí ni rō. Te jeē yúcuan

jnama ri rohó quívī jeē quíji ñn jñúndóho xeēn siquī ñáyuu ní cáhnu ñayīví, jéē cóto ndee ún i jíjnáhan i. ¹¹ Te yachī ndiji ri. Núu súcuan te quendōo nīhin ró jíin jnúhun cá candíje ró, návāha ni ñn ma quénde premio rō. ¹² Tāca ñáyuu jeē cúndeyí síquī jeneé, sáha ri jeē cuu i nájnūhun sihīn yuū luu ini templo Yaā Dios maá rí. Te ma cújiyo i nuū ndeé yá un. Te tee ri sihvī Yaā Dios maá rí jneē i, jíin sihvī jéé máá rí, jíin sihvī ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví nde nuū Yaā Dios maá rí. ¹³ Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cá candíje. Achí yá.

Jnúhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnu nuū ñáyuu cá candíje ñuu Laodicea: Súcuan cáhán ruhū, maá Yaā cúu jnúhun ndaā, Yaā cúu testigo vāha jeē cahán ndaā. Te máá rí ni sáha ndihi jeē ni cáhān Yaā Dios jeē na jécōo. ¹⁵ Je jíin rī táca jniñu cá sáha ró. Te cácuu ró nájnūhun jeē tú mījin ni tú jihní, cúu jeē jecu-ni cá candíje ró jnúhun ri, te ni tu cájito uhū rō ni tu cándihvī ni rō siquī. Te nacā jeē váha núu jeē míjin ró chí jéé jihní ró nuú. ¹⁶ Te tuú chi máá yívíxī-ni ró, chi ni tu cájito uhū rō ni tu cándihvī ni rō siquī. Te jeē yúcuan squéhichī rī rohó nájnūhun ñn jeē tésīhi rí jeē séyūhu rí jeē tu

nújnahan ni rī. ¹⁷ Te cácahān rō jeē cucá ró, te quéndōo vāha ró, te tu cúmanī ni ñn nuū rō. Te tu cá sáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ññi líi rō. Te tāca jéé yáha cúní cahān jeē tu cá candíje vāha ró. ¹⁸ Núu súcuan te cáhān rī jíin ró jeē nuū rī cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cucá ndije ró ndihi jeē ndíso jnúhun ri. Te nuū rī cuaan ró sahma cuijín cuhun ró, návāha tú cucanu rō jeē máá ññi líi rō, cúu jeē quéndōo ndaā rō sáha ri. Te cuaan ró tájnā nuū rī, quívī tinū ró, návāha ndundijin tinū ró, cúu jeē jecūhun ni rō jnúhun ri. ¹⁹ Tāca ñáyuu jeē cundáhú ni rī, chi cáhān rī nuū i te stóho ri i, návāha na chúhun ni i. Núu súcuan te na cóndihvī ni rō jíjnáhan ró, te nacani ni rō jeē stóo ró cuéchi ró. ²⁰ Cuni sōho, chi íin ri yehyí ánuá rō te cáhān rī. Te núu ndé-ni róhó cuni sōho te nune ró yehyí ánuá rō, te quívī ri caji rī staā jíin ró, te suni caji maá ró jíin rí. Te suu cúu jeē cóndee rī anuá rō. ²¹ Tāca ñáyuu jeē cúndeyí síquī jeneé, cuāha ri jnúhun conene i jíin rí nuū mesa nuū ndácu ri jniñu. Chi máá rí suni ni snáā rī poder jeneé, te ni cucōo ri jíin Tátá rī nuū mesa nuū ndácu ya jniñu. ²² Ñayuu iyó sóho na chúsóhó i jnúhun jeē cahán maá Espíritu Santo jíin táca grupo ñayuu cá candíje. Achí yá.

Tāca jéé cáyūcú andiví

cáchiñúhún núu yā

4

¹ Yūcuán na te ni ndacoto ri, te ni jito ri jeē núne ñn yéhyí andiví, te máá Yaā jeē ni cáhān jín rí jeē xihna ñúhún, ni cáhān tucu jín rí nájnūhun jeē tiví trompeta. Te ni cáhān:

Caa quiji ró yáha, te na stéén rī nuū rō tācā jniñu jeē cóo ichi núú gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví ñn ñn mesa nuū ndácu jniñu, te néne máá yá nuū mesa un. ³ Te máá yá jeē néne yūcuan cáa ya nájnūhun ndíndéé ñn yuū quiyi ndíi chí ñn yuū cuehé ndíi. Te ñn ticō vēhnde ní jicó ndūu yuhu mesa yā, te ndíndéé nájnūhun ñn yuū cuí ndíi. ⁴ Te xiin mesa yā ni jito ri jeē ní jicó ndūu ocō cuñ gā mesa nuū ndácu jniñu. Te nuū mesa un néne ocō cuñ tēe jéhu cándiso jniñu. Te cáñuhun de sahma cuijín yaa, te xinī de cáñuhun corona oro. ⁵ Te nde nuū mesa nuū ndácu ya jniñu ndíndéé taja te ññin te cáhān taja. Te ichi núú mesa yā ñn ndihúxá Espíritu Yaā Dios, jeē cáa nájnūhun uxā yiti náhnu jeē cayú ñuhūn. ⁶ Te ichi núú mesa yā ún suni iyó nájnūhun ñn mar jeē jito quiyi nájnūhun vidrio.

Te xiin mesa yā un ní jicó ndūu cuñ jeē técu. Te iyó cuehē tñūu ní cáhnu ichi núú jín ichi yátá un. ⁷ Te ñn jeē técu un cáa nájnūhun ndicaha. Te ñga cáa nájnūhun stiquī. Te jeē uní chí nēe nuū tēe.

Te jeē cuñ chí cáa nájnūhun yaha chócó jēé jicó núu tachí.

⁸ Te ndicúún jeē técu un iyó ññu ndijēn jeē ñn ñn. Te máni máá tñūu cúu ní cáhnu nde jín ní chíji ndijēn. Te nduú ññu tu jécuiñi cuiti jeē cahán: Yaā ñi Yaā ndoo ndasí cúu máá Jítoho yō Yaā Dios, Yaā jñí ndihí poder, Yaā iyó vijna, te ni ñyo yá ní cáni, te coo ya ní cáni.

Achí.

⁹ Chi máni jeē cácahān ndicúún un jēé cujéhu ndasí máá Yaā jeē néne nuū mesa, Yaā jeē técu ní cáni cuiti. Te yíñúhún cácahān un jín yá, te nácuatáhú núu yā. ¹⁰ Te tāca jínu jeē casáha súcuan, te ndihócó cuñ tēe jéhu cándiso jniñu, cájecuiñi yiti de nuū Yaā jeē técu ní cáni cuiti, cáchiñúhún de ya. Te cástaa de corona de, cájequin de ichi núú jehé mesa yā. Te cácahān de:

¹¹ Jítoho ná te Yaā Dios na cúu ní.

Te vāha ndasí Yaā cúu ní jēé cácahān i jeē luu cújéhu ní,

te cáhīyo yíñúhún i nuū ní, te jñí ní ndihí poder.

Chi máá ní ni sáha ndihí jeē iyó,

te siquī jeē súcuan ni cuu ni maá ní te ni jecō ndihí.

Achí de jínáhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jniñu, ndaváha ya jñí ya ñn

tutu cáni jeē ní tuu. Te yósó jnúhun ndíndúú lado tutu ún, te ndíhyú jíin úxā sello. ² Te ni jito ri ñn ndajéhé yā jeē ndíso poder, te ni cahān jee:

¿Ndé ñn cúu tēe vāha ndasí jeē cóndiso jníñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē iyó chíji ñayiví, tu ní íyo ni ñn jeē cóndiso jníñu nune tutu ún, ni jeē cóto nuū. ⁴ Te ni ndahyū ndasí rí, chi tu ní íyo ni ñn jeē cóndiso jníñu nune te cahu tutu ún, ni jeē cóto nuū. ⁵ Yūcuán na te ni cahān ñn tēe jéñu un jíin rí:

Ma ndahyú rō, chi íyó ñn Yaā ndíso jníñu jeē cahnde yā ndihúxá sello ndihyú tutu, te nune ya. Te máá yá chi íyó cuéhē poder yā, nájnūhun jeē iyó cuéhē fuerza ñn ndicaha. Te ni cacu ya chíji yucūn Judá, jeē cúu yucūn rey David. Te ni snāā yā poder táca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñú ndicúun jeē técu, jíin tēe jéñu cándiso jníñu. Te íyó úxā ndiqui jíin úxā tinūú Londe ún. Te tinūú un cúu ndihúxá Espíritu Yaā Dios jeē ní tají yá ni jengoo ní cáhnu ñayiví. ⁷ Te Londe un ní jequihin ya tutu jeē jñí ndaváha Yaā jeē néne nuū mesa. ⁸ Te ná ni quihin ya tutu ún, te ndicúun jeē técu jíin ndihóco cuūn tēe jéñu cándiso jníñu, ni cajecuiñí yití núu yā. Te ná ñn ná ñn tēe jéñu un cándaha yaa jeē naní

arpa, jíin cóhō cūu oro jeē ñúhun chitú súje cutú. Te sūje cutú un cúu máá táca jnúhun jeē cájicān tahú ñayuu yíhi ndaha Yaā Dios. ⁹ Te ni cajita de ñn yaa jeé, te suhva cáhān: Vāha ndasí Yaā cúu ní jéē quihin ní tutu te cahnde ni sello jeē ndihyú.

Chi ni cajehni i níhín, te jíin níñí ni ní nacuaan ní ñayuu

mēhñu táca raza, táca yuhu, táca ñuu, táca nación, návāha cuu i ñayuu Yaā Dios.

¹⁰ Te ni sáha ní jéē cuu i rey jíin sūtū nuū Yaā Dios, te ndacu i jniñu ini ñayiví. Achí de cájita de.

¹¹ Te ni jito ga rí, te ni jini sōho ri jeē cácahān cuehē ndajéhé yā jeē ní cajicó ndúū xiin mesa yā, jíin xiin ndicúun jeē técu, jíin xiin tēe jéñu cándiso jníñu. Te íyó cuéhē ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jñí ya poder, te yōhyo cúca yá,

te yōhyo ndíchí yá, te ndíso ya cuehē fuerza,

te cáhīyo yíñúhún ndihí nuū yā, te luu cújéñu ya,

te cácahān i jeē vāha ndasí Yaā cúu ya.

Achí.

¹³ Te suni ni jini sōho ri jeē cácahān ndihí jeē ní sáha Yaā Dios jeē iyó ini andiví jíin ini ñayiví jíin chíji ñayiví jíin ini mar. Te ndiví un ní cacahān: Cúsí ni yō cahān yō jeē yōhyo vāha Yaā cúu máá Yaā

néne mesa nuū ndácu
ya jniñu,
jín Yaā cúu Londe Yaā Dios.
Te na cóo yíñuhún yó nuū yā,
chi cújéhu luu ya,
te jnñi ya poder ní cáni cuiti.

Achí.

¹⁴Te ni cacahān ndicúún jeē
técu:

Súcuan na cóo, áchí.

Te ndihóco cuūn tēe jéhu
cándiso jniñu ni cajecuiñi yití
de, te ni cachiñuhún de nuū
Yaā jeē técu ní cáni cuiti.

Siqui ndihúxá sello

6

¹Yūcuán na te ni jito ri jeē
Yaā cúu Londe Yaā Dios, ni
jehnde yā ñn jeē uxá sello un.
Te ni jini sōho ri jeē cahán
ñn jnáhan ndicúún jeē técu ún,
nájñuhun cáhán taja:

Nehen te cuni rō.

²Te ni ndacoto ri, te ni
jito ri ñn caballo cuijín. Te
jeē yosó síquī tī un ndáhá ñn
arco jeē stáva nduva. Te ni
jecūhun ñn corona xinī. Te
ni quenda ni jejnáhan, te ni
cundeyí síquī ndihi.

³Yūcuán na te Londe un ní
jehnde yā sello uū. Te ni jini
sōho ri jeē cahán inga jnáhan
ndicúún jeē técu:

Nehen te cuni rō.

⁴Te ni quenda ñn caballo
cuehé, te jeē yosó síquī tī
ndíso jniñu jeē snāā jñuhun
cáyūcu mánī ñayuu ñayiví, te
quejéé i cahni jnáhan i. Te ni
nihñn ún ñn espada cáhnu.

⁵Yūcuán na te Londe un ní
jehnde yā sello unī. Te ni jini
sōho ri jeē cahán inga jnáhan
ndicúún jeē técu:

Nehen te cuni rō.

Te ni ndacoto ri, te ni jito ri
ñn caballo jnuú. Te jeē yosó
síquī tī ndáhá ñn balanza jeē
chícuāha, chi coo jnamā xeēn.
⁶Te mēhñú ndicúún jeē técu
un ní jini sōho ri ñn jeē cahán:

Máá ñn kilo-ni trigo nihñn
i jín yáhu i jeē sájñiñu i ñn
quiví. Te núu cebada, te
unī-ni kilo nihñn i jín yáhu i
jeē sájñiñu i ñn quiví. Te aceite
jín vino chi ma sáha ró jéé
cúmanī. Achí.

⁷Yūcuán na te Londe un ní
jehnde yā sello cuūn. Te ni
jini sōho ri jeē cahán tucu inga
jnáhan ndicúún jeē técu:

Nehen te cuni rō.

⁸Te ni ndacoto ri, te ni jito
ri ñn caballo cuaán yaa, te jeē
yosó síquī tī cúu máa cuéhyī
jéhu ñayuu. Te ichi yátá un
ndíquín máa jñuhun jeē quiví
ñayuu lugar nuū cáyūcu ánuá
ndīyi. Te ndíndúú un cándiso
jniñu jeē ndóna síquī ñn jeē
ndicúún parte ñayiví, te cuu
sáha jeē cúu ñayuu jín guerra,
jín jnámā, jín cuéhyī xeén,
jín táca quiti xeén jeē iyó
ñayiví.

⁹Yūcuán na te Londe un
ní jehnde yā sello uhñn. Te
chiji altar cáhnu ni jito ri anuá
ñayuu jeē ní cacandíje jñuhun
Yaā Dios te ni canacani ndaā
i jñuhun ya, te síquī yūcuan
ní cajehni ñayuu i. ¹⁰Te ni
cacana jee ánuá un:

Jitoho ná Yaā Dios, maá ní
cúu Yaā ndoo te vāha squícu
ní jéé ni jéjnñuhun ní. ¿Te
nasaa ga tiempo coo te sándaā
ni jéhē ná, te nacuaāha ní jéé
ndútahū ñayuu ñayiví jéé ní ca-
jehni sāñá? áchí.

¹¹ Yūcuán na te ni jēhe ya sahma cuijín cuhun i jíjnáhan i, te ni cahān yā jíin i jeē na ndétātú i jecu gā tiempo. Chi iyó gá hermano i jeē cájejniñu nuū yā, jeē suni jíni ñúhún cuu i návāha jinu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnúú níandii nájnūhun ñn sahma jnúú. Te ní yóo ni nduu nájnūhun niñi. ¹³ Te quimi andiví ní ningoyo nuū ñúhún nájnūhun níngoyo ndehē yihí yujnu higo sáha tachí níhin. ¹⁴ Te andiví ní cujiyo cuahān nájnūhun jeē nátuu ñn tutu cáhnu. Te tāca yucu jíin táca isla ni cujiyo cuango inga lado. ¹⁵ Te tāca rey ñayiví, jíin jéē cácujeñnu, jíin jéē cucá, jíin táca capitán, jíin jéē cándiso poder, jíin mozo jeē ní cajeen ñayuu, jíin téé cásajniñu cuenta maá, ní cachisāhi máá ini yaū cava jíin méhñu cava chiji yucu. ¹⁶ Te ni cacahān i jíin yucu jíin cava:

Ndicó cáva siquī rī, na quisāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷ Chi ni quee maá quiví cáhnu jeē cuáha ya castigo, ¿te ndé ñn canda condichi nuū yā? achí i jíjnáhan i.

Ñayuu tāca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē

cáhīn ndicúún lado ñayiví. Te cájesi yā nuū ndicúún tachí, návāha ma quéé nuū ñúhún ni nuū mar ni nuū ní ñn yujnu. ² Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndíso jniñu jeē sáha daño nuū ñúhún íchi jíin núū mar:

³ Ma sáha ró daño nuū ñúhún ni nuū tācá yujnu ni nuū mar, chi nde na téé yó sello jneē tāca ñayuu cájejniñu nuū Yaā Dios yó.

⁴ Te ni jini sōho ri jeē achí jéé iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. ⁵ Te iyó úxī uū mil ñayuu cácuu yucūn Judá jeē ni jécondee sello, jíin úxī uū mil yucūn Rubén, jíin úxī uū mil yucūn Gad, ⁶ jíin úxī uū mil yucūn Aser, jíin úxī uū mil yucūn Neftalí, jíin úxī uū mil yucūn Manasés, ⁷ jíin úxī uū mil yucūn Simeón, jíin úxī uū mil yucūn Leví, jíin úxī uū mil yucūn Isacar, ⁸ jíin úxī uū mil yucūn Zabulón, jíin úxī uū mil yucūn José, jíin úxī uū mil yucūn Benjamín. Ndihi yucūn yáha cúu jeē ni jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñayuu. Te cúu i ñayuu tācá nación jíin táca raza jíin táca yuhu jíin táca ñuu. Te cáhīn i nuū mesa nuū ndácu Yaā Dios jniñu jíin

núū maá Yaā cúu Londe. Te siquī jeē cuehé ndasí i, te ni ñn ma cúu çahu nasaa i cúu. Te cañuhun i sahma cuijín, te cándahá i ñuū. ¹⁰ Te ni cacana jee i:

Yaā Dios maá yó cúu jeē ní jnama yóhó,

Yaā jeē néne nuū mesa jeē ndácu jniñu,

jíin Yaā cúu Londe Yaā Dios.

Achí i jíjnáhan i. ¹¹ Te ndihi ndajéhé ni cajicó ndúū yā cáhīn ya xiin mesa Yaā Dios, jíin xiin tēe jéhnú cándiso jniñu, jíin xiin ndicúún jeē técu. Te ni cajecuiñī yití yá ni cachiñuhún yá Yaā Dios ichi núū mesa yā. ¹² Te ni cacahān yā:

Amén. Cúsī ni yō cahán yō jeē yóhyo vāha Yaā cúu Yaā Dios maá yó.

Te luu cújéhnú ya te ndíchí yá.

Te na nácuatáhú yó nuū yā, te na cóo yíñuhún yó núū yā.

Chi jñí ya poder, te ndíso ya cuehē fuerza jeē ní cáni cuiñī. Amén.

Achí táca ndajéhé yā.

¹³ Yūcuán na te ni cahān ñn tēe jéhnú un jíin rí:

¿Ndé ñāyuu cúu yāha jéē cañuhun sahma cuijín, te ndé chi véjicoo i?

¹⁴ Te ni cahān rī jíin de:

Máá ní cúu jeē jiní, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin níñī maá Londe, te ni nduyaa vāha, cúu jeē ní ndundoo ánuá i ni sáha ya. ¹⁵ Jeē yúcuán

cúu jeē cáhīn i nuū mesa nuū ndácu Yaā Dios jniñu, te cájejniñu i ini templo yā nduú ñuú. Te Yaā jeē néne nuū mesa, coto ya i jeē quéndōo vāha i nuū yā. ¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihní. ¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núú i jíjnáhan i, te ma ndahyú gā i. Achí tēe jéhnú ún.

Siquī sello uxā jíin cohō cūu oro

8

¹ Te Londe un ní jehnde yā sello uxā jeē ndihyú tutu ún, te nayúú-ni ni iyo ini andiví nájnūhun sava hora. ² Te ni jito ri ndihúxá ndajéhé jeē cáhīn nuū Yaā Dios. Te ni cajēhe uxā trompeta nuū ndajéhé un. ³ Yūcuán na te ni quee inga ndajéhé, ndáhá yá ñn cohō cūu oro, te ni jecuiñī yā nuū altar. Te ni jēhe cuehē sūje cutú núū yā, návāha socō yā jíin jnúhun cájicān tahu ndihi ñayuu cácadíje Yaā Dios. Te ni socō yā nuū altar oro jeē índichi ichi núú mesa nuū ndácu Yaā Dios jniñu. ⁴ Te nuū cohō cūu jñí ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácadíje Yaā Dios. ⁵ Yūcuán na te ni quihīn ndajéhé un cohō cūu un. Te ni scutú

yá tīcua ñuhūn jeē cayú nuū altar. Te ni jete yā nde ini ñayīví. Te ni sáha jeē ni cáhān taja, te ni ñihīn, te ni ndindēē taja, te ni jnāa.

Jñūhun siquī trompeta

⁶ Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷ Te ndajéhé ñn ni tiví yā trompeta. Te ni cuun ññí ini ñayīví jíin ñuhūn jeē ni sácā núu jíin níñi. Te ni cayū ñn jeē uní parte ñayīví, jíin ñn jeē uní parte yujnu, jíin ñn jeē uní parte ite cuí.

⁸ Te ndajéhé uū ni tiví yā trompeta. Te ñn nájnūhun ñn yucu cáhnu jeē cayú ñuhūn ni ñingava cuahān nuū mar. Te ñn jeē uní parte mar ni nduu niñi. ⁹ Te ni jihī ñn jeē uní parte quití ñūhun nuū mar. Te ni naa cuehē barco, chí ñn ñn jeē tāca úní ni naa.

¹⁰ Te ndajéhé uní ni tiví yā trompeta. Te ni ñingava ñn quími cáhnu ichi ándiví, te cáyú nájnūhun cáyú ñn yiti cáhnu. Te ni ñingava siquī ñn ñn jeē tāca úní yūte jíin núu cáne ndute. ¹¹ Te quími un nání quími uvuā. Te ñn jeē uní parte ndute ni cuu uvuā. Te ni cajihī cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te ñn jeē uní parte niāndii jíin yóō jíin quími ni tiví. Te ni ndunee ñn jeē uní parte i, te tuá ni cúndijin ñn jeē uní parte nduú jíin ñuú.

¹³ Te ni ndacoto ri, te ni jini sōho ri jeē cána jee ñn

ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayīví, chí je yajni cuecu uní gā trompeta jeē tiví uní gā ndajéhé, achí yá.

9

¹ Te ndajéhé uhūn ni tiví yā trompeta. Te ni jito ri jeē ichi ándiví ní ñingava ñn quími nde ini ñayīví. Te nuū quími un ní jēhe ndacáa jeē núne tūhnchi cúnú ndasí. ² Yūcuán na te ni nune un tūhnchi, te ni cane ñuhmā ni caa nájnūhun ñuhmā ñn ijnū cáhnu. Te ñuhmā un ní sáha jeē ní cunee niāndii jíin ní núu tachí. ³ Te nuū ñuhmā un ní canecoo tíca ndicuéhyí, ni jitē núu ti ní cáhnu ñayīví. Te ni jēhe ya jñūhun jeē sáha ti nájnūhun cásáha tisuhma xeēn jeē iyó ini ñayīví. ⁴ Te ni ndacu ya jniñu nuū tī jeē ma sáha ti dañō ite jíin yúcū cuí jíin yujnu, chí máni ñayuu jeē tu ndéé sello Yaā Dios jneē i cúu jeē tuu ti. ⁵ Te tu ní jēhe ya jñūhun jeē cáhni tī ñayuu, chí máni jeē stóho ti i uhūn yoō. Te sáha ti jeē jetú i nájnūhun jeē jetú ñayuu jeē túu tisuhma i. ⁶ Te quívi ún nducú ndasí ñáyuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa ti nájnūhun caballo jeē cáhiyo tūhva quingoo nuū cuájnāhan. Te xinī tī ñūhun nájnūhun corona oro. Te nēe ti nuū tée. ⁸ Te iyó ixí ti jeē cáa nájnūhun ixí xíní ñahan. Te jñūhun ti cáa nájnūhun jñūhun ndicaha.

⁹ Te ní tí ndihyú nájñūhun sahma cáa. Te nñhin ndijēn tī nájñūhun nñhin jeē cuángoo cuehē caballo nuū guerra cáñuhun tī carreta. ¹⁰ Te suhmā tī ndíso iñu nájñūhun tisuhma. Te jíin súhmā tī cuu stóho tī ñayuu uhūn yoō. ¹¹ Te iyó ñin jeē kujéñnu nuū tī, te suu cúu ndajéhé jexeén jeē ndító tūhñchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéē snāa.

¹² Je ni yāha ñin jñūndóho, te iyó úu gā jñūndóho jeē quíji.

¹³ Te ndajéhé iñu ni tiví yā trompeta. Te ni jini sōho ri ñin jñūhun jeē ni cáhān nde mēhñú ndicúún yiquí altar oro jeē ñin nuū Yaā Dios. ¹⁴ Te ni cahān un jíin ndajéhé iñu jeē ndahá trompeta:

Nandají ró ndicúún ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandají ndicúún ndajéhé un, návāha cahni ñin jeē uní parte ñayuu ñayiví. Chi je cáhíyo tūhva ndajéhé un jeē siquí maá hora jíin quíví jíin yóō jíin cuíyā jeē cóo súcuan. ¹⁶ Te ni jini sōho ri jeē achí jéē iyó úu ciento millón soldado jeē cáyoso caballo.

¹⁷ Te ni steén gā yā nuū rí, te ni jito ndijin rí tēcá caballo. Te tēe cáyoso siquí tī cáñuhun de camisa cáa jeē cuehé, jeē ndeé, jíin jéē cuaán. Te xiní caballo un cándāa nájñūhun xiní ndícaha. Te yuhu tī quénda ñuhūn jíin ñúhmā jíin azufre. ¹⁸ Te jíin úní jeē

quénda yuhu caballo un, te ni jihí ñin jeē uní parte ñayuu, suu jíin ñúhūn jíin ñúhmā jíin azufre. ¹⁹ Chi yuhu tī jíin súhmā tī iyó fuerza jeē cáhni tī ñayuu. Chi suhmā tī cándāa nájñūhun coō, te iyó xiní, te jíin yúcuan stóho tī ñayuu.

²⁰ Te sava ga ñayuu jeē tu ní jihí jíin táca jñúndóho yáha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhūn i táca táchi jíin ídolo jeē ní cuvāha jíin oro jíin plata jíin cáa cuaán jíin yúu jíin yujnu. Te tēcá un chi tu cúu coto, ni tu cúu cuni sōho, ni tu cúu çaça. ²¹ Te ni tu ní cánacani ni i stóo i jeē jéñni i ndíyi, jíin jéē satásí i, jíin jéē jíca jnéni i, jíin jéē sacuíhná i.

Ndajéhé jeē ndahá libro lulí

10

¹ Te ni jito ri ñinga ndajéhé yā jeē ndíso poder, ni cuun ya ichi ándiví. Te ñúsúcún yá vicō, te xiní yā ñúhūn ticō vēhndé. Te nuū yā ndíndēe nájñūhun niándii, te siñin ya cáa nájñūhun uū siñin jeē cáa ná cáa ñuhūn. ² Te ndahá yá ñin libro lulí jéē núne. Te ni jeni ya jehē váha ya nuū mar, te jehē jecó yá nuū ñúhūn íchi. ³ Te ni cana jee téyí yá, nájñūhun jeē ndahyú ndícaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je iyó tūhva ri jeē tée ri jñūhun un núú. Te ni jini sōho ri ñin jñūhun ichi ándiví jeē ni cáhān jíin rí:

Chuvāha ró táca jnúhun jeē ní cacahān uxā taja ún, te ma steén rō, ni ma téé ró, áchí.

⁵ Yūcuán na te ndajéhé jeē ní jito ri jeē ín nuū mar jíin núu ñúhun, ni ndonehen ya ndaha váha ya ichi ándiví. ⁶ Te ni ndacunehen ya síhví máá Yaā jeē técu ní cáni, Yaā ni sáha andiví jíin ñáyiví jíin mar jíin táca ndihi jeē iyó ini. Te jíin síhví yá un ní cahān teyí ndajéhé:

Ma cucuéé gá jeē jínu ñayiví. ⁷ Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jnúhun sāhi yá, nájnūhun ni castūhun yá nuū tāca mozo yā, tēe ni canacani jnúhun ya nde jenahán, áchí ndajéhé.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhé jeē ín nuū mar jíin núu ñúhun, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núu rī. Te ni cahān yā:

Quihin te caji rō. Chi vixī sáha ini yuhu ró nájnūhun ndūxi, te chíji ró chí cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixī ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī. ¹¹ Te ni cacahān jíin rí:

Cánuú jéé nacani tucu ró jnúhun Yaā Dios, ndese coo

siquī ñayuu cuehē ñuu jíin cuehē nación jeē sán sán yuhu, jíin síquī cuehē rey cándacu jniñu, áchí jíin rí.

Siquī uū testigo yā

11

¹ Yūcuán na te ni cajēhe ñin yujnu nuū rī, jeē cúu ñin cūhva jeē chícuāha. Te ni cacahān jíin rí:

Ndocuñī te chicuāha ró templo cáhnu Yaā Dios jíin altar; te cahu ró nasaa ñayuu cúu jeē cáchiñúhún núu yā yūcuán. ² Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyūcú i ini ñuu lí yāhá, te uū xico uū yoō cueñū i síquī ñuu. ³ Te tají rí uū testigo rī jeē nácani jnúhun ri mil uū ciento unī xico quiví. Te cuhun de sahma ndáyí jéé cácuuñhyá ni de síquī cuéchi ñayuu, áchí yá.

⁴ Te ndindúú testigo un cúu nájnūhun ndindúú yujnu olivo jíin ndindúú candelero jeē ín nuū Yaā Dios, Yaā chíi ñayiví. ⁵ Te na-ni ñayuu núu nducú sáha ndevāha jíin ndindúú testigo un, te quenda ñuhūn yuhu ndindúú de, te cayū ndihi ñayuu cájito uhū i de. Te súcuan cuu tāca ñayuu jeē nducú sáha ndevāha jíin de. ⁶ Te iyó poder ndindúú testigo un jéé cási de jeē ma cúun saū ní tiempo jeē nácani de jnúhun ya. Te suni iyó poder de sáha de jeē nduu niñī tācá ndute. Te cuu stíví de ñayiví jíin ndinuū jnúndóho, núu nasaa jínu cácuni de. ⁷ Te ná

ni jīnu ni canacani de jnūhun ya, yūcuán na te quenda quitī xéén jeē néne tūhnchi ún. Te cuajnáhan jíin ndindúú de, te cundeyí jíin de, te cahni de. ⁸ Te ndīyí ún cava nuū yáhu űuu cáhnu nuū ní cajehni i máá Jítóho yō jicā cruz. Te űuu un cácahān yatá i jeē űuu Sodoma jíin Egipto cúu, siquī jeē xeēn cuēchi íyó űuu ún. ⁹ Te űayuu tācá űuu, tāca yúcūn, tācá yuhu, tācá nación, chi coto i jeē cáva ndindúú ndíyí un únī quivī yosáva, te ma cuáha i jnūhun jeē quíndūji. ¹⁰ Te űayuu níí cáhnu űayiví cusī ndasí ni i jeē ní cajihī de, te sáha i vico, te cuáha i regalo nuū jnáhan i. Chi ndindúú téé ni canacani jnūhun ya ún, ní casáha de jeē ní candoho ndasí űayuu űayiví. ¹¹ Te jeē yáha unī quivī yosáva ún, te Yaā Dios sáha ya jeē nastáa tachī de, te ndonda-ni de. Te yūhú ndasí űayuu coto i jeē ní canatecu de. ¹² Yūcuán na te cunī sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de ándiví, cunī űayuu cájito uhū i de. ¹³ Te máá hora un jnáa ndasí, te ndicó cáva naa in jeē uxí parte űuu ún. Te jíin űujnáa ún cuu uxā mil űayuu. Te tāca gá űayuu jeē ndóo, yūhú ndasí i, te cahān i jeē cujéhnu Yaā Dios jeē ndeé ándiví.

¹⁴ Súcuan yāha jnūndóho uū, te yachī coo jnūndóho unī.

Siquī trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān: Tācá nación űayiví je ni nuquihí ndaha máá Jítóho yō Yaā Dios jíin Cristo jeē ní tají yá. Te ndacu ya jniñu ní cáni cuiti.

Achí.

¹⁶ Yūcuán na te ndihóco cuūn tēe jéhnu cándiso jniñu jeē cánene de mesa de ichi núu Yaā Dios, ni cajecuiñí yití de, ni cachiñúhún de ya. ¹⁷ Te ni cacahān de:

Na cútahū na núu ní, Tátā Yaā Dios,

chi máá ní jnī ndihí poder, te cúu ní Yaā iyó vijna, te ni iyo ní ní cáni, te coo ní ní cáni.

Te ni najnī ní ndivii jeē iyó, te jíin poder ni ní quejéé ní ndácu ní jniñu nuū.

¹⁸ űayuu tācá nación ni caquitī ni i siquī ní.

Te vijna chi ni quee quiví jeē cuáha ní castigo i, jíin jéé sándaā ní jniñu tāca ndíyí.

Te cuáha ni táhū nuū tāca mozo ni jéé ní canacani jnūhun ní, jíin núu tāca űayuu cájejniñu nuū ní, jíin űayuu cáchiñúhún núu ní, cúu űayuu cácujeñu jíin jéé tuú.

Te vijna te snáhnú ndetū ni űayuu castíví űayiví.

Achí de jíināhan de.

¹⁹ Yūcuán na te ni nune templo Yaā Dios jeē iyó ándiví. Te ni cajito űayuu jeē yúcuan íne yejnū jeē űúhun

contrato yā. Te ni ndindēé taja, te n̄hin, te cáhán taja, te ni jnāa, te ni cuun xeēn n̄ñí.

Jnūhun ñahan jín cóo cáhnu

12

¹ Yūcuán na te ini andiví ní cane ñn jeē nahán nāa ni yō jító yó: ñn ñahan jeē ñúhun ña niāndii nájnūhun sahma, te ñn jehē ña siquī yoó, te ñúhun ñn corona xinī ña jeē ndeé uxī uū quīmi. ² Te ñúhun sēhe ña. Te ni ndahyū cohó ña jeē ndóho ña jéhnde chíji ña jeē scácu ña i. ³ Yūcuán na te ini andiví ní cane tucu inga jeē nāa ni yō jító yó: ñn coō cuehé cáhnu ndasí. Te iyó úxā xinī t̄ jín úxī ndiqui t̄. Te ndihúxá xinī t̄ ñúhun corona. ⁴ Te jín súhmā t̄ ni stáa t̄ ñn jeē uní parte quīmi jeē iyó andiví, te ni síngoo t̄ ini ñayiví. Te ni ine t̄ nuū ñahan jeē scácu sēhe ún, ndétu t̄ cocó t̄ sēhe ña jeē jé yajni cacu i. ⁵ Te ni scácu ña ñn sēhe yí, te sūchi un ní jeconaā jeē ndácu ñhin i jniñu nuū ndivii nación. Yūcuán na te ni ndoñúhún sēhe yí ña ún, ni ndaa i cuahān i nde nuū ñn mesa Yaā Dios nuū ndácu ya jniñu. ⁶ Te ñahan un ní jinu ña cuahān ña nde nuū ñúhun téhé núu iyó ñn lugar jeē ni sátúhva Yaā Dios. Te yūcuán condee ña nihīn ña jeē cáji ña mil uū ciento uní xico quiví.

⁷ Yūcuán na te ni cajejnáhan ini andiví. Chi ndajéhé jéhnua ga jeē naní Miguel jín táca ndajéhé jeē cácuu mozo nuū yā, ni cajejnáhan jín cóo cáhnu. Te coō un jín táca ndajéhé maá, ni cajejnáhan

jín yá. ⁸ Te tu ní cácundeyí t̄, te tuá ní cúu coyūcu t̄ andiví. ⁹ Súcuán ni cuu jeē ní quenehen ya coō cáhnu un jéē iyó ndé jenahán ndasí. Te nání t̄ jexeén jín Satanás, te máá t̄ cúu jeē stahú ndihi ñayuu ñayiví. Te ni scáne ya t̄ nde ini ñayiví jín táca ndajéhé t̄.

¹⁰ Yūcuán na te ni jini sōho ri ñn jnūhun jeē cahán jee ichi ándiví:

Je ni quee quiví jeē jínu jnama ya yohó, jín jéē steén ndijin yā jeē jnā ya poder, jín jéē ndácu ya jniñu, jín jéē ndiso jniñu máá Cristo jeē ní tají yá. Chi je ni quenehen ya maá jéē cahán cuēchi siquī táca hermano yō. Chi nduú ñuú ni cahān cuēchi siquī i nuū Yaā Dios maá yó. ¹¹ Te ni cacundeyí i siquī Satanás un, ní sáha jnūhun jeē ni jíhī Yaā cúu Londe, jín jéē ní cacahān ndaā i jnūhun Yaā Dios, jín jéē tu ní cundáhú ni i máá i, chí ni jēhe i jnūhun candíje i vésú núu cuu i jeē siquí yā. ¹² Núu súcuán te na cúsiñ ndasí ni táca rōhó jéē cáyūcú andiví. Te nacā xeēn ndoho táca rōhó jéē cáyūcú ini ñayiví jín núu mar. Chi ni cuun jexeén ni jinū nuū rō jijnáhan ró. Te quítí xeēn ni, chí jíní jeē tuá coo cuehé gā tiempo jeē stahú ñayuu. Achí.

¹³ Te ni jini coō cáhnu ún jéē ni scáne ya maá cuahān ini ñayiví, te ni jinu t̄ jín ñahan ní scácu sēhe yí, jeē xeēn sáha t̄ jín ña núu. ¹⁴ Te ni cajēhe uū ndijēn yaha chócó cáhnu nuū ñahan ún, návaha ndava

ña quihñ ña lugar ña nuū ñuhun téhé, te cācu ña nuū coō ún. Te yūcuán condee ña unī cuiyā yosáva, te nihñ ña jeē cáji ña. ¹⁵ Te yuhu cóō un ní cane ndute nájñuhun ññ yūte cáhnu, cuahān yatā ña návaha jneni ña. ¹⁶ Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóō ún. ¹⁷ Yūcuán na te xeēn ni quitī ni coō cáhnu ni jito ti ña. Te cuahān tī cuajñahan ti jín táca gá sēhe ña, suu ñayuu casquícu jniñu ndácu Yaā Dios te cácanđje vāha i jñuhun Jesu-cristo.

Jñuhun siquī uū quitī xéén

13

¹ Te ni indichi rī yumár. Te ni jito ri jeē ní cane ññ quitī xéén ini mar. Te íyó úxā xinī tī jín úxī ndiqui ti. Te ndihúxí ndiqui ti ñuhun corona. Te ndihúxá xinī tī ndeé ññ síhví néé jéē quitī ni Yaā Dios sáha. ² Te quitī xéén jeē ní jito ri ún, cáa ti nájñuhun cuiñī, te ndaha ti cáa nájñuhun ndaha oso, te yuhu ti cáa nájñuhun yuhu ndícaha. Te nuū quitī un ní jēhe coō cáhnu poder maá jín mesa nuū ndácu máá jniñu. Te ni sáha jeē cujéhnu ndasí quitī ún. ³ Te ni jito ri jeē ni tújī ññ xinī tī, jeē jé yajni cuu tī nuú. Te ni nduvāha ti jeē ni tújī tī. Te nahán ní naa ni ñayuu ní cáhnu ñayīví ní jito i, te ni cajetáhú i nuū tī. ⁴ Te ni cachiñúhún i coō cáhnu siquī jeē ni sáha ti jeē cujéhnu ndasí quitī xéén un, te suni ni

cachiñúhún i quitī xéén un. Te ni cacahān i:

Tú ni ññ jeē cujéhnu nájñuhun quitī yáha, te tú ni ññ cundeyí cuajñahan jín tī, áchí i jínñahan i.

⁵ Te tu ní jési ya jeē cahān tī jeē quitī téyí cúu ti, jín jéē cahán ndevāha ti siquī yā. Te ni nihñ jniñu ti jeē ndácu ti jniñu uū xico uū yoō. ⁶ Te ni quejéé tī ni cahān ndevāha ti siquī Yaā Dios, jín siquī síhví yá, jín siquī nuū ndeé yá, jín siquī táca jéé iyó andiví. ⁷ Te tu ní jési ya jeē cuajñahan ti jín ñayuu maá Yaā Dios, te cundeyí tī jín i. Te suni ni nihñ jniñu ti jeē ndácu ti jniñu nuū ñayuu táca yúcūn, táca ñuu, táca yuhu, táca nación. ⁸ Te ñayuu ní cáhnu ñayīví jéē tu yósó síhví i nuū tútu, ni cachiñúhún i quitī xéén un. Te Yaā cúu Londe jeē ní cajehni i, máá yá névāha tutu un jéē yosó síhví ñayuu cotecu ní cáni, te je yósó síhví i nde quiví ni jécōo ñayīví.

⁹ Ñayuu iyó sóho na chúsóho váha i jñuhun cahān rī yáhá. ¹⁰ Táca ñayuu jeē sáha jeē quiví jñahan vecāa, suni vecāa cone máá i. Te táca ñayuu jeē jéhni jñahan jín espada, suni jín espada cuu maá i. Núu súcuan te ñayuu maá Yaā Dios chi jini ñuhún cuandeyí ni i jín jnúndóho te ma jécuiñī i candíje i jñuhun cúndáhú ni yā i.

¹¹ Yūcuán na te ni jito ri inga quitī xéén jeē ní cane chíji ñuhun. Te íyó úu ndiqui ti jeē cáa nájñuhun ndiqui

lánchi. Te nájnūhun tachī coō cáhnu, súcuan tachī cahán tī. ¹² Te nájnūhun ndácu quitī xéén xīhna ñúhún jniñu, suni súcuan ndácu quitī uū ún jniñu, ín tī nuū quitī xīhna ñúhún. Te quitī uū sáha tī jeē chiñúhún táca ñáyuu ní cáhnu ñayíví nuū quitī xīhna ñúhún, quitī ní tújī jeē jé yajni cuu tī te ni nduvāha tī. ¹³ Te quitī uū suni sáha táca jniñu jéhnū jeē nahán náā ni yō jito yó. Chi ni scúun tī ñuhún ichi ándiví ní quiiji ini ñayívi, ní cajito ñayuu. ¹⁴ Te ni stahú tí ñayuu ñayívi jíin táca jniñu jéhnū jeē ní níhín tī poder jeē sáha tī, jito jíinúū quitī xīhna ñúhún. Te ni ndacu tī jniñu jeē na sáha ñayuu imagen quitī xīhna ñúhún, quitī ní tújī jíin espada, jeē jé yajni cuu tī te ni nduvāha tī. ¹⁵ Te quitī uū ní níhín tī poder jeē chutáchí tí xijnī imagen quitī xīhna ñúhún, návāha cuu cahán, te cahni táca ñáyuu jeē tu cájétahú i chiñúhún i máá. ¹⁶ Te táca ñáyuu cujéhnū jíin ñáyuu tu cújéhnū, táca ñáyuu cucá jíin ñáyuu ndahú, táca ñáyuu sájniñu cuenta maá jíin mozo jeē ní cajeen ñayuu, ní sáha tī jeē ní jécondee ñin jnunī ndaváha i chí jnéē i. ¹⁷ Te ni ñin ñayuu ma cúu cuaan i xīcó i te núu tu ndíso i jnunī jeē cúu síhví tí chí jnunī número jeē cúu síhví tí. ¹⁸ Jnūhun ndíchí cúu jeē cahán rī yāhá: Táca ñáyuu jécūhun vāha ni cuu tava i cuenta número quitī xéén un, chí número un cúu síhví ñin tē. Te número un cúu íñū ciento unī xico íñū.

Yaa jeē cájita 144,000 ñayuu

14

¹ Yūcuán na te ni ndacoto ri, te ni jito rī jeē ín máá Yaā cúu Londe xinī yucu Sión. Te cáhīn ciento uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaā Dios. ² Te ni jini sōho rī jeē níhín ndasí ichi ándiví, nájnūhun jeē jíca cuehē yūte chí jéē cahán níhín taja. Te jeē níhín un sáha nájnūhun jeē cátee cuehē ñayuu yaa jeē naní arpa. ³ Te cáhīn i ichi núu mesa nuū ndácu Yaā Dios jniñu, jíin núu ndicúun jeē técu, jíin núu ndihócó cuūn tēe jéhnū cándiso jniñu. Te ni cajita i ñin yaa jeé. Te ni ñin ñayuu tu cúu cutūhva i yaa ún, chí máni máá ciento uū xico cuūn mil ñayuu jeē ní jnama ya i ini ñayíví. ⁴ Te táca tēe yáha cácuu jeē tu ní cása ha cuēchi jíin ñahan cása ha néé, chí tēe ndoo ánuá cácuu de. Te cándiquin de Londe ndé-ni cúu-ni nuū cuahán yā. Chi ni jnama ya de ini ñayíví, te máá de cácuu tēe jeē xīhna gā ni cacandije nuū Yaā Dios jíin núu Yaā cúu Londe. ⁵ Te tú cuiti na jnūhun stáhú cácahán de, chí tēe ndoo ánuá cácuu de, cáhīn de nuū mesa Yaā Dios.

Jnūhun jeē ní cacahán ndinúni ndajéhé yā

⁶ Yūcuán na te ni jito rī inga ndajéhé yā jeē ndáva cuahán sava andiví. Te ndíso ya jnūhun jeē jnama Yaā Dios ñayuu cotecu i ní cáni. Te ni nacani ya jnūhun un núu táca ñáyuu ní cáhnu ñayíví, nuū ñáyuu táca nación, táca yúcūn,

tācá yuhu, tācá ñuu. ⁷ Te ni cahān jee ya:

Conso iyo ró núū Yaā Dios, te na cāhān rō jeē yóhyo cújéhnū ya, chí je ni quee quivī jeē sándaā yā siquī rō ndese ni casáha ró. Te na chíñúhún ró yā, chí máá yá ni sáha andiví jíin ñáyiví jíin mar jíin táca núū cáne ndute, áchí ndajéhé yā.

⁸ Yūcuán na te ndíquín inga ndajéhé yā vēji, te ni cahān yā:

Je ni naa iñ ñuu teyí Babilonia. Chí ni sáha jeē ñayuu tācá nación casiquí ndēē i Yaā Dios jeē ní castóo i ya te cándiquīn i ídolo jíin táca jniñu néé, áchí ndajéhé uū.

⁹ Yūcuán na te ndíquín inga ndajéhé unī vēji, te ni cahān jee ya:

Xeēn coo siquī ñayuu cáchiñúhún quitī xéén jíin imagen tī, te jéhe i jnūhun condee jnunī tī jneē i chí ndaha i. ¹⁰ Chí nihīn i castigo xeēn siquī cuéchi ni casáha i, chí quitī ni Yaā Dios nuū i, te tuá cone cāhnu ni yā. Te ndoho i nuū cayú ñuhūn jíin azufre, coto tācá ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda ní cáni cuiṭi. Te nduū ñuū tu ndétātú ñayuu cándoho ún jeē ní cachiñúhún quitī xéén jíin imagen tī, jíin jéē ni jécondee jnunī sihví tí. ¹² Jeē yúcuān ñayuu maá Yaā Dios jeē casquícu i jniñu ndácu ya te cácandije vāha i Jesús, cánuú jéē cuándeý ni i. Achí ndajéhé unī.

¹³ Yūcuán na te ni jini sōho ri ñn jnūhun ichi ándiví jéē ni cāhān jíin rí:

Teē ró jnūhun jeē cahān rī jíin ró yāhá: Nacā jeē ndetū tāca ñayuu cácandije Jitoho yō jeē cájihī vijna jíin ndé ní cuáhān yō. Jendaá chí ndetātú i jeē ní casáha i jniñu váha, te jniñu i un má nāá chí sáha jeē quendōo vāha i ní cáni, áchí Espíritu.

Jeē ní nastútú yá ñayuu ñáyiví

¹⁴ Yūcuán na te ni ndacoto ri, te ni jito ri ñn vicō cuijín. Te nuū vicó un néne Yaā ní nduu tēe. Te xinī yā ñūhun corona oro, te ndáhá yá ñn hoz xeēn. ¹⁵ Te ni quenda inga ndajéhé yā ini templo, te ni cana jee, te cāhān jíin Yaā néne nuū vicó un:

Cahnde ni jíin hoz ní, te nastútú ní ñayuu ñáyiví. Chí je ni quee quivī jeē nastútú ní i nájnūhun táhndé trigo jeē jé ni cuaan, áchí.

¹⁶ Yūcuán na te Yaā néne nuū vicó ni nastútú yá ñayuu váha ini ñáyiví, nájnūhun táhndé trigo jíin hoz.

¹⁷ Yūcuán na te ni quenda inga ndajéhé yā ini templo jeē iyó andiví, te suni ndáhá yá ñn hoz xeēn. ¹⁸ Te nde nuū altar ni quenda tucu inga ndajéhé, te ndíso jniñu ya siquī ñuhūn altar. Te ni cana jee ya, te cāhān yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñáyiví, nájnūhun jeē cájehnde i chutū ndehē uva jeē jé ni jīchi, áchí.

19 Te ndajéhé un ní jehnde yā jín hoz yā, te ni nastútú yā ñayuu casáha néé ini ñayíví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín. 20 Te ni jēhe ya castigo i yatā ñúū, te ni jica ñíñí i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jín ndihúxá jnūndóho jeē sándihí

15

1 Te ni jito ri inga jniñu jéhu ichi ándiví jéé náā ni yō jító yó. Chi cáhīn uxā ndajéhé yā jeē cuāha ndihúxá jnūndóho sandihí na. Te jeē jīnu ndihúxá jnūndóho yáha, te jīnu jeē cuáha Yaā Dios castigo xeēn siquí cuéchi.

2 Te suni ni jito ri ñn jeē cáa nájnūhun mar, te cáa nájnūhun vidrio jeē ndíndēe nájnūhun ñuhūn. Te yumar un cáhīn ñayuu ni cacundeyí siquí quití xéén jín imagen tí, jín jéé tu ní cáquihin i jnunī número jeē cúu síhví tí. Te cándāhá i yaa jeē naní arpa jeē ni jēhe Yaā Dios nuū i. 3 Te cájita i yaa jeē ní tava Moisés, tēe cúu mozo Yaā Dios, jín yaa maá Yaā cúu Londe. Te súcuan cáhān yaa ún:

Yóhoyo náā ni na cájito ná ndihí jniñu jéhu teyí jéé sáha ní,
Tátā Yaā Dios, chi jnā ní ndihí poder.
Te máni jniñu ndaā jniñu váha sáha ní,

jeē cúu ní Rey nuū tācá nación.

4 Tú ni ñn i íyó jéé ma cónso íyo i nuū ní, Tátā Yaā Dios. Te ndihí i cahān nahín i jeē yóhoyo cújéhu ní.

Chi máñuhún ni máá ní cúu Yaā ndoo Yaā íi.

Te quijicoo ñayuu tācá nación, chiñuhún i níhín, chi je ni cajini i jeē ndaā váha sáha ní táca jniñu.

Achí i cájita i.

5 Yūcuán na te ni ndacoto ri, te ni jito ri jeē ini andiví núne cuarto íi ini templo nuū íne tabla yuū jeē yosó ley yā. 6 Te ini templo un ní quendacoo ndihúxá ndajéhé jeē cándiso jniñu siquí ndihúxá jnūndóho. Te cáñuhun ya sahma fino iyó ndoo te xíñú. Te núhni cinturón oro jicā yā. 7 Te ñn jnáhan ndicúún jeē técu ni jēhe ñn ñn cohō oro nuū ndihúxá ndajéhé un. Te ini cohō un ñuhun chitú castigo xeēn jeē ni jēhe Yaā Dios, Yaā técu ní cáni. 8 Te ni chitú ndí ñuhmā ini templo, te suu ni steén jeē yóhoyo cújéhu Yaā Dios jín poder jnā ya. Te ni ñn tu ní cúu quíví ini templo, chi nde na ndihí ndihúxá jnūndóho jeē cuáha ndihúxá ndajéhé yā.

Siquí ndihúxá cohō jeē ñuhun castigo

16

1 Yūcuán na te ini templo ni jini sōho ri ñn jnūhun cáhān jee jín ndihúxá ndajéhé yā:

Cuangoo te cati ró siquí ñayíví ndihúxá cohō jeē

ñúhun castigo xeēn jeē ni jéhe Yaā Dios, achí.

² Te cuahān ndajéhé ìn, te ni jeti ya cohō yā siquī ñayīví. Te tāca ñáyuu jeē ndeé jnunī quiti xéén un jín jeē cáchiñúhún imagen tī, ni canecoo ndīhyi xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájnūhun niñī ndíyi. Te ni cajihī tācá quiti jeē ñúhun ini mar.

⁴ Te ndajéhé unī ni jeti ya cohō yā ini tāca yúte jín tāca núu cáne ndute, te ni nduu niñī. ⁵ Te ni jini ri jeē cahán ndajéhé jeē ndíso jniñu siquī ndúte:

Tátā Yaā Dios, maá ní cúu Yaā ndoo Yaā ì, Yaā iyó vijna, te ni iyo ní ñí cáni. Te ndaā sáha ní jeē súcuan ni ndonda ní siquī cuéchi i. ⁶ Chi ni casáha i jeē ní jeti niñī ñayuu ndoo ní jín ñáyuu ní canacani jnūhun ní. Te vijna chi ni sáha ní jéé cájhi i niñī, chi ñayuu casáha jniñu néé cácuu i, jeē cánuú ndoho i súcuan.

⁷ Te ni jini sōho ri jeē cahán inga nde nuū altar:

Tátā Yaā Dios, maá ní cúu jeē jnī ndihī poder. Te jniñu váha jniñu ndaā ni sáha ní jéé ní ndonda ní siquī cuéchi i. Achí.

⁸ Te ndajéhé cuūn ni jeti ya cohō yā siquī níāndii, te ni jéhe Yaā Dios jnūhun jeē ndujíhní ndasí níāndii návāha cayū ñayuu. ⁹ Te xeēn ndasí ní cayū tāca ñáyuu. Te vésú súcuan te tu ní canacani ni i stóo i cuéchi i, ni tu ní cacahān i jeē kujéhnú Yaā Dios. Chí

sa suhva ni cacahān ndevāha i siquī yā jeē ni jéhe ya tācá castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quiti xéén jniñu. Te ni cunee ní cáhnu nuū ndácu tī jniñu. Te cánacayīhi ñáyuu yuhu i jeē cájetū ndasí i. ¹¹ Te vésú súcuan te tu ní canacani ni i stóo i jniñu néé cásáha i. Chí sa ni cacahān ndevāha i siquī Yaā Dios andiví siquī jeē cájetū ndasí i jín ndíhyi xeēn cándoho i.

¹² Te ndajéhé iñū ni jeti ya cohō yā siquī yúte cáhnu jeē naní Eufrates. Te ni ichi ndihī ndute yúte ún, návāha nune ìn ichi jeē quíjicoo tāca rey ichi núu cáne niāndii.

¹³ Te ni jito ri jeē ini yuhu coō cáhnu jín ini yuhu quiti xéén jín ini yuhu máá téé nácani jnūhun stáhú ní canecoo unī tachī jeē cáa nájnūhun sáhvá. ¹⁴ Te tachī ún chi ndajéhé jexeén cácuu, te cásáha jniñu jéhnú jeē náā ni ñayuu cájito i. Te ni quendacoo tachī un jéé nastútú tāca rey ní cáhnu ñayīví, jéé cuajnáhan de siquī Yaā Dios quiví jeē ndíji ya. Te máá yá cúu jeē jnī ndihī poder. ¹⁵ Cuni sōho jínáhan ró, chi sanaa ni rō te ndiji ri, nájnūhun jeē ìn sanaa-ni te quíji ñacuīhná. Te nacā jeē ndetū ñayuu jeē ndito ni i, te ndíto yúcún i sahma i, návāha ma cáca vichí lí i, cúu jeē tú na cuéchi coo siquī i jeē cucanu i nuū tāca ñáyuu, achí yá. ¹⁶ Te ni canastútú táchī un táca rey, ni candutútú ìn

lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tachí. Te ini templo andiví jíin núū mesa nuū ndácu ya jniñu, ni cane ñn jnūhun jeē ni cáhān jee:

Je ni jīnu, áchí.

¹⁸ Yūcuán na te ni ndindēé taja, te nñin, te cáhān taja, te ni jnáa ndasí. Chi nde ní cáni jeē iyó ñáyuu ñayívi, tu ní jnáa nñin ndasí nájñūhun jeē ni jnáa ni jito ri. ¹⁹ Te máá ñuu cujéhnū Jerusalén, ni cusñin ni nduu unī parte, te ní cáhnu ñayívi ni naa tācā ñuu. Te ñuu teyí Babilonia, chi ní sáha nahín yá jeē ní ndutahū i castigo xeēn, chi ni quití ndasí ni yā siquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándiví ní cuun ñíñí náhnū siquī ñayuu, jeē véyi nde uū xico kilo. Te ni cacahān ndevāha ñayuu siquī Yaā Dios jeē ní cuun ndasí ñíñí, chi ñn jnūndóho xeēn ni cuu.

Jeē ndonda ya siquī ñuu neé Babilonia

17

¹ Yūcuán na te ni quiiji ñn jnáhan ndihúxá ndajéhé jeē ní candāhá ndihúxá cohō ún, te ni cahān yā jíin rí:

Nehen, te na stéén rī nuū rō ndese coo castigo siquī maá ñahan jnéni jeē cúu ñuu cujéhnū íne nuū iyó cuéhē ndute. ² Chi tāca rey ñayívi nájñūhun ni casíquí ndēé de jíin ñahan ún, cúu jeē ní castóo de Yaā Dios te cándiquīn de jnūhun néé ní steén ña. Te

ni sáha ña jeē ñáyuu ní cáhnu ñayívi, nájñūhun nájñi i te casíquí ndēé i Yaā Dios cúu jeē ní castóo i ya te casáha ndasí i cuéchi. Achí ndajéhé yā.

³ Te ni sáha ga Espíritu Santo jeē ní jito ndijin rī, te ndajéhé yā un cuáhān yā jíin rí nde nuū ñūhun téhé. Te ni jito ri ñn ñahan, yósó ña ñn quití xéén cacuéhé. Te ní cáhnu ti ndeé jnūhun néé jéé quití ni Yaā Dios sáha. Te iyó úxā xinī tī jíin úxī ndiqui ti. ⁴ Te ñahan un ñūhun ña sahma ndihí jíin sahma cuehé, te suni ñūhun ña siquī oro jíin yúu luu jíin perla jeē ndeé yahu. Te ndáhá ña ñn cohō oro jeē ñūhun chitú jíin jniñu néé ndasí jíin jniñu jnehén jéé jíca jnéni ña. ⁵ Te jneé ña ndeé ñn síhví jéé cúu ñn jnūhun sáhi, te suhva cáhān: Yāha cúu ñuu teyí Babilonia, jeē cúu nájñūhun náná tāca jéé cájica jnéni jíin jéé casáha néé ndasí ini ñayívi, áchí. ⁶ Yūcuán na te ni jini rī jeē ñahan un nájñi ña jeē nájñūhun ni jihí ña niñí ñayuu maá Yaā Dios jíin níñí ñayuu ni cajihí siquī jeē ní canacani ndaā i jnūhun Jesús. Te nahán ní naa ni rī ni jito ri ña. ⁷ Yūcuán na te ni cahān ndajéhé un jíin rí:

¿Naun náā ni rō jito ró? Na cástūhun rí nuū rō ndese cúni cahān jnūhun sáhi siquī ñahan un jíin quití xéén yósó ña, jeē iyó úxā xinī tī jíin úxī ndiqui ti. ⁸ Quití xéén jeē ní jito ró, chi ni cotecu tī, te vijna chi tuá tī. Te ndenda tucu ti ini tūhnchi cúnú, te yūcuán na te quihñ tī nuū jnahnú ndetū tī. Te ñayuu

cáyūcu ní cáhnu ñayīví, naa ni i coto i nuū quíti un jeē ní cotecu tī te ni jihī tī, te natecu tucu ti. Te cácuu i ñayuu jeē tu yósó síhví i nuū tútu jeē yosó síhví ñayuu cotecu ní cáni jeē ni jécósō síhví i nde quiví ni jécōo ñayīví.

9 Tāca ñayuu jécūhun vāha ni, cuu tava i cuenta ndese cúu: Ndihúxá xinī tī cácuu nájñūhun uxā yucu nuū néne ñahan ún. 10 Te ndihúxá xinī tī suni cácuu nájñūhun uxā rey. Te uhūn rey un je ni naa jeē ndácu de jniñu, te ñn de ndácu jniñu vijna, te ñnga de chi ná tu quiji de. Te núu na quiji de te jecu-ni tiempo coo de. 11 Te quiti xéén jeē ní cotecu te tuá iyó tí vijna, máá tí cuu rey unā. Te ñn jnáhan ndihúxá rey un cúu ti. Te suni quihīn tī nuū jnahnú ndetū tī.

12 Te ndihúxí ndiqui jeē ní jito ró cúu nájñūhun uxī rey, te ná tu ndacu de jniñu jíjnáhan de. Te máá de jíjn quiti xéén un, chi nihīn jniñu de cuu de rey jecu-ni tiempo. 13 Te ndihúxí rey un chi squíjnáhan de jñūhun, te nacuāha de poder de jíjn jniñu ndíso de nuū quiti xéén un návāha ndacu tī jniñu. 14 Te cuajnáhan de jíjn Yaā cúu Londe. Te Yaā cúu Londe quende yā poder de jíjnáhan de. Chi máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhīn jíjn yá, chi ni nacāji Yaā Dios i te ni cana ya i, te cásquícu vāha i. Achí ndajéhé un.

15 Te ni cahān gā yā:

Cuehē ndute jeē ní jito ró nuū néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. 16 Te ndihúxí ndiqui jeē ní jito ró jeē névāha quiti xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. 17 Chi Yaā Dios scānda ya ñni de jeē na sáha de jniñu cúní yā. Te squíjnáhan de jñūhun jeē nacuāha de jniñu ndíso de nuū quiti xéén un, ndacu tī jniñu nde na squícu tāca jnúhun ni cahān Yaā Dios. 18 Te ñahan jeē ní jito ró cúu máá ñuu teyí jeē cujéhu nuū tāca rey ñayīví. Achí ndajéhé un.

Siqui jeē naa ñuu Babilonia

18

1 Yūcuán na te ni jito ri jeē ní cuun ñnga ndajéhé yā ni quiji ichi ándiví. Te cújéhu ndasí yá. Te jeē ndíndēe yá te ni ndíndēe núu ñayīví. 2 Te ni cana jee ya:

Je ni naa ñi ñuu teyí Babilonia. Te ni nduu vehe tāca táchī, nuū ññūhun ndínuū tachī neé, jíjn tāca téji, quiti quíni jeē tu nújnahan ni yō. 3 Chi ñuu un cúu nájñūhun ñn ñahan ndevāha, te ni sáha ña jeē ñayuu tācá nación, nájñūhun nájñi i te cásiquí ndēe i Yaā Dios, cúu jeē ní castóo i ya te cásáha ndasí i cuēchi. Te tāca rey ñayīví, nájñūhun ni casíquí ndēe de jíjn ñahan ún jeē ní cajetáhú de jñūhun néé ní steén ña. Te ñayuu ní ñayīví

jeē cájeen cáxícó, ní cacucúca i jín cuéhē jeneē jeē ní nevāha ña.

⁴ Yūcuán na te ni jini sōho ri inga jnūhun jeē ni cáhān ichi andiví:

Máá ró jeē cácuu ró ñayuu maá rí, quendacoo ró ini ñuu jñā, návāha ma quívi nduu rō jín táca cuéchi jeē sáha ña, te návāha ma ndóho ró jnúndóho xeēn jeē ndoho ña. ⁵ Chi ni cayā cuehē ndasí cuéchi ña, nájñūhun ñn montón cáhnu ndasí jéē ní cusúcún ndé andiví. Te vijna te nduxeēn Yaā Dios siquī cuéchi ña.

⁶ Stóho ró ña nájñūhun ni sáha ña jeē ní ndoho sava ga ñayuu. Te nachunaa rō nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquī ña vésú jeē ni sáha ña siquī inga ñayuu. ⁷ Te yōhyo ni satéyí ña máá ña, te cucá ndasí ní cotecu ña. Te suni jín cúhva yúcuan nacuāha ró jéē ndóho xeēn ndasí ña. Chi jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuíti jnúndóho ndoho ri, achí ña. ⁸ Jeē yúcuan cúu jeē ñn quívi-ni te quíji cuehē jnúndóho siquī ña. Chi cuu ndīyí, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jítoho yō Yaā Dios, Yaā ní ndonda siquī cuéchi ña, áchí.

⁹ Te tāca rey ñayīvi jéē ní casiquí ndéē de jín ña te ni cotecu cucá ndasí de jín ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jicá de

chi yūhú de coto de jeē súcuan ndoho ña castigo. Te cahān de jijnáhan de:

Nacā jeē xeēn ndóho ró, ñuu cujéhnu Babilonia, chi yá-ni ñuu teyí ní cuu ró núú. Te vijna chi ñn núnúu-ni te ni quee castigo jeē náā rō, achi de jijnáhan de.

¹¹ Te tāca téē ñayīvi jéē cájeen cáxícó ñuu ún, ndahyū de te ndahyū cohó de jehē. Chi tuá ndé ñn cuaan ndajniñu cáxícó de. ¹² Te ndajniñu cáxícó de un cúu oro, plata, yuū luu jín perla jeē ndeé yahu, jín sahma fino jín sahma seda jeē ndihí jín jéē cuehé. Te suni tāca yujnu jeē asñ jéen xicō, jín táca ndajniñu luu jeē ni sáha jín marfil jín yujnu lúu jeē ndeé yahu jín cáa cuaán jín cáa hierro jín yúu cuijín luu. ¹³ Te suni cáxícó de canela jín táca jíhyo asñ jín súje cutú jín súje uvuā jín táca perfume jín vino jín aceite jín harina fina jín trigo. Te suni cáxícó de quití ndiso jín lanchi jín caballo jín carreta, te nde ñayuu cáxícó de jeē sájniñu sáa-ni i. ¹⁴ Te cahān de jín ñuu ún:

Ni cujiyo ndihi ndajniñu cucá jeē ní nujnahan ndasí ni rō. Te tāca jéē lúu jeē váha jeē ní cotecu cucá ró, chi ni naa ndihi, te ma nánihñ cuíti gā rō, achi de jijnáhan de.

¹⁵ Te tāca téē ni cajeen ni caxico ní cacucúca jéē siquí ndajniñu ñuu ún, chi cuiñi jicá de jeē yūhú de coto de castigo coo ñuu ún. Te ndahyū de te

ndahyū cohó de. ¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun iin ñahan jeē ni ñūhun sahma fino, sahma ndihí jíin jéē cuehé. Te ni ñuhun ña siquī oro jíin yūu luu jíin perla jeē ndeé yahu. ¹⁷ Te vijna te iin núnúu-ni te ni naa ndihí tācá ndajniñu váha ún, achi de jíjnáhan de.

Te cuiñi jíca táca téē cásacáca barco, jíin ñayuu cuángoo nuū barco, jíin téē cásájniñu ini barco, jíin táca gá téē cásájniñu nuū mar. ¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhnu nájnūhun ni íyo ñuu yáha? achi de.

¹⁹ Te cosō de ticachā ñuhun xinī de jeē cācucuíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñu cúca jeē ni íyo ñuu un ní cacucúca táca ñayuu cánevāha barco cájica nuū mar. Te vijna te iin núnúu-ni te ni naa ndihí-ni, achi de.

²⁰ Te na cúsiñi ni táca róhó jéē cāyúcú andiví, siquī jee ní naa ñuu ún. Te na cúsiñi ni rohó, táca téē apóstol, jíin téē canacani jnūhun Yaā Dios, jíin ñayuu maá Yaā Dios. Chi ni sáha néé ñuu un síquī rō jíjnáhan ró, te jeē yúcuan ní ndonda Yaā Dios siquī, achi de.

²¹ Yūcuán na te iin ndajéhé ndíso poder, ni quihin ya iin yuū cáhnu nájnūhun iin yōso

cáhnu, te ni scáne ya ini mar. Te ni cahān yā:

Nájnūhun ni naa yōso yáha, suni súcuan naa Babilonia, ñuu cujéhnu téyí. Te ma núcoo cuiti gā jeē cóto yó núu. ²² Te ni cahān yā jíin ñuu ún: Ini calle rō ma cúni sōho cuiti gā ñayuu jeē scáta i yaa arpa jíin flauta jíin trompeta. Te suni ma cóo cuiti gā ñayuu casáha tācá ndajniñu. Te suni ma cúni sōho ga i jeē ñhin tācá molino rō. ²³ Te ni iin lámpara ma sáha ga jeē cúndijin nuū rō. Te ni ma cúni sōho ga i vico jeē cācusiñi ni ñahan téē nándāha mēhñu rō. Te ñayuu ní cajeen ni caxícó nuū rō, ni cacujéhnu ndasí i ini ñayiví. Te ni stahú ró ñayuu tācá nación jíin jniñu tasí jíin jniñu mágica. Achí ndajéhé un.

²⁴ Te ñuu un ní nihin castigo xeēn, chi siquī ñuu un ndeé cuéchi jeē ní jeti niñí tāca téē ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i ní cáhnu ñayiví.

19

¹ Te ná ni cuu táca jéē yáha, te ni jini sōho ri jeē cahán jee cuehé ndasí ñayuu ini andiví: Yōhyo cújéhnu Yaā Dios. Chi Yaā Dios maá yó cúu jeē ní jnama yóhó.

Te máá yá cujéhnu ndasí, te máá yá jniñi ndihí poder.

² Te ndaā te váha sándaā yā táca jniñu,

chi ni ndonda ya siquī cuéchi ñuu neé cújéhnu ún.

Chi ni stívi un ñáyuu ní
cáhnú ñayīvi jíin jnúhun
cásíquí ndēē Yaā Dios.

Te ni sáha ya jeē ní ndu-
tahū ñuu un síquī jeē ní
jehni tāca mozo yā.

Achí i jíináhan i.

³ Te ni cacahān tucu i:

Yōhoyo cújéhnú ya. Chi ní
cáni canda ñuhmā ñuu un jée
cayú, achí.

⁴ Te ndihóco cuūn tēe jéhnú
cándiso jniñú, jíin ndicúún jeē
técu, ni cajecuiñī yití de, te ni
cachiñúhún de Yaā Dios, Yaā
néne nuū mesa ndácu jniñú.
Te ni cacahān:

Amén. Súcuan na cóo. Yōhoyo
cújéhnú ya.

⁵ Te nde nuū mesa nuū
ndácu ya jniñú ni cahān ñn
jnūhun:

Róhó jée cájejniñú nuū Yaā
Dios,
jíin róhó jée cándiso īyo nuū
yā,

jeē cácujehnú jíin jée tu
cácujehnú,
na cáhán rō jeē yóhoyo vāha
Yaā cúu ya.

Achí.

*Vico jeē nándāha Yaā cúu
Londe*

⁶ Te ni jini sōho ri jeē
cácahān ñayuu cuehē ndasí,
te níhin nájnūhun níhin cuehē
yūte, te nájnūhun jeē cahán
níhin taja. Te ni cacahān:

Yōhoyo cújéhnú ya. Chi Jitoho
yō Yaā Dios, Yaā jniñ
ndihí poder,

vijna te ndácu níhin ya jniñú.

⁷ Te na cúsiñ ni yō, te siñ ndasí
na cóo ni yō,

te na cáhán yō jeē yóhoyo
cújéhnú ya.

Chi ni quee quivī jeē nándāha
máá Yaā cúu Londe.

Te je iyó túhva ñahan nándāha
jíin yá, te suu cúu ñayuu
máá Yaā Dios.

⁸ Te ni nihīn ña jnúhun cuhun
ña sahma fino jeē ndóo
ndasí te xíñú.

Achí i jíináhan i. Te sahma
fino un cúu tācá jniñú ndaā
jeē casáha ñayuu máá Yaā
Dios.

⁹ Te ni cahān ndajéhé yā jíin
rí:

Tee ró jnúhun yáha: Nacā
jeē ndetū tāca ñáyuu jeē
ní cana ya quingoo vico
nándāha Yaā cúu Londe.

Te ni cahān gā ndajéhé un
jíin rí:

Tāca jnúhun yáha cúu
jnūhun ndaā ni cahān Yaā
Dios, achí yá.

¹⁰ Te ni jecuiñī yití rí nuū
jehé ndajéhé un jée chiñúhún
rí yā nuú. Te ni cahān yā jíin
rí:

Ma sáha ró súcuan. Chi
ruhū suni mozo Yaā Dios cúu
rí, nájnūhun máá ró jíin tāca
hermano rō jeē cácañíje vāha
jnūhun Jesús. Sa suhva nuū
máá Yaā Dios chiñúhún ró.
Achí yá.

Chi jnūhun síquī Jesús
cúu jeē cácahān ndaā ñayuu
cánacani jnūhun Yaā Dios.

*Yaā yosó síquī caballo
cuijín*

¹¹ Yūcuán na te ni jito ri
jeē núne andiví. Te ni cane
ñn caballo cuijín, te Yaā yosó
síquī tī naní yá Yaā ndaā, Yaā
squícu, chi squícu ya jeē ni
jéjnūhun ya. Te ndaā sándaā
yā jniñú te ndaā ndónda
ya síquī tāca jéneé. ¹² Te

tinūu yá ndíndēe nájñuhun yáñuhūn. Te xinī yā ñuhun cuehē corona. Te yósó ñn síhví yá jeē maá-ni ya cúu jeē jiní. ¹³ Te ñuhun ya ñn sahma jeē ni ñúndaji nuū ñíñí, te nání yá Jñuhun Yaā Dios. ¹⁴ Te tācá ndajéhé yā jeē iyó andiví, cáyosō caballo cuijín, cándiquñ yatā yā. Te cáñuhun sahma fino cuijín iyó ndoo. ¹⁵ Te ini yuhu máá Yaā jeē yosó síquī caballo, quénda jeē cáa nájñuhun ñn espada xeēn. Te espada un cúu jñuhun ya jeē stóho ya ñayuu tācá nación. Te ñihin ndacu ya jñiñu nuū i. Te sándaā yā síquī cuéchi i nájñuhun jeē jeñú síquī ndehē uva cájexñ. Te cuāha ya castigo xeēn ndoho i jeē quití ni yā síquī cuéchi i. Chi máá yá jñí ndihí poder. ¹⁶ Te sahma ya jín síhin ya yosó jñuhun yáha: Rey nuū tāca rey jín Jítoho nuū tāca jítoho, áchí.

¹⁷ Yūcuán na te ni jito ri ñn ndajéhé yā jeē ín nuū níandii. Te ni cana jee ya xinī tācá quití ndáva nuū tachí:

Ndutútú ró quijicoo ró cuxíni ró ñn vico cáhnu sáha Yaā Dios. ¹⁸ Te caji rō cūñu tāca rey jín capitán jín téé téyí, jín cūñu tācá caballo jín téé ni cayosō síquī tī. Te suni caji rō cūñu tāca gá ñayuu, cúu ñayuu casáñiñu cuenta maá jín mozo jeē ní cajeen ñayuu, cúu ñayuu cácujeñu jín ñayuu tu cácujeñu. Achí ndajéhé yā.

¹⁹ Yūcuán na te ni jito ri maá quití xeēn jín tāca rey ñayiví jín cuéhē soldado de. Te ni candutútú de jeē cuajñahan

de jín máá Yaā yosó caballo jín tāca ndajéhé yā. ²⁰ Te ni jñí ya quití xeēn cuahān tī preso jín téé ni nacani jñuhun stáhú jeē ni sáha tācá jñiñu jeñu jeē ní jito jínúu quití xeēn. Chi jín jñiñu jeñu un cúu jeē ni stáhú de tāca ñayuu jeē ní cajēhe jñuhun condiso jñuní quití xeēn, jín jéé ní cachiñuhūn imagen tī. Te quití xeēn un jín téé ni nacani jñuhun stáhú un, cátecu ndíndúú te ni scáne ya nuū laguna ñuhūn jeē cayú jín azufre. ²¹ Te jín espada jeē cáne yuhu Yaā yosó caballo ni cajihí tācá soldado quití xeēn un. Te tācá quití ndáva nuū tachí ni candutú chíji tī ni cayejí tī cūñu de jíñáhan de.

Siquí mil cuiyā

20

¹ Te ni jito ri jeē ní cuun ñn ndajéhé yā ichi ándiví. Te ndáhá yá ndacáa jeē núne tñhñchi cúnú ndasí. Te suni ndáhá yá ñn cadena cáhnu. ² Te ni jñí ya maá cóo cáhnu jeē iyó ndé jenahán ndasí, te nání tī jexeēn jín Satanás. Te ni jihni yā jeē conuhñí mil cuiyā. ³ Te ni scáne ya ini tñhñchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñayuu tācá nación, chi nde na jínu mil cuiyā. Te jeē yáha mil cuiyā ún, yūcuán na te cánuú jéé ndají caca cuu jecu na tiempo.

⁴ Te ni jito ri tāca mesa nuū ndácu jñiñu, te yūcuan cáyūcu

táca ñáyuu jeē ní canihīn jniñu i sándaā i jniñu. Te suni ni jito ri anuá táca ñáyuu jeē ní cajehnde xinī i siquī jeē ní canacani i jnūhun Jesús jíin jnúhun Yaā Dios. Te tu ní cáchiñúhún i quitī xéén jíin imagen tī, ni tu ní cájēhe i jnūhun jeē cóndee jnuni tī jneē i chí ndaha i. Te ni jito ri jeē ní natecu i te ni candacu i jniñu jíin Cristo mil cuiyā. ⁵ Yāha cúu ndīyi jeē nátecu xīhna gā. Te táca gá ndīyi, tu ní cánatecu i, chí nde jeē jínu mil cuiyā. ⁶ Te nacā jeē ndetū táca ñáyuu ndoo ánuá jeē nátecu xīhna gā. Chí ma cúu cuiṭi i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷ Te jeē jínu mil cuiyā ún, te ndajī Satanás te quenda nuū yíndihyū. ⁸ Te stáhú tucu ñayuu táca nación ní cáhnu ñayīví. Te stáhú ñayuu ñuu Gog jíin Magog. Te sáha jeē ndutútú táca soldado ñuu un jéé cuajnáhan de. Te coo cuehē ndasí de nájñūhun ñīṭi yumar. ⁹ Te cuiṭe núu de quingoo de ní cáhnu ñayīví. Te cuicó ndúu de ñuu nuū cáyūcu ñáyuu maá Yaā Dios, ñuu jeē maní yā jíin. Te Yaā Dios chí scúun ya ñuhūn ichi ándiví, te cayū ndihi de. ¹⁰ Te jexeén jeē ní stáhú táca ñáyuu ún, chí scáne ya quihīn nuū laguna ñuhūn jeē cayú jíin azufre. Te yūcuán chí xīhna gā ní scáne ya quitī xéén jíin téé ní nacani jnūhun stáhú. Te yūcuán ndoho nduú ñuú ní cáni cuiṭi.

Jeē sándaā yā jniñu nuū mesa cuijín

¹¹ Yūcuán na te ni jito ri ñin mesa cuijín cáhnu, te néne maá Yaā ndácu jniñu. Te ñayīví jíin andiví ní ndoñúhún cuáhān jeē ní jito ya nuū, chí tuá ní cúu quendōo nuū yā. ¹² Te ni jito ri táca ndīyi, jeē ní cujéhnu jíin jéé tu ní cujéhnu, cáhīn nuū Yaā Dios. Te ní sáha ya jeē núne táca libro, te suni ni nune inga libro jeē yosó sīhví ñáyuu cotecu ní cáni. Te ni sándaā yā siquī táca ndīyi ún, núu ndese jniñu ní casáha i jíin ndese yosó núu táca libro un. ¹³ Te táca ndīyi jeē ní cajihī nuū mar, ní nanecoo. Te suni ní nanecoo táca ndīyi jeē ní cajihī i, jeē íne i maá lugar nuū cáyūcu ánuá ndīyi. Te ní sándaā yā siquī, núu ndese ní casáha ñin ñin i. ¹⁴ Yūcuán na te cuehyī jéhni ñayuu jíin lugar nuū cáyūcu ánuá ndīyi, ní snāā yā ní scáne ya cuango nuū laguna ñuhūn. Te jeē ndóho ñayuu nuū laguna ñuhūn, yūcuan cúu jeē cúu i vuelta uū. ¹⁵ Te yūcuan ní scáne ya táca ñáyuu ní casáha jniñu néé jéé tu yosó sīhví i nuū libro jeē yosó sīhví ñayuu cotecu ní cáni.

Andiví jéé jíin ñáyīví jéé

21

¹ Yūcuán na te ni jito ri andiví jéé jíin ñáyīví jéé. Chí andiví jíin ñáyīví xīhna ñuhūn ní naa. Te suni tuá mar. ² Te ruhū Juan, ní jito ri ñuu íi jeē cúu Jerusalén jeé. Te ñuu un ní cuun vēji ichi ándiví núu

néne Yaā Dios. Te ñuu ún luu cáa nájñuhun ññ ñahan jeē ni sātūhva ña ni cucutú ña jeē nándāha ña jíin yñ ña. ³ Te ni jíin sōho ri ññ jñuhun jeē ni cáhān jee ichi ándiví:

Condēhé, chi vijna te ndée Yaā Dios mēhñu ñáyuu. Te condee yā jíin i jíināhan i, te cuu i ñayuu maá yá. Te maá yá condee yā jíin i jeē cúu ya Yaā Dios i. ⁴ Te nacuaa yā ndute tñnúú i jíināhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jñúndóho jeē ni íyo, áchí.

⁵ Yūcuán na te ni cahān maá Yaā néne nuū mesa:

Condēhé, chi nasáha jeé rí tāca jéē iyó, áchí yá.

Te suni ni cahān yā:

Tee ró jñuhun yáha. Chi tāca jñuhun yáha cúu jñuhun jeē jíiní ndije ró jéē ndaā cúu.

⁶ Te ni cahān gā yā:

Je ni jíinu. Máá rí cúu nájñuhun letra A xīhna ñúhún jíin letra Z jeē sándihí na, chi máá rí ni squeejéé ndihi te máá rí sínu. Te tāca ñayuu cájichí, súcuan-ni cuāha ri coho i ndute cáne jeē cótecu i ní cáni. ⁷ Tāca ñáyuu jeē cúndeyí síquī jéneé, nihñ i ndihi jeē yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeē cáyūhú ndoho síquī jñuhun ri, jíin ñáyuu tu cácandíje, jíin ñáyuu casáha jññu néé, jíin ñáyuu cájehni ndíyi, jíin ñáyuu cájica jñení, jíin ñáyuu casáha tásí, jíin ñáyuu cáchiñúhún ídolo, jíin tāca ñáyuu castáhú, ñayuu ún chi quívicoo i laguna

ñuhūn jeē cayú jíin azufre. Te yūcuan cúu jeē cúu i vuelta uū.

Jerusalén jeē

⁹ Yūcuán na te ni quiji ññ jñahan ndihúxá ndajéhé jeē ní candāhá ndihúxá cohō jeē ni ñuhun chitú ndihúxá jñúndóho sandihí. Te ni cahān yā jíin rí:

Nehen, te na stéén rī nuū rō ñahan jeē nándāha ña cuu ña ñasihí Yaā cúu Londe, áchí yá.

¹⁰ Te ni sáha ga Espíritu Santo jeē ní jito ndijin rī, te ndajéhé un ní jeca ya ruhū cuahān yā jíin rí xiní ññ yucu cáhnu súcún. Te ni steén yā nuū rī maá ñuu ií cujéhnu jeē cúu Jerusalén, te ni cuun vēji nde andiví núu néne Yaā Dios. ¹¹ Te ndíndēé ndasí ñuu un nájñuhun ndíndēé Yaā Dios. Te xíñú nájñuhun xíñú ññ yuū luu jeē ndeé yahu ndasí, nájñuhun yuū cuijín jeē quiyí nájñuhun vidrio. ¹² Te yuhu ñúu un ní jicó ndúu ññ jeē cáhnu súcún ndíhyú ñuu ún. Te íyo úxí uū yehyí. Te tāca yéhyí un íin ññ ndajéhé yā. Te tāca yéhyí un yósó síhví ndihúxí uū yucūn Israel. ¹³ Te lado nuū cáne niāndii iyó úní yehyí. Te lado norte suni íyo úní yehyí. Te lado sur suni íyo úní yehyí. Te lado nuū quée niāndii suni íyo úní yehyí. ¹⁴ Te íyo úxí uū yuū náhnu jeē cúu cimientto maá jéē ndihyú ñuu ún. Te tāca yúu un yósó síhví ndihúxí uū apóstol maá Yaā cúu Londe.

¹⁵ Te ndajéhé jeē ni cahān jíin rí, ndáhá yá ññ yujnu oro jeē chícuāha yá ñuu un jíin

táca yéhyí jíin máá jéē ndihyú ñuu ún. ¹⁶ Te ñuu ún chí ñn cūhva-ni cúu ndicúun lado. Chí jeē cáni jíin jéē jité, ñnuú-ni cúu. Te ndajéhé un ní chucuāha yá ñuu un jíin yujnu ún. Te née uū mil uū ciento kilómetro jeē ñn ñn lado. Te ñnuú-ni cūhva jeē cáni, jeē sucún, jíin jéē jité. ¹⁷ Te suni ni chucuāha yá maá jéē ndihyú ñuu ún, te née unī xico cuūn metro jeē sucún. Te yūcuan cúu cūhva jejníñu ñayuu, jeē suni jéjníñu ndajéhé un.

¹⁸ Te máá jéē ndihyú ñuu un ní cuvāha jíin yūu cuijín quiyi. Te ñuu ún chí máá nene oro cúu, te cáa nájñūhun vidrio quiyi. ¹⁹ Te tāca yūu jeē cúu cimientu maá jéē ndihyú ñuu ún, ní cucutú jíin ndinuū yūu luu jeē ndeé yahu. Yuū ñn cúu yūu cuijín quiyi. Te jeē uú cúu yūu ndeé ndíí. Te jeē uní cúu yūu pinto. Te jeē cuún cúu yūu cuí ndíí. ²⁰ Te jeē uhún cúu yūu pinto jeē ñūhun raya. Te jeē iñú cúu yūu cuehé pinto. Te jeē uxá cúu yūu cuaán quiyi. Te jeē uná cúu yūu cuí ndeé. Te jeē ñn cúu yūu cuaán ndíí. Te jeē uxí cúu yūu cuí cuijín. Te jeē uxí ñn cúu yūu cuehé cuáán. Te jeē uxí uū cúu yūu ndihí ndíí. ²¹ Te ndihúxí uū yehyí un cácuu uxí uū perla jeē ndeé yahu. Te ñn ñn yéhyí cúu ñn ñn perla. Te máá nene oro cúu calle cáhnu ñuu ún, te quiyi nájñūhun vidrio.

²² Te tú na templo ni jíto ri ini ñuu ún, chí ñí cáhnu ñuu un ndeé máá Jítoho yō, Yaā jñí ndihí poder, jíin Yaā cúu

Londe. ²³ Te ñuu ún tu jíni ñūhún cundijin jíin luz niāndii jíin yōō. Chí jeē ndíndēe máá Yaā Dios cúu jeē cundijin ñuu ún. Te luz ñuu un cúu máá Yaā cúu Londe. ²⁴ Te ñayuu tācá nación ñayīvī jéē ní jnama ya, caca i jeē cundijin luz ñuu un núu i. Te tāca rey ñayīvī quijicoo de ñuu ún, quindeca de tācá ndajñíñu jeē ndeé yahu jíin jéē cujéhnu de sáha. ²⁵ Te tāca yéhyí ñuu ún ma cóndihyū cuiti nduú, chí tú na jecuáa coo. ²⁶ Te ini ñuu ún quijicoo ñayuu tācá nación, quindeca i tācá ndajñíñu jeē ndeé yahu jíin jéē cujéhnu i sáha. ²⁷ Te ma quívicoo cuiti ni ñn jeē jnehén. Ni ma quívicoo ñayuu casáha jñiñu née jíin jéē castáhú. Chí quívicoo máni máá ñayuu jeē yosó síhvī i nuū libro jeē yosó síhvī ñayuu cotecu ñí cáni, jeē névāha Yaā cúu Londe.

22

¹ Yūcuán na te ndajéhé yā ni steén yā nuū rī ñn yūte íyó ndoo. Te ndute un sáha jeē cótecu yō ñí cáni. Te xíñú nájñūhun vidrio, te cáne nuū mesa nuū ndácu Yaā Dios jñiñu jíin Yaā cúu Londe. ² Te jíca yūte ún sava mēhñu calle cáhnu ñuu ún. Te ndíndúu lado yuyūte un yíhi yujnu jeē cótecu yō ñí cáni sáha. Te yujnu un jéhe ndehē uxí uū jínu jeē ñn cuiyā, chí tāca yōō cúun ndehē. Te ndaha yúcu i cúu tajnā jeē ndúvāha ñayuu tācá nación. ³ Te tācá-ni jeē ni cáhān yā jeē násūu jéē váha cúu, ma cóo ini ñuu ún. Te ini

ñuu ún cuiñi máá mesa nuū ndácu Yaā Dios jniñu jíin Yaā cúu Londe. Te ñayuu cácadíje jeē cácuu i mozo yā, chiñúhún i ya. ⁴ Te coto i nuū yā, te condee síhví yá jneē i. ⁵ Te ma cóo ga jecuáa ñuu ún. Te ñayuu cáyūcu yúcuau tuá jíni ñúhún i jeē cúndijin lámpara nuū i, ni jeē cúndijin niāndii. Chi jeē ndíndēe máá Jítoho yō Yaā Dios cúu jeē cúndijin nuū i. Te ndacu i jniñu ní cáni cuiti.

Jeē cuácuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíni ndije ró jéē ndaā cúu. Te Jítoho yō Yaā Dios, máá yá sáha jíin téé cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návāha stéén nuū ñáyuu cácuu mozo yā tācá jniñu jeē yachī coo.

⁷ Ndacā yachī rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuifí yití rí nuū jehé maá ndajéhé jeē ni stéén tācá jniñu yáha núu rí, jeē chiñúhún rí yā nuú. ⁹ Te ni cahān ndajéhé un jíin rí:

Ma sáha ró súcuau. Chi ruhū suni mozo Yaā Dios cúu rí, nájnūhun máá ró jíin tāca hermano rō jeē cánacani jnúhun ya, jíin ndihí ñayuu cájetáhú jnúhun yosó nuū tútu yáha.

Sa suhva nuū maá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró táca jnúhun Yaā Dios jeē yosó núu tútu yáha, chí je cuacuyajni tiempo jeē cúndaā ndihí. ¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuau. Te sa ñayuu casáha jniñu ndaā, na sáha ga i jniñu ndaā. Te ñayuu cáhīyo ndoo ánuá, na cáca ndoo ga i súcuau. Achí ndajéhé un.

¹² Jendaá jeē ndiji yachī rí, achí Jesús. Te quiji rí jíin táhū cuāha ri nuū ñayuu, núu ndese jniñu ni casáha i. ¹³ Máá rí cúu nájnūhun letra A xīhna ñúhún jíin letra Z jeē sándihí na, chí iyó rí nde xīhna ñúhún te coo rí ní cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chi cuu caji i ndehē yujnu jeē sáha jeē cótecu i ní cáni, te cuu quívicoo i yéhyí ñuu íi ún. ¹⁵ Te ichi fuera ñuu ún cuiñi ñayuu tu cácadíje, jíin ñáyuu casáha tásí, jíin ñáyuu cájica jnéni, jíin ñáyuu cájehni ndīyi, jíin ñáyuu cáchiñúhún ídolo, jíin ñáyuu cácusí ni stahú jnáhan.

¹⁶ Máá rúhū Jesús, ni tají rí ndajéhé rí návāha castūhun yá tāca jnúhun yáha nuū tāca grupo ñayuu cácadíje. Te máá rí ni sáha jeē ni iyo rey David, te ni quiji rí nuū yucún David. Te cúu rí nájnūhun

lucero ndíndēe cáne cúndijin.
Achí yá.

¹⁷ Te máá Espíritu Santo jíin máá ñahan jeē nándāha jíin Yaā cúu Londe, cácahān:

Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhán i:

Nehen, quívicoo ró ndaha ya.

Te tāca ñáyuu cájichī jeē cáconi i coho i, na quívicoo i ndaha ya, te súcuan-ni na cóho i ndute jeē cótecu i ní cáni sáha.

¹⁸ Te tāca ñáyuu jíni sōho jnūhun Yaā Dios jeē yosó núū tútu yáha, cáhán nihin ri jíin i: Núu ndé ñáyuu chisóó i nuū jnūhun cáhán tutu yáha, te

Yaā Dios chisóó yá jnūndóho cáhán tutu yáha, ndoho i. ¹⁹ Te núu ndé ñáyuu quende i jecu jnūhun cáhán tutu yáha, te Yaā Dios quende yā tahū i jeē yosó núū libro jeē yosó síhví ñáyuu cotecu ní cáni, te ma nihín i tahū i ini ñuu i ún. Te tutu yáha cúu jeē cahán siquī tācá un.

²⁰ Te Yaā jeē ni cáhān tāca jnūhun yáha, suhva cáhán yā:

Jendaá jeē ndiji yachī rī, achí yá.

Amén. Súcuan na cóo. Jitoho ná Jesús, jícan tahu na jéē ndíji yachī ní.

²¹ Te ñūhun ni rī jeē Jítoho yō Jesucristo na sáha ga yā jeē váha róhó jíjnāhan ró. Amén.